


भड्लाई बाइबलि



The Holy Bible in the Bhadrawahi Language (bhd) of India

भड्लाई बाइबिल

The Holy Bible in the Bhadrawahi Language (bhd) of India

Copyright © 2020 The Love Fellowship

Language: भद्रवाही (Bhadrawahi)

Contributor: The Love Fellowship

Read and download Bible and several other Christian materials in various formats :
www.freebiblesindia.in

This translation is made available to you under the terms of the Creative Commons Attribution Share-Alike license 4.0.

You have permission to share and redistribute this Bible translation in any format and to make reasonable revisions and adaptations of this translation, provided that:

You include the above copyright and source information.

If you make any changes to the text, you must indicate that you did so in a way that makes it clear that the original licensor is not necessarily endorsing your changes.

If you redistribute this text, you must distribute your contributions under the same license as the original.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

Note that in addition to the rules above, revising and adapting God's Word involves a great responsibility to be true to God's Word. See Revelation 22:18-19.

2023-04-06

PDF generated using Haiola and XeLaTeX on 26 Jul 2024 from source files dated 7 Apr 2023
7f6d55d1-b322-5b69-99bd-e0641d0d9871

Contents

| | |
|----------------------------|-----|
| मत्ती | 1 |
| मरकुस | 56 |
| लूका | 98 |
| यूहन्ना | 155 |
| प्ररितां | 196 |
| रोमियो | 247 |
| 1 कुरिन्थियों | 269 |
| 2 कुरिन्थियों | 292 |
| गलातियों | 306 |
| इफिसियों | 314 |
| फिलिप्पियों | 322 |
| कुलुस्सियों | 327 |
| 1 थिस्सलुनीकियों | 332 |
| 2 थिस्सलुनीकियों | 337 |
| 1 तीमुथियुस | 340 |
| 2 तीमुथियुस | 347 |
| तीतुस | 352 |
| फिलेमोन | 355 |
| इब्रानियों | 357 |
| याकूब | 374 |
| 1 पतरस | 380 |
| 2 पतरस | 387 |
| 1 यूहन्ना | 392 |
| 2 यूहन्ना | 398 |
| 3 यूहन्ना | 399 |
| यहूदा | 400 |
| प्रकाशित | 402 |

मत्ती

ॐॐॐॐ ॐॐॐॐॐॐ ॐॐॐॐॐॐ

(ॐॐॐॐ 3:23-38)

1 अब्राहमेरी औलादी मरां दाऊद राज्ञो थियो, दाऊद राज्ञेरी औलादी मरां यीशु मसीह थियो । यीशु मसीहेरे दादे-पडदादां केरां नंवां इना आन ।

2 अब्राहमेरू मट्टू इसहाक थियूं, इसहाकेरू याकूब, याकूबेरां मट्टां यहूदा ते तैसेरे दूला थियो ।

3 यहूदा ते तामारेरां मट्टां पेरेस ते जेरह थियां, पेरेसेरू मट्टू हेस्रोण, हेस्रोनेरू एराम,

4 ते एरामेरू अम्मीनादाब, अम्मीनादाबेरू नहशोन, नहशोनेरू सलमोन,

5 ते सलमोन ते तैसेरी कुआन्श राहाबेरू मट्टू बोआज थियूं, ते बोआज ते तैसेरी कुआन्श रूतरू ओबेद, ओबेदेरू यिशै,

6 ते यिशैरू मट्टू दाऊद राज्ञो थियो, दाऊद राज्ञेरू मट्टू सुलैमान तैस कुआन्शी सेइं पैदा भोव, जै पैदली ऊरिय्याहरी कुआन्श थी ।

7 सुलैमानेरू रहवाम, रहवामेरू अबिय्याह, अबिय्याहेरू आसा,

8 ते आसारू यहोशाफात, यहोशाफातेरू योराम, ते योरामेरे खानदानेरे मरां उज्जियाह पैदा भोव ।

9 उज्जियाह रू योताम, योतामेरू आहाज, आहाजेरू हिजकिय्याह,

10 ते हिजकिय्याहेरू मनशशे, मनशशेरू आमोन, आमोनेरू मट्टू योशिय्याह थियूं

11 ते योशिय्याहेरां पोदलडां यकुन्याह ते तैसेरे दूला थियो, जैना गिरफतार भोइतां बाबेलेरी गुलैमी मां गानेरे वक्ते मां जर्मोरां थियां ।

12 गिरफतार भोइतां बाबेलेरी गुलैमी मां गानेरे पत्ती यकुन्याहेरू शालतियेल ते शालतियेलेरू जरूबाबेल,

13 ते जरूबाबेलेरू अबीहूद, अबीहूदेरू एलयाकीम, एलयाकीमेरू अजोर,

14 ते अजोरेरू सादोक, सादोकेरू अखीम, अखीमेरू एलीहूद

15 ते एलीहूदेरू एलीआजर, एलीआजारेरू मत्तान, मत्तानेरू याकूब,

16 ते याकूबेरू यूसुफ, ते यूसुफ मरियमरो मुन्श थियो, ते मरियमरू मट्टू यीशु आए, जैस जो मसीह ज़ोतन ।

17 एन्चरे अब्राहमे करां दाऊद राज्ञे तगर च़ेवधे पीडी भोइ, ते दाऊद राज्ञे करां यहूदी केरे गिरफतार भोइतां बाबेलेरी गुलैमी मां गाने तगर च़ेवधे पीडी भोइ, ते गिरफतार भोइतां बाबेले मां गाने करां देइतां यीशु मसीह तगर च़ेवधे पीडी भोइ ।

ॐॐॐॐॐ ॐॐॐॐ

(ॐॐॐॐ 1:26-38; 2:1-7)

18 यीशु मसीहेरू ज़र्म एन्चरे सेइं भोवं, कि ज़ैखन तैसेरी अम्मा मरियमरी कुडमाइ यूसुफ नंवे एक्की मैन्हु सेइं भोरी थी, त तैन केरे इला भोने करां पेइले मरियम पवित्तर आत्मारै शेक्ति सेइं दोज्जीती भोइ ।

19 तैसारो मुन्श यूसुफ ज़ै धर्मी मैन्हु थियो, तै तैस वदनाम केरनि न थियो चातो । तैनी चुपच़ारे इन सोचू, कि मीं एस सेइं इला नई बनानो ।

20 हेजू ते एन सोचने लोरो थियो, त प्रभुएरे एक्की स्वर्गदूते तैस सेइं सुपने मां एइतां ज़ोवं, “हे यूसुफ! तू ज़ै दाऊदेरे खानदाने मरां आस, तू मरियम अपनि कुआन्श बनाने करां न डर, किजोकि ज़ैन तैसारै पेटे मां आए तैन पवित्तर आत्मारै तरफां आए ।

21 तैस मट्टू भोनूए, ते तू तैसेरू नवं ‘थीशु’ रेखां, किजोकि तैए अपने लोकन तैन केरे पापन करां मुक्ति देलो ।”

22 एन सब किछ् एल्हेरेलेइ भोवं, कि जैना वचन प्रभुए यशयाह नेबेरे जिरिये ज़ोरे थिये पूरे भोए कि,

23 “हेरा, अक अडलाई कुई पेटे भारी भोली, ते तैस अक मट्टू भोलू, ते लोक तैस जो इम्मानुएल जोले” जेसेरो मतलब ई आए, परमेशर असन सेइं साथी आए।

24 तैखन यूसुफ निडलारां बीडो त तैनी परमेशरेरे स्वर्गदूतेरू ज़ोनू मन्नु, ते मरियमी सेइं ड्ला वनाव ते अपने घरे आनी।

25 पन ज़ातगर तैस मट्टू न भोवं तांतगर तै तैस सेइं साथी न झुल्लो ते ज़ैखन तैस मट्टू भोवं त यूसुफे तैस मट्टेरू नवं यीशु रखवू।

2

एल्हेरेलेइ भोवं, कि जैना वचन प्रभुए यशयाह नेबेरे जिरिये ज़ोरे थिये पूरे भोए कि,

1 हेरोदेस राज़रे ज़माने मां ज़ेइस यहूदिया इलाकेरे बैतलहम नगर मां यीशु पैदा भोव, त पूर्वरां किछ् जोष्टी लोक यरूशलेम नगरे मां आए।

2 ते तैना लोकन पुच्छने लगगे, “यहूदी लोकां केरो राज़ो ज़ै ज़र्मोरोए तै कोडि आए? किजोकि असेईं पूरवे मां तैसेरो तारो लोरोए, ते आस तैस कां मथ्यो टेकने ओरेम।”

3 ज़ैखन हेरोदेस राज़े ए गल शुनी, त हेरोदेस राज़ो ते कने यरूशलेम नगरेरे सारे लोक घवराए।

4 ते हेरोदेस, यहूदी लोकां केरे प्रधान याजक ते शास्त्री लोक अकोट्टे केरतां तैन पुच्छने लगो, “मसीह कोडि पैदा भोरो लोडे?”

5 तैनेईं तैस सेइं ज़ोवं, “यहूदिया इलाकेरे बैतलहम नगरे मां,” किजोकि (बडे पेडले) मीका नेबे एन्बेरे लिखोरूए, कि परमेशरे ज़ोवं,

6 “हे बैतलहम नगर, तू ज़ैन यहूदिया इलाके मां आस, यहूदियारे इलाकन मां तू बडू खास नगर आस, किजोकि तीं मरां अक एरो हाकिम निसेलो ज़ै मेरे लोक इस्राएलेरी रखवाली केरलो”

7 ज़ैखन हेरोदेस राज़े एन शुनु, त तैनी जोष्टी चुपचारे कुजेइतां तैन करां तारो निसनेरे ठीक वक्तेरे बारे मां पतो कियो।

8 ते तैनी जोष्टी एन ज़ोइतां बैतलहम नगरे जो भेजे, कि “गाथ, ते तैस बच्चेरे बारे मां रोडेचारे पतो केरा ते ज़ैखन तुसन पतो लगगे, त (वापस एइतां) मीं भी पतो देइयथ ताके अवं भी तैस कां गेइतां मथ्यो टेकी।”

9 तैना जोष्टी (हेरोदेस) राज़ेरी गल शुन्तां (यरूशलेम नगरेरां) चले जे। ते अकदम तै तारो, ज़ै तैनेईं पूरवे मां लोरो थियो, तैन अग्री-अग्री चलो ते तैस घरेरे बा रुको ज़ैडी तैन मट्टू थियूं।

10 ज़ैखन तैनेईं तै तारो लव, त तैना बडे खुश भोए।

11 तैखन तैना घरे अन्तर जे ते तैन मट्टू तैसेरी अम्मा मरियमी कां लाव ते तैस मट्टे कां मथ्यो टेको। तैखन तैनेईं अपने-अपने खज़ानेरे झोले खोलतां सोन्नु, लोवान ते मुर्न तैस कां च़ादू।

12 जोष्टी केरे तैट्टां निसनेरां पत्ती, तैन सुपने मां ए बिस्तार मैल्लो कि वापस हेरोदेसे कां न गेइयथ। एल्हेरेलेइ तैना वापस कोन्ची होरि वत्तां अपने मुलखे जो चले जे।

एल्हेरेलेइ भोवं, कि जैना वचन प्रभुए यशयाह नेबेरे जिरिये ज़ोरे थिये पूरे भोए कि,

13 जोष्टी केरे गानेरां पत्ती, अचानक प्रभुएरो अक स्वर्गदूत यूसुफे सुपने मां मैल्लो ते ज़ोने लगो, “उठ, बच्चो ते तैसेरी अम्मा नेइतां मिस्र मुलखे जो नशश। ते मेरे ज़ोने तगर तैडी रेइयां, किजोकि हेरोदेस राज़ो बच्चे तोप्तां मारने चाते।”

14 यूसुफ निडलारां उठो ते मट्टू ते तैसेरी अम्मा साथी नेइतां रातो-रात मिस्र मुलखे जो चलो जेव।

15 हेरोदेसेरे मरने तगर यूसुफ तैडी राव, ताके प्रभुएरू तैन वचन पूरू भोए, ज़ैन होशे नेबे लिखोरू थियूं, “मीं मिस्र मुलखे मरां अपनू मट्टू कुजाव।”

॥॥॥॥॥ ॥॥॥॥॥ ॥॥॥॥॥॥॥ ॥॥॥॥॥ ॥॥॥॥॥

16 जैखन हेरोदेस जोष्टी करे धोखे बैजरो पतो लगी, त तैस बड़ी सरक आई। तैनी अपने मैन्हु भेजतां, जैन गल्लां केरो पतो तैस जोष्टन करां मैल्लोरो थियो, तैनी बैतलहम नगरे ते तैसेरे आसेपासेरे इलाकन मां सिपाही भेजतां सारां मट्टां, जैना दूई सालां केरां या दूई सालन करां निकड़ां थियां मां।

17 जैखन एन भोव, त तैखन तैन वचन पूरू भोवं, जैन यिर्मयाह नेबे ज़ोरू थियू। तैनी ज़ोवं,

18 “रामाह नगर मां बेड़ि लेरां ते मातमेरि आवाज शूनोई, राहेल अपने बच्चां केरे लेइ लेरां देने लोरी, तैसारो दिल ठंडो न भोए, किजोकि तैसेरे बच्चे मेरि जोरन।”

॥॥॥॥ ॥ ॥॥॥॥॥ ॥॥॥॥॥ ॥॥॥॥॥ ॥॥॥॥॥ ॥॥॥॥॥ ॥॥॥॥॥

19 हेरोदेसेरी मौतारां पत्ती, जैखन यूसुफ मिस्र मुल्खे मां थियो, त अचानक प्रभुएरो स्वर्गदूत तैस सुपने मां लेइहोव ते तैस सेइं ज़ोने लगी,

20 “उठ, बच्चो ते कने तैसेरी अम्मा साथी नेइतां इस्राएल मुलखे जो वापस ज़लो गा, किजोकि जैना लोक बच्चे मारने चाते थिये, तैना मेरि जोरन।”

21 फिरी यूसुफ निइलारां बीझो, ते बच्चो ते तैसेरी अम्मा साथी एन्तां इस्राएल मुलखे जो वापस अव।

22 पन जैखन यूसुफे एन शूनू कि अरखिलाउस अपने बाजी हेरोदेसेरी ठैरी यहूदिया इलाके पुड़ राज़ केरने लगगोरो, त तै तैड़ी गाने करां डरो। एल्हेरेलेइ जैखन यूसुफे सुपने मां परमेशेरो बिस्तार मैल्लो, त तै गलील इलाके जो ज़लो जेव।

23 ते तैड़ी पुजतां तै नासरत नंब्वेरे नगर मां राने लगी, ताके तैन वचन पूरू भोए, जैन परमेशेरे अपने नेबी केरे ज़िरिये ज़ोरो थियू। तैनेई ज़ोवं, “तैस जो नासरी ज़ोले।”

3

॥॥॥॥॥ ॥॥॥॥॥॥॥ ॥॥॥॥॥॥॥ ॥॥॥॥॥॥ ॥॥ ॥॥॥॥ ॥॥॥॥॥ ॥॥॥॥॥
(॥॥॥॥॥ 1:1-8; ॥॥॥॥॥ 3:1-18; ॥॥॥॥॥॥॥ 1:6-8,15-34)

1 तैन दिहाइन मां यूहन्ना नंब्वेरो मैन्हु, जै बपतिस्मो देनेबालो थियो, यहूदिया इलाकेरे सुनसान ठैरी मां अव। तै लोकन जैना तैस कां एइते थिये, तैन ई प्रचार केरतो थियो,

2 “अपने पापन करां मनफिराथ, किजोकि स्वर्गेरू राज़ नेडे ओरूए।”

3 ई तैए ज़ेसेरे बारे मां यशायाह नेबे एन ज़ोरू थियू,

“कोई सुनसान ठैरी मां लोकन, जैना तैस कां गातन, तैन उच्ची आवाजी सेइं ज़ोलो कि ‘तुसन कां प्रभु एजनेबालो आए, एल्हेरेलेइ तैसेरी बत तियार केरा ते कने तैसेरेलेइ सड़कां सिद्धी केरा।’ (यानी, प्रभुएरे लेइ तुस अपने दिल साफ केरा)”

4 यूहन्ना आम लिगड़ां लातो थियो जैना लिगड़ां ऊँटेरे बालन सेइं बनोरां थियां। तै अपनि कमरी पुड़ चमड़ेरू मज़ बंधतो थियो। ते तै टिट्टां त कने जंगलेरू माछ्छी खातो थियो।

5 तैखन यरूशलेम नगरेरे बड़े लोक ते यहूदिया इलाकेरे बड़े लोक ते यरदन दरियारे आसे-पासेरे इलाकन मरां लोक यूहन्नारी गल्लां शूननेरे लेइ तैस कां एइते थिये।

6 ते तैनेई अपने पाप मेन्तां यूहन्ना करां यरदन दरियाए मां बपतिस्मो नीयो।

7 पन जैखन तैनी हेरू कि बड़े फरीसी ते सद्की लोक बपतिस्मो नेनेरे लेइ तैस कां एजने लोरेन, त तैनी तैन सेइं ज़ोवं, “तुस ज़ेहरीले सप्पेरे ज़ेरे बुरे आथ! तुसन केनि ज़ोवं कि, एजनेबाले परमेशेरे कोपे करां नशशा?”

8 सज़ाई करां बच्चनेरे लेइ तैना कम्मां केरा, जैन सेइं पतो लगगे तुसेईं सच्चे पापन करां मन फिरावरोए।

9 ते अपने-अपने दिले मां एन न सोचा कि 'अब्राहम इशो वाजी आए' (परमेशर तुशे पाप सिर्फ एल्हेरेलेइ माफ़ न केरेलो कि तुस अब्राहमेरी औलाद आथ), किजोकि अवं तुसन सेइं ज़ोताई कि परमेशर इन घोड़न मरां भी अब्राहमेरे लेइ औलाद पैदा केरि सकते!

10 ते हुन्ना त बुट्टां केरे ज़ीलन पुड़ परमेशेरो मैक्कुर खखोरोए, एल्हेरेलेइ ज़ै कोई तैस बुट्टेरो ज़ेरो भोते, ज़ै रोड़ो फल न दे, तै कटनोए ते अग्गी मां छुडनोए।

11 अवं त तुसन पैनी सेइं बपतिस्मो देताई किजोकि तुसेईं मनफिरोरोए, पन मसीह ज़ै मेरे बाद एजनेबालोए, तै मीं केरां भी महान आए। अवं त तैसेरो गुलाम भोनेरे काबल भी नई कि तैसेरे बूट छुई। तै तुसन पवित्र आत्माई सेइं ते अग्गी सेइं बपतिस्मो देलो (ज़ैना मन फिरान, तैनन्)।

12 तैसेरू छज्ज तैसेरे हथ्थे मां आए ते तै खलाइ रोड़ेचारे साफ केरेलो*, तै गेहुं अपने कोठारे मां रखेलो, पन झाझी तैस अग्गी मां फुकेलो ज़ै कधे न हिशे। (एल्हेरेलेइ पापन करां मनफिराथ नई त परमेशर तुसन सज़ा देलो)।”

ⓂⓂⓂⓂ ⓂⓂⓂⓂ ⓂⓂⓂⓂⓂⓂ ⓂⓂⓂⓂ ⓂⓂ, ⓂⓂⓂⓂⓂⓂ ⓂⓂ ⓂⓂⓂⓂⓂⓂ ⓂⓂⓂⓂ

(ⓂⓂⓂⓂ 1:9-11; ⓂⓂⓂⓂ 3:21-22; ⓂⓂⓂⓂⓂⓂ 1:31-34)

13 तैस मौके यीशु गलील इलाके मरां यरदन दरियारे बन्ने पुड़ यूहन्ना कां अव, ताके तैस करां बपतिस्मो ने।

14 पन यूहन्ना, यीशु जो इन ज़ोइतां रोकने लगो, “मीं तीं करां बपतिस्मो नीयोरो लोड़ते, फिरी किजो तू मीं करां बपतिस्मो नेने ओरोस?”

15 पन यीशुए तैस ईं जुवाब दित्तो, “हुनी तू एन्चरे भोने दे, किजोकि †एन्चरे केरतां अस तैन केरतम ज़ैन परमेशर चाते।” तैखन यूहन्ना तैसेरी गल मन्नी।

16 ते यीशु ज़ैखन बपतिस्मो नेइतां पैनी मरां बेइर अव, त तैस मौके हेरा अम्बर खुल्ली ज़ोवं। ते तैनी पवित्र आत्मा कबूतरेरी शकली मां एप्पू पुड़ एइती लाई।

17 ते तैखन हेरा अम्बरे मरां ए आवाज आई (त यीशुएरे बारे मां ज़ोवं), “एन मेरू ट्लारू मट्टू, अवं एस पुड़ बड़ो खुश आई।”

4

ⓂⓂⓂⓂ ⓂⓂⓂⓂ ⓂⓂⓂⓂⓂⓂ

(ⓂⓂⓂⓂ 1:12-13; ⓂⓂⓂⓂ 4:1-13)

1 तैल्ला पत्ती, पवित्र आत्मा यीशु सुनसान ठैरी मां नीयो, ताके शैतान तैसेरी अज़मैइश केरे।

2 40 दिहाड़े ते 40 रातन किछ न खानेरां पत्ती तैस दलुख लगगी।

3 त तैखन शैताने ज़ैस जो अज़माने वालो भी ज़ोतन, तैस कां एइतां ज़ोवं, “अगर तू परमेशेरू मट्टू आस, त इन घोड़न जो हुक्म देइतां साबत केर, कि एना रोट्टी बनन् ताके तू खेइ सकस।”

4 यीशुए तैस जुवाब दित्तो, “अवं न केरेलो किजोकि परमेशेरी किताबी मां लिखोरूए, मैन्हु सिर्फ रोट्टेईं सेइं ज़ींतो न राए,

बल्के तै हर गल मन्ने सेइं ज़ींतो राते, ज़ै परमेशर ज़ोते।”

5 फिरी शैताने तै पवित्र नगर यरूशलेमे मां नीयो ते मन्देरेरी उच्ची छम्पी पुड़ नेइतां खड़ो कियो।

6 तैखन तैनी यीशु सेइं ज़ोवं, “अगर तू हकीकत मां परमेशेरू मट्टू आस त इट्टां बिछुड़तां साबत केर, किजोकि पवित्रशास्त्रे मां लिखोरूए, तै तेरे लेइ अपने स्वर्गदूतन हुक्म देलो, ते तैना तीं अपने हथ्थन मां टलाले, ताके तेरे पावन केन्ची घोड़न सेइं टोकर न लगगे।”

* 3:12 3:12 मतलब, कि परमेशर सारे लोकन इन्साफ करेनेरे लेइ त कने जेन्चरे अक किसान गेहुं करां झाझ अलग केरते, तेन्चरे बुरे लोकन करां धर्मी लोकन अलग केरनेरे लेइ तियार आए। † 3:15 3:15 मूल भाषाई मां: ज़रूरी आए कि अस सारी धार्मिकता एन्चरे सेइं पूरी केरम

7 यीशुए तैस सेइं ज़ोवं, “(नई, अवं छाल न मारेलो, किजोकि) परमेशेरी किताबी मां एन भी लिखोरूए, तू परभु अपने परमेशे अजमेइतां इन साबत केरनेरी कोशिश न केर कि तै अपने वादे पूरे केरते या नई।”

8 तैखन शैताने, यीशु एक्की बड़े उच्चे पहाड़े पुड़ नीयो, ते तैड़ी दुनियारां सारां राज्जां ते तैन केरि धन दौलत तैस हिराई।

9 तैखन तैनी यीशु सेइं ज़ोवं, “अगर तू मीं कां मथ्यो टेकस ते मेरी आराधना केरस, त अवं इन सब किछ् तीं देलो।”

10 यीशुए तैस जो ज़ोवं, “हे शैतान! दूर भो, किजोकि परमेशेरी किताबी मां लिखोरूए, तू सिर्फ परभु अपने परमेशे कां मथ्यो टेक ते तैसेरी आराधना केर!”

11 तैखन शैतान तैस करां ज़लो जेव, ते अकदम किछ् स्वर्गदूत यीशु कां एइतां तैसेरी सेवा केरने लगगे।

~~~~~

(मत्ती 1:14-15; मत्ती 4:14-15,31)

12 एक्सां केन्चे यीशु जो ज़ोवं, कि यूहन्ना जै बपतिस्मो देनेवालो थियो, कैद कियोरोए त यीशु यहूदिया इलाकेरां, गलील इलाके मां वापस अव।

13 ते नासरत नगर शैरतां कफरनहूम नगरे मां राने लगो, जैन समुन्दरेरे बन्ने पुड़ आए, जैड़ी जबूलून ते कने नप्ताली गोदलेरे लोक राते थिये।

14 ताके तैन वचन जैन यशायाह नेवे ज़ोरू थियूं पूरू भोए, तैनी ज़ोवं,

15 “जैना लोक जबूलून ते नप्ताली गोत्रां केरे इलाके मां आन,

जैना गलील समुन्दरेरे नेड़े यरदन दरियारे उस पार, गलील इलाके मां आन, जैड़ी गैर यहूदी लोक भी रातन,

16 (तैना लोक) जैना पापेरे आंधरे मां बिशशोरेन, तेनेई बडडी लौ लई। ते लौ तैन पुड़ चमकी जैना हमेशारे मौतारे आंधरेरे मुलखे मां बिशशोरेन।”

17 तेइसेरू देंतू यीशुए परमेशेरी खबर लोकन शुनानेरी सेवा शुरू की। तैनी लोकन ज़ोवं, “अपने पापन करां मनफिराथ, किजोकि स्वर्गेरू राज नेड़े ओरूए।”

~~~~~

(मत्ती 1:16-20; मत्ती 5:1-11; मत्ती 1:35-42)

18 एक्सां जैखन यीशु गलील समुन्दरेरे बन्ने ज़लोरो थियो, त तैनी दई मैन्हु लागे जैना मेच्छली टलानेवाले थिये। तैना मेच्छली टलानेरे लेइ समुन्दरे मां ज़ाल छेड्डी राओरे थिये। तैन मरां एक्केरू नवं शमोन, जैस जो पतरस भी ज़ोतन, ते तैसेरो दूला ज़ेसेरू नवं अन्दिरयास थियूं।

19 यीशुए तैन सेइं ज़ोवं, “एज्जा मेरे चले बना। अवं तुसन शिखालेलो कि केन्चरां होरे मैन्हु मेरे चले बनानेन।”

20 तैना अकदम अपना ज़ालां छेडतां यीशु पत्ती ज़ले जे।

21 ते तैना तैट्टां थोड़े ज़ेरे अगगर जे, त यीशुए होरे दई दूला, यानी याकूब त कने तैसेरो दूला यूहन्ना अपने बाजी जब्दी सेइं साथी किशती मां लागे। तैना किशती मां ज़ालां ठीक केरने लगगोरे थिये। यीशुए तैना भी कुजाए (कि तैना तैसेरे चले बनन)।

22 ते तैना भी तैखने किशती ते अपने बाजी तैड़ी ज़ेरे छेडतां यीशु सेइं साथी ज़ले जे।

~~~~~

(मत्ती 6:17-19)



23 तैल्ला पत्ती, यीशु सारे गलील इलाके मां हंठतो फिरतो राव । तै तैन केरे परार्थना घरन मां लोकन शिक्षा देतो राव ते परमेशेरे राज्जेरी खुशखबरी शुनातो राव । ते तै लोकां केरि हर किसमेरी बिमैरी ते कमजोरी दूर केरतो राव ।

24 यीशुएरे बारे मां ई खबर सारे सीरिया इलाके मां मुशूर भोइ जेई । एसेरे वजाई सेइं, ज़ैडी कोन्वी तै जेव, तैडी लोक सेब्बी बिमारन ज़ैना हर किसमेरी बिमैरी ते तकलीफन मां फसोरे थिये, ते ज़ैन लोकन पुइ भूतां केरो सायो थियो, ते ज़ैना मिरगरे रोगी थिये, ते ज़ैना अधरंगरे रोगी थिये, तैना यीशु कां आने ते यीशुए तैना सारे बज्झाए ।

25 एसेरे वजाई सेइं मैन्हु केरि बडी भीड़ यीशु पत्ती चली । तैना लोक गलील, दिकापुलिस\* इलाकां केरे, यरूशलेम नगरेरे, यहूदिया इलाकेरे, ते यरदन दरियारे पैरी पारेरे इलाकां केरां ओरे थिये ।

## 5

~~~~~

1 यीशु तैना हच्छे लोक लेइतां एक्की पहैडी पुइ चलो जेव, ते ज़ैखन तै शिखालनेरे लेइ विशशो त तैसेरे चेले तैस कां आए ।

2 तैखन यीशु तैन लोकन शिक्षा देने लगो,

~~~~~  
(~~~~~ 6:20-23)

3 “परमेशर तैन लोकन बरकत देते, ज़ैना ज़ानतन कि तैन परमेशेरी ज़रूते, किजोकि तै तैन पुइ राज़ केरेलो ।

4 परमेशर तैन लोकन बरकत देते, ज़ैना दुखी आन, किजोकि परमेशर तैन तस्सली देलो ।

5 परमेशर तैन लोकन बरकत देते ज़ैना नम्र आन,

किजोकि परमेशर तैन, तैना सैरी बरकतां देलो ज़ैन केरो तैनी वादो कियोरोए ।

6 परमेशर तैन लोकन बरकत देते, ज़ैना परमेशेरी नज़री मां रोडी गल्लां केरनेरी बडी इच्छा रखतन, (जेन्चरे कोई दलुखोरो खाने पीनेरी इच्छा रखते)

तैन परमेशर अपनि मेज़ी पुइ चलनेरे लेइ शक्ति देते ।

7 परमेशर तैन लोकन बरकत देते, ज़ैना दया केरतन, किजोकि परमेशर भी तैन पुइ दया केरेलो ।

8 परमेशर तैन लोकन बरकत देते, ज़ैन केरे मन साफ आन, किजोकि तैन परमेशर दर्शन देलो ।

9 परमेशर तैन लोकन बरकत देते, ज़ैना शैनतरां कम्मां केरतन, किजोकि तैन जो परमेशेरे बच्चे जोले ।

10 परमेशर तैन लोकन बरकत देते, ज़ैना परमेशेरी नज़री मां रोडि गल्लां केरनेरे वजाई सेइं सताए गातन,

किजोकि परमेशर तैन पुइ राज़ केरते ।”

11 “परमेशर तुसन बरकत देलो, ज़ैखन लोक तुसन मेरे चेलो भोनेरे वाजाई सेइं तुशशी तुहीन केरन ते स्तान ते झूट जोइतां हर किसमेरी बुरी गल्लां तुशशे बारे मां ज़ोन ।

12 तैखन तुस खुशी रेइयथ ते मघन भोइयथ, किजोकि परमेशेरे ज़ैन इनाम स्वर्गे मां तुशशे लेइ रख्खेरूए तैन बडू बडूए, किजोकि लोकेई बडे पेइले तैना नबी भी एन्चरे सतोर थिये ।”

~~~~~  
(~~~~~ 9:50; ~~~~~ 9:34-35)

* 4:25 4:25 दिकापुलिस: इडी दिकापुलिसेरो मतलब दश नगर ।

13 “तुस इस दुनियारे लोकां केरे लेइ लूनेरे ज़ेरे आथ, पन अगर लूनेरो स्वाद चेलि गाए, त फिरी दुवारां केन्चरे तैसेरो स्वाद वापस आनेले? फिरी तैन कोन्ची कम्मरू न राए, सुवाए बेइरोवं शारनेरां ते लोकां केरे पांवेइं सेइं दलेन्चोनेरां।”

14 “तुस इस दुनियारे लोकां केरे लेइ लोअरे ज़ेरे आथ। ज़ैन नगर पहाड़े पुड़ बसते तैन कधे भी छेप्पी न सके।

15 लोक बलतो दीयो हेटी मां न रखन, पन तैस उच्ची ठैरी रखतन ताके धरेरे सैरी मैनन् लौ पुज्जे।

16 ते एन्चरे तुशशी लौ मैन्हु केरे सामने एरी चमके, ताके तैना तुशशां रोडां कम्मां हेरतां तुशशे स्वर्गेरे बाजेरी तारीफ़ केरन।”

~~~~~

17 “एन न बुझथ कि अवं मूसरो कानून या नेबी केरे किताबन मां लिखोरी गल्लां रद केरने ओरोई। अवं तैन रद केरने नई बल्के पूरी केरने ओरोई।

18 किजोकि अवं तुसन सेइं सञ्ज ज़ोताई, कि ज़ां तगर धरती त अम्बर खतम न भोए, तांतगर परमेशेरे कानूने मरां अक मातरा या बिंदी भी न टलेली, ज़ां तगर सब किछ् लिखोरू पूरू न भोए।

19 एल्हेरेलेइ ज़ै कोई इन निकड़े करां निकड़े हुक्मन मरां केन्ची एक्की ज़ेरे टलोइते ते होरन भी एन्ने केरनू शिखालते, ते स्वर्गेरे राज्जे मां सेब्बन करां निकड़ो भोलो, पन ज़ै तैन हुक्मन पुड़ अमल केरते ते होरन भी एन हुक्मन पुड़ च़लनेरे बारे मां शिखालते त तै स्वर्गेरे राज्जे मां बड़ो भोलो।

20 किजोकि अवं तुसन सेइं ज़ोताई कि ज़ां तगर तुस शास्त्री ते फरीसी लोकन करां रोड़े च़ारे कानूने न मन्नेले, तांतगर तुस स्वर्गेरे राज्जे मां दाखल न भोइ सकतथ।”

~~~~~

21 “तुसेईं शुनेरू थियू कि परमेशेरे इशशे दादे-पड़दादन सेइं ज़ोरू थियू, खून नई केरनो, ते ज़ै खून केरेलो त तैस आदालत सज़ा देली।”

22 पन मेरू ज़ोनू एने कि ज़ै कोई अपने दलाए पुड़ क्रोध केरते, परमेशर तैसेरो इन्साफ़ केरेलो, ते ज़ै कोई अपने दलाए जो निकम्मो ज़ोते त तैस भी महासभा मां जुवाब देनो पेनोए, ते ज़ै कोई अपने दलाए जो ‘बेवकूफ’ ज़ोलो त परमेशर तैस नरकेरे अगारी सज़ा देलो।

23 एल्हेरेलेइ अगर तू अपनि च़दतल मन्दरे मां आनस, ते तैड़ी तीं याद एज्जे कि मीं अपने दलाए सेइं किछ् गिलोए।

24 त तू अपनि च़दतल बलिदान च़ादनेरि ठैरी पुड़ छेडतां पेइले अपने दलाए सेइं मेल-मलाप केरां, फिरी अपनि च़दतल च़ैदां।

25 अगर कोई मैन्हु तीं पुड़ दाओ केरतां तीं आदालती मां नेनो चाते, त तू बत्तां तैस सेइं मेल-मिलाप केरां न त तैनी तू हाकिमे कां खड़ो केरनोस, ते तैनी तू सिपैहीएरे हवाले केरनोस ते सिपैहिए तू कैद केरतां छ्डनोस।

26 अवं तुसन सेइं सञ्ज ज़ोताई कि ज़ां तगर तू पाई-पाई न देलो त तांतगर तैट्टां छुट्टी न सकेलो।”

~~~~~

27 “तुसेईं शुनेरू थियू, कि ई हुक्म दित्तोरी थियो, ‘बदमाशी नई केरनि।’

28 पन अवं तुसन इन भी ज़ोताई कि ज़ै कोई केन्ची कुआन्शी पुड़ गेन्दी नज़रां सेइं तकते, तैनी अपने दिले मां पेइली तैस सेइं बदमाशी केरि छ्ड्डी।

29 अगर तेरी देइनी अछ् तीं पाप केरनेरे लेइ ठोकर खुवाए, त तैस केदतां शार, किजोकि तेरी पूरी जान नरके मां छ्ड्डे गाने करां तेरे लेइ एन्ने रोडूए कि तेरी जानी मरां अक अंग नाश भोए

30 अगर तेरो देइनो हथ तीं पाप केरनेरे लेइ ठोकर खुवाए त तैस केदतां शार, किजोकि तेरी पूरी जान नरकेरी अग्गी मां गाने करां तेरे लेइ एन्ने रोडूए कि तेरी जानी मरां अक अंग नाश भोए।”

॥॥॥॥ ॥॥॥॥॥॥॥॥ ॥॥॥॥ ॥॥ ॥॥॥॥॥॥ ॥॥॥॥॥  
 (॥॥॥॥ 19:9; ॥॥॥॥ 10:11-12; ॥॥॥॥ 16:18)

31 “एन भी ज़ोरू थियूं, ज़ै कोई अपनि कुआन्श शारे त एन ज़रूरीए कि फारख्ती लिखतां हावाले केरे।”

32 पन अवं तुसन सेइं ज़ोताई, कि ज़ै कोई अपने कुआन्शी बदमैशरे अलावा होरि केन्ची गल्लीन पुड़ फारख्ती दे, त तैस केरां बदमैशी केरवाते। ते ज़ै कोई तैस शैरोरी कुआन्शी सेइं ड़ला बनाते, त तै भी तैस सेइं बदमाशी केरते।”

॥॥॥॥ ॥॥ ॥॥॥॥॥॥॥ ॥॥॥॥ ॥॥ ॥॥॥॥॥॥ ॥॥॥॥

33 “तुसेईं शुनोरू, कि ईं हुकम दित्तोरु थियो, झूठी कसम नईं केरनि, पन कसम पूरभुएरे लेइ पूरी केरथ।”

34 पन अवं तुसन सेइं ज़ोताई कि कधे कसम न केरथ, न स्वर्गेरी, किजोकि तै परमेशेरो तखत आए।

35 न ज़मीनारी किजोकि परमेशर तैड़ी पाव रखते, ते न यरूशलमे नगरेरी किजोकि तैन महा राजां केरू नगर आए।

36 ते न अपने दोगेरी कसम केरथ, किजोकि तुस अपनो अक बाल भी छित्तो या कालो न केरि सकतथ।

37 पन हांएरी ठैरी हाँ ते नाएरी ठैरी न ज़ोथ, किजोकि ज़ैन किछ एस करां जादे तैन बुरैईं यानी शैतानेरे पासेरां आए।”

॥॥॥॥ ॥॥॥॥॥ ॥॥॥॥ ॥॥ ॥॥॥॥ ॥॥॥॥॥॥॥ ॥॥॥॥  
 (॥॥॥॥ 6:29-30)

38 “तुसेईं शुनोरूए, कि मूसेरे कानूने मां लिखोरूए, कि अछ्छेरे बदले अछ्छे ते दंतरे बदले दंत।

39 पन अवं तुसन सेइं ज़ोताई कि, बुरे मैन्हु करां बदलो न नेइयथ। अगर कोई तेरे देइनी खैखोड़ी पुड़ थप्पड़ बालो त तू बाएं पासो भी तैसेरे पासे रेख्वां।

40 ते अगर कोई मुकदमो केरतां तेरी कमीज़ नेनी चाए त तू कोट भी तैसेरे हवाले केरां।

41 ते अगर कोई सिपाई तीं भारो छूने अक मील नेने चाए त तू दूईं मील गेइयां।

42 ज़ै कोई तीं करां किछ मग्गे, तैस दे। ते ज़ै कोई तीं करां ओधार मग्गे त तुत्तर न फिरेइयां।”

॥॥॥॥॥॥॥ ॥॥॥॥ ॥॥॥॥॥ ॥॥॥॥॥॥॥॥ ॥॥॥॥ ॥॥ ॥॥॥॥॥॥॥  
 (॥॥॥॥ 6:27-28,32-36)

43 “तुसेईं शुनोरूए, कि मूसेरे कानूने मां लिखोरूए, कि ‘अपने पड़ोसी सेइं अपनो ज़ेरो प्यार केरथ ते दुश्मने सेइं वैर रेखथ।’

44 पन अवं तुसन सेइं ज़ोताई, कि अपने दुश्मन सेइं प्यार केरा, ते ज़ैना तुसन सतातन तैन केरे लेइ प्रार्थना केरा।

45 ज़ैस सेइं तुस अपने स्वर्गेरे बाजी केरे बच्चे बेनि सकतथ, ज़ै अपनो दिहाड़ो अपने रोड़े लोकन पुड़ चमकाते ते बुरे लोकन पुड़ भी, ते धेर्मी लोकन पुड़ झड़ो देते ते बुरे लोकन पुड़ भी।

46 किजोकि अगर तुस तैन्ने लोकन सेइं प्यार केरथ ज़ैना तुसन सेइं प्यार केरतन त तुसन कुन इनाम मैलेलू? कुन चुंगी धिन्ने बाले भी एन्ने न केरन?”

47 “ते अगर तुस सिर्फ अपने दूलान जो नमस्कार ज़ोथ, त तुस होरन करां जादे कुन केरतथ? कुन गैर कौमां केरे लोक ज़ैना परमेशेरे कानूने न मनन् तैना भी एरू न केरन?”

48 तुसन तैन लोकन सेइं प्यार केनेरी ज़रूरत आए, ज़ैना तुसन सेइं प्यार न केरन, एन्चरां तुस सिद्ध भोले ज़ेन्चरे स्वर्गे मां रानेबालो तुप्रशो बाजी सिद्ध आए।”

## 6

॥॥॥॥॥॥॥॥ ॥॥॥॥ ॥॥॥॥॥॥॥॥॥ ॥॥॥॥ ॥॥ ॥॥॥॥॥॥॥ ॥॥॥॥॥॥॥ ॥॥॥॥

1 “खबरदार, तुस अपने रोड़ा कम्मां सिर्फ लोकन हिरानेरे लेइ न केरा, नई त तुशुओ स्वर्गेरो बाजी तुसन कोई इनाम न देलो।

2 एल्हेरेलेइ ज़ैखन तू गरीब मैन्हु दान देस, त तू ढुंढूरो न बज्जेइयां, जेन्चरे पाखंडी लोक प्रार्थना घरन मां ते गेल्लन मां केरतन, ताके लोक तैन केरि तारीफ़ केरन। अवं तुसन सेइं सच्च ज़ोताई कि ज़ैन इनाम तैन मैलनू थियूं, तैन सिर्फ इन्ने, कि लोकेई तैन केरि तारीफ़ की (परमेशे करां तैनन् कोई इनाम न मैलेलो)।

3 पन ज़ैखन तू गरीब मैन्हु दान देस, त केन्ची पतो न लोड़े लग्गोरो कि तीं कुन दित्तु।

4 ताके तेरू दान छप्पोरू भोए, तैखन तेरो बाजी ज़ै छेपतां तकते, तीं इनाम देलो।”

~~~~~  
(मत्ती 11:2-4)

5 “ज़ैखन तू प्रार्थना केरस त पाखंडी लोकां केरो ज़ेरो न बेना, ज़ैना प्रार्थना घरन मां ते सड़कां केरे मोड़न पुड़ खेड़ोइतां प्रार्थना केरनि सुखातन, ताके लोक तैन तक्कन ते तैन केरि तारीफ़ केरन। अवं तुसन सेइं ज़ोताई कि ज़ैन इनाम तैनन् मैल्लोरू लोड़तू थियूं, तैन सिर्फ इन्ने, कि लोकेई तैन केरि तारीफ़ की (परमेशे करां तैनन् कोई इनाम न मैलेल)।

6 पन ज़ैखन तू प्रार्थना केरस त अकैल्लो अपने कमरेरो अन्तर गा, ते दार बंद केरतां अपने परमेशे कां ज़ै लेइहोए न तैस कां प्रार्थना केरा। तैखन तुशुओ बाजी परमेशर ज़ै लेइहोए न, ज़ै हर वक्त तीं तकतो राते तै तीं इनाम देलो।

7 प्रार्थना केरते बार, गैर कौमां केरू ज़ेरू बकबक न केरां, किजोकि तैना समझतन कि तैन केरे बकबक केरने सेइं तैन केरि प्रार्थना शुनी गाली।

8 तैन केरे ज़ेरे न बना, किजोकि तुशुओ बाजी तुशुओ मगने करां पेइले तुशुओ ज़रूरतां जानते।”

9 “एल्हेरेलेइ तुस एन्चरे प्रार्थना केरा,

हे इशुओ बाजी, तू ज़ै स्वर्गें मां आस, लोक तेरी आदर केरन किजोकि तू पवित्र परमेशर आस।

10 तू सेब्बी लोकन पुड़ ते चीज़न पुड़ राज़ केरस। तेरी मर्जीं जेन्चरे स्वर्गें मां पूरी भोचे, इस धेरती पुड़ भी भोए।

11 इशुओ रोज़ेरी रोट्टी अज़ असन दे।

12 ते जेन्चरे अस ज़ैना इशुओ खलाफ़ बुराई केरतन, तैन माफ़ केरतम, तेन्चरे तू भी इशुओ बुरैई माफ़ केर।

13 अज़मैइशे ज़िरिये असन पाप केरने न दे, पन बुरैई यानी शैताने करां बच्चेइयां, (किजोकि राज़, शक्ति ते महिमा हमेशा तेरी भोती राए। आमीन।)”

14 “एल्हेरेलेइ अगर तुस लोकां केरे पाप माफ़ केरेले, त तुशुओ स्वर्गेरो बाजी भी तुशुओ पाप माफ़ केरेलो।

15 ते अगर तुस लोकां केरे पाप माफ़ न केरेले, त तुशुओ स्वर्गेरो बाजी भी तुशुओ पाप माफ़ न केरेलो।”

~~~~~

16 “ज़ैखन तुस बरत रखत, त पाखंडी लोकां केरू ज़ेरू अपनू तुत्तर न बगैइथा तैना अपनू तुत्तर बिगाइतन, ताके लोकन पतो लग्गे कि एनेई अज़ बरत रखोरूए ते तैन केरि तारीफ़ केरन। अवं तुसन सेइं सच्च ज़ोताई कि ज़ैन इनाम तैन मैलनू थियूं तैन मैल्ली जेव।

17 बल्के ज़ैखन तू बरत रखस त अपनू तुत्तर धोइयां ते दोग्गे तेल मेल्तां।

18 ताके लोक नई, पन तेरो स्वर्गेरो बाजी, ज़ै लेइहोतोए न तै लाए कि तीं बरत रखोरूए तै तीं इनाम देलो।”

~~~~~

(मत्ती 12:33-34)

19 “एप्पू जेई धरती पुड दौलत अकोट्टी न केरा, ज़ैडी कीडे खातन ते मौरच्चो लेगतां नाश करते, ते चोर तुशू घर टलोडतां चोरी करतन।

20 बल्के रोडू करतां अपने लेइ स्वर्गे मां दौलत अकोट्टी केरा ज़ैडी न कीडो लगगे, ते न मोरच्चो लगगे ते न चोर चोरी केरेले।

21 किजोकि ज़ैडी तेरी दौलत भोली, तैडी तेरो दिल भी लग्गेलो।”

🔗 🔗 🔗 🔗 🔗 🔗 🔗 🔗

(🔗 11:34-36)

22 “अच्छ जानेरे लेइ दीयेरी ज़ेरि आए, एल्हेरेलेइ अगर तेरी अच्छ रोडी साफ आए, त तेरी सारी जान लौ भोली।

23 अगर तेरी अच्छ खराब आए, त सारी जानी मां आंधरू भोलू। बस अगर ज़ै लौ तीं मां आए तै आंधरू बेनि गाए, त तैन केतरू आंधरू भोलू!”

🔗 🔗

(🔗 16:13; 12:22-31)

24 “कोई मैन्हु दूई मालिकां केरि सेवा एक्की वक्ते मां न केरि सके। न त एक्की सेइं दुश्मनी केरेलो ते होरि सेइं प्यार केरेलो, या एक्केरो बेनतां रालो त होरि न सुखालो। तुस परमेशेरी ते दौलतरी, दुइयां केरि सेवा न केरि सकतथ।

25 एल्हेरेलेइ अवं तुसन सेइं ज़ोताई, कि तुस अपने ज़िन्दगरी ज़रूरतां केरे लेइ फिक्र न केरा, कि तुस कुन खाले या कुन पीले, ते न अपने जानारी कि कुन लामेले। कुन प्राण रोट्टी करां ते जान लिगडे करां बेधतां नई!”

26 “अम्बेरे चुडोल्लन हेरा! तैना न किछ बेन, ते न किछ कट्टन, ते न अकोट्टे करतां रखन, फिरी भी तुशूो स्वर्गेरो बाजी तैन खाने जो देते ते तैन केरि हेरगेश करते। कुन तुशूी कदर तैन करां जादे नई?”

27 तुसन मां एरो कौन आए, ज़ै फिक्र करतां अपनि उमर अक घड़ी भी बधेई सकते?”

28 “ते लिगडेरे लेइ किजो फिक्र करतथ? जंगले मां सोसनेरां फूडू हेरा कि तैना केन्चरे बेडोतन, न तैना मेहनत केरन, ते न तैना लिगडां बनान।

29 फिर भी अवं तुसन सेइं ज़ोताई कि राजो सुलैमाने भी अपने सारे धन दौलतरे वावजूद भी तैन केरां ज़ेरां लिगडां न लां।

30 एल्हेरेलेइ ज़ैखन परमेशर मैइदानेरो घास, ज़ै अज आए ते कालां लौवंने मां फुकनोए, एरी खूबसूरती देते, त हे घट विश्वासे बाले लोकव, कुन तै तुसन लिगड न देलो?

31 एल्हेरेलेइ तुस फिक्र करतां एन न जोइयथ, कि कुन खामेले, या कुन पीमेले, या कुन लामेले?”

32 किजोकि गैर कौमां एन गल्लां केरि फिक्री मां रइचन। ते तुशूो स्वर्गेरो बाजी ज़ानते, कि तुसन कोनां-कोनां चीजां केरि ज़रूरत आए। एल्हेरेलेइ तुस कोन्ची चीजरी फिक्र न केरा।

33 पन पेडले तुस अपने आपे परमेशेरे राज़ेरे लेइ अर्पण केरा, ते तैन कम केरा ज़ैन परमेशेरी नज़री मां रोडू भोते, त इना सैरी चीजां भी तुसन मैल्ली गैली।

34 एल्हेरेलेइ कालेरे बारे मां फिक्र न केरथ, किजोकि कालेरी दिहाड़ी अपने लेइ एप्पू फिक्र आनेली। अज्जेरे लेइ अज्जेरो दुख सुद्धोए।”

7

🔗 🔗

(🔗 6:37-38,41-42)

1 “केन्ची पुड दोष न लेइयथ, तुसन भी दोष न लग्गेलो।

2 किजोकि ज़ेन्चरे तुस होरि पुड दोष लाएले, तेन्चरे परमेशर भी तुशूो इन्साफ केरेलो। ज़ेन्चरे तुस होरि लोकन सेइं बर्ताव करतथ, तेन्चरे परमेशर तुसन सेइं बर्ताव केरेलो।”

3 “तू अपने ढलाएरी एछ्छी मां कूडो किजो तकतां, पन तेरी एछ्छी मां त नग आए, ते तैसेरो तू खियाल भी न केरस?

4 ज़द तेरी एछ्छी मां नग आए, त तू कौस ऐशी सेइं अपने ढलाए जो ज़ोई सकतां कि, ‘एई, अवं तेरी एछ्छी मरां कूडो केडडी!’

5 हे पाखंडी! पेडले अपने एछ्छी मरां नग कढ, ते फिरी अपने ढलाएरी एछ्छी मरां रोडे च़ारे तेकतां कूडो केडडी सकतस।”

6 “ज़ैना लोक परमेशेरे वचन शन्नू न चान, तैन न शुनाथ। अगर तुस एन्चरे केरेले, त पवित्र चीज़ कुतरन कां छडनेरे बराबर ते कने मोती सूरन कां छडनेरे बराबर भोले, कि तैना तैन पव्वन हैठ इलन्चन ते वेदलोइतां तुसन पुड हमलो केरेले।”

⚠⚠⚠⚠⚠⚠ ⚠⚠⚠ ⚠⚠⚠⚠⚠⚠ ⚠ ⚠⚠⚠ ⚠⚠⚠⚠⚠⚠
(⚠⚠⚠ 11:9-13)

7 “परमेशेरे करां मग्गा, त तुसन दित्तू गालू। ते तोप्पा, त तुसन मैल्ली गालू। ते दार गुडकाथ, त तुशशे लेइ खोल्लू गालू।

8 किजोकि ज़ै कोई मगते तै हासिल केरते, ते ज़ै कोई तोपते तैस मैल्ली गाते, ते ज़ै कोई दार गुडकाते त तैसेरेलेइ खोल्लू गालू।

9 तुसन मां एरो कौन आए, कि अगर तैसेरू मट्टू रोटी मग्गे, त तै तैस घोड दे?

10 या अगर मछली मग्गे, त तैस सप दे?

11 ते तुस बुरे भोनेरे बावजूद भी अपने मट्टन रोडी चीज़ां देनी ज़ानतथ, त तुशशो स्वर्गेरो बाजी तुसन रोडी चीज़ां कि न देलो, ज़ैना तैस करां मगतन?

12 ज़ेरू तुस चातथ कि लोक तुसन सेइं केरन, तुस भी तैन सेइं तेरहु केरा, किजोकि मूसेरे कानूनेरी त कने नेबी केरि लिखोरी शिक्षा ईए आए।”

⚠⚠⚠⚠⚠⚠ ⚠⚠ ⚠⚠ ⚠⚠⚠⚠⚠⚠ ⚠⚠
(⚠⚠⚠ 13:24)

13 “तुस परमेशेरे राज़े मां सिर्फ सुन्कडे दारेरां बत्तां गेइ सकतथ। किजोकि तैन दार चौडू, ते तै बत बडी खुल्ली आए ज़ै नाशेरे पासे गाचे, ते तैस बत्तां गानेबाले बडे आन।

14 किजोकि तैन दार सोंकडू आए, ते तै बत असुखती आए, ज़ै हमेशेरे ज़िन्दगरे पासे गाचे, ते तेरहां गानेबाले थोडे आन।”

⚠⚠⚠⚠⚠ ⚠⚠⚠ ⚠⚠⚠⚠⚠⚠ ⚠⚠⚠⚠⚠⚠ ⚠⚠⚠⚠⚠
(⚠⚠⚠ 6:43-44,46; 13:25-27)

15 “झूटे नेबन करां खबरदार रेइयथ, ज़ैना तुसन कां भैडडां केरे रूपे मां एइतन पन असली मां तैना मारने वालां गिदां भोतन।

16 तुस तैन केरे कम्मन सेइं तैन पिशानेले, कुन लोक झल्लन सैहीयेरां दाछ कढतन ते करेरी सैहीयेरां फैगू टलोइतन?

17 एन्हेरेलेइ हर एककी रोडे बुट्टे रोडो फल लगते, ते हर एककी बुरे बुट्टे बुरो फल लगते।

18 रोडे बुट्टे बुरो फल न लगगे, ते न बुरे बुट्टे रोडो फल लगगे।

19 ते ज़ैस बुट्टे रोडो फल न लगगे तै केटतां अग्गी मां फुकतां छडतन, तेन्चरे झूटे नेबन भी सज़ा मैलेली।

20 बस्सा, तुस तैन केरे कम्मन सेइं तैन पिशानेले।”

21 “मीजो, हे प्रभु, हे प्रभु, ज़ोनेबाले सारे मैन्हु स्वर्गेरे राज़े मां दाखल न भोले, पन ज़ै, मेरे स्वर्गेरे बाजी केरे मेज़ीं पुड च़लने बालोए तै ज़रूर दाखल भोले।

22 इन्साफेरे दिहाड़ी बड़े लोक मीं सेइं ज़ोले कि, 'हे प्रभु, हे प्रभु,' कुन असेईं तेरे नंवे सेइं भविष्यवाणी नईं कियोरी? ते तेरे नंवे सेइं भूतां नईं कढोरां ते तेरे नंवे सेइं बड़े चमत्कार नईं हेरेवरे?

23 तैखन अवं तैन जो साफ ज़ोलो, 'अवं तुसन कधे न ज़ैनी, ओ बुरां कम्मां करने बालाव, मेरे तुत्तर अगरां दूर भोथ।' ”

🔍 🔍🔍🔍 🔍🔍 🔍🔍 🔍🔍🔍🔍, 🔍🔍🔍🔍🔍 🔍 🔍🔍🔍🔍,
(🔍🔍🔍 6:47-49)

24 “एल्हेरेलेइ ज़ै मेरी गल्लां शुनते ते तैन पुइ अमल करते त तै तैस अकलमन्द मैनेरो ज़ेरो भोलो, ज़ैनी अपनू घर शफ़ड़ी पुइ बनेवरुए ।

25 झड़ी लगगी ते हड़ाई आईं ते अंधगुबारी भोइ ते तैस घरे पुइ पुज़ी, पन तैन घर न डुल्लू, किजोकि तैसेरी मुनीयाद पेक्की शफ़ड़ी पुइ कढोरी थी ।

26 पन ज़ै मेरी गल्लां शुनते ते तैन पुइ अमल न केरे, त तै तैस बेवकूफ़ मैनेरो ज़ेरोए भोलो, ज़ैनी अपनू घर रेती पुइ बनेवरु थियूं ।

27 झड़ी लगगी ते हड़ाई आईं अंधगुबारी भोइ ते तैस घरे कां पुज़ी ते तैन घर डुल्ली ज़ोवं ते बरवाद भोवं ।”

28 ज़ैखन यीशुए एना सैरी गल्लां शुनेइतां झैड़ी, त सारे लोक तैसेरी शिक्षा शुन्तां हैरान भोए ।

29 किजोकि यीशु तैन शास्त्री लोकां केरि ज़ेरि नईं, बल्के अधिकारे सेइं शिक्षा देतो थियो ।

8

🔍🔍🔍 🔍🔍🔍
(🔍🔍🔍 1:40-45; 🔍🔍🔍 5:12-16)

1 ज़ैखन तै पहैड़ी पुड़ां उन्डो अव, त बड़े लोक तैस पत्पती च़ले ।

2 तैखन एक्की कोढ़े यीशु कां ज़ैन्धु केरे भारे विशतां तैस कां मिन्नत केरतां ज़ोवं, “हे प्रभु अगर तू चास त मेरू कोढ़ बज्झेई सकतस ।”

3 यीशुए तैस पुइ हथ रेखतां ज़ोवं, “अवं चाताईं, तू बज्झोस ।” ते तै कोढ़ी तैखने साफ़ भोइ जेव ।

4 यीशुए तैस सेइं ज़ोवं, “हेर, एस गल्लेरे बारे मां केन्ची सेइं किछ् न ज़ोइयां । बल्के अपनो आप याजक हिरा । तैल्ला पत्ती, तू अपने बेज्झोनेरे वजाई सेइं च़ढतल च़ाढ, ज़ेसेरे बारे मां मूसा नेवे कानूने मां हुक्म दित्तोरोए, ताके लोकन पतो च़ले कि तू बेज्झोरोस ।”

🔍🔍🔍 🔍🔍🔍🔍🔍🔍🔍 🔍🔍🔍 🔍🔍🔍🔍
(🔍🔍🔍 7:1-10)

5 ज़ैखन यीशु कफरनहूम नगर मां अव त अक रोमी सूबेदार ज़ै 100 सिपेहिन केरो अफसर थियो, तैनी यीशु कां एइतां बिनती की ।

6 “हे प्रभु, मेरो नौकर अधरंगेरो मरीज़ घरे बिमार भोरोए, तै च़लनेरे काबल नईं, ते तै बेड़ि तकलीफ़ी मां आए ।”

7 तैनी तैस सेइं ज़ोवं, “अवं एज्जेलो ते तैस बज्झेइलो ।”

8 सूबेदार* ज़ोने लगो, हे प्रभु अवं एस काबल नईं कि तू मेरे घरे मां एज्जी सकस; पन तू अगर सिफ़ ज़वाना सेइं ज़ोस त मेरो नौकर बेज्झोलो ।

9 किजोकि अवं भी केन्चेरे अधिकारे मां कम केरताईं, ते सिपाही मेरे अधीन आन, ते ज़ैखन एक्की जो ज़ोताईं कि गा, त तै गाते ते होरि जो ज़ोतां एईं, त तै एइते, ते अपने सेवके जो ज़ोताईं इन कम केर त तै केरते ।

* 8:8 सूबेदार: ए यहूदी नईं थियो एल्हेरेलेइ तै ज़ोने लगगोरो थियो अवं इस काबल नईं ।

10 यीशु एन शुन्तां हैरान रेइ जेव, ते एप्पू पत्ती च़लने वाले मैनन सेइं ज़ोने लगगे, “अवं तुसन सेइं सन्न ज़ोताई, कि मीं इस्राएल मुलखे मां इस गैर यहूदी मैनेरो ज़ेरो मैन्हु नईं लोवरो ज़ै मीं पुइ एतुरो विश्वास केरे।”

11 अवं तुसन सेइं ज़ोताई कि बडे गैर कौमां केरे लोक पूर्वरां ते पछ्मेरां एइतां अब्राहमे, इसहाक ते याकूबे सेइं साथी परमेशेरे राज़ेरी धामी मां शामिल भोले।

12 पन इस्राएली लोक बेइर आंधरे मां छ़ड्डे गाले ज़ैड़ी तैना लेरां देते ते दंत चापते राले।

13 ते यीशुए तैस सूबेदारे सेइं ज़ोवं, “घरे जो गा, ज़ेरो तेरो विश्वासे तेरे लेइ तेरहु भोलू,” ते तैखने तैसेरो नौकर बेज्झोइ जेव।

ⓂⓂⓂⓂ ⓂⓂⓂⓂ ⓂⓂⓂⓂⓂⓂ

(ⓂⓂⓂⓂⓂ 1:29-34; ⓂⓂⓂⓂⓂ 4:38-41)

14 ज़ैखन यीशु पतरसेरे घरे जेव, त तैनी हेरू, कि पतरसेरी शिखी बड़ो भुखारे, ते तै लेटोरी थी।

15 तैनी तैसारो हथ टलातो ते अकदम तैसारो भुखार उतरी जेव, ते तै खड़ी उट्टतां तैसेरी सेवा केरने लगगी।

16 ज़ैखन इलोझ भोइ त लोकेईं बडे बिमार, ज़ैन पुइ भूतां केरो सायो थियो तैस कां आने, ते तैनी तैना भूतां अपने वचने सेइं कढां, ते सारे बिमार बज्झाए।

17 ताके यशायाह नेबेरी ज़ोरी तै गल पूरी भोए कि, “तैनी एप्पू इश्शी कमज़ोरी हटेइ ते इश्शी बिमैरी भी मुकेइ।”

ⓂⓂⓂⓂⓂⓂⓂ ⓂⓂⓂⓂⓂ ⓂⓂⓂⓂⓂⓂⓂ ⓂⓂⓂⓂ

(ⓂⓂⓂⓂⓂ 9:57-62)

18 यीशुए अपने च़ेवरे पासन मैन्हु केरि भीइ लेइतां अपने चलन, गलील समुन्दरे पार गानेरो हुक्म दित्तो।

19 ज़ैखन तैना पार गानेरी तियारी केरने लगगे, त तैखन अक शास्त्री मैन्हु तैस कां एइतां ज़ोने लगगे, “गुरू, तू ज़ेरहां भी गालो त अवं तीं पत्ती च़ललेलो।”

20 यीशुए तैस जो ज़ोवं, “लौई केरि कूढां, ते अम्बेरेरे चुड़ोल्लू केरे आले भोतन, पन मैनेरे मट्टे यानी मीं कां कोई ठार नईं ज़ैड़ी अवं झुल्लनी सेक्खी।”

21 चलन मरां एक्के होरे तैस सेइं ज़ोवं, “हे प्रभु, मीं घरे गानेरी अज़ाज़त दे, मेरे बाजेरे मरनेरां बाद अवं तैस देवतां एज्जेलो ते फिरी तीं पत्ती च़ललेलो।”

22 यीशुए तैस जो ज़ोवं, “तू मेरो चेलो वन ते मीं पत्ती च़ल, ते ज़ैना लोक आत्मिक तरीके सेइं मरेंन तैन अपने मैन्हु मरने बलगने दे।”

ⓂⓂⓂⓂ ⓂⓂⓂⓂⓂ ⓂⓂⓂⓂⓂ

(ⓂⓂⓂⓂⓂ 4:35-41; ⓂⓂⓂⓂⓂ 8:22-25)

23 ज़ैखन यीशु किशती मां च़ढो त तैसेरे चले भी तैस सेइं साथी च़ले।

24 ते अचानक समुन्दरे मां अक बड़ो तूफान अव ते किशती छ़लहेईं सेइं छ़पने लगगी ते यीशु तैस मां झुल्लोरो थियो।

25 तैखन चलेईं ते बीझेइतां तैस सेइं ज़ोवं, “हे प्रभु, असन बच्चा! अस त डुबने लोरेम!”

26 तैनी तैन सेइं ज़ोवं, “हे घट विश्वासे बालाव, तुस किजो डरतथ?” तैखन तैनी खडे उट्टतां तूफान त समुन्दर डांटो, तैखने तूफान रुकी जेव त समुन्दर बडे शांत भोव।

27 लोक हैरान भोइतां ज़ोने लगगे, “ए मैन्हु कौन आए कि तूफान त समुन्दर भी एसेरो हुक्म मन्तन!”

ⓂⓂⓂ ⓂⓂⓂⓂⓂⓂⓂ ⓂⓂⓂ ⓂⓂⓂⓂⓂⓂⓂⓂ ⓂⓂⓂⓂ ⓂⓂⓂⓂⓂⓂⓂⓂ ⓂⓂ ⓂⓂⓂⓂⓂⓂⓂⓂⓂⓂ

(ⓂⓂⓂⓂⓂ 5:1-20; ⓂⓂⓂⓂⓂ 8:26-39)

28. जैखन तै गलील समुन्दरेरे पार, गिरासेनी इलाके मां पुजो, त दई मैन्हु जैन पुड़ भूतां केरो सैयो थियो कवरन मांमेइं यीशु कां मिलने आए। तैना एतरे निग्गर थिये, कि कोई भी तैस बत्तां निस्सी न थियो बटतो।

29. तैना ज़ोर-ज़ोरे चिन्डां मारने लगगे ते ज़ोने लगगे, हे परमेशेरा मट्टां, तीं असन सेइं कुन कम्मे? कुन तू वक्ते करां पेइले असन नरके मां छुडने ओरोस?

30. तैन केरां दूर सूरां केरो अक बड़ो धान चरने लोरो थियो।

31. भूतेईं यीशु कां मिनत केरतां ज़ोवं, “अगर तू असन कढने चातस त उन सूरां केरे घाने मांजो भेज्ज।”

32. तैखन यीशुए ज़ोवं, “गाथ,” तैना भूतां तैट्टां निस्तां तैन सूरां केरे घाने मां जेआं, ते सूरां केरो सारो धान उछुडतो-उछुडतो डैल्ले मां गेइतां सारे सूर मेरि जे।

33. तैखन सूरां केरे चारनेवालेईं एन हेरू, त तैना डेरि जे, ते तैनेईं नगरेरे लोकन सेइं सारो बिस्तार दित्तो, ते ज़ैन पुड़ भूतां केरो सैयो थियो तैन केरो हाल भी शुनाव।

34. तैस नगरेरे सारे लोक यीशु सेइं मिलनेरे लेइ आए ते यीशु लेइतां लोक मिनत केरतां ज़ोने लगगे, इशे इलाके मरां चलो गा।

9

~~~~~  
 (~~~~~ 2:1-12; ~~~~~ 5:17-26)

1. फिरी यीशु किशती मां च्चेदतां दरियाए पार जो जेव, ते अपने नगर मां अव।

2. ते हेरा, किछु मैनेईं अक अधरंगी मैन्हु खट्टी पुड़ छुइतां तैस कां आनो, जैखन यीशुए तैन केरो विश्वास हेरो, त तैस अधरंगी मैन्हु जो ज़ोवं, “मट्टा, गा हिम्मत रख, तेरे पाप माफ़ भोए।”

3. एस गल्ली पुड़ किछु शास्त्री एप्पू मांमेइं ज़ोने लगगे, “ए त परमेशेरी तुहीन केरते!”

4. यीशुए तैन केरि मनेरी गल्लां बुझतां तैन जो ज़ोवं, “तुस अपने-अपने मने मां एन्चरां किजो सोचने लगगेरेथ?

5. एन ज़ोनू कुन सुखतुए कि गा ‘तेरे पाप माफ़ भोए,’ या एन ज़ोनू कि ‘उठ, ते च़ल फिर?’

6. पन अवं किछु करनेवालोईं, जैस सेइं तुसेईं बुझनूए कि मैनेरे मट्टे (यानी मीं) धेरती पुड़ लोकां केरे पाप माफ़ केनेरो अधिकार आए। तैखन तैनी तैस अधरंगी मैन्हु जो ज़ोवं, “अपनि खट छुइतां अपने घरजो च़लो गा।”

7. ते अधरंगी मैन्हु तैखने अपनि खट छुइतां घरजो च़लो जेव।

8. लोक एन हेरतां डेरि जे ते परमेशेरी बड़याईं केने लगगे, कि ज़ैनी मैन्हु एतरो अधिकार दित्तोरोए।

~~~~~  
 (~~~~~ 2:13-17; ~~~~~ 5:27-32)

9. जैखन यीशु तैट्टां अग्रोवं च़लो त तैनी अक मत्ती नंखेरो मैन्हु, चुंगी नेनेबालो दफ़तेरे मां विश्शोरो लाव, ते यीशुए तैस जो ज़ोवं, “तू मीं पत्ती च़ल।” तै तैखने यीशु पत्ती च़लो।

10. ते ज़ैखन यीशु अपने च़ेलेरे घरे गेइतां रोट्टी खाने विश्शो ज़ेसेरू नवं मत्ती थियू, त बड़े चुंगी नेनेबाले ते पापी मैन्हु* भी आए ते यीशु त तैसेरे चलन सेइं साथी रोट्टी खाने विश्शे।

11. ज़ैखन फरीसी लोकेईं एन हेरू, त तैनेईं तैसेरे चलन पुच्छू, “तुशो गुरू चुंगी धिन्ने बाले ते पैपी लोकन सेइं साथी रोट्टी किजो खाते?”

12. एन शुन्तां यीशुए तैन मिसाल देइतां ज़ोवं, “सझर लोकन डाक्टरेरी ज़रूरत न भोए, पन बिमारन भोचें।”

* 9:10 9:10 पापी मैन्हु: लोक तैन केरे बारे मां सोचते थी कि एना पापिन।

13 फिर भी तुस गेइतां एस गल्लरो मतलब कढा, “अवं बलिदान नई बल्के दया पसंद केरताई, किजोकि अवं धर्मी लोकन नई बल्के पापी लोकन कुजाने ओरोई ।”

[XXXXXXXXXX](#) [XXXX](#) [XXXX](#) [XXXXXXXX](#) [XXXXXXXX](#) [XXXX](#) [XXXX](#) [XXXXXXXXXXXXXXXX](#)

([XXXXXX](#) 2:18-22; [XXXX](#) 5:33-39)

14 तैखन यूहन्नारे चले यीशु कां एइतां ज़ोने लगगे कि कुन वजा आए, कि अस ते फरीसी लोक त बरत रखतम, पन तेरे चले किजो बरत न रखन?

15 यीशुए तेनन् जुवाब दित्तो, “ड्लाएरे दिहाड़े, ज़ैखन लाडो जैनी सेइं साथी राते, कुन जन शौग बनेई सकतन? पन तैना दिहाड़े एज्जले, ज़ेइस लाडो तैन केरां अलग कियो गालो (यानी मारो गालो), तैखन तैना (अपने दुखेरे वजाई सेइं) बरत रख्वेले ।

16 अवं तुसन अक होरि मिसाल देताई, नंब्वे लिगडेरी टलोई पुराने लिगडे कोई न लाए । किजोकि नंब्वे लिगडेरी टलोई पुराने लिगडे अपने पासे खिच्ची छइडेली । ते तैन पेइले केरां भी जादे छिन्दोलू ।

17 ते नंब्वो दाछारो रस पुरैनी मसकन मां न भरन, किजोकि मसकां फैट्टी गाचिन ते दाछारो रस ज़ैया भोइ गाते ते मसकां भी कोन्वी कम्मैरी न रान । एल्हेरेलेइ नंब्वो दाछारो रस नेव्वी मसकी मां छडतन ताके दुइये बरबाद न भोन ।”

[XXXXXXXX](#) [XXXX](#) [XX](#) [XXXXXXXX](#) [XXXXXXXX](#)

([XXXXXXXX](#) 5:21-43; [XXXXXX](#) 8:40-56)

18 यीशु एन गल्लां हेजू मसां ज़ोने लोरो थियो, त पूरार्थना घरेरो अक प्रधान अव ते यीशु कां मथ्थो टेकतां ज़ोने लागो, मेरी कुई मेरि जोरीए, “पन तू अगर एइतां तैस पुड़ हथ रख्वस त तै हुन्ना ज़ीती भोइ गानीए ।”

19 यीशु तैस सेइं साथी ज़लो जेव, ते चले भी तैस सेइं साथी जे ।

20 ते एरू भोवं कि अक कुआन्श भी थी, ज़ैस 12 सालां केरि खून ज़लनेरी बिमारी थी । तैसां यीशु पत्पती एइतां तैसेरे चोगे सेइं हथ लाव ।

21 किजोकि तै अपने दिले मां एन ज़ोती थी, कि अगर अवं यीशुएरे चोगे सेइं हथ लाएली त अवं बेज्झोइ गानीं ।

22 यीशुए बेदलोइतां तैस कुआन्शरे पासे तकू ते ज़ोवं, “हे कुईए, विश्वास रख, तेरे विश्वासे सेइं तू बेज्झोरस” ते तै तैखने बेज्झोइ जेई ।

23 ज़ैखन यीशु तैस पूरधानेरे घरे पुजो, त लोक नगारो बजाते ते लेरां देंते लाए ।

24 तैखन यीशुए तैन लोकन सेइं ज़ोवं, “दूर भोथ, किजोकि कुई मरीं नई, बल्के झुल्लोरीए ।” एन शुन्तां तैना लोक हसने लगगे ।

25 पन ज़ैखन लोक तैटठां दूर कढे, त यीशुए अन्तर गेइतां कुइयरो हथ ट्लाव, त तै ज़ीती भोइ ।

26 ते एस गल्लरी खबर सारे इलाके मां फैली जेई ।

[XXXXXXXX](#) [XXXX](#) [XXXX](#) [XXXXXXXX](#) [XXXXXXXXXXXX](#)

27 ज़ैखन यीशु तैटठां अग्रोवं ज़लो, त दूई काने तैस पत्ती चिन्डां मारते ज़ोने लगगे, “हे दाऊदेरा मटठां असन पुड़ दया केर !”

28 ज़ैखन तै घरे अन्तर जेव, त तैना काने तैस कां आए, ते यीशुए तैन सेइं ज़ोवं, “कुन तुसन विश्वासे, कि अवं तुसन बज्जेई सकताई?” तैनेईं जुवाब दित्तो “हाँ पूरभु, अस विश्वास केरतम, तू असन बज्जेई सकतस ।”

29 तैखन तैनी तैन केरि एछ्छन सेइं हथ लाव ते ज़ोवं, “तुस विश्वास केरतथ कि अवं बज्जेई सकताई, अवं तुसन बज्जेइलो ।”

30 ते तैना लहने लाए, ते यीशुए तैन रोडेचारे समझेइतां ज़ोवं, “खबरदार ज़ैन मीं तुशुणे लेइ कियूं तैसेरे बारे मां कोन्वी सेइं न ज़ोइयथ !”

31 पन तेनेईं बेइर गेइतां सारे मुलखे मां एस चमत्कारेरे बारे मां ज़ोवं ।

३२

जैखन तैना बेइर चलोरोर थिये, त लोकेई अक मैन्हु जै गल्लां न थियो केरि बटतो, किजोकि तैस पुइ भूतेरो सैयो थियो, तै तैनेई यीशु कां आनो ।

३३ ते जैखन भूतेरो सैयो तैस मेरां कढो, त लट्टो गल्लां केरने लगो, लोक बडे हैरान भोइजेइ ते जोने लगगे, असेई एरो जेरो माजरो इस्राएले मां पेइले कधे नई लाहोरो ।

३४ पन फरीसी लोक जोने लगगे, “ए त भूतां केरे गुरेरी मदी सेइं भूतां कढते ।”

३५

यीशु त कने तैसेरे चले गलील इलाकेरे इलोव्वन ते नगरन मां ते प्रार्थना घरन मां जे । ते तै शिक्षा देतो राव, ते परमेशेरेरे राज्जेरी खुशखबरी शुनातो राव, ते लोकां केरि हर किसमेरी बिमारी ते कमजोरी दूर केरतो राव ।

३६ जैखन तैनी बडे लोक लाए ए तैस तैन लोकन पुइ बडो तरस अव, किजोकि तैना तैन भैड्डां केरे जेरे थिये जैन केरो कोई पुहाल न भोए, तैन केरो बडो बुरो हाल थियो ते तैना टेपलोरे थिये ।

३७ तैखन यीशुए अपने चलन सेइं ज़ोवं, “पकोरी फसलरे जेरे बडे लोक तियार आन जैना परमेशेरेरे वचने पुइ विश्वास केरनू चातन, पन कम केरनेवाले थोडे आन जैना तैन परमेशेरे राज्जेरे बारे मां जोन ।

३८ एल्हेरेलेइ तुस फसलरे मालिके कां प्रार्थना केरा कि तै जादे कम केरनेवाले भेजे, कि तैना लोकन परमेशेरेरे राज्जेरे बारे मां जोन ।”

10

१२

(३:१३-१९; ६:१२-१६)

१ फिरी यीशुए अपने १२ चले एप्पू कां कुजाए, ते तैन भूतां केरो सैयो कढनेरो ते हर बिमारी ते तकलीफ दूर केरनेरो अधिकार दित्तो ।

२ १२ परेरितां केरां नव्वां इना आन, शमौन जैस जो पतरस ज़ोतन ते तैसेरो दूला अन्दरयास, जब्दरू मट्टू याकूब ते कने तैसेरो दूला यूहन्ना,

३ फिलिप्पुस, बरतुल्मै, थोमा, ते मत्ती चुंगी घिन्ने वालो, हलफईरू मट्टू याकूब, ते तदै ।

४ शमौन कनानी, ते यहूदा इस्करियोती जैनी ते दलुवेवरो भी थियो ।

१२

(६:७-१३; ९:१-६; १०:४-१२)

५ एन १२ यीशुए एन ज़ोइतां भेजे, “गैर कौमां केरे पासे न गेइयथ, ते कने सामरी लोकां केरे केन्वी नगर मां न गेइयथ ।

६ बल्के इस्राएलेरे घरानेरी हेरोरि भैड्डन कां गेइयथ ।

७ ते चलते-चलते, एन ज़ोते गेइयथ कि स्वर्गेरू राज नडे ओरूए ।

८ बिमारन बज्जेइयथ, मुइदन जीते केरथ, कोदी केरू कोद साफ केरथ, ते भूतां केरो सैयो केदथ, तुसन एन सब किछ मुफ्त मैलोए ते मुफ्त देइयथ ।

९ ते साथी सोन्नु, चाँदी ते पेंडसे न रेखथ ।

१० ते न बत्तारे लेइ झोलो नेइयथ ते न दूई-दूई लिगडां, ते न बूट ते न सोटी, किजोकि मज्जदूर अपनि मज्जदूरारो हकदार भोते ।”

११ “जैखन तुस केन्वी नगर या इलोव्वे मां गाथ त तुस एरे मैनेरो पतो केरथ, कि कौन अतबारेरे काबल? तैट्टां ज़ां तगर गानेरो वक्त न एज्जे त तांतगर तैडी तैस्से कां रेइयथ ।

१२ ते घरे मां अन्तर गांते बार तैन जो शान्ति देइयथ ।”

१३ “अगर तैन घर तुशशे काबल भोलू त शान्ति पुज्जेली, ते अगर तैन घर तुशशे काबल न भोलू त तुशशी शान्ति तुसन पुइ वापस एज्जेली ।

14 जै तुसन कबूल न केरे ते तुशशी गल न मन्ने त तैस घरे या नगर मरां बेइरोवं गांते वार अपने पावां केरि धूड तैडी झैडथ ।”

15 “अवं तुसन सेइं सन्न जोताई कि इन्साफेरे दिहाडे तैस नगरेरो हाल सदोम ते अमोरा नगरां केरे हाले करां भी जादे बुरो भोलो ।”

???????? ?

(???? 13:9-13; ???? 21:12-17)

16 “हेरा, अवं तुसन भैड्डां केरे गिदन मां भेजने लोरोई, एल्हेरेलेइ तुस सप्पां केरे जेरे हुशार ते कबूतरां केरे जेरे सादे बनथ ।

17 मैन्न करां हुशार रेइयथ तैना तुसन ट्लेइतां सभान मां पैश केरेले ते प्रार्थना घरन मां तुसन कोडां केरि मार दुवाले ।

18 ते तुसन मेरी वजाई सेइं गवन्नरन ते कने राजन कां हाज्र केरेले, ताके तुस तैन मां ते गैर कौमन मां मेरे गवाह बनथ ।

19 पन जैखन तैना ट्लेवेइतां हावाले केरेले, त तुस फिकर न केरथ, कि अस कुन जोमेले ते केन्त्रे जोमेले, किजोकि जैन किछ ज़ोनू भोलू तैखने अवं तुसन जोइलो ।

20 किजोकि जोने बाले तुस नई, बल्के पवित् आत्मा भोलो जै तुशशे स्वर्गेरि वाजी परमेशेरे तरफां आए ।”

21 “दूला, दूलाए ते वाजी मट्टे मारनेरे लेइ सॉफेले, ते मट्टां अपने अम्मा वाजी केरे खलाफ भोइतां तैन माराले ।

22 मेरे नंवेरो वजाई सेइं सब लोक तुसन सेइं वैर केरेले, पन जै आखरी तगर वरदाशत केरेलो तैस्से मुक्ति मैलेली ।

23 जैखन लोक तुसन एककी नगर मां सताले, त होरि नगर मांजो नेशशी गेइयथ, अवं तुसन सेइं सन्न जोताई कि एस करां पेइले तुस इस्राएलेरे सैरी नगरन मां तुशशू सफर पूरू न भोलू, त अवं मैनेरू मट्टू एज्जी गालू ।”

24 “चेलो अपने गुरू करां बड्डो न भोए, ते न नौकर अपने मालिके करां ।

25 चेलेरे लेइ त एन्ने बड्डुए कि तै अपने गुरेरो जेरो भोए, ते नौकरेरे लेइ एन्ने बड्डुए कि तै अपने मालिकेरे बराबर भोए, अगर तैनेई मालिके जो शैतान ज़ोवं, त तैसेरे घरेबालन जो केतूरू ज़ोनूए!”

???? ?

(???? 12:2-7)

26 “तुस तैन करां न डेरथ, किजोकि कोई चीज छप्पोरी नई, जै खोल्ली न गाली, ते कोई भेद छप्पोरो न रालो, बल्के सारो भेद बांदो भोलो ।

27 जैन किछ अवं तुसन सेइं आंधरे मां जोताई, तुस तैन दीसां जोइयथ, ते जैन किछ तुशशे कन्ने पत्र बल्हे सेइं शुनावं गाते, तुस लाए पुड गेइतां तैसेरो प्रचार केरथ ।

28 तुस तैन करां न डेरथ जैना जानी त मारतन, पन आत्मा न मैरी बटन, परमेशेरे करां डरा, जै आत्माई ते जानी दुइने नरके मां नाश केरि बटते ।

29 कुन एककी सिकेरी दूई च़ड़ोली न बिकन? फिरी भी तुशशो बाजेरे मेरजरे बगैर तैन मरां अक भी धेरती पुड न झैडी बटन ।

30 परमेशर तुशशे हर गल्लरी फिकर केरते इडी तगर तुशशे दोगेरे बाल भी गन्नोरेन ।

31 एल्हेरेलेइ डरा न, तुशशी कदर बेडि च़ड़ोलन करां भी बडी जादे ।”

???? ?

(???? 12:8-9)

32 “जैना लोक, मैन्हु केरे सामने मेरो इकारा केरतन कि तैना मेरे चेलेन, त अवं भी अपने स्वर्गेरो वाजी केरे सामने तैन केरो इकारा केरेलो, कि तैना मेरे चेलेन ।

33 पन ज़ैना लोक, मैन्हु केरे सामने इन ज़ोने करां डरेले, कि तैना मेरे चलेन, त अवं भी तैन केरो अपने स्वर्गोरो बाजेरे सामने इन्कार केरेलो, कि एना मेरे चले नई।”

ⓂⓂⓂⓂⓂⓂⓂⓂⓂⓂⓂⓂⓂⓂⓂⓂⓂⓂⓂⓂ
(ⓂⓂⓂⓂⓂ 12:51-53; 14:26-27)

34 “इन न सैमझथ कि अवं धेरती पुड़ एल्हेरेलेइ ओरोई लोक मेल मिलापे सेइं रान, पन मेरू एज्नु लोकन एप्पू मांमेइं लड़नेरी वजा भोइ, मेल मलाप नई।

35 अवं एल्हेरेलेइ ओरोई कि मट्टे बाजी करां ते कुइये अम्मा करां ते नुशी शिखी करां अलग केरि।

36 मैनेरे दुश्मन त तैसेरे अपने घरेरे लोक भोनेन।”

37 ज़ै कोई अम्मा या बाजी मीं करां जादे ट्लारे समझते, तै मेरो चेलो बन्नेरे काबल नई ते ज़ै कोई मट्टे या कुइये मीं करां जादे समझते, तै भी मेरो चेलो बन्नेरे काबल नई।

38 ज़ै कोई मेरो चेलो भोनेरी वजाई सेइं दुःख झैल्लनेरे लेइ त कने मरनेरे लेइ तियार नई, त तै भी मेरो चेलो बन्नेरे काबल नई।

39 ज़ै कोई मरने करां बन्ननेरे लेइ मेरो इन्कार केरेलो, त तैन हमेशारी जिन्दगी न मैलेली। पन ज़ै मीं पुड़ विश्वास केरनेरे वजाई सेइं अपने जान देनेरे लेइ भी तियार भोलो, त तैस हमेशारी जिन्दगी मैलेली।

ⓂⓂⓂⓂⓂⓂⓂⓂⓂⓂⓂⓂⓂⓂⓂⓂⓂⓂⓂⓂ
(ⓂⓂⓂⓂⓂ 9:41)

40 “ज़ैना तुसन कबूल केरतन, तैना मीं कबूल केरतन, ज़ैना मीं कबूल केरतन, तैना सिर्फ मीं नई, पन तैना परमेशरे भी कबूल केरतन, ज़ैनी अवं इड़ी भेजोरोई।”

41 “ज़ै नेबन, नबी सेमझतां कबूल केरेलो, परमेशर तैस नेबी केरे बराबर इनाम देलो, ते ज़ै धेर्मी मैन्हु धर्मी सेमझतां कबूल केरते, परमेशर तैस धेर्मी बराबर इनाम देलो।

42 ज़ै कोई इन निकड़न मरां एक्की मेरो चेलो बुझतां सिर्फ अक कटोरो ठंडू पानी पियालो, अवं तुसन सेइं सन्न ज़ोताई तैस पक्कू इनाम मैलनू आए।”

11

ⓂⓂⓂⓂⓂⓂⓂⓂⓂⓂⓂⓂⓂⓂⓂⓂⓂⓂⓂⓂ
(ⓂⓂⓂⓂⓂ 7:18-35)

1 ज़ैसन यीशुए अपने 12 चेलन हुक्म दित्तो, त तै तैट्टां चलो जेव, ताके चेलां केरे नगरन मां गेइतां शिक्षा दे ते परचार केरे।

2 यहन्ना नेवे कैदखाने मां मसीहेरे कम्मां केरे बारे मां शुन्तां तैस कां अपने चले इन पुच्छने भेजे।

3 “तैनी तैन सेइं ज़ोवं, एजनेबालो मसीह तू आस, जेसेरे बारे मां परमेशरे वादो कियोरोए, या आस केन्ची होरि बलगम?”

4 यीशुए तैन जुवाब दित्तो, “ज़ैन किछ् तुस शुन्तन ते लातथ तैन गेइतां यहन्ना सेइं ज़ोथ।

5 कि काने लातन, ते टोन्टे च़लतन, ते कोदी केरू कोढ़ शुद्ध भोते, ते टोंऊने शुन्तन, ते मुइदे ज़ीते भोतन, ते गरीबन खुशखबरी शुनाई गातीए

6 परमेशर तैस बरकत देते, ज़ै मीं पुड़ शक न केरे।”

7 ज़ैसन यहन्नारे चले तैट्टां च़ले जे, त यीशु लोकन सेइं यहन्नारे बारे मां ज़ोने लगो, “तुस सुनसान ठैरी कुन हेरने जोरे थिये? कुन हवाई सेइं हिलते निरैठरे डाले?

8 त फ़िरी होरू कुन हेरने जोरे थिये? माघां लिगड़ां लेइतां कोई? हेरा ज़ैन माघां लिगड़ां लेइतां भोतन तैना महलन मां रातन।

9 फ़िरी तुस कुन हेरने जोरे थिये? कुन कोई नेबी? हाँ पन अवं तुसन सेइं ज़ोताई कि नेबी करां भी बड्डे हेरने जोरे थिये।

10 ई तैए यूहन्ना आए ज़ेसेरे बारे मां परमेशर पवित्रशास्त्रे मां ज़ोते,
कि हेरा, 'अवं अपने बिस्तार देनेबालो तीं अग्री भेजताई,
जै तेरे लेइ बत तियार केरेलो ।' ”

11 अवं तुसन सेइं सच्च ज़ोताई, कि ज़ै कुआन्शन करां ज़रमोरोए तैन मां यूहन्ना बपतिस्मो देनेबाले
करां कोई बड्डो नईं भोरो, पन ज़ै स्वर्गेरे राज़े मां निकडे करां निकडोए तै तैस करां भी बड्डोए ।

12 यूहन्ना बपतिस्मो देनेबालेरे दिहाड़न करां अज तगर प्रचार भोइ रावरोए, ते स्वर्गेरू राज़
जल्दी बधने लोरूए, पन बडे निग्गर लोक तैस पुइ हमलो केरतन ।

13 सारे नेबी केरे लेख, ते मूसरो कानून यूहन्ना तगर भविष्यवाणी केरते राए ।

14 अगर तुस चाथ ते मन्थ, एलिव्याह ज़ेसेरे बारे मां नेवेईं ज़ोरू थियूं, कि ते एजनेबालो थियो
तै ईए ।

15 ज़ै कोई समझनू चाते, तै ध्याने सेइं शुने ते समझे ।

16 “अवं इस ज़मानेरे लोकां केरि मिसाल केस सेइं देईं, इना तैन मट्टां केरे ज़ेरेन ज़ैना बज़ारन
मां बिशतां अपने दोसन सेइं शिकैयत केरतन,

17 कि असेईं तुशे लेइ बाजो बज़ाव, ते तुस न नञ्चे, ते असेईं शौग कियो ते तुसेईं छाती न
पिट्टी ।

18 किजोकि यूहन्ना बपतिस्मो देनेबालो* जादे तर बरत रखतो थियो, ते शराब न थियो पीतो, ते
तैना तैस जो ज़ोतन कि एस पुइ भूतेरो सैयो आए ।

19 ते मैनेरू मट्टू यानी अवं खातो पीतो अव, हेरा, ते तैना ज़ोतन पेटू ते शराबी मैन्हु ते चुंगी
नेनेबाले ते पापी लोकां केरो दोस्त, पन अक्लमन्द कौने तैसेरे कम्मेईं सेइं पतो ज़लते ।”

(***** 10:13-15)

20 तैखन यीशु फिरी तैन नगरन मां गेइतां तैट्टेरे लोकन झिड़कतां ज़ोने लगो, ज़ैन मां तैनी
चमत्कार कियोरे थी, पन तैनेईं अपने पापन करां मन न फिराव ।

21 हे खुराजीन नगरेरे लोकव! तुसन पुइ अफ़सोस, हे बैतसैदा नगरेरे लोकव तुसन पुइ अफ़सोस,
कि ज़ैना चमत्कार तुसन मां किये, अगर एना चमत्कार सूर ते सैदा नगरन मां कियोरे भोथे, त तैन
लोकेईं केइसेरे देतेरी टाट पलेटतां ते मांज़नी मां बिशतां† अपने पापन करां मनफिरावरो भोथो ।

22 पन अवं तुसन सेइं ज़ोताई, कि इन्साफेरे दिहाड़े परमेशर, ज़ै सज़ा सूर ते सैदा नगरां केरे लोकन
देलो, तुशशी सज़ा तैस करां भी जादे भोली ।

23 ते हे कफ़रनहूम नगरेरे लोकव, कुन तुस सोचतथ कि स्वर्गे मां तुशशी आदर भोनीए! नईं तुस
त नरके गाले ज़ैड़ी पापी लोकन सज़ा मैलेली! किजोकि ज़ैना चमत्कार तुसन मां किये, अगर मीं
एना सदोम नगरे मां कियोरे भोथे त सदोम नगर अज तगर भी भोनू थियूं ।

24 पन अवं तुसन ज़ोतां कि इन्साफेरे दिहाड़े परमेशर ज़ै सज़ा सदोम नगरेरे लोकन देलो, तुशशी
सज़ा तैस करां भी जादे भोली ।”

(***** 10:21-22)

25 तैखन यीशुए ज़ोवं, “हे बाज़ी, स्वर्ग ते धेरतरे प्रभु, अवं तेरू शुकर केरतां कि तीं एना गल्लां
अक्लमन्द ते समझदार लोकन करां छपेइतां रेख्खी ते तैन लोकन पुइ वैदी की, ज़ैना निकके बच्चां
केरे ज़ेरे आन ।

26 हां, हे बाज़ी तीं एन्ने रोडू लग्गू ।

* 11:18 11:18 यूहन्ना: हन्ना टिटां ते जंगली माछी खातो थियो । † 11:21 11:21 टाट पलेटतां ते मांज़नी मां बिशतां:
बडे पेइले लोक टाट पलेटतां ते मांज़नी मां बिशतां अपने पापन करां मन फिराते थी ।

27 “मेरे बाजेई सब किछू मेरे सुपुर्द कियोरूए; कोई होरो मट्ठे‡ न जानि, सिर्फ बाजी जानते; कोई बाजी S न जानि सिर्फ मट्ठू जानते, या तै मैन्हू बाजी जानते जैस पुड़ मट्ठू बांदो करने चाए।

28 “हे मेहनत करनेवाले* लोकव, ते भारे सेइं थकोरे लोकव मीं कां एज्जा; अवं तुसन आराम देइलो।

29 मेरे अधीन एन्चरे भोथ जेन्चरे दांत जुंए हैट भोते, ते जैन किछू अवं तुसन शिखालताई तैस शिखा, किजोकि अवं श्रीफ आई ते दिलेरो नमर आई ते तुश्री जानी आराम मैलेलो।

30 जै भार अवं तुसन देइलो तै पोल्लोए, तुस तैस आरामे सेइं छुई सकतथ।”

12

~~~~~

(~~~~~ 2:23-28; ~~~~~ 6:1-5)

1 यीशु आरामेरे दिहाडे ऊडारन मामेइं एककी बत्तां ज़लोरे थियो, ते तैसेरे चेलन द्लुख लगगी, ते तैना शिल्लां टलोइतां खाने लगगे।

2 फरीसी लोकेई एन लेइतां यीशु सेइं ज़ोवं, “तक! तेरे चेले तैन कम केरने लोरेन जैन आरामेरे दिहाडे केरनू जेइज नई।”

3 यीशुए तैन जुवाब दित्तो, “कुन तुसेईं पवित्रशास्त्रे मां कथे नई पढ़ेरू कि जेइस इशे पूर्वज दाऊद राज़ो त तेसेरे साथी द्लुखोरे थिये त तैनेई कुन कियेरू थियू?

4 ते केन्चरे परमेशेरे घरे मां जेव, ते जैना ज़ेदोरी रोटटी थी तैट्टां एन्तां एप्पू भी खेइ, ते अपने सैयन भी दित्ती, ते तैनेई भी खेइ हालांकी तैना रोट्टी खैनी तैन केरे लेइ जेइज थी, तैना सिर्फ याजक खेइ सकते थिये।

5 या तुसेईं मूसेरो कानून मां एन भी नई पढ़ेरू, कि याजक मन्देरे मां आरामेरे दिहाड़ेरी विधि न मन्ने पुड़ भी बेकसूर भोतन।

6 पन अवं तुसन सेइं ज़ोताई कि इडी तैए, जै मन्देरे करां भी बड्डोए।

7 अगर तुस एल्हेरो मतलब जानेथे कि, अवं बलिदान नई बल्के दया पसंद केरताई, त तुस बेकसूर कुसुरवार न बनाथे।

8 किजोकि मैनेरू मट्ठू यानी अवं आरामेरे दिहाड़ेरो भी प्रभु आई।”

~~~~~

(~~~~~ 3:1-6; ~~~~~ 6:6-11)

9 यीशु तैट्टां निस्तां तैन केरे प्रार्थना घरे मां जेव।

10 तैडी अक मैन्हू थियो, जेसेरो हथ शुक्कोरो थियो, तैनेई यीशु दोष लानेरे वहाने सेइं तैस पुच्चू, “कुन आरामेरे दिहाडे कोई बज्ञानो जेइजे?”

11 तैनी तैन जो ज़ोवं, “तुसन मरां कौने, जेसेरी अक्के भैड भोए, ते तै आरामेरे दिहाड़े गत्ते मांजो बिछड़े, त तुस कुन तैस तैट्टां बेइर न कढेले?

12 मैनेरी कीमत त भैडी करां केत्री जादे! एल्हेरेलेइ आरामेरे दिहाड़े रोडू कम केरनू जेइजे।”

13 तैखन यीशुए तैस मैन्हू जो ज़ोवं, “अपनो हथ अग्रोवं केर।” तैनी मैने अपनो हथ अग्रोवं कियो, ते अकदम तैसेरो हथ बेज्झोव।

14 तैखन फरीसी लोक बेइर गेइतां तैसेरी खलाफ साजिश केरने लगगे, कि एस केन्चरे मारम?

~~~~~

15 इन बुझतां यीशु तैट्टां ज़लो जेव। ते बड़े लोक तैस पत्ती ज़ले, ते तैनी तैना सब बज्झाए।

16 ते तैनी तैना खबरदार किये, कि मेरे बारे मां केन्ची सेइं न ज़ोइयथ।

17 ताके यशायाह नेबेरी ज़ोरी तै गल पूरी भोए:

- 18 “हेरा ई मेरो सेवके जै मीं चुनोरोए, ई मेरो ट्लारोए जैस पुड़ मेरो दिल खुशे, अवं अपनि आत्मा तैस पुड़ छुडेले, ते तै गैर कौमन मां गेइतां इन्साफेरी खबर शुनालो ।
- 19 तै न लड़ाई केरेलो, ते न शौर,  
ते बज़ारन मां कोई तैसेरी आवाज़ न शुनेलो ।
- 20 ते ए दलेन्चोरे निरैठरे डाले न टलोडेलो,  
ते न बलतो दीयो हिशाहो जां तगर इन्साफ भारी न भोए ।
- 21 ते तैसेरे नव्वे पुड़ गैर कौमां उमीद रेखेली ।”

ⓂⓂⓂⓂ ⓂⓂ ⓂⓂⓂⓂⓂⓂ

(ⓂⓂⓂⓂ 3:20-30; ⓂⓂⓂⓂ 11:14-23)

- 22 तैखन लोकेई अक मैन्हु यीशु कां आनो जै कानो ते लट्टो थियो ते तैस पुड़ भूतेरो सैयो थियो, ते तैनेई तैस कां आनो, तैनी तै ठीक कियो, ते तै लहने लगो ते गल्लां भी करने लगो ।
- 23 एन हेरतां लोक हैरान भोइतां ज़ोने लगगे, “कुन एन दाऊदेरू मट्टए?”
- 24 पन फरीसी लोकेई एन शुन्तां ज़ोवं, “ए त भूतां केरे प्रधान शैतानेरी मट्टी सेइं भूतां केरो सैयो कढते ।”
- 25 यीशुए तैन केरे मन्नां केरे खियाल ज़ैनतां तैन सेइं ज़ोवं, “जैस राज़े मां फूट पेचे, तैन राज़ बनोरू न रइ सके, ते केन्वी नगर या खानदाने मां फूट पेचे, तैन भी बनोरू न राए ।
- 26 अगर शैतान एप्पू अपने भूतां कढे, त तै अपनो मुखालफ एप्पू भुओ, त फिरी तैसेरू राज़ केन्चरे बनोरू रेइ सकते?
- 27 अगर अवं शैतानेरी मट्टी सेइं भूतां केरो सैयो कढताई त तुश्रशे अपने मैन्हु केसेरी मट्टी सेइं कढतन? तैन्ना तुश्रशो हाकिम भोले ।
- 28 पन अगर अवं परमेशेरी आत्माे मट्टी सेइं भूतां केरो सैयो कढताई त परमेशेरू राज़ तुश्रशे नेडे पुज़ोरूए ।
- 29 या कोई मैन्हु केन्वी ज़ोरेबाले मैनेरे घरेरे मां गेइतां तैसेरो माल तांतगर लुट्टी न सके, ज़ांतगर कि तै पेइले तैस ज़ोरेबाले मैन्हु बेंधी न छुड्डे । तैखन तै तैस ज़ोरेबाले मैनेरो माल लुट्टी सकते ।
- 30 ज़ै मीं सेइं साथी नई तै मेरे खलाफ, ते ज़ै मीं सेइं साथी नई तै अकोट्टू न केरे ते इरां उरां बिटलते ।
- 31 एल्हेरेलेइ अवं तुसन सेइं ज़ोताई कि, मैन्हु केरे सारे पाप ते तुहीन माफ़ भोली, पन पवित्त्र आत्माेरी तुहीन माफ़ न भोली ।
- 32 ज़ै कोई मैनेरे मट्टेरे खलाफ किच्छ ज़ोलो, त तैसेरो ए पाप माफ़ कियो गालो, पन ज़ै पवित्त्र आत्माेरी तुहीन केरे, त तैस मैन्हु न इस दुनियाई मां माफ़ भोलू ते न एजने बैली दुनियाई मां माफ़ भोलू ।”

ⓂⓂⓂ ⓂⓂ ⓂⓂⓂⓂⓂⓂ ⓂⓂ

(ⓂⓂⓂⓂ 6:43-45)

- 33 “अगर बुट रोडे, त तैसेरे फल भी रोडो भोलो, अगर बुट बुरोए त तैसेरे फल भी बुरो भोलो, किजोकि बुट अपने फले सेइं पिशैनाते ।
- 34 तुस ज़हरीले सपेरे बच्चवां केरे बुरे भोइतां रोडी गल केन्चरे ज़ोई सकतथ? किजोकि ज़ैन दिले मां भोते तैन्ने ज़बानी पुड़ एइते ।
- 35 रोडो मैन्हु दिलेरे रोडे खज़ाने मरां रोडी गल्लां कढते, ते बुरो मैन्हु बुरे दिलेरे बुरे खज़ाने मरां बुरी गल्लां कढते (दिल खज़ानेरो ज़ोरोए) ।
- 36 अवं तुसन सेइं ज़ोतां, कि ज़ैना-ज़ैना निक्केमी गल्लां मैन्हु ज़ोले, इन्साफेरे दिहाडे लोकन अपनि हर एककी तैस गल्लरो हिसाब देनो भोलो ।
- 37 किजोकि तू अपने गल्लेई सेइं धर्मी ते अपने गल्लेई सेइं दोषी भोलो ।”



११:२१-२३) (११:२१-२३)  
(११:२१-२३) 8:11-12; ११:29-32)

38 इस पुड़ किछ शास्त्री ते फरीसी लोकेई तैस सेइ ज़ोवं, "हे गुरू अस तीं करां कोई निशान हेरनो चातम ।"

39 तैनी तैन जुवाव दित्तो, "इस ज़मानेरे बुरे ते बदमाश लोक निशान हेरनो चातन, पन तैन योना नेबेरे निशानेरे अलावा होरो कोई निशान न दित्तो गालो ।

40 जेन्चरे योना नबी ट्लाई दिहाडे ते ट्लाई रातन मेछलरे पेटे मां राव, तेन्चरे मैनेरू मट्टू यानी अवं भी ट्लाई दिहाडे ते ट्लाई रातन ज़मीनी मां रालो ।

41 नीनबेरे लोक इन्साफेरे दिहाडे इस ज़मानेरे लोकन सेइ साथी खड़े भोइतां एन दोषी बनाले, एल्हेरेलेइ कि तैनेई योनारो प्रचार शुन्तां पापन करां मन फिराव, ते हेरा इड़ी तैए, ज़ै योना करां भी बड्डोए, पन तुसेई पापन करां मन फिरानो न चाव ।

42 दक्षिणेरी रानी इन्साफेरे दिहाडे इस ज़मानेरे लोकन सेइ साथी खड़ी भोइतां दोषी बनाली, किजोकि ते बडे दूरेरां सुलेमान राजेरू ज्ञान शुन्नेरे लेइ ओरी थी, पन हेरा इड़ी तैए, ज़ै सुलेमाने करां भी बड्डोए ।"

११:२४-२६) (११:२४-२६)  
(११:२४-२६) 11:24-26)

43 "ज़ैखन केन्ची मैन्हु मरां भूतां केरो सैयो निसते, त तै अपने आरामेरे लेइ बेरान ठारां हंठते, पन ज़ैखन तैस ठार न मैल्ले ।

44 तैखन ज़ोते, कि अवं वापस अपने तैस्से घरे मां गाताई ज़ैस मरां निसोरो आई, ते ज़ैखन तै वापस एइते, त तैस तैन घरे खाली, धोवेरू ते साफ सुथरू सज्जो-सजेवरू मैलते ।

45 तैखन तैन गाते ते सत बुरां भूतां एप्पू सेइ साथी आनते, ते तैन सब तैस मां रहतन, ते तैस मैनेरो हाल पेइले हाले करां भी जादे बुरो करतन, तेन्चरे इस ज़मानेरे बुरे लोकां केरो हाल भी एरो भोनोए ।"

३:३१-३५; ८:१९-२१) (३:३१-३५; ८:१९-२१)  
(३:३१-३५; ८:१९-२१)

46 ज़ैखन तै मैनन सेइ गल्लां केरने लोरो थियो, त तैसेरी अम्मा ते कने तैसेरे दूला खड़े थी, तैना तैस सेइ गल्लां केरनि चाते थिये ।

47 केन्चे गोइतां तैस सेइ ज़ोवं, "बेइर तेरी अम्मा ते दूला खड़े आन, तैना तीं सेइ गल केरनि चातन ।"

48 एन शुन्तां तैनी पतो देनेबाले जो ज़ोवं, "कौने मेरी अम्मा, ते कौन मेरे दूला?"

49 ते अपने चेलां केरे पासे हथ अग्रोवं केरतां ज़ोवं, "हेरा मेरी अम्मा, ते मेरे दूला इना आन ।

50 किजोकि ज़ै कोई मेरे स्वगेरि बाजेरी मेर्जी पुड़ चलते तैए मेरो दूला ते मेरी बेइन्, ते मेरी अम्मा आए ।"

## 13

४:१-९; ८:४-८) (४:१-९; ८:४-८)  
(४:१-९; ८:४-८)

1 तैस दिहाडे यीशु घेरं निस्सो, ते गलील समुन्देरे बन्ने पुड़ गोइतां बिशो ।

2 तैसेरे नेवरे पासन लोकां केरि एतरी भीड़ अकोट्टी भोइ, ते तै एक्की किशती मां चढो ते बिशो जेव, ताके तै सेन्भी लोकन परमेशेरी गल्लां केरि शिक्षा देइ सके, ते सारे लोक बन्ने पुड़ खड़े राए ।

3 तैखन तैनी तैन सेइ कहैनी केरे तरीके सेइ वेड़ि गल्लां ज़ोई, "एक्सां अक बीज बेनेबालो बीज बेने जो जेव ।

4 बीज बते बार किछ, बीज बत्तेरे इलेखी बिछड़ू त चुड़ोल्लेई एइतां तैन बीज चुनु ।

5 किछ बीज धोइनबाली ज़मीनी पुड़ बिछड़ू, जेड़ी तैस डुग्धी मित्ती न मेलनेरे वजाई सेइ तैन लूशी उगगू ते बूटो लगो ।

6 पन ज़ैखन दिहाड़ो निस्सो, त तै निकडो बूटो फुक्कोई जेव । ज़ील न छुड्डनेरे वजाई सेइं शुक्की जेव ।

7 ते किछ बीज कटां केरे झैल्लन मां बिछूडू । ज़ैखन तैड़ी बूटो लगो, त कटां केरे झैल्लेई भी वेडोइतां तै बूटो दवेइ छुड्डो ।

8 पन ज़ैन रोड़ी ज़मीनी मां बिछूडू, त तैस फल भी लगो केन्ची शौव गुणा केन्ची शठ गुणा, ते केन्ची टली गुणा ।

9 ज़ै कोई समझनू चाते, तै ध्याने सेइं शुने ते समझे ।”

⚠️⚠️⚠️⚠️⚠️⚠️⚠️⚠️⚠️⚠️⚠️⚠️⚠️⚠️  
(⚠️⚠️⚠️ 4:10-12; ⚠️⚠️⚠️ 8:9-10)

10 चेलेईं यीशु कां एइतां पुच्छू, “तु लोकन सेइं कहैनी केरे तरीके सेइं गल्लां किजो केरतां?”

11 तैनै जुवाब दित्तो, “तुसन त स्वर्गेरे राज्जरे भेदां केरि समझ दित्तोरीए” पन होरि लोकन नई ।

12 किजोकि ज़ैस कां परमेशेरी मर्जी समझनेरी इच्छा आए, तैस परमेशर जादे समझ देलो । पन ज़ैस कां परमेशेरी मर्जी समझनेरी इच्छा नई, तैस केरां, थोड़ी जेरि समझ, ज़ै तैस कां आए, तै भी नी गाली ।

13 अवं तैन सेइं एल्हेरेलेइ कहैन्न मां गल्लां केरतां, कि तैन, तैना बार-बार शुनेले, पन मेरी गल न समझेले ।

14 तैन केरे बारे मां यशयाह नेबेरी भविष्यवाणी पूरी भोतीए,

“तुस कन्नेई सेइं त शुनेले पन समझेले न, तुस एछछन सेइं त लाएले पन पिशैनी न सकेले ।”

15 “किजोकि एना लोकां केरे दिलन पुड चरभी भेरोरीए,

ते एना कन्न सेइं उकडु शुन्तन, ते एनेई अपनि एछछी तुमोरिन,

एरू न भोए कि तैना एछछेई सेइं लहन,

ते कन्नेई सेइं शुन्न ते दिले सेइं समझन,

ते मेरे पासे फिरन ते अवं तैन बज्जेई ।”

16 “पन तुश्री एछछी धन आन, कि तुस लातथ ते तुश्रे कन्न धन आन किजोकि तुस शुन्तन ।

17 अवं तुसन सेइं सन्न जोताई, कि बड़े नेबी ते धरमी लोकेई चाव कि ज़ैन गल्लां तुस हेरतथ तैना हेरन, पन न हेरी बेटि, ते ज़ैना गल्लां तुस शुन्तन शुन्न, पन न शुनी बेटि ।”

⚠️⚠️⚠️⚠️⚠️⚠️⚠️⚠️⚠️⚠️⚠️⚠️⚠️⚠️  
(⚠️⚠️⚠️ 4:13-20; ⚠️⚠️⚠️ 8:11-15)

18 “हूनी तुस बीज बेनेबालेरी कहैनरो मतलब शुना ।

19 बीज बेनेबालो तै आए, ज़ै परमेशेरी गल्लां लोकन शुनाते । ज़ैना मैन्हु परमेशेरी गल्लां शुन्तन, तैन मरां किछ लोक तैस बत्तरे ज़ेरे आन, ज़ेड़ी बीज बिछूडते । तैना त परमेशेरी गल्लां शुन्तन, पन शैतान अकदम एइतां तैन मैन्हु केरे दिले मरां परमेशेरी गल्लां केडूडी छुडते ।

20 ते ज़ैन घोड़नबाली ज़मीनी मां बेवं, एना तैना आन, ज़ैना खुशी सेइं वचन शुन्तन कबूल केरतन ।

21 पन एप्पू मां ज़ील न रखनेरे वजाई सेइं तैन थोड़े दिहाड़ी केरूए, ते ज़ैखन वचनेरे वजाई सेइं तैन पुड मुसीबत या जुलम भोते त तैखने ठोकर खातन ।

22 होरे किछ लोक ज़ैना परमेशेरी गल्लां शुन्तन, तैना तैस कटां केरे झैल्लां केरे ज़मीनेरे ज़ेरे आन । पन दुनियारो फिर ते दौलतरे वजाई सेइं धोखो खातन, ते तैना बेफल रेइ गाते ।

23 ज़ैन रोडि ज़मीनी मां बेवं, एना तैना लोकन ज़ैना वचन शुन्तन ते समझतन, ते तैस फल भी लगते कोन्ची शौव गुणा कोन्ची शठ गुणा, ते केन्ची टलही गुणा ।”

⚠️⚠️⚠️⚠️⚠️⚠️⚠️⚠️⚠️⚠️

24 यीशुए तैन अक होरि मिसाल देइतां ज़ोवं, “स्वर्गेरू राज़ तैस मैनेरू ज़ेरूए ज़ैनी अपने ऊडारे मां रोडू बीज़ बेवं।

25 पन ज़ैखन लोक झुलोरो थियो, त तैसेरे दुश्मने एइतां तैसेरे ऊडारे मां गेहुं केरे बीजे मामेइं जंगली बीज़ बेवं।

26 ज़ैखन पट्लां ते शिल्लां लगां लगने त तै जंगली डाल भी साथी लगगो।

27 मालिकेरे नौकरेई एइतां तैस सेइं ज़ोवं, हे मालिक, कुन तीं अपने ऊडारे मां रोडू बीज़ न थियूं बेवरू, फिरी जंगली तैस मां कोट्टां अव?”

28 तैनी तैन सेइं ज़ोवं, एन केन्वी दुश्मनेरू कम्मे, नौकरेई पुच्छू कुन तू चातस, कि अस गेइतां तैन पुट्टी छडम?

29 पन तैनी ज़ोवं नन्ना, एरू न भोए कि तैस सेइं साथी तुस गेहुं भी पुटथ।

30 फसल लुन्ने तगर दुइये साथी बेडोने देथ, ते लुनते वार अव एप्पू लुन्ने बालन सेइं ज़ोइलो, कि पेइले जंगली बीज़ लुन्तां अग्गी मां फुकनेरे लेइ अकोट्टू केरा, ते फिरी तुस गेहुं मेरे कोठारे मां जम्हां केरतां रख्वा।”

?????? ??????? ??????

(????? 4:30-32; ????? 13:18-19)

31 तैनी तैन अक होरि मिसाल देइतां ज़ोवं, “स्वर्गेरू राज़ शेरीएरे बीजेरू ज़ेरू आए, ज़ैन एक्के मैने आनु ते अपने ऊडारे मां बेवं।

32 एन बीज़ सेब्भी बीज़न करां निक्कु भोते, पन ज़ैखन तैन बीज़ बेव गाते, त तैन उगतां सारे निक्के-निक्के बुट्टन केरां बड्डू भोते। ते एरो बुट्ट बनते इडी तगर कि अम्बेरां चुडोल्लू भी तैस पुइ विशतन।”

?????? ?????

(????? 13:20-21)

33 तैनी तैन अक होरि मिसाल देइतां ज़ोवं, “स्वर्गेरू राज़ अम्लटेरू ज़ेरूए, ज़ैन केन्वी कुआन्शां आनु, ते हछे अट्टे मां मलाव ते सारू अट्टू खमीर बेनि ज़ोवं।”

?????? ????? ???????

(????? 4:33-34)

34 एन सैरी गल्लां यीशुए तैन लोकन मिसाल देइतां शुनातो थियो, ते मिसाल देनेरे बगैर तै तैन किछ न थियो शुनातो।

35 ताके तैन वचन ज़ैन नेवे ज़ोवरो थियूं पूरू भोए, “अवं कहैनी केरे लेइ अपनि ज़बान खोल्लेलो, ते तैना गल्लां ज़ोइलो ज़ैना दुनिया वन्ने करां पेइली छेप्पोरी थी।”

?????? ??????? ?????

36 तैखन यीशु लोकन करां अलग भोइतां घरजो अव, ते तैसेरे चलेई तैस कां एइतां ज़ोवं, “तू असन ऊडारेरे जंगली बीजेरी कहैनरो मतलब समझा।”

37 तैनी तैन जुवाव दित्तो, “रोडू बीज़ बेनेबालो मैनेरू मट्टूए।

38 ऊडार ई दुनियाए, ते रोडू बीज़ राज़ हासिल केरनेवाले लोक, ते जंगली बीज़ शैतानेरे लोक आन।

39 ते तै दुश्मन ज़ैनी तैन बेवरू थियूं तै शैताने, लुन्नेरो मतलब इस दुनियारो अन्त भोनोए, ते लुन्ने बाले स्वर्गदूतन।

40 ज़ेन्त्रेरे जंगली बीजेरे ग्लेव अकोट्टे केरतां अग्गी मां फुकतन, तेन्त्रेरे इस दुनियारो अन्त भोनोए।

41 मैनेरू मट्टू अपने स्वर्गदूतन भेजेरू, ते तैन केरे राज़े मां ठोकरारी वजा ते बुरां कम्मां केरनेबालन अकोट्टे केरेले।

42 ते तैन अगगारे कुण्डे मां छुडले, जैडी तैना लोक लेरां देते ते दंत चापते राले ।

43 तेइस धर्मी लोक अपने बाजी केरे राऊजे मां दिहाडेरें जेरें चमकेले । जै कोई समझनू चाते, ते ध्याने सेइं शुने ते समझे ।”

XXXXXXXXXXXXXXXXXXXX

44 “स्वर्गेरू राज तैस दौलतरू जेरू ए, जै एककी ऊडारे मां दबोरी थी, जै एककी मैने तोप्पी, ते तैस मैल्ली भी, ते फिरी तैने छुपेइतां छुडी ते खुशी सेइं अपनू सब किछ बेचतां तैन ऊडार घिनु ।

XXXXXX XXXX

45 “स्वर्गेरू राज तैस बुपैरेरू जेरू ए, जै कीमती मोती तोपतो धियो ।

46 जैखन तैस अक कीमती मोती मैल्लो, त तैनी अपनू सब किछ बेचतां तै मोती घिनो ।

XXXXXXXX XXXX

47 “स्वर्गेरू राज तैस मेछली जालेरू जेरू ए, जैन समुन्द्रे मां छुडू ते तैस मां हर किसमेरी मेछली लेगी ।

48 ते जैखन जाल भेरोई ज़ोवं त झिरेई जाल खिचतां कनारे पुड आनू, ते बिशतां रोडी-रोडी मेछली टोकरन मां रेख्खी ते बुरी-बुरी मेछली शैरी छैडी ।

49 हुनियारे अन्ते मां भी एरू भोनू ए, स्वर्गदूतेई एइतां दुष्ट लोक, धेर्मी लोकन करां अलग केरनेन ।

50 ते तैना अगारी भेठी मां छुडनेन तैडी लेरां ते दंत चापने भोले ।

XXXXXXXX XX XXXXXXXXXXXXXXXXXXXX

51 “कुन तुसेई एन सेरी गल्लां समझी?” तैनेई ज़ोवं, “हाँ” असेई सेमझी ।

52 फिरी यीशुए तैन सेइं ज़ोवं, “हर अक शास्त्री जै स्वर्गेरू राज्जेरो चेलो बनोरोए एककी एरे मुकान मालिकेरो ज़ेरोहे, जै अपने खजाने मरां नब्वीं ते पुरैनी चीजां कढते ।”

XXXXXXXX XXXX XXX XXXXXXXXXXXXXXXXXXXX

(XXXXXXXX 6:1-6; XXXXX 4:16-30)

53 जैखन यीशुए एना सब कहैनी शुनेई त तै तैट्टां अग्रोवं चलो जेव ।

54 ते अपने नगर मां एइतां तैट्टेरे पुरार्थना घरे मां गेइतां शिक्षा देने लगे, ते लोक तैसेरी शिक्षा शुन्तां हैरान भोए ते ज़ोने लगे: “ए अकल बुधी ते एना चमत्कार एस कोट्टां हासिल भोए ।

55 एन त तैस टलखानेरू मटटू आए ते एसेरे अम्मरू नवं मरियम ते एसेरे ढलां केरू नवं याकूब, यूसुफ, शमौन ते कने यहूदा आन,

56 ते एसेरी सब बेइनां इशे इडी रेइचन, फिरी एसमां ई काबलीत कोट्टां आई?”

57 एन्चरे तैन लोकेई इन्कार कियो । पन यीशुए तैन सेइं ज़ोवं, “नबी अपने नगर मां ते अपने घरेरे अलावा होरि कोन्ची ठारी बेइजत न भोए ।”

58 ते तैने तैडी तैन केरे विश्वास न केरनेरे वजाई सेइं जादे चमत्कार न हिराए ।

## 14

XXXXXXXXXXXXXXXXXXXXXXXXXXXXXXXXXXXXXXXXXXXX

(XXXXXXXX 6:14-29; XXXXX 9:7-9)

1 जेइस हेरोदेस जै मुलखेरे च़ेवरोवं हिस्से पुड हकोमत केरतो धियो, तैनी यीशुएरे बारे मां शुनू ।

2 तैनी अपने नौकरन सेइं ज़ोवं, “ए यूहन्ना आए जै बपतिस्मो देनेबालोए, ए मुड्डन मरां ज़ीतो भोरोए, एल्हेरेलेइ तै चमत्कार हिराते ।”

3 किजोकि हेरोदेसे अपने ढलाए फिलिप्पुसेरी कुआन्श हेरोदियासेरी वजाई सेइं यूहन्ना टलेइतां बन्धोवरो ते कैदखाने मां छुडोरो धियो ।

4 किजोकि यूहन्ना हेरोदेस सेइं ज़ोरू धियू, कि ए रखनी तेरे लेइ जेइज नई ।

5 ते हेरोदेस तैस कत्ल केरनो चातो धियो, पन लोकन करां डरतो धियो, किजोकि लोक तैस नबी मन्ते धिये ।

6 पन ज़ैखन हेरोदेसेरी जर्म दिहैड़ी आई, त हेरोदियासेरे कुइयां मेहमाना केरे सामने नेच्रतां हेरोदेस खुश कियोरो थियो।

7 एह्तेरेलेइ तैनी वादो कियोरो थियो, “कि ज़ैन किछ तू मग्गेली, अव तीं तैन्ने देलो।”

8 तैसां अपने अम्मारे शिखालने पुइ ज़ोवं, “मीजेई यूहन्ना बपतिस्मो देनेबालेरी क्रोडी थाले मां मग।”

9 राजे बडो अफ़सोस भोव, पन अपने मेहमाना केरे सामने ते कसम खानेरी वजाई सेइं हुक्म दित्तो कि देथ।

10 ते तैनी कैदखाने मां लोक भेज़तां यूहन्नारी क्रोडी कटाई।

11 ते तैसेरी क्रोडी थाले मां रेखतां कुइये कां दित्ती, ते तै अपनि अम्मा कां घिन्तां जेई।

12 तैखन तैसेरे चले आए, ते तैनेई तैसेरी लाश नेइतां देवतां छुडी ते गेइतां यीशुए पतो दित्तो।

**500**

(**6:30-44; 9:10-17; 6:1-14**)

13 ज़ैखन यीशुए एन शुनु, त तै किशतरे ज़िरिये अकन्ती ठारी जो च़लो जेव, ते लोक एन शुन्तां नगर नगरेरे पैदल तैस पत्ती च़ले जे।

14 ज़ैखन यीशु किशती मरां ओस्सो त तैनी बडे लोक पतोरं एइते जाए, ते तैस तैन पुइ बडो तरस अव, ते तैनी तैन केरे बिमार लोक बज्झाए।

15 ज़ैखन इलोझ भोइ, त यीशुएरे च़ेलेई तैस कां एइतां ज़ोवं, “ई सुनसान ठार आए, त च़िर भी बडू भोरू आए। ते एन लोकन भेज़ी छुड ते कोस्कोई इलोव्वन मां गेइतां किछ खाने जो घिन्न।”

16 यीशुए तैन सेइं ज़ोवं, “एना भेज़ने ज़रूरी नई! तुस्से एन किछ खाने जो देथ।”

17 च़ेलेई तैस सेइं ज़ोवं, “इडी असन कां पंच रोट्टी ते दूई मेछली केरे अलावा होरू किछ नई।”

18 तैनी ज़ोवं, “तैन इरां मीं कां आनां।”

19 तैखन यीशुए लोकन घासे पुइ उन्डे विशनेरे लेइ ज़ोवं, ते पंच रोट्टी ते दूई मेछली हथ्ये मां रेख्की, ते अम्बरेरे पासे तेकतां शुकर कियूं, ते रोट्टी टलोड़ी-टलोड़ी अपने च़ेलन कां दित्ती, ते च़ेलेई तैन लोकन दित्ती।

20 ते सारे मेन्हु खेइतां रेज्जी जे। तैल्ला पत्ती, यीशुएरे च़ेलेई बच़ोरे टुकडन सेइं 12 टोकरी भेरि।

21 रोट्टी खानबाले लोकां केरि तैधात कुआन्शां ते बच्चां केरे अलावा कोई 5000 मइद थियो।

**500**

(**6:45-52; 6:15-21**)

22 तैल्ला पत्ती, यीशुए अपने च़ेलन हुक्म दित्तो कि, तुस किशती मां च़ेइतां मीं केरां पेइले समुन्दरेरे उस पार जो गाथ ते अव एन लोकन वापस भेज़तां एइताई।

23 लोकन भेज़नेरे पत्ती, यीशु तैट्टां निस्तां नेडे एक्की पहैड़ी पुइ प्रार्थना केनेरे लेइ जेव। ते इलोझी तै अकैल्लो थियो।

24 तैखन किशती बन्ने करां दूर पुजोरी थी, किजोकि एग़रोवरां बडी तेज़ हवा च़लोरी थी।

25 ते लगभग ज़ेज्जोरे च़ेवरे बजेई ज़ैखन हेजू आंधरू थियूं, यीशु समुन्दरेरे पैनी पुइ च़लतां अपने च़ेलन कां अव।

26 ज़ैखन च़ेलेई यीशु समुन्दरे पुइ च़लतो लाव त तैना डेरि जे, तैनेई बुझू, “ए भूत ओरोए,” ते डेरतां च़िन्डां लगगे मारने।

27 यीशुए तैखने तैन सेइं रोडेच़ारे गल्लां की ते ज़ोवं, “हिम्मत रख्वा डरा नन्ना, अव आई।”

28 पतरसे तैस जुवाब दित्तो, “हे प्रभु अगर तू आस, त मीं भी हुक्म दे ते अव भी पैनी पुइ च़लतो तीं कां एज्जी।”

29 तैनी ज़ोवं, “एई!” तैखन पतरस किशती मरां ओस्तां यीशु कां गानेरे लेइ पैनी पुइ मेइं च़लने लगो।

30 पन तेज़ हावी सेइं छेल्ली च़लने लेग्गी ते तै डेरि जेव, ते डुबने लगो तैखन तैनी च़िन्डां मैरतां ज़ोवं, “हे प्रभु मीं बच्चा।”

31 यीशुए लूशी अपने हथ्ये सेइं झफ देइतां पतरस ट्वालो, ते तैस सेइं ज़ोवं, “हे घट भरोसे बाला तीं किजो शक की?”

32 जैखन तैना किशती मां विशशे ते हवां रुकी जेई।

33 तैखन जैना किशती मां विशशेरे थिये, त तैनेई तैस कां मथ्यो टेको ते ज़ोने लग्गे, “तू सञ्चरे परमेशेरू मट्टूस।”

*Matthew 15:14-17*  
(Matthew 6:53-56)

34 जैखन तैना गलील समुन्दर पार केरतां गन्नेसरत नव्वेरे जगाई पुड़ पुज्जे।

35 त तैट्टेरे लोकेई यीशु पिशानो ते आसेपासेरे इलाके मां खबर दिती, ते सारे बिमार तैस कां आने।

36 ते तैनेई यीशु सेइं मिन्त करते थिये कि, तैन तैसेरे लिगइन सेइं हुर्ने दे। ते ज़ेत्रेइ तैसेरे लिगइन सेइं हथ लाव तैना सब बेज्जोए।

## 15

*Matthew 15:21-28*  
(Matthew 7:1-13)

1 तैखन किछ फरीसी ते किछ शास्त्री लोक यरूशलेम नगरे मरां यीशु कां आए ते ज़ोने लग्गे।

2 “तेरे चले बुज्जगां केरि रसमरे खलाफ किजो चलतन, तैना रोट्टी खाने करां पेइले हथ न धोन?”

3 तैनी तैन जुवाव दित्तो, “तुस किजो अपने रसमन सेइं परमेशेरो हुक्म टलोइतथ?”

4 किजोकि परमेशेरे ज़ोरूए, कि अपने हाज बव्वेरी इज्जत केरा, ते ज़ै कोई अपने हाज बव्वे जो बुरू ज़ोलो तै मारो गालो।

5 पन तुस ज़ोतथ, कि ज़ै कोई बाजी या अम्मा सेइं ज़ोए कि, मीं करां ज़ै किछ मद्दत तुसन मैल्ली सकती थी, तै पेइली बलिदान भोरीए, यानी परमेशेरे जो चढतल चादोरीए

6 त तै अपने बाजी केरि इज्जत न केरे, एन्चरे तुस अपने रसमन सेइं परमेशेरो हुक्म टलोइतथ।

7 हे पाखंडी लोकव, यशायाह नेवे तुशशे बारे मां ई भविष्यवाणी ठीक कियोरीए,

8 एना लोक ऐशी सेइं त मेरी बड़ी तारीफ़ केरतन,  
पन एन केरे दिल मीं करां बड़े दूर आन।

9 एना लोक बेफैइदी मेरी आराधना केरतन,  
किजोकि एना मैन्हु केरे हुक्मां केरि शिक्षा देतन।”

*Matthew 15:29-32*  
(Matthew 7:14-23)

10 फिरी मैन्हु एप्पू कां कुजेइतां ज़ोवं, “शुना, ते समझा।

11 ज़ै चीज ऐशी मां गाचे तैस सेइं मैन्हु ज़ुट्टो न भोए, पन ज़ैन तैसेरे ऐशी मरां बेइरोवं निस्ते, तैन्ने तैस ज़ुट्टो केरते।”

12 तैखन चलेई यीशु कां एइतां ज़ोवं, “कुन तू ज़ानतस कि फरीसी लोकेई ए गल शुन्तां ठोकर खाइ?”

13 तैनी जुवाव दित्तो, “ज़ै बुट मेरे स्वर्गेरि वाजे नई लोरो तै ज़ीलना पुटतां छुडनोए।

14 तैन केरि परवाह न केरा, तैन काने बत हिराने बालेन, अगर अक कानो होरि काने बत हिराए,  
त तैना दुइये गढे मां बिछुड़ेले।”

15 एन शुन्तां पतरसे ज़ोवं, “ए मिसाल असन समझा।”

16 यीशुए ज़ोवं, “कुन तुस हेजू भी बेसमझाथ?”

17 “कुन तुस न ज़ानथ, कि ज़ैन किछ ऐशी मां गाते तैन पेटे मां गाते, ते फिरी पेटे मरां बेइर निस्ते?”

18 पन ज़ैन किछु मैनेरे अन्तरेरां निस्ते, तैन दिले मरां निसते, तैन्ने मैन्हु जुटो करेते?

19 किजोकि बुरे खियाल, कल्ल केरनो, अडलाए देइने गलत कम केरनू, बदमाशी, चोरी, झूठी गवाही देनी, ते तुहीन दिले मरां निसचे ।

20 एन एरी गल्लन ज़ैना मैन्हु जुटो केरचन, पन हथ धोने बगैर रोट्टी खाने सेइं मैन्हु जुटो न भोए ।”

**मत्ती 7:24-30**

21 यीशु तैट्ठां ज़लो जेव, ते सूर ते सैदारे आसेपासेरे इलाकेरे नेडे अव ।

22 तैस इलाकेरी अक कनानी कुआन्श यीशु कां आई, ते चिन्डां मैरतां ज़ोने लगगी, “हे प्रभु दाऊदेरा मट्ठां, मीं पुड़ दया केर, मेरी कुइये पुड़ भूतेरो सैयोए, तैन भूत तैस बडू सताते ।”

23 पन यीशुए कोई जुवाब न दित्तो, तैसेरे चले नेडे एइतां तैस कां मिनत केरने लगगे, “एस भेज, किजोकि ए चिन्डां मारचे ते इश्शो पीछो न छुडे ।”

24 तैनी जुवाब दित्तो, “अवं इस्राएलेरी हेरोरि भैड्डां केरे अलावा होरि कोन्ची कां नई भेजोरो ।”

25 पन तै कुआन्श आई, ते तैस कां मथ्यो टेकतां ज़ोने लगगी, “हे प्रभु मेरी मदत केर ।”

26 तैनी जुवाब दित्तो, “बच्चा\* केरि रोट्टी नेइतां कुतरन देनी ठीक नई ।”

27 तैसां ज़ावं “सच्चे प्रभु, पन ज़ैन टुक्के मालिकेरी मेज्जे पुड़ेरां बिछुडतन तैना कुतरां भी खातन ।”

28 यीशुए तैस जुवाब दित्तो, “ए कुआन्श तेरो विश्वास बडोए, जेरू तू चातिस तेरे लेइ तेरहु भोए” ते तैसारी कुई तैखने बेज्जोइ जेई ।

**मत्ती 7:24-30**

29 यीशु तैट्ठां निस्तां गलील समुन्दरेर वन्ने पुड़ अव, तैखन तै एक्की पहाड़े पुड़ गेइतां बिश्शी जेव ।

30 ते बडे लोकां केरि भीड़ तैस कां आई, तैन लोकेई एप्पू सेइं साथी टोंटे, काने, लट्टे, डोंडे ते होरे काई एरे ज़ेरे मैन्हु साथी आने, ते तैसेरे पावन कां छुड्डे, ते तैनी तैना सब बज्जाए ।

31 ज़ैखन लोकेई हेरू कि लट्टे गल्लां केरतन कमज़ोर तकडे भोतन, टोंटे ज़लतन ते काने लातन त तैना बडे हैरान भोइ जे ते इस्राएलेरे परमेशेरी तारीफ़ केरने लगगे ।

**मत्ती 4000 मत्ती 8:1-10**

32 यीशुए अपने चले कुजेइतां तैन सेइं ज़ावं, “मीं एन लोकन पुड़ बडो तरस एइते, एना मैन्हु टलेइ दिहैडी केरे देंते बराबर मीं सेइं साथिन, ते एन कां खाने जो किछु भी नई । अवं एन नियन्ने भेजने न चैई, कोस्कोई एरू न भोए कि एना बत्ती मां रेड गान ।”

33 तैसेरे चलेई तैस जुवाब दित्तो “अस इस सुनसान ठैरी मां एतरे लोकां केरे लेइ रोट्टी कोट्ठां आनम, ज़ैना सेब्भी केरे लेइ पूरी भोन?”

34 यीशुए पुच्छू, “तुसन कां केत्री रोट्टी आन?” तैनेई ज़ावं, “सत रोट्टिन ते किछु निक्की मेछली भी आन ।”

35 तैखन तैनी लोकन ज़मीनी पुड़ बिशनेरे लेइ ज़ावं ।

36 ते यीशुए तैना सत रोट्टी ते मेछली टलेइ, ते परमेशेरेरू शुक्र केरतां टलोडी, ते अपने चलन कां दित्ती ते चलेई तैना मैनन् दित्ती ।

37 सारे मैन्हु रोट्टी खेइतां रेज्जी जे । तैल्ला पत्ती, यीशुएरे चलेई मेछली त कने रोट्टी केरे बच्चोरे टुक्डन मरां सत टोकरे भेरतां सल्ले ।

38 रोट्टी खाने बालां केरि तैधात कुआन्शां ते बच्चां केरे अलावा 4000 मडद थिये ।

\* 15:26 15:26 बच्चां; बच्चां केरो मतलब इडी यहुदी लोकन कुतरां केरो मतलब गैर कौमां केरे लोकन ।

39 तैखन तैने तैना सब लोक भेजे ते एप्पू किशती मां ज़ेदतां मगदन इलाके जो ज़लो जेव ।

## 16

*Matthew 16:1-13; Mark 8:11-13; Luke 12:54-56*

1 किछ् फरीसी ते किछ् सदूकी लोक यीशु का आए, “ते तैस अजमानेरे लेइ तैस सेइं ज़ोवं, असन कोई अम्बरेरो निशान हिरा ।”

2 तैनी तैन जुवाब दित्तो, “ज़ैखन इलोइझ भोतीए त तुस ज़ोतथ कि मौसम रोड़ोए किजोकि अम्बर लाले ।

3 ते झेझां ज़ोतथ कि अज आंधी एजनीए किजोकि अम्बर लाले ते विदलारे, तुस अम्बर हेरतां अंदाजो लेइता ज़ोतथ, पन ज़मानेरो निशान न पिशैनी सकतथ!

4 इस ज़मानेरे बुरे ते बदमाशी केरनेवाले लोक निशान मगतन, पन तैन योना नेबेरे अलावा होरो कोई निशान न दित्तो गालो ।” यीशु तैन शैरतां ज़लो जेव ।

*Matthew 16:13-21; Mark 8:14-21*

5 ते यीशुएरे चेले समुन्दरे पार पुज्जी जे, पन तैनेईं रोट्टी साथी नेनी बिसरोरी थी ।

6 यीशुए तैन सेइं ज़ोवं, “खबरदार फरीसी ते कने सदूकी लोकां केरे खमीरे करां हुशार रेइयथ ।”

7 तैना एप्पू मांमेइं गलवात केरने लगगे, “असेईं रोट्टी नईं आनोरी, एल्हेरेलेइ तै एरू ज़ोने लोरोए ।”

8 एन ज़ैनतां, यीशुए ज़ोवं, “हे घट विश्वैसव, तुस एप्पू मांमेइं किजो सोची राओरथ, कि असन कां रोट्टी नईं?

9 कुन तुसन याद नईं? ज़ताली मीं 5000 मैन्हु केरे लेइ पंज रोट्टी दलोइतां दित्तोरी थी, त तुसेईं बादे मां बच्चोरी रोट्टी केरे केत्रे टोकरे भेरतां सल्लोरे थिये?

10 ते तैन 4000 मैन्हु केरे लेइ सत रोट्टी ते टुकां केरि केत्री टोकरी सैल्लोरी थी?

11 तुस की न समझथ, कि मीं तुसन रोट्टी केरे लेइ न थियूं ज़ोरू? पन फरीसी ते कने सदूकी लोकां केरे खमीरे करां हुशार रेइयथ ।”

12 तैखन तैन केरि समझी मां अव, कि तैनी रोट्टी केरे लेइ नईं, बल्के फरीसी ते कने सदूकी लोकां केरे खमीर यानी शिक्षाईं करां हुशार रानेरे लेइ ज़ोरू थियूं ।

*Matthew 16:27-30; Mark 9:18-21*

13 ज़ैखन यीशु केसरिया फिलिप्पी इलाके मां अव, त तैनी अपने चलन पुच्छ्छ्: “मैनेरू मट्टू कौन, लोक एस बारे मां कुन ज़ोतन?”

14 चेलेईं ज़ोवं, “किछ् ज़ोतन यूहन्ना बपतिस्मो देनेबालोए, किछ् ज़ोतन एलिय्याह, ते किछ् ज़ोतन यिमंयाह नबी ते किछ् ज़ोतन नेवन मरां कोई अक आए ।”

15 यीशुए तैन पुच्छ्छ्, “पन तुस मेरे बारे मां कुन सोचतथ कि अवं कौन आईं?”

16 शमौन पतरसे जुवाब दित्तो, “तू ज़ीते परमेशेरू मट्टू मसीह आस ।”

17 यीशुए ज़ोवं, “ए शमौन योनारे मट्टां तू धन आस, किजोकि ए गल मासे या खूने नईं बल्के मेरे स्वर्गेरि बाजे तीं पुड़ बांदी कियोरीए ।

18 ते अवं तीं सेइं ज़ोताईं, तू पतरस आस ते अवं इस पक्के घोड़े पुड़ अपनि कलीसिया बनेइलो ते पातालारां दारां तैस पुड़ अस्सर न केरि बटेलां ।

19 अवं अपने स्वर्गेरि राज़ेरी चैवी तीं देइलो, ते ज़ैन किछ् तुस ज़मीनी पुड़ बंधेले तैन स्वर्गे मां बंधोलू, ते ज़ैन किछ् तू ज़मीनी पुड़ खोल्लेला तैन सब किछ् स्वर्गे मां खुल्लेला ।”

20 तैखन यीशुए चलन जो ज़ोवं, ए गल केन्ची सेइं न ज़ोइयथ कि अवं मसीह आईं ।



२१ २२ २३ २४ २५ २६ २७ २८ २९ ३० ३१ ३२ ३३ ३४ ३५ ३६ ३७ ३८ ३९ ४० ४१ ४२ ४३ ४४ ४५ ४६ ४७ ४८ ४९ ५० ५१ ५२ ५३ ५४ ५५ ५६ ५७ ५८ ५९ ६० ६१ ६२ ६३ ६४ ६५ ६६ ६७ ६८ ६९ ७० ७१ ७२ ७३ ७४ ७५ ७६ ७७ ७८ ७९ ८० ८१ ८२ ८३ ८४ ८५ ८६ ८७ ८८ ८९ ९० ९१ ९२ ९३ ९४ ९५ ९६ ९७ ९८ ९९ १००

(२२:२२ 8:31-33; २२:२२ 9:22)

21 एसरे बाद यीशुए अपने चलन ज़ोने लगो कि, "तैसेरू यरूशलेम नगरे मां गानू ज़रूरीए ताके यहूदी लोकां केरे बुजुर्गन, प्रधान याजकन ते शास्त्री लोकां केरे हथेईं तै बड़ो दुःख झैल्ले, ते मारो गाए ते तै दलेइयोवं दिहाड़े फिरी ज़ीतो भोलो ।"

22 पतरस तैस अलग नेइतां झिडकने लगो, "हे प्रभु, परमेशर न केरे, तीं सेईं एरू कधे न भोलू ।"

23 यीशुए मुडतां पतरसे सेईं ज़ोवं, "हे शैतान, मीं करां दूर भो, तू मीं करां पाप करानेरी कोशिश कराने लोरोस । किजोकि तू ज़ेन्वरे परमेशर सोचते तेन्वरे नईं बल्के ज़ेन्वरे मैन्हु सोचन तेन्वरे सोचतस ।"

२४ २५ २६ २७ २८ २९ ३० ३१ ३२ ३३ ३४ ३५ ३६ ३७ ३८ ३९ ४० ४१ ४२ ४३ ४४ ४५ ४६ ४७ ४८ ४९ ५० ५१ ५२ ५३ ५४ ५५ ५६ ५७ ५८ ५९ ६० ६१ ६२ ६३ ६४ ६५ ६६ ६७ ६८ ६९ ७० ७१ ७२ ७३ ७४ ७५ ७६ ७७ ७८ ७९ ८० ८१ ८२ ८३ ८४ ८५ ८६ ८७ ८८ ८९ ९० ९१ ९२ ९३ ९४ ९५ ९६ ९७ ९८ ९९ १००

(२२:२२ 8:34; 9:1; २२:२२ 9:23-27)

24 तैखन यीशुए अपने चलन सेईं ज़ोवं, "अगर कोई मीं पत्ती एज्जो चाते त तै अपने आपेरो इन्कार केरे, ते अपनू कूरुस छुडतां मीं पत्ती चले ।"

25 "किजोकि ज़ै कोई अपनि जान बचानी चालो, त तै तैस गुवालो, ते ज़ै अपनि जान मेरे लेइ गुवालो, त तै तैस हासिल केरेलो ।

26 अगर कोई सारी दुनिया हासिल केरे, ते अपने हमेशारे ज़िन्दगी गुवाए, त तैस कुन फैइदो भोलो? या मैन्हु हमेशारे ज़िन्दगरे बदले कुन देलो?

27 किजोकि ज़ैखन मैनेरू मटटू अपने बाजेरी महिमाईं मां अपने स्वर्गदूतन सेईं साथी एज्जेलू, तैखन तै हर केन्वी तैन केरे कियोरे कम्मां केरो फल देलो ।

28 अवं तुसन सेईं सत्र ज़ोतईं कि ज़ैना इडी खड़े आन, ज़ां तगर मैनेरे मटटे अपने राज्जे मां एइते न लाएले, तांतगर न मरेले ।"

## 17

१ २ ३ ४ ५ ६ ७ ८ ९ १० ११ १२ १३ १४ १५ १६ १७ १८ १९ २० २१ २२ २३ २४ २५ २६ २७ २८ २९ ३० ३१ ३२ ३३ ३४ ३५ ३६ ३७ ३८ ३९ ४० ४१ ४२ ४३ ४४ ४५ ४६ ४७ ४८ ४९ ५० ५१ ५२ ५३ ५४ ५५ ५६ ५७ ५८ ५९ ६० ६१ ६२ ६३ ६४ ६५ ६६ ६७ ६८ ६९ ७० ७१ ७२ ७३ ७४ ७५ ७६ ७७ ७८ ७९ ८० ८१ ८२ ८३ ८४ ८५ ८६ ८७ ८८ ८९ ९० ९१ ९२ ९३ ९४ ९५ ९६ ९७ ९८ ९९ १००

(२२:२२ 9:2-13; २२:२२ 9:28-36)

1 शेइ दिहाइना बाद, यीशु अपने चले पतरस, याकूब त तैसेरे दूला यूहन्ना सेईं साथी एक्की पहाड़े पुइ जेव, जेडी कोई भी न थियो ।

2 तैडी तैन केरे सामने तैसेरी शकल बेदलोईं जेईं, तैसेरू तुत्तर दिहाड़ेरू ज़ेरू चमकने लगू ते तैसेरां लिगड़ां लोअरां ज़ेरां छित्तां भुआं ।

3 तैखन तैनेईं मूसा ते एलिय्याह नबी यीशु सेईं गल्लां केगते लाए ।

4 पतरसे यीशु सेईं ज़ोवं, "हे प्रभु इश्शू इडी रानू रोडूए, अगर तू चातस त आस ट्लाईं डेरे बनाम, अक तेरे लेइ ते अक मूसेरे लेइ ते अक एलिय्याहरे लेइ ।"

5 ते ए गल ज़ोईं राहोरो थियो, अक बडी चमकती बिदलार तैन पुइ एइतां रुकी, ते तैस बिदलारी मरां ईं आवाज़ आईं, "एन मेरू ट्लारू मटटूए, ज़ैस पुइ अवं खुश आईं, एसेरी शुना ।"

6 चले एन शुन्तां तुत्तेरे भारे बिछड़े ते बड़ डेरि जे ।

7 पन यीशुए एइतां तैन सेईं हथ लाव, ते ज़ोवं, "उठा, डरा नन्ना ।"

8 ज़ैखन तैनेईं चेवरे पासन तक्कू, त यीशुएरे अलावा होरो कोई न लाव ।

9 ज़ैखन तैना तैस पहाड़े पुडेरं उन्डे ओरे थियो, त यीशुए तैन ईं हुक्म दित्तो, ज़ैन किछ् तुसेईं लाहेरूए, "ज़ां तगर मैनेरू मटटू मुडदन मरां ज़ीतू न भोए तांतगर केन्वी सेईं न ज़ोइयथ ।"

10 तैसेरे चलेईं तैस पुच्छू, "शास्त्री किजो ज़ोतन कि मसीहरे एज्जेरां पेइले, एलिय्याह नेबेरू दुनियाईं मां एज्जु ज़रूरी आए?"

11 तैनी जुवाव दित्तो, "एलिय्याह ज़ेरू एज्जेलो ते सब किछ् बहाल केरेलो ।

12 पन अवं तुसन सेइं ज़ोतई कि 'एलिय्याह' त पेइले ओरोए, पन लोकेई तैन पिशानो, पन ज़ैन चाऊ तैस सेइं तैन्ने कियूं, एन्चरे मैनेरू मट्टू भी तैन केरे हथ्यन सेइं दुःख भोगेलो।”

13 तैखन चलेई बुझू कि असन सेइं यूहन्ना बपतिस्मो देनेबालेरे बारे मां ज़ोने लोरोए।

ॐॐॐॐ ॐॐ ॐॐॐॐ ॐॐॐॐ ॐॐॐ ॐॐ ॐॐॐॐॐॐ ॐॐॐॐ ॐॐॐॐ  
(ॐॐॐॐ 9:14-29; ॐॐॐॐ 9:37-43)

14 ज़ैखन तैना हछे मैन्हु केरि बड़ी भीड़ी कां पुजे, त अक मैन्हु तैस कां अव, ते ज़ैधू केरे भारे विश्तां ज़ोने लगे।

15 “हे प्रभु मेरे मट्टे पुड़ दया केर, तैस मिरगरी वजाई सेइं दौवरे एइतन, ते तैस बडो दुखे, ते बार-बार अग्गी मां ते बार-बार पैनी मांजो खिरकते।

16 मी तैन तेरे चलन कां आनोरू थियूं, पन तैनेई तैन ठीक न केरि बटु।”

17 यीशुए ज़ोवं, “हे घट विश्वावैसव ते ढीठ लोकव, अवं केइस तगर तुसन सेइं साथी भोनोई, केइस तगर तुशशी झैलतो रेइलो? तै मीं कां आनां।”

18 तैखन यीशुए तैन भूत झिडकू, ते तैस पुड़ां सैयो निस्सी जेव, ते तैन मट्टू तैखने ठीक भोइ ज़ोवं।

19 तैखन चलेई अकैल्ले ज़ेरे यीशु कां गेइतां पुच्छू, “अस तैस मट्टे मरां भूतेरो सायो की न केइडी सके?”

20 तैनी तैन सेइं ज़ोवं, “अपने घट विश्वासेरे वजाई सेइं, अवं तुसन सेइं सन्न ज़ोताई, अगर तुशशो विश्वास शरीएरे ग्लेवे ज़ेतरो भी भोए, त तुस उस पहाड़े जो ज़ोले कि, ‘इट्ठां निस्तां उड़ी गा,’ त तैन गालू, ते तुशशे लेइ कोई भी गल असुखती न भोली।

21 पन इस किसमेरां भूतां प्रार्थना ते बरते बगैर न निस्सन।”

ॐॐॐ ॐॐॐॐ ॐॐॐ ॐॐ ॐॐॐॐॐॐ ॐॐॐॐॐ ॐॐॐॐॐॐॐॐॐॐॐॐ  
(ॐॐॐॐ 9:30-32; ॐॐॐॐ 9:43-45)

22 ज़ैखन तैना गलीले मां थी, त यीशुए तैन सेइं ज़ोवं, “मैनेरू मट्टू भी मैन्हु केरे हवाले कियूं गालू।

23 तैना तैस मारेले, ते तैन ट्लेइयोवं दिहाड़े फिरी ज़ीतो भोलू।” चले एन शुन्तां बडे परेशान भोए।

ॐॐॐॐॐॐॐॐ ॐॐॐॐ ॐॐ ॐॐॐॐ

24 ज़ैखन तैना कफरनहूम नगर मां पुजे, त प्रार्थना घरेरे लेइ चुंगी घिन्ने बाले पतरसे कां एइतां पुच्छू, “कुन तुशशो गुरू प्रार्थना घरेरी चुंगी न दे?”

25 तैनी ज़ुवाब दितो, “हाँ देते।” ज़ैखन पतरस घरे मां पुजो त यीशुए तैसेरे पुच्छनेरे पेइले तैस सेइं ज़ोवं, “हे शमौन तू कुन समझतस? दुनियारे राजे कोन लोकन करां चुंगी घिन्तन अपने बच्चन करां या होरि लोकन करां?”

26 पतरसे तैस सेइं ज़ोवं, “होरन करां।” यीशुए तैस सेइं ज़ोवं, “त मट्टां बरी भोइ जेआं।

27 फिरी भी एल्हेरेलेइ कि अस तैन ठोकर न देम, तू समुन्दरे पुड़ गेइतां कंटो लेइतां मेछली टलेइयां, ते ज़ै मेछली पेइली लगगेली, तैसारू आशी खोल्लां, ते तीं अक सिक्को मैलनोए, ते तै सिक्को नेइतां मेरी ते अपनि चुंगी देइयां।”

## 18

ॐॐॐ ॐॐॐ ॐॐॐॐॐॐ ॐॐॐॐॐॐॐॐॐॐॐ ॐॐॐॐॐ ॐॐ ॐॐॐॐ ॐॐॐ  
(ॐॐॐॐ 9:33-37; ॐॐॐॐ 9:46-48)

1 तैखन चले यीशु कां आए ते पुच्छने लगगे, “स्वर्गेर राजे मां सेब्बन करां बडो कौने?”

2 तैनी अक निकड़ा बच्चो एप्पू कां कुजाव, ते मझाटे खड़ी कियो।

3 ते ज़ोने लागो, “अवं तुसन सेइं सन्न ज़ोताई, कि तुस अपनो आप बेदलतां निकडे बच्चेरो ज़ेरे न बनथ, त तुस स्वर्गेरे राज्जे मां कधी दाखल न भोले।

4 ज़ै कोई अपनो आप इस बच्चेरो ज़ेरो निकडो बनालो, त तै स्वर्गेरे राज्जे मां बड्डो भोलो।

5 ते ज़ै कोई एरे ज़ेरे निकडे बच्चे मेरे नव्ये सेइं कबूल करते, त तै मीं कबूल करते।”

\*\*\*\*\*

(\*\*\*\*\* 9:42-48; \*\*\*\*\* 17:1-2)

6 “ज़ै कोई इन निकडन मरां ज़ैना मीं पुड विश्वास केरतन एक्केरे लेइ ठोकर बने, त तैसेरेलेइ एन्ने रोड् आए कि बडे द्वालाटोरो द्वालेइटोल तैसेरे गल्ले उन्डो दंढेइतां डुघे समुन्दरे मां डोबतां छुडोरो लोडते।

7 ठोकरां केरि वजाई सेइं दुनियाई पुड अफ़सोस! ठोकरां लेगगनी त ज़रुरन पन, अफ़सोस तैस मैन्हु पुड ज़ेसेरी वजाई सेइं ठोकर लगगतीए।

8 अगर तेरो हथ या तेरो पाव तेरे लेइ ठोकरारो ज़िरयो बनते, त तू तैस केटतां छुड, किजोकि तेरू टोट्टु या कानू बेनतां ज़िन्दगी मां दाखल भोनू रोड्ए, ते तेरे दुइये हथ पाव सथे भोने सेइं अगर तू हमेशारी अग्गी मां गास त तैल्ला केरतां तू टोट्टो या कानो बेनतां रोडोस।

9 अगर तेरी अछ् तेरे लेइ ठोकरां वजा बनती, त तू तैस केडतां शैरी छुड, कानू भोइतां ज़िन्दगी मां दाखल भोनू तेरे लेइ रोड्ए, कि दुइये एछ्छी भोने सेइं तू नरकेरी अग्गी मां गास त तैल्ला रोडोस।”

\*\*\*\*\*

(\*\*\*\*\* 15:3-7)

10 “हेरा इन निक्के चेलन मरां तुस केन्ची घटिया न बुझा, अवं तुसन सेइं ज़ोताई कि तैन केरे स्वर्गदूत हर वक्त स्वर्गे मां मेरे बाजी केरे हज़ूरी मां रातन।

11 (किजोकि मैनेरू मट्टू यानी अवं हेरोरे लोकन बन्नने ओरोई।)

12 तुश्शो खियाल कुने? कि केसकोई कां 100 भैड्डां भोन, ते तैस मरां अक हेरोए, त कुन तै नडेनुवं भैड्डां ज़ैडी खतरो न भोए तैडी छेडतां, तैस हेरोरि न तोपेलो?

13 ते अगर एरू भोए, तैस तै मैल्ले, त अवं तुसन सेइं सच्च ज़ोताई कि तै तैना नडेनुवं केरे लेइ एतरी खुशी न मनालो, ते तैस एक्की भैडारे लेइ जादे खुशी बनालो।

14 एन्चरे तुश्शो बाजी ज़ै स्वर्गे मांए, तै एन न चाए कि एन निकन मरां भी कोई नाश न भोए।”

\*\*\*\*\*

15 “अगर कोई मीं पुड विश्वास केरनेवालो द्वाला तीं सेइं बुराई करते, त तू अकैल्ले मां तैस समझा, अगर तै तेरी गल शुने, त तीं तै वापस परमेशेरे कां आनो।

16 अगर तै तेरी गल न शुने, त तू एप्पू सेइं साथी अक या दूई मैन्हु नेइयां, किजोकि मूसेरे कानूनेरे मुताबिक हर शिकैइतरी मां दूई या द्वालाई मैन्हु गवाह भोतन।

17 अगर तै तैन केरि भी न शुने, त तू कलीसियारे लोकन सेइं ज़ो, अगर तै कलीसियारे लोकां केरि भी न शुने, त तू तैस सेइं एरो बर्ताव केर ज़ेन्चरां तै गैर कौमरो भोए या चुंगी धिन्ने वालो भोए।”

\*\*\*\*\*

18 “अवं तुसन सेइं सन्न ज़ोताई, ज़ैन किछ् तुस ज़मीनी पुड बंधेले त समझा कि स्वर्गे पुड बंधोलू, ते ज़ैन किछ् तुस ज़मीनी पुड खोल्लेले त तैन स्वर्गे मां खुल्लेलू।

19 फिरी अवं तुसन सेइं सन्न ज़ोताई, कि अगर तुसन मरां दूई ज़ने धेरेती पुड अक मन भोइतां कोन्ची मसलेरे हल कढनेरे लेइ परमेशेरे करां ज़ै स्वर्गे मां आए महत मगन, त तै तैन केरि महत ज़रूर केरलो।

20 किजोकि ज़ैडी दूई या द्वालाई मैन्हु, मेरे नव्ये सेइं परमेशेरे करां महत मगनेरे लेइ अकोट्टे भोतन, अवं तैडी तैन केरि महत केरनेरे लेइ तैन मां भोइताई।”

\*\*\*\*\*

11 तैखन पतरसे यीशु कां एइतां पुच्छू, “परभु अगर कोई तीं पुड़ विश्वास करेनेवालो, मीं सेइं बुराई करतो राए, त अवं केतरे बार तैस माफ़ केरि? कुन सत बार?”

12 यीशुए जुवाब दित्तो, “अवं तीं सेइं इन न ज़ोई सत बार, बल्के सत्तरे सत्तर बार माफ़ करां (यानी लगातार माफ़ केरतू रानू)।

13 बस्सा अवं तुसन सेइं इन ज़ोताई, स्वर्गेरू राज तैस राज़ेरू ज़ेरू आए, ज़ैनी सोचू कि अवं अपने नौकरन करां हिसाब धिंनी।

14 ज़ैखन तै हिसाब धिंने लगो, त अक मैन्हु तैस कां हाज़र कियो, ज़ै दश हज़ार सोन्नेरे सिक्कां केरे तोड़ां\* केरो कर्ज़दार थियो।

15 तैस कां कर्ज़ो मुकाने जो किच्छ न थियूं, राज़े हुक्म दित्तो, एसेरे बाल बच्चे ते कुआन्श ते ज़ैन किच्छ भी आए सब बेचतां कर्ज़ो उसुल केरा।

16 पन तै नौकर ज़ोवले हथ केरतां मालिके कां मिनत केरतां ज़ोने लगो, ‘मीं किच्छ मौको दे, ते अवं तेरो सारो कर्ज़ो मुकालो।’

17 मालिके तैस नौकरे पुड़ बड़ो तरस अव, ते तैनी तै छैडी दित्तो ते तैसेरो कर्ज़ो भी माफ़ कियो।”

18 “पन ज़ैखन तै नौकर तैटटां च़लो जेव, त तैस अक एरो नौकर मैल्लो, ज़ै तैसेरो साथी थियो, ते तैस तैनी 100 दीनारां दित्तो थिये, तैनी तै गलेरां ट्लाव ते ज़ोने लगो, ‘मेरो कर्ज़ो कढ।’

19 तैसेरो साथी नौकर तैस्से कां मिनत केरने लगो, मीं किच्छ मौको दे ते अवं तेरो सारो कर्ज़ो मुकालो।

20 पन तैनी तैसेरी अक गल भी न शुनी, ते तैनी तै ढेपतां छड़डो कि ज़ां तगर कर्ज़ो न देस तांतगर ढप्पोरो रा।

21 ज़ैखन होरि नौकरेई एन शुनू, त तैना बड़े परेशान भोए, ते मालिके कां गेइतां सारो हाल शुनाव।

22 तैखन मालिके तै अपने नौकर कुजेइतां ज़ोवं, ‘ओ बेईमान नौकरा मीं तेरो सारो कर्ज़ो माफ़ कियो, किजोकि तीं मीं कां छंदे कियोरे थिये।

23 कुन तेरे लेइ ज़रूरी न थियूं, कि ज़ेन्चरे मीं तीं पुड़ दया केरतां तेरो कर्ज़ो माफ़ कियो, तेन्चरे तू भी अपने सैथन पुड़ दया केरतां तैन केरो कर्ज़ो माफ़ केरथो?’

24 मालिके सरक आई, ते तैनी तै नौकर सज़ा देनेवालां केरे हवाले कियो, कि ज़ां तगर मेरो सारो कर्ज़ो न दे तांतगर ढप्पोरो भोए।

25 “एन्चरे अगर तुसन मरां हर कोई, तैस मैन्हु ज़ै मीं पुड़ विश्वास केरते दिले सेइं माफ़ न केरे त मेरो स्वर्गेरि वाजी यानी परमेशर भी तुसन सेइं एन्चरे पैश एज्जेलो।”

## 19

XXXXXXXXXX  
(XXXXXXXX 10:1-12)

1 ज़ैखन यीशुए एन गल्लां ज़ोई छैडी, त तै गलीले मरां गेइतां यरदन दरियारे पार यहूदिया इलाके मां च़लो अव।

2 बड़े लोक यीशु पत्ती च़ले जे, ते यीशुए तैना तैड़ी बज्झाए।

3 तैखन फरीसी लोकेई यीशु कां एइतां तैस अजमानेरे लेइ पुच्छू, “कुन मैन्हु अपनि कुआन्श केन्ची भी वजाई सेइं फारख्ती देनी जेइजे?”

4 तैनी जुवाब दित्तो, “कुन तुसेईं नईं पढेरू कि ज़ैने तैना बनां तैनी शुरू करां मड़द ते कुआन्श बनेवरां थियां।

5 एल्हेरेलेइ मड़द अपने हाज बव्चे करां कनारे बिशतां अपनि कुआन्शी सेइं साथी रालो, ते तैना दुइये अक जान भोलां।’

\* 18:24 18:24 तोड़ां: अक तोड़ां 15 सालां केरे मज़ूगरे बराबर भोती थी † 18:28 18:28 100 दीनार शौब दिहेई केरू मज़दरी।

6 एल्हेरेलेइ हुनी तैना परमेशेरी नजरी मां दूई नई, पन अक्के आन । एल्हेरेलेइ जैना परमेशेरे जोडोरेन, तैनन् कोई मैन्हु अलग न केरे!”

7 तैनेई तैस पुच्छ, “फिरी मूसे ए हुक्म किजो दित्तो कि फारख्ती लिखतां छैडी देथ?”

8 तैनी तैन सेइ ज़ोवं, “मूसे तुशे सखत दिलेरी वजाई सेइ अपनि कुआन्शन छडनेरो हुक्म दित्तोरो थियो, पन शुरू करां एन न थियूं।

9 अवं तुसन सेइ सत्र ज़ोताई, कि ज़ै कोई अपनि कुआन्शी बदमैशेरे अलावा कोन्ची होरि गल्ली पुड़ फारख्ती दे, ते ते केन्ची होरि सेइ इला बनाते, त ते (एप्पू) बदमाशी केरते । ते ज़ै तैस शैरोरी कुआन्शी सेइ इला बनाते, त तै भी बदमाशी केरते।”

10 चेलेई यीशु सेइ ज़ोवं, “अगर मड़द ते कुआन्शारे रिशतेरो ई हाले त इला न लोडे बनोरो।”

11 यीशुए तैन सेइ ज़ोवं, “ए गल सब कबूल न केरि बटन, सिर्फ तैना ज़ैन परमेशेर ई काबलीत दित्तोरीए।

12 किछ त जर्मनेरे हिजडे भोतन ते किछन लोक बनातन, ते किछ एरे भी आन, कि ज़ैन स्वर्गेरि राज्जेरे लेइ इला न बनान, ते ज़ैना इना गल्लां सेमझी सकतन तैना समझन।”

~~~~~

(~~~~~ 10:13-16; ~~~~~ 18:15-17)

13 तैखन लोकेई बच्चे यीशु कां आने, कि तैन पुड़ हथ रेखतां प्रार्थना केरे, पन चेलेई तैना लोक झिड़के।

14 यीशुए ज़ोवं, “बच्चे मीं कां एजने देथ, तैन न टाका, किजोकि स्वर्गेरू राज एरां केरूए।”

15 ते तै बच्चन पुड़ हथ रेखतां तैट्टां अग्रोवं चलो जेव।

~~~~~

(~~~~~ 10:17-31; ~~~~~ 18:18-30)

16 हेरा, अक मैन्हु यीशु कां अवं ते पुच्छने लगो, “हे गुरू अवं कुन भलू कम केरि, कि हमेशारी जिन्दगी हासिल केरि?”

17 यीशुए तैस सेइ ज़ोवं, “तू मीं भलैइये बारे मां किजो पुच्छतस? परमेशेरे अलावा होरो कोई भी रोडो नई, पन अगर तू हमेशारी जिन्दगी हासिल केरनि चातस त हुक्म मनन।”

18 तैनी ज़ोवं, “कोन हुक्मन पुड़?” यीशुए ज़ोवं, “खून नई केरनो, बदमाशी नई केरनि, चोरी नई केरनि, झूठी गवाही नई देनी,

19 अपने हाज बच्चां केरि सेवा केर, अपने पड़ोसी सेइ अपने बराबर प्यार केर।”

20 तैनी जवाने जुवाब दित्तो, “एना सब हुक्म अवं बचपनेरो मन्तो ओरोई। हुनी मीं मां को कमीए?”

21 यीशुए तैस सेइ ज़ोवं, “अगर तू सिद्ध भोनू चातस, त गा ज़ैन किछ तीं कां आए तैन बेचतां गरीब मैनन् दे, तैखन तीं स्वर्गे मां खजानो मैलेलो। ते एइतां मीं पत्ती च़ल।”

22 पन तैनी जवाने ए गल शुनी, त बड़ो उदास भोइतां च़लो जेव, किजोकि तै बड़ो अमीर थियो।

23 तैखन यीशुए अपने चेलन सेइ ज़ोवं, “अवं तुसन सेइ सत्र ज़ोताई कि अमीर मैनेरू स्वर्गेरि राज्जे मां दाखल भोनू मुशकले।

24 फिरी अवं तुसन सेइ ज़ोताई, परमेशेरे राज्जे मां अमीर मैनेरू दाखल भोने केरां ऊंटेरू सांधनेरे पाए मरां निस्नू सुख्खू आए!”

25 एन शुन्तां चेलेई हैरान भोइतां ज़ोवं, “फिरी कसेरी मुक्ति भोइ बटतीए।”

26 यीशुए तैन केरे पासे तेकतां ज़ोवं, “मैनन् करां त एन न भोइ सके पन परमेशेरे करां सब किछ भोइ बटते।”

27 एस पुड़ पतरस ज़ोने लगो, “हेर अस सब किछ शैरतां तीं पत्ती च़लोरेम ते असन कुन मैलनूए?”

28 यीशुए तैन सेइं ज़ोवं, “अवं तुसन सेइं सन्न ज़ोताई, कि नंब्वे दुनियाई मां ज़ैखन अवं मैनेरू मट्टू अपने महिमारे तखते पुड़ बिशेलू, त तुस भी मीं पत्ती चलने बाले 12 तखतन पुड़ बिशतां इसराएलेरे 12 गोत्रां केरो इन्साफ केरेले।

29 ते ज़ैनी केन्चे अपना घरां ते दला या बेइन या हाज या बव या बच्चे या ऊडारां छुडडोरेन, तैस 100 गुणा फल मैलेलो, ते हमेशारी जिन्दगरी विरासत मैलेली।

30 पन बड़े मैन्हू ज़ैना हुन्ना पेइले आन, तैना वादे मां पत्रोवं भोनेन। त ज़ैना हुन्ना पत्रोवं आन, तैना वादे मां पेइले भोनेन।”

## 20

☞☞☞☞ ☞☞☞☞☞☞☞☞ ☞☞☞☞☞☞☞☞

1 “स्वर्गरू राज तैस ज़िमदाररू ज़ेरूए ज़ै झेझां उट्टतां ते अपने दाछरी बागी मां मज़दूर कम्मे लाए।

2 तैनी अक दीनार\* रोज़ मुजुरी देनेरे लेइ तैना बागी मां भेजे।

3 फिरी नौ बजेइं बेइर गेइतां तैनी बज़ारे मां काई लोक बेकार खड़े लाए।

4 तैनी तैन सेइं ज़ोवं, ‘तुस भी मेरी बागी मां गाथ, ते ज़ैन किछ जेइज भोलू अवं तुसन देलो।’ तैना कम्मे पुड़ जो जे।

5 फिरी तैनी दुपहरेईं ते टलेइ बज़न तगर एन्ने कियूं।

6 पंचे बजेइं तैनी बेइर निस्तां किछ होरे लोक भी खड़खड़े लेइतां तैन पुच्छू, ‘तुस झेझेरे देंते किजो खेड़ोरेथ?’ तैनेईं जुवाब दित्तो, ‘अस केन्चे कम्मे नईं लोरे।’

7 तैनी तैन सेइं ज़ोवं, ‘तुस भी मेरे बागी मां गाथ ते कम केरा।’”

8 “डलोझी तैनी बागोरे मालिके अपने मुन्शी सेइं ज़ोवं कि, ‘पेइले लगगोरे मज़दूर ते पत्ती कम्मे लगगोरे मज़दूर सेबन अक-अक दीनार दिहाड़ी दे।’

9 ज़ैना पंचे बजेइं ओरे थिये, तैन भी अक दीनार पूरी दिहाड़ी मैल्ली।

10 ज़ैना मज़दूर झेझां कम्मे लगगोरे थिये तैन केरि बारी आई त तैनेईं सोचू कि असन जादे मैलनेन, पन तैन भी अक-अक दीनार मैल्लो।

11 ज़ैखन दिहाड़ी मैल्ली, त तैस मालिकेरे बारे मां तैना एप्पू मांमेइं बुराईं करेने लगगे।

12 ‘पत्ती लोरे मज़दूरैईं सिर्फ अक वेन्टो कम कियोरूए, ते तीं तैन भी असन बराबर ज़ैनेईं सैरी दिहैड़ी कम कियां मुजुरी दिती।’

13 तैनी तैन मरां एककी जुवाब दित्तो, ‘दोस्त मीं तीं सेइं कोई बेइन्साफी नईं कियोरी, कुन मीं तीं सेइं अक दीनार दिहैडरी गल न थी कियोरी?’

14 एन्हरेलेइ ज़ै तेरी मज़दूरीए तै टला ते चलो गा, ए मेरी मर्जीए कि वादे मां लगगोरे मज़दूर भी एतरे दईं।

15 कुन मीं ए अधिकार नईं कि अपने माले मरां ज़ैन चैईं तैन केरि? तू मीं पुड़ एन्हरेलेइ ज़लतस कि अवं खुल्ले दिले सेइं देने बालोईं?’

16 एन्हरेलेइ बड़े मैन्हू ज़ैना हुन्ना पेइले आन, तैना वादे मां पत्रोवं भोनेन, ते ज़ैना हुन्ना पत्रोवं आन, तैना वादे मां पेइले भोनेन।”

☞☞☞☞ ☞☞☞☞☞☞☞☞ ☞☞☞☞☞☞☞☞

(☞☞☞☞ 10:32-34; ☞☞☞☞ 18:31-34)

17 यरूशलेम नगरे जो गांते बार यीशुए अपने 12 चेलन अलग नेइतां तैन सेइं ज़ोवं, कि तैस सेइं कुन भोने बालूए।

18 ‘हेरा, अस यरूशलेम नगरे जो चलोरेम, मैनेरू मट्टू प्रधान याजकां ते शास्त्री लोकां केरे हवाले कियूं गालू, ते तैना तैस मारनेरे काबल ठैरेले।

\* 20:2 20:2 दीनार एककी दिहैडरी मज़दूरी।

19 तैस गैर कौमां केरे हवाले केरेले, तैना मैनेरे मट्ठेरी यानी मेरी हासी बनाले, ते तैस कोडे बाहेले, ते फिरी तैस कुरूसे पुड चाढेले, ते अवं दलेइयोवं दिहाडे फिरी ज़ीतो भोलो ।”

????? ?????? ?????

(????? 10:35-45)

20 तैखन जब्दी नंव्वेरे मैनेरां मट्ठां केरि अम्मा अपने मट्ठन सेइं साथी यीशु कां आई, ते तैस कां मिनत केरने लाई ते तैस करां किछ् मगने लग्गी ।

21 तैने तैस पुच्छ्, “तीं कुन लोडते?” तैसां ज़ोवं, “वचन दे, कि मेरां इन्ना मट्ठां तेरे राज्जे मरां अक तेरे देइने पासे त होरू तेरे बाएं पासे विग्रशन ।”

22 पन यीशुए तैन सेइं ज़ोवं, “तुस न ज्ञानथ कि कुन मगने लग्गोरेथ! ज़ेन्चरे दुख अवं झलने बालोई, कुन तुस झेल्ली सकतथ? तैनेईं जुवाव दित्तो, हाँ झेल्ली सकतम ।”

23 तैनी तैन सेइं ज़ोवं, “तुस मेरे ज़ेरो दुःख झललेले, पन एन मेरू कम नई कि एककी देइने पासे ते होरि बाएं पासे विशैली, ए ठार ज़ेसेरे लेइ मेरे बाजेरे तरफां रखोरीए तै तैसेरे लेइए ।”

24 एन शुन्तां होरि दश चलेईं तैन दूईं हलान पुड नराज्ज भोइ जे ।

25 यीशुए अपने सारे चले नेडे कुजेइतां, तैन सेइं ज़ोवं, “होरि कौमां केरे प्रधान अपने लोकन पुड राज्ज केरतन, ते तैन केरे मालिक तैन पुड अधिकार रखतन ।

26 पन तुसन मां एरू न लोडे भोरू, बल्के तुसन मां ज़े बड्डो वन्नो चाते, तै सेब्भी केरो सेवक बने ।

27 ज़ै कोई तुसन मां प्रधान वन्नू चाए, तै सेब्भी केरो गुलाम बने,

28 ज़ेन्चरे कि मैनेरू मट्ठू एल्हेरेलेइ नई ओरूए कि कोई तैसेरी सेवा केरे, बल्के एल्हेरेलेइ कि सेवा केरे, ते अपनि जान बडे लोकां केरे छुटकारेरे लेइ दे ।”

????? ?????? ?????

(????? 10:46-52; ????? 18:35-43)

29 ज़ैखन यीशु त तैसेरे चले यरीहो नगरे मरां ज़लोरे थिये, त बडे लोक तैस पत्पती ज़ले ।

30 दूईं काने वत्ती मां विग्रशारे थिये, तैनेईं एन शुनू कि यीशु इस बत्तां ज़लोरोए, त तैना चिन्डां मारने लग्गे, “हे प्रभु दाऊदेरा मट्ठां असन पुड दया केर ।”

31 लोक तैन झिडकने ते ज़ोने लग्गे कि चुप राथ, पन तैना मना चिन्डां मारने लग्गे, “हे प्रभु, दाऊदेरा मट्ठां असन पुड दया केर ।”

32 तैखन यीशु खेडोव ते तैन कुजेइतां पुच्छ्ने लग्गे, “तुस कुन चातस अवं तुग्रशे लेइ केरि?”

33 तैन कानेईं जुवाव दित्तो, “हे प्रभु अस चातम कि इग्रशी एछ्छन लौ एज्जे ।”

34 यीशुए तैन पुड बड्डो तरस अव, ते तैनी तैन केरे एछ्छन पुड हथ रख्खो ते तैना लहने लग्गे, ते दुइये काने यीशु पत्ती ज़ले जे ।

## 21

????? ?????? ???

(????? 11:1-11; ????? 19:28-40; ????? 12:12-19)

1 ज़ैखन यीशु ते कने तैसेरे चले यरूशलेम नगररे नेडे पुजे, त यीशुए ज़ैतून पहाडे पुड बैतफगे मरां अपने दूईं चले एन ज़ोइतां अग्रोवं भेजे ।

2 “अपने सामने उस इलव्वे मां गाथ, ते तैड़ी पुजले, त तुसन अक गधी बंधोरी मैलनिये, ते तैस साथी तैसेरो वच्चो भी भोनोए, तैस खोलतां इड़ी मीं कां आनां ।”

3 अगर तुसन कोई पुच्छ्, त तुस ज़ोइयथ, कि प्रभुए एसेरी ज़रूरत आए, ते तै लूशी तैस वापस भेजेलो ।

4 इन सब किछ् एल्हेरेलेइ भोवं, कि नेबे ज़ैन वचन ज़ोरू थियूं, तैन पूरू भोवं,

5 “सिय्योनेरे कुइये सेइं ज़ोथ,

कि तेरो राज्रो तीं कां ओरोए,  
ते तै बडो हलीमी ते तै गैधी पुड च्चेढतां ओरोए,  
बल्के गधेरे बच्चे पुड ।”

6 चले चले जे ते जेन्चरे यीशुए ज़ोरू थियुं, तैनेई तेन्चरे कियुं ।

7 तैनेई तै गधी ते तैसारो बच्चो आनो, ते तैन पुड अपना लिगडां छडां, ते यीशु तैस पुड च्चेढतां चलो ।

8 बडे लोकेई अपना लिगडां बत्ती मां विछ्ठां, ते किछ्छेई बुट्टा केरे डाल केटतां बत्ती मामेई छुडोरे थिये ।

9 ते तैना लोक जैना यीशु सेइं साथी अगरी-अगरी ते पत्ती-पत्ती चलोरे थिये, तैना नहरे देते थिये, “दाऊदरे मट्ठेरी होशाना (तारीफ़), धने तै, जै प्रभुएरे नंवे सेइं एइते, स्वर्गें मां होशाना\* ।”

10 जैखन यीशु यरूशलेम नगरे मां पुजो, त सारे नगर मां हलचल मेजि जेई, ते लोक ज़ोने लगगे, “ए कौने?”

11 लोकेई ज़ोवं, “ई गलीलेरे नासरत नगरेरो नबी यीशुए ।”

*Matthew 11:15-19; 19:45-48; 21:23-22)*

(*Matthew 11:15-19; 19:45-48; 21:23-22)*

12 यीशुए परमेशेरे मन्देरे अंगने मां गोइतां, जैना बुपारी बुपार केरते थिये सब तैट्टां कडे, तैनी सुनारां केरि दुकान ते कबूतर बेचने बालां केरि ठारां टलोडी ।

13 ते तैनी ज़ोवं, “लिखोरूए कि मेरे मन्देरे जो प्रार्थना केरनेरू घर ज़ोले, पन तुसेई त ए डैकू केरो अडडो बनेवरोए ।”

14 तैखन काने ते टोटे मन्देरे मां यीशु कां आए, ते तैनी तैना सब बज्झाए ।

15 पन जैखन मन्देरे प्रधान याजक ते शास्त्री लोक एना कम्मां जैना तैनी कियां, ते मट्टन मन्देरे मां दाऊदरी औलादरी होशाना (तारीफ़) ज़ोते लाए, तैन बड्डी सरक आई ।

16 ते तैस सेइं ज़ोने लगगे, “तू शुन्ने लोरोस कि एना कुन ज़ोने लोरेन?” यीशुए तैन सेइं ज़ोवं, “हाँ अवं शुन्ने लोरोई, तुसेई कधे नई पढेरू कि, तीं मट्टन ते दुद्ध पीते बच्चन करां भी तीं अपनि पूरी तारीफ़ कमाई?”

17 तैखन ते तैन शेरतां नगरे बेइरोवं चलो जेव, ते बैतनिय्याह नगरे मां जेव ते तैडी रात गुज्जारी ।

*Matthew 11:12-14,20-24)*

(*Matthew 11:12-14,20-24)*

18 झेझां जैखन यीशु नगरे मांजो वापस ओरो थियो, त तैस दलुख लगगी ।

19 बत्तारे इलेखी अक फ़ेगोरो बूट लाव ते तैस कां जेव, ते पट्लां केरे अलावा तैस पुड किछ्छ न लाव, तैनेई तैस जो ज़ोवं, “कधे भी तीं पुड फल न लग्गेलो ते तैखने तै बुट्ट शुक्की जेव ।”

20 एन हेरतां चले हैरान भोइतां पुच्छ्छन लगगे, “ई फ़ेगोरो बुट्ट अकदम केन्चरे शुक्की जोरोए?”

21 यीशुए जुवाब दित्तो, “अवं तुसन सेइं सच्च ज़ोताई कि अगर तुस विश्वास रखथ, ते शक न केरथ, जैन फ़ेगोरे बुटे सेइं भोवं तैन तुस भी केरि सकतथ, बल्के उस पहाडे जो ज़ोले कि इट्टां उखडतां समुन्देरे मां गा, त तैन्ने भोलू ।”

22 अगर तुशुओ विश्वास पक्कोए त जैन किछ्छ तुस प्रार्थनाई मां मग्गोले, तैन तुसन मैल्ली गालू?

*Matthew 11:27-33; 20:1-8)*

(*Matthew 11:27-33; 20:1-8)*

23 यीशु मन्देरे मां शिक्षा देने लोरो थियो, त प्रधान याजक, ते लोकां केरे बुजुर्गेई तैस पुच्छ्छ, तू एन कम कसेरे अधिकारे सेइं केरतस? ते तीं एन कम कैनी दित्तोरोए?

\* 21:9 होशाना मतलब बजाथ



24 यीशुए तैन जुवाब दित्तो, “अवं भी तुसन अक गल पुछ्ततई, अगर तुस तैसेरो जुवाब देले, त अवं भी ज़ोडलो कि अवं एन कम कसरे अधिकारे सेइं केरताई।

25 यूहन्नारो बपतिस्मो कोट्टां थियो? स्वर्गेर तरफां थियो, या की इन्सानेरी तरफां थियो? तैना एप्पू मामेइं गलवात केरने लग्गे, कि अगर अस ज़ोतम कि, स्वर्गेर तरफां थियो, त फिरी तैनी ज़ोनूए कि फिरी तुसेईं तैसेरू याकीन की नईं कियेरू?

26 पन अगर अस ज़ोतम कि, ‘इन्सानेरी तरफां थियो,’ त लोकां केरो भी डरे किजोकि लोक यूहन्ना नवी मन्त्ते थिये।”

27 एल्हेरेलेइ, तैनेईं यीशुए जुवाब दित्तो, “अस किछ् न ज़ानम।” तैनी भी तैन सेइं ज़ोवं, “अवं भी तुसन सेइं न ज़ोईं कि अवं इन कम्मां कसरे अधिकारे सेइं केरताई।”

~~~~~

28 पन तुस इस मिसालरे बारे मां कुन सोचतथ? केन्वी मैनेरां दूईं मट्टां थियां, तैनी बड्डे मट्टे कां गेइतां ज़ोवं, “अज़ दाछ्छरी बागी मां गा ते कम केर।”

29 तैनी जुवाब दित्तो, “अवं न गेईं।” पन वादे मां पशतेइतां ज़लो जेव।

30 फिरी बाजे होरि मट्टे कां भी गेइतां एन्ने ज़ोवं, तैनी जुवाब दित्तो, “अच्छा खरी गाताई।” पन जेव नन्ना।

31 “एन दुइने मरां केनि अपने बाजेरो हुकम मन्तो?” तैनेईं जुवाब दित्तो बड्डे हुकम मन्तो, यीशुए तैन सेइं ज़ोवं, कि अवं तुसन सेइं सत्र ज़ोताई, कि चुंगी धिन्ने बाले ते बदचलन कुआन्शां तुसन करां पेइले परमेशेरे राज़ मां दाखल भोली।

32 अवं इन ज़ोताई, यूहन्ना बपतिस्मो देनेबाले तुसन ज़ोवं, कि धार्मिकतारी ज़िन्दगी केन्चरां ज़ीनीए पन तुसेईं तैसेरू विश्वास न कियो, पन चुंगी धिन्ने बाले ते बदचलन कुआन्शेईं तैसेरू विश्वास कियुं, एन हेरतां भी तुसेईं पापन करां मन न फिराव ते तैस पुड़ विश्वास न कियो।

~~~~~

(~~~~~ 12:1-12; ~~~~~ 20:9-19)

33 अक होरि मिसाल शुना, एक्की ज़मीनदारो अक दाछ्छरी बाग लाई ते तैसेरे च़ेवरे पासन बाड़ दित्तो, ते दाछ्छारो रस कढनेरे लेइ अक हौवज़ बनावं, ते तैस बागरी हेरगेश केरनेरे लेइ अक उच्चवी कूड़ी बनाई ते फिरी तै काशत केरनेबालन ठेके पुड़ देइतां कोन्च दूर परदेशे जो ज़लो जेव।

34 ज़ैखन दाछ्छ टलोइनेरो मौको अव त तैनी अपनो हिस्सो नेनेरे लेइ अपने नौकर तैन ठेकेदारन कां भेजे।

35 ते ठेकेदारइं तैसेरे नौकर कोई झूसो कुटो कोई मारो ते केन्वी जेईं घोडेईं दित्ती।

36 फिरी तैनी होरे नौकर भेजे ज़ैना पेइलन करां जादे थिये, पन ठेकेदारइं तैन सेइं भी तेरहो ज़ेरो सलूख कियो।

37 आखकार तैनी अपनू मट्टू तैन कां भेजे, ते सोचू कि मेरे मट्टेरो त लिहाज़ केरेले।

38 “पन ज़ैखन ठेकेदारइं तैसेरू मट्टू लाव, त तैना एप्पू मामेइं मुशोरों केरने लग्गे, कि एज्जा एस सेवां मारम ते एसेरी बागी पुड़ कब्ज़ो केरम।”

39 “तैखन तैनेईं तैन मट्टू टलाव ते बागारे बेइर शेरी छ्छ्इइ।

40 एल्हेरेलेइ ज़ैखन बागरो मालिक एप्पू एज्जेलो, त तैन ठेकेदारन सेइं केरो सलूख केरेलो?”

41 तैनेईं जुवाब दित्तो, तै तैन बुरन, बुरे तरीके सेइं मेरतां बागरो ठेको होरि ठेकेदारन देलो, ज़ैना मौके पुड़ तैसेरो हिस्सो तैस देन।

42 यीशुए तैन सेइं ज़ोवं, “तुसेईं पवित्रशास्त्रे मां कधे नईं पढ़ेरू,

ज़ै घोड़ मिस्त्रेईं रद्दी कियोरो थियो,

तैए कूनेरो घोड़ भोलो,

एन कम परमेशेरे कियोरूए,

ते इश्शी नज़री मां एन आजीब आए?”

43 एल्हरेलेइ अवं तुसन सेइं ज़ोताई, कि परमेशेरू राज़ तुसन करां निव गालू, ते एरी कौमी कां दिन्तू गालू ज़ै वक्ते पुड़ तैस फल दे ।

44 ते ज़ै कोई इस घोड़े पुड़ बिछड़ेलो त तैसेरे टुकड़े-टुकड़े भोइ गाले, पन ज़ै एस उन्ढो बिछड़ेलो त तैस पइतां छुड़ेले ।

45 परधान याजक ते फरीसी लोकेई यीशुएरी ए मसाल शुन्तां सेमझी जे, कि यीशु एन गल्लां इश्शे बारे मां ज़ोने लोरोए ।

46 तैनेई यीशु टलानो चाव, पन लोकन करां डरते थिये किजोकि तैना यीशु नबी मन्ते थिये ।

## 22

XXXXXXXX XXXX XXXX

(XXXX 14:15-24)

1 यीशु फिरी मसाल देइतां ज़ोने लगे ।

2 “स्वर्गेरू राज़ एक्की राज़ेरू ज़ेरूए, ज़ैनी अपने मट्टेरे इला बनाव ।

3 ते अपने नौकर भेजे कि तैना लोकन ज़ैन जेई इलाएरी धाम बनोरी थी, तैन कुजान पन तैना न आए ।

4 तैखन तैनी अपने नौकर एन ज़ोइतां भेजे, कि ज़ैन जेई इलाएरी धाम बनेवरीए, तैन ज़ोथ, रोट्टी बनोरीए ते मीं बडे-बडे जानवर कट्टोरन, ते सब किछ तियार भोरूए, ते इलाएरी धामी मां शामिल भोथ ।

5 पन तैनेई ध्यान न दिन्तू ते कोई परवाह न की, कोई अपने ऊडारे मां च़लो जेव, ते कोई अपने कारोबारे मां लगे ते कोई कोरां च़लो जेव ।

6 किछेई तैसेरे नौकर टलेइतां तैन तैना बेइजत किये, ते जानां भी मैरी छुड़डे ।

7 ज़ैखन राज़े एन शुनू त राज़े बड़ी सरक आई, ते तैनी अपनि फौज भेजतां तैना कातली मैरी छुड़डे ते तैन करां नगरां फुके ।

8 तैखन तैनी अपने नौकरन सेइं ज़ोवं, इलाएरी धाम तियार आए, पन ज़ैन कुजारे थिये तैन एस काबल नई ।

9 एल्हरेलेइ तुस हर पासे गाथ ते ज़ेत्तरे तुसन मैलतन, तैना सब इरां कुजाथ ।

10 तैखन तैना नौकर च़ले जे ते हर पासे गोइतां ज़ेत्तरे खरे बुरे तैन मैल्ले, सब अकोट्टे इलाए मां आने ते मेहमानेइं सेइं घर भेरतां भोवं ।

11 “ते राज़ो मेहमान सेइं मिलने अन्तर अव, त तैसेरी नज़र एक्की मैन्हु पुड़ पेईं ज़ै इलाए मां इलेरां लिगड़ां लेइतां न थियो ओरो ।”

12 राज़े तैस पुच्छू, हे दोस्त, तू इलाएरे लिगड़न मां की नई ओरो? पन तैने किछ न ज़ोवं ।

13 “एस गल्ली पुड़ राज़े अपने नौकरन सेइं ज़ोवं, एसेरे हथ पाव बंधतां बेइर आंधरे मां छुड़डा ज़ैड़ी ए लेरां दंतो राए, ते दंत चापतो राए ।”

14 किजोकि परमेशेरू हमेशारे ज़िन्दगरे लेइ त बडे कुजारेन पन चुनोरे थोड़ैन ।”

XXXXXXXX XX XXXX XXXX

(XXXX 12:13-17; XXXX 20:20-26)

15 तैखन फरीसी लोक तैट्टां च़ले जे, ते एप्पू मामेइं मुशोरो करेने लगगे एस केन्बरे गल्लन मां फसाम ।

16 एल्हरेलेइ तैनेई अपने किछ च़ले हेरोदेस राज़ेरे लोकन सेइं साथी यीशु कां भेजे, ते तैनेई ज़ोवं, “हे गुरू अस ज़ानतम कि तू सच्चोस, ते परमेशेरी बत सच्चैइं सेइं शिखालतस ते कोन्वेरी परवाह न करस किजोकि तू मैन्हु करू तुतर हेरतां गल्लां न करस ।

17 एल्हरेलेइ असन ज़ो, तू कुन सोचतस? महाराज़े जो चुंगी देनी जेइजे की नई?”

18 यीशु तैन केरि चाल सेमझतां ज़ोवं, “हे पाखंडी लोकव मीं किजो अज़मातथ?

19 ज़ै सिको चुंगरे लेइ देतथ तैस मीं हिराथ, तैनेई अक दीनार तैस कां आनो ।

20 यीशुए तैन पुच्छू, इस पुड़ कसेरी शकल ते कसेरू नव लिखोरूए?”

21 तैनेई जुवाब दित्तो महारजेरू, तैखन तैनी तैन सेइं ज़ोव, “जैन महारारजेरूए तैन महारजे जो देथ, ते जैन परमेशेरूए तैन परमेशेर जो देथ ।”

22 तैना एन शुन्तां हैरान रेइजे, ते तैस तैड़ी छेइतां चले जे ।

~~~~~

(~~~~~ 12:18-27; ~~~~~ 20:27-40)

23 तेस्से दिहेड़ी किछ् सद्की लोक जैना ज़ोते थिये कि मरनेरां बाद कोई ज़ीतो नई भोनो, तैनेई तैस पुच्छू,

24 “हे गुरू मूसे ज़ोरूए कि, ‘अगर कोई मैन्हु बेऔलाद मेरि गाए, त तैसेरो दूला तैसेरी कुआन्शी सेइं इला बनाए ताके अपने दूलाएरे लेइ औलाद पैदा केरे ।’

25 इश्शे इड़ी सत दूला थिये, पेइले इला बनेइतां मेरि जेव, तैस औलाद न थी तैनी अपनि कुआन्श अपने दूलाएरे लेइ छेइडी दित्ती ।

26 ए वजा आए तैसेरे दुइयोवं ते टलेइयोवं भी एन्चरे कियू बल्के सत्ते दूलान सेइं एन्ने भोतू राऊ ।

27 आखकार तै कुआन्श भी मेरि जेई ।

28 हुनी ज़ो तै कुआन्श मुइदन मरां ज़ीते भोनेरे दिहाइ तैन सत्ते दूलान मरां कसेरी कुआन्श भोली? किजोकि तै सेब्मी केरि कुआन्श बनोरी थी ।”

29 यीशुए तैन जुवाब दित्तो, “तुस न पवित्रशास्त्र ते न परमेशेरी शक्ति ज्ञानथ, ते एस्से वजाई सेइं तुस टेपलोरथ ।

30 किजोकि ज़ीते भोनेरां पत्ती तैना इला न बनाले, पन तैना स्वर्गें मां परमेशेरे स्वर्गदूतां केरे ज़ेरे भोनेन ।”

31 “पन मुइदन मरां ज़ीते भोनेरे वारे मां कुन तुसेईं इन वचन नई पढेरू जैन परमेशर तुसन सेइं ज़ोवं,

32 ‘अवं अब्राहमेरो परमेशर, ते इसहाकेरो परमेशर ते याकूबेरो परमेशर आई?’ तै मुवोरां केरो नई बल्के ज़ीतां केरो परमेशर ।”

33 लोक तैसेरी ए शिक्षा शुन्तां हैरान रेइजे ।

~~~~~

(~~~~~ 12:28-34; ~~~~~ 10:25-28)

34 जैखन फरीसी लोकेई एन शुनू कि तैनी सद्की केरू आशी बंद कियोरूए, त तैना तैस कां सब अकोट्टे भोए ।

35 तैन मरां अक शास्त्री तैस अज़मानेरे लेइ यीशुए पुच्छू ।

36 “हे गुरू, मूसेरे कानूने मां सेब्बन करां बड्डो हुक्म कौ आए?”

37 तैनी ज़ोवं, “तू परमेशेर अपने प्रभु सेइं अपने सारे दिले सेइं ते अपनि सैरी जानी सेइं ते अपनि सैरी अक्ली सेइं प्यार केरा ।

38 सेब्बन करां बड्डो ते खास हुक्म ईए ।

39 एसेरो ज़ेरो ईए, ‘अपने पड़ोसी सेइं अपने बराबर प्यार केर ।’

40 इन्ना दूई हुक्म मूसेरे कानून ते नेबी केरो आधारे ।”

~~~~~

(~~~~~ 12:35-37; ~~~~~ 20:41-44)

41 जैखन फरीसी लोक भी तैड़ी जम्हां भोइजेइ, त यीशुए तैन पुच्छू ।

42 “मसीहेरे वारे मां तुश्शो कुन खियाले, कि तैन कसेरू मट्टूए?” तैनेई जुवाब दित्तो, “दाऊदेरू मट्टू ।”

43 यीशुए तैन सेइं ज़ोवं, “फिरी दाऊद आत्माई मां तैस जो प्रभु किजो ज़ोते?”

18 “तुस ज़ोतथ कि अगर कोई बलिदान ज़ादनेरे ठारारी कसम केरे, त कोई हज़ नई, पन ज़ेदोरी चीज़री कसम केरे त तैसेरो पाबंद भोलो।

19 हे कानाव! बड्डू कुन आए, ज़ादोरी चीज़ या बलिदान ज़ादनेरे ठार ज़ेसेरी वजाई सेई ज़ादोरी चीज़ पवितर समझी गाचे?

20 अगर ज़े कोई बलिदान ज़ादनेरे ठारारी कसम केरते, त तै सेबी ज़ेदोरी चीज़ां केरि कसम केरते।

21 ज़े कोई मन्देरी कसम केरते त तै मन्देरे मां रानेबाले परमेशेरी कसम केरते।

22 ते ज़े कोई स्वगेरी कसम केरते, तै परमेशेरे तखतेरी ते तैस पुड़ बिशने बालेरी कसम केरते।”

23 “हे पाखंडी शास्त्री ते फरीसी लोकव, तुसन पुड़ अफ़सोस, तुस पुतनेरो ते सॉफ़ेरो ते ज़ीरेरो दशोवं हिस्सो त देतथ, पन मुसेरे कानूनेरी खास गल्लां ज़ेन्चरे इन्साफ़ केरनो, दया केरनि ते ईमानदार भोनू शारोरूए, ज़रूरी धियूं तुस एन भी केरते राथे ते तैन भी न शारेथे।

24 हे बत हिराने बाले कानाव! तुस मशशे त छानतथ पन सथ्थो ऊँट निगलतथ।”*

25 “हे पाखंडी शास्त्री ते फरीसी लोकव, तुसन पुड़ अफ़सोस, तुस कटोरो ते कने थाली बेडरमेई खूब मांजतथ पन अन्तरेमेई लालच ते बे सबरीए भेरताए।”

26 “हे काने फरीसाव पेडले कटोरो ते थाली अन्तरेमेई मांज्रा, ते फिरी बेडरमेई भी साफ़ भोए।”

27 “हे पाखंडी शास्त्री ते फरीसी लोकव तुसन पुड़ अफ़सोस, तुस तैन कवरां केरे ज़ेरेथ ज़ैन बेडरमेई त सफ़ेदीए ते बेड़ि रोड़ी लेहीयोचन, पन अन्तरेमेई मुडदां केरि हड्डी ते सब किसमेरी गेन्दगी सेई भेरतन।

28 एन्चरे तुस बेडरमेई लोकन बडे धर्मी लेइयोतथ, पन अन्तरेमेई दुनियारे पाखंडे ते अधर्मे सेई भेरतथ।”

~~~~~

(~~~~~ 11:47-51)

29 “हे पाखंडी शास्त्री ते फरीसी लोकव तुसन पुड़ अफ़सोस, किजोकि तुस नेबी केरे आसथान सजातथ ते धर्मी लोकां केरि कवरां बनातथ।

30 ते ज़ोतथ कि, ‘अगर अस अपने दादे-पड़दादां केरे ज़माने मां भोथे त नेबन मारने मां तैन केरू साथ न देथे।’

31 एन्चरे तुस एप्पू मन्तथ कि तुस नेबी केरे कल्ल केरनेबालां केरि औलादी मरां आथ।

32 हुनी तुस अपने दादे-पड़दादां केरे पापेरे घडो भरते राथ।”

33 “हे ज़हरीले सप्पां केरे ज़ेरे बच्चाव! तुस नरकेरी सजाई करां केन्चरे बच्चेले?

34 एल्हेरेलेइ हेरा अवं नेबन ते अकलमन्दन ते शास्त्री लोकन तुसन कां भेजताई, तुस तैन मरां किछन कल्ल केरले, ते किछन करूसे पुड़ ज़ादले, ते किछन अपने प्रार्थना घरे मां कोडेई सेई बाले, ते नगरे-नगरे मां तैन मारनेरे लेइ तैन पत्नी लगगोरे राले।

35 एल्हेरेलेइ सारे धर्मी केरो कल्ल ज़ै इस धेरती पुड़ भोरोए, तैन केरि सज़ा तुसन पुड़ एज्जे, धर्मी हाबिलेरे कल्ले करां लेइतां, ते बिरिक्याहरे मट्टे जकर्याहरे कल्ले तगर ज़ै तुसेई मन्देरे ते बलिदान केरनेरे ठारारे मज़ाटे मन्देरे अंगने मां कल्ल कियोरो थियो।

36 अवं तुसन सेई सज़ ज़ोताई कि इस ज़मानेरे लोकन एना सैरी गल्लां केरे सज़ा मैलनी।”

~~~~~

(~~~~~ 13:34-35)

37 फिरी यीशुए ज़ोवं, “हे यरूशलेम नगरेरे लोकव, हे यरूशलेम नगरेरे लोकव, तुसेई केतरे नबी कल्ल किये ज़ेना बडे पेडले तुसन कां आए, ते ज़ेना तुसन कां भेजे तुसेई तैन घोडेई बेई, मीं बडे वार सोचू कि तेरे बच्चन अकोट्टे केरि ज़ेन्चरे कुकड़ी अपने बच्चन अपने फंगन हैट रखचे पन तुस राज़ी न भोए।

* 23:24 23:24 तैना लोक कानूनेरी निक्की-निक्की गल्लां बडे ध्याने सेई मन्ते थिये ज़ेन्चरे किछ पीनेरी चीज़न मरां मशशे छान्ने, पन तैना परमेशेरे खास हुक्म न थिये मन्ते। तैन ऊँट निगलनेरू ज़ेरू आए।

38 हेरा तुशू घर तुशू लेइ बेरान भोइ गाते ।

39 किजोकि अवं तुसन सेइं सत्र ज़ोताई, कि तुस मीं हुन्ना करां तैस दिहाडे तगर कधे न लेईं सकेले, जांतगर मेरे बारे मां इन न ज़ोले, तैसेरी तारीफ़ भोए ज़ै प्रभुएरे अधिकारे सेइं एइते । ”

24

Matthew 24:1-13
(*Matthew 13:1-2; Matthew 21:5-6*)

1 ज़ैखन यीशु मन्दरे मरां निस्तां च़लोरो थियो, ते तैसेरे चले तैस कां आए, ताके तैस मन्दरेरे रोडे-रोडे भवन हिरान ।

2 तैनी तैन सेइं ज़ोवं, “कुन तुस एन सब किछ् हेरने लोरेथ? अवं तुसन सेइं सत्र ज़ोताई कि इडी कोई घोडे पुड़ घोड़ बाकी न रालो, ज़ै बछ्छोड़ो न गालो ।”

Matthew 24:14-19
(*Matthew 13:3-13; Matthew 21:7-19*)

3 ज़ैखन तै ज़ैतून पहाड़े पुड़ बिशोरो थियो, त तैसेरे चले अलग ज़ेरे तैस कां एइतां तैस सेइं ज़ोने लगगे, “असन ज़ो कि एन गल्लां केइस भोनिन? ते तेरे एजनेरो ते दुनियारो अन्त भोनेरो कुन निशान भोनेए?”

4 यीशुए तैन जुवाब दित्तो, “खबरदार राथ, कोई तुसन न टपलाए!

5 किजोकि बड़े मेरे नव्वे सेइं एजनेन ते तैनेईं ज़ोनूए कि, ‘अवं मसीह आई,’ ते तैनेईं बड़े लोक टपलानेन ।

6 तुस लड़ाई ते लडैईं केरि अफवाह शुनेले, खबरदार डेरथ नन्ना, किजोकि एन गल्लां ज़रूरी भोनिन, पन तैस वक्ते खातमों नईं भोनों ।

7 किजोकि कौमी पुड़ कौम, ते राज्जे पुड़ राज चढ़हाईं केरेलू, ते ठारी-ठारी काल पेलो, ते भुंजल एज्जले ।

8 मुसीबतां केरि शुरुआत भी एन्ने गल्लेईं सेइं भोनीए ।

9 तैखन ज़ैना तुशू खलाफन तैना तुसन टलेइतां बड़ी सखत सज़ा देले, ते कल्ल केरेले, ते मीं पुड़ विश्वास केरनेरे वजाईं सेइं, सैरी कौमां केरे लोक तुसन सेइं बैर रखेले ।

10 तैखन बड़े लोक मीं पुड़ विश्वास केरनो शारेले, एक्की होरि टलुवाले, ते एप्पू मामेइं भी बैर रखेले ।

11 ते बड़े झूटे नवीं दुनियाईं मां निसनेन ते बड़े लोक टपलानेन ।

12 अधर्म बधने सेइं बड़े लोक एप्पू मामेइं प्यार केरनो शारेले ।

13 पन ज़ै कोई आखरी दम्मं तगर मीं पुड़ विश्वास केरेलो, त तैस्से मुक्ति मैलनीए ।

14 ते परमेशेरे राज्जेरी ईं खुशखबरी दुनियारे हर पासे शुनाईं गाली, ताके सैरी कौमां केरे लोकन मौको मैले कि तैना इस कबूल केरन, तैखन दुनियारो खातमों भोलो ।”

Matthew 24:20-24
(*Matthew 13:14-23; Matthew 21:20-24*)

15 “ज़ैखन तुस तैस उज्जाने वाली भिट्टी चीज़ी, ज़ेसेरे बारे मां दानिय्येल नेवे ज़ोरू थियू, पवित्तर ठैरी खड़ी लाएले, (त पढ़नेवालो भी समझे) ।

16 कि ज़ैना तैस मौके यहूदिया इलाके मां भोले तैना पहाड़न पुड़ जो नश्शन ।

17 ते ज़ैना लाए पुड़ भोन त तैना कोई चीज़ नेने अन्तर न एजन ।

18 ते ज़ै मैन्हु ऊडारे मां भोलो, त तै लिंगड़ां नेने अन्तर न एज्जे ।”

19 तैन दिहाड़न मां ज़ैना दोज़ीती त दुद्ध पियाती कुआन्श भोली, तैन केरे लेइ अफ़सोस!

20 “ते प्रार्थना केरा कि तुसन हिंवतडे या आरामेरी दिहाड़ी नश्शन न पे ।

21 किजोकि तेइस एतरी बड्डी मुसीबत भोली, जेरि दुनियारे शुरू करां अज तगर नई ओरी, ते न कधी एज्जेली ।

22 अगर तैन दिहाड़ां केरि तैधात घटेवरी न भोथी, त कोई प्राणी न थियो बच्चानो, पन चुनोरां करे लेइ तैना दिहाड़े घटेवरेन ।

23 अगर कोई तुसन सेइं जोए कि, 'तक्का, मसीह इड़ी आए! या उड़ी आए! त तुस विश्वास न करथ ।'

24 "किजोकि झूठे मसीह ते झूठे नबी दुनियाई मां निसनेन, ते तैनेई निशान ते बड्डे-बड्डे चमत्कार हिरानेन, ते भोइसखे त चुनोरे लोक भी टेपलानेन ।

25 हेरा, मीं तुसन सैरी गल्लां भोनेरे पेइले जोरिन ।

26 अगर कोई तुसन सेइं जोए कि, 'हेरा तै जंगले मांए,' त तुस बेइर न गेइयथ; हेरा, तै घरे मांए,' त तुस विश्वास न करथ ।'

27 "किजोकि जेन्चरे बिजली पूर्वोरां, पछमें तगर चमकतीए एन्चरे मैनेरू मट्टू भी एज्जेलू ।"

28 "जैड़ी जिगग भोते तैड़ी इल्लां जम्हां भोइचन ।"

~~~~~

(~~~~~ 13:24-27; ~~~~~ 21:25-28)

29 "तैन दिहाड़ना बाद दिहाड़ो कालो भोइ गालो, त चाँदनी लौ न देली, त कने अम्बेरां तारे बिछ्छुने लगगले, त अम्बेरी सैरी शेक्ति हिलेइ गेली ।

30 तैखन मैनेरे मट्टेरो निशान अम्बेरे मां लेइहोनोए, ते दुनियारी सैरी कौमां छाती पिट्टेली, ते मैनेरू मट्टू अम्बेरे मरां बिदलारी पुड़ बेड़ि शेक्ति ते महिमा सेइं एइते लाएले ।

31 ते तै अपने स्वर्गदूत ते नइशिंगेरी बड़ी आवाजी सेइं साथी भेजेलो, ते तैसेरे चुनोरे लोकन च़ेवरे पासन अम्बेरे एक्की पासेरां होरिं पासे तगर सेब्बन जम्हां केरेले ।"

~~~~~

(~~~~~ 13:28-31; ~~~~~ 21:29-33)

32 "फ़ेगेरे वुटे करां ई सबक शिखा, जेरे तैसेरे डाल नर्म भोतन ते पट्लां निसतन त तुस बुझतथ कि गेमेंरो मौसम एजनेवालो आए ।

33 एसेरो जेरो, जैखन तुस एना गल्लां, जैना मीं जोई, भोते हेरेले, त तुस बुज्झी छुइडा कि मैनेरू मट्टू, यानी अवं बड़े नेडे पुज्जोरोई ।

34 अवं तुसन सेइं सत्र जोताई, कि ज़ां तगर एन सब किछ्छ पूरू न भोए, तांतगर एस पीड़रो खातमां न भोलो ।

35 अम्बर ते धरती टेली गाली पन मेरी गल्लां कथे न टेलेली ।"

~~~~~

(~~~~~ 13:32-37; ~~~~~ 17:26-30,34-36)

36 "मेरे वापस एजनेरे दिहाड़ेरे बारे मां, या तैस वक्तेरे बारे मां कोई भी न ज़ाने कि तै कताली भोलो, स्वर्गेरे स्वर्गदूते भी न ज़ानन् त कने परमेशेरेरू मट्टू यानी अवं भी न ज़ैनी, पन सिर्फ मेरो बाजी परमेशर ज़ानते ।

37 जेन्चरे नूहेरे ज़माने मां भोरू थियूं, तेन्चरे मैनेरे मट्टेरे एजनेरे वक्ते भोनूए ।

38 किजोकि तूफान एजने करां पेइले भी लोक खाते पीते थिये, ते इला भी बनाते थिये, ते नूहेरे किशती मां गाने तगर एन सब किछ्छ भोतू राऊं ।

39 तैन पतो भी न थियो कि कुन भोने बालूए, इड़ी तगर कि तूफान अव ते तैनी सब किछ्छ रुडेइतां नेव, ते मैनेरे मट्टेरू यानी मेरू एजनू भी एरू भोनूए ।

40 तैखन ऊडारे मां दूई मैन्हू कम करते भोले ते अक नीयो गालो, ते दुइयोवं तैड़ी रालो ।

41 ते दूई कुआन्शां ढलाट पिती भोली त अक नी गाली ते होरिं तैड़ी राली ।

42 तुस बीझ्झ राथ किजोकि तुस न ज़ानथ कि तुशो प्रभु कइस एजनोए ।

43 पन याद रखा, अगर घरेरे मालिके पतो भोए कि चोर कताली एजानो, त तै वींझे विशेथो ते अपने घरे चोरी न भोने देथो ।

44 एल्हरेलेइ तुस भी तियार राथ, किजोकि ज़ैखन तुसन शक भी नई भोनी त मैनेरू मट्टू यानी अवं एज्जी गानोई ।”

⚬⚬⚬⚬⚬⚬ ⚬⚬⚬⚬⚬⚬ ⚬⚬⚬⚬⚬⚬ ⚬⚬⚬⚬⚬⚬  
(⚬⚬⚬⚬ 12:41-48)

45 “ईमानदार ते अक्लमन्द नौकर तैसेरो ज़ेरोए, ज़ेसेरो मालिक तैस अपने नौकरन पुड़ पुछ्छो गन्ने रखे ताके ते तैन मौके पुड़ रोटी दे, ते फिरी दूर सफरे पुड़ गाए ।”

46 “तै नौकर धने ज़ेसेरो मालिक एइतां तैस करां एरू ज़ेरू करतो लाए ।”

47 अवं तुसन सेइं सत्र ज़ोताई कि ते मालिक अपने घरेरो सारो अधिकार तैसेरे सुपुर्द करेलो ।

48 “पन अगर ते बुरो नौकर अपने दिले मां एन ज़ोए कि मेरे मालिकेरे एजने हेजू बडू चिरे ।

49 ते अपने सैथन मारने कुटने ते शरैपण सेइं खाए ते पीए ।

50 त तैसेरो मालिक कोस्कोई एरी दिहैड़ी एज्जे ज़ेइस तैस नौकरे उमीदे न भोए, ते तैसेरो मालिक वापस एज्जी गाए ।

51 ते मालिक तैस पक्की सज़ा देलो, ते तैसेरो हिस्सो पाखंडी लोकन सेइं साथी भोलो, ज़ैड़ी लेरां देनी ते दंत चापने भोले ।”

## 25

⚬⚬ ⚬⚬⚬⚬⚬⚬ ⚬⚬⚬⚬⚬⚬⚬ ⚬⚬⚬⚬⚬⚬⚬

1 तैखन यीशुए अपने चलन सेइं ज़ोवं, ज़ैखन मैनेरू मट्टू यानी अवं वापस एज्जेलो तैस मौके स्वर्गेरू राज तैन दश अइलैई कुइयां केरू ज़ेरू भोलू, ज़ैना अपनि मिसालां बैलतां लाड़े सेइं मिलनेरे लेइ निस्सी ।

2 तैन मां पंच बेवकूफ थी, पन पंच अक्लमन्द थी ।

3 ज़ैना बेवकूफ थी तैनेई मिसालां त नी, पन होरो तेल साथी न नीयो ।

4 “पन ज़ैना अक्लमन्द थी तैनेई मिसालां केरे अलावा कुप्पन मां होरो तेल भी साथी नीयो ।”

5 लाडो एजने चिर लगू, ते तैना सब बलगते-बलगते डिगरी लेइ देने, ते झुल्लती जेई ।

6 “अध्धी रात भोइ त शौर मच्ची कि लाडो ओरोए, ते तैस सेइं मिलनेरे लेइ एज्जा ।

7 तैखन सैरी अइलैई कुइयां वींझी, ते अपनि-अपनि मिसालां ठीक करने लेगि ।

8 बेवकूफ कुइयेई अक्लमन्द अइलैई कुइयन सेइं ज़ोवं, ‘अपने तेले मरां थोड़ो ज़ेरो तेल असन भी देथ, किजोकि इश्शी मिसालां हिश्शने लोरिन ।’

9 पन अक्लमन्देईं जुवाब दित्तो, ‘असन कां एतरो तेल नई, कि इश्शे लेइ ते तुश्शे लेइ पूरो भोए, तुस एरू केरा कि बेचनेबालन करां आनां ।’

10 ज़ैखन तैना तेल धिन्ने चेलोरि थी त तैतरे मां लाडो पुजी जेव, ते ज़ैना तियार थी, तैना लाडे सेइं साथी अन्तर इलाएरे घरे मां चेलि जेई, ते दार बंद केरतां छूडू ।

11 बादे मां तैना होरि अइलैई कुइयां भी वापस पुजी ते लाडे जो ज़ोने लेगि, ‘परभु! परभु!’ इश्शे लेइ दार खोल्ल ।

12 पन तैनी जुवाब दित्तो, ‘अवं तुसन सेइं सत्र ज़ोताई, अवं तुसन न ज़ैनी ।’

13 एल्हरेलेइ खबरदार राथ, किजोकि तुस मेरे वापस एजनेरे दिहाड़ेरे बारे मां न जानथ ।”

⚬⚬⚬⚬⚬⚬ ⚬⚬⚬⚬⚬⚬ ⚬⚬⚬⚬⚬⚬  
(⚬⚬⚬⚬ 19:11-27)

14 ज़ैखन मैनेरू मट्टू यानी अवं वापस एज्जेलो त स्वर्गेरू राज तैस मैनेरो ज़ेरू भोनूए, ज़ै दूर मुलखे जेव, तैनी अपने नौकर कुजाए ते सारी दौलत तैन दित्ती, ते तैन ज़ोवं एस दौलती सेइं होरि भी कमाई केरा ।



15 “तैनी एक्की पंच तोड़े दित्ते होरि दूई तोड़े दित्ते, ते एक्की अक्के तोड़ो\* दित्तो, हर एक्की तैसेरे काबलीतरे मुताबिक दित्ते, ते एप्पू होरि मुलखे जो चलो जेव ।”

16 ज़ैस नौकरे पंच तोड़े मैलोरे थिये, तैनी गेइतां कारोबार केरतां पंच तोड़े होरे कमाए ।

17 एन्चरे ज़ैस नौकरे दूई तोड़े मैल्लोरे, तैनी दूई होरे कमाए ।

18 पन ज़ैस नौकरे अक तोड़ो मैल्लोरे थियो, तैनी मित्ती घेइतां मालिकेरी रकम छुपेइतां छुडी ।

19 बड़े च्चिररां पत्ती तैसेरो मालिक वापस अव, ते नौकरन सेइं हिसाब केरने लगो कि तैनेई तैन तोड़ां केरू कुन कियूं ।

20 “ज़ैस नौकरे पंच तोड़े मैल्लोरे थिये, तैनी गेइतां पंच होरे तोड़े हाज़र कमाए ते ज़ोने लगो, हे मालिक तीं पंच तोड़े दित्तोरे, ते हेर मीं पंच तोड़े होरे कमाए ।”

21 मालिके तैस सेइं ज़ोवं, “शाबाश ईमानदार नौकरा तीं थोड़ी ज़ेरि रकमी पुड़ इमानदेरी सेइं कम कमाव, अवं तीं बेड़ि चीज़ां केरो मुख्तियार बनालो, ते अपने मालिकेरी खुशी मां शामिल भो ।”

22 ते ज़ैस दूई तोड़े मैल्लोरे थिये, तै भी अव ते ज़ोने लगो, “हे मालिक तीं मीं दूई तोड़े दित्तोरे थिये, ते हेर मीं दूई तोड़े होरे कमाए ।”

23 मालिके तैस सेइं ज़ोवं, “शाबाश ईमानदार नौकरा तीं थोड़ी ज़ेरि रकमी पुड़ इमानदेरी सेइं कम कमाव, अवं तीं बेड़ि चीज़ां केरो मुख्तियार बनालो, ते अपने मालिकेरी खुशी मां शामिल भो ।”

24 ते ज़ैस अक तोड़ो मैल्लोरे थियो, त तै भी हाज़र भोव ते ज़ोने लगो, “हे मालिक अवं ज़ानतो थियो तू बड़ो सखत मैन्हु आस, तू तैस मैनेरो ज़ेरोस ज़ैनी ऊडारे मां फसल नई बेवरी ते तै तैट्ठां फसल कटते ।”

25 एल्हेरेलेइ अवं डरो कि अगर अवं तेरी दौलत हिरेइलो त तू मीं सज़ा देलो, तांए तेरी दौलत मीं ज़मीनी मां देवतां छुडी, हेर, “तेरी दौलत ई आए ।”


26 तैसेरे मालिके जुवाब दित्तो, हे दुष्ट ते निकम्मे नौकरा अगर तीं पतो थियो, कि अवं तैस मैनेरो ज़ेरोई ज़ैनी ज़ैस ऊडारे मां नई बेवरू त तैट्ठां कटते ।

27 त तीं एन लोडतू थियूं कियोरू, कि मेरी दौलत शौकारां केरे हवाले केरस, तैखन अवं वापस एइतां अपनि दौलत सूते समेत उसुल केरेथो ।

28 हुनी एन केरा कि एस करां तै तोड़ो नेइतां तैस देथ ज़ैस कां दश तोड़ेन ।

29 एल्हेरेलेइ ज़ैस कां परमेशेरी मर्ज़ी समझनेरी इच्छा आए, तैस परमेशर जादे समझ देलो । पन ज़ैस कां परमेशेरी मर्ज़ी समझनेरी इच्छा नई, तैस केरां, थोड़ी ज़ेरि समझ ज़ै तैस कां आए, तै भी नी गाली ।

30 ते एस निकम्मे नौकरे आंधरे मां छुड़डा, ज़ैडी ए लेरा देंतो ते दंत चापतो राए ।



31 ज़ैखन मैनेरू मट्टू यानी अवं, अपने महिमा मां अपने स्वर्गदूतन सेइं साथी एज्जेलो त अपने महिमा रे तखते पुड़ बिशतां लोकन पुड़ राज़ केरलो ।

32 सैरी कौमां मीं कां अकोट्टी भोली, ते धर्मी लोक बुरे लोकन करां अलग किये गानेन, ज़ेन्चरे पुहाल भैड्डन, छेल्लन मरां अलग केरते ।

33 ते अवं धर्मी लोकन सेइं ज़ैना मेरे देइने पासे भोले, ते बुरे लोकन ज़ैना मेरे बांए पासे भोले ।

34 तैखन राज़ो यानी अवं अपने देइने पासेरे लोकन सेइं ज़ोलो, “एज्जा मेरे बाजरे धन लोकव इन राज़, ज़ैन दुनियारे शुरू मां तुश्शे लेइ तियार कियोरूए ।

35 किजोकि अवं नियन्नो थियो, ते तुसेईं मीं रोट्टी खुवाई, अवं ट्लिशोरो थियो, ते तुसेईं मीं पानी पियावं अवं परदेशी थियो, ते तुसेईं अवं अपने घरे मां कुजाव ।

36 अवं नग्गो थियो, ते तुसेईं मीं लिगड़ां दित्तां, ते अवं बिमार थियो, ते तुसेईं मेरी हेरगेश की अवं कैद थियो, ते तुस मीं मिलने आए ।”

\* 25:15 25:15 तोड़ो: अक तोड़ो पहने सालां केरि कुमैयारे बराबर थियो ।

37 तैखन तैना धर्मी मैनन ज़ोलो, “हे प्रभु असेई कैखन तू नियन्नो लाव, ते असेई तीं रोट्टी खुवाई या तू ट्लिशोरो थियो, ते असेई तीं पानी पियांव।”

38 असेई कैखन परदेशी सेमझतां तू अपने घरे मां रख्खो, या तू नग्गो थियो, ते असेई तीं लिगड़ां दित्तां?

39 ते अस कताली तीं बिमार या कैद लेइतां तीं सेइ मिलने आए?

40 तैखन राज़ो यानी अवं जुवाब देलो, “कि अवं तुसन सेइ सज़ ज़ोताई कि ज़ैखन तुसेई इन लोकन सेइ ज़ैनेई मीं पुड़ विश्वास कियो एक्की सेइ भी एरो बताव कियो त एन बुझा कि एन तुसेई मीं सेइ कियूं।”

41 तैखन तै बांए पासे बालन सेइ ज़ोलो, “हे लानती लोकव मेरे तुत्तरे अगरां तैस हमेशारी बैलती अग्गी मांजो गाथ, ज़ै परमेशेरे, शैतान त कने शैतानेरे दूतां केरे लेइ तियार कियोरीए।

42 एन्हैरेलेइ ज़ैखन अवं नियन्नो थियो, ते तुसेई मीं रोट्टी न खुवाई अवं ट्लिशोरो थियो, ते तुसेई मीं पानी न पियांव।

43 अवं परदेशी थियो, ते तुसेई अवं अपने घरे मां न रख्खो, अवं नग्गो थियो, ते तुसेई मीं लिगड़ां न दित्तां, ते अवं बिमार ते कैद थियो, ते तुस मीं सेइ मिलने न आए।”

44 तैखन तैना लोक भी ज़ोलो, “हे प्रभु असेई कताली तू नियन्नो या ते ट्लिशोरो या परदेशी ते नग्गो या बिमार या कैद लाव ते असेई तेरी सेवा न की?”

45 तैखन अवं अपने बांए पासेरे लोकन जुवाब देलो, “अवं तुसन सेइ सज़ ज़ोताई कि ज़ैखन तुसेई मेरे इन निकड़े करां निकड़े लोकन पुड़ ज़ैना मीं पुड़ विश्वास केरतन एक्की सेइ भी एरो ज़ेरो बताव कियो त एन बुझा कि एन मीं सेइ कियूं।

46 एन्हैरेलेइ एन लोकन हमेशेरे लेइ सज़ा भोली, पन धर्मी लोकन हमेशारी ज़िन्दगी मैलेली।”

## 26

?????? ???? ??????

(????? 14:1-2; ???? 22:1-2; ?????? 11:45-53)

1 ज़ैखन यीशुए एन गल्लां की, त तै अपने चलन सेइ ज़ोने लगो।

2 “तुसन पत्तोए कि दई दिहैइना बाद फ़सह तिहारे, ते मैनेरू मट्टू करूसे पुड़ ज़ादनेरे लेइ ट्लुवाव गाए।”

3 तैखन प्रधान याजक ते कौमेरे बुजुर्ग कैफा महायाजकेरे अंगने मां अकोट्टे भोए।

4 ते तैनेई सल्लाह की, कि यीशु थोखे सेइ टलेइतां मेरी छडम।

5 पन तैना ज़ोते थी, कि फ़सह तिहारेरे मौके पुड़ नई, एरू न भोए कि लोक हंगामो केरन।

???????????? ?????????? ??? ????????? ????????? ?????????

(????? 14:3-9; ?????? 12:1-8)

6 तैस मौके यीशु बैतनिय्याह इलव्वें मां शमौन कोदरो घरे मां थियो।

7 ते अक कुआन्श शंखमरमरी भांडे मां इत्र घिन्तां यीशु कां आई, तैखन तै रोट्टी खानेरे लेइ विशोरो थियो, त तैसेरे दोग्गे पुड़ तै इत्र उलटाव।

8 चले एन लेइतां बड़े नाराज़ भोए ते ज़ोने लग्गे, “कि ए किजो बराबर कियो?”

9 अगर ए बेचोरो भोथो, त बड़ी कीमत मैलनी थी, ज़ै गरीबन बेन्टतां दथे।

10 यीशुए एन शुन्तां तैन सेइ ज़ोवं, “तुस एस कुआन्शी किजो तंग केरने लोरेथ? एसां त मीं सेइ रोड़ कियोरूए।

11 गरीब त हमेशा तुसन सेइ साथी भोनेन, पन अवं तुसन सेइ साथी हमेशा नई भोनो।

12 तैसां मेरी जानी पुड़ ज़ै ई इत्र उलटावरोए, तैसां मेरे दबनेरे लेइ कियोरू।

13 अवं तुसन सेइ सज़ ज़ोताई, कि सेरी दुनियाई मां ज़ैड़ी भी खुशखबरी शुनाई गाली, तैड़ी तैसेरी यादगैरी मां एस गल्लेरे बारे मां भी ज़ोवं गालू।”

????? ?????????????? ?????????

(????? 14:10-11; ????? 22:3-6)

14 फिरी 12 चेलन मरां अक ज़सेरू नव यहूदा इस्करियोती थियूं, प्रधान याजकन कां जेव ते ज़ोवं ।

15 “अगर अवं यीशु तुसन दलुवेइं, त तुस मीं कुन देले? तैनेईं तैस दलाही चेंदरे सिके दित्ते ।

16 ते तै तेइसरो तै ठीक मौके बलगने लगो कि यीशु केन्त्रे सेइं दलुवाए ।”

????? ????? ????? ????? ?????????????? ????? ???

(????? 14:12-21; ????? 22:7-13,21-23; ????????? 13:21-30)

17 “अखमीरी रोट्टारे तिहारेरी पेइली दिहाड़ी चेले यीशु कां एइतां पुच्छने लगगे कि, तू फ़सह तिहारेरी रोट्टी कोड़ि खानी चातस, ताके अस गेइतां तियारी केरम?”

18 तैनी ज़ोवं, “नगर मां अक फ़लानो मैनुए, ते तुस तैस कां गाथ ते तैस ज़ोथ, कि गुरू ज़ोने लगगोरोए, मेरो वक्त नेडे पुज़ोरोए ते अवं अपने चेलन सेइं साथी फ़सह तेरे घरे मां मनेइलो ।”

19 बस्सा ज़ेरो यीशुए अपने चेलन हुकम दित्तोरो थियो, तैनेईं तेन्त्रे फ़सह तिहारेरी रोट्टी तियार की ।

20 ज़ैखन इलोइ भोइ त यीशु 12 चेलन सेइं साथी रोट्टी खाने बिशो ।

21 ते रोट्टी खांते बार यीशुए तैन सेइं ज़ोवं, “अवं तुसन सेइं सत्र ज़ोताई कि तुसन मरां अक मीं दलुवालो ।”

22 “एन शुन्तां तैना सारे चेले उदास भोए, तैना बैरी-बैरी सेइं तैस पुच्छने लगगे, हे प्रभु कुन अर्वें त नईं?”

23 तैनी जुवाब दित्तो, “ज़ैनी मीं सेइं साथी थैली मां हथ छुडोरोए, तैए मीं दलुवालो ।

24 मैनेरे मट्टेरे लेइ त ज़ेरू तैसेरे बारे मां लिखोरूए तैस सेइं तेरहु कियूं गाते, पन अफ़सोस तैस मैनु पुइ ज़ेसेरी वजाई सेइं तैन दलुवाव जेव, तैसेरेलेइ एन्ने रोडू थियूं कि तै ज़मोरो न भोथो ।

25 तैखन दलुवानेवालो यहूदा ज़ोने लगो, हे गुरू अर्वें त नईं? तैनी तैस सेइं ज़ोवं, तीं एप्पू ज़ोवं ।”

????? ???

(????? 14:22-26; ????? 22:14-20; 1 ?????????????? 11:23-25)

26 खांते बार यीशुए रोट्टी दलाती, ते बरकत मेगतां दलोड़ी, ते चेलन कां देइतां ज़ोवं यांथ खाथ ई मेरी जाने ।

27 फिरी यीशुए दाछरे रसेरो कटोरो दलातो, ते परमेशेरू शुक्र केरतां चेलन कां दित्तो ते ज़ोवं, “यांथ तुस सब इस मरां पीया ।

28 किजोकि ई मेरे नव्वे करारे मां मेरो तै खूने ज़ै बड़ां केरे पापां केरि मैफारे लेइ दित्तो गाते ।

29 अवं तुसन सेइं ज़ोताई, कि अवं दाछारो ई रस फिरी कधे न पियेलो ज़ां तगर परमेशेरे राज्जे मां तुसन सेइं साथी नव्वो न पीं ।”

30 तैल्ला पत्ती, यीशु त कने तैसेरे चेले परमेशेरू भजन ज़ोइतां, यरूशलेम नगरेरे बेइर ज़ैतून नव्वेरे पहैड़ी पुइ ज़ली जे ।

????????? ?????????????? ???????????????

(????? 14:27-31; ????? 22:31-34; ????????? 13:36-38)

31 तैखन यीशुए तैन सेइं ज़ोवं, “तुस अजे राती मेरी वजाई सेइं ठोकर खाले, किजोकि लिखोरूए, ‘अवं पुहाले मारेलो ते धनेरी भैइडां तितर-बितर भोली ।’

32 पन अवं ज़ींतो भोइतां तुसन करां पेइले गलील इलाके मां गेइलो ।”

33 पतरसे तैस सेइं ज़ोवं, “अगर सारे तेरी वजाई सेइं ठोकर खान त खान, पन अवं तेरे बारे मां कधी ठोकर न खेइलो ।”

34 यीशुए तैस सेइं ज़ोवं, “अवं तुसन सेइं सन्न ज़ोताई कि अज़ राती कुकड़ बांग देने करां पेइले तू मेरो टलाई बार इन्कार केरेलो।”

35 पन पतरसे ज़ोवं, “अगर तीं साथी मीं मरनू भी पे, त तांभी अवं तेरो इन्कार न केरेलो ते सैरी चलेई भी एन्ने ज़ोवं।”

**XXXXXXXXXX**

**(XXXXXX 14:32-42; XXXXXX 22:39-46)**

36 तैखन यीशु अपने चेलन सेइं साथी एककी ठैरी पुजो, ज़ैस ठारारू नवं गतसमनी थियूं, ते तै अपने चेलन सेइं ज़ोने लगो, तुस इड़ी बिश्शा, ते तांतगर अवं उड़ी अगर गेइतां प्रार्थना केरताई।

37 तैनी पतरस ते जेब्दरां दुइये मट्टां साथी नियां, ते तैड़ी तै बड़े परेशान भोने त कने घबराणे लगे।

38 फिरी यीशु तैन सेइं, इस दुखेरे वजाई सेइं मेरे प्राण निसने लोरेन इड़ी बिश्शोरे राथ ते बींझे राथ।

39 फिरी थोड़ो जेरे अगर गेइतां तल्ले मां मथ्यो टेकतां खिरको ते प्रार्थना की, “हे बाजी अगर भोइसखे त ईं कटोरो मीं करां टेली गाए, फिरी भी ज़ैन अवं चाताई तैन नई बल्के ज़ैन तू चातस तैन्ने भोए।”

40 फिरी तै चेलन कां वापस अव ते तैना झुलोरे लाए, ते तैने पतरसे सेइं ज़ोवं, “कुन तुस अक घड़ी भी मीं सेइं साथी बींझे न बिश्शी सके?”

41 बींझे बिश्शा ते प्रार्थना केरते राथ ताके तुस अज़मैइशी मां न राथ, आत्मा त तियारे पन जान कमजोरे।

42 यीशुए फिरी जेव, ते ईं प्रार्थना की, “हे मेरे बाजी ईं दुखेरो कटोरो मेरे पीने बगैर टेली न सखे, त तेरी मर्ज़ी पूरी भोए।”

43 तैखन तै चेलन कां एइतां तैना फिरी झुलोरे लाए, किजोकि तैन केरि एछ्छी ओंइले सेइं गिरकी भोरी थी।

44 तै तैन तैड़ी छेइतां चलो जेव, ते फिरी तैए प्रार्थना केरने लगे ज़ै पेइली कियोरी थी।

45 तैसेरां बाद तै चेलन कां वापस अव, ते तैन सेइं ज़ोने लगे, “हुनी झुलोरे राथ ते आराम केरा, हेरा तै मौको नेडे पुजोरोए, ते मैनेरू मट्टू पापी लोकां केरे हवाले कियूं गाते।

46 उटा, च़लम। हेरा! मीं टलुवानेबालो नेडे पुज्जी जोरोए!”

**XXXXXXXXXX**

**(XXXXXX 14:43-50; XXXXXX 22:47-53; XXXXXXXX 18:3-12)**

47 तै एना गल्लां ज़ोने लोरो थियो, त यहूदा ज़ै 12 चेलन मरां थियो तैड़ी पुजो, तैस सेइं साथी बड़े मैन्हु थिये ज़ैना तलवारां ते लट्टां घिन्तां ओरे थिये तैना प्रधान याजकन ते कौमेरे बुजुर्ग लोकेई भेजोरे थिये।

48 तैसेरे टलुवाने बाले तैन ईं निशान दित्तोरो थियो, कि ज़ैस अवं फुम्मड़ी देइलो त तैए, ते तुस तैस टलेइयथ।

49 ते तैखन यहूदा, यीशु कां एइतां ज़ोवं, हे गुरू नमस्कार, ते एइतां तैस फुम्मड़ी दित्ती।

50 यीशुए तैस सेइं ज़ोवं, हे मेरे दोस्ता ज़ैस कम्मेरे लेइ तू ओरोस तैन कम केर, तैखन लोकेई एगरोइतां यीशु पुड़ हथ रखे ते टलाव।

51 यीशुएरे सैथन मरां एकके अपनि तलवार कढी, ते महायाजकेरे नौकरे पुड़ बाई ते तैसेरो कन्न कटो।

52 तैखन यीशुए तैस जो ज़ोवं, तलवारी मियांने मां रख किजोकि ज़ैना तलवार च़लातन तैना तलवारी सेइं मारे गाले।

53 “कुन तू न ज़ानस अवं अपने बाजी करां मिनत केरि सकताई तै हुन्ना स्वर्गद्तां केरि 12 फौवजां बल्के तैस करां भी जादे भेजते।

54 पन फिरी तैना पवित्रशास्त्रेरी गल्लां केन्चरे पूरी भोनिन ज़ैन केरू पूरू भोनू ज़रूरीए?”

55 तैखन यीशुए तैन हछे लोकन सेइ ज़ोवं, “अवं कुन कोई डैकू आई ते तुस मींजो डांग सोटे ते तलवारां टलेइतां मीं टलाने ओरेथ? अवं त रोज़ मन्दरे मां बिशतां शिक्षा देतो थियो ते तैखन तुसेई अवं नई टलातोरो?”

56 पन एन सब किछ् एल्हेरेलेइ भोवं, कि पवित्तर बचने मां नेबी केरि लिखोरी गल्लां पूरी भोन, तैखन सारे चले तैस तैड़ी छेइतां चले जे।”

[\[२२२२२२\] \[२२२\] \[२२२२\]](#)

[\[२२२२२\] 14:53-65; \[२२२२\] 22:54-55,63-71; \[२२२२२२\] 18:13-14,19-24](#)

57 ते यीशु टलानेवाले तैस महायाजक कैफा कां घिन्तां जे, ज़ैड़ी तैना शास्त्री ते बुजुर्ग अकोट्टे भोरे थिये।

58 ते पतरस भी दूरेरां देंतो पत्पती तैस महायाजके अंगनेरे तगर जेव, ते तैड़ी पेरहेदारन सेइ साथी बिशतां यीशुएरो अन्त लोरो थियो हेरने कि कुन केरतन।

59 प्रधान याजक ते कने सारी महासभा यीशुएरे खलाफ गवाही तोपनेरी कोशिश केरि राओरे थिये, कि ज़ैस सेइ यीशु कल्ल कियो गाए।

60 पन कोई गवाह न मैल्लो, हालांकी बडे झूठे गवाह भी पैश भोए, आखकार दूई गवाह पैश भोए।

61 ते ज़ोने लगगे, एनी ज़ोरू कि “अवं परमेशेरू घर डोलतां टलेइ दिहाइन मां फिरि खडू केरि सकताई।”

62 तैखन महायाजक खडो भोइतां यीशु पुच्छने लगगे, “कुन तू कोई जुवाब न देस, इना लोक तेरे खलाफ कुन गवाही देतन?”

63 पन यीशु चुप राव, “तैखन महायाजक फिरि पुच्छने लगगे, तीं ज़ीते परमेशेरी कसम भोए कि असन ज़ो, कि तू परमेशेरू मट्टू मसीह आस?”

64 यीशुए जुवाब दित्तो, तीं एप्पू ज़ोई छडू ते हुनी अवं भी ज़ोताई कि अज्जेरे बाद तुस मैनेरे मट्टे परमेशेरे देइने पासे बिशारे लाएले, ते अम्बरे पुड बिदलारी मां एइते लाएले।”

65 तैखन महायाजके अपना लिगाड़ां छिंदा, ते ज़ोने लगगे, एनी परमेशेरी तुहीन कियोरीए हुनी असन केन्वी गवाहेरी ज़रूरत नई, तुसेई हुन्ना एसेरू झूठ शुनेरूए।

66 तुशशी कुन राईए? तैनेई जुवाब दित्तो ए कतलेरे काबल आए?

67 तैखन तैनेई तैसेरे तुत्तरे पुड थुकू ते तैस घुसेइं ते होरेई थप्पड मैरतां ज़ोवं।

68 “हे मसीह अगर तू नबी आस त भविष्यवाणी केर ते ज़ो, तीं केनि बाहोरिए?”

[\[२२२२२२\] \[२२२२२\] \[२२२२\]](#)

[\[२२२२२\] 14:66-72; \[२२२२\] 22:56-62; \[२२२२२२\] 18:15-18,25-27](#)

69 पतरस बेइर अंगने मां बिशोरो थियो, ते अक नौकरानी तैस कां आई ते ज़ोने लगगी कि तू भी यीशु गलीली सेइ साथी थियो।

70 तैनी सेब्मी केरे सामने इन्कार कियो ते ज़ोवं, “मीं नई पतो तू कुन लोरिस ज़ोने?”

71 तैखन पतरस बेइर फाटकेरे पासे जेव, त अक होरि नौकरानी तैस लेइतां तैन सेइं ज़ैन तैड़ी थी ज़ोने लाई, ई मैन्हु भी नासरतेरे यीशु सेइं साथी थियो।”

72 पन तैनी सेब्मी केरे सामने कसम केरतां इन्कार कियो, ते ज़ोवं, अवं एस मैन्हु सैइयां न ज़ैनी।

73 थोडे चिरेरां पत्ती तैना लोक ज़ैना तैड़ी खडखडे थिये, पतरसे कां आए ते ज़ोने लगगे, सच्चे तू भी तैन्ने मरां अक आस, किजोकि तेरी बोली सेइं बुझोते कि तू तैसेरो साथिस।

74 तैखन ते तैस जो गैई देइतां ज़ोने लगगे, ते कसम केरतां ज़ोने लगगे, “अवं एस मैन्हु सैइयां न ज़ैनी।” तैखन कुकडे बांग दित्ती।

75 पतरसे तैखन यीशुएरी ते गल याद आई, ज़ै तैनी ज़ोरी थी कि कुकड़ेरे बांग देने करां पेइले तू टलेइ बार मेरो इन्कार केरलो, ते पतरस बेइर गेइतां हुस्बुकैइं-हुस्बुकैइं लेरां देने लगगे।

## 27

॥॥॥॥॥॥॥॥॥ ॥॥॥॥ ॥॥॥॥

(॥॥॥॥॥ 15:1; ॥॥॥॥ 23:1-2; ॥॥॥॥॥॥ 18:28-32)

- 1 झेझ भोते सारे लोक ते प्रधान याजक, ते कोमरे बुजुर्गई मुशोरो कियो कि यीशुएरे कल्ल केरनेरो फैसलो कियो।  
2 ते यीशु बंधतां नीयो, ते रोमी गवर्नर पिलातुसे कां नीयो।

॥॥॥॥॥ ॥॥॥॥॥॥ ॥॥॥॥॥

(॥॥॥॥॥॥ 1:18-19)

- 3 जैखन यहूदा जैनी यीशु टलुवेवरो धियो तैस एसास भोव, कि यीशु मुर्जम बनोरोए त तैनी बड् पशतावं, ते तैना चेंदरे टलही सिक्के प्रधान याजक ते बुजुर्गन कां वापस आने।  
4 ते ज़ोने लगो, “मीं पाप कियो, कि अक बेकसूर मैन्हु, मारने लेइ टलुवाव,” ते तैना ज़ोने लगो, “असन कुने? तू ज्ञान ते तेरू कम ज्ञाने।”  
5 तैखन यहूदा तैना सिक्के मन्दरेरे अंगने मां शैरतां छडे, ते तैट्ठां गोइतां अपने आपे फांसी दित्ती।  
6 प्रधान याजकेई तैना सिक्के सल्ले, ते ज़ोने लगो, “इन सिक्के इश्शे कानूनेरे मुताबिक मन्दरेरे खजाने मां रखने जेइज नई, किजोकि ए कोन्वी मैन्हु मारनेरी कीमते।”  
7 एल्हेरेलेइ तैनेई मुशोरो केरतां तैस रकमी सेइं कुम्हारे करां अक ऊडार घिन्नु, ताके परदेशी केरे लेइ कबरास्तान बनावं गाए।  
8 तांए त अज्र तगर भी तैस ऊडारे जो खुनेरू ऊडार ज़ोतन।  
9 तैखन तै गल पूरी भोइ ज़ै यिमयाह नेवे ज़ोरी थी, कि तैनेई तैसेरी पूरी कीमत चेंदरे टलही सिक्के निये, ए कीमत इस्राएलेरे लोकेई कियोरी थी।  
10 ते तैन चेंदरे टलही सिक्केइं सेइं कुम्हारेरू ऊडार घिन्ने जो दिते ज़ेन्चरे प्रभुए मीं हुकम दित्तोरो धियो।

॥॥॥॥॥॥ ॥॥॥॥ ॥॥॥॥ ॥॥॥॥॥॥॥॥॥

(॥॥॥॥॥ 15:2-5; ॥॥॥॥ 23:3-5; ॥॥॥॥॥॥ 18:33-38)

- 11 जैखन यीशु हाकिमेरे तुत्तरे अगर खडो धियो, ते हाकिम तैस पुच्छ, “तू यहूदी केरो राज़ोस?” यीशुए जुवाब दित्तो, “तू एप्पू ज़ोने लोरोस।”  
12 ते ज़ैखन प्रधान याजक ते बुजुर्ग तैस पुइ इलज़ाम लाने लोरे धिये त यीशुए कोई जुवाब न दित्तो।  
13 तैखन पिलातुसे यीशु सेइं ज़ोवं, “हेर एना तेरे खलाफ केत्री गवाहई लोरेन देने तू शुन्तस की नई।”  
14 पन यीशुए तैस एक्की गल्लारो भी जुवाब न दित्तो; ते इडी तगर कि हाकिम बडो हैरान भोइ जेव।

॥॥॥॥॥ ॥॥॥॥॥ ॥॥॥॥॥

(॥॥॥॥॥ 15:6-15; ॥॥॥॥ 23:13-25; ॥॥॥॥॥॥ 18:39; 19:16)

- 15 ते हाकिमेरो अक दस्तूर धियो, कि फ़सह तिहाररे मौके पुइ अक कैदी ज़ैस लोक चाते धिये तैस हथरां छडतो धियो।  
16 तैस मौके तैन केरो अक बडो मुशूर कैदी धियो, जेसेरू नवं वरअब्बा धियूं।  
17 ज़ैखन तैना लोक पिलातुसे कां जम्हां भोए, त पिलातुसे तैन पुच्छ, “तुस कुन चातथ, अवं केस हथरां छेड्डी? वरअब्बा कि यीशु ज़ैस जो मसीह ज़ोतन?”  
18 किजोकि ते ज्ञानतो धियो, कि तैनेई सिर्फ जलनी सेइं ते टलुवोरोए।

19 ज़ैखन तै आदालतरी तखते पुड़ विशरो धियो, त तैसेरी कुआन्शां तैस जो समाद भेजरो धियो, “कि तू एस रोड़े मैनेरे बारे मां किछ न करां, किजोकि मीं अज राती एसेरी वजाई सेइं सुपने मां बड़ो दुःख भोरोए।”

20 पन प्रधान याजकेईं ते बुजुर्ग लोकेईं लोक बमकाए, कि तैना पिलातुसे करां बरअब्बा हथरां छुडन ते यीशु मारन।

21 ज़ैखन हाकिमे तैन लोकन पुच्छू, “कि तुस एन दुईन मरां केस चातथ, अवं तैस हथरां छेइडी,” तैन लोकेईं ज़ोवं, “बरअब्बा।”

22 पिलातुसे तैन पुच्छू, “फिरी अवं यीशु ज़ैस जो मसीह ज़ोतन तैस सेइं कुन केरि?” सब लोक ज़ोने लगगे “एस क़रुसे पुड़ चाढ़।”

23 हाकिमे ज़ोवं किजो? “एनी कुन बुराई कियोरीए? पन तैना मना ज़ोरे-ज़ोरे ज़ोने लगगे कि एस क़रुसे पुड़ चाढ़।”

24 ज़ैखन पिलातुसे हेरू कि किछ भी बन्ने बालू नई बल्के उलटो फसाद भोने बालोए, त तैनी पानी मेगतां तैन मैन्हु केरे सामने हथ धोए ते ज़ोवं, “कि अवं एस एक्की धेर्मी मैनेरे खूने करां बरी भोइताई, तुसे ज़ांना।”

25 ते सारे लोकेईं जुवाब दित्तो, “एसेरो खून असन पुड़ ते इश्शी औलादी पुड़ भोए।”

26 तैखन पिलातुसे बरअब्बा हथरां छुइडो, ते यीशुए कोड़े बावैहीतां तैन केरे हवाले कियो, ताके तैना तैस क़रुसे पुड़ चाढ़न।

*XXXXXXXXXXXXXXXXXXXXXXXXXXXXXXXXXXXX*

*(XXXXXXXX 15:16-20; XXXXXXXX 19:2,3)*

27 ते तैखन हाकिमेरे सिपैहीयेइं यीशु महलेरे अंगने मां नेइतां सारे फौजरे सिपाही यीशुएरे चुफरतां जम्हां भोए।

28 तैनेईं तैसेरां लिगडां खोल्लां ते तैस अक लाल रंगेरो चोगो लुवाव।

29 फिरी कंटां केरू ताज तैसेरे दोगगे पुड़ रखवू, ते तैसेरे देइने हथ्ये मां अक निरैठरी लैट दित्ती, ते तैस कां मथ्यो टेकतां तैसेरी हासी बनाने लगगे, ते ज़ोने लगगे, “हे यहूदी केरे राजा नमस्कार।”

30 तैना तैस पुड़ थुकते ते सोटी सेइं तैसेरे दोगगे पुड़ बाते धिये।

31 ज़ैखन तैनेईं तैसेरो मज़ाक बनाव, त तैसेरो चोगो खोल्लो, ते फिरी तैस तैसेरां लिगडां लुवां ते तैट्ठां चले, ताके तैस क़रुसे पुड़ चाढ़न।

*XXXXXXXXXXXXXXXXXXXXXXXXXXXXXXXXXXXX*

*(XXXXXXXX 15:21-32; XXXX 23:26-43; XXXXXXXX 19:17-27)*

32 ज़ैखन तैना तैट्ठां चलोरे धिये, त तैन शमौन कुरेनी नंब्वेरो अक मैन्हु मैल्लो, तैन लोकेईं ते दलातो ताके यीशुएरू क़रुस छुइतां चलाए।

33 ते यीशु गुलगुता नंब्वेरी ठेरी पुजे, ज़ेसेरो मतलबे खोपड़ारी ठार।

34 तैइी तेनेईं यीशु दाछ़ारो रस ते टलिठो रस मिलेइतां पीने जेईं दित्तो, पन तैनी पीनी न चाव।

35 ज़ैखन तैनेईं यीशु क़रुसे पुड़ चाढ़ो त शर्त रेखता चिट्ठी छेइतां तैसेरां लिगडां भी एप्पू मामेइं बंटा।

36 ते तैइी बिश्तां तैसेरो पैरहो करेने लगगे।

37 ते तैनेईं तैसेरो जुर्म एक्की पेखड़ी पुड़ लिखतां तैसेरे दोगगे करां बा लाईं ज़ैस पुड़ एन लिखोरू धियूं, “ई यहूदी केरो राजा यीशु आए।”

38 तैखन तैस सेइं साथी इईं डैकू भी क़रुसे पुड़ चाढ़े, अक यीशुएरे देइने पासे, ते होरो बांए पासे।

39 तैट्ठां गानेबाले सारे लोक दोग हिलेइतां गाते धिये ते तैसेरी तुहीन केरते धिये।

40 ते ज़ोते थी इस मन्देरे डोलने बाला ते टलेइ दिहइन मां बनाने बाला, अपनी आप त बच्चा, “अगर तू परमेशेरू मट्टू आस त एस क़रुसे पुड़रां उन्डो ओस।”

- 41 एन्चरे प्रधान याजक ते शास्तरी ते बुजुर्ग भी तैसेरी हासी बनाते थिये, ते ज़ोते थिये।
- 42 “एनी होरे बच्चाए पन अपनो आप न बच्चेइ बटो, ई त इसराएलेरो राज़ो आए।” अगर हुन्ना भी तू क़रूसे पुडरां उन्डो ओस्स, त अस तीं पुड विश्वास केरतम।
- 43 एसेरो भरोसो परमेशरे पुडे, अगर तै एस चाते त एस बच्चाए, किजोकि एनी ज़ोरू थियू, ‘अवं परमेशरेरू मट्टू आई।’ ”
- 44 ते दूई डैकू भी ज़ैना तैस सेइं साथी क़रूसे पुड च़ादोरे थिये, तैना भी तैसेरी तुहीन केरते थिये।

**उत्तरांचल प्रोटेस्टेंट चर्च ब्यूरो**

(**मत्ती** 15:33-41; **मत्ती** 23:44-49; **मत्ती** 19:28-30)

- 45 दीसेरे 12 बज़ेई सारे मुल्वे मां आंधरू भोवं ते टलेइ बज़न तगर रावं।
- 46 ते टलेइ बाज़ां केरे लगभग यीशुए बडे ज़ोरे सेइं ज़ोवं, “एली, एली लमा शबकतनी?” ज़ेसेरो मतलबे, “हे मेरे परमेशर, हे मेरे परमेशर, तीं अवं किजो शारो?”
- 47 ज़ैना लोक तैड़ी खडखडे थिये, तैन मरां किछ शुन्तां एन ज़ोने लगगे, कि ए त एलिय्याह फुकारने लोरोए।
- 48 तैखन अक मैन्हु देवडतां जेव, ते अक गलास पैनी मां डोबतां ते निरेठरे सोटी पुड टकेइतां पीनेरे लेइ तैसेरे ऐशी सेइं हुरावं।
- 49 किछ ज़ोने लगगे, “बलगा हुनी हेरतम, कि एलिय्याह एस बच्चाने एइते कि नई।”
- 50 ते यीशुए फिरी ज़ोरे सेइं चिन्ड मारी ते प्राण दित्ते।
- 51 तैखन मन्दरेरो पडदो बां देता बुन तगर फेटतां दूई टुकडे भोइ जे, ते पहाड़ां ते सारी ज़मीन हीलने लगगी।
- 52 कब्रां खुल्ली जेई, ते बडे पवित्तर लोक ज़ैना मौतरी निडला मां झुलोरे थिये, ज़ीते भोइ जे।
- 53 ते कबरन मरां निस्तां ज़ीते भोनेरां पत्ती पवित्तर नगर मां दाखल भोए, ते तैड़ी बडे होरि लोकेई भी लाए।
- 54 तैखन तैनी सूबेदारे ते तैसेरे सैथेई ज़ैन यीशुएरी निगरानी केरने लोरे थिये, भुञ्जल गांतो हेरो, त तैना डेरि जे, ते ज़ोने लगगे, “सच्चेरे एन परमेशरेरू मट्टू थियू!”
- 55 तैड़ी बेडि कुआन्शां ज़ैना गलील इलाके मरां यीशु सेइं साथी तैसेरी सेवा केरती तैस पत्ती ओरी थी, ते दूरेरां तकने लोरी थी।
- 56 तैन मां मरियम मगदलीनी ते याकूब त योसेसेरी अम्मा मरियम ते जब्देरे मट्टां केरि अम्मा साथी थी।

**उत्तरांचल प्रोटेस्टेंट चर्च ब्यूरो**

(**मत्ती** 15:42-47; **मत्ती** 23:50-56; **मत्ती** 19:38-42)

- 57 ज़ैखन इलोझ भोइ त अरिमतियाहरो अक अमीर यूसुफ नंब्वेरो मैन्हु ज़ै एप्पू भी यीशुएरो चेलो थियो अव।
- 58 तैनी पिलातुसे कां गोइतां यीशुएरी लाश मगी, ते पिलातुसे लाश देनेरो हुकम दित्तो।
- 59 यूसुफे लाश नेइतां एककी रोडि ज़ेरि च़ादरी मां पलैटी।
- 60 ते तै लाश एककी नर्वीं कबरी मां ज़ै शफ़डी मां घडोरी थी रखवी, ते तैस कबरी आग्रोरां अक बड्डो घोड तैस उबरो छड्डो।
- 61 ते मगदलीन इलब्बेरी मरियम ते होरि मरियम तैड़ी तैस कबरारे सामने विशोरी थी ज़ैस मां यीशुएरी लाश रखोरि थी।

**उत्तरांचल प्रोटेस्टेंट चर्च ब्यूरो**

- 62 होरसां तियैरारे दिहाड़े बाद यहूदी केरे आरामेरे दिहाड़े प्रधान याजक ते फरीसी लोक मिलतां पिलातुसे कां पुजे।



63 ते ज्ञाने लगगे महाराज्ज असन यादे कि तैनी धोखे बाज्जे अपने ज्जीते सांसेइ ज़ोरू थियूं, “अवं मरनेरे टलेइ दिहाइं बाद फिरी ज्जीतो भोनोई।

64 एल्हेरेलेइ हुक्म दे ताके टलाई दिहाइन तगर कबरी पुड़ पेरहो दित्तो गाए, कि एरू न भोए कि तैसेरे चले एइतां तैसेरी लाश चोरन, ते लोकन सेइं ज़ोन कि ते मुडदन मरां ज्जीतो भोरोए, ए धोखो पेइले धोखे करां भी जादे बुरो भोलो।”

65 पिलातुसे जुवाब दित्तो, “तुसन कां पेरहो देनेवाले आन, गाथ ज़ेतूरू भोइसखे पेरहो देथ।”

66 तैखन तैनेई गेइतां घोडे पुड़ मोहर लाई, ते कबररारे पेरहे लेइ पेरहेदार रख्वे।

## 28

XXXXXXXXXXXXXXXXXXXX

(XXXXXXXX 16:1-10; XXXX 24:1-12; XXXXXXXX 20:1-10)

1 आरामेरे दिहाइरे बाद हफतेरे पेइले दिहाइ टलेकडॉते-टलेकडॉते मगदलीन इलव्वेरी मरियम ते होरि मरियम ज़ैडी यीशुएरी लाश कबरी मां रख्वोरी थी, हेरने एई।

2 ते हेरा अक बडो भुंजल अव, किजोकि परमेशेरो अक स्वर्गदूत स्वर्गेरां ओरो थियो, ते तैस कबरी अगरां घोइ उन्ढो बिछोइतां तैस पुड़ बिश्वी जेव।

3 तैसेरी शकल सूरत दिहाइरी ज़ेरि रोडी थी, ते तैसेरां लिगइा हीवेरां ज़ेरां छित्तां सुफैद थियां।

4 पेरहेदार डेरतां थर-थर कम्बने लगगे ते ज़ेरे मुडदे भोए।

5 स्वर्गदूते कुआन्शन सेइं ज़ोवं, “डरा नन्ना, अवं ज्ञानताई कि तुस यीशुए तोपने लोरिथ, ज़ै कूरूसे पुड़ चाढोरोए।

6 ते इडी नई बल्के ज़ेन्नेरे तैनी ज़ोरू थियूं, ते ज्जीतो भोरोए, एज्जा ते ठार हेरा, ज़ैडी प्रभु थियो।

7 ते जल्दी गेइतां तैसेरे चेलन पतो देथ, कि ते मुडदन मरां ज्जीतो भोरोए, ते तुसन करां पेइलो गलीले मां गाते, ते तुसेईं ते लहनोए हेरा मीं तुसन एन ज़ोरूए।”

8 तैखन तैना कुआन्शां डेरतां भी ते खुशी सेइं भी कबरी मरां बेइर एई, ते दौवइती-दौवइती जेई ताके चेलन पतो देन।

9 तैखन यीशु तैन मैल्लो, ते तैनी ज़ोवं तुसन शान्ति मैल्ले, ते तैनेई तैसेरे पाव बंते, ते तैस कां मथ्यो टेको।

10 तैखन यीशुए तैन ज़ोवं, डरा न ते गाथ ते मेरे चेलन सेइं ज़ोथ कि गलीले मांजो गान, तैना मीं तैडी लाएले।

XXXXXXXXXXXXXXXXXXXX

11 हेजू तैना कुआन्शां बत्तां थी कि ज़ैना चेलन खबर देने ज़लोरी थी, त पेरहेदारन मरां किछ नगर मां जे ते प्रधान याजकन सेइं सारो बिस्तार शुनाव।

12 ज़ैखन महायाजकेई बुजुर्गन सेइं मिलतां मुशोरो कियो, ते तैनेई ई फैसलो कियो कि सिपेहिन बडे पेइंसे देन, कि तैना ई गल केन्वी सेइं न ज़ोन, कि कवर केन्नेरे खाली भोइ।

13 तैनेई पेहेरेदारन एन ज़ोवं, कि तुस एन ज़ोइयथ, कि ज़ैखन अस राती झुल्लोरे थिये त तैसेरे चले आए ते तैनेई तैसेरी लाश नी।

14 अगर ए गल गुवनरि तगर पुजेली त अस तैस एप्पू समझामेले त तुसन कोई परेशानी न भोली।

15 ते सिपेहेईं पेइंसे नीए ते ज़ेन्नेरे तैनेई ज़ोरू थियूं तेन्नेरे कमाव, ते अज तगर ए गल यहूदन मां मुशूरे।

XXXXXXXXXXXXXXXXXXXX

(XXXXXXXX 16:14-18; XXXX 24:36-49; XXXXXXXX 20:19-23; XXXXXXXX 1:6-8)

16 11 चले गलीले मां जे, ते तैस पहाइ पुड़ अकोट्टे भोए ज़ैडी गानेरे बारे मां यीशुए तैन ज़ोवरू थियूं।

17 ज़ैखन तैनेई यीशु लाव त तैस कां मथ्यो टेको, ते किछ्छन हेजू भी शक थी, कि तै ज़ींतो वापस ओरोए।

18 तैखन यीशु तैन केरे नेडे एडतां ज़ोवं, “धेरतरो ते स्वर्गेरो सारो अधिकार मीं दित्तोरोए।

19 एल्हेरेलेइ तुस गाथ ते सैरी कौमां केरे लोकन चले बनाथ, ते तैन बाजी, ते मट्टेरे, ते पवित्र आत्मारं नंव्वे सेइं बपतिस्मो देथ।

20 ते तैन तैना सब हुक्म मन्ने शिखाला ज़ैना मीं तुसन दित्तोरेन, ते हेरा, अवं दुनियारे आखरी तगर हमेशा तुसन सेइं साथी आईं।”

## मरकुस

॥॥॥॥॥॥ ॥॥॥॥॥॥॥॥ ॥॥॥॥॥॥ ॥॥॥॥॥॥॥ ॥॥ ॥॥॥॥॥ ॥॥॥॥ ॥॥॥ ॥॥॥ ॥॥॥॥॥ ॥॥॥॥॥॥  
(॥॥॥॥॥ 3:1-12; ॥॥॥॥॥ 3:1-18; ॥॥॥॥॥॥॥ 1:19-28)

- 1 ई यीशु मसीहरे बारे मां खुशखबरायी शुरुआत आए, जैन परमेशेरू मट्टू आए ।
- 2 (बड़े पेइले) यशायाह नेबे अपनि किताबी मां लिखोरू थियूं कि, (परमेशेरु अपने मट्टे सेई ज़ोव,) “शुन, अवं अपनो बिस्तार देनेबालो तीं केरां पेइले भेजेलो ।”  
“तै तीं केरां पेइलो गेइतां तेरे लेइ बत तियार केरेलो । (यानी, लोकां केरे दिल परमेशेरु लेइ तियार केरेलो)”
- 3 “तै बिस्तार देनेबालो सुनसान ठैरी मां लोकन, जैना तैस कां गाले, तैन हक देइतां ज़ोलो कि ‘तुसन कां पूरभु एजनेबालो आए, एल्हेरेलेइ तुस तैसेरेलेइ बत तियार केरा त कने तैसेरेलेइ सडकां सिद्धी केरा ।’ (यानी, पूरभुएरे लेइ तुस अपने दिल साफ केरा)”
- 4 जेन्त्रां लिखोरू थियूं, अक बिस्तार देनेबालो अब । तैस मैनेरू नवं यूहन्ना थियूं । लोक तैस जो बपतिस्मो\* देनेबालो भी ज़ोते थिये । तै यहूदिया इलाकेरे सुनसान ठैरी मां अब । तैड़ी तै लोकन परमेशेरु गल्लां शुनातो थियो कि, “तुस अपने पापन करां मनफिराथ, त कने बपतिस्मो नेथ, ताके परमेशेरु तुशुशे पाप माफ़ केरे ।”
- 5 यहूदिया इलाकेरे बड़े लोक त यरूशलेम नगरेरे रानेबालन मरां बड़े लोक यूहन्नारी गल्लां शुन्नेरे लेइ सुनसान ठैरी मां तैस कां आए । तैन लोकेई अपने पाप मेन्तां यूहन्ना करां यरदन दरियाए मां बपतिस्मो नीयो ।
- 6 यूहन्ना आम लिगड़ां लातो थियो जैना लिगड़ां ऊँटेरे बालन सेइं बनोरां थियां । तै अपनि कमरी पुड़ चमड़ेरू मज्र बंधतो थियो । ते तै टिटटां त कने जंगलेरू माछ्ठी खातो थियो ।
- 7 तै लोकन शुनातो थियो कि, “कोई अक, जै मीं केरां भी महान आए, मेरे बाद एजनेबालोए । अवं त तैसेरो गुलाम भोनेरे काबल भी नई कि लिकतां तैसेरे वूटेरे तसमे खोल्ली ।
- 8 अवं त तुसन पैनी सेइं बपतिस्मो देताई, पन तै तुसन पवित्र आत्मा सेइं बपतिस्मो देलो।”

॥॥॥॥॥॥ ॥॥॥॥ ॥॥॥॥॥॥॥ ॥॥॥॥॥॥  
(॥॥॥॥॥ 3:13; 4:11; ॥॥॥॥॥ 3:21-22; 4:1-13)

- 9 तैल्ला पत्ती, तैन दिहाइन मां एरू भोवं कि यीशु गलील इलाकेरे नासरत नगरेरां यूहन्ना कां अब । तैनी यूहन्ना करां यरदन दरियाए मां बपतिस्मो नीयो ।
- 10 ज़ैखन यीशु बपतिस्मो नेइतां पैनी मरां बेइर अब, त तैनी अम्बर खुलतू त पवित्र आत्मा कबूतरेरी शकली मां तैस पुड़ एत्तो लाव ।
- 11 तैखन परमेशेरु स्वर्गोरां यीशु सेइं ज़ोव, “तू मेरू ट्लारू मट्टू आस, अवं तीं पुड़ बडो खुश आई ।”

॥॥॥॥ ॥॥॥ ॥॥॥॥॥॥॥ ॥॥॥ ॥॥॥॥॥ ॥॥॥॥॥॥॥

- 12 तैल्ला पत्ती, अकदम पवित्र आत्मा यीशु सुनसान ठैरी जो भेजो ।
- 13 सुनसान ठैरी मां 40 दिहाइन तगर शैताने यीशु अजमाव । त तैड़ी यीशु जंगली जानवरन साथी थियो । तैखन परमेशेरु स्वर्गदूत यीशु कां एइतां तैसेरी सेवा करेने लगगे ।

\* 1:4 1:4 बपतिस्मो: मतलब कि, मैन्हु पापेरी जिन्दगी छेइतां परमेशेरु बत्ती पुड़ ज़लनेरे लेइ तियार भोते । एल्हेरेलेइ एस रसमी केरतन । एसमां कुन भोते कि मैन्हु पैनी मां डुबइतां बेइर कदतन । † 1:8 1:8 पवित्र आत्मा सेइं बपतिस्मो: ए अक मुहावरो आए । एसरो मतलब, जैना लोक पापन करां मनफिरातन, तैनन् परमेशेरु एन आशिर्वाद देते । तैन मां वसनेरे लेइ परमेशेरु तैन कां अपनि पवित्र आत्मा भेजेलो । पवित्र आत्मा तैनन् शुद्ध केरेलो, त कने परमेशेरु मर्जी पुड़ ज़लनेरे लेइ मदत केरेलो त समझ देलो, त कने होरि बड़ी गल्लन मां भी तैन केरि मदत केरेलो ।

**॥३३३ ३३३३ ३३३३३३ ३३ ३३३३ ३३३३३॥**

**(३३३३३ 4:12-17; ३३३३३ 4:14-15)**

14 किछ वक्तेरां बाद, यूहन्ना नवी कैंद कियो जेव । तैल्ला बाद, यीशु गलील इलाके मां जेव । तैडी तै लोकन परमेशेरे राज्जरे बारे मां खुशखबरी शुनाने लगे ।

15 तैनी ज़ोवं कि, “ठीक वक्त ओरोए त कने परमेशेरू राज्ज नेडे ओरूए! एल्हेरेलेइ, तुस अपने पापन करां मनफिराथ ते इस खुशखबरी पुड विश्वास केरा ।”

**॥३३३ ३३३३३३ ३३३३३३३३३३ ३३३३ ३३३३ ३३३३३३३३ ३३३ ३३३३३३३॥**

**(३३३३३ 4:18-22; ३३३३३ 5:1-11)**

16 एक्सां, जैखन यीशु गलील नव्वेरे समुन्दरेरे बन्ने ज़लोरो थियो, तैखन तैनी दूई मैन्हु शमौन त तैसेरो दूला अन्दरयास लाए, जैना मेछली ट्लानेबाले थिये । तैना मेछली ट्लानेरे लेइ समुन्दरे मां ज़ाल छेड्डी राओरे थिये ।

17 यीशुए तैन सेइं ज़ोवं, “एज्जा मेरे चले बना । अवं तुसन शिखालेलो कि केन्चरां होरे मैन्हु मेरे चले बनानेन ।”

18 अकदम तैना अपना जालां छेडतां यीशु पत्ती चले जे ।

19 जैखन तैना थोड़े ज़ेरे अगगर जे, त यीशुए याकूब त कने तैसेरो दूला यूहन्ना लाए । तैना दुइये जेव्वेरां मट्टां थियां । तैना किशती मां जालां ठीक करने लगगेरे थिए ।

20 अकदम यीशुए तैना अपने चले बनानेरे लेइ कुजाए । तैना दुइये, अपने बाजी जब्दी किशती मां मज़दूरन सेइं साथी छेडतां, यीशु सेइं साथी चले जे ।

**॥३३३ ३३३३३३ ३३३३३३३३३३ ३३३३३३३३३३ ३३३३३३ ३३३३ ३३३३॥**

**(३३३३३ 4:31-37)**

21 तैल्ला पत्ती, यीशु त तैसेरे चले तैट्टां कफरनहूम नगरे मां जे । आरामेरे दिहाडे, अकदम यीशु तैन केरे प्रार्थना घरे मां जेव । तैडी तै परमेशेरी गल्लां तैन लोकन शुनाने लगे ।

22 तैना यीशुएरी शिक्षा शुन्तां हैरान भोए, किजोकि तैनी शास्त्री लोकां केरि ज़ेरि शिक्षा न दिती, पन तै अधिकारे सेइं शिक्षा देइ राओरो थियो ।

23 जैखन यीशु तैडी थियो, त तैन केरे प्रार्थना घरे मां अक मैन्हु थियो, जैस पुड भूतेरो सायो थियो ।

24 अचानक तैनी मैने चिन्डां मेरतां ज़ोवं, “हे नासरत नगरेरो यीशु! तीं सेइं असन कुन कम? कुन तू असन नाश केरनेरे लेइ ओरोस? अवं ज़ानताई कि तू कौन आस, तू परमेशेरू पवित्तर मट्टू आस!”

25 पन यीशुए तैस भूते झिड़कतां ज़ोवं, “चुप रा, एस मैन्हु मरां निस्सी गा!”

26 तैखन भूते तै मैन्हु इलेडेइतां त ज़ोरे सेइं चिन्डां मेरतां तैस मैन्हु मरां निस्सी जेव ।

27 एन हेरतां सारे लोक बड़े हैरान भोए । तैना एण्यू मामेइं गलबात केरतां एक्की होरि पुछ्ने लगगे कि, “ए कुन गल आए! ए त अक नव्वी शिक्षा आए ज़ैस मां अधिकार आए! तै त भूतन भी अधिकारे सेइं हुक्म देते ते तैना भी तैसेरो हुक्म मन्तन ।”

28 अकदम यीशुएरे बारे मां ए गल गलील इलाकेरे आसेपासेरे सेब्मी ठैरन मां फैली जेई ।

**॥३३३ ३३३३ ३३३३३ ३३३३३ ३३३३३३३३३॥**

**(३३३३३ 8:14-17; ३३३३३ 4:38-41)**

29 तैना अकदम प्रार्थना घरे मरां निस्तां, याकूब त कने यूहन्ना सेइं साथी शमौन त अन्दरयासेरे घरे जे ।

30 शमौनेरी शिक्षा भुखारे थियो ते तै लेटोरी थी । अकदम तैनेई तैसारे बारे मां यीशु सेइं ज़ोवं कि ऊ विमार आए ।

31 यीशुए तैस कां गेइतां तैसारेो हथ ट्लेइतां खड़ी की । अकदम तैसारेो भुखार ठीक भोव । ते ते तैन केरि सवा करने लगगी ।

32 इलोझी ज़ैखन दिहाड़ो डुब्बो, त लोक सारे बिमार मैन्हु त कने ज़ैन मैनन् पुड़ भूतेरो सायो थियो तैना यीशु कां आन्ने लगगे, ताके तै तैनन् बज्झाए ।

33 तैस नगरेरे बड़े लोक तैस घरेरे दारे पुड़ अकोट्टे भोए ।

34 यीशुए बड़े मैन्हु बज्झाए, ज़ैना बड़े किसमां केरि बिमैरन सेइं दुखी थिये । त तैनी बड़े मैनन् मरां भूतां केरो सायो कड्डो । पन यीशुए भूतन किछ् ज़ोने न दित्तू, किजोकि तैना यीशु पिशानतां थियां (कि एन परमेशेरे मट्टू आए) ।

ⓂⓂⓂⓂ ⓂⓂⓂⓂⓂ ⓂⓂⓂⓂⓂⓂⓂ ⓂⓂⓂⓂⓂⓂ ⓂⓂⓂⓂⓂⓂ  
(ⓂⓂⓂⓂ 4:42-44)

35 एगरी दिहाड़ी, झेज्झां-झेज्झां दिहाड़ो निस्ने केरां बड़े पेइले, यीशु उठतां बेइर एक्की सुनसान टैरी मां जेव । तैड़ी तै परार्थना केरने लगो ।

36 पन थोड़े चिरेरां बाद, शमौन त तैसेरे साथी, यीशु तोपने जे ।

37 ज़ैखन तैनन् तै मैल्लो, त तैनेई यीशुए सेइं ज़ोवं, “(वापस इलाव्वे मां एई,) सारे लोक तीं तोपपी राओरेन!”

38 पन यीशुए तैन सेइं ज़ोवं, “एज्जा, अस होरि केन्वी आसेपासेरे इलोव्वन मां गाम, ताके अवं तैन लोकन भी परमेशेरी गल्लां शुनेई । किजोकि अवं एस्से कम्मरे लेइ दुनियाई मां ओरोई ।”

39 तैल्लेरेलेइ यीशु गलील इलाकेरे सारे इलोव्वन मां गेइतां, तैन केरे परार्थना घरन मां लोकन परमेशेरी गल्लां शुनातो राव ते बड़े लोकन मरां भूतां केरो सायो कढतो राव ।

ⓂⓂⓂⓂ ⓂⓂⓂⓂⓂ ⓂⓂⓂⓂⓂ ⓂⓂⓂⓂⓂ ⓂⓂⓂⓂⓂⓂⓂⓂ  
(ⓂⓂⓂⓂⓂ 8:1-4; ⓂⓂⓂⓂ 5:12-16)

40 तैल्ला पत्ती, एक्सां अक कोढी मैन्हु यीशु कां अव । तैनी मैने यीशुएरे सामने ज़ैन्धु केरे भारे बिशतां तैस कां मिन्नत केरतां तैस सेइं ज़ोवं, “अगर तू चास, त मीं बज्झेई सकतस । (महरबानी केरतां मीं बज्झा ।)”

41 यीशुए तैस मैन्हु पुड़ तरस खाव । यीशुए अपनो हथ अग्रोवं कियो त तैस कोढी मैन्हु सेइं हथ लेइतां‡ ज़ोवं, “अवं चाताई, तू बज्झोस ।”

42 अकदम तै कोढी बज्झोई जेव ।

43 तैखन यीशुए तै मैन्हु समझेइतां लूशी भेजो ।

44 त तैनी तैस सेइं ज़ोवं, “हेर, एस गल्लेरे बारे मां केन्वी सेइं किछ् न ज़ोइयां । (तू यरूशलेम नगरेरे मन्देरे मां गा), त कने अपने आपे याजके हिरा । तैल्ला पत्ती, तू अपने बेज्झोनेरे वजाई सेइं च़दतल च़ाद, ज़ेसेरे बारे मां मूसा नेवे कानूने मां हुक्म दित्तोरोए, ताके लोकन पतो च़ले कि तू बेज्झोरोस ।”

45 पन तै मैन्हु बेइर गेइतां एस गल्लेरे बारे मां लोकन बडू शुनाने लगो ते इड़ी तगर फैलाने लगो कि यीशु फिरी बांदे नगरे मां न गेइ सको, पन बेइर सुनसान टैरन मां राव ते च़ेवरे पासां केरे लोक तैस कां एइते राए ।

## 2

ⓂⓂⓂⓂ ⓂⓂⓂⓂⓂⓂ ⓂⓂⓂⓂⓂⓂ ⓂⓂⓂⓂⓂⓂ  
(ⓂⓂⓂⓂⓂ 9:1-8; ⓂⓂⓂⓂ 5:17-26)

1 किछ् दिहाड़ना बाद, यीशु फिरी कफरनहूम नगरे मां जेव । तैट्टेरे मैनेईं शुनू कि तै तैड़ी एक्की घरे मां आए ।

2 अकदम बड़े मैन्हु तैस घरे मां अकोट्टे भोए । तैड़ी ठार न राई, इड़ी तगर कि दारे केरां बेइर भी ठार न थी । यीशु तैन लोकन परमेशेरी गल्लां शुनाने लगो ।

‡ 1:41 1:41 हथ लेइतां: पन सारे लोक समझते थिये कि कोढी मैन्हु सेइं हथ लानो ज़ुठो (गंदो) आए ।

3 तैखन किछ मैन्हु एक्की अधरंगी मैन्हु छुइतां यीशु कां आए। च़ेवरे मैनेई तै अधरंगी मैन्हु खट्टी पुइ छुइतां आनारो थियो।

4 मैन्हु केरि भीङरे वजाई सेइं, तैना यीशुएरे नेडे न पुज्जी सके। एल्हेरेलेइ तैनेई तैस धरेरी छत ज़ैस मां यीशु थियो पुट्टी छुइडी। तैल्ला बाद, तैनेई तै खट आसाली ज़ैस पुइ अधरंगी मैन्हु थियो।

5 यीशुए तैन केरो विश्वास हेरतां अधरंगी मैन्हु सेइं ज़ोवं, “हे मट्टा, तेरे पाप माफ़ भोए।”

6 तैखन शास्त्री लोकन मरां किछ मैन्हु ज़ैना तैडी थिये, अपने-अपने मने मां सोचने लगगे कि,

7 “ए मैन्हु एन्त्रां किजो ज़ोते? ए त परमेशेरी तुहीन केरते। परमेशेरे अलावा कौन पाप माफ़ केरि सकते?”

8 अकदम यीशुए ज़ैनी छुइडू कि तैना अपने-अपने मने मां कुन सोचने लगगोरन। एल्हेरेलेइ तैनी तैन सेइं ज़ोवं, “तुस अपने-अपने मने मां एन्त्रां किजो सोचने लगगोरथ?”

9 एस अधरंगी मैन्हु सेइं कुन ज़ोनू सुखू आए? एन ज़ोनू कि तेरे पाप माफ़ भोए, या एन ज़ोनू कि उठ, अपनि खट छुइतां च़ल फिर?”

10 अवं किछ करेनेवालौई, ज़ैस सेइं तुसेई बुज्झनुए कि मैनेरे मट्टे (यानी मीं) धेरती पुइ लोकां केरे पाप माफ़ करेनेरो अधिकार आए!” फ़िरी तैनी तैस अधरंगी मैनेरे पासे मुइतां तैस सेइं ज़ोवं,

11 “अवं तीं सेइं ज़ोतई, उठ, अपनि खट छुइतां अपने घरजो गा!”

12 अकदम तै खडो उठो ते अपनि खट छुइतां सारे मैन्हु केरे सामने निस्तां च़लो जेव। एस वजाई सेइं सारे मैन्हु ह़ैरान भोए, त परमेशेरी बइयाई केरतां ज़ोने लगगे, “असेई एरू ज़ेरू कधी नई लावरू!”

[\[मरकुस 9:9-13\]](#); [\[मरकुस 5:27-32\]](#)

13 तैल्ला पत्ती, यीशु तैट्टां निस्तां फ़िरी गलील समुन्दरेरे बन्ने जेव। तैखन मैन्हु केरि सारी भीड तैस कां आई। तै तैन लोकन परमेशेरी गल्लां केरि शिक्षा देने लगो।

14 समुन्दरेरे बन्ने गाते-गाते, यीशुए लेवी नंब्बरे मैन्हु लाव, ज़ैन हलफईसेरू मट्टू थियूं। तै मैन्हु चुंगी नेनेरे दफ़तरें मां कम केरतो थियो। तैखन यीशुए तैस सेइं ज़ोवं, “मीं पत्ती एई, ते मेरो चेलो बन।” अकदम लेवी उठो त यीशु पत्ती च़लो।

15 बादे मां, यीशु त तैसेरे च़ेले लेवरे धरे मां रोट्टी खाने विशे। तैखन बडे चुंगी नेनेबाले त हारे पापी मैन्हु (लोक तैन केरे बारे मां सोचते थिये कि एना पापिन।) भी यीशु त तैसेरे च़ेलन सेइं साथी रोट्टी खाने विशे, किजोकि एन केरे ज़ेरे बडे लोक यीशु पत्ती च़लते थिये।

16 ज़ैखन किछ शास्त्री लोकेई त कने फ़रीसी लोकेई हेरू कि यीशु पापी मैनन् त चुंगी नेनेबालन सेइं साथी रोट्टी खाने लगगोरए, तैखन तैनेई यीशुएरे च़ेलन सेइं ज़ोवं, “तै चुंगी नेनेबालन त पैपन सेइं साथी किजो खाते पीते?”

17 यीशुए तैन केरि गल शुन्तां तैन मिसाल देइतां जुवाब दिचो, “सज़र लोकन डाक्टरेरी ज़रूरत न पे, पन बिमार मैनन् ज़रूरत पेचे। तेन्त्रां, अवं तैन मैन्हु केरे लेइ नई ओरोई ज़ैना अपने आपे धर्मी समझतन, पन पापी मैनन् कुजाने ओरोई, ताके तैना अपने पापन केरां मन फिरान।”

[\[मरकुस 9:14-17\]](#); [\[मरकुस 5:33-39\]](#)

18 यूहन्नारे च़ेले त कने फ़रीसी लोक बरत रखते थिये, पन यीशुएरे च़ेले बरत न थिये रखते। किछ लोकेई यीशु कां एइतां तैस पुञ्छू, “यूहन्नारे च़ेले ते फ़रीसी लोकां केरे च़ेले बरत रखतन, पन तेरे च़ेले बरत की न रखन?”

19 यीशुए तैनन् जुवाव दित्तो, “डलाएरे दिहाड़े, ज़ैखन लाडो जैनी सेइं साथी राते, कुन तैना वरत रेख्वी सकतन? (बिलकुल नई) तैल्हेरेलेइ, ज़ांतगर लाडो तैन सेइं साथी राते, तांतगर तैना वरत न रेख्वी सकन। (किजोकि तैना खुशी आन।)

20 मेरे चले भी तैन केरे ज़ेरे आन, किजोकि अवं तैन सेइं साथी आई। पन तैना दिहाड़े एज्जले, ज़ैखन लाडो तैन केरां अलग कियो गालो (यानी मारो गालो), तैस मौके तैना (अपने दुख्खेरे वजाई सेइं) वरत रख्वेले।”

21 “अवं तुसन अक होरि मिसाल देताई, नंव्वे लिगडेरी टलोई पुराने लिगडे कोई न लाए। अगर कोई एन्त्रां केरे, त धोनेरे पत्ती नंव्वे लिगडेरी टलोई पुराने लिगडे अपने पासे खिच्वी छ्इडेली। त तैन पेइले केरां भी जादे छ्इन्दोल्।

22 तेन्त्रे कोई भी पुरैनी मसकन मां नंव्वे दाछारो रस न रखे, किजोकि दाछारो रस अम्लो भोइतां फुलते बार मसकन छ्इन्दी छ्इडेलो। दाछारे रस त कने मसकां, एना दुइये वरवाद भोइ गाले। एल्हेरेलेइ नंव्वे दाछारे रस हमेशा नंव्वे मसकन मां रख्वोरो लोइ, ताके मसकन न छ्इन्दे।”

⚡⚡⚡⚡⚡⚡⚡⚡⚡⚡⚡⚡⚡⚡⚡⚡⚡⚡⚡⚡  
(⚡⚡⚡⚡ 12:1-8; ⚡⚡⚡⚡ 6:1-5)

23 एककी आरामेरे दिहाड़े, यीशु त कने तैसेरे चले बत्ती मांमेइं चलने लगगोरे थिये, ज़ै गेंव्वां केरे ऊडारन मांमेइं थी। चलते-चलते तैसेरे चले गेंव्वां केरे किछ् शिल्मां टलोइतां खाने लगगे।

24 पन किछ् फरीसी लोकेई तैन हेरतां यीशु सेइं ज़ोवं, “तक! एना आरामेरे दिहाड़े तैन कम किजो केरतन, ज़ैन मूसेरे कानूनेरे मुताबिक जेइज नई?”

25 यीशुए तैन सेइं ज़ोवं, “कुन तुसेईं परमेशेरी किताबी मां एन कधी नई पढोरूए कि (बड़े पेइले) दाऊद राजे कुन कियूं, ज़ैखन तैस त तैसेरे सैथन ढलुख लगगी त तैनन् रोट्टीरी ज़रूरत थी?”

26 तुसन पतोए कि दाऊद राजे परमेशेरे घरे मां गेइतां, अबियातार नंव्वेरे महायाजक करां खाने जो रोट्टी मग्गी। दाऊदे तै रोट्टी खाइ, ज़ै परमेशेरे जो ज़दोरी थी। कानूनेरे मुताबिक याजक केरे अलावा होरि केन्ची तैना रोट्टी खानेरी अज़ाज़त नई थी। पन दाऊदे अपने सैथन भी रोट्टी दित्ती त तैनेई भी तैना रोट्टी खेइ? (पन फिरी भी परमेशेरे दाऊदे पुइ दोष न लाव।)”

27 तैखन यीशुए तैन फरीसी लोकन सेइं ज़ोवं, “परमेशेरे आरामेरी दिहाड़ी लोकन मद्दत केरनेरे लेइ बनोरीए, न कि आरामेरे दिहाड़ेरे कानून मन्नेरे लेइ तैनी लोक रत्रे।

28 एल्हेरेलेइ, मैनेरू मट्टू यानी अवं आरामेरे दिहाड़ेरो भी परभु आई।”

### 3

⚡⚡⚡⚡⚡⚡⚡⚡⚡⚡⚡⚡⚡⚡⚡⚡⚡⚡⚡⚡  
(⚡⚡⚡⚡ 12:9-14; ⚡⚡⚡⚡ 6:6-11)

1 तैल्ला पत्ती, यीशु एककी प्रार्थना घरे मां जेव। तैडी अक मैन्हु थियो, जेसेरो हथ शुक्कोरे थियो।

2 तैडी किछ् फरीसी लोक भी थिये, ज़ैना यीशु पुइ इलज़ाम लानो चाते थिये। एल्हेरेलेइ तैना यीशु ध्याने सेइं हेरने लगगोरे थिये कि आरामेरे दिहाड़े तै तैस मैन्हु बज्ज़ाते की नई।

3 तैखन यीशुए शुक्कोरे हथ्थेबाले मैन्हु सेइं ज़ोवं, “मज़ाटे खड़े भो।” (तै तै मैन्हु खड़ो भोव।)

4 त यीशुए तैन लोकन पुच्छ्छ्, “आरामेरे दिहाड़े कुन केरनू जेइज्जे, मैनेरू भलू केरनू या वुरू केरनू, मैनेरी जान बच्चानी या मारनी?” पन तैना चुप राए।

5 त तैनी सरकी सेइं तैन केरे ज़ेरेरे पासन तकू, पन तैन केरे सखत दिलेरी वजाई सेइं उदास भोव। तैखन तैनी तैस मैन्हु सेइं ज़ोवं, “अपनो हथ अग्रोवं केर।” तैनी मैने अपनो हथ अग्रोवं कियो। त अकदम तैसेरो हथ बेज्ज़ोव।

6 तैखन फरीसी लोक प्रार्थना घरे मरां बेइर जे। अकदम तैना हेरोदेस राजेरे लोकन सेइं साथी यीशुएरे खलाफ साजिश करेने लगगे कि यीशुएरो कोस तरीके सेइं कत्ल केरम।

*[[[11:1-10:1]]]*

7 तैल्ला पत्ती, यीशु अपने चेलन सेइं साथी गलील समुन्दरेरे पासे जेव। मैन्हु केरि बडी भीड तैस पत्ती चली। गलील त यहूदिया इलाकां केरे लोक तैस कां आए।

8 यरूशलेम नगरेरे लोक, इदूमिया इलाकेरे लोक ते यरदन दरियारे पारेरे लोक त कने सूर त सैदारे आसेपासेरे लोक भी तैस कां ओरे थिये। तैना सब यीशु कां आए, किजोकि तैनेई यीशुएरे सारे चमत्कारेरे कम्मां केरे बारे मां शुनोरू थियू, जैना तै केरतो थियो।

9-10 यीशुए बडे लोक हथ लेइतां बज्जावरे थिये, एल्हेरेलेइ होरे बडे लोक जैना बडे बिमार थिये, तैना तैस सेइं हथ लानेरे लेइ तैस पुइ बिछ्छी गाते थिये, ताके तैना भी बेज्जोन। मैन्हु केरि भीड बडी जादे थी। एल्हेरेलेइ यीशुए अपने चेलन सेइं ज़ोवं, “मेरे लेइ अक किशती तियार केरा, ताके एना लोक मीं दलन्ची न सकन।”

11 त जैन लोकन पुइ भूतां केरो सायो थियो, तैना भी यीशु लेइतां तैसेरे पावन पुइ बिछ्छी गाते थिए। तैना भी ज़ोरे-ज़ोरे सेइं ज़ोते थिए कि, “तू परमेशेरेरू मटटू आस।”

12 यीशुए तैन भूतन सखत हुक्म दित्तो कि, “मेरे बारे मां लोकन न ज़ोथ कि अवं कौन आई।”

*[[[12:1-10:1]]], [[[10:1-4:1]]], [[[6:12-16:1]]]*  
(*[[[10:1-4:1]]], [[[6:12-16:1]]]*)

13 तैल्ला पत्ती, यीशु एक्की पहाडे पुइ चढो। जैना मैनन् तै अपने चले बनानो चातो थियो, तैना एप्पू कां कुजाए। तैना तैस कां आए।

14 यीशुए तैन मरां 12 मडद चुने, ते तैन प्रेरित नवं दित्तू कि तैना तैस सेइं साथी-साथी रान, ताके तै तैन लोकन खुशखबरी शुनाने भेजे।

15 यीशुए तैनन्, लोकां केरि विमैरी बज्जाने त कने मैनन् मरां भूतां केरो सायो कढनेरो अधिकार दित्तो।

16 तैना 12 मैन्हु केरां नंवां इना थियां: शमौन जेसेरू नवं यीशुए पतरस रखू,

17 याकूब त तैसेरो दला यहून्ना, एना दुइये जेबेदां मट्टां थियां, त यीशुए एन दुइयां केरू नवं बुअनरगिस रखू, मतलब कि, गुइनेरां मट्टां।

18 त अन्दरयास, फिलिप्पुस, बरतुलमै, मत्ती, थोमा, याकूब जैन हलफईसेरू मट्टू थियू, त तद्दे, शमौन जै पेइले रोमी सरकारारे खलाफ यहूदी लोकां केरि आजैदेरे लेइ लइनेवालो थियो।

19 त कने यहूदा इस्करियोती जैनी बादे मां यीशु धोखे सेइं दलुवाव।

*[[[12:22-32:1]]], [[[11:14-23:1]]], [[[12:10:1]]]*  
(*[[[12:22-32:1]]], [[[11:14-23:1]]], [[[12:10:1]]]*)

20 तैल्ला पत्ती यीशु कफरनहूम नगरेरे एक्की घरे मां जेव। फिरी मैन्हु केरि भीड तैस घरे मां अकोट्टी भोइ, कि यीशु त तैसेरे चेलन रोट्टी खानेरे लेइ भी मौको न मैल्लो।

21 जैखन यीशुएरे रिशतेदारेई एन शुन्, त तैना तैस टलेइतां अपने घरे वापस आन्नेरे लेइ जे, किजोकि तैना ज़ोने लगगेरे थिये कि तैसेरो दिमाग ठीकाने नई।

22 किछ्छ शास्त्री लोक, जैना यरूशलेम नगरेरां ओरे थिये, तैना लोकन सेइं ज़ोई राओरे थिये कि, “यीशु मां शैतान आए।” त एन भी ज़ोई राओरे थिये कि, “ते भूतां केरे प्रधानेरी शेक्ति सेइं लोकन मरां भूतां केरो सायो कढते।”

23 एल्हेरेलेइ यीशुए तैना नेडे कुजाए ते तैन मिसाल देइतां ज़ोने लगगे, “शैतान केन्चरां अपने भूतन लोकन मरां केइडी सकते?”

24 अगर एक्की राज्जरे लोक अपने राज्जरे खलाफ लड़ाई केरन, त तैन राज बनोरू न रेइ सके।



25 अगर केन्ची टब्बरे लोक अपने टब्बरे खलाफ लडाई करन, त तैन टब्बर भी बनोरू न रेड सके।

26 तेन्चरे, शैतान भी अगर एप्पू अपने भूतां केरे खलाफ लडाई केरे, त तै केन्चरां बनोरो रेड सकते? तैसेरो त बिलकुल खातमां भोड गालो।

27 अवं होरि मिसाल देताई, कोई मैन्हु केन्ची ज़ोरेबाले मैनेरे घरेरे मां गेइतां तैसेरो माल तांतगर लुट्टी न सके, ज़ांतगर कि ते पेइले तैस ज़ोरेबाले मैन्हु वेंधी न छुड्डे। तैखन तै तैस ज़ोरेबाले मैनेरो माल लुट्टी सकते। अवं भी शैतानेरे भूतां केरो सायो लोकन मरां केडडी सकतां। (शैतान तैस ज़ोरेबाले मैनेरो ज़ेरोए)

28 अवं तुसन सेइं सच्च ज़ोतई कि मैन्हु केरे सारे किसमां केरे पाप त कने परमेशेरी तुहीन, ज़ै तैना करतन, अगर तैना मन फिरान त परमेशर तैन माफ़ केरेलो।

29 पन ज़ै कोई पवित्तर आत्मारी तुहीन केरे, त तैस कधी भी परमेशर माफ़ न केरेलो। पन तै मैन्हु हमेशारे पापेरो दोषी बेनि गालो।”

30 यीशुए एन्चरां ज़ोवं किजोकि तैना यीशुएरे बारे मां एन ज़ोते थिये कि तैस पुड भूतेरो सायो आए।

~~~~~  
(~~~~~ 12:46-50; ~~~~~ 8:19-21)

31 तैखन यीशुएरी अम्मा त कने तैसेरे दूला तैडी आए। तैना घरेरे बेइर खडे भोइतां तैस जो विस्तार भेजो।

32 तैना घरेरे अन्तर न गेइ सके किजोकि मैन्हु केरि भीड यीशुएरे च़ेवरे पासन विशशोरी थी। एल्हेरेलेइ तैन लोकेई यीशु सेइं ज़ोवं, “तक, तेरी अम्मा त तेरे दूला बेइर खडे आन। तैना तीं सेइं मिलनू चातन।”

33 पन यीशुए तैनन् जुवाब दित्तो, “अवं तुसन ज़ोताई मेरी अम्मा त कने मेरे दूला कौन आन!”

34 तैखन यीशुए तैन लोकां केरे पासे तेकतां ज़ोवं, ज़ैना तैसेरे च़ेवरे पासन विशशोरे थिये, “तक्का, मेरी अम्मा त कने मेरे दूला इना आन।

35 किजोकि ज़ै कोई परमेशेरी मेर्ज़ी पुड चलते, तैए मेरो दूला, मेरी बेइन ते मेरी अम्मा आए।”

4

~~~~~  
(~~~~~ 13:1-9; ~~~~~ 8:4-8)

1 तैल्ला पत्ती, यीशु फिरि गलील समुन्दरेरे वन्ने लोकन शिक्षा देने लगो। मैन्हु केरि एतूरी भीड तैस कां अकोट्टी भोइ। यीशु समुन्दरे मां एक्की किशती मां च़दो ते विशशी जेव, ताके तै सेब्भी लोकन परमेशेरी गल्लां केरि शिक्षा देइ सके। मैन्हु केरि सारी भीड तैसेरी गल्लां शुन्तां समुन्दरेरे वन्ने पुड खडी राई।

2 यीशुए तैनन् बेडि गल्लां मिसालन मां ज़ोई। तैनी शिक्षा देइतां तैन लोकन सेइं ज़ोवं,

3 “ई कहानी शुना! एक्सां अक बीज बेनेबालो बीज बेने जो जेव।

4 बीज बेते बार किछ् बीज बत्तेरे डलेखी बिछ्छू त चुडोल्लेई एइतां तैन बीज चुनू।

5 किछ् बीज घोइनबाली ज़मीनी पुड बिछ्छू, ज़ेडी तैस डुग्धी मित्ती न मेलनेरे वजाई सेइं तैन लूशी उगगू त बूटो लगो।

6 पन ज़ैखन दिहाडो निस्तो, त तै निकडो बूटो फुक्कोई जेव। ते ज़ील न छुड्डनेरे वजाई सेइं शुक्की जेव।

7 होरू किछ् बीज कंटां केरे झैल्लन मां बिछ्छू, ज़ैखन तैडी बूटो लगो, त कंटां केरे झैल्लेई बेडोइतां तै बूटो दवेइ छुड्डो, त तैनी बुटे फल न दित्तो।

8 पन किछ् वीज रोड़ी ज़मीनी पुड बिछ्डू, त तैन उग्गू त बेडोवं त फलदार भोवं । तैन मरां केन्ची बीजे टलही गुणा फल दित्तो, त केन्ची बीजे शठ गुणा, त केन्चे शौव गुणा ।”

9 ए मिसाल शुनानेरे बाद, यीशुए लोकन सेइं ज़ोवं, “जै कोई समझनू चाते, तै ध्याने सेइं शुने त समझे ।”

*Matthew 13:10-17; Mark 8:9-10*

10 तैल्ला पत्ती, जैखन यीशु मैन्हु केरि भीड़ी करां अलग थियो, त तैखन तैसेरे सैथेईं त कने तैसेरे 12 चलेईं यीशु तैस मिसालेरे बारे मां पुच्छ् ।

11 यीशुए तैन सेइं ज़ोवं, “अवं तुसन परमेशेरे राज़ेरो भेद समझेईलो । पन होरि लोकां केरे लेइ मिसालन मां ज़ोवं गाते ।

12 ताके ज़ेन्चरां परमेशेरी किताबी मां लिखोरूए तेन्चरां भोए कि, ‘जैन अवं केरतईं, तैन तैना बार-बार हेरेले, पन तैना तैसेरो मतलब न बुज्झेले । जैन अवं ज़ोतईं, तैन तैना बार-बार शुनेले, पन मेरी गल न समझेले । एरू न भोए कि तैना अपने पापन करां मन फिरान त तैन केरे पाप माफ़ किये गान ।’”

*Matthew 13:18-23; Mark 8:11-15*

13 तैल्ला पत्ती, यीशुए तैन सेइं ज़ोवं, “कुन तुसेईं तै मिसाल न समझी? अगर तुस तैस मिसाली न समझथ, त फिरि होरि सब मिसालां केन्चरां समझेले?”

14 अवं तुसन तै मिसाल समझताईं । बीज बेनेबालो ते आए, जै परमेशेरी गल्लां लोकन शुनाते ।

15 जैना मैन्हु परमेशेरी गल्लां शुन्तन, तैन मरां किछ् लोक तैस बत्तेरे ज़ेरे आन, जेड़ी बीज बिछ्डते । तैना त परमेशेरी गल्लां शुन्तन, पन शैतान अकदम एइतां तैन मैन्हु केरे दिले मरां परमेशेरी गल्लां केइडी छइते ।

16 किछ् होरे लोक, जैना परमेशेरी गल्लां शुन्तन, तैना तैस घोडनबैली ज़मीनेरे ज़ेरे आन । तैना परमेशेरी गल्लां शुन्तन त खुशी सेइं तैन कबूल भी केरतन ।

17 पन ज़ेन्चरां निकड़ी बूटो घोडनबैली ज़मीनी मां मिच्ची घट भोनेरे वजाईं सेइं लूशी लगते, तेन्चरां एना मैन्हु भी भोतन । तैना मज़बूत विश्वास न रखन । एल्हेरेलेइ तैना थोडे दिहाडन तगर विश्वास रखतन । पन ज़ैखन परमेशेरी गल्लां केरे मुताबिक च़लनेरे वजाईं सेइं तैन पुड मुसीबतां एचचन त कने ज़ैखन लोकन केरां सताए गातन, त तैखन तैना अकदम अपने विश्वास छइतां टोकर खातन ।

18 होरे किछ् लोक, जैना परमेशेरी गल्लां शुन्तन, तैना तैस कटां केरे झैल्लां केरे ज़मीनेरे ज़ेरे आन । तैना परमेशेरी गल्लां त शुन्तन,

19 पन तैना इस दुनियारी फिर केरतन, त कने दौलतरे वजाईं सेइं धोखो खातन, त तैना बडे चीजां केरू लालच़ केरतन । एसेरे वजाईं सेइं तैना परमेशेरी गल्लां बिसरी छइतन त तैन गल्लन पुड न च़लन ।

20 पन किछ् लोक, जैना परमेशेरी गल्लां शुन्तन त कने तैन पुड च़लतन, तैना तैस रोड़ी ज़मीनेरे ज़ेरे आन । तैना परमेशेरी गल्लां शुन्तन त कबूल भी केरतन त फल देतन, मतलब की तैना परमेशेरी गल्लां केरे मुताबिक ज़िन्दगी जीतन । कोई टलही गुणा, कोई शठ गुणा त कोई शौव गुणा फल देतन ।”

*Matthew 8:16-18*

21 तैल्ला पत्ती, यीशुए मैन्हु केरि भीड़ी सेइं ज़ोवं, “कोई बलतो दीयो एन्तां हेटी मां या खट्टी हठ न रखे । पन केन्ची उच्ची ठेरी पुड रखे गाते । (ताके सारे घरे लौ भोए ।)

22 कोई गल छप्पोरी न राली, पन सैरी गल्लां बेंदी भोली, तेन कोई भेद छप्पोरो रालो, पन सारो भेद बांदो भोलो ।

23 जै कोई समझनू चाते, तै ध्याने सेइं शुने त समझे!"

24 तैल्ला पत्ती, यीशुए मैन्हु केरि भीड़ी सेइं ज़ोवं, "होशियार राथ कि अवं तुसन कुन शिक्षा देइ राओरोई। मेरी शिक्षाईं शुन्तां, ज़ेत्त्री तुस मेरी गल मन्नेले तेत्त्री परमेशर तुसन समझ देलो। हाँ, परमेशर तुशशी समझ होरि भी बधालो।\*"

25 किजोकि ज़ैस कां परमेशरेरी मर्जी समझनेरी इच्छा आए, तैस परमेशर जादे समझ देलो। पन ज़ैस कां परमेशरेरी मर्जी समझनेरी इच्छा नई, तैस केरां, थोड़ी ज़ेरि समझ, ज़ै तैस कां आए, तै भी नी गाली।"

~~~~~

26 तैल्ला पत्ती, यीशुए मैन्हु केरि भीड़ी सेइं ज़ोवं, "परमेशेरू राज़ एरू ज़ेरू आए, कि अक मैन्हु ज़मीनी पुड़ बीज बेते ।

27 तै मैन्हु हर राती झुलते त दीसां बींझते। तैन बीज उगने लग्गोरूए त बडोने लग्गोरूए, पन तैस पतो न चले कि तैन केन्चरां भोते ।

28 केन्चेरी महतरे बगैर ज़मीन एप्पू फल आन्चे। पेइले मुन्केरे निस्तन, बादे मां शिल्लां निस्तन, तैल्ला पत्ती शिल्लन ग्लेव लगतन।

29 आखरी मां, ज़ैखन ग्लेव पेक्की गातन, तैखन अकदम तै मैन्हु कटाईं केरनेरे लेइ मैन्हु भेजते, किजोकि कटाईरो वक्त ओरो भोते।"

~~~~~

(~~~~~ 13:31-32,34; ~~~~~ 13:18-19)

30 तैल्ला पत्ती, यीशुए मैन्हु केरि भीड़ी सेइं ज़ोवं, "अस परमेशेरू राज़ेरी मसाल कोस चीज़ी सेइं देइ सकतम? कोस मिसाली सेइं अस तैस समझेइ सकतम?"

31 परमेशेरू राज़ शेरीएरे बीजेरू ज़ेरू आए (ज़ै शेरीयो इस्राएले मां भोते)। ज़ैखन तैन बीज ज़मीनी मां बेव गाते, तैन सारे बीजन केरां निकडू भोते ।

32 पन ज़ैखन तैन बीज बेव गाते, तै उगतां सारे निक्के-निक्के बुट्टन केरां बड्डो भोते। तैसेरी एत्त्री बेड्डी डेलडी निस्चन, कि अम्बेरां चुड्डोली तैसेरी छावी मां अपने आले बनेइ सकतन।"

33 एन्चरां बेडि मिसालां ज़ोइतां, यीशु तैन लोकन परमेशरेरी गल्लां शुनातो थियो, ज़ेत्तूरू तैना शुनी सकते थिये ।

34 तै हमेशा मिसाल देइतां परमेशरेरे राज़ेरे बारे मां तैन सेइं ज़ोतो थियो। पन ज़ैखन मैन्हु केरि भीड़ी मरां यीशु त तैसेरे चले अलग बिशते थिये, तैखन यीशु अपने चलन सेइं सैरी मिसालां केरो मतलब समझोतो थियो।

~~~~~

(~~~~~ 8:23-27; ~~~~~ 8:22-25)

35 तैस दिहाड़ेरे बादे मां, ज़ैखन इलोझ भोइ, यीशुए अपने चलन सेइं ज़ोवं, "एज्जा, अस गलील समुन्दरेरे पार च़लम।"

36 तैह्नेरेलेइ मैन्हु केरि भीड छेइतां तैना तैस किशती मां च़ढ़े ज़ैस मां यीशु पेइलो थियो, त तैना तैट्टां च़ले जे। होरि किछ् किशती मां भी लोक तैन सेइं साथी जे।

37 ज़ैखन तैना समुन्दर पार केरने लग्गारे थिये, तैखन अक बड्डो तूफान च़लो, त छेल्ली एडी तगर पुज्जी कि किशती पैनी सेइं भेरोई जेई।

38 पन यीशु किशतेरी पेत्री पासे, शेराहने पुड़ क़ोडी रेखतां झुल्लोरो थियो। तैखन तैसेरे च़ेलेई तै बींझेइतां तैस सेइं ज़ोवं, "हे गुरू, कुन तीं फ़िकर नई, अस त मरने बालेम!"

* 4:24 4:24 मूल भाषाईं मां: ज़ैस नापी सेइं तुस नापतथ तैस्से नापी सेइं परमेशर तुसन भी नापेलो, त तुसन परमेशर होरू भी जादे देलो।

39 तैखन यीशुए उठतां तूफान डांटो, त समुन्दरे सेइं ज़ोवं, “शान्त रा, रुकी गा!” अकदम तूफान रुकी जेव त समुन्दर शान्त भोव ।

40 तैखन यीशुए अपने चेलन सेइं ज़ोवं, “तुस किजो डरतथ? कुन तुसन हेजू भी मीं पुड़ विश्वास नई?”

41 पन तैना बड़े डेरि जे त एप्पू मांमेइं ज़ोने लगगे, “ए मैन्हु कौन आए कि तूफान त समुन्दर भी एसेरो हुक्म मन्तन!”

5

ⓂⓂⓂⓂ ⓂⓂⓂⓂⓂ ⓂⓂⓂⓂⓂⓂ ⓂⓂⓂⓂ ⓂⓂⓂⓂ ⓂⓂⓂⓂⓂⓂ ⓂⓂⓂⓂ ⓂⓂⓂⓂ ⓂⓂⓂⓂ ⓂⓂⓂⓂ
(ⓂⓂⓂⓂⓂ 8:28-34; ⓂⓂⓂⓂⓂ 8:26-39)

1 यीशु त तैसेरे चले गलील समुन्दरेरे पार, गिरासेनी इलाके मां पुज्जे ।

2 ज़ैखन यीशु किशती पुड़ेरां ओस्सो, त तैखन अक मैन्हु, ज़ैस पुड़ भूतां केरो सायो थियो, कब्रन मांमेइं यीशु कां मिलने अव ।

3 तै मैन्हु कब्रस्ताने मां रातो थियो । (तै मैन्हु बड़ो खतरनाक थियो ।) कोई तैस शंगली सेइं भी न बंधी सकतो थियो ।

4 किजोकि (पेडले बड़े बार) लोकेईं तैसेरे हथ पाव शंगलन सेइं बंधोरे थियो । पन हर बार तै हथ्यां केरि शंगलां टलोडतो थियो त पव्वां केरि शंगलां केरे टुकड़े-टुकड़े केरतो थियो । कोई तैस कैवू न केरि सकतो थियो ।

5 तै हमेशा रात-दिहाड़ी कब्रस्ताने मां त कने पहैइन पुड़मेइं हन्टतो थियो त चिन्डां मारतो थियो, त अपने आपे घोड़न सेइं ज़ख्मी केरतो थियो ।

6 ज़ैखन तैनी मैने यीशु दूरेरां लाव, त तै दौडतां यीशु कां अव ते तैस कां मथ्यो टेको ।

7-8 यीशुए भूते सेइं ज़ोवं, “हे भूता, एस मैन्हु मरां निस्सी गा!” तैनी भूते ज़ोरे सेइं चिन्डां मेरतां ज़ोवं, “हे यीशु, परमप्रधान परमेशेरेरा मट्टा, मीं तीं सेइं कुन कम? अवं तीं परमेशेरेरी कसम देताईं, मीं दुख न दे ।”

9 एल्हेरेलेइ यीशुए तैस पुच्छू, “तेरू कुन नवं आए?” तैनी यीशु सेइं ज़ोवं, “मेरू नवं फौज आए, किजोकि अस बड़े आम ।”

10 तैखन तैनी यीशु कां बड़ी मिन्नत की, “इस इलाके मरां असन बेडर न भेज ।”

11 तैड़ी पहैड़ी पुड़ सूरं केरो अक बड़ो धान च़ेरी राहोरो थियो ।

12 तैल्हेरेलेइ तैन भूतेईं यीशु कां मिन्नत की, “महरबानी केरतां असन उन सूरन मां भेज्ती दे ताके अस उन मां गाम!”

13 तैखन यीशुए तैनन, सूरन मां गानेरी अज़ाज़त दित्ती, त तैना भूतां तैस मैन्हु मरां निस्तां सूरन मां जेओ । तैखन सूरं केरो धान, ज़ैस मां लगभग दूईं हज़ार सूर थियो, टिब्बे पुड़ेरां बिछूडतां अकदम समुन्दरे मां डुबतां मेरि जे ।

14 ज़ैखन सूरं केरे च़ारनेबालेईं एन हेरू, त तैना डेरि जे । तैनेईं तैट्टां नेशतां नगरी मां त कने आसेपासेरे इलोव्वन मां ए खबर शुनाई । तैल्हेरेलेइ लोक एप्पू हेरनेरे लेइ तैड़ी आए ।

15 ज़ैखन नगरेरे लोक यीशु कां पुज्जे, त तैस मैन्हु, ज़ैस मां पेडले भूतां केरि फौजेरो सायो थियो, हुनी लिगडां लगगोरे त कने होशी मां लेइतां डेरि जे ।

16 ज़ैनेईं तैना गल्लां पेडले लेवरी थी, तैनेईं तैस मैनेरे बारे मां ज़ैस पुड़ भूतेरो सायो थियो त कने तैन सूरं केरे बारे मां पूरो हाल लोकन शुनाव ।

17 तैना यीशु कां मिन्नत केरतां ज़ोने लगगे कि, “इशे इलाके मरां च़ेलि गा!”

18 ज़ैखन यीशु वापस गानेरे लेइ किशती मां च़ढ़ने लगो, त तैनी मैने ज़ैस मां पेडले भूतां केरो सायो थियो, यीशु कां मिन्नत की कि, “मीं एप्पू सेइं साथी चलने दे ।”

19 पन यीशुए तै एप्पू सेइं साथी च़लने न दित्तो । पन तैनी तैस सेइं ज़ोवं, “अपने घरे जो गा त कने अपने लोकन सेइं ज़ो, कि परभु परमेशेरे तीं पुड़ दया केरतां तेरे लेइ केतू बड्डू कम कियोरूए ।”

20 एल्हेरेलेइ तै मैन्हु गेइतां दिकापुलिस इलाके मां लोकन शुनाने लगे कि यीशुए मेरे लेइ केतू बड्डू कम कियोरूए । सारे लोक ए गल शुन्तां हैरान भोइ जे ।

एल्हेरेलेइ तै मैन्हु गेइतां दिकापुलिस इलाके मां लोकन शुनाने लगे कि यीशुए मेरे लेइ केतू बड्डू कम कियोरूए । सारे लोक ए गल शुन्तां हैरान भोइ जे ।

(एल्हेरेलेइ 9:18-26; एल्हेरेलेइ 8:40-56)

21 तैल्ला पत्ती, यीशु फिरी किशती मां गलील समुन्देरे इस पासे वापस अव, त मैन्हु केरि बडी भीड़ तैस कां अकोट्टी भोइ । यीशु समुन्देरे बन्ने पुड़ थियो ।

22 तैखन याईर नव्वेरो मैन्हु तैडी अव, ज़ै यहूदी लोकां केरे प्रार्थना घेरे प्रधान्न मरां अक थियो । ज़ैखन तैनी यीशु लाव, त तैसेरे पावन पेव ।

23 तैनी एन ज़ोइतां यीशुए सेइं बडी मिन्नत की, “मेरी निकडी कुई मरनेबाली आए । तू मीं सेइं साथी एइतां तैस पुड़ अपनां हथ रख, ताके तै बेज्झोए ते ज़ींती राए ।”

24 एल्हेरेलेइ यीशु तैस सेइं साथी तैसेरे घरे जेव ।

मैन्हु केरि अक बडी भीड़ यीशु पत्ती च़ली, इडी तगर कि लोक यीशु पुड़ बिछ्छते थियो ।

25 तैस भीडी मां अक कुआन्श भी थी, ज़ैस 12 सालां केरि खून च़लनेरी बिमारी थी ।

26 तैसां बडे बेइदन केरां बडो दुख झल्लो । बिमारी ठीक भोनेरे लेइ तैसां अपने सब पेंइसे खेर्ची दित्ते, पन तैस कोई फेइदो न भोव । पन तै होरि भी जादे बिमार भोइ जेई ।

27-28 तै यीशुएरे बारे मां शुन्तां अपने दिले मां ज़ोती थी, “अगर अव सिर्फ तैसेरे लिगडे सेइं हथ लाएली, त अव बेज्झोई गाली ।” एल्हेरेलेइ तै मैन्हु केरि भीडी मां यीशुएरे पत्तेवरां आई ते तैसेरे लिगडे सेइं हथ लाव ।

29 ज़ैखन तैसां यीशुएरे लिगडे सेइं हथ लाव, त अकदम तैसेरो खून च़लनेरी बिमारी बेज्झोई । तैसां अपनि जानी मां बुज्झू कि अव तैस बिमारी केरां बेज्झोरी आई ।

30 यीशुए अकदम बुज्झू कि मीं मरां शक्ति निस्सोरीए । एल्हेरेलेइ तैनी मैन्हु केरि भीडी मां च़ेवरे पासन मुइतां लोकन पुच्छू, “मेरे लिगडे सेइं केनि हथ लाव?”

31 तैसेरे चेलेई तैस सेइं ज़ोवं, “तू हेरतस कि मैन्हु केरि भीड़ तीं पुड़ बिछ्छडने लगगोरी, फिर भी तू किजो पुच्छतस कि केनि मीं सेइं हथ लाव?”

32 पन यीशु तैस हेनेरे लेइ, ज़ैनी एरू कियोरू थियू, च़ेवरे पासन तकने लगे ।

33 तैखन तै कुआन्श डरती ते थकती थी, किजोकि तै ज़ानती थी कि तैसां मूसेरो कानून दलोडरोए । तै अगगर आई ते यीशुएरे पावन पुड़ बिछ्छडतां, तैस सेइं सैरी गल्लां सच्च-सच्च ज़ोने लगगी ।

34 पन यीशुए तैस सेइं ज़ोवं, “हे कुईए, तेरे विश्वासे, ज़ै तीं मीं पुड़ रखवोरो, तैनी तू वज्झाई । खुशी सेइं घरजो गा, ते हुनी तू एस बिमारी केरां वेची जेई ।”

35 ज़ताली यीशु ई गल मसां ज़ोई राओरो थियो, तैखन प्रार्थना घेरे लीडेरे घेरां किछ्छ मैनेई एइतां तैस सेइं ज़ोवं, “तेरी कुई मेरि जोरीए, हुनी गुरू किजो तकलीफ देतस?”

36 पन यीशुए तैन केरि गल न शुन्तां प्रार्थना घेरे लीडेरे सेइं ज़ोवं, “न डर । सिर्फ मीं पुड़ विश्वास रख ।”

37 यीशु ते याईर च़लने लगगे, पन यीशुए पतरस, याकूब ते तैसेरो दूला यूहन्नारे अलावा, होरो कोई एप्पू सेइं साथी एजने न दित्तो ।

38 प्रार्थना घेरे लीडेरे घेरे मां पुज्जां यीशुए हल्लो मच़ोरो लाव ते कने लोक बडे लेरां देते त शोग करते लाए ।

39 तैखन यीशुए घरे मां गेइतां तैन सेइं ज़ोवं, “तुस किजो रोलो मचातथ त लेरां देतथ? कुई मर्रीं नईं, पन झुल्लोरीए ।”

40 ज़ैखन तैन लोकेईं एन शुनु, त तैना तैसेरो मज़ाक बनाने लगगे, किजोकि तैना ज़ानते थिये कि कुई मेरि जोरीए । तैखन यीशुए सारे मैन्हु तैट्टां केढतां, सिर्फ कुईअरे हाज-बव त कने अपने ट्लाई चेलन सेइं साथी कमरेरे अन्तर जेव, ज़ेड़ी कुई पेवरी थी ।

41 तैखन यीशुए कुईएरो हथ ट्लेइतां तैस सेइं अपनि भाषाईं मां ज़ोवं, “तलीता कूमी!” ज़ेसेरो मतलब कि, “हे निकडी कुईए, अवं तीं सेइं ज़ोतईं, खडी उट!”

42 अकदम कुई उटतां च़लने फ़रने लगगी, किजोकि तै कुई 12 सालां केरि थी । एन हेरतां तैना बड़े हैरान भोए ।

43 पन यीशुए तैन हुकम देइतां ज़ोवं कि, “ए गल केन्ची सेइं न ज़ोइयथ । एस कुईए किछ खाने जो देथ ।”

6

—————
 [कुरुकरांतो १३:५३-५८; १४:१६-३०]

(१३:५३-५८; १४:१६-३०)

1 तैल्ला पत्ती, यीशु तैट्टां निस्तां अपने नगर नासरते जो जेव । तैसेरे चले तैस सेइं साथी च़ले ।

2 आरामेरे दिहाड़े, यीशु तैन केरे प्रार्थना घरे मां गेइतां तैन लोकन परमेशेरी गल्लां केरि शिक्षा देने लागो । तैसेरी शिक्षा शुन्तां बड़े लोक हैरान भोए ते एक्की होरि पुछ्ने लगगे, “एनी मैने एना गल्लां कोट्टां शिखी? एस एतरी अक्ल कोट्टां आई? एस एतरे चमत्कार केरनेरी शक्ति कोट्टां मैल्ली!”

3 ए त ट्लखान आए, ज़ैन मरियमारू मट्टू आए । ए त याकूब, योसेस, यहूदा, ते शमौनेरो दूला आए! एसेरी वेइनां भी इशशे इड़ी रेइचन!” एल्हेरेलेइ तैनेई यीशुएरो इन्कार कियो ।

4 तैखन यीशुए तैन लोकन अक कहावत ज़ोई, “नबी बेडींए लोकन मां इज्जतदार भोलो, पन अपने नगरेरे लोकन केरां ते कने अपने रिश्तेदारन केरां त कने अपने घरेबालन मां वेइज्जत भोलो ।”

5 तैन लोकेईं यीशु पुड़ विश्वास न केरनेरे वजाईं सेइं, तैनी तैस नगरी मां सिर्फ थोडे ज़ेरे बिमार मैनु पुड़ हथ रेखतां तैना बज्झाए, तैन केरे अलावा होरो कोई चमत्कार न केरि सको ।

6 यीशु नासरत नगरेरे लोकां केरो अविश्वास हेरतां हैरान भोव । तैल्ला पत्ती, तै अपने चेलन सेइं साथी च़ेवरे पासन केरे इलोव्वन मां परमेशेरी गल्लां केरि शिक्षा देतो राव ।

—————
 [मतेय १०:५-१५; मार्कु ९:१-६]

(१०:५-१५; ९:१-६)

7 तैल्ला पत्ती, यीशुए अपने 12 चले एप्पू कां कुजेइतां, तैन दूई-दूई केरतां भेजने लागो । भेजने केरां पेइले, तैनी अपने चेलन, लोकन मरां भूतां केरो साथो कदनेरो अधिकार दित्तो ।

8 ते तैनी तैन हुकम दित्तो, “बत्तां च़लते-च़लते सोटेरे अलावा होरु किछ न नेइयथ । न रोट्टी न झोलो त कने बेटवे मां पेइसे भी न नेइयथ ।

9 पन बूट लेइयथ, पन दूई-दूई कुरते न लेइयथ ।

10 ज़ैखन तुस केन्ची इलोव्वे मां गाथ, अगर कोई अपने घरे बिश्नेरेलेइ तुसन कुजाए, त तैस्से घरे मां बिश्थथ, ज़ांतगर तैस इलोव्वेरां न निस्सथ ।

11 अगर केन्ची इलोव्वेरे लोक तुसन कबूल न केरन त कने तुशशी गल्लां न शुनन्, त तैट्टां च़लते-च़लते तुस अपने पावां केरि धूड़ झेड़ी छेइडथ* ताके तैन केरे खलाफ गवाही भोए । (अवं तुसन सेइं सत्र ज़ोतईं कि परमेशेरे आदालतरे दिहाड़े बुरे लोकन सज़ा देलो, ज़ैना सदोम त कने

* 6:11 6:11 पावां केरि धूड़ झाड़ा: एरू केरतां, यीशुएरे चले लोकन इतला देतन कि परमेशेरी गल्लां न शुन्नेरे वजाईं सेइं तैनन् सज़ा मैलेली ।

अमोरा नगरन मां रहते थिये। पन ज़ैना लोक तुशशी गल्लां न शुनेले, तैस नगरेरे लोकन परमेशर बड़ी जादे सज़ा देलो)”)

12 यीशुएरो हुकम शुन्नेरे बाद, तैनेई तैट्ठां निस्तां बड़े नगरन मां गेइतां लोकन परमेशेरी गल्लां शुनेई कि, “तुस अपने पापन करां मनफिराथ।”

13 ते तैनेई बड़े लोकन मरां भूतां केरो सायो भी कड्डो, त कने बड़े बिमार मेनन् पुड़ तेल लेइतां बज्जाए।

???????? ???? ?????? ????????????? ???? ?????? ?????? ??????
(???? 14:1-12; ???? 9:7-9)

14 हेरोदेस राजे भी यीशुएरे बारे मां शुनू, किजोकि यीशुएरू नंव मुशूर भोरू थियूं। तैनी यीशुएरे बारे मां ज़ोवं कि, “शायद, यूहन्ना, जै बपतिस्मो देनेवालो थियो, मुडदन मरां ज़ीतो भोरोए। एल्हेरेलेइ, तै एना चमत्कार केरि सकते।”

15 होरेई मैनेई यीशुएरे बारे मां ज़ोवं कि, “शायद, तै मैन्हु एलिय्याह नबी आए!” पन किछ होरेई मैनेई ज़ोवं कि, “तै त पराने ज़मानेरे परमेशेरी गल्लां ज़ोनेवालां केरो ज़ेरो अक नबी आए!”

16 पन हेरोदेस राजे लोकां केरि गल्लां शुन्तां ज़ोवं कि, “तै मैन्हु त यूहन्ना आए, ज़ेसेरी क्रोड़ी मीं कट्टेवरी थी। तै मुडदन मरां ज़ीतो भोरो आए!”

17 हेरोदेस राजे एन्चरां सोचू, किजोकि थोड़े दिहाइना पेइले, तैनी एप्पू अपने सिपाही भेजतां यूहन्ना कैद केरतां छड्डोरो थियो। तैनी अपने दूला फिलिप्पुसेरी लाड़ी हेरोदियासेरी वजाई सेइ एन्चरां कियोरू थियूं, ज़ैस सेइ तैनी इला बनोरो थियो।

18 एल्हेरेलेइ, यूहन्ना हेरोदेस राजे सेइ बार-बार ज़ोतो थियो कि, “तीं अपने दूलाएरी लाड़ी सेइ इला बनानो जेइज नई।”

19 तैल्हेरेलेइ हेरोदियास रानी यूहन्ना सेइ दुश्मनी रखती थी ते तैस कल्ल केरनो चाती थी। पन तै तेन्चरां न केरि सकती थी,

20 किजोकि हेरोदेस राजे पतो थियो कि यूहन्ना अक धर्मी ते पवित्र मैन्हु थियो। तैल्हेरेलेइ, हेरोदेस राजो तैसेरी बड़ी इज्जत केरतो थियो त कैदखाने मां हेरोदियास रैनी केरां बचेइतां रखतो थियो। त तै यूहन्नारी गल्लां शुन्तां बड़ी डरतो थियो, पन तैसेरी गल्लां खुशी सेइ शुन्तो भी थियो।

21 आखकार यूहन्ना मारनेरो ठीक मौको मैल्लो। हेरोदेस राजे अपने ज़रमेरी दिहाड़ी मां अक धाम रखी। तैस धामी मां तैनी अपने बड़े खास अफसरन, त कने फौजी अफसरन, त कने गलील इलाकेरे बड्डे-बड्डे मैन्हु कुजाए।

22 तैखन हेरोदियास रैनेरी कुई तैस कमरे मां आई, ज़ेड़ी तैना बिशारे थियो। त तैसां तैड़ी नेचतां हेरोदेस राजो त कने तैसेरे मेहमान खुश किये। तैखन राजे कुईए सेइ ज़ोवं, “ज़ैन तू चास मीं केरां मग, अवं तीं देलो।”

23 त राजे तैस कुईए सेइ कसम भी खाइ कि, “ज़ैन किछ तू मीं केरां मग्गेली, अवं तीं देलो, इड़ी तगर कि अवं अपनू अधू राज भी देलो।”

24 तैल्हेरेलेइ तैस कुइयां बेइर गेइतां, अपनि अम्मा पुच्छू, “अवं हेरोदेस राजे केरां कुन मेग्गी?” तैखन तैसेरी अम्मा ज़ोवं, “यूहन्ना बपतिस्मो देनेवालेरी क्रोड़ी मग।”

25 अकदम तै कुई अन्तर राजे कां आई त तैस कां मिन्नत की, “अवं चाताई कि, तू यूहन्ना बपतिस्मो देनेवालेरी क्रोड़ी केटतां एक्की थाले मां हुन्ना आन।”

26 तैसेरी गल शुन्तां राजो बड़ी दुखी भोव, पन अपनि कसमेरे वजाई सेइ त कने अपने मेहमानां केरे वजाई सेइ तैने इन्कार केरनो न चाव।

27 तैल्हेरेलेइ, तैनी अकदम एक्की सिपाही हुकम दित्तो कि, “यूहन्नारी क्रोड़ी केटतां आन।”

28 सिपाही कैदखाने मां गेइतां यूहन्नारी क्रोड़ी कट्टाई, त एक्की थाले मां रखतां आनी त कुईए कां दित्ती। त कुइयां गेइतां अपनि अम्मा कां दित्ती।

29 ए गल शुन्तां यूहन्नारे चले तैडी आए, त तैसेरी लाश नेइतां कबरी मां देव्वी छुड्डी ।

30 परमेशेरी गल्लां लोकन शुनानेरे पत्ती, यीशुएरे परेरित तैस कां वापस आए, जैना तैनी भेजोरे थिये । जैन किछु तैनेई लोकन सेइं कियोरू ते शिक्षा दित्तोरी थी, तैन सारी गल्लां यीशु सेइं शुनाई ।

31 बडे लोक यीशु त कने तैसेरे चलन कां एइते गाते थिये । एस वजाई सेइं, तैनन रोट्टी खानेरे लेइ भी मौको न थियो मैल्लोरो । तैल्हेरेलेइ यीशुए अपने चलन सेइं ज़ावं, “मीं सेइं साथी केन्ची अकेन्ती ठैरी एज्जा, त थोडो जेरो आराम केरा ।”

32 एल्हेरेलेइ तैना किशती मां च्चेदतां, अकेन्ती ठैरी च्चेलि जे ।

ⓂⓂⓂⓂ ⓂⓂⓂⓂⓂⓂⓂⓂ ⓂⓂⓂⓂⓂⓂ 5000 ⓂⓂⓂⓂⓂ ⓂⓂⓂⓂⓂⓂ ⓂⓂⓂⓂⓂⓂⓂⓂ

(ⓂⓂⓂⓂⓂ 14:15-21; ⓂⓂⓂⓂⓂ 9:11-17; ⓂⓂⓂⓂⓂⓂⓂ 6:1-14)

33 पन बडे लोकई यीशु त तैसेरे चले गाते लेइतां पिशानी छुड्डे कि तैना कोरां च्चलोरन । तैल्हेरेलेइ, सारे नगरेरे मैन्हु पैदल दौइतां तैन केरां पेइले तैडी पुज्तां अकोट्टे भोए ।

34 जैखन यीशु किशती पुडेरां ओस्सो, त तैनी मैन्हु केरि अक बडी भीड लेइतां तैन पुइ तरस खाव, किजोकि तैना मैन्हु तैन भेइडां केरे ज़ेरे थिये, जैन केरो कोई पुहाल न भोए† । तैखन यीशु तैन लोकन परमेशेरे राऊजेरे बारे मां वेइि गल्लां केरि शिक्षा देने लगे ।

35 जैखन दिहाडी डुबने लग्गोरी थी, त यीशुएरे चलेई तैस कां एइतां ज़ावं, “ई सुनसान ठार आए, ते च्चिर भी बडू भोरू आए ।

36 एन मैनन् भेज्ज, ताके एना च्चेवरे पासां केरे वेस्तन त कने इलोव्वन मां गोइतां अपने लेइ खाने जो रोट्टी घिन्ना ।”

37 पन यीशुए तैनन् जुवाव दित्तो कि, “तुस्से एन खाने जो रोट्टी देथ ।” पन तैनेई तैस सेइं ज़ावं, “कुन अस दूई शौव दिहाडी केरि कमाई सेइं रोट्टी घिन्तां एन मैनन् खुवाम? एन न भोइ सके!”

38 एल्हेरेलेइ, यीशुए तैन सेइं ज़ावं, “तुसन कां केत्तरी रोट्टी आन? गेइतां हेरा ।” पतो केरनेरे पत्ती, तैनेई यीशु सेइं ज़ावं कि, “पंच रोट्टी त कने दूई मेछली आन ।”

39 तैखन यीशुए अपने चलन हुक्म दित्तो कि, “सारे मैन्हु नीले घासे पुइ बिशाला ।”

40 एल्हेरेलेइ तैना मैन्हु शौव-शौव त कने पज्जां-पज्जां केरि हुन्डी मां विश्शी जे ।

41 तैखन यीशुए अपने हथ्थे मां पंच रोट्टी ते दूई मेछली टलेइ, त अम्बरेरे पासे तेकतां शुक्र कियूं । तैल्ला पत्ती, यीशु तैना रोट्टी टलोइतां चलन कां देते जेव कि लोकन खाने जो देन । तेन्चरां दूई मेछली भी तैन सारे लोकन वेंटी दित्ती ।

42 ते सारे मैन्हु खेइतां रेऊजी जे ।

43 तैल्ला पत्ती, यीशुएरे चलेई वेच्चोरी रोट्टी त कने मेछली केरे टुकइन सेइं 12 टोकरि भेरि ।

44 जैनेई रोट्टी त मेछली खेइ, तैन मां 5000 मडद थिये ।

ⓂⓂⓂⓂ ⓂⓂⓂⓂⓂⓂⓂⓂⓂⓂ ⓂⓂⓂⓂ ⓂⓂⓂⓂ ⓂⓂⓂⓂⓂⓂ

(ⓂⓂⓂⓂⓂ 14:22-33; ⓂⓂⓂⓂⓂⓂⓂ 6:15-21)

45 तैल्ला पत्ती, यीशुए अपने चलन हुक्म दित्तो कि, “तुस किशती मां च्चेदतां मीं केरां पेइले समुन्दरेरे उस पार बैतसैदा नगरे जो च्चली गाथ, ज़ांतगर अवं एन लोकन न भेज्जी ।” त तैना तैट्टां जे ।

46 लोकन भेजनेरे पत्ती, यीशु तैट्टां निस्तां नेडे एककी पहैडी पुइ प्रार्थना केरनेरे लेइ जेव ।

47 जैखन इलोझ भोइ, त तै किशती, जैस मां यीशुएरे चले थिये, समुन्दरेरे मझाटे थी, त यीशु अकैल्लो ज़मीनी पुइ थियो ।

48 तैनी हेरू कि तैसेरे चले किशती मां च्चेप्पू देइ-देइ परेशान भोने लग्गोरेन, किजोकि एग्रोवरां बडी तेज्ज हवा च्चलोरी थी ।

† 6:34 6:34 यानी तैनन् परमेशेरी गल्लन पुइ च्चलानेवालो कोई न थियो ।

लगभग झेञ्जेरे चेवरे बजेई जैखन हेजू आंधरू थियूं, यीशु समुन्दरेरे पैनी पुड च़लतां अपने च़लन कां अव । तै तैन केरां अगरोवं निस्नु चातो थियो ।

49 पन ज़ैखन तैनेई यीशु समुन्दरेरे पैनी पुड च़लतो लाव, त तैनेई सोचो कि तै भूत आए । तैह्हेरेलेइ, तैनेई चिन्डां मैरी,

50 किजोकि तैना सारे तैस हेरतां बडे डेरि जोरे थिये । पन तैनी अकदम तैन सेइं गल्लां की ते ज़ोवं, “हिम्मत रखा! अवं आई । डरा न!”

51 तैखन तै तैन केरि किशती मां च़दो, ते तूफान च़लनो बन्ध भोइ जेव । तैखन च़ेले बडे हैरान भोए,

52 किजोकि तैनेई न थियूं समझोरू कि यीशु केन्च़रां रोट्टी त कने मेछली बधोरी थी, पन तैन केरे मन बेसमझ भोरे थिये ।

~~~~~  
 (~~~~~ 14:34-36)

53 तैल्ला पत्ती, यीशु त तैसेरे च़ेले गलील समुन्दर पार केरतां गन्नेसरत नंब्बेरे जगई पुड पुञ्जे । तैडी तैनेई किनारे पुड किशती बंधतां रखी ।

54 ज़ैखन तैना किशती पुडेरं ओस्से, त तैट्टेरे लोकेई यीशु पिशैनी छुडो ।

55 एह्हेरेलेइ, तैनेई सारे इलाके मां गेइतां लोकन खबर शुनाई कि यीशु ओरोए । ज़ेडी-जेडी लोकेई शुनु कि यीशु ओरोए, तैडी लोकेई बिमार मैन्हु खट्टी पुड छुडतां यीशु कां आन्ने लगो, ताके तै तैनन् बञ्झाए ।

56 ज़ेडी कोन्ची इलोव्वन मां, नगरन या बेस्तन मां यीशु गातो थियो, तैडी लोक बिमार मैनन् बज़ारन मां यीशु कां एन्ता रखते थिये । तैना यीशु सेइं मिन्त केरते थिये कि, तैन सिर्फ तैसेरे लिगडे सेइं हुने देन । ज़ेत्तेरे बिमार मैन्हु यीशु सेइं हथ लाते थिये, तैना सारे बेञ्झोते थिये ।

## 7

~~~~~  
 (~~~~~ 15:1-9)

1 एक्की दिहाडे किछ फरीसी लोक त कने शास्त्री लोकन मरां किछ लोक, ज़ैना यरूशलेम नगरेरां ओरे थिये यीशुए कां अकोट्टे भोए ।

2 ते तैनेई हेरू कि यीशुएरे किछ च़ेले रीति रुवाज़ेरे खलाफ अधोए हथ्यन सेइं रोट्टी खेइ राओरेन ।

3 किजोकि फरीसी लोक त कने सारे यहूदी लोक, ज़ांतगर हथ न धोन तांतगर रोट्टी न खाते थिये । अपने बुजुर्गां केरि परमपरा च़लानेरे लेइ तैना एन्च़रां केरते थिये ।

4 ज़ैखन तैना बज़ारेरां घरे एइते थिये, ज़ांतगर तैना निहान न देन तांतगर रोट्टी न थिये खाते । होरे भी बडे रीति रुवाज़ थिये, ज़ैना तैन केरे बुजुर्गन केरां ओरे थिये, ज़ेन्च़रां कटोरे, घडे, ट्लामेरां भांडां रुवाज़ेरे मुताबिक धोना ।

5 एह्हेरेलेइ फरीसी लोकेई त कने शास्त्री लोकेई यीशु पुच़छू, “तेरे च़ेले इशशे बुजुर्गां केरि परमपरा पुड की न च़लन? पन तैना रुवाज़ेरे खलाफ अधोए हथ्यन सेइं रोट्टी खातन!”

6 तैखन यीशुए तैन सेइं ज़ोवं, “बडे पेइले यशायाह नेबे तुशशे ज़ेरे पाखंडी केरे वारे मां ठीक भविष्यवाणी कियोरीए कि परमेशेरे ज़ोवं,

एना लोक ऐशी सेइं त मेरी बडी तारीफ़ केरतन,

पन एन केरे दिल मीं केरां बडे दूर आन ।

7 एना बेफाइदी मेरी आराधना (पूजा) केरतन,

किजोकि एना त मैन्हु केरि बनोरी परमपरान, परमेशेरेरे हुक्मां केरे ज़ेरे लोकन शिक्षा देतन ।”

8 तैखन यीशुए तैन सेइं ज़ोवं, “तुस भी तैन लोकां केरे ज़ेरे आथ, ज़ैना परमेशेरे हुक्मन टेलतां मैन्हु केरि बनोरी परमपरान मन्तन, ज़ेन्चरां घडे त कने कटोरे रुवाज़ेरे मुताबिक धोने, त कने एसेरे ज़ेरे होरे भी बडे रुवाज़न मन्तथ।”

9 फिरी तैनी तैन सेइं ज़ोवं, “तुस केतूरू गलत केरतथ, कि अपने रीति-रुवाज़ मन्नेरे लेइ परमेशेरे हुक्म टलोइतथ।

10 किजोकि मूसा नेबे ज़ोरूए कि, परमेशेरे सारी मैनन ई हुक्म दित्तो कि, ‘तू अपने हाज बव्वेरी केरि इज़्जत केर। त ज़ै कोई अपने हाज बव्वे जो बुरू ज़ोलो, तै ज़रूर मारो गालो।’

11 पन तुस ज़ोतथ कि अगर कोई मैन्हु अपने हाज बव्वे सेइं सिर्फ एन ज़ोए, त तैन बडू आए कि, ‘भीं करां ज़ै किछ् महत तुसन मैल्ली सकती थी, तै पेइली बलिदान भोरीए, यानी परमेशेरे जो च़दतल च़ादोरीए। एल्हेरेलेइ, अवं तुसन किछ् न देइ सकी।’

12 एरी शिक्षा देइतां तुस लोकन तैन केरे हाज बव्वां केरि किछ् महत केरने न देथ।

13 एन्चरां तुस अपनि परमपरा च़लानेरे लेइ, परमेशेरेरी गल्लां टेली छ्इतथ। एरी ज़ेरि तुस होरि भी बंडि गलत परमपरा मन्ते ओरेथ।”

~~~~~  
 (~~~~~ 15:10-20)

14 तैखन यीशुए फिरी सारे लोक एप्पू कां कुजेइतां तैन सेइं ज़ोवं, “तुस सारे लोक, मेरी गल ध्याने सेइं शुना ते समझा।

15 एरी कोई चीज़ नई ज़ै बेइरेरां मैनेरे अन्तर गेइतां तैस ज़ुट्टो केरे। पन ज़ैना बुरी चीज़ां मैनेरे अन्तरां, यानी तैसेरे दिले मरां बेइर निस्चन, तैन्नां तैस ज़ुट्टो केरचन।

16 अगर कोई समझनो चाते, त तै ध्याने सेइं शुने!”

17 बादे मां, यीशु मैन्हु केरि भीड़ी मरां घरे जो जेव। तैखन तैसेरे चेलैई तैस मिसालारे मतलबेरे वारे मां तैस पुच्छू।

18 तैनी तैन सेइं ज़ोवं, “होरि मैन्हु केरे ज़ेरे कुन तुस भी न समझथ? कुन तुस न समझथ कि ज़ै चीज़ बेइरां मैनेरे अन्तर गाचे, तै तैस ज़ुट्टो न केरि सके?

19 किजोकि तै तैसेरे दिले मां नई, पन तैसेरे पेटे मां गाचे ते बादे मां पेटे मरां निस्सी गाचे!” एन ज़ोइतां यीशुए समझावं कि खानेरी चीज़ कोई भी असन ज़ुट्टो न केरे।

20 तैखन तैनी अपने चलन सेइं ज़ोवं, “ज़ैन मैनेरे अन्तरेरां निस्ते, तैन्ने परमेशेरेरी नज़री मां मैन्हु ज़ुट्टो केरते,

21 किजोकि मैनेरे अन्तरेरां, यानी मैनेरे दिले मरां बुरे खियाल, बदमाशी, चोरी, कत्ल केरनो,

22 अइलाए देइने गलत कम केरनू, लालच, दुष्ट कम केरनू, बेइमानी, बदचलन, जलन, तुहीन, घमण्ड, ते बेवकूफी एच्चन।

23 एना सैरी बुरी गल्लां मैनेरे अन्तरेरां, यानी दिले मरां निस्तां मैन्हु ज़ुट्टो केरचन।”

~~~~~  
 (~~~~~ 15:21-28)

24 तैल्ला पत्ती, यीशु तैट्टां निस्तां सूर त सैदा नगरेरे आसेपासेरे इलाकेरे नेडे अव। ते तैड़ी ते एककी घरे मां जेव। ते तै चातो थियो कि कोई न ज़ैनी सके कि अवं इड़ी आई। पन तै छेप्पी न सको।

25 तैड़ी अक कुआन्श थी, ज़ेसेरी निकड़ी कुईए पुड़ भूतेरो सायो थियो। ते यीशुएरे वारे मां शुन्तां अकदम तैड़ी आई ते तैसेरे पावन पुड़ पेई।

26 त तै कुआन्श गैर कौमरी थी ते सुरूफिनिकी इलाकेरी थी। तैसां यीशु सेइं मिन्नत की कि, “मेरी कुईए पुड़ेरां भूतेरो सायो केइडी देथ।”

27 पन यीशुए तैस सेइं ज़ोवं, “पेइले बच्चन रज़ने दे, किजोकि बच्चा* केरि रोट्टी नेइतां कुतरन जो देनी ठीक नई!”

28 तैसां जुवाब दित्तो, “सच्चे, प्रभु! पन कुतरां भी मेज़े हेठोरां बच्चां केरि रोट्टन मरां बिछड़ोरे टुकड़े खातन।”

29 तैखन यीशुए तैस सेइं ज़ोवं, “मीं पुड़ तीं एतरो विश्वास रख्वोरोए, एल्हेरेलेइ तू आरामे सेइं घरे जो गा। तेरी कुईए मरां भूतेरो सायो निस्सी जोरोए।”

30 तैसां कुआन्शां तैट्ठां अपने घरे वापस एइतां हेरू कि कुई खट्टी पुड़ आरामे सेइं झुल्लोरी थी, त भूतेरो सायो तैस मरां निस्सी जोरो थियो।

~~~~~

31 यीशु फिरी अपने चेलन सेइं साथी सूर त सैदारे नगरेरे इलाकन मरां निस्तां, दिकापुलिस इलाके मामेइं भोइतां गलील समुन्दरेरे नेड़े पुज्जो।

32 तैड़ी किछ लोकेई अक टोवो मैन्हु, जै खेख्वो भी थियो, यीशु कां एन्तां तैस सेइं मिन्नत की कि, “तू अपनो हथ एस पुड़ रख कि ए मैन्हु बेज्झोए।”

33 यीशुए मैन्हु केरि भीड़ी मरां तै मैन्हु अलग नीयो। तैखन तेनी अपनि एंगलोई तैस मैनेरे कन्न मां छेइडी, त अपनि एंगलोई सेइं थुक तैस मैनेरी जिभ्भी सेइं लावं।

34 तैल्ला पत्ती, यीशु अम्बरेरे पासे तेकतां ओशा छेइडो, त तैस मैन्हु सेइं अपनि (इब्रानी) भाषाई मां ज़ोवं, “इप्फत्तह!” ज़ेसेरो मतलब “खुल्ली गा!”

35 अकदम तै रोड़ेचारे शुन्ने लगे ते तैसेरी जिभ भी ठीक भोइ जेई, ते तै साफ-साफ गल्लां केरने लगे।

36 तैखन यीशुए तैन मैन्हु हुकम दित्तो कि, “ए गल केन्वी सेइं न ज़ोइयथ।” पन ज़ेतूरू जादे यीशुए तैन हुकम दित्तोरो थियो, तेतूरू जादे तैना होरि लोकन ए गल शुनाने लगगे।

37 यीशुएरे चमत्कारेरां कम्मां केरे वजाई सेइं, तैना बड़े हैरान भोइतां ज़ोने लगगे, “कमाल आए! यीशुए ज़ैन किछ भी कियूं सब किछ रोडू कियोरूए! तै टोवन्न शुन्नेरी ते लट्टन गल्लां केरनेरी शक्ति देते।”

## 8

~~~~~

1 तैन दिहाइन मां एरू भोव कि, मैन्हु केरि बड़ी भीड़ यीशु कां फिरी अकोट्टी भोइ। तैन कां किछ खाने जो न थियूं। तैखन यीशुए अपने चले एप्पू कां कुजेइतां तैन सेइं ज़ोवं,

2 “मीं एन मैन्हु केरि भीड़ी पुड़ तरस एइते, किजोकि एना ट्लेइ दिहाइं केरे देंते मीं सेइं साथी आन, ते एन कां खाने जो किछ नईं राओरू।

3 अगर अवं एन दलुख्वोरे घरे जो भेज़ी, त च़लते-च़लते बत्ती मां थेकतां रेइ गानेन, किजोकि एन मरां कोई-कोई दूरेरां भी आन।”

4 तेसेरे चलेई तैस जुवाब दित्तो, “इड़ी सुनसान ठैरी एन मैन्हु जो एतरी रोट्टी कोट्टां आनम कि एन मैन्हु रेज़तां खान?”

5 तैखन यीशुए तैन पुच्छू, “तुसन कां केतरी रोट्टी आन?” तैनेई जुवाब दित्तो, “सत रोट्टी आन।”

* 7:27 7:27 एस कहावती मां, यीशु यहूदी लोकां केरि तुलना बच्चन सेइं करेते, त गैर यहूदी लोकां केरि तुलना कुतरन सेइं करेते। तैस कुआन्शारे विश्वासेरी अज़मैइश केरनेरे लेइ यीशुए एन्चरां ज़ोवं।

6 तैखन यीशुए मैन्हु केरि भीड़रे पासे मुडतां तैन जो हुक्म दित्तो कि, “जमीनी पुड़ बिश्शी गाथ ।” तैखन तैनी तैन सत रोट्टी दलेइतां परमेशेरू शुक्र केरतां दलोड़ी, ते अपने चलन कां देते जेव कि तैना लोकन खाने जो देन । ते चलेई मैनन् रोट्टी दित्ती ।

7 तैन कां थोड़ी जेरि निक्की मेछली भी थी । यीशुए मेछली केरे लेइ भी परमेशेरू शुक्र केरतां अपने चलन सेइं ज़ोवं, “इना भी लोकन खाने जो देथ ।” तेन्त्रां तैसेरे चलेई कियूं ।

8 तैना सारे मैन्हु रोट्टी खेइतां रेज्जी जे । तैल्ला पत्ती, यीशुएरे चलेई मेछली त कने रोट्टी केरे बच्चोरे टुकड़न मरां सत टोकरे भेरतां सल्ले ।

9 तैड़ी लगभग 4000 मडद थिये । लोकन रोट्टी खुवानेरे पत्ती यीशुए मैन्हु भेज्जी दित्ते ।

10 तैखन तै अकदम अपने चलन सेइं साथी किशती मां ज़ेदतां दलमनूता इलाके जो चलो जेव ।

Matthew 16:1-4

11 फिरी किछ फरीसी लोक यीशु कां एइतां तैस सेइं बेंस करेने लग्गे । तैना तैस अज़मानेरे लेइ तैस पुछ्छने लग्गे, “असन अम्बेरां कोई निशान* हिरा ।”

12 जैखन यीशुए एन शुन्, त तैनी अक बड़डो ओशा छेइतां ज़ोवं, “इस ज़मानेरे लोक मीं केरां किजो निशान मगतन! अवं तुसन सेइं सन्न ज़ोतई कि इस ज़मानेरे लोकन, यानी तुसन अवं कोई भी निशान न हिरैई ।”

13 तैल्ला पत्ती, यीशु तैन लोकन छेइतां, फिरी किशती मां ज़ेदो ते गलील समुन्दरेरे पार चलो जेव ।

Matthew 16:5-12

14 जैखन यीशुएरे चले किशती मां ज़ेद, त तैना एप्पू सेइं साथी रोट्टी नेनी बिसरी जे । किशती मां तैन कां अक्के रोट्टी थी ।

15 जैखन तैना समुन्दरे पार केरि राओरे थिये, त यीशुए तैन समझावं कि, “खबरदार! फरीसी लोकां केरे खमीरिरे† बारे मां ते कने हेरोदेस राजेरे खमीरिरे बारे मां होशियार रेइयथ ।”

16 चले यीशुएरी गल गलत सेमझतां एप्पू मामेइं गलबात केरने लग्गे कि, “असन कां त रोट्टी नई, एल्हेरेलेइ यीशुए एन्त्रां ज़ोवं ।”

17 तैखन यीशुए तैन केरि गल ज़ेनतां, तैन सेइं ज़ोवं, “तुस एप्पू मामेइं एन्त्रां किजो सोची राओरेथ कि असन कां रोट्टी नई? कुन तुस हेजू भी मेरी गल न समझी ते कने न बुझी? कुन तुशे मन बेसमझ भोइ जोरेन?”

18 कुन तुसन एछ्छी भोइतां भी न लेइहोए? ते कन भोइतां भी न शुनोए? कुन तुसन याद नई?

19 ज़ताली 5000 मैन्हु केरे लेइ पन्न रोट्टी दलोइतां दित्तोरी थी, त तुसेईं बादे मां बच्चोरी रोट्टी केरे केतरे टोकरे भेरतां सल्लोरे थिये?” तैनेई तैस जुवाब दित्तो, “बारह टोकरे ।”

20 तैखन तैनी तैन पुछ्छ, “ज़ताली मीं 4000 मैन्हु केरे लेइ सत रोट्टी दलोइतां दित्तोरी थी, त तुसेईं रोट्टी केरे केतरे टोकरे भेरतां सल्लोरे थिये?” तैनेई तैस जुवाब दित्तो, “सत टोकरे ।”

21 तैखन तैनी तैन पुछ्छ, “कुन तुसन हेजू भी समझ न आई?”

Matthew 16:13-15

22 तैल्ला पत्ती, यीशु त तैसेरे चले बैतसेदा नगर मां आए । लोकेई अक कानो मैन्हु यीशु कां आनो ते तैस कां मिन्नत की कि, “एस मैन्हु सेइं हथ लाथ ताके ए वेज्झोए ।”

* 8:11 8:11 यीशुए पेइले बड़े चमत्कार कियोरे थिये, पन फरीसी लोक तैस पुड़ बिश्वास न कियो । तैना सिर्फ यीशुए गल्लन मां फसानेरे लेइ एन्त्रां सवाल पुछ्छते थिये । † 8:15 8:15 इडी खमीरिरो मतलब गलत शिक्षा आए, पन यीशुएरे चलेई तैसेरी गल न समझी ।

23 तैखन यीशुए तैस काने मैनेरो हथ टलेइतां इलोंव्वे केरां बेइर नीयो। तैखन तैनी तैस काने मैनेरी एछ्छन पुइ थुक्तां, तैस पुइ हथ रखे, ते तैस पुच्छू, “कुन तू किछ लातस?”

24 तैखन तैनी मैने उबरे तेकतां ज़ोवं, “हाँ, अवं मैनन् हेरी सकतई, तैना मीं ज़लते बुट्टां केरे ज़ेरे लेइहोतन।”

25 तैखन यीशुए दुइयोवं हटे तैसेरी एछ्छन पुइ हथ रखे। तै कानो ध्याने सेइं लाने लगो। तैसेरी एछ्छी ठीक भोइ जेई, त तै सब किछ साफ-साफ हेरने लगो।

26 तैल्ला पत्ती, यीशुए तै मैन्हु एन ज़ोइतां घरे जो भेजो, “तू इस इलोंव्वे मां पाव भी न रेखां (ते कने ई गल केन्वी सेइं न ज़ोइयां।)”

📖📖📖📖📖📖📖📖📖📖📖📖📖📖📖📖📖

(📖📖📖📖 16:13-20; 📖📖📖📖 9:18-21)

27 तैल्ला पत्ती, यीशु ते तैसेरे चले बैतसैदा नगरे मरां निस्तां कैसरिया-फिलिप्पी नंव्वेरे नगरेरे इलोंव्वन मां ज़ेलि जे। बत्तां ज़लते-ज़लते यीशुए अपने चेलन पुच्छू, “ज़ैखन लोक मेरे बारे मां गल्लां केरतन, त तैना मेरे बारे मां कुन ज़ोतन कि अवं कौन आई?”

28 तैसेरे चलेईं जुवाब दित्तो, “किछ ज़ोतन कि तू यूहन्ना आस, ज़ै बपतिस्मो देनेवालो थियो, पन किछ होरे मैन्हु ज़ोतन कि तू एलिय्याह आस, ज़ै नबी थियो, पन किछ होरे मैन्हु एन भी ज़ोतन कि तू परमेशेरी गल्लां ज़ोनेबालन मरां अक मैन्हु आस।”

29 तैखन यीशुए अपने चेलन पुच्छू, “पन तुस मेरे बारे मां कुन सोचतथ कि अवं कौन आई?” पतरसे जुवाब दित्तो, “तू मसीहः आस।”

30 त यीशुए तैनन् समझावं कि, “मेरे बारे मां ई गल केन्वी सेइं न ज़ोइयथ।”

📖📖📖📖📖📖📖📖📖📖📖📖📖📖📖📖📖
📖📖📖📖📖📖

(📖📖📖📖 16:21-23; 📖📖📖📖 9:22)

31 तैखन यीशु अपने चेलन शिक्षा देनो लगो कि, “मैनेरे मट्टेरे लेइ, यानी मेरे लेइ एन ज़रूरी आए कि मीं बड़े दुख झल्लनेन। यहूदी लोकां केरे बुजुर्गन, प्रधान याजकन, त कने शास्त्री लोकन केरां अवं निकम्मो समझो गानोई त मारो गानोई। पन टलेइ दिहाइना पत्ती अवं फिरी ज़ीतो भोनोई।”

32 यीशुए एना गल्लां तैन सेइं साफ-साफ ज़ोई। तैखन पतरस तैस अलग नेइतां डांटने लगो, “मसीह न मरे।”

33 पन यीशुए मुइतां अपने बाकी चेलां केरे पासे तक्कू, ते पतरसे सेइं झिडकेइतां ज़ोवं, “हे शैतान, मीं करां दूर भो! (मतलब एन्चरां न सोच! शैतान तीं करां एन्चरां जुवाते) मीं करां दूर भोइ गा। तू परमेशेरी गल्लन पुइ नई, पन मैन्हु केरि गल्लन पुइ मन लातस।”

📖📖📖📖📖📖📖📖📖📖📖📖📖📖📖📖📖
📖📖📖📖

(📖📖📖📖 16:24-28; 📖📖📖📖 9:23-27)

34 तैखन यीशुए अपने चेले त कने मैन्हु केरि भीइ एप्पू कां कुजेइतां सेबन सेइं ज़ोवं, “तुस अगर मेरे चेलो बन्नु चातथ, त तुस अपने आपेरो इन्कारऽ केरा त कने तुस अपनू क्रूस* छुइतां मीं पत्ती ज़ला।

35 किजोकि ज़ै कोई अपनि ज़िन्दगी बचानी चाते, त तै हमेशारी ज़िन्दगी गुवालो। पन ज़ै कोई मेरे वजाई सेइं त कने मेरे बारे मां खुशखबरी हरि लोकन शुनानेरी वजाई सेइं अपनि ज़िन्दगी गुवाते, यानी बलिदान केरते, त तै तैस बचालो, यानी हमेशारी ज़िन्दगी हासिल केरेलो।

‡ 8:29 8:29 मसीहः मतलब की, परमेशेरे तरफां भेजोरो राजो। § 8:34 8:34 इन्कार केरनुः मतलब की, अपनि खुवाइश छुइई देनी कने अपनि मर्जी पुइ नई ज़लनू। * 8:34 8:34 क्रूस छुइतां यीशु पत्ती ज़लनूः मतलब कि, यीशुएरे पत्ती ज़लनेरे वजाई सेइं दुख या मुसीबत झलनेरे लेइ, त मरनेरे लेइ भी तियार भोनु।

36 मैन्हु अगर सारी दुनियाई हासिल केरे त अपनि हमेशारी जिन्दगी गुवाए, त तैस फिरी कुन फेइदो भोलो?

37 मैन्हु अगर अपनि हमेशारी जिन्दगी गुवालो, त गुवानेरे पत्ती तै कुन देइतां तैस वापस घिन्नी सकते?

38 अज्जेरे ज़मानेरे लोक परमेशेरे करां दूरन त कने पापी आन । एस ज़माने मां, अगर कोई मैन्हु मीं करां त कने मेरी गल्लन करां शरमाते, त मैनेरू मट्टू भी, यानी अवं भी तैस करां शरमालो । ज़ेइस अवं अपने बाजी केरि महिमा सेइं साथी त कने पवित्तर स्वर्गदूतन सेइं साथी वापस एज्जलो, त तेइस अवं तैस करां भी शरमालो ।”

9

1 तैखन यीशुए तैन सेइं ज़ोवं, “अवं तुसन सेइं सन्न ज़ोतई कि ज़ैना इडी खडे आन, तैन मरां किछु मैन्हु एरे आन कि ज़ांतगर तैना परमेशेरेरे राज्जेरी शक्ति न हेरेले, तांतगर तैना न मरेले ।”

Matthew 17:1-13; Mark 9:28-36

2 शेइ दिहाइना बाद, यीशु अपने चेले पतरस, याकूब त कने यूहन्ना सेइं साथी एक्की पहाडे पुड ज़दो, जेडी कोई भी न थियो । तैडी तैन केरे सामने यीशुएरी शकल बेदलोई जेई ।

3 तैसेरां लिगडां हियूवेरां ज़ेरां बडां चमकने लगगां कि एत्तेर छित्तां भुआं कि धेरती पुड कोई भी लिगडां धोनेवालो एरां ज़ेरां छित्तां न केरि सके ।

4 तैखन तैडी मूसा नबी त कने एलिय्याह भी यीशु सेइं साथी लेइहोए । ते तैना यीशु सेइं गल्लां करेने लगगे ।

5 ज़ैखन पतरसे एन हेरू, त तैनी यीशु सेइं ज़ोवं, “हे गुरु, इशू इडी रानू रोडू आए! एल्हेरेलेइ, अस ट्लाई डेरे बनाम, अक तेरे लेइ, अक मूसेरे लेइ, त कने अक एलिय्याहरे लेइ ।”

6 पतरसे एन्चरां एल्हेरेलेइ ज़ोवं किजोकि तैस पतो न थियो कि कुन ज़ोई, किजोकि तै त कने होरे दूई चेले भी बडे डेरि ज़ोरे थियो ।

7 तैखन तेडी तैन पुड बिदलार आई ते तैस बिदलारी मरां परमेशेरेरी आवाज आई, “एन मेरू ट्लारू मट्टू आए । ध्याने सेइं एसेरी गल शुना!”

8 अकदम, ज़ैखन यीशुएरे चेलेई च़ेवरे पासन तक्कू, त यीशुएरे अलावा तैडी तैन कोई भी न लेइहोव ।

Matthew 17:1-13; Mark 9:28-36

9 पहाडे पुडरां ओस्ते-ओस्ते यीशुए अपने चलन हुक्म दित्तो कि, “ज़ांतगर मैनेरू मट्टू, यानी अवं, मेरतां ज़ीतो न भोई, तांतगर ज़ैन किछु तुसेई पहाडे पुड लावरूए, तैन केन्ची सेइं न ज़ोइयथ ।”

10 तैनेई तैन केन्ची सेइं न ज़ोवं, ते तैना एप्पू मामेई गलबात केरेने लगगे कि, “मेरतां ज़ीतो भोनेरो कुन मतलब भोइ सकते ।”

11 तैखन तैनेई यीशुए पुच्छू, “शास्त्री लोक किजो ज़ोतन कि मसीहरे एजनेरां पेइले एलिय्याह नेवेरू दुनियाई मां एजनु ज़रूरी आए?”

12 यीशुए तैन जुवाब दित्तो, “ते तै सन्न ज़ी गल आए कि मसीहरे एजने केरां पेइले एलिय्याह एजतां सेरी गल्लां ठीक केरनिन । पन परमेशेरेरी किताबी मां मैनेरे मट्टेरे बारे मां, यानी मेरे बारे मां एन किजो लिखोरूए कि, भीं बडे दुख झल्लनेन त लोक मीं निकम्मा समझेले?”

13 पन अवं तुसन सेइं ज़ोतई कि “एलिय्याह” त पेइले ओरोए, (यूहन्ना, एलिय्याहरे जगाई अवं) त ज़ेन्चरां तैसेरे बारे मां परमेशेरेरी किताबी मां लिखोरू थियू, तेन्चरां तैनेई तैस सेइं कियू, यानी ज़ेन्चरां तैना चाते थियो, तेन्चरां तैनेई तैस सेइं बुरू कियू ।”

Matthew 17:14-21; Mark 9:37-43

14 तैल्ला पत्ती, यीशु त तैसेरे टलाई चले पहाडे पुडेरां ओस्तां, होरि चेलन कां पुज्जे, जैना बुन थिये । तैडी एजतां यीशुए तैन चेलन केरे चेवरे पासन मैन्हु केरि बडी भीड लाई । शास्त्री तैन चेलन सेइं बेंस केरि राओरे थिये ।

15 यीशु लेइतां सारे लोक बडे हैरान भोए । तैना तैसेरे पासे दौइतां आए ते तैस जो नमस्कार कियू ।

16 तैखन यीशुए तैन पुचछ्छ, “मेरे चेलन सेइं कुन बेंस केरि राओरेथ?”

17 मैन्हु केरि भीडी मरां एक्की मैने यीशु जुवाब दित्तो, “हे उस्ताद, मीं अपनू मट्टू तीं कां आनेरू थियू, ताके तैन ठीक भोए । किजोकि तैस पुड भूतेरो सायो आए, ते तैस गल केरने न दे ।

18 कोन्वी भी ठैरी तैन भूत मेरे मट्टे टलाते, ते ज़मीनी पुड बिछोइते । तैखन तैसेरे ऐशी मरां शैम्फ एच्वे ते तैन दंत कटते ते ठठमुकर भोइ गाते । मीं तेरे चेलन सेइं ज़ोरू थियू कि, ‘मेरे मट्टे पुडेरां भूतेरो सायो केडडी देथ ।’ पन तेना केडडी न सके!”

19 एन गल्लां शुन्तां यीशुए तैन जुवाब दित्तो, “हे गैर विश्वासी मैनाव! अवं केइस तगर तुसन सेइं साथी रालो? त केइस तगर अवं तुश्शो अविश्वास झैल्ललो? तैस मट्टे मीं कां आनां!”

20 तैखन तैनेई तैन मट्टू यीशु कां आनू । ज़ैखन तैनी भूते यीशु लाव, त तैनी अकदम तैन मट्टू मरोइ, ते मट्टू तल्ले बिछोइ । ते तैसेरी ऐशी मरां शैम्फ निस्ने लग्गी त तैन इलेइने लग्गू ।

21 यीशुए तैसेरे बाजी पुचछ्छ, “ऐसेरी ए हालत केइसेरी देंती आए?” तैसेरे बाजे ज़ोवं, “बचपनेरी देंती ।

22 ऐस मारनेरे लेइ एन भूत बडे बार कधी अग्गी मां ते कधी पैनी मां बिछोइतू राते, पन अगर तू किछ्छ केरि सकतस, त असन पुड तरस खेइतां इश्शी महत केर!”

23 यीशुए तैस मट्टेरे बाजी सेइं ज़ोवं, “तू ए को गल केरतस! अगर तू विश्वास केरस, त एन भोइ सकते । किजोकि मीं पुड विश्वास केरनेबालां केरे लेइ सब किछ्छ भोइ सकते ।”

24 तैस मट्टेरे बाजे अकदम ज़ोरे सेइं लेरां देइतां ज़ोवं, “हे परभु, अवं विश्वास केरतई, मेरी महत केर कि अवं शक न केरि !”

25 ज़ैखन यीशुए हेरू कि बडे लोक दौइतां अकोट्टे भोने लग्गोरेन, त तैनी भूत एन ज़ोइतां डांटू, “हे भूता, ज़ै एस मट्टे टोव्णू त लट्टू बनातस । अवं तीं हुक्म देताई, एस मट्टे मरां निस्सी गा, ते एसमां फिरी कधी भी न एज्जां!”

26 तैखन तैनी भूते चिन्डां मारी त तैन मट्टू मरोइ, फिरी तैन तैस मट्टे मरां निस्सी जेव । त मट्टू मरू ज़ेरू भोइ ज़ोवं, इडी तगर कि बडे लोक ज़ोने लग्गे कि मट्टू मेरि ज़ोवं ।

27 पन यीशुए मट्टेरो हथ टलेइतां खडू कियू । ते मट्टू ठीक भोइतां खडू भोवं ।

28 तैल्ला पत्ती, यीशु ते तैसेरे चले घरे जो जे । ज़ैखन तै अकैल्लो थियो तैखन तैसेरे चेलेई तैस पुचछ्छ, “अस तैस मट्टे मरां भूतेरो सायो की न केडडी सके?”

29 यीशुए तैन सेइं ज़ोवं, “बगैर प्रार्थनारे (त कने बगैर बरत रखनेरे) अलावा, होरि केन्वी तरीके सेइं, तुस एरे ज़ेरे भूतेरो सायो न केडडी सकतथ ।”

17:22-23; 18:41-43, 45, 47, 49, 51, 53, 55, 57, 59, 61, 63, 65, 67, 69, 71, 73, 75, 77, 79, 81, 83, 85, 87, 89, 91, 93, 95, 97, 99, 101, 103, 105, 107, 109, 111, 113, 115, 117, 119, 121, 123, 125, 127, 129, 131, 133, 135, 137, 139, 141, 143, 145, 147, 149, 151, 153, 155, 157, 159, 161, 163, 165, 167, 169, 171, 173, 175, 177, 179, 181, 183, 185, 187, 189, 191, 193, 195, 197, 199, 201, 203, 205, 207, 209, 211, 213, 215, 217, 219, 221, 223, 225, 227, 229, 231, 233, 235, 237, 239, 241, 243, 245, 247, 249, 251, 253, 255, 257, 259, 261, 263, 265, 267, 269, 271, 273, 275, 277, 279, 281, 283, 285, 287, 289, 291, 293, 295, 297, 299, 301, 303, 305, 307, 309, 311, 313, 315, 317, 319, 321, 323, 325, 327, 329, 331, 333, 335, 337, 339, 341, 343, 345, 347, 349, 351, 353, 355, 357, 359, 361, 363, 365, 367, 369, 371, 373, 375, 377, 379, 381, 383, 385, 387, 389, 391, 393, 395, 397, 399, 401, 403, 405, 407, 409, 411, 413, 415, 417, 419, 421, 423, 425, 427, 429, 431, 433, 435, 437, 439, 441, 443, 445, 447, 449, 451, 453, 455, 457, 459, 461, 463, 465, 467, 469, 471, 473, 475, 477, 479, 481, 483, 485, 487, 489, 491, 493, 495, 497, 499, 501, 503, 505, 507, 509, 511, 513, 515, 517, 519, 521, 523, 525, 527, 529, 531, 533, 535, 537, 539, 541, 543, 545, 547, 549, 551, 553, 555, 557, 559, 561, 563, 565, 567, 569, 571, 573, 575, 577, 579, 581, 583, 585, 587, 589, 591, 593, 595, 597, 599, 601, 603, 605, 607, 609, 611, 613, 615, 617, 619, 621, 623, 625, 627, 629, 631, 633, 635, 637, 639, 641, 643, 645, 647, 649, 651, 653, 655, 657, 659, 661, 663, 665, 667, 669, 671, 673, 675, 677, 679, 681, 683, 685, 687, 689, 691, 693, 695, 697, 699, 701, 703, 705, 707, 709, 711, 713, 715, 717, 719, 721, 723, 725, 727, 729, 731, 733, 735, 737, 739, 741, 743, 745, 747, 749, 751, 753, 755, 757, 759, 761, 763, 765, 767, 769, 771, 773, 775, 777, 779, 781, 783, 785, 787, 789, 791, 793, 795, 797, 799, 801, 803, 805, 807, 809, 811, 813, 815, 817, 819, 821, 823, 825, 827, 829, 831, 833, 835, 837, 839, 841, 843, 845, 847, 849, 851, 853, 855, 857, 859, 861, 863, 865, 867, 869, 871, 873, 875, 877, 879, 881, 883, 885, 887, 889, 891, 893, 895, 897, 899, 901, 903, 905, 907, 909, 911, 913, 915, 917, 919, 921, 923, 925, 927, 929, 931, 933, 935, 937, 939, 941, 943, 945, 947, 949, 951, 953, 955, 957, 959, 961, 963, 965, 967, 969, 971, 973, 975, 977, 979, 981, 983, 985, 987, 989, 991, 993, 995, 997, 999

(17:22-23; 18:41-45)

30 तैल्ला पत्ती, यीशु त तैसेरे चले तैटटां निस्तां गलील इलाके मांमेइं त्रेलि राओरे थिये । यीशु न चातो थियो कि कोई तैसेरे बारे मां ज़ाने कि तै तैडी ओरोए,

31 किजोकि तैखन तै अपने चेलन शिक्षा देतो ते तैन सेइं ज़ोतो थियो कि, “मेरे दुश्मनेई मैनेरू मट्टू, यानी अवं केद केरनोई । त तैनेई अवं मारनोई, पन मारनेरां टलेइयोवं दिहाइ अवं मुडदन मरां फिरी ज़ीतो भोनोई ।”

32 पन यीशुएरी ए गल चेलां केरि समझी मां न आई, ते तैना एस गल्लारो मतलब पुछ्छने केरां भी डरते थिये।

XXXXXXXXXX XXXXX XXX XXX
 (XXXXXXXXX 18:1-5; XXXXX 9:46-48)

33 तैल्ला पत्ती, यीशु ते तैसेरे चले कफरनहूम नगरे मां आए। तैना तैडी एक्की घरे मां जे। तैखन यीशुए अपने चेलन पुछ्छ्छ्छ्, “बत्तां जलते-जलते तुस एप्पू मांमेइं कोस गल्लारे बारे मां बेंस केरि राओरे थिये?”

34 तैना सब शरमेइतां चुप राए, किजोकि तैनेई बत्तां एप्पू मांमेइं एसेरे बारे मां बेंस कियोरी थी कि असन मां बड़डो मैन्हु कौन आए।

35 तैखन यीशुए तल्ले बिश्तां अपने 12 चले कुजाए ते तैन सेइं ज़ोवं, “अगर कोई परमेशेरी नज़री मां बड़डो बन्नु चाते, त तै सेब्वन केरां निकडो बने, ते कने सेब्वी मैन्हु केरो सेवक बने।”

36 तैखन यीशुए अक निकडो बच्चो हथ्यन मां दलेइतां, तैन केरे मझाटे खडो कियो। तैनी तै बच्चो अपने कुम्म मां रेखतां अपने चेलन सेइं ज़ोवं,

37 “जैना लोक मीं सेइं प्यार केरनेरे वजाई सेइं एरे ज़ेरे बच्चन मरां अक भी कबूल केरतन, तैना मीं कबूल केरतन। जैना मीं कबूल केरतन, तैना सिर्फे मीं नई, पन तैना परमेशेरे भी कबूल केरतन, जैनी अवं इड़ी भेजोरोई।”

XX
 (XXXXXXXXX 9:49-50)

38 तैखन यूहन्ने यीशु सेइं ज़ोवं, “हे गुरु, असेई अक मैन्हु लाव, जै तेरू नवं घिन्तां लोकन मरां भूतेरो सायो केडडी राओरो थियो। एल्हरेलेइ, असेई तै मैन्हु ठाको, किजोकि तै असन सेइं साथी तीं पत्ती नई ज़ले।”

39 पन यीशुए जुवाब दित्तो, “तैस न ठाका, किजोकि अगर कोई मेरे नवं घिन्तां चमत्कारेरां कम्मां केरे, त तै मेरे बारे मां लूशी बुरी गल्लां न ज़ोए।

40 किजोकि जैना इश्शे खलाफ कम न केरन, तैना इश्शे पासेन।

41 अगर कोई मेरे नंवे सेइं तुशुशी मद्दत केरे, अक गिलास पानी भी तुसन पियाए, कि मसीहेरे आथ, त अवं तुसन सेइं सच्च ज़ोतां कि तै मैन्हु परमेशेरे केरां अपनो फल ज़रूर हासिल केरेलो।

42 “जै कोई इन निकडे बच्चन मरां जैना मीं पुइ विश्वास केरतन, केन्ची भी पाप करवाए, त तैस मैनेरे लेइ एन रोडू आए कि दलाटेरो अक बड़डो दलेइटोल तैसेरे गल्ले सेइं बंधतां समुन्दरे मां शारो गाए।

43 अगर तेरो हथ तीं पाप केरनेरे लेइ ठोकर खुवाए, त तैस केट्टी छ्छ्। किजोकि तेरे लेइ दूई हथ भोंते सांते सज़ा मैलनेरे लेइ नरकेरी अगगी मां गाने केरां एन रोडू आए, कि तू डोण्डो भोइतां हमेशारी ज़िन्दगी मां दाखल भोस। किजोकि नरकेरी अग कधी भी न हिश्शे।

44 तैडी तैन केरे कीडे, जैना तैन खातन न मरन ते कने अग भी न हिश्शे।

45 त अगर तेरो पाव तीं पाप केरनेरे लेइ ठोकर खुवाए, त तैस केट्टी छ्छ्। किजोकि तेरे लेइ दूई पाव भोंते सांते सज़ा मैलनेरे लेइ नरकेरी अगगी मां गाने केरां एन रोडू आए, कि तू टोंटो भोइतां हमेशारी ज़िन्दगी मां दाखल भोस। किजोकि नरकेरी अग कधी भी न हिश्शे।

46 तैडी तैन केरे कीडे, यानी जैना तैन खातन न मरन त अग भी न हिश्शे।

47 अगर तेरी अछ्छ् तीं पाप केरनेरे लेइ ठोकर खुवाए, त तैस केडडी छ्छ्। किजोकि तेरे लेइ दूई एछ्छ्छ्छ् भोंते सांते नरकेरी अगगी मां छ्छ्छ्छ् गाने केरां एन रोडू आए, कि एक्की अछ्छ्छ्छ् सेइं तू परमेशेरेरां राज्जे मां दाखल भोस।

48 नरके मां तैन केरे कीडे, जैना तैन खातन न मरन त अग भी न हिश्शे।

49 जेन्चरां हर बलिदाने* मां लून छुडनु जरूरी आए, तेन्चरां परमेशर हर † एककी मैनेरी अजमैइश घिन्नलो, जै बडी दुखे वाली भोनी आए, जेन्चरां कि अगगी ‡ मामेई निसनूए ।

50 लून त रोडू आए, पन अगर लूनरो स्वाद चेलि गाए, त फिरी दुबारा केन्चरे तैसेरो स्वाद वापस आनेले? तेन्चरां तुस भी एप्पू मां लून रखाई, यानी परमेशेरो हुक्म मन्ना, त एप्पू मामेई मेल मिलापे सेई राथ ।”

10

🔗🔗🔗 🔗 🔗 🔗🔗🔗🔗 🔗🔗🔗🔗 🔗🔗 🔗🔗 🔗🔗 🔗🔗🔗🔗 🔗🔗
(🔗🔗🔗🔗 19:1-12; 🔗🔗🔗 16:18)

1 तैल्ला पत्ती, यीशु त तैसेरे चले तैट्टां उटतां यहूदिया इलाके मां आए, त फिरी यरदन दरियारे उस पार चले जे । तैड़ी मैन्हु केरि भीड़ फिरी तैस कां अकोट्टी भोइ । त तै अपने रीतरे मुताबिक तैन फिरी शिक्षा देने लगे ।

2 तैखन फरीसी लोकेई यीशु कां एइतां तैस अजमानेरे लेइ तैस पुच्छू, “कुन एन जेइज आए कि मइद अपनि कुआन्शी फारख्ती दे?”

3 पन यीशुए तैनन् पुच्छू, “बड़े पेइले मूसा नेवे तुसन कुन केरनेरो हुक्म दित्तोरो थियो?”

4 तैखन तैनेई यीशुए जुवाब दित्तो, “मूसे मइदे अजाजत दित्तोरीए कि तै लिखतां फारख्ती दे ।”

5 तैखन यीशुए तैनन् जुवाब दित्तो, “तुश्शे सखत दिलेरी वजाई सेइ, मूसे तुश्शे लेइ ए हुक्म दित्तोरो थियो ।

6 पन दुनियारी शुरुआती मां, जैखन परमेशेरे मैन्हु केरि रचना की, तैखन तैनी तैना मइद ते कुआन्श बनोरेन ।

7 एल्हेरेलेइ, इलाएरे पत्ती मइद अपने हाज-बव्वे केरां अलग भोइतां अपनि कुआन्शी सेई साथी रालो,

8 ते तैना दुइये अक्के जान भोले ।” तैल्ला पत्ती यीशुए ज़ोवं, “एल्हेरेलेइ तैना हुनी परमेशेरी नजरी मां दूई नई, पन तैना अक्के आन ।

9 एल्हेरेलेइ जैना परमेशेरे ज़ोडोरेन, तैनन् कोई मैन्हु अलग न केरे !”

10 बादे मां, जैखन यीशु ते तैसेरे चले घरे मां थिये, तैखन तैसेरे चलेई फारख्ती देनेरे बारे मां तैस फिरी पुच्छू ।

11 यीशुए तैन सेई ज़ोवं, “जै कोई अपनि कुआन्शी फारख्ती देइतां होरो इला बनाए, त तै तैस पेइली कुआन्शारे खलाफ बदमाशी करते ।

12 त अगर कुआन्श अपने मइदे छेइतां होरो इला बनाए, त तै अपने पेइले मइदेरे खलाफ बदमाशी केरेचे ।”

🔗🔗🔗 🔗🔗🔗 🔗🔗🔗🔗🔗 🔗🔗
(🔗🔗🔗🔗 19:13-15; 🔗🔗🔗 18:15-17)

13 तैल्ला पत्ती, किछ लोक अपने निक्के बच्चन यीशु कां आन्ने लग्गे ताके तै तैन पुड़ हथ रेखतां आशिवाद दे, पन तैसेरे चलेई तैना लोक डांटे ।

14 यीशुए एन हेरतां सेरकोइतां अपने चलन सेई ज़ोवं, “निक्के बच्चन मीं कां एजने देथ, तैनन् न टाका, किजोकि परमेशेरू राज एरे ज़ेरे लोकां केरे लेइ आए ।

* 9:49 9:49 पुराने ज़माने मां बलिदाने पुड़ लून छुइते थिये । तेन्चरां यीशुएरो हर अक चेलो ज़ीतो बलिदानेरो ज़ेरो भोनीए । मतलब की, मसीहेरे लोक अगारे ज़ेरे मुसीबतन मां भी, परमेशेरो हुक्म मन्नारे लोडे । † 9:49 9:49 मूल भाषाई मां: हर अक मैन्हु अगगी सेई लूनो कियो गालो । ‡ 9:49 9:49 परमेशर अगारे ज़ेरे मुसीबतन सेई हर एककी मैन्हु अजमालो, यानी इमतिहान नेलो । एन्चरां केरतां परमेशर साबत केरते की सच्चे मां तैसेरे लोक कौन आन, त तै तैन सेई अपनो रिश्तो मजबूत केरते ।

§ 9:50 9:50 यीशु चाते कि तैसेरे चले नरम दिले सेई राए (वचन 35-37), ताके तैना एप्पू मामेई बेंस न केरे कि असन मरां बड़डो कौन आए, त तैन मरां कोई भी एन्चरां न सोचे कि अक्वे बड़डोई, त केन्ची ठोकर न खुवाए ।

15 अवं तुसन सेइं सन्न ज़ोतईं कि ज़ै कोई परमेशेरेरे राज्जे* निकडे बच्चेरू ज़ेरू कबूल न केरे, त तै परमेशेरेरे राज्जे मां कधी भी दाखल न भोइ सके ।”

16 तैखन यीशुए तैना बच्चे कुम्मे मां रेखां, तैन पुइ हथ रेखतां तैनन् आशिवांद दित्तो ।

(19:16-30; 18:18-30)

17 तैल्ला पत्ती, ज़ैखन यीशु त तैसेरे चले घेरां बेइर निस्तां बत्तां चेलि राओरे थिये, ते अक मैन्हु यीशु कां दौइतो अव । तैनी तैस कां मथ्यो टेकतां तैस पुच्छू, “हे रोडे गुरु, हमेशारी जिन्दगी हासिल केरनेरे लेइ अवं कुन केरि?”

18 पन यीशुए तैस पुच्छू, “किजो तू मींजो रोडू ज़ोतस? परमेशेरेरे अलावा होरो कोई भी रोडो नई ।

19 तू त परमेशेरेरे हुक्मन ज़ानतस, यानी ‘खून न केरा, बदमाशी न केरा, चोरी न केरा, झूठी गवाही न देथ, धोखो न देथ, अपने हाज-बच्चां केरि इज्जत केरा ।”

20 पन तैनी मैने यीशु जुवाब दित्तो, “हे गुरु, एना सब हुक्म अवं बचपनेरो मन्तो ओरोई ।”

21 तैखन यीशुए तैस तेकतां तैस सेइं प्यार कियो, त तैस सेइं ज़ोवं, “तीं मां एककी गल्लारी कमी आए । गा, ज़ैन किछ् तीं कां आए तैन बेचतां गरीब मैनन् दे, तैखन तीं स्वर्गे मां खजानो मैलेलो । तैल्ला पत्ती, एइतां मेरो चेलो बना, त अपनू करूस † छुइतां मीं पत्ती च़ल ।”

22 यीशुएरी ए गल श्नुतां तैस मैनेरू तुत्तर टलक्कू, त तै बडो दुखी भोइतां च़लो जेव, किजोकि तै बडो अमीर थियो त तै अपनो धन छुडने न चातो थियो ।

23 तैखन यीशुए च़ेवरे पासन अपने चेलन तेकतां तैन सेइं ज़ोवं, “अमीर मैन्हु केरू परमेशेरेरे राज्जे मां दाखल भोनू बडू मुश्किल आए ।”

24 यीशुएरे च़ेले तैसेरी गल्लां श्नुतां हैरान‡ भोए । पन यीशुए फ़िरी तैन सेइं ज़ोवं, “हे मट्टाव, ज़ैना धने पुइ भरोसो रखतन, तैन केरे लेइ परमेशेरेरे राज्जे मां दाखल भोनू बडू मुश्किल आए!

25 परमेशेरेरे राज्जे मां अमीर मैनेरू दाखल भोने केरा ऊँटेरू सांधनेरे पाए मरां निस्सू सुख्ठू आए!”

26 तैखन तैना बडे हैरान भोइतां एप्पू मांमेइं ज़ोने लगगे, “अगर अमीर मैनेरे लेइ मुक्ति§ हासिल केरनि नमुमकिन आए, त फ़िरी केसेरी मुक्ति भोइ सकचे?”

27 यीशुए तैन केरे पासे तेकतां ज़ोवं, “मैन्हु अपने आपे न बच्चेइ सकन, यानी मुक्ति हासिल न केरि सकन, पन परमेशर एन केरि सकते, किजोकि परमेशर सब किछ् केरि सकते ।”

28 तैखन पतरस यीशु सेइं ज़ोने लगगे, “तक, अस त सब किछ् छेइतां तीं पत्ती च़लोरेम! असन कुन इनाम मैलेलू?”

29 यीशुए अपने चेलन सेइं ज़ोवं, “अवं तुसन सेइं सन्न ज़ोतईं कि, ज़ैनेईं मेरे लेइ त कने मेरे बारे मां खुशखबरी होरे लोकन शूनानेरे लेइ अपने घर या दूला या बेइन या हाज या बव या बच्चे या ऊडारां शारोरन,

30 तैनन् इस दुनियाईं मां शौव गुणा मैलेलू । तैना घरन, दूलान, बेइनन, हेईयन, बच्चन त कने ऊडारां हासिल केरेले । लोक भी तैनन् सताले, पन एजनेवाली दुनियाईं मां परमेशर तैनन् हमेशारी जिन्दगी देलो ।

31 पन बडे मैन्हु ज़ैना हुन्ना पेइले आन, तैना बादे मां पत्रोवं भोनेन । त ज़ैना हुन्ना पत्रोवं आन, तैना बादे मां पेइले भोनेन ।”

* **10:15** 10:15 परमेशेरेरे राज्जेरे दईं मतलब आन । इशुजी जिन्दगी मां, हुन्ना भी परमेशर राज्जे करते । या स्वर्गे मां भी तै हमेशा असन पुइ राज्जे केरेलो । † **10:21** 10:21 करूस छुइतां यीशु पत्ती च़लन्: मतलब कि, यीशुएरे पत्ती च़लनेरे वजाईं सेइं दुख या मुसीबत झलनेरे लेइ, ते मरनेरे लेइ भी तियार रान् । ‡ **10:24** 10:24 यहूदी लोक एरो विश्वास केरते थिये कि अगर कोई अमीर आए त तै स्वर्गे मां गेइ सकते । एल्हेरेलेइ यीशुएरे च़ेले तैसेरी ए गल श्नुतां हैरान भोए । § **10:26** 10:26 मुक्ति हासिल केरनि या परमेशेरेरे राज्जे मां दाखल भोनू, एना दुइये लगभग अक्के गल आए ।

“२०:१७-१९; २०:१८-३४”

32 तैल्ला पत्ती, यीशु त तैसेरे चले ते किछ लोक यरूशलेम नगरे जो चलते-चलते, तैना हेजू बत्तां थिये। यीशु तैन करे अगरी-अगरी पासे चेलि राओरो थियो। ते तैसेरे चले हैरान भोए त होरे लोक डरते-डरते तैस पत्ती चली राओरे थिये। तैखन यीशु अपने 12 चलन बत्ती मरां अलग नेइतां फिरी तैन सेइ तैना गल्लां ज़ोने लगो, ज़ैना तैस सेइ भोनेबैली थी।

33 तैनी ज़ोवं, “शुना, अस सारे यरूशलेम नगरे जो गोइ राओरेम। तैड़ी मैनेरू मट्टू (यानी अवं) प्रधान याजकन त कने शास्त्री लोकन केरां कैद कियो गानोई, त तैना मीं मारनेरो हुक्म देले त गैर यहूदी लोकां केरे हवाले केरले।

34 त होरि कौमां केरे लोक मेरो मज़ाक बनाले, त मीं पुइ थुकेले, त मीं कोडे मारेले, त तैना मीं मैरी छड़ेले, पन ट्लेइ दिहाइना पत्ती अवं मुडदन मरां फिरी जीतो भोलो।”

“२०:२०-२८”

35 तैखन याकूब त यूहन्ना, ज़ैना जब्दी नंब्वेरे मैनेरां मटटां थियां, यीशुएरे नेडे एइतां तैस सेइ ज़ोने लगगे, “हे गुरू, अस चातम कि ज़ैन किछ अस तीं केरां मग्गम, तैन तू असन देइयथ।”

36 यीशुए तैन पुच्छू, “तुसन कुन लोडते, ज़ैन अवं तुसन देई?”

37 तैनेई तैस सेइ ज़ोवं, “असन एन दे कि ज़ैखन तू महिमा सेइ साथी राज़ केरेलो, तैखन तीं सेइ साथी राज़ केरनेरे लेइ असन मरां अक तेरे देइने पासे त होरो तेरे बाएं पासे राज़गेदी पुइ बिश्ये।”

38 पन यीशुए तैन सेइ ज़ोवं, “तुस न ज़ानथ कि तुस कुन मगने लगगोरथ! ज़ेन्चरे दुख अवं झलने बालोई, कुन तुस झेल्ली सकतथ? ज़ेन्चरे अवं मारनोई कुन तुस भी मारे गानेरे लेइ तियारथ?”

39 तैनेई तैस जुवाब दित्तो, “हाँ, अस एन केरि सकतम।” एल्हेरेलेइ, यीशुए तैन सेइ ज़ोवं, “सच्चे, ज़ेन्चरे अवं दुख झलने बालोई, तेन्चरे तुस झल्लेले? ज़ेन्चरे अवं मारनोई तेन्चरे तुस मारे गाले।

40 पन तै ठार ज़ैन केरे लेइ पेइले तियारी कियोरीए, तैन छेडतां होरे केन्ची अपने देइने पासे त कने अपने बाएं पासे राज़गेदी पुइ विशालनू मेरू कम नई।”

41 एन शुन्तां यीशुएरे बाकी दश चले याकूब त कने यूहन्ना सेइ नराज़ भोइ जे।

42 तैखन यीशुए अपने सारे चले नेडे कुजेइतां, तैन सेइ ज़ोवं, “तुसन पतोए कि ज़ैना होरि कौमां केरे लोकां केरे राज़ केरनेवाले समझे गातन, तैना अपने लोकन पुइ राज़ केरतन। तैन मरां ज़ैना बड्डे अफसर आन, तैना अपने लोकन पुइ हकोमत चलातन।

43 पन तुसन मां एरी ज़ेरि गल न लोडे, पन ज़ै कोई तुसन मां बड्डो बन्नू चाए, त तै निकडो बेनतां तुश्यो सेवक बने।

44 त ज़ै कोई तुसन मां प्रधान मैन्हु बन्नू चाए, त तै सारे मैन्हु केरो सेवक बने।

45 किजोकि मैनेरू मट्टू, यानी अवं एस दुनियाई मां एल्हेरेलेइ नई ओरो कि कोई मैरी सेवा केरे, पन एल्हेरेलेइ ओरोई कि अवं होरि लोकां केरि सेवा केरि त कने बडे लोकां केरे लेइ अपनि जान बलिदान केरि, ताके तैन अपने पापां केरे सज़ाई केरां छुटकारो मैल्ले।”

“२०:२९-३४; २०:३५-४३”

46 तैल्ला पत्ती, यीशु त तैसेरे चले यरीहो नगरे मां पुज्जे। बादे मां, ज़ैखन तैना मैन्हु केरि बड़ी भीड़ी सेइ साथी यरीहो नगरी मरां निस्सी राओरे थिये, त तैखन बरतिमाई नंब्वेरो कानो भिखारी सइकेरे इलेखी बिश्तां भीख मेगगी राओरो थियो। तैसेरे बाजी केरू नंब्व तिमाई थियू।

47 जैखन तैनी शुनू कि नासरत नगरेरो यीशु इलमेइ निस्सी राओरोए, त तै भिखारी ज़ोरे सेइं ज़ोने लगे, “हे यीशु, दाऊद राज़ेरा मट्टा*! मीं पुइ दया केर!”

48 त बडे लोकेई तै डांटो कि, “चुप रा।” पन तै पेइले केरां जादे चिन्डां मारने लगे, “हे दाऊद राज़ेरा मट्टा, मीं पुइ दया केर!”

49 तैखन यीशुए रुकतां लोकन सेइं ज़ोवं, “तुस तैस इरां कुजाथ।” लोकेई तै कानो कुजेइतां तैस सेइं ज़ोवं, “हिम्मत रख! उठ! यीशु तीं एप्पू कां कुजाने लग्गारेन।”

50 तै अपनि चादर शैरतां लूशी उठो, ते यीशु कां अव।

51 तैखन यीशुए तैस पुच्छू, “तीं कुन लोइते कि अव तेरे लेइ केरि?” काने मैने जुवाब दित्तो, “हे गुरु, अव लानू चाताई।”

52 तैखन यीशुए तैस सेइं ज़ोवं, “तू गा। तीं मीं पुइ विश्वास कियूं एन्हरेलेइ अव तीं बज्जाताई।” अकदम तै लाने लगे त कने यीशु पत्ती चलो।

11

~~~~~

(~~~~~ 21:1-11; ~~~~~ 19:28-40; ~~~~~ 12:12-19)

1 जैखन यीशु त तैसेरे चले यरूशलेम नगरेरे नेइ आए, त तैखन जैतून नंव्वेरे पहाड़ेरे नेइ, बैतफगे त कने बैतनिय्याह इलोव्वन कां पुज्जे। तैखन यीशुए अपने चलन मरां दुइयन सेइं एन ज़ोइतां पेइले भेजे कि,

2 “अपने सामनेबाले इलोव्वे मां गाथ। तैड़ी पुज्जते तुसन अक गैधरो बच्चो बंधोरो मैलेलो, जैस पुइ कधी कोई नई चढोरो। तैस खोलतां इड़ी मीं कां आनां।

3 अगर तुसन कोई पुच्छे, ‘किजो एन केने लग्गारेथ?’ त तैस सेइं ज़ोइयथ, ‘परभुए एसेरी ज़रूरत आए।’ त तै अकदम गधेरे बच्चे तुसन सेइं साथी इड़ी भेजेलो।”

4 तैना दूई चले तैस इलोव्वे मां जे। तैड़ी गैधरो बच्चो एक्के घरेरे दारे बेइर बंधोरो लाव, त तैना तैस खोलने लग्गे।

5 जैना तैड़ी खडे धिये, तैन मरां किछ मैनेई तैन पुच्छू, “एन कुन केने लग्गारेथ, गधेरे बच्चे किजो खोलने लग्गारेथ?”

6 जेन्चरां यीशुए अपने चलन सेइं ज़ोरू धियूं, तेन्चरां तैनेई तैन मैनन् सेइं ज़ोवं। तैखन तैन मैनेई चले तैटटां गाने दित्ते।

7 यीशुएरे चलेई बच्चो यीशु कां एन्तां यीशुए तैस पुइ विशालनेरे लेइ, तैस पुइ अपने लिगडां छुइडो। त यीशु तैस पुइ विश्शां (त तैना यरूशलेम नगरेरे पासे जो चलने लग्गे)।

8 तैखन बडे लोकेई (तैसेरी इज्जत केनेरे लेई) अपना लिगडां बत्ती मां बिछ्ठां त कने किछ मैनेई पटलनबाली डैलडी एन्तां बत्ती मां बिछ्छेई।

9 जैना यीशुएरे अगरी-अगरी त कने पत्ती-पत्ती चलने लग्गारे धिये, तैना खुशी सेइं ज़ोरे सेइं ज़ोने लग्गे, “होशाना! (परमेशेरी तारीफ भोए) परमेशर तैस बरकत दे, जै परभु-परमेशेरे अधिकारे सेइं साथी एज्जी राओरोए!”

10 “परमेशर तीं आशिर्वाद दे, जैखन तू इग्रशे पइदादे दाऊदेरू राजेरू जेरू राज\* केरे! परमेशेरी होशाना (तारीफ) भोए, जै उच्चे स्वर्गे मां आए!”

11 तैल्ला पत्ती, तैन लोकन सेइं साथी, यीशु यरूशलेम नगरी मां पुज्जां मन्देरे मां जेव। यीशु मन्देरे मां चेवरे पासन तक्कू कि जैन तैड़ी भोइ राओरू धियूं। तै अपने 12 चलन सेइं साथी नगरे

\* 10:47 10:47 दाऊद राजेरू मट्टः यहूदी लोक ज्ञानते धिये कि परमेशेरे तरफां एजनेबालो मसीह, दाऊद राजेरे खानदाने मरां भोलो। एस विश्वासे सेइं तैनी काने मैने यीशु एन्चरां कुजाव कि दाऊद राजेरा मट्टा। \* 11:10 11:10 बडे पेइले परमेशेरे दाऊद राजे सेइं ए वादो कियोगे धियो कि तैसेरी औलादी मां अक मैन्हू राजो भोइतां हमेशेरे लेइ परमेशेरे लोकन पुइ राज करेलो। एन्हरेलेइ, सारे लोक तैस राजेरे लेइ इंतज़ार केरि राओरे धिये। यीशु मसीह जै आए तैए तै राजो आए।

मरां निस्तां, राती बिशनेरे लेइ बैतनिय्याह इलोव्वे जो वापस चलो जेव, किजोकि इलोझ भोइ जोरी थी।

**२१:१८-१९**

12 त एग्री दिहाड़ी, जैखन यीशु त तैसेरे चले बैतनिय्याह इलोव्वेरां निस्तां यरूशलेम नगरे जो वापस एज्जी राओरे थिये, तैखन यीशुए ढलुख लगगी।

13 तै दूरेरां फेगरो अक नीलो बुट लेइतां तैसेरे नेडे जेव कि खाने जो शायद तैस मां किछ मैल्ले। पन, जैखन तै बुटे कां जेव, त तैड़ी पट्लां केरे अलावा तैस किछ न मैल्लू, किजोकि तै फल्लेरो मौसम न थियो।

14 तैखन यीशुए तैस बुटे फिटकार देइतां तैस सेइं ज़ोवं, “हुन्नेरे पत्ती, तीं मां कोई फल कधी न लगगलो!” त तैसेरे चले एन शुनी राओरे थिये।

**२१:१२-१७; १९:४५-४८; २:१३-२२**

15 तैल्ला पत्ती, तैना फिरी यरूशलेम नगरे मां पुज्जे, त यीशु मन्दरेरे अंगने मां जेव। तैड़ी लोक जानवरां केरू त कने मन्दरे मां चाढ़नेरू सामान धिन्नेरू त कने बेचनेरो कारोवार केरि राओरे थिये। यीशु तैनन बेइर कढने लगो, ते तैनी तैड़ी पेंइसे बदलनेवालनां केरे मेज्जन त कने कबूतर बेचनेवालन केरि कुर्सी उलटेइ दित्ती।

16 त मन्दरेरी ठैरी मां केन्वी बेचनेरे लेइ कोई चीज एन्तां चलने न दित्तू।

17 तैखन यीशुए तैन लोकन शिक्षा देइतां ज़ोवं, “परमेशेरी किताबी मां एस मन्दरेरे बारे मां एन लिखोरूए कि परमेशेरे ज़ोवं, मेरू मन्दर सैरी कौमां केरे लोकां केरे लेइ प्रार्थनारू घर भोलू! पन तुस लोकेई इन मन्दर डैकू केरो अड्डो बनोरौए।”

18 एन शुन्तां प्रधान याजक त कने शास्त्री लोक यीशु कल्ल केरनेरो मौको तोपने लगगे। पन तैना यीशु केरां डरते थिये, किजोकि सारे लोक तैसेरी शिक्षाई शुन्तां हैरान भोते थिये।

19 जैखन इलोझ भोइ, त यीशु त तैसेरे चले (रात गुज्जानेरे लेइ) नगरेरां बेइर चलि जे।

**२१:२०-२२**

20 एग्री दिहाड़ी, झेज्ज्जां यीशु त तैसेरे चले तैट्ठां यरूशलेम नगरे जो चले त तैनेई तै फेगरो बुट लाव, जैस यीशुए पेइले फिटकार दित्तोरो थियो। तै बुट ज़ीलन तगर शुक्की जोरो थियो।

21 पतरसे तै गल याद आई कि यीशुए एस बुटे फिटकार दित्तोरो थियो, त तैनी यीशु सेइं ज़ोवं, “हे गुरू, तक! ए फेगरो बुट ज़ैस तीं फिटकार दित्तोरो थियो, शुक्की जोरोए! (एन केन्चरां भोवं)”

22 यीशुए अपने चलन जुवाव दित्तो, “तुस परमेशेरे पुइ विश्वास रखा।

23 अवं तुसन सेइं सच्च ज़ोताई कि ज़ै कोई एस पहाड़े सेइं ज़ोए, ‘तू उखडतां समुन्दरे मां बिछड़ी गा,’ त एन्चरां ज़ोइतां अपने दिले मां शक न केरे, पन विश्वास केरे कि ‘जैन अवं ज़ोतई तैन भोइ गालू,’ त तैसेरेलेइ तैन्ने भोलू।

24 एल्हेरेलेइ अवं तुसन सेइं ज़ोतई कि, जैखन तुस प्रार्थना केरतां परमेशेरे केरां जैन भी मगले, त विश्वास केरा कि तुसन तैन जरूर मैल्ली गालू, तैखन परमेशेरे केरां तैन तुसन दित्तू गालू।

25 ते जैखन कधी तुस खडे भोइतां परमेशेरे कां प्रार्थना केरतथ, त अगर तुसन केन्वी सेइं गिलो भोए, त पेइले तुस तैस माफ़ केरा, ताके तुशुओ स्वर्गेरो बाजी भी तुशुओ पाप माफ़ केरे।

26 अगर तुस होरि लोकन माफ़ न केरथ, त तुशुओ बाजी परमेशर भी, जै स्वर्गे मां आए, तुशुओ पाप माफ़ न करेलो।”

† 11:15 11:15 जैन पेंइसे लोकन मन्दरे मां आनतन, तैन मां रोमी सरकारेरे राजेरी शकल भोती थी। एल्हेरेलेइ तैन पेंइसे मन्दरे मां इस्तेमाल न थिये करेते। मन्दरे मां इस्तेमाल केरनेरे लेइ अलग पेंइसे रखते थिये। तैस पेंइसे सेइं बलिदाना केरि चीजां धिन्ने थिये।



9 तैखन यीशुए तैन मैनन पुच्चूछू, “हुनी बागारो मालिक तैन ज़मीनदारन सेइं कुन करेलो? अवं ज़ोतईं कि तैनी कुन करनू, तै एइतां तैन किसानां केरो नाश करेलो, ते बागारो टेको होरि केन्ची ज़मीनदारन देलो\*!”

10 “कुन तुसेईं पवित्रशास्त्रे मां मसीहेरे बारे मां ई गल नईं पदोरी? तैस मां लिखोरूए कि, ‘जै घोड़ राज-मिस्तरेईं निकम्मो ठहरेवरो थियो, तै मकानेरो खास घोड़ बेनि जेव।

11 एन प्रभु परमेशेरी तरफां एन्चरां भोव, ते कने इशशी नज़री मां ए हैरान भोनेरी गल आए!”

12 जैखन यहूदी लोकां केरे लीडरेईं एन शुनू, त तैनेईं सेमझी छड्डू कि यीशुए ई मिसाल इशशे खलाफ ज़ोरीए। एल्हेरेलेइ, तैना सेरकोए। त तैनेईं यीशु कैद करनू चाव। पन तैना लोकन केरां डरे, एल्हेरेलेइ तैस छेडतां ज़ेलि जे।

~~~~~

(~~~~~ 22:15-22; ~~~~~ 20:20-26)

13 तैल्ला पत्ती, यहूदी लोकां केरे लीडरेईं यीशु कां किछ फरीसी† लोक त कने हेरोदेस राज़ेरे लोक‡ भेजे, ताके तैना यीशुए अपनि गल्लन मां फसान।

14 तैनेईं यीशु कां एइतां तैस सेइं ज़ोवं, “हे गुरू, अस ज़ानतम कि तू सच्चो आस, त केन्चेरी परवाह न केरस, किजोकि तू सारे मैनन बराबर समझतस, त तू परमेशेरी गल्लां लोकन सच्च़ाई सेइं शुनातस। एल्हेरेलेइ असन ज़ो, कुन रोम-मुल्खेरे महाराजे जो चुंगी देनी जेइज आए कि नईं?

15 अस देम या न देम?” यीशुए तैन केरू पाखंड ज़ेनतां तैन सेइं ज़ोवं, “मीं किजो अज़मातथ? अक सिक्को (दीनार) मीं कां आनां कि अवं तैस हेरी।”

16 तैनेईं आनो, तैखन यीशुए तैन पुच्चूछू, “इस सिक्के पुड़ केसेरी शकल त केसेरू नवं आए?” तैनेईं ज़ुवाव दित्तो, “महाराजेरू आए।”

17 यीशुए तैन सेइं ज़ोवं, “जैन महाराजेरू आए तैन बड्डे राज़े देथ, ते ज़ैन परमेशेरेरू आए तैन परमेशेरे देथ।” जैखन फरीसी लोकेईं ते कने हेरोदेस राज़ेरे लोकेईं एन शुनू, त तैखन तैना बडे हैरान भोए।

~~~~~

(~~~~~ 22:23-33; ~~~~~ 20:27-40)

18 तैल्ला पत्ती, सडूकी लोक यीशु कां आए। तैना ज़ोतन मुड्डे ज़ीते न भोन। त तैनेईं यीशु पुच्चूछू,

19 “हे गुरू, बडे पेइले मूसे असन जो कानून मां लिखोरू थियूं कि अगर कोई मैन्हु बेऔलाद मेरि गाए त तैसेरी कुआन्श रेइ गाए, त तैसेरो दूला तैसेरी लैड़ी सेइं इला बनाए, त अपने दूलाएरे लेइ औलाद पैदा केरे, ताके तैसेरी खानदानी राए।

20 सत दूला थिये। पेइलो दूला इला बनेइतां बेऔलाद मेरि जेव।

21 तैखन दुइयोवं दूलाए तैस कुआन्शी सेइं इला बनाव। तै भी बेऔलाद मेरि जेव। तेन्चरां टलेइयोवं दूलाए भी कियूं।

22 त सते दूलाएईं तैस कुआन्शी सेइं एक्केरे पत्ती एक्के इला कियो, पन औलाद न भोइ। सैरेन पत्ती तै कुआन्श भी मेरि जेईं।

\* 12:9 12:9 एस मिसाली मां, बागारो मालिक परमेशेर आए, त बुरे किसान यहूदी लोक त कने तैन केरे लीडर आन, त फल्लेरो मतलब परमेशेरी गल्लन पुड़ ज़लनेबाली जिन्दगी, त मालिकेरे नौकर तैना आन, जैना परमेशेरे गल्लां ज़ोनेबालेन, त मालिकेरू मट्टू, यीशु मसीह आए। त तै मालिक तैन ज़मीनदारन सज़ा देते, मतलब कि परमेशेर यहूदी लोकन सज़ा देलो। त होरे किसान गैर-यहूदी लोक आन। † 12:13 12:13 फरीसी लोक सोचते थिये कि रोम-मुल्खेरे बड्डे राज़े जो चुंगी देनी गलत आए। ‡ 12:13 12:13 हेरोदेस राज़ेरे लोक सोचते थिये कि रोम-मुल्खेरे बड्डे राज़े जो चुंगी देनी ठीक आए।

23 एल्ह्नेरेलेइ, परमेशर लोक मुडदन मरां ज़ीते केरनेरे पत्ती, यानी ज़ैखन लोक ज़ीते भोले, त तैखन तै कुआन्श तैन सत्तन मरां केसेरी लाड़ी भोली? किजोकि तै इड़ी धेरती पुड सत्तां केरि लाड़ी भोरी थी।”

24 यीशुए तैन सेइं ज़ोवं, “तुशशी सोच केतूरी गलत आए! कुन तुसन पतो किजो? किजोकि तुस पवित्त्रशास्त्रे मां लिखोरी गल्लन त कने परमेशेरी शक्ति न ज्ञानथ!

25 तुसेईं ज़ै कहानी जोइं, तैस मां तै कुआन्श तैन सत्तन मरां केन्चेरी लाड़ी नईं भोनी, किजोकि ज़ैखन लोक मुडदन मरां ज़ीते भोले, त तैखन कोई केन्ची सेइं इला न बनालो, पन तैना स्वर्गें मां परमेशेरे स्वर्गदूतां केरे ज़ेरे भोले, ज़ैना इला न बनान।

26 मुडदां केरे ज़ीतो भोनेरे बारे मां, कुन तुसेईं मूसेरी किताबी मां एन नईं पदोरू ज़ैखन मूसे बलत् झैल्ल लाव, तैखन (यानी अब्राहम, इसहाक त याकूब भरनेरे बड़े सालना पत्ती) परमेशेरे मूसा सेइं ज़ोवं, ‘अवं अब्राहमेरो परमेशर, ते इसहाकेरो परमेशर, ते याकूबेरो परमेशर आई?’

27 परमेशर मुडदां केरो परमेशर नईं, पन ज़ीतां केरो परमेशर आए, एल्ह्नेरेलेइ तुशशी सोच बिलकुल गलत आए।”

~~~~~

(22:34-40; 10:25-28)

28 तैखन शास्त्री लोकन मरां एक्की मैने एजतां यीशु ते सद्की लोकां केरि गलवात शुनी। तैस पतो चलो कि यीशुए तैनन् ठीक जुवाब दित्तो, ते तैनी यीशु कां एडतां तैस पुच्छू, “परमेशेरे सारे हुकमन मरां बड़ो खास हुकम को आए?”

29 यीशुए तैस जुवाब दित्तो, “सारे हुकमन मरां बड़ो खास हुकम ईं आए, ज़ेन्चरां परमेशेरी किताबी मां लिखोरूए कि, ‘हे इस्राएलेरे लोकव शुना, परभु इशशो परमेशर, अक्के परभु आए,

30 एल्ह्नेरेलेइ परभु अपने परमेशेरे सेइं तुस अपने सारे दिले सेइं, त अपनि सैरी जानी सेइं, त अपनि सैरी अक्ली सेइं, त अपनि सैरी ताकती सेइं प्यार केरा।’ ए बड़ो खास हुकम आए।

31 तैसेरो ज़ेरो दुइयोवं बड़ो खास हुकम ईं भी आए कि, ‘तू अपने पेड़ोसन* सेइं अपने बराबर प्यार केर।’ एन दूईं हुकमन केरां होरो कोई भी बड़ो हुकम नईं।”

32 तैखन शास्त्री मैन्हु यीशु सेइं ज़ोवं, “हे गुरू, तीं बड़ू ठीक ज़ोवं! त तीं सज़ ज़ोवं कि परमेशर अक्के आए, ते तैसेरे अलावा होरो कोई नईं।

33 त असेईं परमेशेरे सेइं अपने सारे दिले सेइं, ते अपनि सैरी जानी सेइं, ते अपनि सैरी अक्ली सेइं, त अपनि सैरी ताकती सेइं प्यार कियोरो लोड़े। ते कने असेईं अपने पेड़ोसन सेइं अपने बराबर प्यार कियोरो लोड़े। जानवरां केरू बलिदान केरनू या होरि चीज़ां केरि चढतल च़ाढ़ने करां भी बेधतां, एना दुइये हुकमन मन्ने परमेशेरे लेइ बड़े खास आन!”

34 ज़ैखन यीशुए हेरू कि तैनी अक्ली सेइं जुवाब दित्तो, त तैनी तैस सेइं ज़ोवं, “तू परमेशेरे राज़े मां दाखल भोने करां दूर नईं।” ते तैल्ला पत्ती, केन्ची यीशु किछ पुछ्नेरी हिम्मत न भोइ।

~~~~~

(22:41-46; 20:41-44)

35 मन्देरे मां शिक्षा देते बार यीशुए लोकन अक सवाल पुच्छो, “शास्त्री किजो ज़ोतन कि ज़ै मसीह आए, तै दाऊद-राजेरी औलादी मरां भोलो?

36 बड़े पेड़ले दाऊद राज़े एप्पू पवित्त्र आत्माेरे शक्ति सेइं एन्चरां ज़ोरू थियूं कि, परभु परमेशेरे मेरे परभु मसीहे सेइं ज़ोवं, ‘तू मेरे देइने पासे विश, ज़ांतगर कि अवं तेरे दुश्मन बिलकुल न हारेई।’

37 दाऊद राज़े त एप्पू मसीहेरे बारे मां एन ज़ोवं कि तै मेरो परभु आए, ‘फिरी मसीह तैसेरू मट्टू केन्चरां भोइ सकते?’ त मैन्हु केरि भीड़ यीशुएरी गल्लां खुशी सेइं शुन्ती थी।

§ 12:27 12:27 किजोकि ज़ैना इस धेरती पुड मेरि गातन, तैना परमेशेरे सेइं साथी ज़ीते भोइ गानेन! एस सेइं एन सावत भोते कि परमेशर लोकन मुडदन मरां ज़ीतो केरेलो। \* 12:31 12:31 पड़ोसी सेइं: मतलब कि होरे सारे मैन्न सेइं प्यार केरोए।



॥२३॥ ॥२३॥ ॥२३॥ ॥२३॥ ॥२३॥ ॥२३॥  
(॥२३॥ 23:1-36; ॥२३॥ 20:45-47)

38 यीशुए शिक्षा देते बार लोकन सेईं ज़ोवं, “शास्तूरी लोकन करां खबरदार राथ, ज़ैना लम्मे-लम्मे चोले लेइतां हन्ठून् चातन, ताके लोक समझन कि तैना बड़े धर्मी आन, त तैना चातन कि बज़ारन मां लोक असन बड़ी इज़्जती सेईं नमस्कार करन।

39 त कने प्रार्थना घरन मां बड़े खास मैन्हु केरे लेइ रखखोरी कुर्सी पुड़ विशनू चातन, त धामन मां भी गोइतां बड़े खास मैन्हु केरे लेइ रखखोरी कुर्सी पुड़ विशनू चातन।

40 तैना विधवां केरे घरन लुटतन त कने होरि मैनन् हिरानेरे लेइ लेम्मी-लेम्मी प्रार्थना केरतन, ताके लोक समझन कि तैना बड़े धर्मी आन। परमेशर तैनन् बड़ी जादे सज़ा देलो!”

॥२१॥ ॥२१॥ ॥२१॥ ॥२१॥ ॥२१॥ ॥२१॥  
(॥२१॥ 21:1-4)

41 लोकन शिक्षा देनेरे पत्ती, यीशु मन्देरेरे दान-पेटटेरे सामने विशतां एन तकने लगगोरो थियो कि, लोक दान-पेटटी मां केन्वरां पेंडसे छड़तन। बड़े मैनेईं, ज़ैना अमीर थिये, तैड़ी एइतां तैस मां बड़े पेंडसे छड़ने लगगोरे थिये।

42 तैखन अक गरीब विधवां एइतां दईं सिक्के छड़डे, ज़ैन केरि कीमत बड़ी घट थी।

43 ज़ैखन यीशुए तैन हेरू, तैनी अपने चले एप्पू कां कुजेइतां तैन सेईं ज़ोवं, “अवं तुसन सेईं सच्च ज़ोतईं कि मन्देरेरे दान-पेटटी मां पेंडसे छड़नेवालन मरां, एस गरीब विधवां तैन सारे मैनन् करां जादे छड़डोरेन।

44 किजोकि तैन सैरेईं अपने जादे पेंडसन मरां थोड़े ज़ेरे छड़डे, पन ए विधवा त बड़ी गरीबी आए, फिरी भी तैसां सब किछ ज़ैन तैस कां थियू छेड़डी दिन्तू, यानी अपनि ज़रूरतेरे लेइ रखखोरे पेंडसे भी छेड़डी दिन्ते!”

## 13

॥२४॥ ॥२४॥ ॥२४॥ ॥२४॥ ॥२४॥ ॥२४॥ ॥२४॥ ॥२४॥ ॥२४॥  
(॥२४॥ 24:1-2; ॥२४॥ 21:5-6)

1 ज़ैखन यीशु त तैसेरे चले मन्देरे मरां निस्सी राओरे थिये, तैखन तैसेरे चलन मरां एक्के तैस सेईं ज़ोवं, “हे गुरू, इड़ी हेर! केतरे बड़डे-बड़डे घोड़न सेईं बनोरी दिवारां कने केतूरू रोड़े भवन आए!”

2 यीशुए तैन सेईं ज़ोवं, “हुन्ना त तुस एना बड़डे-बड़डे घोड़न सेईं बनोरे भवनन लातथ, पन एक्की दिहाड़े इड़ी घोड़े पुड़ घोड़ भी न रालो, यानी सब नाश भोइ गालू!”

॥२४॥ ॥२४॥ ॥२४॥ ॥२४॥ ॥२४॥ ॥२४॥ ॥२४॥ ॥२४॥ ॥२४॥  
(॥२४॥ 24:3-14; ॥२४॥ 21:7-19)

3 तैल्ला पत्ती, यीशु ज़ेतून नंवेरे पहेड़ी पुड़ चढ़ता पार मन्देरेरे सामने विशशो। तैखन पतरस, याकूब, यूहन्ना ते अन्दरयास यीशु कां अलग गोइतां तैस केरां पुछ्छने लगगे,

4 “असन जो कि एना गल्लां केइस भोनिन? तैन दिहाड़ी केरो कुन निशान आए, ज़ैखन एना सब गल्लां पूरी भोनिन?”

5 तैखन यीशु तैन सेईं ज़ोने लगे, “खबरदार राथ कि कोई तुसन धोखो न दे।

6 किजोकि बड़े मैन्हु मेरे नंवे सेईं एइतां ज़ोले कि, ‘अवं मसीह आईं।’ ते तैना बड़े मैन्हु धोखो देले।

7 ज़ैखन तुस लड़ाईं ते कने लड़ाइयां केरि अफवाह शुनेले, त तुस घबरेइयथ न, किजोकि लड़ाइयां केरू भोन् ज़रूरी आए, पन एस दुनियारो अन्त अकदम न भोलो।

8 किजोकि एक्की ज़ातारे लोक होरि कौमरे लोकां केरे खलाफ लड़ाईं केरले, त अक मुलख होरि मुलखेरे खलाफ लड़ाईं केरेलो। हर टैरी भुंजल एज्जले, त काल पेलो। एन सब त सिर्फ मुसीबतां केरि शुरुआत आए।

9 “पन तुस अपने बारे मां खबरदार राथ, किजोकि लोक तुसन सभां केरे हवाले केरले, प्रार्थना घरन मां नेडतां मड्डले, त तुस मेरे वजाई सेइं गवर्नरन ते कने राजन कां खडे किये गाले, ताके तुस तैन केरे सामने मेरे गवाह भोथ।

10 पन इस युग्गेरो अन्त भोनेरे पेइले एरू भोनु जरूरी आए कि परमेशरेरे राज्जेरे बारे मां सुशखबरी सैरी कौमां केरे लोकन शुनेई गाए।”

11 जैखन लोक तुसन नेडतां आदालतां केरे हवाले केरले, त पेइले फिकर न केरथ त न सोचथ कि अस कुन ज़ोमेले, पन ज़ैन किछ परमेशर तुसन तैस घड़ी ज़ोनेरे लेइ ज़ोवं गालू, तैन्ने ज़ोइयथ। किजोकि ज़ोनेवाले तुस नई, पन पवित्तर आत्मा तुशे ज़िरिये ज़ोलो।

12 ढूला (जै मीं पुइ विश्वास न केरे, तै) अपने ढूलाए मरानेरे लेई हवाले केरेलो। त वाजी भी अपने मट्टे तेन्त्रां हवाले केरेलो, ते बच्चे अपने हाज-बच्चेरे खलाफ भोइतां तैनन् मैरी छुडेले।

13 मीं पुइ विश्वास केरनेरे वजाई सेइं सारे लोक तुसन सेइं नफरत केरले, पन ज़ै मरने तगर विश्वासे मां बनोरो रालो, तैस परमेशर मुक्ति देलो।

*~~~~~*  
(*~~~~~* 24:15-28; *~~~~~* 21:20-24)

14 तैल्ला पत्ती, यीशुए तैन सेइं ज़ोवं, “बड़ी बुरी गंदी चीज़, जै नाश केरचे, एजनेवाली आए। तै भिट्टी चीज़ तैस जगाई पुइ खड़ी भोली, जेड़ी तैसारू खडू भोनु जेइज नई। बडे पेइले दानिय्येल नेवे तैस चीजेरे बारे मां ज़ोरू थियू। (जै कोई एन पदे, तै ए गल समझे।) ज़ैखन तुस तै चीज़ी तैड़ी खड़ी लाएले, त तैखन ज़ैना लोक यहूदिया इलाके मां रातन, तैना बन्ननेरे लेइ पहाइन पुइ नेशशी गान।

15 ते अगर कोई मैन्हु अपने घरेरे छूते पुइ भोलो, त तै अकदम तैट्टां नेशशी गाए, ते अपने घरेरां किछू नेने अन्तर न गाए (ताके वक्त बरबाद न भोए)।

16 ते अगर कोई मैन्हु ऊडारे मां कम केरि राओरो भोलो, त तै भी अकदम तैट्टां नेशशी गाए। ते अपना लिगाड़ां भी नेनेरे लेइ पत्रोवं न एज्जे।

17 तैन दिहाइन मां ज़ैना दोज़ीती त दुद्ध पियाती कुआन्शां भोली, तैन केरे लेइ अफ़सोस! (किजोकि तैन केरे लेइ बड़ी मुश्किल भोली।)

18 ते तुस प्रार्थना केरा कि एन हियूतडेरे दिहाइन मां न भोए।

19 किजोकि तैन दिहाइन मां लोकन बड़ी मुसीबत भोली, कि दुनितयारी शुरुआती केरां देंती ज़ैन परमेशरे बनोरीए, अज तगर एरी मुसीबत नई ओरी। ते एरी ज़ेरि मुसीबत फिरी कधी न भोली।”

20 “अगर प्रभु परमेशर तैन मुसीबतेरी दिहाइन न घटाए, त कोई मैन्हु भी न बन्नलो। पन परमेशर अपने चुनोरे लोकां केरे वजाई सेइं तैन दिहाइन घटालो।

21 तैस मुसीबतेरे दिहाइन मां, अगर कोई तुसन सेइं ज़ोए कि, ‘तक्का, मसीह इड़ी आए!’ या ‘तक्का, उड़ी आए!’ त विश्वास न केरथ।

22 किजोकि झूठे मसीह ते कने झूठे नवी एज्जले। तैना लोकन धोखो देनेरे लेइ निशान ते कने चमत्कारेरां कम्मां हिराले, कि अगर भोइ सके, त तैना परमेशरेरे चुनोरे लोकन भी धोखो देले।

23 एन्हेरेलेइ, तुस होशियार राथ! हेरा, मीं तुसन सैरी गल्लां भोनेरे पेइले ही ज़ोरिन।”

*~~~~~*  
(*~~~~~* 24:29-31; *~~~~~* 21:25-28)

24 तैल्ला पत्ती, यीशुए तैन सेइं ज़ोवं, “तैन दिहाइन मां, तैस मुसीबतेरे वक्तेरे पत्ती, ‘दिहाड़ो कालो भोइ गालो,

त चाँदनी लौ न देली,

25 त अम्बरेरां तारे बिछुडने लग्गेले,

त अम्बरेरी सैरी शेक्ति\* हिल्लेली ।”

26 “तैखन लोक मैनेरे मट्टे (यानी मीं) बडी शेक्ति त कने बडी महिमा सेइं साथी धरती पुड जो विदलारी मां एजते हेरेले ।

27 तैखन अवं अपने स्वर्गदूतन सारी दुनियाई मां भेजतां धरतारे हर पासेरां अपने चुनोरे लोकन अकोट्टे केरेलो ।”

\*\*\*\*\*  
(\*\*\*\*\* 24:32-35; \*\*\*\*\* 21:29-33)

28 तैल्ला पत्ती, यीशुए तैन सेइं ज़ोवं, “फेगोरे बुटेरे मिसाले केरां अक सबक शिख्वा! ज़ैखन तैसेरी डैलडी नरम भोइतां, त नव्यां पट्लां निस्ने लगतन, ते तुस बुज्झी छुडतथ कि गेमेंरो मौसम एजनेवालो आए ।

29 एसेरो ज़ेरो, ज़ैखन तुस एना गल्लां, ज़ैना मीं ज़ोई, भोते हेरेले, त तुस बुज्झी छुडडा कि मैनेरू मट्टू, यानी अवं बडे नेडे पुज्जोरोई ।

30 अवं तुसन सेइं सन्न ज़ोतई कि ज़ांतगर एना सैरी गल्लां न भोली, तांतगर एना लोक, ज़ैना हुन्ना ज़ीतेन, तैना न मरेले ।

31 अम्बर त कने धरती टेली गाली, पन मेरी गल्लां कधी न टेलेली ।”

\*\*\*\*\*  
(\*\*\*\*\* 24:36-44)

32 तैल्ला पत्ती, यीशुए तैन सेइं ज़ोवं, “मेरे वापस एजनेरे दिहाडेरे बारे मां, या तैस वक्तेरे बारे मां कोई भी न ज़ाने कि तै कताली भोलो, स्वर्गेरे स्वर्गदूते भी न ज़ानन् त परमेशेरू मट्टू यानी अवं भी न ज़ैनी, पन सिर्फ मेरो बाजी परमेशर ज़ानते ।

33 एल्हेरेलेइ, मेरे वापस एजनेरे लेइ हमेशा तियार राथ, ते प्रार्थना केरते राथ, किजोकि तुस न ज़ानथ कि तै वक्त कताली एज्जलो ।

34 मैनेरे मट्टेरू, यानी मेरू वापस एजन् तैस मैनेरू ज़ेरू आए, ज़ै अपनू घर छुडतां होरे मुल्खे जो गाते । गाने केरां पेइले, तै अपने नौकरन कुजेइतां अपने घरेरी रखवाली केरनेरो अधिकार देते, ते हर एक्की अपनू-अपनू कम देते, त दारे पुड रखवाली केरनेरे लेइ संतूरी बीज्जो रानेरो हुक्म भी देते, किजोकि तै कधी भी वापस एज्जी सकते ।”

35 “एसेरे ज़ेरे, तुस भी हमेशा मेरे वापस एजनेरे लेइ तियार राथ, किजोकि तुस न ज़ानथ कि घरेरो मालिक यानी अवं कताली वापस एज्जेलो । शायद इलोझी या एध्धी राती या कुकडेरे वांग देनेरे मौके या झेज्झां ।

36 एल्हेरेलेइ तियार राथ! एरू न भोए कि अवं अचानक एइतां लेई कि तुस तियार नई ।

37 ज़ैन अवं तुसन सेइं ज़ोतई, तैन्ने सारे मैन्न् सेइं भी ज़ोतई कि, ‘हमेशा तियार राथ!’”

## 14

\*\*\*\*\*  
(\*\*\*\*\* 26:1-5; \*\*\*\*\* 22:1-2; \*\*\*\*\* 11:45-53)

1 फ़सहेरू तिहार त कने अखमीरी रोट्टारू तिहार दई दिहाइन पत्ती एजनेवालां थियां । प्रधान याजक त कने शास्त्री मौको तोपने लगगोरे थिये कि अस यीशु केन्द्रां चुपचारे ट्लाम ते तैस मैरी छुड्डम ।

2 पन तैनेई एप्पू मांमेइं ज़ोवं कि, “अस तिहाररे दिहाइन मां यीशुए कैद न केरम, किजोकि तैन दिहाइन मां बडे लोक चेवरे पासन भोतन, ते एरू न भोए कि यीशुएरे कैद भोनेरे वजाई सेइं लोकन मां दंगोफसाद भोइ गाए ।”

\* 13:25 13:25 शेक्ति: मतलब कि शैतान त कने शैतानेरी दुष्ट फौज

॥ २६:६-१३; १२:१-८ ॥  
(२६:६-१३; १२:१-८)

३ यीशु बैतनिय्याह इलोव्वे मां शमीन नव्वेरे मैनेरे घरे मां थियो, जैस पेइले कोद्वेरो रोग थियो। जैखन यीशु तैड़ी रोटी खेइ राओरो थियो, त तैखन अक कुआन्श संगमरमेरे सेइ बनोरे भांडे मां इत्र एन्तां यीशु कां आई, जै बड़ो कीमती थियो त कने जैस जो जटामासी ज़ोतन। तैसां तै इत्र बोतल ट्लोइतां खोल्ली ते यीशुएरी इज्जत केरनेरे लेइ तैसेरे दोगे पुइ इत्र उलटव।

४ पन किछु मैन्हु, जैना तैड़ी खेइ थिये, तैस कुआन्शी हेरतां अपने दिले मां सेरकोइतां एप्पू मामेइं ज़ोने लगगे, “ए कुआन्श किजो एस बड़ी कीमतारो इत्र ज़ायो केरचे?”

५ ए इत्र त एक्की सालेरी मज़दूरारे पेइसन केरां भी जादे भाए मां बेचतां, ते तैना पेइसे गरीब मैन्नु देइ सकती थी!” ते तैना सेरकोइतां तैस सेइ डाटने लगगे।

६ पन यीशुए तैन सेइ ज़ोवं, “एस छेइडी देथ! एस किजो तंग केरतथ? एसां त मीं सेइ भलाई कियोरीए।

७ गरीब मैन्हु त हमेशा तुसन सेइ साथी रातन। जैखन भी तुस चाथ, तैखन तैन सेइ भलाई केरि सकतथ, पन अवं तुसन सेइ साथी हमेशा न रालो।

८ जैन किछु ए कुआन्श केरि सकती थी, तैन एसां कियूं। एसां मेरी जानी पुइ खुशबूदार तेल लेइतां मेरे मरनेरां पेइली मेरी जान दबनेरे लेइ तियार कियोरीए।

९ अवं तुसन सेइ सत्र ज़ोतई कि सैरी दुनियाई मां ज़ेड़ी कोन्वी मेरे बारे मां खुशखबरी लोकन शुनाई गाली, तैड़ी ज़ैन कम एसां मीं सेइ कियोरूए तैन भी एसेरी यादी मां ज़ोवं गालू।”

॥ २६:१४-१६; २२:३-६ ॥  
(२६:१४-१६; २२:३-६)

१० तैल्ला पत्ती, यहूदा इस्करियोती, जै १२ चलन मरां अक थियो, प्रधान याजकन कां जेव कि तै यीशु ट्लुवानेरे लेइ तैन केरि मद्दत केरे।

११ एन शुन्तां तैना बडे खुश भोए, ते तैसेरे मद्दतरे लेइ तैनेई चेंदरे रुपइये देनेरो वादो कियो। एल्हेरेलेइ, ते ठीक मौके बलगने लगगे कि यीशु केन्चरां सेइ ट्लुवाए।

॥ २६:१७-२५; २२:७-१४,२१-२३; १३:२१-३० ॥  
(२६:१७-२५; २२:७-१४,२१-२३; १३:२१-३०)

१२ अखमीरी रोटीारे तिहारेरी पेइली दिहाड़ी, जैखन लोक फ़सहेरे तिहारेरे गबडे बलिदान केरते थिये, तैखन यीशुएरे चलेई तैस पुच़्छू, “तू कोडि चातस कि अस गेइतां तेरे लेइ फ़सह तिहारेरी रोटी तियार केरम?”

१३ तैखन यीशुए अपने दुई चले एन ज़ोइतां भेजे, “यरूशलेम नगरे मां गाथ, ते अक मैन्हु तुसन पैनेरो घड़ो छुवोरो मैलेलो, तैस पत्ती-पत्ती गेइयथ।

१४ ते तै जैस घरे मां गालो, तैस घरेरे मालिके सेइ तुस एन ज़ोइयथ कि, इश्शे गुरे ज़ोवरूए कि, भेरे लेइ तियार कियोरो मेहमान कमरो कोडि आए, जेड़ी अवं अपने चलन सेइ साथी फ़सह तिहारेरी रोटी खेइ?”

१५ तैखन घरेरो मालिक तुसन दुइयोवं छती पुइ, तियार कियोरो, अक बड़ो कमरो हिरालो। तैड़ी इश्शे लेइ रोटी तियार केरथ।”

१६ ते चले तैट्टां निस्तां नगरे मां आए, त ज़ेन्चरां यीशुए तैन सेइ ज़ोरू थियूं, तेन्चरां तैनेई लावं। ते तैनेई फ़सह तिहारेरी रोटी तियार की।

॥ १३:२१-३० ॥

१७ जैखन इलोझा भोइ, त यीशु अपने १२ चलन सेइ साथी मेहमान कमरे मां अव।

18 ज़ैखन तैना बिशतां रोट्टी खेइ राओरे थिये, त यीशुए तैन सेइं ज़ोवं, “अवं तुसन सेइं सच्च ज़ोतई कि तुसन मरां अक, जै मीं सेइं साथी रोट्टी खेइ राओरोए, मीं धोखे सेइं दलुवालो।”

19 एन शुन्तां तैना सारे चले उदास भोए, ते तैना अक-अक केरतां यीशु सेइं पुछ्छने लगगे, “कुन अवं आई? कुन अवं आई?”

20 यीशुए तैन सेइं ज़ोवं, “तै तुसन बारहन मरां अक आए, जै मीं सेइं साथी बिशतां इश्शी एक्की थैली मां रोट्टी खेइ राओरोए।

21 ज़ेन्चरां मैनेरू मट्टू यानी मेरे बारे मां परमेशेरेरी किताबी मां लिखोरूए, तेन्चरां अवं मारो गानोई। अफ़सोस! (किजोकि तैस मैन्हु बड़ी सज़ा मैल्लनीए एजने वालीए) ज़ेसरे वजाई सेइं मैनेरू मट्टू यानी अवं दलुवाव गानोई! अगर तै मैन्हु ज़रमोरो न भोथो, त तैसेरे लेई तैन भलू थियू।”

~~~~~

(~~~~~ 26:26-30; ~~~~~ 22:14-20; 1 ~~~~~ 11:23-25)

22 ज़ैखन यीशु त तैसेरे चले फ़सहेरी रोट्टी खेइ राओरे थिये, यीशुए अक रोट्टी दलेइतां परमेशेरू शुक्र केरतां टलोड़ी। तैल्ला पत्ती, तैनी ते अपने चलन दित्ती, ते तैन सेइं ज़ोवं, “दलाथ ते साथ। ई मेरो ज़िसम आए।”

23 फिरी यीशुए दाछ्यारे रस्सेरो कटोरो दलेइतां परमेशेरू शुक्र कियू। तैल्ला पत्ती, तैनी ते अपने चलन दित्तो, ते तेनेई सैरेई पियो।

24 तैखन तैनी तैन सेइं ज़ोवं, “ए दाछ्यारे रस मेरो खून आए, जै परमेशर त कने लोकां केरे मज़ाटे नव्वों करार बनाते, जै बड़े लोकां केरे मैफारे लेइ बगाव गालो।

25 अवं तुसन सेइं सच्च ज़ोतई कि अवं दाछ्यारो रस तैस दिहाड़ी तगर फिरी कधी न पीलो, ज़ांतगर परमेशेरे राज्जे मां अवं नव्वो दाछ्यारे रस पीं।

26 तैल्ला पत्ती, यीशु त कने तैसेरे चले परमेशेरू भजन ज़ोइतां, यरूशलम नगरेरे बेडर ज़ैतून नव्वेरे पहैड़ी पुड़ चले जे।”

~~~~~

(~~~~~ 26:31-35; ~~~~~ 22:31-34; ~~~~~ 13:36-38)

27 तैखन यीशुए अपने चलन सेइं ज़ोवं, “तुस सारे मीं छेइतां नश्शेले, किजोकि परमेशेरेरी किताबी मां लिखोरू कि, “अवं पुहाले मैरेलो ते तैसेरी भैइडां इरां उरां नेशशी गाली।”

28 पन अवं मेरतां मुइदन मरां फिरी ज़ीतो भोनोई। तैल्ला पत्ती, अवं तुसन केरां पेइले गलील इलाके जो गालो त तैड़ी तुस मीं लाएले।”

29 तैखन पतरसे यीशु सेइं ज़ोवं, “अगर सारे तीं छेइतां नश्शेले त नश्शन, पन अवं कधे न नेश्शेलो।”

30 यीशुए पतरसे सेइं ज़ोवं, “अवं तीं सेइं सच्च ज़ोतई कि अज्जेरी राती कुकड़ेरे दूई बार बांग देने केरां पेइले, तू टलाई बार मेरो इन्कार केरेलो कि तू मीं न ज्ञानस।”

31 पन पतरसे मना ज़ोरे सेइं यीशु सेइं ज़ोने लगगे, “अगर मीं तीं सेइं साथी मरनू भी पे, त फिरी भी अवं तेरो इन्कार कधी न केरेलो।” एन्चरां होरि चलेई भी ज़ोवं।

~~~~~

(~~~~~ 26:36-46; ~~~~~ 22:39-46)

32 तैल्ला पत्ती, यीशु ते तैसेरे चले गतसमनी नव्वेरे एक्की बागी मां जे, ते तैड़ी यीशुए अपने किछ्च चलन सेइं ज़ोवं, “इड़ी बिश्शारे राथ, ज़ां तगर अवं प्रार्थना न केरि।”

33 फिरी यीशुए पतरस ते याकूब ते यूहन्ना एप्पू सेइं साथी बागी मां अगगर निये, ते तैड़ी तै बड़े परेशान भोने ते कने घबराने लगगे।

34 ते तैखन यीशुए तैन सेइं ज़ोवं, “मेरो दिल बड़ो उदास आए, इड़ी तगर कि अवं मरनेवालोई। तुस इड़ी बलगा, ते बीझै राथ।”

53 तैल्ला पत्ती, मैन्हु केरि भीड़ां यीशु महायाजकेरे घरे मां नीयो। ते सारे प्रधान याजक ते कने बुजुर्ग त कने शास्त्री यीशुएरू इमतिहान नेनेरे लेइ महायाजके सेइं साथी तैडी अकोट्टे भोए।

54 यीशु त कने मैन्हु केरि भीडी केरा दूर-दूर रेइतां पतरस तैन पत्ती-पत्ती महायाजकेरे महल्लेरे अंगने तगर पुज्जी जेव। ते तैडी तै महायाजकेरे पैरदारो सेइं साथी विशतां अग तपने लगे।

55 मेहल्लेरे अन्तर, प्रधान याजक त कने सारी महासभा यीशुएरे खलाफ गवाही तोपनेरी कोशिश केरि राओरे थिये, ताके तैना तैस मैरी सकन, पन तैनन् किछ्च न मैल्लू।

56 किजोकि बडे मैन्हु यीशु पुइ झूटी गवाही देने लग्गोरे थिये, पन तैन केरि गवाही अक्कां जेरि न थी।

57 आखरी मां किछ्च मैनेई उठतां तैसेरे खलाफ ई झूटी गवाही दिती कि,

58 “असेई एस केरां एन ज्रोते शुनेरू कि, ‘अवं मैन्हु केरू बनोरू एस मन्दरे विछोइतां ट्लेइ दिहाइन मां होरू मन्दर बनालो, जैन मैन्हु केरू बनोरू न भोलू।’”

59 पन एन ज्रोइतां भी तैन केरि गवाही अक्कां जेरि न निस्सी।

60 तैखन महायाजके आदालतेरे मझाटे खडे भोइतां यीशु पुज्छ्छ, “एना लोक तेरे खलाफ गवाही देतन, कुन तू कोई जुवाव नई देस?”

61 पन यीशु चुप राव, ते किछ्च जुवाव न दित्तो। तैखन महायाजके तैस फिरी पुज्छ्छ, “कुन तू परमेशेरू मट्टू मसीह आस?”

62 यीशुए ज्रोवं, “हाँ, अवं ते आई। ते जेन्चरां परमेशेरी कितावी मां लिखोरू कि ‘तुस सारे लोक, मैनेरू मट्टू (यानी मीं) सर्वशक्तिमान परमेशेरी देइने पासे विशशोरे त अम्बरे मरां विदलारे सेई साथी धेरती पुइ एजते हेरेले।’”

63 तैखन महायाजके सेरकोइतां, अपना चोगो छिन्दतां आदालतेरे मैनेन् सेई ज्रोवं, “हुनी असन होरि केन्चेरी गवाहेरी ज़रूरत नई!”

64 तुसेई एप्पू परमेशेरी तुहीन शुनी! ते तुस एसेरो कुन फैसलो केरतथ?” तैखन तैनेई सारे मैनेई ज्रोवं कि, “ए मैन्हु दोषी आए किजोकि एनी परमेशेरी तुहीन की, एल्हेरेलेइ, एस मौतरी सज़ा दे।”

65 तैखन तैन मरां किछ्च मैन्हु, तैसेरी बेज्जती केरनेरे लेइ, तैस पुइ थुकने लग्गे। ते किछ्च मैन्हु तैसेरी एछ्छी लिगडे सेइं ढेकतां तैस मुक्केई बाने लग्गे ते तैस सेइं ज़ोने लग्गे, “भवविष्याणी केर कि केनि तीं बाई।” ते नौकरेई भी तैस ट्लेइतां थप्पड बाए।

~~~~~

(~~~~~ 26:69-75; ~~~~~ 22:56-62; ~~~~~ 18:15-18,25-27)

66 ज़ैखन पतरस, महायाजकेरे महल्लेरे अंगने मां थियो, त महायाजकेरे नौकरेनन मरां अक कुआन्श तैडी आई।

67 तैसां पतरस अग तपतो लाव। ते तै कुआन्श पतरस तेकतां तैस सेइं ज़ोने लग्गी, “तू भी एस नासरत नगरेरो यीशु सेइं साथी थियो।”

68 पन पतरसे यीशुएरो इन्कार कियो ते ज़ोवं, “अवं न ज़ैनी ते न सेमझी कि तू कुन लगोरिस ज़ोने।” फिरी तै तैट्टां बेइर डेवढी मां जेव। तैखन कुकडे बांग दिती।

69 ज़ैखन तैसां नौकरेनां फिरी पतरस लव, त तै तैन सेइं, ज़ैना नेडे खडे थिये, ज़ोने लग्गी, “ए मैन्हु तैसेरे चलन मरां अक आए।”

70 पन पतरसे फिरी यीशुएरो इन्कार कियो।

थोडे चिरे बाद, ज़ैना पतरसेरे नेडे खडे थिये, तैनेई तैस सेइं ज़ोवं, “पक्को तू भी तैसेरे चलन मरां अक आस, किजोकि तू गलील इलाकेरो मैन्हु भी आस।”

71 तैखन पतरस कसम केरतां ज़ोने लग्गे, “मीं फिटकार लग्गे, अगर अवं झूठ ज़ोई कि अवं एस मैन्हु ज़ानतो भोई, ज़ेसेरे बारे मां तुस गल्लां केरने लग्गोरथ!”

72 तैखन अकदम दुइयोवं वार कुकड़े बांग दित्ती। जै गल यीशुए पतरसे सेइं पेडली ज़ोरी थी, तै गल तैस याद आई कि, “कुकड़े दूई वार बांग देने केरां पेडले तू टलाई वार मेरो इन्कार केरेलो कि तू मीं न जानस।” तैखन तैनी बड़ी लेरां दित्ती, किजोकि तैनी यीशुएरो इन्कार केरनेरे वजाई सेइं बड़ो दुखी भोव।

## 15

*मरकुस 27:1-2,11-14; मरकुस 23:1-5; मरकुस 18:28-38*

*(मरकुस 27:1-2,11-14; मरकुस 23:1-5; मरकुस 18:28-38)*

1 झेज्झ भोते, अकदम प्रधान याजकेई, ते यहूदी लोकां केरे बुजुर्गेई, ते कने शास्त्री लोकेई ते कने सारे महासभारे मैनेई यीशुएरे खलाफ सलाह केरतां तै बन्धाव ते तैट्टां नेइतां रोमी गवर्नर पिलातुसेरे हवाले कियो।

2 पिलातुसे यीशु पुच्छ, “कुन तू यहूदी लोकां केरो राज़ो आस?” यीशुए तैस जुवाब दित्तो, “तू एप्पू ज़ोई राओरोस।”

3 तैखन प्रधान याजक तैस पुड़ बेड़ि गल्लां केरो झूटो इलज़ाम लेइ राओरे थिये। पन यीशुए किछ न ज़ोवं।

4 पिलातुसे तैस फिरी पुच्छ, “तू किछ भी जुवाब की न देस? हेर, एना लोक तीं पुड़ केतरी गल्लां केरो इलज़ाम लेइ राओरेन!”

5 हालाकि यीशुएरी किछ भी गलती न थी, तैनी किछ जुवाब न दित्तो, इड़ी तगर कि पिलातुस बड़ो हैरान भोव।

*मरकुस 27:15-26; मरकुस 23:13-25; मरकुस 18:39-19:16*

*(मरकुस 27:15-26; मरकुस 23:13-25; मरकुस 18:39-19:16)*

6 हर साल फ़सह तिहारेरे वक्ते पुड़ यहूदी लोकां केरे लेइ केन्ची एक्की कैदी, जैस तैना लोक चाते थिये तैस पिलातुस छेड़डी देतो थियो।

7 तैन दिहाइन बरअब्बा नंवेरो अक मैन्हू किछ दंगेफसाद केरनेबालन सेइं साथी कैदखाने मां थियो, जैनेई दंगेफसादे मां कल्ल कियोरो थियो।

8 तैखन मैन्हू केरि भीड़ पिलातुसे कां गेइतां मिन्नत केरने लगगी कि, “जैन तू इश्शे लेइ हर साल केरतो ओरोस तैन्ने केर।”

9 पन पिलातुसे तैनन पुच्छ, “तुस कुन चातथ कि अवं तुश्शे लेइ यहूदी केरे राजे यानी तुश्शे राजे छेड़डी देई?”

10 पिलातुसे लोकन एन्चरां पुच्छ, किजोकि तै जानतो थियो कि प्रधान याजक यीशु पुड़ ज़लतन तांए तैनेई तै टलुवोरोए।

11 पन प्रधान याजकेई लोक बमकाए, ताके पिलातुस तैन केरे लेइ यीशुएरे बदले बरअब्बा छेड़डी दे।

12 एन शुन्तां पिलातुसे लोकन फिरी पुच्छ, “अगर अवं बरब्बे छेड़डी देई, त जैस तुस यहूदी लोकां केरो राज़ो ज़ोतथ, तैसेरू अवं कुन केरि?”

13 तैना पिलातुसे सेइं फिरी शोर केरतां ज़ोने लगगे कि, “एस क़रूसे\* पुड़ चाद!”

14 पिलातुसे तैनन पुच्छ, “किजो ए क़रूसे पुड़ चादनो, एनी कुन बुराई कियोरीए?” पन तैना लोक पेडले केरां जादे शोर केरने लगगे कि, “एस क़रूसे पुड़ चाद!”

15 तैखन पिलातुसे लोक खुश केरनेरे इरादे सेइं, बरअब्बा तैन केरे लेइ छेड़डी दित्तो, ते यीशु कोड़े लुवेइतां सिपेही केरे हवाले कियो कि तैना यीशु क़रूसे पुड़ चादन।

\* 15:13 15:13 क़रूसे पुड़ चादन: सरकारेरे खलाफ दंगेफसाद केरनेबालन, ते कल्ल खरावन ते कने हुकम न मन्नेवाले गुलामन जो रोमी-सरकार एरी सज़ा देती थी। ए बड़ी दुख देनेवाली ते कने शरमेरी सज़ा आए। दूई बड़डी लेकडी जुडेइतां क़रूसे बनावन। दोषी मैनेरे पावन त हथ्थन पुड़ मेखां देइतां, क़रूसे पुड़ टेंगी छड़वन, ज़ातगर तैस मैनेरे प्राण न निस्सन।



२७:२७-३१; १९:२-३)

16 तैखन सिपाही यीशुए पिलातुसरे महलरे अंगने मां नेइ जे, जैस जो प्रीटोरियम ज़ोतन। ते तैनेई सारी रोमी पलटन कुजेइतां आनी।

17 तैखन तैनेई यीशुएरो मज़ाक बनानेरे लेइ तैसेरां लिगडां खोल्लां, ते तैस लाल रंगेरो चोलो लुवाव ते कने कंटां केरू ताज बनेइतां तैसेरे दोग्गे पुड़ रख्खू।

18 ते एन ज़ोने लग्गे कि, “हे यहूदी केरा राजा, नमस्कार!”

19 तैना यीशुएरो दोग्गे पुड़ अक्करे पत्ती अक केरतां सोटी सेइ बाने लग्गे, ते तैसेरी बेजती केरनेरे लेइ तैस पुड़ थुकने लग्गे, ते मज़ाक बनानेरे लेइ तैसेरे अग्गर ज़ैन्धु केरे भारे बिशतां तैस नमस्कार करते राए।

20 तैसेरो मज़ाक बनानेरे पत्ती, तैनेई तैस पुड़ेरां लाल रंगेरो चोगो खोलतां तैसेरां लिगडां लुवां। तैखन तैना यीशु कर्से पुड़ चाढ़नेरे लेइ यरूशलेमेरे नगरे केरां बेइर नीयो।

२७:३२-४४; २३:२६-४३; १९:१७-२७)

(२७:३२-४४; २३:२६-४३; १९:१७-२७)

21 ज़ताली तैना तैटटां चेलि राओरे थियो, त तैखन शमौन नंब्वेरो मैन्हु इलांव्वेरां तैलमेइ एज्जी राओरो थियो। तै मैन्हु कुरेनी नंब्वेरे नगरेरां ओरो थियो ते तै सिकन्दर ते कने रूफुसेरो बाजी थियो। तैखन सिपाहेई शमौन मजबूर कियो कि तै यीशुएरे लेइ तैसेरी कर्से छुइतां चले।

22 ते तैनेई यीशु गुलगुता नंब्वेरी ठैरी पुड़ आनो, ज़ेसेरो मतलब “खोपड़ाी ठार” आए।

23 फिरी किछ लोकैई मुर् नंब्वेरी दवाई, दाछ्येरे रस्से मां मिलेइतां यीशु पीने जो दितीं, पन तैनी तैसेरो इन्कार केरतां न पी।

24 तैखन तैनेई यीशु कर्से पुड़ चाढ़ो ते तैसेरां लिगडां केरे लेइ पेरची छुइडी कि तैसेरां लिगडां केस मैलतन। तैल्ला पत्ती, तैनेई तैसेरां लिगडां बेन्टी छुइडां।

25 ज़ैखन तैनेई तै कर्से पुड़ चाढ़ो, तैखन झेज्जेरे नौ बज्जोरे थियो।

26 ते एक्की फेट्टी पुड़ तैसेरी सज़ारी वजा लिखतां तैसेरे क़ोडी केरां बां लेइ छुइडी। तैस मां लिखोरू थियू कि, “ए यहूदी लोकां केरो राज़ो आए।”

27 सिपाहेई यीशु सेइ साथी हारे दूई डैकू भी, अक तैसेरे देइने पासे ते अक तैसेरे बाए पासे अलग-अलग कर्सन पुड़ चाढ़े।

28 तैखन परमेशेरी किताबी मां लिखोरी गल पूरी भोइ। तैस मां मसीहेरे बारे मां एरू लिखोरू थियू कि, “ते पापी मैन्हु केरे साथी गनो गालो।”

29 तैखन बत्तां चलनेबालन मरां किछ मैन्हु अपनि क़ोडी हिलेइ-हिलेइतां ते कने एन ज़ोइतां तैसेरी तुहीन करते थियो कि, “वाह! वाह! मन्दर बिछोइनेबालो, त कने टलेइ दिहाइन मां बनानेबालो!”

30 अगर तू शक्तिशाली आस त कर्से पुड़ेरां ओस्तां अपने आपे बच्चा!”

31 एन्चरां प्रधान याजक भी शास्त्री लोकन सेइ साथी तैसेरो मज़ाक बनेइ राओरे थियो, त तैना एप्पू मामेइ ज़ोते थियो कि, “एनी हारे मैन्हु त बच्चाए, पन अपने आपे बच्चे न सको।

32 ए ज़ोरो थियो कि ‘अवं इस्राएल लोकां केरो राज़ो आई, यानी मसीह आई,’ अगर ए गल सत्र आए त हुन्ना कर्से पुड़ेरां ओस्से, ताके अस हेरतां विश्वास केरम कि ए इशो राज़ो आए।” त दूई डैकू, ज़ैना तैस सेइ साथी कर्से पुड़ चाढ़ोरे थियो, तैनेई भी तैसेरी बेजती की।

२७:४५-५६; २३:४४-४९; १९:२८-३०)

(२७:४५-५६; २३:४४-४९; १९:२८-३०)

33 दीसारे बारे बज़ेई सारे मुल्खे मां आंधरू भोवं, ते टलेइ बज़न तगर रावं।

34 टलेइ बजेई यीशुए बडी ज़ोरे सेइं अपनि बोली मां ज़ोवं कि, “इलोई, इलोई, लमा शवक्तनी!” ज़ेसेरू मतलब, “हे मेरे परमेश्वर, हे मेरे परमेश्वर, तीं किजो अवं छेइडी दित्तो!”

35 तैखन ज़ैना तैडी नेडे खडे थियो, तैन मरां किछ मैनेई एन शुन्तां गलत सेमझतां एप्पू मांमेइं ज़ोवं, “हेरा, ए मैन्हु एलिय्याहे जो मद्दत केरनेरे लेइ कुजेई राओरोए।”

36 तैखन तैन मरां एक्की मैने दौडतां स्पन्जे (जै पेनेरी ज़ेरि चीज चूसी सकचे) खटटे दाछारे रस्से मां डुवेइतां डांगी पुइ रेखतां यीशु जो चुसावं त ज़ोवं, “बलगा, हेरम, एलिय्याह एस कुरूसे पुडेरां उसालने एजते कि नई।”

37 तैखन यीशुए बडे ज़ोरे सेइं आवाज देइतां प्राण दित्ते।

38 ते तैखन मोट्टो पर्दा, जै मन्दरे मां लोरो थियो, बां देंता बुन तगर फेटतां दई टुकडे भोइ जे।

39 ज़ैखन फौजी-अफसर, जै यीशुएरे सामने खडो थियो, यीशु एन्चरां ज़ोरे सेइं आवाज देइतां प्राण देंतो लाव, तैखन तैनी ज़ोवं, “सच्चे, ए मैन्हु परमेश्वरेरू मट्टू थियुं!”

40 किछ कुआन्शां भी दूरेरां एन हेरी राओरी थी। तैन मां मगदलीन नगरेरी मरियम, निकडो याकूब ते योसेसेरी अम्मा मरियम, त कने सलोमी भी थी।

41 ज़ैखन यीशु गलील इलाके मां थियो, त तैखन एना कुआन्शां तैस पत्ती-पत्ती चेलती थी त तैसेरी सेवा केरती थी। त तैडी होरि भी बडी कुआन्शां थी, ज़ैना तैस सेइं साथी गलील इलाके मरां यरूशलेम नगरे मां ओरी थी।

~~~~~

(~~~~~ 27:57-61; ~~~~~ 23:50-56; ~~~~~ 19:38-42)

42 ज़ैखन इलोइ भोइ, ते एल्हेरेलेइ कि तै तिहारेरी दिहाडी थी, यानी आरामेरे दिहाडेरे पेइली दिहाडी ज़ैखन लोक आरामेरी दिहाडेरे लेइ तियार भोते थियो, त तैखन

43 अरिमतियाह नगरेरो रानेबालो यूसुफ नंवेरो मैन्हु तैडी अव, जै यहूदी लोकां केरे बड्डे आदालतेरे खास मैनन् मरां अक थियो। तै एप्पू भी परमेश्वरेरे राज्जे बलगने लोरो थियो। तै मैन्हु हिम्मत केरतां गवर्नर पिलातुसे कां जेव ते यीशुएरी लाश मग्गी, ताके तै तैस दबनेरे लेइ ने।

44 तैखन पिलातुस हैरान भोव कि केन्चरां तै एत्री लूशी मेरि जेव। त तैनी फौजी-अफसर कुजेइतां पुच्छे, “कुन तै मेरि जोरोए?”

45 ज़ैखन तैनी फौजी-अफसरे केरां हाल ज़ानो कि यीशु सच्चे मेरि जेव, त तैनी यूसुफे लाश नेनेरी अज़ाजत दित्ती।

46 तैखन यूसुफे अक कीमती लिगड घिन्नु ते यीशुएरी लाश कुरूसे पुडेरां ओसैलतां यहूदी लोकां केरि रसमेरे मुताबिक तैस लिगडे मां पलेटतां एक्की कवरी मां छेइडी, जै पहैडी पुइ एक्की घोडे मां घडोरी थी। त तैस कवरेरे बेइर दारे पुइ अक बड्डो घोड घिसेइतां छेइडो।

47 मगदलीन इलव्वेरी मरियम, ते योसेसेरी अम्मा मरियम, एना दुइये हेरी राओरी थी कि यीशुएरी लाश कोडि रखतन।

16

~~~~~

(~~~~~ 28:1-8; ~~~~~ 24:1-12; ~~~~~ 20:1-10)

1 होरसां इलोइ, ज़ैखन आरामेरी दिहाडी खतम भोरी थी, त तैखन मगदलीन इलव्वेरी मरियम, त कने याकूबेरी अम्मा मरियम, त कने सलोमी, एन सेब्भेई रोडी मुशकी बालो तेल आनो, ताके यहूदी लोकां केरि रसमेरे मुताबिक यीशुएरी लाशी पुइ तेल लान।

2 हफतेरे पेइले दिहाडे झेज्जां-झेज्जां, ज़ैखन मसां दिहाडो निस्सी राओरो थियो, त तैना कवरी कां जेई ज़ैस मां यीशुएरी लाश रखोरि थी।

3 तैखन तैना एप्पू मांमेइं ज़ोती थी, “इश्शे लेइ कवरेरे दारे पुडेरां घोड कौन गिसालो?”

4 किजोकि तै घोड़ बड़ो बड़ो थियो । पन तैड़ी पुज्जनेरे बाद, तैनेई कबरेरे पासे उव्री तक्कू त हेरू कि घोड़ पेइलो कबरेरे दारे पुड़ेरां गिस्सोरो थियो ।

5 तैनेई कबरेरे अन्तर गेइतां अक जवान\* लाव ते तैना बेड़ि हैरान भोइ जेई । तैस छिट्तां लिगडां लेगगोरां थियां, ते तैड़ी तैन केरे सिध्धे पासे बिश्शोरो थियो ।

6 तैनी जवाने तैन सेइं ज़ोवं, “डरा न, अवं ज्ञानताई कि तुस नासरत नगरेरे यीशु तोप्पी राओरिथ, जै करूसे पुड़ ज़ादरो थियो । तै मुइदन मरां ज़ीतो भोरोए । तै इड़ी नई । हैरा, ई तैए ठार आए, ज़ेड़ी तैसेरी लाश रख्वोरी थी ।

7 पन तुस गेइतां तैसेरे चेलन सेइं त कने पतरसे सेइं भी ज़ोइयथ कि यीशु तुसन करां पेइलो गलील इलाके जो गालो । ज़ेन्चरां तैनी पेइलू तुसन सेइं ज़ोरू थियूं, तेन्चरां तुस तैस तैड़ी लाले ।”

8 तैना कुआन्शां कबरी मरां बेइर निस्तां तैटटां नेश्शी जेई, किजोकि तैनन् थकं लगगोरी त घेबोरी थी । बत्तां तैनेई केन्वी सेइं किछ्च न ज़ोवं, किजोकि तैना डेरी थी ।

*~~~~~*  
(~~~~~ 28:9-10; ~~~~~ 20:11-18)

9 हफ्तरे पेइले दिहाड़े झेज्ज भोते, यीशु मुइदन मरां ज़ीतो भोइतां पेइले मगदलीन नगरेरी मरियमी लेइहोव, जैस मरां तैनी पेइलां सत भूतां केरो सायो कइडोरो थियो ।

10 मरियमां यीशु लानेरे पत्ती, गेइतां तैसेरे चेलन खबर दित्ती, ज़ैना यीशुएरे लेइ शोग केरने लगगोरे ते कने लेरां देने लगगोरे थिये ।

11 पन ज़ैखन तैनेई तैसारी गल शुनी कि यीशु फिरी ज़ीतो भोरोए ते तैसां लेवरोए, त तैनेई तैसारी गल्ली पुड़ याकीन न कियूं ।

*~~~~~*  
(~~~~~ 24:13-35)

12 तैल्ला पत्ती, यीशु अपने चेलन मरां दूई चेलन होरि रूपे मां लेइहोव, ज़ैखन तैना (यरूशलेम) नगरेरां अपने इलांवे जो च़लारे थिये ।

13 तैखन तैनेई भी नगरे वापस एजतां यीशुएरे होरे चेलन खबर दित्ती, पन तैनेई तैन केरि गल्लारो भी विश्वास न कियो ।

*~~~~~*  
(~~~~~ 28:16-20; ~~~~~ 24:36-49; ~~~~~ 20:19-23; ~~~~~ 1:6-8)

14 तैल्ला पत्ती, यीशु अपने 11 चेलन भी लेइहोव, ज़ैखन तैना रोट्टी खेइ राओरे थिये । त तैन केरे अविश्वास त कने सखत दिलेरे वजाई सेइं यीशुए तैना डांटे, किजोकि तैनेई तैन केरो विश्वास न कियो, ज़ैनेई यीशु ज़ीतो भोनेरे पत्ती तै लेवरो थियो ।

15 यीशुए अपने चेलन ज़ोवं, “तुस सैरी दुनियाई मां गेइतां सारे लोकन मेरे बारे मां खुशखबरी शुनाथ ।

16 ज़ै कोई मीं पुड़ विश्वास केरे ते बपतिस्मो ने, तैस पापां केरि सज़ाई करां मुक्ति मैलेली । पन ज़ै कोई विश्वास न केरे, तैस अपने पापां केरि सज़ा मैलेली ।

17 ज़ैना मीं पुड़ विश्वास केरतन, तैना एरां चमत्कारेरां कम्मां (निशाना) केरले कि तैना मेरे नंवे सेइं लोकन मरां भूतां केरो सायो कढेले, ते नंवी-नंवी बोली केरले ।

18 ते अगार तैना ज़ेहरीले सप्पन टलाले त कने ज़ेहरीली चीज़ भी पीले, तांभी तैनन् किछ्च नुकसान न भोलो । ते ज़ैखन तैना बिमारन पुड़ हथ रख्वेले, ते तैना बेज्जोइ गाले ।”

*~~~~~*  
(~~~~~ 24:50-53; ~~~~~ 1:9-11)

19 यीशु अपने चेलन सेइं गल्लां केरनेरां पत्ती, परमेशेरे तै स्वर्गे जो नीयो । ते यीशु परमेशेरेरे देइने पासे राजगेद्दी पुड़ बिश्शी जेव ।

\* 16:5 16:5 तै जवान मेन्दू स्वगंदूत थियो

20 ते यीशुएरे चेलेईं वेइर हर जगाईं गेइतां लोकन खुशखबरी श्रुनाने लग्गे । ते प्रभु तैन सेइं साथी कम केरतो राव । तैना चमत्कारेरां कम्मां (निशानन) केरे ज़िरिये, ज़ैना साथी-साथी भोतां धियां, प्रभु साबत केरतो राव कि तैन केरि गल्लां सन्न आन । आमीन ।

## लूका

१२३४ ५६७८ ९१०१११२ १३१४ १५१६१७ १८ १९२० २१२२२३ २४२५ २६२७ २८२९ ३०३१ ३२३३ ३४३५ ३६३७ ३८३९ ४०४१ ४२४३ ४४४५ ४६४७ ४८४९ ५०५१ ५२५३ ५४५५ ५६५७ ५८५९ ६०६१ ६२६३ ६४६५ ६६६७ ६८६९ ७०७१ ७२७३ ७४७५ ७६७७ ७८७९ ८०८१ ८२८३ ८४८५ ८६८७ ८८८९ ९०९१ ९२९३ ९४९५ ९६९७ ९८९९ १००१ १००२

1-2 जनाब थियुफिलुस, बडे लोकेई तैना गल्लां हेरी जैना प्रभु-यीशुए कियोरी थी, जैखन तै असन सेइं साथी थियो, जेइसेरां तैनी अपनू सेवारू कम शुरू कियोरू थियूं। तैन मैनेई होरि मैनन यीशुएरे बारे मां शिक्षा देइतां परमेशेरी सेवा की। बडे मैनेई तैन केरि गल्लां शुन्तां यीशुएरे बारे मां इशे लेइ इतिहासेरी किताब लिखी।

3 मीं एप्पू तैन सैरी गल्लां केरि बडे रोडेचारे छानबीन की। एल्हेरेलेइ, मीं एन रोडू लग्गु, कि अवं भी तुशे लेइ तैन गल्लां केरे बारे मां ठीक डंगे सेइं इतिहासेरी किताब लिखी।

4 अवं चाताई कि तीं पतो लग्गे कि यीशुएरे बारे मां तैना गल्लां सच्ची आन, जैन केरे बारे मां तुसन शिक्षा मैल्लोरी थी।

५६७८९१० १११२१३ १४१५१६ १७१८१९ २०२१२२ २३२४ २५२६ २७२८ २९३० ३१३२ ३३३४ ३५३६ ३७३८ ३९४० ४१४२ ४३४४ ४५४६ ४७४८ ४९५० ५१५२ ५३५४ ५५५६ ५७५८ ५९६० ६१६२ ६३६४ ६५६६ ६७६८ ६९७० ७१७२ ७३७४ ७५७६ ७७७८ ७९८० ८१८२ ८३८४ ८५८६ ८७८८ ८९९० ९१९२ ९३९४ ९५९६ ९७९८ ९९१० १००२

5 यहूदिया इलाके मां, जैखन हेरोदेस राजो राज करतो थियो, त तैखन जकर्याह नंब्वेरो अक यहूदी याजक\* थियो। तै मैन्हु याजकां केरे टोली मां अबिव्याह नंब्वेरो टोली मरां थियो। तैसेरी कुआन्शारू नंब एलीशिबा थियूं। एलीशिबा हारूनेरे खानदेनी मरां थी, (हारून इस्राएल लोकां केरो पेइलो याजक थियो)।

6 तैना दुइये प्रभु-परमेशेरी नजरी मां धर्मी थियां ते कने परमेशेरे सारे कानून ते सारे हुकमन पुइ बेइलजाम चलनेवालां थियां।

7 पन तैन केरि कोई औलाद न थी, किजोकि एलीशिबा बाँझ थी, ते तैना दुइये बुढ़ां थियां।

8 एक्की फेरे, जकर्याहेरी टोली यरूशलेम नगरेरे मन्दरे मां सेवारू कम केरि राओरे थी, तैखन तै प्रभु परमेशेरी हजरी मां अपनू याजकेरू कम लोगोरो थियो केरने।

9 याजकां केरे रीतेरे मुताबिक तैनेई परची छेडतां जकर्याह चुनो कि तै प्रभु-परमेशेरे मन्दरे मां गेइतां गुग्गल बाले।

10 जैखन तै गुग्गल बालने लोरो थियो, त तैखन मैन्हु केरि सारी भीइ मन्दरेरे बेइर प्रार्थना केरि राओरी थी।

11 तैखन अचानक प्रभु-परमेशेरो अक स्वर्गदूत गुग्गल बालनेरी ठारारे देइने पासे खडे भोइतां जकर्याह लेइहोव।

12 जैखन जकर्याहे स्वर्गदूत लाव, त तै घेमरोव ते बडो डेरि जेव।

13 पन स्वर्गदूते तैस सेइं ज़ोवं, “हे जकर्याह, न डर! जैखन तीं प्रार्थना की, त परमेशे तेरी प्रार्थना शुनी। एल्हेरेलेइ, तेरी कुआन्श एलीशिबाई मट्टू भोनूए, ते तू तैसेरू नंब यहून्ना रेख्वां।

14 तैसेरे ज़र्म भोने सेइं तू बडो खुश भोलो। त बडे लोक भी खुश भोले।

15 तै प्रभु-परमेशेरी नजरी मां महान भोलो, ते तैनी कान्ची भी किसमेरी नशे बाले चीज त कने शराब कधे न लोडे पियोरी, ते तै अपनि अम्मारे पेटे मां भोते वक्तेरां परमेशेरी पवित्र आत्मारी शेक्ति सेइं भरपूर भोलो।

16 तै इस्राएली लोकन मरां बडे लोक परमेशेरे पासे जै तैन केरो प्रभु परमेशे वापस तैस कां आनेलो, जैना अपने पापां केरि वजाई सेइं परमेशे करां दूर भोरे थियो।

\* 1:5 1:5 याजक याजक यहूदी मन्दरे मां सेवा केनेवालो अक सेवक भोतो थियो, तै बलिदानां चादनेरि सेवा केरतो थियो जैना लोक मन्दरे मां आनते थियो।

17 ते तै एरो मैन्हु भोलो जैस पुड़ एलिय्याहरी आत्मा ते कने शक्ति भोली। तै परमेशेरी बत तियार केरेलो, तैस अगरी-अगरी बल्लेलो ताके हाज बव्वां केरो दिल औलादेरे पासे ते परमेशर न मन्नेबाले लोकन धेर्मी लोकां केरे बत्तां केरे पासे बदलेलो, ताके जैखन प्रभु एज्जे त लोक तियार भोन।”

18 जकर्याहे स्वर्गदूते पुच्छू, “अवं केन्त्रे मेन्नी एन असन सेई भोनूए, अवं त बुढोई ते मेरी कुआन्श भी बुढी भोरीए।”

19 स्वर्गदूते जुवाब दित्तो, “अवं जिब्राईल आई अवं परमेशेरे कां खडो भोताई, अवं एल्हेरेलेइ भेजोरोई, कि अवं तीं सेई गल केरि ते तीं ए खुशखबरी शुनेई।

20 ते हेर जां तगर एना गल्लां पूरी न भोन तेरी ज़बान बंद भोली, ते तू गल न केरि सकेलो किजोकि तीं मेरी गल्लां केरू याकीन नई कियेरू जैना अपने वक्ते पुड़ पूरी भोनिन।”

21 ते जैखन जकर्याह ते स्वर्गदूत मन्देरे मां गल्लां लोरे थिये केरने त लोक मन्देरे बेइर अंगने मां जकर्याह बलगने लोरे थिये, तैना बड़े हैरान भोइजेइ कि जकर्याह मन्देरे मां एतूरू चिरि किजो लाव।

22 जैखन तै बेइर निस्सो, त तै कुजी न बटो ते तैन लोकेई बुझी छडू, कि एनी मन्देरे मां किछ् दर्शन लाहेरूए किजोकि तै इशारो केरतो थियो, पन कुजी न थियो बटतो।

23 जेइस यरूशलेम नगरेरे मन्देरे मां जकर्याहरू एक्की हफतेरे याजकेरी सेवारू कम पूरू भोवं, त तै अपने घरे जो बल्लो जेव।

24 किछ् वक्तेरां बाद तैसेरी कुआन्श एलीशिबा दोज़ीतीए भोइ, ते तै पंच महीन्न तगर बेइर लोकन मां न जेई। तैसां ज़ोवं,

25 “प्रभुए मीं पुड़ दया केरतां केतूरू महान कम कियूं, ते अवं दोज़ीती भोइ, ते जैस गल्लेरे वाजाई सेई लोक मीं घटिया समझते थिये, तै गल दूर की।”

### CHAPTER 17

26 एलीशिबारे दोज़ीती भोनेरे शइयोवं महीने जिब्राईल स्वर्गदूत परमेशेरी तरफां गलील इलाकेरे नासरत नगरे मां,

27 एक्की अड्लैई कुइये कां भेजो। तैसारी कुडमाइ दाऊदेरे खानदाने मरां एक्की मडदे सेई भोरी थी जेसेरू नवं यूसुफ थियूं, ते तैस कुइयरू नवं मरियम थियूं।

28 स्वर्गदूते तैस कां एइतां ज़ोवं, “आनन्द ते ज़ीत तेरी भोए, तीं पुड़ परमेशेरी बड़ी दया भोरीए, प्रभु तीं सेई साथिये!”

29 मरियम स्वर्गदूतेरी गल शुन्तां परेशान भोइतां सोचने लगी एन केरहु नमस्कारे?

30 स्वर्गदूते तैस सेई ज़ोवं “हे मरियम, डर न, किजोकि परमेशेरो तीं पुड़ बड़ो अनुग्रह भोरोए।

31 तू दोज़ीती भोली तीं अक मट्टू भोलू, ते तू तैसेरू नवं यीशु रेखां।

32 तैन महान भोलू ते तैस जो परमप्रधान परमेशेरू मट्टू ज़ोले, ते परमेशर तैस तैसेरे पूर्वज दाऊद राजेरू ज़ेरो राज़ो बनालो।

33 ते तै याक्वेरे खानदाने पुड़ हमेशा राज़ केरेलो, ते तैसेरू राज़ कधे खतम न भोलू।”

34 मरियमा स्वर्गदूते पुच्छू, “एन केन्त्रे भोइ सकते? अवं त अड्लैई आई।”

35 स्वर्गदूते जुवाब दित्तो, “पवित्तर आत्मा तीं पुड़ उतरेलो, ते परमप्रधान परमेशेरी शक्ति तीं पुड़ सैयो केरेली एल्हेरेलेइ तै बच्चो ज़ै जर्मएलो तै पवित्तर भोलो तैस जो परमेशेरू मट्टू ज़ोले।

36 ते हेर तेरी रिशतेदार एलीशिबाई भी बुढे बारे मट्टू भोने बालूए तैस जो लोक बाँझ ज़ोते थिये, तैस दोज़ीती शा महीने भोरेन।

37 किजोकि परमेशेरे लेइ किछ् भी नमुमकिन नई।”

38 मरियमा स्वर्गदूते जुवाब दित्तो, “अवं परमेशेरी सेवा केरती ज़ैन तीं ज़ोरूए तैन भोए।” तैखन स्वर्गदूत तैस करां बल्लो जेव।

### CHAPTER 18

39 किछ् दिहाइन पत्ती मरियम तियार भोइतां यहूदियारे इलाकेरे एक्की पहाड़ी नगरे मां जेई।

40 ते जकर्याहरे घरे मां गेइतां एलीशिबा जो नमस्कार कियूं ।

41 जैखन एलीशिबा मरियमारू नमस्कार शुनू त बच्चो तैसारे पेटे मां उच्छड़ने लगो ते एलीशिबा पवित्तर आत्माई सेइं भेरोई जेई ।

42 ते बड़े ज़ोरे सेइं जोने लगी, “तू कुआन्शन मां धन आस ते जै बच्चो तीं ज़ांनोए तै भी धने!

43 ते मेरे लेइ बड़ी इज़्जतरी गल आए कि, मेरे प्रभुएरी अम्मा मीं कां आई!

44 किजोकि हेर ज़ेरि तेरे नमस्कारेरी आवाज़ मीं शुनी त बच्चे खुशी सेइं मेरे पेटे मां छालां लगे मारने ।

45 तू धन आस तीं तैन गल्लन पुड़ विश्वास कियो ज़ैना प्रभुए तीं सेइं जोई कि, तैना पूरी भोली ।”

~~~~~

46 ते मरियमा ज़ोवं,

“अवं प्रभुएरी तारीफ़ करती ।

47 ते मेरी आत्मा मेरे मुक्ति देनेवाले

परमेशरे सेइं खुशी भोइ ।

48 किजोकि तैनी अपनि सेवा करने बैलरी गिरोरी हालती पुड़ नज़र की,

अज़ेरां देइतां हर ज़मानेरे लोक

मींजो धन ज़ोले ।

49 किजोकि परमेशरे मेरे लेइ बड़ा-बड़ा

कम्मां कियोरन ते तैसेरू नवं पवित्तर भोए ।

50 तैसेरी दया तैस करां डरने बालन

पुड़ पीड़ी-पीड़ी तगर राचे ।

51 तैनी अपने शेक्ति सेइं बड़डां-बड़डां कम्मां कियोरन

तैनी घमण्डी तितर-बितर किये ।

52 तैनी राज़े राज़ करने करां रोके,

ते तैनी नमर लोकन आदर दिती ।

53 तैनी नियन्ने रोड़ी-रोड़ी चीज़ेइं सेइं रज़ाने

ते धन दौलती वाले खाली हथेइं भेजे ।

54 तैनी अपने वादे ज़ैना तैनी इश्शे दादन-पड़दादन सेइं कियोरे थिये याद किये, तैनी अपनि सेवा करनेवाले इस्राएली लोकां केरि महत की,

55 तैनी हमेशारे लेइ अब्राहमे पुड़ ते तैसेरी

औलादी पुड़ दया केरनि याद रख्खी ।”

56 मरियम कोई टलाई महीन्न तगर एलीशिबा सेइं साथी राई ते फिरी अपने घरजो आई ।

~~~~~

57 एलीशिबारो गल्हे बिशनेरो वक्त एज्जी अव ते तैस मट्टू भोवं ।

58 तैसारे आसेपासेरे रिशतेदारेइं एन शुनू कि परमेशरे तैस पुड़ बड़ी दया कियोरिये ते तैस सेइं साथी खुशी मनाई ।

59 अटोवं दिहाडे तैना मट्टेरो खतनो करने आए, ते तैना तैसेरू नवं तैसेरे बाजी केरे नव्वें पुड़ जकर्याह रखनू चाते थिये ।

60 पन तैसेरी अम्मा ज़ोने लगी, “नई एसेरू नवं यूहन्ना भोलू ।”

61 किछ तैस जो ज़ोने लगे, “तुश्शी खानदेनी मां कोई भी एस नव्वेरो नई ।”

62 तैखन तैन लोकेई जकर्याहरे पासे इशारे सेइं पुच्छू कि तू मट्टेरू नवं कुन रखनू चातस?

63 ते तैनी पटारी मगी ते तैस पुड़ लिखू, “एसेरू नवं यूहन्ना आए,” ते सब लोक हेरान रेइजे ।

64 तैखने तैसेरी जिभ खुल्ली ते जकर्याह गल्लां लगे करने ते परमेशरेरी तारीफ़ करने लगे ।

65 ते आसे-पासेरे लोक एस तमाशे हेरतां हैरान रेडजे, ते यहूदियारे इलाकेरे एककी पहाड़ी नगर मां एस गल्लरी चरचा भोने लगी।

66 ते शुन्ने बाले अपने-अपने मन्न मां सोचते थिये, “एन मट्टू बड्डू भोइतां केरहु भोनूए?” किजोकि परमेशेरी शक्ति अऊजेरी देतीं एस सेइं साथीए?

*???????? ??????? ??????? ????????????? ??????? ???????*

67 तेखन तैसेरो बाजी जकर्याह पवित्र आत्माई सेइं भेरोवं ते भविष्यवाणी करने लगे।

68 “प्रभु इस्राएलेरो परमेशर धन भोए, किजोकि तेनी एइतां अपने लोकन मुक्ति दितोरिये।

69 ते तैसेरे दास दाऊदरे घराने मरां इशे लेइ अक मुक्ति देनेवालो भेजरोए।

70 (बडे पेइले जेन्चरे पवित्र नेबी केरे जिरिये जोरू थियूं, जैन शुरु करां देते ओरूए।)

71 असां अपने दुश्मन करां ते बैर रखने बालन करां मुक्ति हासिल केरम।

72 ते तै इशे दादे पड़दादन पुड़ दया केरे

ते अपनो पवित्र करार याद केर।

73 तै करार जै तीं इशे पूर्वज

अब्राहमे सेइं कियोरो थियो।

74 कि तै असन हिम्मत देलो,

कि असां अपने दुश्मन करां बगैर केन्वी भी डरे सेइं बेंची सखम।

75 ते अपनि जिन्दगी तैस सोंफम ते सारी जिन्दगी पवित्रेइ ते धार्मिकता ज्रीम।

76 ते हे बच्चां तू नबी भोलो

किजोकि तू परमेशेरे अग्री-अग्री चलेतां

लोकन तियार केरेलो कि परमेशर एज्जोए।

77 तै अपने लोकन तैन केरे पाप माफ़ केनेरे जिरिये मुक्तेरे बारे मां ज्ञान देलो।

78 ते इशे परमेशेरी दया एरी भोली

जेन्चरे दिहाड़ी लौ देते तेन्चरे मसीह स्वर्गां एज्जेलो।

79 ताके तैन केरे लेइ जैना पापे मां ज़ीतन ते हमेशेरे मौतरे खतरे मां रातन लौ दे,

ते तै असन बत हिराए ताके अस सुखे सेइं जिन्दगी ज्रीम।”

80 तैन मट्टू यानी यहून्ना बेडोतो जेव ते आत्माई मां बद्धतो जेव ते इस्राएलेरे लोकन प्रचार केने तगर सुनसान ठैरन मां राव।

## 2

*???????? ?????*

*(???? 1:18-25)*

1 तैन दिहैइन मां रोम मुलखेरे महाराजे औगस्तुसे एलान कियूं कि, दुनियारे सारे मैन्हु केरि गिनती की गाए।

2 ए पेइली मैन्हु केरि गिनती थी, जै सीरिया इलाकेरे गवर्नर क्विरिनियुसेरे वक्ते मां भोइ।

3 ते सारे लोक, मैन्हु केरि गिनतेरे लेइ नव लिखाने अपने-अपने पूर्वजां केरे नगर जो चले जे।

4 यूसुफ भी गलील इलाकेरे नगर नासरते मरां यहूदिया इलाके मां दाऊदरे नगर बैतलहम मांजो चलो, किजोकि तै दाऊद राजेरे खानदाने मरां थियो।

5 ताके तेड़ी मरियमी सेइं साथी ज़ैस सेइं तैसेरी कुड़माइ भोरी थी ते तै दोज़ीती थी नव लिखाए।

6 तैन केरे तेड़ी रेइतां तेसारे गल्हे बिशनेरो वक्त अव।



7 ते तैस पेडलू मट्टू भोवं ते तैसां तैन फैल्हडी मां पलेटतां खुरली मां रख्वू किजोकि तैन धर्मशाली मां कोन्च टार न थी मैल्लोरी ।

XXXXXXXXXX XXXX XXXXXXXX XXXXXXXX

8 किछ् पुहाल राती एक्की इलबडें मां गब्बां करां पेरहो करते थियो ।

9 ते परमेशेरो स्वर्गदूत तैन कां बांदो भोव ते परमेशेरी महिमारी लौ तैन केरे च़ेवरे पासन बलने लगी ते तैना बडे डेरि जे ।

10 तैखन स्वर्गदूते तैन जो ज़ोवं, “डरा नन्ना, किजोकि अवं तुसन अक बडी खुशखबरी शुनाने ओरोडें, ज़ै खुशी सैरी लोकां केरे लेइ भोली ।

11 अज़ बैतलहमे मां ज़ैन दाऊद राज़ेरू नगर थियू, तुशे लेइ अक मुक्ति देनेबालो ज़रमोरोए यानी यीशु मसीह प्रभु ।

12 तैसेरो तुशे लेइ ए निशान भोलो कि तुसन अक मट्टू फैल्हडी मां पलैट्टेरू गाल्हेरे बेइर खुरली मां मैल्लू ।”

13 ते अकदम तैस स्वर्गदूते सेइ हारे भी स्वर्गदूत बांटे भोए ते तैना परमेशेरी तारीफ़ केरने लगे ते एन ज़ोने लगे,

14 “स्वर्गे मां परमेशेरी महिमा भोए, ते ज़मीनी पुड़ तैन मैनन् शान्ति मैल्ले, ज़ैन पुड़ परमेशर खुशे ।”

15 ज़ैखन स्वर्गदूत पुहालां केरे सामने वापस स्वर्गे मांजो च़ले जे । पुहाल एप्पू मांमेइ ज़ोने लगे, “एज्जा अस बैतलहम नगरे मां गाम ज़ै बिस्तार प्रभुए असन दित्तोरौए तैस हेरम ।”

16 एल्हेरेलेइ तैना लूशी तैट्टां च़ले जे ते तैडी पुज्जे ते सच्चे तैडी मरियम, यूसुफ ते निकडो बच्चो फैल्हडी मां पलेट्टोरौ गोरू केरि गाल्हेरे बेइर खुरली मां मैल्लो ।

17 ते पुहाल एन हेरतां ज़ै गल तैन एस बच्चेरे बारे मां ज़ोरी थी सेब्बन सेइ ज़ोने लगे ।

18 पुहालां केरि गल्लां शुन्तां सारे लोक हेरान रेइजे ।

19 पुन मरियम सैरी गल्लां अपने दिले मां रेखतां सोचने लगी ।

20 ते पुहालन ज़ेन्च़ेरे तैनी स्वर्गदूते ज़ोरू थियू, तैनेई अपनि एछ्छेई तैन सब किछ् लेइतां परमेशेरी तारीफ़ केरते वापस घरजो च़ले जे ।

XXXXXXXXXX XXXX XXXXXXXX

21 अटोवं दिहाडे ज़ेइस तैसेरो खतनो केरनेरो वक्त अव त तैसेरू नवं यीशु रख्वू । एन तैन नवं आए, ज़ैन स्वर्गदूते मरियमारे दोज़ीतीए भोने करां पेडले रख्वेरू थियू ।

XXXXXXXXXX XXXX XXXXXXXX XXXXXXXX

22 ज़ैखन मूसरे कानूनरे मुताबिक तैसेरे शुच्चे भोनेरे दिहाडे पूरे भोए, त यूसुफ ते मरियमा यीशु यरूशलेम नगरे मांजो नीयो ताके तैस प्रभुए कां अर्पण केरन ।

23 ज़ेन्च़ेरे प्रभुएरे कानूने मां लिखोरूए, “सारां पेडलां मट्टां परमेशेरे लेइ पवित्र भोलां ।”

24 ज़ेन्च़ेरे प्रभुएरे कानूने मां लिखोरूए कि, “अक जोडी गुधू केरि या कबूतरेरे दूई बच्चे बलिदानेरे लेइ आन ।”

XXXXXXXXXX XXXX

25 तैस वक्ते यरूशलेम नगरे मां अक मैन्हु थियो, तैसेरू नवं शमौन थियू, तै बडो धर्मी ते भक्त मैन्हु थियो, तै मसीह बलगने लोरो थियो, कि तै एज्जेलो ते इस्राएली लोकन शान्ति देलो, ते तैस पुड़ पवित्र आत्मा थियो ।

26 पवित्र आत्मा तैस पुड़ बांद् कियू, कि ज़ां तगर तू प्रभुएरे मसीह न लाएलो तांतगर न मरेलो ।

27 तैस दिहाडे शमौन पवित्र आत्मा च़लाव, तै आत्मिक शक्ति सेइ मन्दरे मां अव तैखन यीशु भी तैसेरे अम्मा बाजेइ अन्तर आनारो थियो, कि तैसेरेलेइ मूसरे कानूनरे मुताबिक कमाव ।

28 त शमौने बच्चो कुम्मे मां ट्लातो ते परमेशेरी तारीफ़ केरने लगे ।

29 “हे परभु तीं जै अपनो वादो कियोरोए  
अपने दासे आनन्दे सेइं मरने दे ।

30 किजोकि मीं अपने एछ्छेईं सेइं मुक्ति देनेवालो लाव, जै तीं सैरी लोकां केरे लेइ भेजोरोए ।

31 जै तीं सैरी कौमां केरे सामने तियार कियोरोए ।

32 तै, परमेशर गैर कौमन पुड़ बांदो केरनेरे लेइ लौ आए,  
ते इस्राएली लोकां केरे लेइ अक बड़ी महिमा भोए ।”

??????????

33 यीशुएरे अम्मा बाजी शमौनेरी एना गल्लां शुन्तां हक्के-बक्के भोए ।

34 तैखन शमौने तैन बरकत दिती, ते तैसेरी अम्मा मरियम सेइं ज़ोवं, “हेरा, इन मट्टू एल्हेरेलेइ ठहरावरो, कि इस्राएले मां बड़े लोकां केरे लेइ नाश भोनेरी ते मुक्ति मैलनेरी वजा भोए, ते परमेशररी तरफां अक निशान आए पन बड़े लोक तैसेरे खलाफ भोले ।

35 ताके बड़े दिलां केरे खियाल खुल्ली गान ते तीं बड़ो दुःख भोनाए ज़ेन्चरे तलवार कटतीए ।”

36 तेड़ी अक कुआन्श थी जै नबिन थी, तैसारू नवं हन्नाह थियूं, अशेरेरे खानदाने मरां अक मैन्दु जेसेरू नवं फनूएल थियूं, हन्नाह तैसेरी कुई थी तै बड़ी बुढी थी ते अपने इलाहेरां वाद सत साल अपने मुन्शे सेइं साथी रहारी थी ।

37 ते विधवा थी तैसारी उमर चूरासी साल थी तै मन्दरे मरां न थी गाती ते रात दिहेड़ी प्रार्थना ते कने बरतां रखती ते परमेशररी आराधना करती रहती थी ।

38 तैखन तै भी तेड़ी एडतां परमेशररू शुक्र करने लगी ते बच्चेरे बारे मां तैन सेबन सेइं गल्लां लाई केरने, जैना बलगने लोरे थिये कि परमेशरे यरूशलेम नगरेरे लोकन छुटानेरे लेइ मसीह भेजोए ।

??????????

39 जैखन मरियम ते यूसुफ मूसरे कानूनेरे मुताबिक यीशुएरो खतनो कियो, त तैना गलील इलाके मरां अपने नगर नासरते मांजो जे ।

40 तैन मट्टू बडोतू जेवं ते अक्लमन्द भोतू जेवं किजोकि परमेशररो तैस पुड़ बड़ो अनुग्रह थियो ।

??????????

41 यीशुएरे अम्मा बाजी हर साल फ़सह तिहारेरी दिहाड़ी बनाने यरूशलेम नगरे मां गाते थिये ।

42 जैखन यीशु 12 सालां केरो भोव त तैना रीतरे मुताबिक यरूशलेम नगरे मां जे ।

43 जैखन तिहार वीतू त यीशुएरे अम्मा बाजी वापस घरजो आए त यीशु यरूशलेम नगरे मां रेइ जेव ते तैसेरे अम्मा बाजी कोई पतो न थियो ।

44 तेनेईं बुझू कि यीशु होरि मेनन् सेइं साथी अग्रोवं जोरोए, तैना अपने रिशतेदारन ते ज्ञान पिशानी बालन मां तोपने लगे ।

45 जैखन तैन यीशु न मैल्लो त तैना वापस तोपते-तोपते यरूशलेम नगरे मां पुजे ।

46 टलेइयोवं दिहाड़े तैन यीशु मन्दरेरे अंगने मां बुजुर्ग लोकन सेइं गलबात केरतो ते तैन सेइं सवाल जुवाब केरतो मैल्लो ।

47 जैना लोक तैसेरी गल्लां शुन्ने लोरे थिये तैना यीशुएरी गल्लां शुन्तां हैरान रेइजे ।

48 जैखन तैसेरे हाज बव्वेईं यीशु लाव त तैना हैरान रेइजे ते ज़ोने लगे, “मट्टां तीं असन सेइं एन कुन कमाव? तेरे हाज बव तीं तोपते-तोपते परेशान भोइ जे ।”

49 यीशु तैन सेइं ज़ोवं तुस मीं किजो तोपने लगगोरो थिये? “तुसन पतो नईं कि मीं अपने बाजेरे घरे मां रानू ज़रूरी थियूं?”

50 पन तैन तैना गल्लां केरि समझ न आई कि, एन केरो कुन मतलब आए ।

51 तैखन तै अपने अम्मा बाजी सेइं साथी नासरत नगरे मां अव ते अपने अम्मा बाजी कां राव ते मरियमा एना सैरी गल्लां अपने दिले मां रेख्खी ।

52 यीशु अक्ली मां भी ते कदे मां भी बडोतो जेव ते परमेशररी ते इन्सानेरी कृपाईं मां बद्धतो जेव ।

## 3

॥॥॥॥॥॥ ॥॥॥॥॥॥॥॥ ॥॥॥॥॥॥॥॥ ॥॥॥॥॥॥॥॥  
 (॥॥॥॥॥ 3:1-12; ॥॥॥॥॥ 1:1-8; ॥॥॥॥॥ 1:19-28)

1 तिबिरियुस महाराजेंरे हुकुमतेर परनोहूँ साले मां जेइस पुन्तियुस पिलातुस यहूदिया इलाकेरो गवर्नर थियो, ते गलीलेरे इलाके मां हेरोदेस गवर्नर थियो, तैसेरो दूला फिलिप्पुस इतूरैया ते त्रखोनीतिस इलाकां केरो गवर्नर थियो, लिसानियास, अबिलेन इलाकेरो गवर्नर थियो।

2 तैस वक्ते हन्ना ते कैफा महायाजक थिये, तेइस परमेशेरे जकर्याहेरे मट्टे यूहन्ना सेइं गल्लां की। जैन सुनसान ठैरी मां रातू थियूं।

3 ते यूहन्ना यरदन दरियारे आसेपासेरे इलाकन मां गोइतां ई पूरचार करने लगो, कि अपने पापन करां मनफिराथ, ते बपतिस्मो नेथ ताके परमेशर तुशे पाप माफ़ केरे।

4 जेन्चरे यशायाह नेबेरी किताबी मां लिखोरूए,  
 “सुनसान ठैरी मां फुकारने बालेरी आवाज एइचे कि,  
 ‘प्रभुएरी वत बनाथ ते तैसेरी वत्तां पैट्टी केरा।’”

5 “डुग्धी ठारां सैरी भेरोई गैनिन,  
 हर अक पहाइ ते च्चौदु बछ्छोइनोए

ते जैना टलेढी बत्तन तैना सिधी केरनिन जैना उन्दी उवरिन तैना पैट्टी केरनिन।

6 ते सब लोक तैस हेरेले, जै परमेशेरे तैन मुक्ति देने भेजोरोए।”

7 ते यूहन्ना तैन लोकन सेइं ज़ोवं, जैना जथन मां तैस करां बपतिस्मो नेने ओरे थिये, “तुस जेहरीले सप्येरे जेरे बुरे आथ! तुसन केनि ज़ोवं कि, एजनेबाले परमेशेरे कोपे करां नशशा?

8 बस्सा, सज़ाई करां बचनेरे लेइ तैना कम्मां केरा, जैन सेइं पतो लगगे तुसेईं सच्चे पापन करां मन फिरावरोए। ते अपने-अपने मने मां एन न ज़ोथ कि, अब्राहम जेन्चरे इशशो बाजीए, किजोकि अवं तुसन सेइं ज़ोताई कि परमेशर इन घोड़न मरां अब्राहमेरे लेइ औलाद पैदा केरि सकते।

9 ते हन्ना त बुट्टां केरे ज़ीलन पुइ परमेशेरो मैक्कु रख्वोरोए, एल्हेरेलेइ जै कोई तैस बुट्टेरो जेरो भोते, जै रोडो फल न दे, तै कटनोए ते अगगी मां छुडनोए।”

10 लोकेई तैस पुच्चछू, “फिरी असां परमेशेरी सज़ाई करां केन्चरे बचम?”

11 यूहन्ना तैन सेइं ज़ोवं, “जैस कां दूई कुरतेन त अक कुरतो तैस देथ जैस कां अक भी नई ते जैस कां रोट्टी आए त तै भी रोट्टी बंटे जैन कां नई।”

12 ते धइत नेनेबाले भी बपतिस्मो नेने ओरे थिये तैनेई तैस पुच्चछू, “हे गुरू जी असां कुन केरम?”

13 तैनी तैन सेइं ज़ोवं, “जैन तुशेरे लेइ सरकारी कानूनेरे हिसाबे सेइं रख्वोरूए तैस करां जादे धइत न नेइयथ।”

14 ते तैखन होरि सिपाहीएइं भी तैस पुच्चछू, “असां कुन केरम?” यूहन्ना तैन सेइं ज़ोवं, “केन्ची पुइ ज़ुलम केरतां बेहक न नेइयथ, ते न केन्ची पुइ झूटो दोष लेइयथ, पन अपनि तनखुवाही पुइ गुज्जारी केरथ।”

15 तैखन लोक इंतज़ारे मां थिये कि, मसीह जल्दी एजनोए, ते सब लोक अपने दिले मां यूहन्नारे बारे मां सोचते थिये कि जै ओरोए तै मसीह आए या नई?

16 त यूहन्ना तैन जुवाबे मां तैन सेइं ज़ोवं, “अवं त तुसन पैनी सेइं बपतिस्मो देताई पन जै मीं करां महाने ते एजनेबालो आए। अवं तैसेरो गुलाम बेनतां तैसेरी जुट्टी केरे तसमे भी खोलनेरे काबल नई। तै तुसन पवित्त्र आत्माई ते अगगी सेइं बपतिस्मो देलो।

17 तैसेरू छज्ज तैसेरे हथ्ये मां आए ते तै खलाइ रोडेचारे साफ केरेलो, ते गेहुं अपने कोठारे मां रखेलो पन झाङ्गी तैस अगगी मां फुकेलो जै कधी हिशनेरी न भोली।”

18 बस्सा ते बडे रोडेचारे लोकन समझेइतां परमेशेरी खुशखबरी शुनातो राव।

19 हेरोदेस नेवरोवं मुलखे पुड राज़ केरतो थियो। यूहन्ना तै झिङकावरो थियो, कि हेरोदेस अपने दला फिलिप्पुसेरी कुआन्श हेरोदियास ज़ै थी तैस सेइं ड्ला कियोरो थियो, ते होरो भी बडां बुरां कम्मां कियोरां थियां।

20 हेरोदेस एन सेब्बन करां जादे बुरू कम कियू कि यूहन्ना कैद केरतां छुड्डो।

~~~~~  
(लूका 3:13-17; मार्क 1:9-11)

21 ज़ैखन सब लोक बपतिस्मो नेने लोरे थियो त यीशुए भी बपतिस्मो नीयो, ते ज़ैखन तै प्रार्थना लोरो थियो केरने, त एरू भोवं कि स्वर्ग खुल्ली जेवं।

22 ते पवित्र आत्मा कबूतेरी शकली मां यीशु पुड उत्रो ते अम्बरे मरां ई आवाज़ आई, “तू मेरू दलारू मट्टू आस, अवं ती पुड बडो खुश आई।”

~~~~~  
(मार्क 1:1-17)

23 ज़ैखन यीशुए अपने सेवारू कम शुरू कियू त तैसेरी उमर 30 साल थी (जेन्नेरे समझू गातू थियू) एन यूसुफेरू मट्टूए, ते तैन एलेरू

24 एली मत्तातेरू ते तैन लेवेरू ते तैन मलकेरो ते तैन यन्नेएरो ते तैन यूसुफेरू मट्टू थियू,

25 ते तैन मत्तित्याहेरू ते तैन आमोसेरो ते तैन नहूमेरू ते तैन असल्याहेरू ते तैन नगगईएरू मट्टू थियू।

26 ते तैन मत्तातेरो ते तै मत्तित्याहेरू ते तैन शिमीएरू ते तैन योसेखेरू ते तैन योदाहेरू मट्टू थियू।

27 ते तैन यूहन्नारू ते तैन रेसारू ते तै जरुब्बाबेलेरू ते तैन शालतियेलेरू ते तैन नेरेरू मट्टू थियू।

28 ते तैन मलकीएरू ते तैन अदीयेरू ते तैन कोसामेरू ते तैन एल्मदामेरू ते तैन एरेरू मट्टू थियू।

29 ते तैन येशुएरू ते तैन एलीएजेरेरू ते तैन योरीमेरू ते तैन मत्तातेरू ते तैन लेवेरू मट्टू थियू।

30 ते तैन शमीनेरू ते तैन यहूदेरू ते तैन यूसुफेरो ते तैन योननेरू ते तैन एलयाकीमेरू मट्टू थियू।

31 ते तैन मलेआहेरू ते तैन मिन्नाहेरो ते तैन मत्ततेरो ते तैन नातानेरो ते तैन दाऊदेरू मट्टू थियू।

32 ते तैन यिशुएरो ते तैन ओबेदेरो ते तैन बोआजेरो ते तैन सलमोनेरो ते तैन नहशोनेरू मट्टू थियू।

33 ते तैन अम्मीनादाबेरू ते तैन अरनेरू ते तै हेसरोनेरू ते तैन पेरेसेरू ते तैन यहूदेरू मट्टू थियू।

34 ते तैन याकूबेरू ते तैन इसहाकेरो ते तैन अब्राहमेरू ते तैन तेरहेरो ते तैन नाहारेरू मट्टू थियू।

35 ते तैन सरूगेरो ते तैन रऊएरो ते तैन पेलेगेरो ते तैन एबेरेरू ते तैन शिलहेरू मट्टू थियू।

36 ते तैन केनानेरू ते तैन अरफक्षदेरो ते तैन शेमेरो ते तैन नूहेरो ते तैन लेमेकेरू मट्टू थियू।

37 ते तैन मथूशिलहेरू ते तैन हनोकेरो ते तैन यिरिदेरू ते तैन महललेलेरू ते तैन केनानेरू मट्टू थियू।

38 ते तैन एनोशेरू ते तैन शेतेरू ते तैन आदमेरो ते तैन परमेशेरू मट्टू थियू।

## 4

~~~~~  
(लूका 4:1-11; मार्क 1:12-13)

1 फिरी यीशु पवित्र आत्मा सेइं भरपूर भोइतां यरदन दरियाए मरां वापस अव त 40 दिहाडे पवित्र आत्मारू च़लाने सेइं सुनसान ठेरी जो च़लो जेवं।

2 तैन 40 दिहाडन मां शैतान तैस अज़मातो राव, तैन दिहेडन मां तैनी किछ न खाव पीवं ते ज़ैखन तैना दिहाडे पूरे भोए त तैस दलख लगगी।

3 शैताने तैस जो ज़ोवं, “अगर तू परमेशेरू मट्टू आस त इन घोड़न जो ज़ो कि एना रोट्टी बन्न।”

4 यीशु तैस जुवाब दित्तो, “पवित्रशास्त्रे मां लिखोरूए, ‘मैन्हु सिर्फ रोट्टेइ सेइं ज़ीतो न राए।’”

5 फिरी शैताने यीशु एककी उच्चे पहाड़े पुड़ घिन्तां जेव ते तैट्ठां एककी पले मां तैस तैड़ी दुनियारां सारां राज्ज़ां हिरां।

6 ते तैनी यीशु सेइं ज़ोवं, “एन सब किछ मेरे अधिकारे मां आए, ते एसेरी सारी धन दौलत अवं तीं देलो एन मेरे स्पुर्दे। अवं ज़ैस चाताई तैस देइ सकताई।

7 बस अगर तू मीं कां मथ्यो टेकस त एन सब किछ तेरू भोलू।”

8 यीशुए तैस जुवाब दित्तो, “पवित्रशास्त्रे मां लिखोरूए, ‘तू सिर्फ अपने प्रभु परमेशेरे कां मथ्यो टेकतां ते सिर्फ तैसेरी भक्ति केरां।’”

9 ते तैनी यीशु यरूशलेम नगरे मन्देरी उच्ची छम्पी पुड़ नेइतां खड़ो कियो ते तैस सेइं ज़ोवं, “अगर तू परमेशेरू मट्टू आस त अपनो आप इट्ठां उन्ढो बछ्छोइ।

10 किजोकि पवित्रशास्त्रे मां लिखोरूए, ‘तै तेरे लेइ अपने स्वर्गदूतन ज़ोलो ते तैना तेरी हफ़ाज़त केरेले।’

11 ते तैना तीं अपने हथ्यन पुड़ छूले ताके एरू न भोए कि तेरे पावन घोड़न सेइं ठोकर लगगे।”

12 यीशु तैस जुवाब दित्तो, “पवित्रशास्त्रे मां इन भी लिखोरूए तू अपने प्रभु परमेशेरी अज़मैइश न केरां।”

13 ज़ैसन शैताने तैसेरी बड़े तरीकेई अज़मैइश की, त किछ ज़िरेरां बाद तैस करां ज़लो जेव।

~~~~~

(~~~~~ 4:12-17; ~~~~~ 1:14-15)

14 फिरी यीशु पवित्र आत्माारी शेक्ति सेइं भरपूर भोइतां गलील इलाके मां वापस अव, ते सारे इलाके मां तैसेरी मुशूरी भोइजेइ।

15 यीशु तैन केरे प्रार्थना घरन मां शिक्षा देतो राव, ते सब लोक तैसेरी तारीफ़ केरेते थियो।

~~~~~

(~~~~~ 13:53-58; ~~~~~ 6:1-8)

16 फिरी तै नासरत नगर मां वापस अव ज़ैड़ी तै पलोरो थियो। अपने रीतरे मुताबिक आरामेरे दिहाड़े तै प्रार्थना घरे मां जेव ते वचन पढ़नेरे लेइ खड़ो भोव।

17 ते तैस यशायाह नेबेरी किताब दित्ती ते तैनी खोलतां तैन वचन कढ़ ज़ैड़ी लिखेरू थियू, कि,

18 “प्रभुएरी आत्मा मीं पुड़े,

एल्हेरेलेइ कि तैनी गरीबन खुशखबरी शुनानेरे लेइ

मेरू अभिषेक कियोरूए,

तैनी अवं भेजोरोई कि कैदन हथरां छेइडी (ज़ैना शैतानेरे कब्जे मां आन)

ते कांना केरि एछ्छन ठीक भोनेरी खबर शुनेई, ते

ज़ैन पुड़ जुलम भोते तैन लोकन आज़ाद केरि।

19 ते तैस वक्तेरू एलान केरि ज़ेइस परमेशर लोकन पुड़ दया केरेलो।”

20 फिरी तैनी तै किताब बंद केरतां सेवके कां वापस देइतां बिश्शी जेव। ज़ेत्तरे प्रार्थना घरे मां थियो सब तैसेरां तकते थियो।

21 ते तै तैन सेइं ज़ोने लगगे, “अज़ पवित्रशास्त्रेरू तैन वचन तुश्शे सामने पूरू भोवं।”

22 ते सब तैसेरी तारीफ़ केरने लगगे, ते तैसेरी गल्लन पुड़ बड़ो अनुग्रह थियो, ज़ैना गल्लां तैसेरे ऐशेरां निसती थी, ते लोक हैरान भोइतां ज़ोने लगगे, “कुन एन यूसुफ़ेरू मट्टू नई?”

23 यीशु तैन सेइं ज़ोने लगगे, “ए कहावत तुस मीं पुड़ ज़ुकर ज़ोले, कि हे बेईद जी अपनो आप त ठीक केर, ज़ैन किछ असेई कफरनहूम नगर मां केरतू शुनेरूए, तैन इड़ी अपने नगरे मां भी केर।”

24 ते तैनी इन भी ज़ोवं, “अवं तुसन सेइं सन्न ज़ोताई, कि कोई नबी अपने मुलखे मां कबूल न कियो गाए ।

25 अवं तुसन सेइं सन्न ज़ोताई कि एलिय्याह नेबेरे वक्ते मां ज़ैखन साडे टलाई साल अम्बर बंद भोवं (यानी झड़ी न भोइ) ते इडी तगर कि सैरी मुलखे मां बडो काल पेईं जेव ते तैस वक्ते बेड़ि विधवा कुआन्शां इस्राएले मुलखे मां थी ।

26 पन एलिय्याह नबी, तैन मरां केन्ची कां नईं पन सैदा नगरेरे नेडे सारफत नगर मां एक्की विधवा कां भेजो, ज़ै यहूदी न थी ।

27 ते एलीशा नेबेरे ज़माने मां इस्राएलेरे मुलखे मां बडे कोढी थिये पन तैन मरां कोई भी कोढे करां साफ न थियो भोरो, पन सिर्फ अक सीरियारो रानेबालो नामान कोढे करां साफ भोरो थियो, ज़ै गैर कौमी मरां थियो ।”

28 ज़ेत्तरे लोक प्रार्थना घरे मां थिये एना गल्लां शुन्तां सरकी सेइं लाल-लाल भोइ जे ।

29 ते खडे उट्टठां तैस नगर करां बेइर निस्से ते तै तैस पहाड़ेरी च़ौटी पुङ्घिन्तां जे ज़ैस पुङ्घि तैन केरू नगर आवाद थियू, ताके तैस तैट्टां उन्दे बछ्छोइतां मारन ।

30 पन यीशु तैन मरां निस्तां ज़लो जेव ।

*?????? ???? ???? ???? ???? ???? ???? ????
(????? 1:21-28)*

31 फिरी तै गलील इलाकेरे कफरनहूम नगरे मांजो जेव । ते आरामेरे दिहाडे तैन शिक्षा देने लगगोरो थियो ।

32 ते लोक तैसेरी शिक्षा शुन्तां हैरान रहते थिये किजोकि तैसेरी शिक्षा बडे अधिकारे सेइं थी ।

33 प्रार्थना घरे मां अक मैन्हु थियो, ज़ैस पुङ्घि भूतेरो सायो थियो । तै बडे ज़ोरे सेइं चिन्डां मारने लगो ।

34 “हे नासरत नगरेरे यीशु! असन तीं सेइं कुन कम? कुन तू असन नाश केरनेरे लेइ ओरोस? अवं ज्ञानताई कि तू कौन आस, तू परमेशेरू पवित्र मट्टू आस!”

35 यीशुए तैस झिङक देइतां ज़ोवं, “चुप रा, एस मैन्हु मरां निस्सी गा!” तैखन भूते तै मैन्हु ज़मीनी पुङ्घि शैरी दिन्तो, ते तैस मरां निस्सी जेव ।

36 एन हेरतां सारे लोक बडे हैरान भोए ते एप्पू मामेइं ज़ोने लगे, “ए कुन गल आए! तै अधिकारे ते शेक्ति सेइं भूतन हुक्म देते ते तैना तैस मरां निस्सी गातन ।”

37 ते सारे मुलखेरे मां च़ेव्रे पासन तैसेरी खबर फैली जेईं ।

*???? ???? ???? ???? ???? ???? ???? ????
(????? 8:14-17; ???? 1:29-34)*

38 फिरी ते प्रार्थना घरे मरां उट्टठां शमौनेरे घरे जेव ते शमौनेरी शिक्षा बडो भुखार थियो, ते लोकेई तैसारे घारे मां यीशु सेइं ज़ोवं ।

39 तै खडो भोइतां तैसारे पासे फिरो ते बिमारी झिङकी, ते तैसारो सारो भुखार उतरी जेव ते तै खडी भोइ, ते तैन केरि सेवा केरने लगी ।

40 ज़ैखन दिहाड़ी लाई डुबने त लोकेई तैना सब लोक ज़ैन मां किसमां-किसमां केरि बिमैरी थी तैस कां आने, ते यीशुए तैन पुङ्घि हथ रेखतां तैना सब बज्झाए ।

41 भूतां भी चिन्डां मारतां थियां, ते ज़ोतां थियां, “तू परमेशेरू मट्टूस!” ते बडे लोकन मरां भूतां केरो सैयो निस्सी जेव, ते तै तैन झिङकतो थियो, ते तैन गल भी न थियो देतो केरने, किजोकि तैना भूतां ज्ञानतां थियां कि ए मसीह आए ।

*???????????? ???? ???? ???? ???? ????
(????? 1:35-39)*

42 ज़ैखन झेझ भोइ त यीशु उट्टठां बेइर एक्की सुनसान ठैरी मां जेव, ते पतोरों सारे लोक तैस तोपते-तोपते तैस कां पुज्जे ते रोकने लगे कि तू असन करां न गा ।

43 पन यीशुए तैन सेइं ज़ोवं, “मीं होरि नगरन मां भी परमेशरेरे राज्जेरी खुशखबरी शुनानी जरूरीए किजोकि अवं एल्हेरेलेइ भेजोरोई।”

44 ते तै यहूदिया इलाकेरे प्रार्थना घरन मां प्रचार करतो राव।

5

????? ???? ???? ?

(????? 4:18-22; ?????? 1:16-20)

1 एक्की दिहाडे यीशु गन्नेसरतेरे समुन्दरे* बन्ने पुड़ खेडोरो थियो, ते बडे लोक तैस कां करां परमेशरू वचन शुन्नेरे लेइ तै उन्दे बिछड़ी गाते थियो।

2 तैनी दुई किशती बन्ने लेगोरी लेई, ते मेछली ट्लानेवाले किशती इलेखी छेडतां अपना ज़ालां धोने लगगोरो थियो।

3 यीशु एक्की किशती मां चढो ते किशतेरे मालिके शमौने सेइं ज़ोने लगो, तुस किशती इट्टां बन्ने पुडेरां नेइतां थोड़ी दूर लाथ। फिरी यीशु किशती मां विशतां तैन लोकन उपदेश देने लगो।

4 ज़ैखन तैनी लोकन शिक्षा दिती त तै शमौने सेइं ज़ोने लगो, “तुस किशती डुग्धी ठैरी चलाथ ते मेछली ट्लानेरे लेइ ज़ाल छुडा।”

5 शमौने जुवाब दित्तो, “हे गुरू, असेई सैरी राती तरले कियोरेन ते अक मेछली भी नई ट्लेइयोरी, पन असां तेरे ज़ोने सेइं ज़ाल छुडतम।”

6 आखकारां पतरस ते तैसेरे सैथेई ज़ालां छेडी दित्तां ते एतरी मेछली लेगि, कि ज़ालां छिन्दोइतां मेछली बेइरोवं निस्सने लेगि।

7 तैखन तैनेई अपने सैथन जो ज़ैना होरि किशती पुड़ थिए, इशारो कियो कि एज्जा इशशी महट केरा, ते तैना भी आए ते किशती मेछलेई सेइं एतरी भरोई जई कि किशती डुबने लगी।

8 शमौन पतरस एन हेरतां यीशुएरे पावन पुड़ पेइतां ज़ोने लगे, “हे प्रभु, अवं पापी मैन्हु आई तू मीं करां दूर भो!”

9 गल ए थी कि तै त तैसेरे साथी एतरी मेछली लेइतां हैरान भोइ ज़ोरे थियो।

10 तेरहो हाल जेब्देरे मट्टां केरो यानी याकूब त कने यूहन्नारो भी थियो, ज़ैना शमौने सेइं साथी थियो, यीशुए शमौने सेइं ज़ोवं, “डर नन्ना अज्जेरे बाद तू मेछली ट्लाने वालो नई, बल्के मैनन् अकोट्टे करतां मेरे चले बनानेवालो भोलो।”

11 तैनेई किशती इलेखी एन्तां लेई, ते अपनू सब किछ छेडतां यीशु पत्ती चले जे।

????? ???? ?

(????? 8:1-4; ?????? 1:40-45)

12 ज़ैखन यीशु एक्की नगर मां थियो, ते एरू भोवं कि तैडी अक मैन्हु थियो, ज़ेसेरे सैरी जानी कोद थियूं, तैनी यीशु लाव, ते तै ज़ैन्धु केरे भारे विशतां तैस कां मिन्तत केरतां ज़ोने लगो, “हे प्रभु तू चास त मेरू कोद बज्जेई सकतस।”

13 यीशुए अपनो हथ तैस पुड़ रखवो ते ज़ोवं, “अवं चाताई, तू बज्जोस।” ते तैखने तैसेरू कोद साफ भोइ जेवं।

14 तैखन यीशुए तैस मैन्हु हुक्म दित्तो, “हेर, एसेरे बारे मां केन्ची सेइं किछ न ज़ोइयां। बल्के अपनो आपे याजके हिरा। तैल्ला पत्ती, तू अपने बेज्जोनेरे वजाई सेइं चढतल च़ाद, ज़ेसेरे बारे मां मूसा नेवे कानूने मां हुक्म दित्तोरोए। ताके लोकन पतो चले कि तू बेज्जोरोस।”

15 पन यीशुएरे बारे मां सेबन पतो लगो ते लोक दूरेरां देंते एजने लगे ताके यीशुएरी गल्लां शुन्न कने अपनि बिमैरन करां बेज्जोन।

16 पन यीशु जादे केरतां सुनसान ठैरी चलो गातो थियो, ते प्रार्थना केरतो रातो थियो।

* 5:1 5:1 गन्नेसरतेरे समुन्दरे इन गलील समुन्दरेरू दुइयोवं नवं आए

॥॥॥॥ ॥॥॥॥॥ ॥॥॥॥॥॥ ॥॥॥॥॥॥

(॥॥॥॥॥ 9:1-8; ॥॥॥॥॥ 2:1-12)

17 एककी दिहेड़ी एरू भोवं कि यीशु शिक्षा देने लगगोरो थियो, ते तैखन किछ फरीसी ते शास्त्री लोक ज़ोते थिये, तैना गलील इलाके ते यहूदियारे सैरी इलाकन मरां यरूशलेम नगरे मां ओर थिये; ते परमेशेरी शक्ति यीशु सेइं साथी थी, ते विमार बेज्जोइतां गाते थिये ।

18 किछ मैनेई अक अधरंगी मैन्हु खट्टी पुड़ छुइतां आनोरोए थियो, ते तैना कोशिश लगे केरने कि एस अन्तर नेइतां यीशु कां पुजाम ।

19 पन अन्तर एतरी तंगी थी कि तैना अन्तर न गेइ सके फिरी तैनेई तैस घरेरी छत पुट्टी जैस घरे मां यीशु थियो, ते खट्टां सने तै अधरंगी मैन्हु अन्तर यीशुएरे तुतरे अगर ओसालो ।

20 यीशु तैन केरो विश्वास हेरतां ज़ोवं, “हे दोस्त तेरे पाप माफ़ भोए ।”

21 शास्त्री ते फरीसी लोक सोचने लगे, “ए कौन मैन्हु आए, ज़ै परमेशेरी तुहीन केरते, परमेशेरे अलावा कौन पाप माफ़ केरि सकते?”

22 यीशुए तैन केरि गल्लां बुझी ते तैन जुवाब दित्तो, “तुस अपने-अपने मने मां एन्चरां किजो सोचने लगगोरथ?

23 कुन ज़ोनू सुखतुए, तेरे पाप माफ़ भोए, या एन ज़ोनू उठ, ते चल फिर?”

24 पन तुसन पतो लगगे, मैनेरे मट्टे ज़मीनी पुड़ पाप माफ़ केरनेरो अधिकारे,” फिरी यीशुए तैस विमारे जो ज़ोवं, “अपनि खट सल्ल ते घरजो चलो गा ।”

25 तै अधरंगी विमार मैन्हु सेब्बी केरे सामने ते खड़े उठो ते जैस खट्टी पुड़ तै झुलतो थियो, अपने दोगे पुड़ छुइतां परमेशेरी बड़याई केरतो-केरतो घरजो चलो जेव ।

26 तैना सारे लोक हैरान राए ते परमेशेरी तारीफ़ केरने लगे ते कने ज़ोने लगे, “ए त असेई अज नव्वीं गल लाई ।”

॥॥॥॥ ॥॥॥॥ ॥॥॥॥ ॥॥॥॥॥॥ ॥॥॥॥॥॥॥ ॥॥॥॥॥॥॥

(॥॥॥॥॥ 9:9-13; ॥॥॥॥॥ 2:13-17)

27 एना गल्लां बीतनेरां बाद यीशु तैटटां निस्सो, ते एककी चुंगी धिन्ने बाले कां चले जेव, तैसरू नवं लेवी थियू । ते तै चुंगी नेनेबाले दफ़तरे मां बिशशोरो लाव, ते यीशुए तैस जो ज़ोवं, “तू मीं पत्ती चल ते मेरो चेलो बन ।”

28 तै तैखने यीशु पत्ती चलो जेव ।

29 ते फिरी लेवी यीशुएरे लेइ अपने घरे अक बड़ी धाम दित्तो । ते तैड़ी चुंगी नेनेबाले ते होरे भी बड़े लोक थिये ज़ैना तैस सेइं साथी रोट्टी खाने बिशशे ।

30 फरीसी लोक ते शास्त्री यीशुएरे चलन सेइं ज़ोने लगगे, “तुस चुंगी नेनेबालन ते पापी लोकन सेइं साथी किजो खातथ पीतथ?”

31 यीशुए तैन सेइं ज़ोवं, “बिमारन डाक्टरेरी ज़रूरत भोचे, न कि सझर लोकन ।

32 अवं धर्मी लोकन नई, पन पापी लोकन कुजाने ओरोई कि, तैना अपने पापन करां मन फिरान ।”

॥॥॥॥॥ ॥॥॥॥

(॥॥॥॥॥ 9:14-17; ॥॥॥॥॥ 2:18-22)

33 तैना लोक यीशु सेइं ज़ोने लगे, “यूहन्नारे चले त बरत रखतन ते प्रार्थना भी केरतन ते एन्चरे फरीसी लोक भी केरतन, पन तेरे चले त खातन पीतन?”

34 यीशुए तैन जुवाब दित्तो, “इलाएरे दिहाड़े, कुन लाड़ो साथी भोंते सांते जन बरत रेखी सकतथ?

35 पन तैना दिहाड़े एज्जले, जैखन लाड़ो तैन केरां अलग कियो गालो (यानी मारो गालो) । तैन दिहेडन मां तैना (अपने दुख्वेरे वजाई सेइं) बरत रख्वेले ।”

36 फिरी यीशु तैन अक होरि मसाल दित्तो, “पुराने लिगाड़े पुड़ नव्वे लिगाड़ेरी टलोई कोई न लाए, नता तै टलोई तैस मरां होरू भी छिंदेली, ते कने पुराने सेइं तै मिले भी नन्ना ।

37 नव्वो दाछारो रस पुरैनी मसकी मां कोई न छुडडे, नन्ना त नव्वे दाछारो रस सेइं मसक भी फेट्टी गाचे, ते दाछारो रस भी डुल्ली गाते, ते तै मसक भी बरवाद भोचे ।

38 किजोकि नव्वो दाछारो रस नव्वीं मसकन मां भरोरो लोडते ।

39 कोई मैन्हु पुरानो दाछारो रस पीतां नव्वीं न पीनो चाए, किजोकि तै ज़ोते कि पुरानो दाछारो रस जादे रोडोए ।”

6

ⓂⓂⓂⓂ ⓂⓂⓂⓂⓂⓂ ⓂⓂⓂⓂⓂⓂ ⓂⓂⓂⓂ ⓂⓂ

(ⓂⓂⓂⓂ 12:1-8; ⓂⓂⓂⓂ 3:23-28)

1 एक्की फेरे यीशु त तैसेरे चले आरामेरे दिहाडे ऊडारन मामेइं एक्की बत्तां च़लारे थिये, ते तैसेरे चले शिल्लां हथेइं सेइं प्रोडतां खाने लगगे ।

2 एन लेइतां किछु फरीसी लोकेइं तैन सेइं ज़ोवं, “तुस एन कम किजो लोरेथ केरने, ज़ैन आरामेरे दिहाडे केरनू जेइज़ नईं?”

3 यीशुए तैन जुवाब दित्तो, “कुन तुसेइं पवित्रशास्त्रे मां कधे नईं पढेरू कि ज़ेइस इश्शो पूर्वज दाऊद राज़ो त तैसेरे साथी दलुखारे थिये त तैनेइं कुन कियेरू थियू?”

4 तैनेइं केन्चरे परमेशेरे घरे मां गेइतां च़ेदोरी रोट्टी खोरी थी, ते अपने सैथन भी दित्तोरी थी । तैना रोट्टी खैनी सिर्फ याजकां केरे लेइ जेइज़ थी ।”

5 फिरि तैन तैन सेइं ज़ोवं, “मैनेरू मट्टू, यानी अवं आरामेरे दिहाडेरो भी प्रभु आई ।”

ⓂⓂⓂⓂⓂⓂ ⓂⓂⓂⓂ ⓂⓂⓂ ⓂⓂⓂⓂⓂⓂ ⓂⓂⓂⓂⓂⓂ

(ⓂⓂⓂⓂ 12:9-14; ⓂⓂⓂⓂ 3:1-6)

6 एक्की बार यीशु प्रार्थना घरे मां गेइतां उपदेश शुनेइं राहोरो थियो, ते तेइस भी आरामेरी दिहाडी थी तेडी अक मैन्हु थियो, ज़ेसेरो देइनो हथ शुक्कोरो थियो ।

7 शास्त्री त फरीसी लोक यीशुएरी ताके मां थिये कि अगर यीशु आरामेरे दिहाडे केन्ची बज़ालो त असन इलज़ाम लानेरो मौको मैलनोए ।

8 एन यीशु तैन केरे बारे मां सेमझी जेव, यीशुए तैस शुक्कोरे हथेबाले मैन्हु सेइं ज़ोवं, “मझाटे खडे भो ।” तै खडो भोव ।

9 तैखन यीशु तैन सेइं ज़ोवं, “अवं तुसन पुछतां कि आरामेरे दिहाडे भलाई केरनि रोडीए या बुराई केरनि रोडीए, मैनेरी जान बचानी या मारनी?”

10 ते तैनी च़ेवरे पासना तैन केरां तक्कू ते तैस मैन्हु जो ज़ोवं, “अपनो हथ हिरा ।” तैनी मैने अपनो हथ अग्रोवं कियो । त अकदम तैसेरो हथ बेज्झोव ।

11 एन याजकन त फरीसन बडी सरक अई तैना एप्पू मामेइं वेंस केरने लगगे, कि असां यीशुए सेइं कुन केरम?

12 ⓂⓂⓂⓂⓂⓂ ⓂⓂⓂⓂⓂⓂ

(ⓂⓂⓂⓂ 10:1-4; ⓂⓂⓂⓂ 3:13-19)

12 तेइस एरू भोवं कि यीशु प्रार्थना केरनेरे लेइ एक्की पहाडे पुइ च़दो, ते सैरी राती परमेशेरे का प्रार्थना केरतो राव ।

13 ज़ैखन टलेकडोने लगू त तैनी अपने चले एप्पू कां कुजाए ते तैन मरां 12 प्रेरित चुने ।

14 अक शमौन ज़ैस जो पतरस भी ज़ोते थिये तैसेरो दला अन्दिरयास, याकूब, यूहन्ना, फिलिप्पुस, बरतुल्मै,

15 मत्ती, थोमा, हलफईरू मट्टू याकूब, ते शमौन ज़ैस जो जेलोतेस ज़ोतन ।

16 ते याकूबेरू मट्टू यहूदा ते यहूदा इस्करियोती ज़ै तैसेरो टलुवाने बालो बनो ।

ⓂⓂⓂⓂⓂⓂ ⓂⓂⓂ ⓂⓂ ⓂⓂⓂⓂⓂⓂⓂ

(ⓂⓂⓂⓂ 4:23-25)

17 तैखन यीशु तैन सेइं साथी चौरस ठैरी मां खड्डो भोव, ते तैसेरे चले भी तैड़ी अकोट्टे भोए ते सारे यहूदिया ते यरूशलेम नगरन त कने सूर ते सैदारे आसेपासेरे लोक समुन्दरेरे बन्नेरे बडे लोक जैना तैड़ी थिये ।

18 एन लोक यीशु करां ज्ञान शुन्ने ते अपनि-अपनि विमैरी तैस कां बझाने ओरे थिये, ते जैन लोकन पुड़ भूतां केरे सैये सेइं दुखे मां थिये तैना भी वेज्जोइ जे ।

19 सब लोक तैस सेइं हथ लानेरी कोशिश करेते थिये किजोकि तैस मां शक्ति थी जैस सेइं तैना वेज्जोते थिये ।

???? ? ? ? ? ? ? ? ? ? ?
(???? 5:1-12)

20 तैखन यीशु अपने चेलां केरे तकने लगो ते ज़ोने लगो,
“परमेशर तुसन बरकत देलो जैना नमरथ,
किजोकि स्वर्गेरू राज तुशू आए ।

21 परमेशर तुसन बरकत देलो जैना दलुखोरेथ,
किजोकि तुस रजनेथ,

परमेशर तुसन बरकत देलो जैना अज लेरां देतथ,
किजोकि तुसेईं हसनुए ।”

22 “परमेशर तुसन बरकत देलो,
जैखन मैनेरे मटठे, यानी मेरे चेलो भोनेरे वाजाई सेइं लोक तुशुशी तुहीन केरन,
ते तुसन भाईचारे करां कनारे छडेले,
ते तुसन बेइजत केरेले,
ते तुशू नवं कट्टी छडेले ।”

23 “तैस दिहाड़े खुशी भोइतां उछड़थ, किजोकि हेरा तुशुशे लेइ स्वर्गे मां बडू इनामे । तैन केरे दादे-पड़दादे नेबन सेइं भी एरो ज़ेरो बताव करेते थिये ।”

24 “पन अफ़सोस! तुसन पुड़ जैना दौलतमन्दथ,
किजोकि तुसन सब किछ मैलेरूए ।

25 अफ़सोस! तुसन पुड़, जैन तुस चाते थिये, तुसन तैन मैल्लू,
किजोकि तुस नियन्ने भोले,

अफ़सोस! तुसन पुड़ जैना अज हसतथ
किजोकि तुस शोग केरेले ते लेरां देले ।

26 पन अफ़सोस! तुसन पुड़ जैखन लोक तुसन जो भलू ज़ोन,
किजोकि तुशुशे दादे-पड़दादेई भी झूठे नेबन सेइं एरो बताव कियोरो थियो ।”

???? ? ? ? ? ? ? ? ? ? ?
(???? 5:38-48; 7:12)

27 “अवं तुसन शुन्नेबालन सेइं ज़ोताई कि अपने दुश्मन सेइं प्यार केरा । जैना तुसन सेइं बैर रखतन तैन केरू भलू केरा ।

28 जैना तुसन जो बुरू ज़ोतन तुस तैन केरे लेइ बरकत मग्गा, जैन तुसन बेइजत केरन तुस तैन केरे लेइ प्रार्थना केरा ।

29 अगर कोई तुशुशे एक्की खैखोड़ी पुड़ थप्पड़ बाहे त होरो पासो भी तैसेरे पासे रखा, ते अगर कोई तुशुशू कोट नेते त कमीज़ भी तैस देथ ।

30 जै कोई तीं करां किछ मग्गे त तैस देथ अगर कोई तेरो सबाब नेते ते तैस करां वापस न मग्गा ।

31 ते ज़ेन्चरे तुस चातथ कि लोक तुसन सेइं केरन तेन्चरे तुस भी तैन सेइं तेरहु केरा ।

32 अगर तुस तैन्ने सेइं प्यार केरथ जैना तुसन सेइं प्यार केरतन त तुशशू कुन एवसाने? किजोकि पापी लोक भी अपने प्यार केनेबालन सेइं प्यार केरतन।

33 अगर तुस तैन केरू भलू केरतथ जैना तुशशू भलू केरतन त तुशशू कुन एवसाने? किजोकि पापी लोक भी अपने प्यार केनेबालन सेइं प्यार केरतन।

34 अगर तुस तैन्ने ओधार देतथ जैन करां तुसन वापस भी मैलनेरी उमीदे, त परमेशर तुशशी बड़याई किजो करे? किजोकि बुरे लोक भी अपने प्यार केनेबालन पेंइसे देतन ताके तैन करां वापस मैलन।

35 पन तुस अपने दुश्मन सेइं प्यार केरा ते तैन केरू भलू केरा, ओधार देइयथ पन तैन करां वापस मैलनेरी उमीद न रेखथ, एल्हेरो स्वर्गे मां तुशशे लेइ अक बडो फले, किजोकि तुस परमप्रधान परमेशरें बच्चे भोले, किजोकि तै परमेशर न मन्ने बालन पुड़ ते ज़ालमन पुड़ भी दया केरते।

36 ज़ेरो दया दिल तुशशो बाजी तेरहे दया दिल तुस भी भोथ।”

~~~~~  
(~~~~~ 7:1-4)

37 “दोष न लाथ, तुसन पुड़ भी दोष न लव गालो, निन्दा न केरा, तुशशी भी निन्दा न की गाली, तुस होरन माफ़ केरेले त तुसन भी माफ़ कियू गालू।

38 तुस होरि किछ देले त तुसन भी किछ दितू गालू तुशशू बरकतरू भांड जेन्चरे अन्नेरी हाटी हिलेइतां देतां तैन भी तेन्चरे ज़ैस हैटी सेइं तुस होरि करे लेइ मिनतथ तैस्से सेइं तुशशे लेइ भी मिनेले।”

39 यीशुए तैन अक मिसाल शुनाई, “कुन कानो होरि काने बत हेरेई सकते? तैना त दुइये गढे मां बिछड़ेले?

40 चेलो अपने गुरू करां बड्डो न भोए पन हर एक्की गल्ली मां ज़ैखन सब शिखेलो त अपने गुरेरो ज़ेरो भोलो।

41 तू अपने दलाएरी एछ्छी मां कूडो किजो तकतस, पन तेरी एछ्छी मां त नग आए, ते तैसेरो तू खियाल भी न केरस?

42 तू अपने दलाए केन्चरे ज़ोई सकतस कि, तेरी एछ्छी मरां कूडो केदी? हे पाखंडी पेइले अपनि एछ्छी मरां नग कढ फिरी अपने दलाएरी एछ्छी मरां कूडो केदी सकतस।”

~~~~~  
(~~~~~ 7:16-20; 12:33-35)

43 “किजोकि केन्वी भी रोड़े बुटे बुरो फल न लगगे ते न केन्वी बुरे बुटे रोडो फल लगगे।

44 हर बुट अपने फले सेइं पिशैनोते। किजोकि न झलन सेइं फैगू लगन ते न झल्लन सेइं दाछु लगे।

45 रोडो मैन्हु अपने दिलेरे रोडे खज़ाने मरां रोडी चीज़ां कढते ते बुरो मैन्हु अपने दिलेरे बुरे खज़ाने मरां बुरी चीज़ां कढते किजोकि ज़ैन दिले मां भरेरू भोते तैन्ने ज़बानी पुड़ एइते।”

~~~~~  
(~~~~~ 7:24-27)

46 “ज़ैखन तुस मेरे ज़ोने पुड़ अमल न केरथ त मींजो, हे परभु, हे परभु, किजो ज़ोतथ?

47 ज़ै मीं कां एइते ते मेरी गल्लां शुन्तां तैन पुड़ अमल केरते त अवं तुसन सेइं ज़ोताई कि तै केसेरो ज़ेरो भोलो?

48 तै तैस मैनेरो ज़ेरोए ज़ैनी अपनू घर डुग्धी खाइ केढतां पेक्की ठैरी घर बनावं ज़ैखन हड़ाई आई त तैस घरे किछ न भोवं, किजोकि तैसेरी मुनीयाद पेक्की ठैरी थी।

49 पन ज़ै मेरी गल्लां शुन्तां तैन पुड़ अमल न केरे त ते तैस मैनेरो ज़ेरोए, ज़ैनी अपनू घर रेती पुड़ बनाव ते ज़ैखन हड़ाई अई त तैन घर डुल्ली जेवं ते तब्बा भोइ जेवं।”

## 7

8:5-13

- 1 जैखन तैनी लोकन एपनी सब गल्लां शुनेई छैडी, त तै कफरनहूम नगर मां अव ।
- 2 तैडी केन्वी सूबेदारो अक टलारो सेवक बिमार थियो ते मरने बालो थियो ।
- 3 तैनी यीशुएरी मुशूरी शुन्तां यहूदी केरे किछ बुजुर्ग तैस कां मिनत केरनेरे लेइ भेजे, कि तै एइतां मेरो सेवक बज्झाए ।
- 4 तैना यीशु कां आए ते तैस कां मिनत केरने लगे, “तै इस काबले, कि तू तैसेरेलेइ इन केरस ।
- 5 किजोकि ते इशुयी कौमी सेइं बडी हमदरदी रखते, ते इशुशू पुरार्थना घर तैन्नी बनेवरुए ।”
- 6 यीशु तैन सेइं साथी-साथी ज़लो जेव, पन जैखन तैस घरे नेडे पुजो त सूबेदारो होरि दोस्तन सेइं समाद भेजो कि, “प्रभु तकलीफ न केर, किजोकि अवं एस काबल नई कि तू मेरे घरे मां एज्जी सखत ।
- 7 एस्से वजाई सेइं अवं भी अपनो आप तीं कां एजनेरे काबल न सेमझी बल्के अपनि ज़बानी सेइं ज़ोस त मेरो नौकर बेज्झोइ सकते ।
- 8 तै मैन्हु ज़ोने लगे कि अवं भी केन्चेरे अधिकारे मां कम केरताई, ते सिपाही मेरे अधीन आन, ते जैखन एक्की जो ज़ोतां कि गा,’ त तै गाते, ते होरि जो ज़ोतां एई, त तै ‘एइते,’ ते अपने सेवके जो ज़ोताई, ‘इन कम केर,’ त तै केरते ।”
- 9 यीशु एन शुन्तां हैरान रेइ जेव, ते पत्रोवं लोकां केरे पासे लगे तकने ज़ैना तैस पत्पती ओरे थिये तैन जां ज़ोने लगे, “कि अवं तुसन सेइं सत्र ज़ोताई कि मीं इस्राएल मुलखे मां इस गैर यहूदी मैनेरो ज़ेरो मैन्हु नई लोवरो ज़ै मीं पुइ एत्रो विश्वास केरे ।”
- 10 ते ज़ैना लोक यीशु कां भेजोरे थिये वापस ज़ैखन घरे आए त तै सेवक बेज्झोरो लव ।

11

- 11 थोड़े च़िररां पत्ती एरू भोवं कि यीशु नाईन नर्वरे नगर मां ज़लो जेव, ते तैसेरे च़ेले ते होरे भी बडे लोक तैन सेइं साथी थिये ।
- 12 जैखन तैना नगररे फाटके पुइ नेडे पुजे, त हेरतन, कि अक मुइदो बेइर जो ज़लेवरोए, ते तैन अपनि अम्मरू अक्के मट्टू थियू, ते नगररे बडे लोक तैस विधवा कुआन्शी सेइं साथी थिये ।
- 13 एन लेइतां परभुए बडो तरस अव, ते तैस जो ज़ोवं, “लेरां न दे ।”
- 14 फ़िरी यीशु नेडे एइतां शिडी सेइं हथ लाव, ते छूनेबाले रुके, ते यीशुए ज़ोवं, “ए जवान, अवं तीं सेइं ज़ोतां, खइ उट !”
- 15 तैखन मुइदो उटो, ते गल्लां लगे केरने, ते यीशुए तै तैसेरी अम्मा सांफतां छइ ।
- 16 इन हेरतां सब लोक डेरि जे, ते परमेशेरी तारीफ़ केरने लगे, “अक महान नबी असन मां ओरोए, ते परमेशेरे अपने लोकन पुइ अपनि सिधी नज़र रखोरीए ।
- 17 एस्से गल्लरी वजाई सेइं ए खबर यहूदियारे ते आसेपासेरे सेन्नी मुलखन मां फैली जेई ।”

11:2-19

- 18 ते यूहन्ना तैसेरे च़ेलेई एन सैरी गल्लां केरि खबर दिती ।
- 19 तैखन यूहन्ना एन शुन्तां दूई च़ेले कुजेइतां यीशु कां पुच्छने भेजे कि, “एजनेबालो तू आस, या असां होरि बलगम?”
- 20 तैनेई यीशु कां एइतां पुच्छू, “असां यूहन्ना बपतिस्मो देनेबाले तीं कां पुच्छने भेजोरेम, कि एजनेबालो तू आस, या असां होरि बलगम?”
- 21 तैखन यीशुए बडे लोक बिमैरन ते तकलीफ, ते भूतन करां छुटाए, ते बडे काने लोकन एच्छन लौ दिती ।

22 यीशु तैन ज़ोवं, “जैन किछ तुसेई लाहेरूए ते शुनेरूए गेइतां यूहन्ना सेइ ज़ोथ, कि काने लातन, ते टोंटे च़लतन, ते कोढी केरू कोढ साफ भोते, ते टोंऊने शुन्तन, ते मुड्डे ज़ीते भोतन, ते गरीबन खुशखबरी शुनाई गाचे ।

23 परमेशर तैस वरकत देते, जै मीं पुड शक न केरे ।”

24 ज़ैखन यूहन्नारे बिस्तार देनेबाले लोक वापस च़ले जे, त यीशु यूहन्नारे बारे मां गवाही देने लगो, “तुस जंगले मां कुन हेरने जोरे थिये? कुन हवाई सेइं हिलते निरैठरे डाल?

25 त फिरी तुस होरू कुन हेरने जोरे थिये? कुन रोड़ां लगगोरां लिगइन बालो मैन्हु? हेरा, ज़ैना मगां लिगइं लाने बाले मैन्हु, ते ज़ैना एश केरनेबाले लोक भोतन । तैना राज महलन मां रातन,

26 त फिरी तुस होरू कुन हेरने जोरे थिये? कुन कोई नवी? हाँ, अवं तुसन सेइं ज़ोताई, नेबी करां बड्डे ।

27 ए तैए, ज़ेसेरे बारे मां लिखोरूए, हेर, अवं अपनो बिस्तार देनेबालो तीं अग्री-अग्री भेजताई, जै तेरी बत अग्रोवं तियार केरेलो ।”

28 यीशुए ज़ोवं, “अवं तुसन सेइं सत्र ज़ोताई, कि जै कुआन्शन करां ज़रमोरोए, तैन मां यूहन्ना बपतिस्मो देनेबाले करां बड्डो कोई नई । पन ज़ै परमेशेरे राज़े मां निकडोए, तै यूहन्ना करां बड्डोए ।”

29 ज़ैखन तैन लोकेई एन गल्लां शुनी त धड़त नेनेबालेई भी यूहन्ना बपतिस्मो देनेबाले करां बपतिस्मो नेइतां परमेशर धर्मी मननो ।

30 पन फरीसी लोकेई ते शास्त्री लोकेई तैस करां बपतिस्मो न नेइतां परमेशेरी मर्ज़ी अपने बारे मां टाली ।

31 “बस्सा, अवं इस ज़मानेरे लोकां केरि मिसाल केस सेइ देई, तैना केसेरे ज़ेरेन?

32 तैना तैन मट्टां केरे ज़ेरेन ज़ैना बज़ारे मां बिशोरां एक्की होरि जो हक देइतां ज़ोतन, ‘असेई तुशे लेइ बेंशोई बज़ाइ, ते तुस न नच़्चे, असेई शौग मनाव, पन तुसेई लेरां न दिक्ती!’

33 किजोकि यूहन्ना बपतिस्मो देनेबालो न रोट्टी खांतो अव, न शराब पीतो अव, ते तुस ज़ोतथ, कि एस पुड भूतेरो सैयो आए ।

34 मैनेरू मट्टू खातू पीतू अव, ते तुस ज़ोतथ, हेरा, तै पेटू ते शराबी मैन्हु, कने धड़त नेनेबाले ते पापी लोकां केरो दोस्त ।”

35 पन अक्ल अपने सेब्भी मट्टन करां जादे सच़्ची साबत भोइ ।”

*~~~~~*

36 फिरी केन्चे फरीसे यीशु कां मिनत की, कि मीं सेइं साथी रोट्टी खा, बस्सा, तै तैस सेइं साथी तैसेरे घरे जेव, ते तैस सेइं साथी रोट्टी खाने लगो ।

37 त हेरा, अक बदचलन कुआन्श ज़ै तैस नगरेरी थी एन बुझतां कि यीशु फरीसेरे घरे रोट्टी खाने बिशोरोए, संगमरमरेरे एक्की भांडे मां इतर आनो ।

38 ते यीशुएरे पावन कां नेडे लेरां देंती खड़ी भोइ, ते तैसेरे पाव एंखेइं सेइं सेले ते अपने दोगगरे बालेई सेइं पोंछने लगी ते तैसेरे पावन फुम्मड़ी देने लगी कने पावन पुड इतर लाव ।

39 ज़ैनी फरीसे यीशु कुजोरो थियो, तैनी एन लाव, त ज़ोने लगो, “अगर ए मैन्हु नवी भोथो त बुझेथो कि ज़ै कुआन्श तैस कांए तै कौने ते ए केरि कुआन्शे? किजोकि ए बदचलने ।”

40 यीशु तैसेरे इन खियाल ज़ैनतां तैस सेइं ज़ोवं, “हे शमौन, मीं तीं सेइं किछ ज़ोनूए ।” फरीसे ज़ोवं, “हे गुरू ज़ो ।”

41 यीशुए तैस सेइं मिसाल देइतां ज़ोवं “केन्वी शोहुकारेरो केन्वी दूई ज़न्न कां कर्जो थियो, एक्की कां 500 दीनार\*, ते होरि कां 50 दीनार थियो ।

\* 7:41 7:41 शौव दीनार, शौव दिहेड़ी केरि मज़दूरी ।

42 जैखन तैन कां देने जो किछ न राऊं, त तैनी शोहोकरे दुइने कर्जो माफ़ कमाव । बस्सा, कौन तैन मरां जादे शोहोकरे सेइं प्यार केरेलो?"

43 शमौने जुवाव दित्तो, "मेरे समझी सेइं त जेसेरो जादे कर्जो माफ़ कियो ।" यीशुए ज़ोवं, "तीं ठीक फैसलो कियो ।"

44 यीशु तैस कुआन्शरे पासे तेकतां शमौने ज़ोवं, "कुन तू इस कुआन्शरां तकतस? अवं तेरे घरे अव, तीं मीं (रीतरे मुताबिक) पव धोने जो पानी न दित्तू, पन इसां मेरे पाव एंखेइं सेइं पव धोए ते अपने दोगगरे बालेइं सेइं पौंछे ।"

45 तीं मीं (रीतरे मुताबिक) फुम्मड़ी न दित्ती, पन एसां जैखनेरो अवं इड़ी ओरोईं मेरे पव्वन फुमड़ी देनी न उडैई ।

46 तीं मेरे दोगगे पुड़ तेल न मल्लो, पन एसां मेरे पावन पुड़ इतर मल्लो ।

47 "एल्हेरेलेइ अवं तीं सेइं ज़ोताई कि, एसार जादे पाप जैना एसां कियेरे थिये, माफ़ भोए, किजोकि एसां जादे प्यार कियो, पन जेसेरे थोडे पाप माफ़ भोतन तै थोडो प्यार केरते ।"

48 यीशुए तैस कुआन्शी जो ज़ोवं, "गा तेरे पाप माफ़ भोए ।"

49 एस गल्ली पुड़ जैना तैस सेइं साथी रोटी खाने विश्शारे थिये, अपने-अपने मने मां सोचने लगे, "ए कौने जै पाप भी माफ़ केरते, पाप त सिर्फ परमेशर माफ़ केरते?"

50 पन यीशुए तैस कुआन्शी सेइं ज़ोवं, "परमेशरे तू एल्हेरेलेइ बत्ताई कि तीं मीं पुड़ विश्वास कियो, हुनी तू खुशी सेइं गा ।"

## 8

~~~~~

1 थोड़े चिरेरां बाद एरू भोवं यीशु अपने तैन 12 चेलेन सेइं साथी नगर-नगर ते इलव्वे-इलव्वे हंटतो ते प्रचार केरतो राव, ते परमेशेरे राज्जरी खुशखबरी शुनातो राव ।

2 किछ कुआन्शां भी तैन सेइं साथी थी, जैन मरां भूतां केरो सैयो कढोरो थियो । ते जैन केरि विमैरी दूर भोरी थी, तैना केरां नव्वां इना आन, मरियम जै मगदलीन इलव्वेरी राने वाली थी, जैस पुडां सत भूतां केरो सैयो कढोरो थियो,

3 हेरोदेस राज्जरे भण्डारी खोजेरी कुआन्श योअन्ना ते सूसन्नाह ते होरि भी काई कुआन्शां थी जैना अपनि जेइदात देइतां यीशु ते तैसेरे चेलां केरि सेवा केरती थी ।

~~~~~

(~~~~~ 13:1-9; ~~~~~ 4:1-9)

4 फिरी जैखन बड़े लोक तैस कां अकोट्टे भोए, जैस मां नगरां-नगरां केरे लोक तैस कां एइते थिये । यीशुए तैन मिसाल देइतां ज़ोवं ।

5 "एक्सां अक बीज बेनेवालो बीज बेने जो जेव । बीज बेते वार किछ बीज बतेरे इलेखी बिछ्ड़ू ते अम्बेरे चुड़ोल्लेई एइतां तैन बीज चुनू ।

6 ते किछ बीज घोडनवाली ज़मीनी पुड़ बिछ्ड़ू, ते लगू पन जल्दी शुक्की जेव, एल्हेरेलेइ कि तैस पानी न मैल्लू ।

7 किछ बीज कंटां केरे झैल्लन मां बिछ्ड़ू । जैखन तैडी बूटो लगो, त कंटां केरे झैल्लेई भी बेडोइतां तै बूटो दवेइ छ्ड़ुडो ।

8 ते किछ बीज रोड़ी ज़मीनी मां बिछ्ड़ू, ते लगू ते शौव गुणा फल लगो," एन शुनेइतां तैनी तैन सेइं उच्ची आवाज़ी मां ज़ोवं, "जै कोई समझनू चाते, तै ध्याने सेइं शुने ते समझे ।"

~~~~~

(~~~~~ 13:10-17; ~~~~~ 4:10-12)

9 तैसेरे चलेई तैस पुच्छू, "एस मिसालरो कुन मतलबे?"

10 यीशुए तैन ज़ोवं, “तुसन परमेशेरे रे राज़ेरे भेदां केरि समझ दित्तोरीए, पन अवं होरि लोकन मिसाल देइतां ज़ोताई, तैन तैना बार-बार शुनेले, पन मेरी गल न समझेले।”

ॐॐॐ ॐॐॐॐॐॐॐ ॐॐॐॐॐॐ ॐॐॐॐ
(ॐॐॐॐ 13:18-23; ॐॐॐॐ 4:13-20)

11 “एस मिसालरो ई मतलबे, कि बीज परमेशेरे वचने।

12 ज़ैना मैन्हु परमेशेरी गल्लां शुन्तन, तैन मरां किछ लोक तैस बत्तेरे ज़ेरे आन, ज़ैडी बीज बिछइते। तैना त परमेशेरी गल्लां शुन्तन, पन शैतान अकदम एइतां तैन मैन्हु केरे दिले मरां तैन वचन धिनी गाते, कि एरू न भोए कि तैना विश्वास केरन ते तैन मुक्ति मैल्ले।

13 ते धोइनवाले ज़मीनी मां बेवरू बीज तैने, ज़ैना वचन शुन्तां खुशी सेई मन्तन पन ज़ील न छुडने सेई तैना थोड़े चिरे तगर विश्वास रखतन ते अज़मैइशरे मौके मुड़ी गातन।

14 ते ज़ैन झल्लन मां बीज झडू तैना इना आन, ज़ैना वचन शुन्तन, पन अग़रोवं च़ेलतां फ़िक्र ते दौलत ते ज़िन्दगरो एशो-अशरती मां फेसी गातन ते तैन केरो फल न पक्के।

15 पन रोड़ी ज़मीनी पुड़ेरूए बीज तैन्न, ज़ैना वचन शुन्तन ते अमल भी केरतन, ते रोड़ेचारे दिले मां बसातन ते सबरी सेई फल भी लगते।

ॐॐॐॐ ॐॐॐॐ
(ॐॐॐॐ 4:21-25)

16 “कोई दीयो बैलतां केन्वी भांडे हैट ओडकतां न रखे, ते न खट्टी हैट रखे बल्के उच्ची ठैरी रखतन ताके दीयो अन्तर एजने बालन लौ दे।

17 किजोकि कोई एरी चीज छुपेरी नई, ज़ै बांदी नई भोनी, ते कोई भेद छुपोतो न रालो, पन सारो भेद बांदो भोलो।

18 बस्सा हुआर राथ, कि तुस केन्वरे शुन्तथ? ज़ैस कां परमेशेरी मर्जी समझनेरी इच्छा आए, तैस परमेशर जादे समझ देलो। पन ज़ैस कां परमेशेरी मर्जी समझनेरी इच्छा नई, तैस केरां थोड़ी ज़ेरि समझ, ज़ै तैस कां आए, तै भी नी गाली।”

ॐॐॐॐॐ ॐॐॐॐ ॐॐ ॐॐॐॐ
(ॐॐॐॐ 12:46-50; ॐॐॐॐ 3:31-35)

19 फिरी तैसेरी अम्मा ते तैसेरे दूला तैस कां आए, पन हछे मैन्हु केरि वजाई सेई तैस कां न पुज्जी सके।

20 ते यीशुए पतो दित्तो, “तेरी अम्मा ते तेरे दूला बेइर खड़े आन ते तैना तीं सेई गल केरनि चातन।”

21 यीशुए तैन जुवाब दित्तो, “मेरी अम्मा ते मेरे दूला इना आन ज़ैना परमेशेरे वचन शुन्तन ते तैस पुड़ अमल भी केरतन।”

ॐॐॐॐ ॐॐॐॐ
(ॐॐॐॐ 8:23-27; ॐॐॐॐ 4:35-41)

22 फिरी एककी दिहाड़े एरू भोवं, कि यीशुए अपने चलन सेई ज़ोवं, “एज्जा, समुन्दरे पार गाम ते तैना किशती मां च़ेढतां समुन्दरे पार च़ले जे।”

23 पन ज़ैखन किशती च़लोरी थी, त यीशुए झुली जेव ते समुन्दरे पुड़ बड़ो तूफान अव, ते किशती पैनी सेई भेरोने लगगी, ते तैन खतरो भोइ जेव।

24 च़ेलेई तै बीझेइतां तैस सेई ज़ोवं, “हे गुरु, असां मेरि गातम यीशु खड़े उठो ते हवाई जो ते पैनी जो ज़ोवं, रुकी गाथ ते तूफान रुकी जेव।”

25 यीशुए अपने चलन सेई ज़ोवं, “तुशो विश्वास कोरां जेव?” तैना डेरि जे ते हैरान भोइतां एप्पू मामेई ज़ोने लगे, “ए कौने! ए हवाई त पैनी भी हुकम देते ते तैना एसेरो हुकम मन्तन।”

॥॥॥॥॥ ॥॥॥॥ ॥॥॥॥ ॥॥॥॥ ॥॥॥॥ ॥॥॥॥॥॥॥ ॥॥॥॥॥॥॥

(॥॥॥॥॥ 8:28-34; ॥॥॥॥॥ 5:1-20)

26 फिरी तेना गिरासेनी इलाके मां पुजे, जै गलील समुन्दरे सामने पारे।

27 जैखन ते बन्ने पुड़ ओस्सो, त तैस नगरेरो अक मैन्हु मैल्लो जैस पुड़ भूतां केरो सायो थियो, ते तै बडे दिहाडे केरो दंतो न लिगडां लातो ते न घरे रातो थियो, बल्के कब्रन मां रातो थियो।

28 तेनी मेने यीशु लाव ते चिन्डां लगे मारने, ते तैसेरे सामने झुकतां ज़रे सेइ ज़ोने लगे, “हे यीशु परमप्रधान परमेशेरा मट्टां! तीं मीं सेइ कुन कम्मे? अवं तीं कां मिनत केरताई मीं दुख न दे।”

29 किजोकि यीशु तैस भूते तैस मैन्हु मरां निसनेरो हुक्म देने लोरो थियो, एल्हेरेलेइ ते बडे बुरे तरीके सेइ टलेइतां रखोरो थियो, ते लोक तैस कैबू केरनेरे लेइ अगरी भी रसन ते शंगलन सेइ बंधतां रखते थिये, ते तै तैन भी टलोइतो थियो, ते भूत तैस मैन्हु जंगले मां नेतू थियूं।

30 यीशुए तैस पुच्छू, “तेरू कुन नवं आए?” तैनी ज़ोवं “तेरू नवं फौज आए,” किजोकि तैस मां बडां भूतां थियां।

31 ते तैनेई तैस कां मिन्नत की, “असन अथाह कुण्डे मां गानेरो हुक्म न दे।”

32 तेई पहैड़ी पुड़ अक सूरं केरो बडो घान थियो, ते तैनेई तैस कां मिनत की, “असन एन मां गाने दे ते यीशुए गाने दितां।”

33 ते तैना भूतां तैस मैन्हु मरां निस्तां तैन सूरन मां ज़ेलि जेआं, ते सूरं केरो सारो घान उत्तरेई उन्हे छालां मेरतां समुन्दरे मां डुवतां मेरि जेव।

34 सूरं केरे चारनेबाले एन हेरतां नेश्शी जे, ते नगर मां ते इलोव्वन मां एस गल्लरी खबर शुनाई।

35 लोक ते तमाशो हेरने आए, ते यीशु कां जैस मैन्हु मरां भूतां केरि फौजरो सैयो निसोरो थियो, तैनी लिगडां लां ते होशी मां एइतां यीशु कां विश्शोरो लाव ते डेरि जे।

36 जैनेई तैना गल्लां पेडले लेवरी थी, तैनेई ज़ोवं, इस मैन्हु पुड़ भूतां केरो सैयो थियो ते ए केन्चरे बेज्झोव।

37 ते गिरासेनियों इलाके मां त्रेवरे पासां केरे लोक यीशु कां मिनत केरने लग्गे, कि इट्टां च़लो गा, किजोकि तैना बडे डेरं थिये, ते यीशु किशती मां विश्तां वापस च़लो जेव।

38 पन जैस मैन्हु मरां भूतां निस्सोरां थियां ते यीशु कां मिनत केरतां ज़ोने लगे, मीं एप्पू सेइ साथी रख पन यीशुए तै भेजो ते ज़ोवं।

39 “अपने घरे च़लो गा ते लोकन सेइ ज़ो, कि प्रभु परमेशेरे तीं पुड़ दया केरतां तेरे लेइ केतूरू बड्डू कम कियोरूए। तैखन ते च़लो जेव ते सारे नगर मां एस गल्लारो प्रचार केरने लगे, कि यीशुए मेरे लेइ केतूरू बड्डू कम कियोरूए।”

॥॥॥॥॥ ॥॥॥ ॥॥ ॥॥ ॥॥ ॥॥॥॥॥ ॥॥॥॥॥॥॥

(॥॥॥॥॥ 9:18-26; ॥॥॥॥॥ 5:21-43)

40 जैखन यीशु वापस एज्जी राहोरो थियो, ते लोक बडे खुशी सेइ तैस सेइ मिले, किजोकि तैना सब तैस बलगतते थिये।

41 ते हेरा याईर नव्वेरो अक मैन्हु जै प्रार्थना घरेरो अक प्रधान थियो, यीशु कां अव ते तैसेरे पावन पुड़ पेइतां मिनत केरने लगे, “तू मेरे घरे च़ल।”

42 किजोकि तैसेरी अक्के कुई जै 12 सालां केरि थी, ते मरनेबाली थी। ते जैखन यीशु च़लोरो थियो, त लोक तैस उन्हे बिछ्छइते थिये।

43 ते अक कुआन्श भी थी, जैस 12 सालां केरि खून च़लनेरी बिमारी थी। ते तैसां अपनो सारो जिन्दगरो पेइसो हकीमन कां अल्लाज़ेरे लेइ खर्च कियोरो थियो, ते ते केन्चरे हथ्ये ठीक न भोइ।

44 ते कुआन्श यीशु पतोरां एइतां तैसेरे चोगे सेइ हुरी, त अकदम तैसेरी खून च़लनेरी बिमारी बेज्झोई।

45 यीशुए ज़ोवं, “मेरे लिंगडे सेइं केनि हथ लाव?” ज़ैखन सब लोक इन्कार केरने लगे, त पतरसे ते तैसेरे सैथेई ज़ोवं, “ए गुरू, लोक तीं दलांचने ते तीं उन्डे बिछुड़ने लोरेन।”

46 पन यीशु ज़ोवं, “केन्चे मीं सेइं हथ लोरोए किजोकि मीं पतो लगे कि मीं मरां शक्ति निसोरिए।”

47 तैखन तैस कुआन्शां हेरू, कि अवं छेप्पी न बेटि, त तै डरती-डरती सामने अईं ते यीशुएरे पावन पुड़ बिछुड़तां सैरी लोकां केरे सामने ज़ोने लगी, मीं तीं सेइं हथ लोरोए, ते ज़ेरो मीं हथ लोरोए अवं अकदम बेज्झोरी।

48 यीशुए तैस कुआन्शी ज़ोवं, “हे कुईए, तेरे विश्वासे तू बज्झाईं ते खुशी सेइं चली गा।”

49 यीशु एन हेजू ज़ोतो थियो, त प्रार्थना घरेरे प्रधानेरे तैट्टां केन्चे मैने एइतां ज़ोवं, “तेरी कुई मेरि जेवरिए, हुनी गुरू तकलीफ न दे।”

50 पन यीशु एन शुन्तां जुवाव दित्तो, “न डर। सिर्फ मीं पुड़ विश्वास रख कुई बेंच्री गानीए।”

51 ज़ैखन तै तैस घरे मां जेव, त तैनी पतरस यूहन्ना ते याकूब ते कुइयरे हाज बव्येरे अलावा होरो कोई अन्तर एजने न दित्तो।

52 सब लोक तैस कुइयरे लेइ लेरां देंते थिये, पन यीशुए ज़ोवं, “लेरां न देथ, ए कुई मूओरी नई बल्के झुलोरोए।”

53 लोक एन शुन्तां हसने लगे, किजोकि तैना ज़ानते थिये कुई मेरि जेवरिए।

54 पन यीशुए तैस कुइयरो हथ टलाव ते ज़ोवं, “कुइये खड़ी उठ!”

55 ते तैसारे प्राण वापस आए ते तै लूशी खड़ी भोइ, ते यीशुए तैन ज़ोवं, एस कुइये किछु खाने जो देथ।

56 तैस कुइयरे हाज बव हैरान रेइजे, पन तैनी तैन सेइं समझेइतां ज़ोवं, ज़ैन किछु इडी भोवं एन केन्ची सेइं न ज़ोइयथ।

9

12 [REDACTED] [REDACTED]

([REDACTED] 10:5-15; [REDACTED] 6:7-13)

1 यीशुए अपने 12 चले एप्पू कां कुजाए ते तैन शक्ति ते अधिकार दित्तो कि सैरी भूतन कढन ते विमैरी दूर केरन।

2 ते यीशुए तैना परमेशेरे राज्जेरो प्रचार केरनेरे लेइ ते बिमार बज्झानेरे लेइ भेजे।

3 तैनी तैन सेइं ज़ोवं, “बत्तां जो किछु न नेइयथ, न सोटी न झोलो न रोट्टी न पेंइसे ते न दुइयोवं लिगडां।

4 ज़ैस घरे मां गाथ त तैड़ी विश्शी रेइयथ ज़ां तगर तुस तैस नगरे मरां न गाथ।

5 ते ज़ैस नगरेरे लोक तुसन कबूल न केरन त तैस नगर मरां गांते बार अपने पांवां केरि धूइ टुइकथ, ताके तैन पुड़ गवाही भोए।”

6 बस्सा, तैना चले जे, ते इलोव्वे-इलोव्वे गेइतां परमेशेरी खुशखबरी शुनाते, ते लोकन विमैरन करां बज्झाते चले जे।

[REDACTED] [REDACTED]

([REDACTED] 14:1-12; [REDACTED] 6:14-29)

7 मुलखेरो जेवरोवं हिस्से पुड़ हेरोदेस राज्जो राज्ज केरतो थियो, तै एन सब शुन्तां डेरि जेव। किजोकि किछु ज़ोते थिये यूहन्ना मुइदन मरां ज़ीतो भोरोए।

8 ते किछु ज़ोते थिये एलिय्याह लेइहोरोए, ते किछु ज़ोते थिये नेबन मरां कोई ज़ीतो भोरोए।

9 पन हेरोदेसे ज़ोवं, “यूहन्नारी क्रोडी त मीं कट्टेवरी थी, पन ए कौन आए, जेसेरे बारे मां एरी ज़ेरि गल्लां शुन्ने मां एजने लोरिन?” ते हेरोदेस यीशु हेरनेरी इच्छा की।

[REDACTED] 5000 [REDACTED] [REDACTED]

([REDACTED] 14:13-21; [REDACTED] 6:30-44; [REDACTED] 6:1-14)

10 फिरी परेरितेई वापस एइतां जैन किछ कियेरू थियूं, यीशु सेइं शुनावं, ते यीशु तैन अलग नेइतां बैतसैदा नव्वेरे नगर मां चलो जेव ।

11 ते बडे लोक तैस पत्ती चले, ते यीशु बडे खुशी सेइं तैन सेइं मिलो । ते तैन सेइं परमेशेरे राज्जेरी गल्लां करेने लगो, ते जैना बिमार ठीक भोनू चाते थिये, तैनी तैना बज्जाए ।

12 जैखन दिहाड़ी डुबने लगी त तैन 12 चलेई यीशु सेइं ज़ोवं, “एन लोकन भेज्जा छड एना कोस्कोई इलांवन मां गेइतां विशन ते रोट्टारो इंतजाम केरन । किजोकि असां गैर आबाद ठैरी आम ।”

13 तैनी तैन सेइं ज़ोवं, “तुस्से एन किछ खाने जो देथ ।” तैनेई ज़ोवं, “असन कां पत्र रोट्टी ते दूई मेछलीन करां जादे किछ भी नई, पन असां गेइतां एन जेई रोट्टी मुल्ले घिन्तां आनतम, त इन भोइ बटते ।”

14 (किजोकि तैन लगभग 5000 मइद थिये ।) यीशुए अपने चेलन सेइं ज़ोवं, “एन लोकन 50-50 मैन्हु केरि हुन्डी मां विशाला ।”

15 ते चलेई तैन्ने कियूं ते तैना तेन्चरे विशाले ।

16 तैखन तैनी तैना पत्र रोट्टी ते दूई मेछलीनी, ते अम्बेरां तेकतां शुकर कियूं, फिरी तैनी तैना रोट्टी टलोड़ी ते चेलन कां दित्ती, कि तैन विशालोरे लोकन खाने जो देन ।

17 सारे मैन्हु खेइतां रेज्जी जे । तैल्ला पत्ती, यीशुएरे चलेई बचोरे टुकड़न सेइं 12 टोकरी भेरि ।

~~~~~

(~~~~~ 16:13-20; ~~~~~ 8:27-30)

18 एककी बार यीशु अकैल्लो पार्थना करेने लोरे थियो, ते चले भी तैस सेइं थिये । यीशुए तैन पुच्छू, “कि लोक मींजो कुन ज़ोतन?”

19 चलेई जुवाब दित्तो, “किछ ज़ोतन यूहन्ना बपतिस्मो देनेबालो, ते किछ ज़ोतन एलिय्याह, ते किछ ज़ोतन नेबन मरां कोई अक ज़ीतो भोरोए ।”

20 तैखन यीशुए चेलन पुच्छू, “पन तुस मेरे बारे मां कुन सोचतथ कि अवं कौन आई?” पतरसे जुवाब दित्तो, “तू परमेशेरो मसीह आस ।”

21 तैखन तैनी तैन खबरदार केरतां ज़ोवं, “कि ए गल केन्ची सेइं न ज़ोइयथ ।”

~~~~~

(~~~~~ 16:21-23; ~~~~~ 8:31-33)

22 यीशुए ज़ोवं, “मैनेरे मटठेरे लेइ जरूरी आए, कि तै बड़ो दुःख झैल्ले, यहूदी लोकां केरे बुजुगंन, प्रधान याजकन, ते शास्त्री तैस घटिया सेमझतां मारेले, ते तै टलेइयोवं दिहाड़े फिरी ज़ीतो भोलो ।”

~~~~~

(~~~~~ 16:24-28; ~~~~~ 8:34-9:1)

23 फिरी यीशुए तैन सेभन ज़ोवं, “अगर कोई मीं पत्ती एजनो चाए, त अपने आपेरो इन्कार केरे, ते रोज़ अपनू कूरुस छूए ते मीं पत्ती चले ।

24 किजोकि ज़ै कोई अपनि जान बचानी चाते तै तैस गुवालो, पन ज़ै मेरे लेइ अपनि जान गुवालो त तै तैस बचालो ।

25 मैन्हु अगर सारी दुनिया हासिल केरे, ते अपनि जानरो नुकसान केरे, या अपनो आप गुवाए, त तैस कुन फेइदो?

26 किजोकि अगर कोई मैन्हु मीं करां त कने मेरी गल्लन करां शरमाते, त मैनेरू मट्टू यानी अवं भी तैस केरां शरमालो । जेइस अवं अपने बाजी केरि महिमा सेइं साथी त कने पवित्र स्वर्गदूतन सेइं साथी वापस एज्जलो, त तेइस अवं तैस केरां भी शरमालो ।”

27 “अवं तुसन सेइं सत्र ज़ोतई कि जैना इड़ी खड़े आन, तैन मरां किछ मैन्हु एरे आन कि ज़ांतगर तैना परमेशेरे राज्जेरी शक्ति न हेरेले, तांतगर तैना न मरेले ।”

XXXXXXXXXX XXX XXXXXXXXX

(XXXXXXXX 17:1-8; XXXXXXXX 9:2-8)

28 एन गल्लां केर लगभग अठ दिहाइना बाद पतरस, ते यूहन्ना ते याकूब साथी नेइतां एक्की पहाड़े पुड़ प्रार्थना करेने ज़ले जे।

29 ते ज़ैखन यीशु प्रार्थना लोरो थियो करेने, त तैसेरी शकल बेदलोई जेई, ते तैसेरां लिगड़ां लोअरां ज़ेरां चमकने लगो।

30 ते हेरा, मूसा, ते एलिय्याह, इन्ना दूई मड़द तैस सेइं गल्लां करेने लगगे।

31 इन्ना महिमा सेइं साथी लेइहोए, ते तैसेरे मरनेरी गलवात करेने लोरे थिये, ज़ैन किछ यरूशलेम नगरे मां भोनेबालू थियूं।

32 पन पतरस ते तैसेरे सैथी केरि एछ्छी निडली सेइं गिरकी भोरी थी, ज़ैखन तैना बीझे, त तैनेई तैसेरी महिमा ते तैना दूई मड़द भी लाए, ज़ैना तैस सेइं साथी खड़े थिये।

33 ज़ैखन तैना तैस करां ज़ले, त पतरसे यीशु सेइं ज़ोवं, “हे गुरु, इश्यू इडी रानू रोड़ोए, कि असां ट्लाई डेरे बनाम, अक तेरे लेइ, ते अक मूसेरे लेइ, ते एलिय्याहरे लेइ।” तैस पतो न थियो, कि तै कुन लोरोए ज़ोने।

34 ते इन ज़ोई राओरो थियो, तैन पुड़ बिदलार घिरी जेई, ते ज़ैखन तैन केरे ज़ेवरे पासन बिदलारी घिरी त तैना डेरि जे।

35 तैखन तैस बिदलारी मरां अक आवाज़ अई, “एन मेरू ट्लारू मट्टू आए। ध्याने सेइं एसेरी गल शुना!”

36 ते तैस आवाज़ी सेइं साथी तैनेई यीशु अकैल्लो लाव, ते तैना चुप राए ते ज़ैन किछ लाहेरू थियूं, तैन केन्वी सेइं न ज़ोवं।

XXXXXXXXXX XXXXXXXX XXXXXXXX XXX XXXXXXX

(XXXXXXXX 17:14-18; XXXXXXXX 9:14-27)

37 होरसां एरू भोवं कि ज़ैखन तैना पहाड़े पुड़ेरां उन्डे ओरे थिये, त बड़े मैन्हु केरि भीड़ तैन कां आई।

38 ते हेरा, एक्की मैने तैन लोकन मरां बड़े ज़ोरे सेइं हक देइतां ज़ोवं, “ए गुरु अवं तीं कां ज़ोवले हथ केरतां कि मेरे मट्टे पुड़ दया केर; तैन मेरू अक्के मट्टूए।

39 ते हेर, अक भूत तैस अपने कब्जे मां केरते, ते तैन अकदम चिन्डां मारते, ते कम्बने लगते, ते तैसेरे एशेरां शैमफ निसचे, ते भूत तैस बड़े बुरे तरीके सेइं ज़ख्मी केरतां शारते।

40 ते मीं तेरे चलन कां बिनती कियोरी थी, कि तैस कदन, पन तैना न केडी सके।”

41 यीशुए जुवाव दित्तो, “हे विश्वास न करेने बालाव ते ढीठ लोकव, अवं केइस तगर तुसन सेइं साथी रेइलो ते तुश्री झैल्लेलो? अपने मट्टे इडी आन।”

42 तै मसां ओरो थियो, त भूते तैन मट्टू मुरोड़तां शारू, पन यीशुए भूत झिड़कतां कदू, ते तैन मट्टू बज्झेइतां तैसेरे बाजरे हवाले कियूं।

XXXXXXXXXX XXXXXXXX XXXXX XXX XXXXXXX XXXXXXXXXX XXX XXXXXXX

(XXXXXXXX 17:22-23; XXXXXXXX 9:30-32)

43 ते सब लोक परमेशेरी बेड़ि कुदरती हेरतां हैरान रेइजे, ते ज़ैखन सब लोक तैन कम्मां ज़ैन यीशु केरतो थियो हैरान रहते थिये। त तैनी अपने चलन सेइं ज़ोवं।

44 “मेरी इन गल्लां रोड़ेचारे शुना किजोकि मैनेरू मट्टू मैन्हु केरे हवाले भोने बालूए।”

45 पन यीशुएरी ए गल चेलां केरि समझी मां न आई, किजोकि तैन करां ए गल छुपारी थी। कि तैन न समझन, ते चेले एस बारे मां यीशु पुच्छने करां डरते भी थिये।

XXXXXXXXXX XXXXXXXX XXXXX

(XXXXXXXX 18:1-5; XXXXXXXX 9:33-37)

46 फिरी चलन एप्पू मामेई बड़ी बेंस भोइ, कि असन मां बड़ो कौन आए?

47 यीशु तैन केरि दिलेरी गल्लां बुझतां निकडो बच्चो आनो ते तै एप्पू कां खडू कियूं ।

48 ते अपने चेलन सेइं ज़ोवं, “जै इस बच्चे मेरे नंवे सेइं कबूल करते, तै मीं कबूल करते, ते जै मीं कबूल करते, तै मेरे भेजने बाले कबूल करते । किजोकि जै तुसन मां निकडे करां निकडोए तै सेभन करां बड्डोए ।”

☞ ☞ ☞ ☞ ☞ ☞ ☞ ☞ ☞ ☞ ☞ ☞ ☞ ☞ ☞ ☞  
(☞☞☞☞ 9:38-40)

49 तैखन यूहन्ना यीशु सेइं ज़ोवं, “ए गुरू, असेई अक मैन्हु तेरे नंवे सेइं भूतां केरो सैयो कढतो लाव, ते असेई तैस ठाकू किजोकि तै असन सेइं साथी मिलतां तीं पत्ती न चले ।”

50 पन यीशुए जुवाब दित्तो, “तैस न ठाका, किजोकि जै तुशशे खलाफ नई तै तुशशो पासे ।”

☞☞☞☞ ☞☞☞ ☞☞☞☞☞☞ ☞☞☞☞☞☞ ☞☞☞☞

51 जैखन यीशुए उबरे नेनेरे दिहाडे पूरे भोने पुड थी त तैनी पक्के चारे यरूशलेम नगरेरे पासे गानेरो खियाल कियो ।

52 ते एप्पू करां अगरी-अगरी किछ बिस्तार देनेबाले लोक भेजे । ते लोक सामरी लोकां केरे एककी डलोव्वे मां जे ताके यीशुए एजनेरी ठार तियारी केरन ।

53 पन लोकेई तै एजने न दित्तो, किजोकि तै यरूशलेम नगरे जो चलोरो थियो ।

54 एन हेरतां तैसेरे चले याकूब ते यूहन्ना ज़ोने लगे, “हे प्रभु, कुन तू चातस, कि अस हुक्म देम, अम्बरेरां अग बखेनतां एन लोकन भस्म केरे?”

55 पन तैनी बेदलोडतां तक्कू, ते तैना झिडके (ते ज़ोवं, “तुस न ज्ञानथ कि तुस कौस आत्माए आथ ।

56 किजोकि मैनेरू मट्टू लोकां केरे प्राणन नाश केरने लेड नई बल्के बचाने ओरोए)” तैखन तैना होरि डलोव्वेरे पासे चले जे ।

☞☞☞☞☞☞ ☞☞☞ ☞☞☞☞☞☞ ☞☞☞☞  
(☞☞☞☞ 8:19-22)

57 जैखन तैना बत्तां चलोरे थियो, त केन्चे तैस सेइं ज़ोवं, “तू जैडी-जैडी भी गालो, अवं तीं पत्ती चलेलो ।”

58 यीशुए तैस सेइं ज़ोवं, “लौई केरि कूढां ते अम्बरेरे चुडोल्लू केरे आले भोतन, पन मैनेरे मट्टे यानी मीं कां कोई ठार नई जैडी अवं झुल्ली सेक्खी ।”

59 फिरी यीशु एककी होरि जो ज़ोवं, “मीं पत्ती चल,” पन तैनी मैने ज़ोवं, “हे प्रभु मीं घरे गानेरी अजाजत दे, मेरे बाजेरे मरनेरां बाद अवं तैस देवतां एज्जेलो ते फिरी तीं पत्ती चलेलो ।”

60 यीशुए तैस जो ज़ोवं, “जैना लोक आत्मिक तरीके सेइं मरेन तैन अपने मैन्हु मरने बलगने दे, पन तू गा ते परमेशेरे राज्जेरे बारे मां लोकन मां प्रचार केर ।”

61 एक्के होरे भी ज़ोवं, “ए प्रभु अवं तीं पत्ती चलेलो, पन पेडले मीं भेज कि अवं अपने घरेबालन ज़ोई ।”

62 यीशुए तैस सेइं ज़ोवं, “जै कोई हल्ली पुड हथ रेखतां पत्रोवं फिरतां तकते, तै परमेशेरे राज्जेरे काबल नई ।”

## 10

70 ☞☞☞☞ ☞☞☞☞

1 ते इन गल्लां केरे बाद प्रभुए 70 होरे चले ठहराए, कि तै जैस-जैस नगर ते ठैरी तैनी एप्पू गानेरे बारे मां सोचोरू थियूं, तेडी दूई-दूई मैन्हु एप्पू अगरी भेजे ।

2 ते तैनी तैन सेइं ज़ोवं, “पकोरी फसलरे ज़ेरे बडे लोक तियार आन जैना परमेशेरे वचने पुड विश्वास केरनू चातन, पन कम केरनेबाले थोडे आन जैना तैन परमेशेरे राज्जेरे बारे मां ज़ोन ।

एल्हेरेलेइ तुस फसलरे मालिके कां प्रार्थना केरा कि तै जादे कम करनेवाले भेजे, कि तैना लोकन परमेशेरे राज्जेरे बारे मां ज़ोन ।”

3 गाथ, अवं तुसन भेड्डां केरे ज़ेरे गिदन मां भेजताई ।

4 एप्पू सेई साथी न बेटवे, न झोलो, न बूट नेइयथ, ते न बत्तां केन्ची जो नमस्कार ज़ोइयथ ।

5 ज़ेसरे घरे मां गाथ त पेइले ज़ोथ कि, “इस घरे मां शान्ति भोए ।”

6 अगर तैड़ी एरे लोक ज़ैना परमेशेरी शान्ति चातन तैड़ी रहते भोलो, त तुशशी शान्ति तैस पुड़ राली, नई त तुशशी शान्ति तुसन पुड़ एज्जेली ।

7 तैस्से घरे मां राथ, ते ज़ैन किछ तैन करां मैल्ले, तैन्ने खाथ-पीथ किजोकि मज़दूर अपनि मज़दूराओ हकदार भोते, घरे-घरे न गोइयथ ।

8 ते ज़ैस नगर मां गाथ, ते तैट्टेरे लोक तुसन अपने घरे मां नेन, त ज़ैन किछ तुशशे सामने रख्खू गाए तैन्ने खाथ ।

9 तैट्टेरे बिमारन बज्झाथ, ते तैन सेइं ज़ोथ, “परमेशेरू राज्ज नेडे ओरूए ।”

10 पन ज़ैस नगर मां गाथ, ते तैट्टेरे लोक तुसन कबूल न केरन, त तैट्टेरे बज़ारन मां गोइतां ज़ोथ ।

11 “कि तुशशे नगरेरी धूड भी इशशे पावन सेइं ज़ै लगोरीए अस तुशशे सामने ठुडकतम ते फिरी भी बुझा कि परमेशेरू राज्ज तुशशे नेडे पुज्जेरूए ।”

12 अवं तुसन सेइं सज़ ज़ोताई, तैस दिहाड़े तैस नगरेरी हालत सदोम नगरेरी हालत झैल्लनेरे काबल भोली ।

~~~~~  
(~~~~~ 11:20-24)

13 “हे खुराजीन! तीं पुड़ अफसोस! हे बैतसैदा तीं पुड़ अफसोस! कि एना चमत्कार मीं तुसन इड़ी हिराए अगर मीं एना कम्मां सूर ते सैदा मां हरेवरां भोथां, त तैन लोकेई केइसेरे देंते टाट पलेटतां ते दोग्गे पुड़ मांज़न छेडतां पापन करां मनफिरावरो भोथो ।

14 पन फिरी भी इन्साफेरे दिहाड़े तुशशो हाल सूर ते सैदारे हाले करां जादे बुरो भोलो ।

15 ते हे कफरनहूम नगरेरे लोकव, कुन तुस सोचतथ कि स्वर्गे मां तुशशी आदर भोनीए! ई तुस त नरके गाले ज़ैड़ी पैपी लोकन सज़ा मैलेली!

16 ज़ै तुशशी शुन्ते, तै मेरी शुन्ते ज़ै तुसन घटिया समझते तै मीं घटिया समझते, ते ज़ै मीं घटिया समझते ते मेरे भेजने वाले घटिया समझते ।”

70 ~~~~~

17 तैना सतर चले खुशी सेइं वापस आए, ते ज़ोने लगे, “हे प्रभु तेरे नंवे सेइं भूतां भी इशशो हुक्म मन्तन ।”

18 तैनी तैन सेइं ज़ोवं, “मीं शैतान एन्चरे विछड़तो लाव ज़ेन्चरे च़डक अम्बेरां पेचे ।

19 हेरा, मीं तुसन सप्पन ते विच़न डल्लंज़नेरो, ते दुश्मनेरी (शैतानेरी) सैरी शेक्ति पुड़ अधिकारे दित्तोए, ते केन्ची चीज़ी सेइं तुसन नुकसान न भोलो ।

20 फिरी भी तुस इस गल्ल्ती सेइं खुशी न भोइयथ कि भूतां तुशशो हुक्म मेनचन, पन इस गल्ल्ती सेइं खुश भोइयथ कि तुशशू नवं स्वर्गे मां लिखोरूए ।”

~~~~~

(~~~~~ 11:25-27; 13:16-17)

21 तैखन यीशू पवित्र आत्मा सेइं मघन भोवं, ते ज़ोने लगे, “हे बाजी, स्वर्गेर त धेरतरे प्रभु, अवं तेरू शुकर करताई, कि तीं इना गल्ल्तां, अक्लमन्द ते समझदारन करां छुपेइतां रेख्खी, ते बच्चन पुड़ बेदी की, हाँ, हे बाजी, किजोकि तेरी खुशी एस्से मां थी ।

22 सैरी चीज़ां मेरे बाजेरी तरफां मेरे सुपुदं कियोरिन, कोई होरो मट्टे न ज़ाने, सिर्फ बाजी ज़ानते; कोई बाजी न ज़ाने सिर्फ मट्टू ज़ानते, या ते मैन्हू बाजी ज़ानते ज़ैस पुड़ मट्टू बांदो करने चाए ।”

23 तैखन तैनी अपने चेलां केरे पासे फिरो अकैल्ले मां ज़ोवं, “धन आन तैना एच्छ्छी ज़ैना एना गल्लां हेरचन ज़ैना गल्लां तुस लातथ,

24 किजोकि अवं तुसन सेइं ज़ोतां, कि बड़े नेबन ते राजां केरि खुवैइश थी, कि एना गल्लां हेरन, ज़ैना तुसेईं लेईं, पन न लेईं सके, ते एना गल्लां शुन्न ज़ैना तुस शुन्तथ पन न शुनी बेटि।”

~~~~~

25 एक्सां यीशु लोकन शिक्षा देने लोरो थियो, ते हेरा, अक शास्त्री खडो भोव, ते इन ज़ोइतां तैस अज़माने लगो, “ए गुरू, हमेशारी ज़िन्दगी हासिल केरनेरे लेइ अवं कुन केरि?”

26 तैनी तैस जुवाब दित्तो, “मूसेरे कानूने मां कुन लिखोरूए? तू केन्चरे समझतस?”

27 तैनी जुवाब दित्तो, “तू प्रभु अपने परमेशरे सेइं अपने सारे दिले, सैरी जानी सेइं, ते अपनि सैरी ताकती सेइं ते अपनि सैरी अक्ल सेइं प्यार रख, ते अपने पड़ोसी सेइं अपने बराबर प्यार केर।”

28 तैनी तैस सेइं ज़ोवं, “तीं ठीक जुवाब दित्तो एन्ने केर, फिरी तीं हमेशारी ज़िन्दगी मैलेली।”

29 पन तैनी अपनो आप धर्मी ठहरानेरे लेइ यीशु पुचछ्छ, “फिरी मेरो पड़ोसी कौने?”

30 यीशुए तैस मिसाल देइतां जुवाब दित्तो, “अक मैन्हु यरूशलेम नगरेरां यरीहो नगरे जो च़ल्लोरो थियो, ते तै डैकेइं तैस पुइ हमलो कियो, ते ज़ैन किछ तैस कां थियू नेव। ते तैसेरां लिगडां खोल्लां, ते मारो कुट्टो ते ज़ख्मी केरतां अधमरो बनेइतां तैड़ी ज़ेरे छुइतां च़ले जे।

31 ते एरू भोवं कि, अक याजक तैस बत्तां च़ल्लोरो थियो, तैनी तै लव ते थरकतो तैसेरी मद्दत केरने बगैर इलखमेइं निस्सो।

32 एन्चरे अक मन्दरे मां कम केरनेवालो लेवी भी निस्सो, ते तैस लेइतां तै भी इलखमेइं निस्सो।

33 फिरी अक सामरी मुसाफर भी तैस बत्तां निस्सो, ते तैस लेइतां तैस बड़ो तरस अव।

34 ते तै तैस कां जेव, ते तैसेरे ज़खमन तेल मल्लो ते दाछोरो रस लाव, ते तैसेरे ज़खमन पट्टी बंधी ते अपने गधे पुइ च़ेइतां एक्की धर्मशाली मां तैसेरी सेवा की।

35 होरसां तैनी दईं दीनार केइतां धर्मशालेरे मालिके कां दित्ते, ते ज़ोवं, ‘एसेरी हेरगेश करां अगर जादे लगगेले त अवं वैपसी पुइ देलो।’

36 तेरे समझी मां एन टलेइन मरां कौन तैसेरो पड़ोसीए ज़ै डैकेइं टलातोरो थियो?”

37 तैनी जुवाब दित्तो, “ज़ैनी तैस पुइ दया की।” यीशुए तैस सेइं ज़ोवं, “गा, तू भी एरू केर।”

~~~~~

38 फिरी ज़ैखन यीशु त कने तैसेरे च़ेले गोइ रावरे थियो, त तैना एक्की इलव्वें मां जे, ते मार्थां नव्वेरी एक्की कुआन्शां यीशु अपने घरे नीयो।

39 ते मरियम नव्वेरी तैसेरी अक बेइन थी, ते यीशुएरे पावन कां बिशतां तैसेरी गल्लां शुनती थी।

40 पन मार्थां किछ खास चीज़ बनेइ रावरी थी, ते यीशु कां आई ते ज़ोने लगी, “हे प्रभु तुसन ज़रां भी खियाल नईं कि, मेरी बेइनां अवं कम केरनेरे लेइ अवं अकैल्ली छुडोरी? ते एस ज़ोथ, ते मेरी मद्दत केरे।”

41 प्रभुए तैस जुवाब दित्तो, “मार्थां, हे मार्थां, तू बेइं गल्लां केरे फिकर केरतिस,

42 पन अक गल ज़रूरीए, मरियमा तै रोडो हिस्सो चुनोरोए, ज़ै तैस करां कोई न नेइ सके।”

## 11

~~~~~

(लूका 6:9-13)

1 फिरी यीशु एक्की ठैरी प्रार्थना लोरे थियो केरने। ते ज़ैखन तैनी प्रार्थना की, त तैसेरे च़ेलन मरां एक्के ज़ोवं, “हे प्रभु, ज़ेन्चरे यूहन्ना अपने च़ेलन प्रार्थना केरनि शिखालोरिये तेन्चरे तू भी असन शिखाल।”

2 यीशुए तैन सेइं ज़ोवं, “ज़ैखन तुस प्रार्थना केरथ, त एन ज़ोइयथ, हे बाजी, लोक तेरी आदर केरन किजोकि तू पवित्तर परमेशर आस।

ते तेरू राज् एज्जे ।'

3 इश्शी रोज़ेरी रोट्टी असन दे ।

4 इश्शे पाप माफ़ केर,

किजोकि अस भी ज़ैना इश्शे खलाफ़ बुराई केरतन, तैन माफ़ केरतम ।

अज़मैइशेरे ज़िरिये असन पाप केरने न दे ।”

???????????? ???? ???? ???? ????
(????? 7:7-11)

5 फ़िरी यीशुए तैन सेइं ज़ोवं, “फ़र्ज केरा तुसन मरां केन्चेरो अक दोस्त एध्धी राती अपने दोस्ते ज़ोए, तू मीं टलाई रोट्टी दे ।

6 किजोकि मेरो अक दोस्त बड़े दूरेरां हंठतो मेरे कां ओरोए, ते मेरे कां रोट्टी नई, कि अवं तैस रोट्टी देइ सेखी ।'

7 ते तैसेरो दोस्त अत्रां जुवाव दे, मीं दुःख ने दे, हुनी त दार बंदे, मीं कां मेरे बच्चे झुलोरेन, ते अवं तीं रोट्टी न देइ सेखी ।

8 अवं तुसन सेइं ज़ोताई कि, अगर तै तैसेरो दोस्ते ते तैस रोट्टी न दे, त तैसेरो दोस्तेरे बार-बार मिनत केरने सेइं ज़रूर तैस रोट्टी देलो ते ज़ेत्ती रोट्टी केरि तैस ज़रूरत भोली देलो ।

9 ते अवं तुसन सेइं ज़ोताई, मग्गा त तुसन दिन्तू गालू । ते तोप्पा, त तुसन मैल्ली गालू । ते दार गुइकाथ, त तुश्शे लेइ खोल्लू गालू ।

10 किजोकि ज़ै कोई मगते तै हासिल केरते, ते ज़ै कोई तोपते तैस मैल्ली गाते, ते ज़ै कोई दार गुइकाते त तैसेरेलेइ खोल्लू गाते ।

11 तुसन मरां कौन ज़ेरो बाजी एरो भोए, कि ज़ैखन तैसेरू मट्टू रोट्टी मग्गे त तैस घोइ दे? या मछली मग्गे, ते तै सप दे?

12 या ठूल मग्गे त तैस बिच्चू दे?

13 ते तुस बुरे भोनेरे बावजूद भी अपने मट्टन रोड़ी चीज़ां देनी ज़ानतथ त तुश्शो स्वर्गेरो बाजी तैन, ज़ैना तैस करां मगतन पवित्तर आत्मा किना देलो ।”

???? ???? ???? ????
(????? 12:22-30; ?????? 3:20-27)

14 फ़िरी तैनी एक्की लट्टे मरां भूतेरो सैयो कढो, ज़ैखन भूतेरो सैयो निस्सो, त तै लट्टो गल्लां लगे केरने, ते लोक हैरान रेइजे ।

15 पन तैन मरां किछ् मैनेई ज़ोवं, “ए त भूतां केरे गुरू शैतानेरे मद्दती सेइं भूतां कढते ।”

16 ते किछ्ई अज़मानेरे लेइ तैस करां कोई अक अम्बरेरो निशान मग्गो ।

17 पन यीशुए तैन केरे मन्नां केरे खियाल ज़ैनतां तैन सेइं ज़ोवं, “ज़ैस-ज़ैस राज्जे मां फूट पेचे, तैन राज् बनोरू न राए, ते ज़ैस खानदाने मां फूट पेचे, तैन भी बनोरू न राए ।

18 अगर शैतान अपनि खलाफ़त एप्पू केरे, त फ़िरी तैसेरू राज् केन्चेरे रेइ सकते? फ़िरी तुस केन्चेरे ज़ोतथ कि अवं शैतानेरे मद्दती सेइं भूतां कढताई ।

19 अगर अवं शैतानेरी मद्दती सेइं भूतां कढताई त तुश्शी औलाद कसेरे मद्दती सेइं कढती? तैन्ना तुश्शो फैसलो केरनेबाले हाकिम भोले ।

20 पन अगर अवं परमेशेरेरे शक्ति सेइं भूतां कढताई त परमेशेरेरू राज् तुश्शे नेइ पुजोरूए ।

21 ज़ैखन कोई ज़ोरेबाले मैन्हु अपने घरेरो पैरहो केरते, त तैसेरू सब किछ् बंछेरू रहते ।

22 पन ज़ैखन तैस करां कोई निगर मैन्हु तैस पुइ हमलो केरते त तैस अपने कब्जे मां केरतां तैसेरे सारे हथियार धिनी गाते ज़ैस पुइ तैसेरो भरोसो थियो, ते तैसेरी सारी जेइदाद लुटी गाते ।

23 ज़ै मीं सेइं साथी नई ते मेरे मुखालफ़े, ते ज़ै मीं सेइं साथी अकोट्टू न केरे ते तै खिलारते ।

????? ?????? ???? ????
(????? 12:43-45)

24 “जैखन केन्वी मैन्हु मरां भूत निसते त तैन शुक्कोरो टैरन मां आराम तोपते ते जैखन तैस ते आराम न मैल्ले त ज़ोते कि अवं वापस तैस्से घरे मां गालो ज़ैट्टां अवं निसोरोई ।

25 ते तैखन तैन भूत वापस एइतां तैन घर साफ सुथरु रोडू लाते ।

26 तैखन तै एप्पू सेइं साथी सत होरां भूतां साथी चिन्तां तैस मां अन्तर गोइतां विशशतन, ते तैस मैनेरो हाल पेइले हाले करां जादे बुरो भोते ।”

?? ?????

27 जैखन यीशु इना गल्लां ज़ोने लगगोरो थियो, त भीड़ी मरां अक कुआन्श जोरे सेइं ज़ोने लगी, “धने ते कुआन्श ज़ैसां तीं ज़र्म दिनु ते तू पालो ।”

28 पन यीशुए ज़ोवं, “हाँ, पन धन आन तैना लोक ज़ैना परमेशेरू वचन शुन्तन ते तैस पुइ अमल केरतन ।”

?????? ?????????? ????
(????? 12:38-42)

29 जैखन हछे लोक भोने लगे त यीशु ज़ोवं, “इस ज़मानेरे लोक बुरेन, तैना निशान तोपतन, पन योनेरे निशानेरे अलावा एन होरो कोई निशान न दित्तो गालो ।

30 किजोकि ज़ेन्बरे योना नबी नीनवेरे लोकन जो निशान बनो तेन्बरे मैनेरू मट्टू भी इस ज़मानेरे लोकां केरे लेइ निशान बनेलू ।

31 पन दक्षिणेरी रानी आदालतरे दिहाड़े इस ज़मानेरे लोकन दोषी बनानी, किजोकि तै बड़े दूरेरां सुलैमानेरे ज़ानेरे बारे मां शुन्तां ओरी थी । ते इड़ी हेरा सुलैमाने करां भी बड्डोए ।

32 नीनवेरे लोक आदालतरे दिहाड़े इस ज़मानेरे लोकन सेइं साथी खड़े भोइतां मुर्जम बनाले । किजोकि तेनेई योनारे प्रचारे सेइं पापन करां मनफिरावरो थियो, पन इड़ी हेरा तै आए, ज़ै योना करां भी बड्डोए ।

????? ????
(????? 5:15; 6:22-23)

33 “कोई मैन्हु दीयो बैलतां भांडे हैट या ओइकतां न छुडे, बल्के उच्ची ठैरी रखतन ताके अन्तर एजने बालन लौ भोए ।

34 अछु जानेरे लेइ दीयेरी ज़ेरि आए, अगर तेरी अछु रोड़ीए, त तेरी जानी मां भी लौए, ते अगर तेरी अछुछे बुरीए त तेरी जान भी आंधरीए ।

35 एन्हरेलेइ खबरदार रेइयां, कोस्कोई एरू न भोए कि ज़ै लौ तीं मां आए तै आंधरू न भोए ।

36 अगर तेरी जानी मां लौए, त तैसेरो कोई भी हिस्सो आंधरो न भोए, त सब एरू भोलू, ज़ैखन दीयो चमकतां लौ देते ।”

????????? ?? ???? ???? ???? ???? ????
(????? 23:1-36; ?????? 12:38-40)

37 जैखन तै एना गल्लां ज़ोने लोरो थियो, त केन्वे फरीसे यीशु कां मिनत की, कि मीं सेइं साथी रोट्टी खा, ते यीशु तैसेरे घरे जेव ते तैसेरे कां गोइतां रोट्टी खाने विशशो ।

38 फरीसी लोक एन हेरतां हैरान भोव, कि ए बगैर हथ-पाव धोने रोट्टी खाने विशशी जेव ।

39 पन प्रभुए फरीसी सेइं ज़ोवं, “हे फरीसाव तुस कटोरो, ते थाली बेइरमेइं त बड़ी साफ केरतथ, पन तुशे अन्तर ज़ुलम ते लालज भेरतांए ।

40 हे बेअक्लाव, ज़ैनी बेरीयोवं हिस्सो बनावरोए, तैनी आंटेलेइयो हिस्सो नई बनेरो?

41 बस्सा एन्त्री चीज दान केरा, त हेरा, सब किछु तुशे लेइ साफ भोइ गालू ।

42 पन हे फरीसाव, तुसन पुड़ अफ़सोस! तुस पुतनेरो ते ज़ीरो ते कने सेबज़ारो दशोवं हिस्सो देतथ, पन तुस इन्साफ़ केरने करां त परमेशेरे प्यारे करां दूर रातथ, लोडतू थियू कि दशोवं हेसे सेइ साथी इन भी केरेथे ।

43 हे फरीसाव, तुसन पुड़ अफ़सोस! तुस लोक चातथ कि प्रार्थना घरन मां तुसन एग्री कुर्सन पुड़ विशालन ते बज़ारन मां लोक तुसन कां झुकतां नमस्कार केरन ।

44 पन हे फरीसाव तुसन पुड़ अफ़सोस! तुस तैन छेपौरी कब्रां केरे ज़ेरेथ, ज़ैन पुड़ लोक च़लतन, पन तैन पतो न भोए ।”

45 तैखन शास्त्री मरां एक्के तैस जुवाव दित्तो, “हे गुरू एना गल्लां जोइतां तू इशशी तुहीन लोरोस केरने ।”

46 यीशुए ज़ोवं, “हे शास्त्री लोकव, तुसन पुड़ अफ़सोस! तुस मैनन् पुड़ त एत्रो भारो लदतथ ज़ै छूनो असुखतो भोते ते पन एप्पू अपने कानूने मन्नेरी कोशिश भी न केरन ।

47 तुसन पुड़ अफ़सोस! तुस नेवी केरि कब्रां बनतथ ते तुशशे दादे-पड़दादेई तैना मारोरे थिये ।

48 बस्सा, तुस शहातथ कि तुस अपने दादे-पड़दादां केरे कम्मां केरि पूरी तैइद केरतथ, किजोकि तैनेई त नवी कल्ल कमाए ते तुस तैन नेवी केरि कब्रां बनातथ ।

49 एल्हेरेलेइ प्रभु परमेशेरी अक्लां ज़ोवं, नवी त प्रेरित तैन कां भेजनेन तैना तैन मरां किछ कल्ल केरेले ते किछन सताले ।

50 बस्सा ई कौम सारे नेवी केरे खूनेरे ज़ै दुनियारे शुरू करां देंतो बगेवरोए ज़िमेवार भोली ।

51 हाबिलेरे खूने करां देंतो ते जकर्याहरे कल्ले तगर ज़ै तुसेई मन्दरेरे ते बलिदान केरनेरे डारोरे मझाटे मन्दरेरे अंगने मां कल्ल कियोरो थियो । अव ज़ोताई कि ए कौम तैन केरे खूनेरी ज़िमेवार भोली ।

52 पन हे फरीसाव तुसन पुड़ अफ़सोस! तुसेई शास्त्री लोकेई चाबी त अपने कब्जे मां रखी, पन तुस एप्पू भी दाखल न भोए ते ज़ैना दाखल भोनु चाते थिये तैना भी रोके ।”

53 ज़ैखन यीशु तैट्टां निस्सी जेव त शास्त्री ते फरीसी लोकेई तै घेरो ते सरकरे मारे च़ेवरे पासना बड़े असुखते सवाल पुच्छने लगे ।

54 ताके यीशुएरे ज़बा एरी गल निस्से ज़ैस सेइ लोक तैस पुड़ गलती लांन ।

12

~~~~~

(~~~~~ 10:26-27)

1 एत्रे मां हज़ारेई मैन्हु अकोट्टे भोइ जे, ते एक्की होरि उन्दे खिरकते थिये त यीशुए सेबन करां पेइले अपने चलन खड़े भोइतां ज़ोवं, “फरीसी लोकां केरे पाखंडेरे खमीरे यानी तैन केरे रीति रूवाज़न करां हुशार रेइयथ ।

2 कोई चीज़ ओडकोरी नई ज़ै बांदी न भोए, ते न कोई चीज़ छपौरीए ज़ै जानी न गाए ।

3 एल्हेरेलेइ ज़ैना गल्लां तुसेई आंधरे मां ज़ोरिन तैना गल्लां लोई मां शुनोनिन, ते ज़ैना गल्लां तुसेई अन्तर ज़ोरिन तैन केरू एलान लाए पुड़ भोनुए ।

~~~~~

(~~~~~ 10:28-31)

4 “दोस्तव अव तुसन सेइ सज़ ज़ोताई कि तैन करां न डेरथ ज़ैना जानी नुकसान पुज़ातन तैसेरे बाद तैना किछ न केरि बटन ।

5 पन अव तुसन सेइ सज़ ज़ोताई कि केस करां डरू लोइते, ज़ैस जानी मारनेरे बाद तैसेरी आत्माई नरके मां छड़नेरो अधिकारे, हाँ अव तुसन सेइ सज़ ज़ोताई कि तैस करां डरा ।

6 कुन दूई पेंडसन मां पंच च़डोली न बिकन? पन परमेशर तैन मरां केन्वी भी न बिसरे ।

7 बल्के तुशुशे दोगगरे सारे बाल गनोरेन डरा नन्ना तुस त काई चुड़ोलन करां भी जादे कीमती आथ ।

~~~~~  
 (~~~~~ 10:32-33; 12:32; 10:19-20)

8 “अवं तुसन जोताई कि ज़ै कोई मैन्हु केरे सामने मेरो इकरार केरेलो, त अवं मैनेरू मट्टू भी परमेशेरे स्वर्गदूतां केरे सामने इकरार केरेलो

9 पन ज़ै मैन्हु केरे सामने मेरो इन्कार केरेलो त तैसेरो इन्कार परमेशेरे स्वर्गदूतां केरे सामने कियो गालो ।

10 “ज़ैना लोक मैनेरे मट्टेरे खलाफ किछ ज़ोले तै तैस माफ़ केरेलो पन ज़ै पवित्र आत्माारी तुहीन केरेलो तैस माफ़ न केरेलो ।

11 “ज़ैखन तैना तुसन प्रार्थना घरन मां ते बड़े-बड़े ते अधिकैरन कां नेले त फिक्र न केरथ कि अस कुन ज़ोम ते केन्चरे जुवाब देम ।

12 किजोकि पवित्र आत्मा तुसन तैस वक्ते ज़ोलो कि तुसेई कुन ज़ोनूए ।”

~~~~~

13 फिरी भी डी मरां केन्च एक्क यीशु सेई ज़ोवं, “हे गुरु जी मेरे दूलाए जो ज़ो, कि इशुशे बाजी केरि जेइदाती मरां मेरो हिस्सो मेरे हवाले केरे ।”

14 यीशुए तैस जुवाब दित्तो, “अवं केनि तुशुशो हाकिम या बंटने वालो बनेवरोइ?”

15 ते यीशुए तैन सेई ज़ोवं, “हर किसमेरे लालच़े करां दूर भोइयथ ते न केन्चेरी जेइदाद केन्चेरी जानी करां जादे भोए ।”

16 तैखन यीशुए तैन अक मिसाल शुनाई, “केन्ची अमीरेरे ज़मीनी मां बड़ी फसल बनी ।

17 तै अपने दिले मां सोचतां ज़ोने लगे, कि अवं कुन केरि, मीं कां ठारे नई कि ज़ैड़ी अवं अन्न रेख्वी सेखी ?

18 तैखन तैनी ज़ोवं कि, ‘अवं अक कम केरताई, अपने पुराने कोठार पुटतां होरे बड़डे कोठार बनेइ ते अपनू सारू अन्न तैस मां रखेलो ।

19 फिरी मीं अपने आपे सेई ज़ोनूए कि, मीं कां त बड़े सालन तगर अन्न जम्हां भोरूए, मेरी जान आरामे सेई खा ते एश केर ।’

20 पन परमेशेरे तैस मैन्हु जो ज़ोवं, ‘हे बेवकूफ अज़े राती तू मरेलो, ते ज़ैन किछ तीं अपने लेइ जम्हां केरतां रखेरूए तैन केसरू भोलू?’

21 एल्हेरेलेइ ज़ै अपने लेइ दौलत जम्हां केरते, पन परमेशेरी नज़री मां तै अमीर न भोए एसेरो भी एरो हाल भोनोए ।”

~~~~~  
 (~~~~~ 6:25-34)

22 तैखन यीशुए अपने चेलन सेई ज़ोवं, एल्हेरेलेइ तुस न अपने जिन्दगरी ज़रूरतेरे लेइ फिक्र केरा, कि तुस कुन खाले, ते न अपने जानारी कि कुन लामेले ।

23 किजोकि पूराण रोट्टी करां ते जान लिगडे करां बेधतां भोते ।

24 कांवां करां तक्का, तैना न बेन ते न कटन ते न तैन कां गुदाम या कोठार भोन, तांभी परमेशर तैन खाने जो देते ते तुस त चुड़ोलन करां भी जादे कीमती आथ ।

25 तुसन मां एरो कौन आए, ज़ै फिक्र केरतां अपनि उमर अक घड़ी भी बधेई सकते ?

26 बस्सा, ज़ैखन तुस ए अक निकडी ज़ेरि गल भी न केरि बटथ, त बाकी बेइडी चीज़ां केरि फिक्र किजो केरतथ ?

27 सोसनेरे फूडू केरे तक्का कि तैना केन्चरे बेडोतन ? तैना न मेहनत केरन ते न कत्तन, फिरी भी अवं तुसन सेई ज़ोताई कि राज़ो सुलैमाने भी अपने सारे धन दौलतरे बावजूद भी तैन करां ज़ेरां लिगड़ा न लां ।

28 बस्सा जैखन परमेशेरे मैइदानेरो घास, जै अज्र आए ते कालां लौवने मां फुकनोए, एरी खूबसूरती देते, त हे घट विश्वासे बाले लोकव, कुन तै तुसन लिगइ न देलो?

29 ते एस फिक्रे मां न रेइयथ, कुन खामेले, या कुन पीमेले, या कुन लामेले, ते न शक केरथ ।

30 किजोकि दुनियारी सैरी कौमां एस्से फिक्रे मां लेगोरी रेइचन, पन तुशशो बाजी ज्ञानते, कि तुसन कोनां-कोनां चीजां केरि ज़रूरत आए ।

31 पेइले परमेशेरे राज्जेरे तलाश केरा, फिरी तुसन एना सैरी चीजां मैल्ली गैली ।

??????

(?????? 6:19-21)

32 “तुस भेइडां केरे निकडे केन्नेरे ज़ेरेथ, तुस कोन्वी गल्लेरे लेइ न डरा, किजोकि तुशशे बाजेरी खुशी एस्से मां आए, कि तै तुसन राज़ दे ।

33 अपनू घरबार बेन्नतां धर्मरथ देथ, ते एप्पू जो अक बेटुवो बनाथ, जै पुरानो न भोए, स्वर्गे मां दौलत जम्हां केरा जै कधे न मुक्के, ज़ेइ न च़ोर पुज़े ते न कीइो खाए ।

34 किजोकि ज़ेइ तेरी दौलत भोली, तेइ तेरो दिल भी लग्गेलो ।

??????

35 “सेवा केरनेरे लेइ रोडेच़ारे कमर बेद्धतां तियार भोथ, ते तुशशे दीये सैरी राती बलते रान ।

36 तुस मेरे एजनेरे लेइ एन्च़रे तियार राथ, ज़ेन्च़रे मैन्हु केरे अपने मालिके, जै इलाएरे धामी मरां वापस एजने बलगतन, कि जैखन तै एज्जे ते दार गुइकान त अस दार खोल्लम ।

37 तैना नौकर धन आन ज़ैना अपने मालिकेरे वापस एजने पुइ बींझे मैलतन, अवं तुसन सेइं सन्न ज़ोताई, कि तै एप्पू तैन रोडेच़ारे नौकरन लिगइं लेइतां तियार लाएलो, ते मालिक तैन सेइं खुश भोइतां एप्पू सेइं साथी रोट्टी खाने बिशालेलो ते तैन केरि सेवा केरेलो ।

38 अगर मालिक एध्धी राती या झेइरेपार एइतां अपने नौकरन बींझे लाए त तैन नौकरां केरे लेइ केतरी रोड़ी गल्ले ।

39 पन याद रखा, अगर घरेरे मालिके, च़ोर एजनेरो पतो भोए त तै बींझो राथो ते अपने घरे च़ोरी न देथो भोने ।

40 बस्सा, तुस भी मेरे वापस एजनेरे लेइ तियार राथ, मैनेरू मट्टू यानी अवं तैस वक्ते एज्जेलो ज़ेइस तुसन खियाल भी न भोलो ।”

??????

(?????? 24:45-51)

41 पतरसे पुच़्छू, “हे परभु जै मिसाल तीं शुनाई तै सिर्फ इशशे लेइए या सेब्भी केरे लेइए?”

42 परभुए ज़ोवं, “कौने ईमानदार अक्लमन्द नौकर ज़ेसेरो मालिक तैस अपने नौकरन पुइ मुन्शी रखे ताके तैन केरि खूराक ठीक मौके पुइ रोडेच़ारे बंटतो राए?

43 तै नौकर धने कि ज़ेसेरो मालिक एज्जे ते मालिक तैस रोडेच़ारे कम केरतू लाए ।

44 अवं तुसन सेइं सन्न ज़ोताई कि तै अपने सारे घरबारेरी हेरगैशरो अधिकार तैसेरे सुपुर्द केरेलो ।

45 पन अगर तै नौकर अपने दिले मां ज़ोए कि मेरे मालिके एजने हेजू बडू च़िरे ते हारि नौकरन ते नौकरेनन मार धाइ केरनि शुरू केरे ते खेइ पीतां नशे मां मसत भोइ गाए ।

46 ते तैस नौकरेरो मालिक केन्वी एरे दिहाडे एज्जे ज़ेइस तैस नौकरे एजनेरो पतो न भोए ते तै मालिक एज्जी गाए त तैस नौकरेरे टुकडे-टुकडे केरतां ते तैसेरी हालत बेइमाना केरि ज़ेरि भोली ।

47 हर तै नौकर ज़ै ज्ञानते कि तैसेरे मालिकेरी कुन मर्जी आए, कि ते कुन केरे, मगर तै अपने आपे कम केरनेरे लेइ तियार न केरे ते अपने मालिकेरी मर्जी पूरी न केरे तैस पक्की मार बज़नीए ।

48 पन अगर कोई नौकरे ज़ैस नई पतो कि मेरे मालिकेरी कुन मर्जी, कि अवं कुन केरि, ते तैन केरे ज़ैस सेइं तैस सज़ा मैल्ले, त तैस घट सज़ा मैलेली ।”

?????? ?????? ???? ?

(????? 10:34-36)

- 49 यीशुए ज़ोवं, “अवं धरती पुड़ अग लाने ओरोई ते अगर अग लगगोरी भोथी त रोड़ थियूं।  
 50 पन मीं बड़े जल्दी दुःख झैल्लनोए, ते अवं बड़ो परेशानई ज़ां तगर दुख न झैल्लनी।  
 51 कुन तुस एन सोचतथ कि अवं धरती पुड़ मेल कराने लेइ ओरोई? नई! अवं तुसन सेइं ज़ोताई, कि अलग करने ओरोई।  
 52 अऊरे बाद अगर एक्की घरे मां पंन्न मैन्हु भोले त तैना एप्पू मांमेइं बेंटोले, टलाई ज़ैना मीं पुड़ विश्वास न केरन तैना दुइयां केरे खलाफ भोले, ते दूई, ट्लेइयां केरे खलाफ भोले।  
 53 बाजी मट्टेरे खलाफ भोलो ते मट्टू बाजरे खलाफ भोलू, हैई कुइयरे खलाफ ते कुई हैईयरे खलाफ ते शिख नुशारे ते नुश शिखारे खलाफ भोनीए।”

?????? ?????? ?

(????? 16:2-3)

- 54 फिरी यीशुए बड़े मेनन् मां ज़ोवं, “कि ज़ैखन तुस विदलार डुबते पासेरां च़लती लातथ त तुस ज़ोतथ कि झड़ी एजने बालीए ते तैन्ने भोते।  
 55 ते दक्षिणेरे पासेरां हवा च़ली त तुस ज़ोतथ गर्मी भोरीए ते तैन्ने भोते।  
 56 हे पाखंडी लोकव, तुस धरती ते अम्बरेरो हाल हेरतां मौसमेरो अंदाज़ो केरनो ज़ानतथ, पन इन न ज़ैनी बटथ कि, परमेशर कुन चाते?”

???? ?????? ???? ????????

(????? 5:25-26)

- 57 “तुस एप्पू फैसलो केरा कि, तुशे लेइ कुन रोड़ए।  
 58 ज़ैखन तू लीडरे सेइं साथी हाकिमे कां गाथ त बत्ते मां तैस सेइं फैसलो की न केरस, एरू न भोए तै तीं हाकिमे कां ने ते हाकिम सिपाहीएरे हवाले केरे, ते तू कैद भोइ गास।  
 59 अवं तुसन सेइं ज़ोताई कि ज़ां तगर तू पाई-पाई न देले त तांतगर तैटठां छुट्टी न सकेलो।”

## 13

???? ?????? ???? ????????

- 1 तैस मौके किछ लोक तैड़ी आए, तैना यीशु सेइं तैन गलील इलाकेरे लोकां केरे वारे मां ज़ोने लगे, ज़ैन केरो खून, रोमेरे गवर्नर पिलातुसे मन्दरे मां जानवरां केरे बलिदाने सेइं साथी मलेवरो थियो।  
 2 यीशुए तैन जुवाब दित्तो, “कुन तुस एन समझतथ कि तैन गलीलेरे लोकां केरो एत्रो बुरो हाल एन्हरेलेइ भोवं, कि तैना बाकी गलीलेरे लोकन करां जादे पापी थिये?  
 3 अवं तुसन सेइं ज़ोताई कि, अगर तुस भी पापन करां मन न फिराले त सब एन्चरे नाश भोनेथ।  
 4 या कुन तैना अठारे ज़न्हे ज़ैन उन्दो शीलोहेरो गुम्मत विछड़ोरो थियो, ते तैना सब तैस हैठ मेरि जे, ते तैना यरूशलेम नगरेरे होरि लोकन करां पापी थिये?  
 5 अवं तुसन सेइं सच ज़ोताई, कि नई बल्के अगर तुस भी पापन करां मन न फिराले त तुस सब एन्चरे नाश भोइ गानेथ।”

???? ??????? ???? ?

- 6 तैसरां बाद यीशुए तैन अक मिसाल देइतां ज़ोवं, “केन्वे मैने अपनि बागी मां अक फ़ेगेरो बुट लोरो थियो, ते तैस बुट्टे पुड़ हर साल फल तोपने अव पन तैस फल न मैल्लो।  
 7 तैखन तैनी बागवने सेइं ज़ोवं, हेर अवं टलाई सालां केरो देंतो इस फ़ेगेरे बुट्टे पुड़ फल लोरोई तोपने, पन अज़ तगर एस पुड़ फल न मैल्लो एस केट्टी छड़ एनी किजो रोड़ी ठार च़िकतां रखोरीए? ”  
 8 पन तैनी तैस जुवाब देइतां ज़ोवं, मीं निदतां एसेरे च़ेवरे पासन खाद छड़निये।

9 अग़र फिरी भी फल न लगेो त फिरी केट्टी देनोए\* ।”

~~~~~

10 एक्की आरामेरे दिहाड़े यीशु प्रार्थना घरे मां शिक्षा देने लोरो थियो ।

11 हेरा, तैड़ी अक कुआन्श थी ज़ैस अठारे सालां केरि देंती भूतेरे सैइयेरे वजाई सेइ कुबड़ी भोरी थी । तै सधी न थी भोइ बटती ।

12 यीशुए तै कुबड़ी कुआन्श लाई त एप्पू कां कुजाई ते ज़ोवं, “हे कुआन्श, तू अपनि तकलीफी करां छुटी जेई ।”

13 ते यीशुए तैस कुआन्शी पुड़ हथ रखे ते तै लूशी बेज्जोइ ते परमेशेरेरी तारीफ़ केरने लगी ।

14 पन प्रार्थना घरेरो प्रधान यीशु पुड़ नराज्ज भोव कि, एनी ए कुआन्श, आरामेरे दिहाड़े किजो बज्जाई ते ज़ोने लगेो, “हफते मां शा दिहाड़े कम काज्ज केरनेरे लेइ आन, ते तैन्ने मां कोई बज्जावरो भी लोइचे, ते आरामेरी दिहैड़ी न ।”

15 परभु यीशुए तैस जुवाब दित्तो, “ए पाखंडी लोकव कुन तुस आरामेरी दिहाड़ी अपने दांत या गधे खोलतां तैन पानी पियाने न नेथ?

16 त कुन एन रोड़ न भोवं कि ज़ै कुआन्श बेज्जोइ तै अब्राहमेरे खानदाने मरां ए, ज़ै अठारे सालां केरि देंती शैताने गुलैमी मां रखोरि थी त आरामेरे दिहाड़े ए कुआन्श छुटानी न थी?”

17 ज़ैखन यीशुए एना गल्लां ज़ोई त तैसेरे खलाफ़ ज़ोने वाले सेब्भी केरि बेइज्जती भोइ, ते सारे लोक यीशुए ज़ैना महिमारां कम्मां अपने हथेइ कियोरां थियां खुशी मनाने लगेो ।

~~~~~

(~~~~~ 13:31-32; ~~~~~ 4:30-32)

18 तैखन यीशु तैन सेइ ज़ोने लगेो, “परमेशेरेरू राज्ज कौस चीज़री ज़ेरूए अवं केस सेइ ज़ोई?

19 तन शेरि एरे वीज़ेरू ज़ेरू आए, ज़ैन एक्की मैने एन्तां अपनि बागी मां बेवं, पन ज़ैखन तैन वीज़ बेव गाते, तै उगतां सारे निक्के-निक्के बुट्टन केरां बइडो भोते । ते अम्बेरां चुड़ोल्लू भी तैस पुड़ विशने लगां ।”

~~~~~

(~~~~~ 13:33)

20 यीशुए फिरी ज़ोवं, “अवं परमेशेरेरे राज्जेरी मसाल केस सेइ देई?

21 तैन खमीरेरू ज़ेरूए, ज़ैन केन्ची कुआन्शां आनु, ते हछे अट्टे मां मलाव ते सारू अट्टू खमीर वेनि ज़ोवं ।”

~~~~~

(~~~~~ 7:13-14,21-23)

22 यीशु अपने चलन सेइ साथी यरूशलेम नगरे मांमेइ गाते बार नगरन मां ते इल्लोव्वन मां शिक्षा देंतो च़ल्लोरो थियो ।

23 केन्चे यीशु पुच्च़्छू, “हे परभु कुन थोड़े ज़ेरे लोक हमेशारी सज़ाई करां बच्चेले?” यीशु तैन सेइ ज़ोवं ।

24 “परमेशेरेरे राज्जे मां सुन्कड़े दारेरां वत्तां गानेरी कोशिश केरा, किजोकि अवं तुसन सेइ ज़ोताई कि बड़े लोक अन्तर गानेरी कोशिश केरेले पन न गेइ सकेले ।

25 ज़ैखन घरेरो मालिक एक्की बार दार बंद केरि छुडते, त तुस बेइर खड़ खड़े दार गुड़काते, ते बिनती केरते राथ कि, ‘हे परभु इश्ये लेइ दार खोल्ल’, ते ते तुसन जुवाब देते कि अवं तुसन न ज़ैनी तुस कौन आथ ते कोट्टां ओरथ?

26 तैखन तुस ज़ोले कि, ‘असेई तीं सेइ साथी खोरी पियोरी नई, ते तीं इश्ये अंगने मां असन शिक्षा नई दित्तोरी ।’

\* 13:9 13:9 फ़ेरो बुट इस्राएली लोकन हिराते ।

27 पन तै तुसन सेइं ज़ोलो, 'अवं तुसन न ज़ैनी तुस कौन आथ, ते कोट्टां ओरेथ हे बेइमानव मीं करां दूर भोथ।'

28 ज़ैखन तुस अबराहम, इसहाक ते याकूब ते सब नेबन परमेशेरे राज़े मां सामने लाएले ते अपनो आप बेइरोवं कढते लाएले, त लेरां देते ते दंत चापते राले।

29 लोक पूर्वरां ते पछ्मेरां ते उत्तर ते दक्षिणेरे देते यानी दुनियारे सारे लोकन मरां लोक परमेशेरे राज़ेरी धामी मां एइते लाएले।

30 ते हेरा किछ् एरेन कि ज़ैना पेइले आन, तैना पत्रोवं भोनेन ते ज़ैना पत्रोवं आन, तैना पेइले भोनेन।"

~~~~~

31 तेखन किछ् फरीसी लोक यीशु कां आए ते ज़ोने लगे, "इट्टां निस ते च़लो गा, किजोकि हेरोदेस तीं मारने चाते।"

32 पन यीशुए तैन ज़ोवं, तैस मैन्हु सेइं ज़ै लोई अरो ज़ेरो आए, गोइतां तैस सेइं ज़ोथ कि, "अवं अज़ ते कालां भूतां केरो सैयो कढने ते बिमारन बज्जानेरू कम केरने लोरोईं ते एन कम ट्लेइ दिहाइन मां मीं पूरू केरनूए।

33 बस्सा मीं अज़ ते कालां ते ट्लेईदी मीं सफर केरनूए, किजोकि नबी सिर्फ यरूशलेम नगरे मां मारे गाले।

~~~~~

(~~~~~ 23:37-39)

34 "हे यरूशलेमे नगरेरे लोकव, हे यरूशलेमे नगरेरे लोकव, तुसेईं केतरे नबी कल्ल किये, ज़ैना बड़े पेइले तुसन कां आए, ते ज़ैना तुसन कां भेजे तैन घोड़ेईं बेईं, मीं केही फेरेईं सोचू कि तेरे बच्चन अकोट्टे केरि ज़ेन्चरे कुकड़ी अपने बच्चन अपने फंगन हैठ रखवे, पन तुस राज़ी न भोए।

35 हेरा तुशू घर तुशू लेइ छ्इइ गाते, ते अवं तुसन सेइं ज़ोताई कि तुस मीं केन्ची तरीके भी न लेईं सकले, ज़ांतगर तुसन एन ज़ोनेरो मौको न एज्जेलो, धने तै ज़ै प्रभुएरे नंवे सेइं एइते।"

## 14

~~~~~

1 यीशु फिरी आरामेरे दिहाइ एक्की फरीसेरे घरे रोट्टी खाने जेव त बड़े फरीसी लोक ध्याने सेइं लोरे थियो तकने, ताके तैसेरी कोई गलती ट्लान।

2 तैड़ी अक बिमार मैन्हु थियो ज़ेसेरी ज़ंघां पैखड़ी शोजती थी ते पस-पाक च़लती थी, तै तैड़ी बिशोरो थियो।

3 यीशुए शास्त्री ते फरीसी लोकन पुच्छ्, "कि आरामेरे दिहाइ कानूनेरे मुताबिक कोई बज्जानो जेइजे की नईं?"

4 तैना चुप राए, तैखन यीशुए तैस बिमारे पुइ अपनो हथ रखो ते तै बज्जाव, ते घरजो भेजो।

5 ते फरीसन सेइं ज़ोवं, "तुसन मरां एरो कौन, ज़ेसेरू मट्टू या दांत खड्डे मां खिरके ते आरामेरी दिहाड़ी भोए, ते तैस तैट्टां बेइर न कढे?"

6 ते तैन लोकेईं यीशुएरी गल्लां केरो जुवाव न देइ बटो।

~~~~~

7 ज़ैखन यीशुए हेरू कि, ज़ैना लोक धाम ज़ोइतां रोट्टी खाने कुजोरेन केन्चरे खास लोकां केरि टार चुनतन, तैनी तैन अक मिसाल दिती।

8 "ज़ैखन तुसन कोई इलाएरी धामी मां कुजाए। ज़ै तैनेईं खास मैन्हु केरे लेइ टार रखोरी भोए, तुस तैड़ी न बिश्रथ, भोइ सकते कि होरो कोई तुसन करां जादे खास मैन्हु कुजेवरो भोए।

9 ते तुसन दुइये ज़न्न कुजाने बालो तुसन कां एइतां ज़ोए, ए टार होरि केरे लेइए ते तुसन शरमेइतां खडे उठनू पे, ते सेब्बन करां पत्र बिशनू पे।

10 ज़ैखन भी कोई तुसन धाम जोइतां कुजाए त सेबन करां पत्र बिश्या, ताके ज़ैखन तेरो कुजाने वालो एज्जे ते जोए, 'दोस्त, अगर एइतां खास ठैरी बिश,' त तैन लोकां केरे सामने तेरी केतरी बड़याई भोनीए।

11 किजोकि ज़ै कोई अपनो आप बड़डो बनालो त तै निकडो बनाव गालो ते ज़ै कोई अपनो आप निकडो बनालो त तै बड़डो बनाव गालो।"

12 फिरी यीशुए, तैस फरीसी मैन्हु सेइं ज़ैनी तै कुजोरो थियो ज़ोवं, "ज़ैखन तुस दिसेरी या रातरी धामी मां मैनन् कुजाथ, त अपने दोस्तन या दलान रिशतेदारन या अपने अमीर पड़ोसन न कुजेइयथ। किजोकि तैना भी तीं कुजेइतां तेरू एवसान मुकेइ छुडेले।

13 बल्के ज़ैखन तुस धाम देथ त टोंटे, कानो, गरीब गुरवे, परदेशी कुजेइयथ।

14 ते परमेशर तुसन बरकत देलो, किजोकि तैन कां किछ भी नईं ज़ैस सेइं तैना तुशु एवसान मुकेइ बटन, ते तेरे एस एवसानेरो फल धेर्मी लोकन ज़ींते भोने सेइं साथी फैसलेरी दिहैड़ी मैलेलो।"

~~~~~

(~~~~~ 22:1-10)

15 टलाहनन् मरां एक्के एन गल्लां शुन्तां यीशु सेइं ज़ोवं, "परमेशरेरे राज़ेरी धामी मां खाने वालो धन भोलो।"

16 यीशुए तैस जुवाब दित्तो, "केन्चे मैने अक बड़ी धाम दित्ती ते बड़े लोक कुजाए।

17 ज़ैखन रोट्टी खानेरो वक्त अव त तैनी अपनो नौकर भेज्जो कि तैन लोकन ज़ैन जो इलाएरी धाम बनोरी थी, 'एज्जा, रोट्टी बनोरोए।'

18 पन धामी बालेईं सेबेईं मिलतां एतराज कियो ते पेइले मैने ज़ोवं, 'मीं ऊडार घिन्नेरू आए, मीं तैस हेरने गानूए ते अवं तीं कां मिनत केरतां कि मीं राने दे।'

19 त होरो ज़ोने लगो, 'मीं पंन्न हल्लां दांत घिन्नोरेन ते अवं तैन लाने परखने च़लोरोईं। अवं तीं कां मिनत केरतां कि मीं राने दे।'

20 अक होरो मैन्हु लगो ज़ोने, 'मीं इला बनावरोए, एल्हेरेलेइ अवं न एज्जी वेटि।'

21 तैखन नौकरे वापस एइतां एन सैरी गल्लां अपने मालिके शुनेईं, त मालिके बड़ी सरक अईं, तैनी अपने नौकरे जो ज़ोवं, 'इस नगर मां गा ते लेंगे लुथे, गरीब गुरवे नगगे, नियन्ने भत्ते, टोंटे, कानो इरां कुजा।'

22 नौकरे ज़ोवं, 'हे मालिक ज़ैन तीं ज़ोवं, मीं तैन्ने कमाव, पन फिरी भी ठार खाली आए।'

23 मालिके नौकरे सेइं ज़ोवं, 'बत्तारे आसे पासे ऊडारन मामेइं गा ते लोक मजबूर केरतां आन, ताके मेरू घर भरतां भोए।

24 किजोकि अवं तीं सेइं ज़ोताईं कि ज़ैन लोक पेइले कुजेवरे थिये, यानी खास ठैरारे लेइ कुजेवरे थिये, तैन मरां कोई भी मेरी धामी मां रोट्टी न खेइ सकेलो।"

~~~~~

(~~~~~ 10:37-38)

25 बड़े लोक यीशु पत्ती च़लोरें थिये, यीशुए पत्रोवं तक्कू ते ज़ोवं।

26 "अगर कोई मीं कां एज्जे, ते अपने अम्मा बाजी, कुआन्श, बच्चन, दलान ते बेइन्न ते अपने जानी करां जादे प्यार मीं सेइं न केरे त तै मेरो चेलो न भोइ सके।

27 ते ज़ै कोई मेरो चेलो भोनेरी वजाई सेइं दुःख झैल्लनेरे लेइ त कने मरनेरे लेइ तियार नईं, त तै मेरो चेलो न भोइसखे।

28 तुसन मरां एरो कोई भोए, ज़ै गुम्मत बनानू चाए, ते पेइले बिशतां हिसाब न केरे, कि पूरो केरनेरे लेइ मीं कां खच्चों आए कि नईं।

29 कधे एरू न भोए कि खाइ कटनेरे बाद तैस बनेइ न सके ते तकने बाले हसते रान।

30 'ते ज़ोन एनी मैने बनानू त शुरु कियूं, पन बनेइ न बटो।'

31 या फर्ज केरा कि कोई राजो होरि राजे सेइ लडाई केरनेरे लेइ सोची राहोरो भोए त कुन पेइले एन न सोचे कि 10000 फौजी जवानन् सेइ अवं 20000 फौजी जवावन सेइ तैसेरो मुकाबलो केरि सकतां कि नई?

32 अगर तै मुकाबलो न केरि सखे त तैस फौजी सेइ जै दूरे, मैन्हु भेजतां तैस सेइ सल्लारी मिनत केरेलो ।

33 एन्त्रे अगर जै कोई तुसन मरां अपनू सब किछ न छडे त मेरो चेलो न भोइसखे ।

\*\*\*\*\*

(\*\*\*\*\* 5:13; \*\*\*\*\* 9:50)

34 “लून रोडी चीजे, पन अगर लूनेरो लूनार मुकी गाए त तैन कोस सेइ लूने बनाव गालू?

35 लोक तैस बेइरोवं शेरी देले, जै कोई समझनू चाते, तै ध्याने सेइ शुने ते समझे ।”

## 15

\*\*\*\*\*

(\*\*\*\*\* 18:12-14)

1 बडे लोक धड़त घिन्ने बाले ते पापी लोक\* यीशु कां एइतां तैसेरी गल्लां शुन्ने लोरे थिये ।

2 फरीसी ते शास्त्री लोक शिकयत केरतां ज़ोने लगे, “कि ए मैन्हु पापी लोकन सेइ तालमेल रखते, ते तैन सेइ साथी खाते पीते ।”

3 यीशुए तैन अक मिसाल देइतां ज़ोवं ।

4 “तुसन मां एरो कोई आए ज़ैस कां 100 भैडडां भोन ते तैन मरां अक हेरोए ते 99 भैडडां तैड़ी ज़ेरे जंगले मां छेइतां तोपने न गाए, ज़ां तगर तैस मैल्लोरी नई?

5 ते ज़ैखन ते तैस मैल्ले त खुशी सेइ कंधे पुइ छुइतां आने ।

6 ते अपने घरे एइतां अपने दोस्तन ते भियालन कुजेइतां ज़ोए कि, ‘अज्ज मीं सेइ साथी खुशी मनाथ, किजोकि अज्ज मेरी हेरोरि भैड मैलोरीए ।’

7 अवं तुसन सेइ ज़ोताई कि, एन्त्रे 99 धर्मी ज़ैनेई पेइले अपने पापन करां मनफिरावरो तैन करां जादे ज़ैखन अक पापी, पापन करां मन फिराते स्वर्गे मां बड़ी खुशी बनाई गाचे ।

\*\*\*\*\*

8 “कुन एरी भी कोई कुआन्ध भाली ज़ैस कां चैंदरे दश सिके भोन ते अक हेरोए ते तै दीयो बैलतां घरे अन्तर धूनी न दे, ते ज़ां तगर मैल्ले न तांतगर तोप्ती न राए?

9 ते तोपनेरे बाद अपने पड़ोसन ते अपनि सेहेलन कुजेइतां एन न ज़ोए कि, ‘एज्जा मीं सेइ साथी खुशी मनाथ किजोकि अज्ज मेरो हेरोरो सिको मैलोरोए ।’

10 बस्सा, अवं तुसन सेइ ज़ोताई कि एक्की पैपेरे, पापन करां मन फिराने सेइ परमेशेरेरे स्वर्गदूतां केरे सामने बड़ी खुशी मनाई गाचे ।”

\*\*\*\*\*

11 यीशु फिरि होरि मिसाल दित्ती, “केन्ची मैनेरां दूई मट्ठां थियां ।

12 तैन मरां निकडे मट्ठे अपने बव्वे सेइ ज़ोवं, हे बाजी जेइदाती मां ज़ै मेरो हिस्सो बनते तै मीं दे । तैनी दुइने हिस्सो बेटतां दितां ।

13 थोडे दिहैइना पत्ती निकडे मट्ठे अपनू सब किछ जेइदात होरि मुलखे जो नी, ते बुरे कम्मन मां लुट्टाई ।

14 ज़ैखन तैनी सब किछ मुकेइ छुइइ त तैस मुलखे मां बड़ो काल पेव, ते तैस कां खाने जो किछ न राऊं ।

15 तैखन तै तैस मुलखेरे एक्की रानेबाले कां कम तोपने पुज्जो । तैनी तै अपने ऊडारन मां सूर चारनेरे कम्मे लाव ।

\* 15:1 15:1 पापी लोक लोक तैन केरे वारे मां पापी समझते थिये ।



16 तैड़ी तै बड़ो ढलुखोरो थियो, तै तैन खाने मां राजी थियो जैन सूर खाते थियो, किजोकि तैस केन्चे किछ्ख खाने जो न दित्तु ।

17 तैखन तैस समझ आई ते ज़ोने लगो, भेरे बाजी केरे मज़दूर रेज़तां रोट्टी खातन, पन अवं इड़ी फाके लोरोई मरने ।

18 मीं खड़े उठतां अपने बाजी कां गानूए ते तैस सेइं ज़ोनूए हे बाजी अवं परमेशेरी नज़री मां ते तुशशी नज़री मां पापी आई ।

19 हुनी अवं एस काबल त नई, कि तुशशू मट्टू भोइ, पन मीं भी अपने मज़दूर मां रखा । ”

20 “बस्सा, तैनी तै मुलख शारो ते वापस अपने बाजी कां चलो, ते हेजू तै बड़े दूरे थियो, ते तैसेरे बाजे तै लाव ते तैसेरे बाजी तैस पुड़ बड़ो तरस अव, ते तै दौवइतो अपने मट्टे कां जेव, ते तैन गले लाव ते बड़ो खुशी भोव ।

21 मट्टे अपने बाजी सेइं ज़ोवं, ‘ए बाजी अवं परमेशेरी नज़री मां ते तुशशी नज़री मां पापी आई । हुनी अवं एस काबल त नई कि, अपने आपे जो तुशशू मट्टू ज़ोई ।’

22 पन बाजे अपने नौकरन सेइं ज़ोवं, ‘लूश केरा ते सेब्बन करां पेइले रोड़ां लिगडां एस मट्टे लुवाथ, ते एसेरे हथ्ये आंवटी ते पावन बूट लुवाथ ।

23 ते अक जानवर मारो ते बड़ी धाम बनेइतां बड़ी खुशी मनाई ।

24 किजोकि मेरू मट्टू ज़ैन ज़ेन्चरे मेरि जोरू थियू, अज़ ज़ींतू भोरूए, हेरोरू थियो, ते मैलोरोए ।’ बस्सा तैना खुशी मनाने लगे ।”

25 “तेइस बड़ू मट्टू ज़ैन ऊडारे मां कम केरतां घरजो ओरू थियू ज़ैखन तै घरे नेडे पुज़ो त तैनी गीतां केरि त नचनेरी शौर शुनी ।

26 तैनी अक नौकर कुजाव ते तैस पुच्छू, ‘ए शौर कीजेई लोरी भोने?’

27 नौकरे तैस सेइं ज़ोवं, ‘तेरो निकडो ढला वापस घरे ओरोए ते तेरे बाजे अक जानवर मैरतां धाम बनोरीए, किजोकि तै ठीक ठाक घरे पुजोरोए ।’

28 पन तैस मैनेरू बड़ू मट्टू नाराज़ भोवं ते अन्तर घरे मां भी न लगे एजने, पन तैसेरो बाजी बेइर अव, ते तैस मिठानेरी कोशिश की, कि घरे अन्तर एज्जे ।


29 बड़े मट्टे अपने बाजी सेइं ज़ोवं, हेरा अवं केतरे सालां केरि देंती तुशशी सेवा केरने लोरोई, ते कधे तुशशो हुकम नई मोड़ोरो ते तुसेईं कधे कोई छेड़ू नई दित्तोरोए कि अवं भी अपने दोस्तन सेइं खुशी मनेई ।

30 पन ज़ैखन तुशशू निकडू मट्टू अपनू सब किछ्ख लुटेइतां वापस अव, त तैसेरेलेइ जानवर मारो ते अक बड़ी धाम बनाई ।’

31 तैसेरो बाजी ज़ोने लगे, भेरा मट्टां तू त मीं कां आस ते ज़ैन किछ्ख मीं कांए तैन सब तेरूए ।

32 पन असेईं खुशी मनानी ज़रूरी थी किजोकि तेरो ए निकडो ढला ज़ै ज़ेन्चरे मेरि जोरो थियो, अज़ ज़ींतो भोरूए, हेरोरो थियो ते अज़ मैलोरोए ।”

## 16



1 फिरी यीशुए अपने चलन अक होरि मिसाल दित्ती कि, “केन्ची अमीररो अक मुन्शी थियो, लोकेई तैसेरी शकेइत तैसेरे मालिके सेइं लाई कि, ए तेरो माल बरबाद केरने लोरोए ।

2 मालिके तै कुजाव ते ज़ोवं, ‘एन कुने ज़ैन अवं तेरे बारे मां शुन्ने लोरोई? सारो हिसाब-किताबे मां अज़ेरां बाद तू मेरो मुन्शी नई रालो ।’

3 मुन्शे अपने दिले मां सोचू मेरो मालिके मेरे कम्मे करां मीं कढने लोरोए, मीं मज़दूरी भी न केरोए ते शमारिमारे भीख भी न मैगोए ।

4 'अव ज्ञानताई कि, मीं कुन केरनूए इट्टा कढनेरे बाद मीं लोक खुशी सेइं अपने घरे मां कबूल केरतन।'

5 बस्सा तैनी अपने मालिकेरो अक कर्जदार तोपते, पेडले एक्की पुच्छू तीं कां मेरे मालिकेरे केतरे रुपइयेन?

6 तैनी जुवाब दित्तो, जैतूनेरे तेलेरे 100 पीपां केरि कीमते, तैनी ज़ाव इना रां तेरां काकलां, ते बिशतां 50 पीपे बना।

7 फिरी तैनी मुन्शे होरि सेइं ज़ाव, 'तीं कां केतरो कर्जाए?' तैनी ज़ाव, 'गेहुं केरि 100 बोरी\*,' तैनी ज़ाव, 'यां काकलां ते बिशतां 80 लिखी।'

8 मालिके तैस बेइमान मुन्शेरी तारीफ़ की, एल्हेरेलेइ कि तैनी बेडि ज़लैकी सेइं कम कियेरू थियूं। किजोकि इस दुनियारे लोक अपने लोकन सेइं सौदो केरनो परमेशेरे लोकन करां बडे हुशारी सेइं केरतन।

9 अव तुसन सेइं ज़ोताई कि दौलत खर्च करेतां इस दुनियारे लोकन दोस्त बनाथ, तुसन मरनेरां बाद हमेशारू घर मैलनूए।

10 जै थोडे ज़ेरे मां इमानदेरी सेइं रहते ते हछे, मां भी इमानदार रहते। जै थोडे करां थोडे मां भी बेइमाने ते हछे, मां भी बेइमाने।

11 बस्सा अगर तुस बेइमानेरे धन दौलती मां इमानदार न भोए, त अपनि सच्ची दौलत जै स्वर्गें मां आए, कौन तुशे हवाले केरेलो?

12 अगर तुसेईं होरि केरे माले मां इमानदार न भोए, त जै तुशो अपनो माले कौन तुसन देलो?

13 कोई नौकर दूई मालिकां केरि सेवा एक्की वक्ते मां न केरि सके। न त एक्की सेइं दुश्मनी केरेलो ते होरि सेइं प्यार केरेलो, या एक्केरो बेनतां रालो त होरि न सुखालो। तुस परमेशेरी ते दौलतरी, दुइयां केरि सेवा न केरि सकतथ।"

~~~~~

(~~~~~ 11:12-13; 5:31-32; ~~~~~ 10:11-12)

14 तैखन फरीसी लोक जैना दौलतरे लालची थिये, एन गल्लां शुन्तां यीशुएरी हासी बनाने लगे।

15 यीशु तैन जो ज़ाव, "तुस तैना आथ जैना लोकन मां अपनो आप बडो धर्मी हिरातन। पन परमेशर तुशे दिलेरी हालत ज्ञानते किजोकि जै चीज लोकां केरे लेइ बडी बड्डीए ते तै परमेशेरी नज़री मां भिट्टी आए।"

16 "मूसेरे कानून ते नेबी केरि गल्लां यूहन्ना वपतिस्मो देनेबाले तगर रेड, ते फिरी परमेशेरे राज़ेरी खुशखबरी शुनाने लगे ते हर कोई तैस मां दाखल भोनेरी बडी कोशिश केरने लगोरेन।

17 पन धरती अम्बर टेली गालू पन परमेशेरे कानूने मरां अक बिंदी भी न मिटेली।

18 जै कोई अपनि कुआन्श शैरतां होरि सेइं इला बनाते तै तैस सेइं बदमाशी केरते ते जै शैरोरी कुआन्शी सेइं इला बनाते तै भी बदमाशी केरते।"

~~~~~

19 "अक मैन्हु बडो अमीर थियो, ते ते बैगनी लिगाड़ां लातो थियो, ते बड़ां माघो लिगाड़ां लातो थियो। ते रोज़ एश अशरती मां मसत रातो थियो।

20 अक बडो गरीब मैन्हु जेसेरू नवं लाज़र थियूं, तैसेरे दारे कां एन्तां रखोरो थियो, तैसेरी सारी जान खेराडेइं सेइं भेरतां थी।

21 ते चातो थियो, कि अमीर मैनेरे टुकेइं सेइं अपनू पेट भेरि, पन तैडी कुतरां एइतां थियां ते तैना तैसरां खेरड़ां भी ज़टतां थियां।

22 फिरी एरू भोवं कि ते गरीब लाज़र मेरि जेव स्वर्गदूतेईं तै छुइतां अब्राहमे कां पुजव, ते अमीर मैन्हु भी मेरि जेव ते तै दैब्बी छुइडो।

\* 16:7 16:7 गेहुं केरि 100 बोरी अक बोरी 200 किल्लो केरि थी।

23 जैखन तैनी पातालेरे दुखे मां अपनि एछ्छी घैडी? त दूरेरां तैनी अब्राहम ते तैस कां नेडे लाजरे लाव ।

24 तै चिन्दां मैरतां ज़ोने लगे, 'ए बाजी अब्राहम मीं पुड़ दया केर, एस लाजरे भेज ते ए अपनि अंग्लोई पैनी सेइं सेलतां मेरे ज़िभी पुड़ लाए, किजोकि अवं अग्गी मां तड़फने लोरोई ।'

25 पन अब्राहमे ज़ोवं, 'भट्टां याद केर तीं त अपनि जवेंनी मां सब रोड़ी चीजां मैल्ली ते इस लाजरे सिर्फ बुरी चीजां मैल्ली, पन ए हुन्ना इड़ी आरामे मांए ते तू तकलीफी मां आस ।

26 ते एन गल्लां केरे अलावा इश्शे ते तुश्शे मझाटे अक बड्डी खाईए, ताके ज़ै कोई पार गानू चाए न गेइ सखे ते ज़ै वार एजनु चाए न एज्जी सखे ।'

27 तैनी मैने ज़ोवं, 'ए बाजी अब्राहम, अवं ज़ोवले हथ केरतां ज़ोताई कि, तू लाजरे दुनियाई मां मेरे बाजी केरे घरे भेज ।

28 तैड़ी मेरे पंच दूला आन ते तै तैन हदायत दे कि, एरू न भोए ते तैना भी इस अग्गी मां एजन ।

29 पन अब्राहमे तैस ज़ोवं, 'तैन केरि हदायतरे लेइ तैन कां मूसैरो कानूने ते नेबी केरि कितावां त आन तैना तैन शुननु ते मननु ।'

30 तैनी मैने ज़ोवं, 'नई ए बाजी अब्राहम अगर कोई मुडदन मरां ज़ीतो भोइतां गाए त तैना ज़रूर पापन करां मन फिराले ।'

31 पन अब्राहम तैस सेइं ज़ोवं, 'अगर तैना मूसैरी ते नेबी केरि न शुनी ते अगर कोई मुडदन मरां ज़ीतो भोइतां गाए त तैना तैसेरू भी याकीन न करेले ।' "

## 17

~~~~~

(~~~~~ 18:6-7,21-22; ~~~~~ 9:42)

1 फिरी तैनी अपने चलन सेइं ज़ोवं, 'एन न भोइसखे कि लोकन टोकर न लगगे, पन अफ़सोस तैस मैन्हु पुड़ ज़ै होरि केरे लेइ टोकर बनते ।

2 तैसेरेलेइ त एन्ने रोड़ु थियू, कि दूलाटेरो दूलेइटोल तैसेरे गल्ले उन्ढो छेइतां ते समुन्द्रे मां शैरतां छड़डो गाथो, ताके तै होरि जो ज़ैना विश्वासे मां कमज़ोरन टोकर न बने ।

3 बस्सा हुशार राथ तुस कुन केरतथ, अगर तुश्शो विश्वासी दूला पाप केरते त तैस समझाथ ते अगर तै पापन करां मन फिराए त तैस माफ़ केरा ।

4 अगर तै एक्की दिहैड़ी मां तेरो सत्ते बार तेरो पाप केरे त अगर तै सत्ते फेरेई तीं कां एइतां माफ़ी मग्गे त तू सत्ते फेरेई तैस माफ़ केरा ।'

~~~~~

5 परैरतेई परभु सेइं ज़ोवं, 'हे परभु, इश्शी मदत केर कि अस होरे भी मजबूती सेइं विश्वास केरम ।'

6 परभु यीशुए ज़ोवं, 'अगर तुश्शो विश्वास सिवलारे गलेवे बराबर भी भोलो त तुस इस तूतरे बुटे जो ज़ोई सकतथ इट्टां उखड़ ते समुन्द्रे मां लग त तै तुश्शो हुक्म मनेलो ।

~~~~~

7 'तुसन मां एरो कौन आए, ज़ेसेरो नौकर ऊडारां बेंतो भोए या गोरू चारतो भोए ते ज़ैखन तै ऊडारे मरां घरे एज्जे त तैसेरो मालिक तैस ज़ोए कि, 'लूशी बिश्श ते रोट्टी खा ।'

8 या एन न ज़ोए कि मेरी रोट्टी तियार केरथ ते ज़ां तगर अवं खेइ पीं नन्ना ते ज़ां तगर अवं रेज्जी नन्ना तू मेरी सेवा केरतो राए, तैल्ला पत्ती तू भी खा?

9 कुन ते एल्हेरेलेइ नौकरेरू अहसान केरलो कि, तीं तैन कियू ज़ैन तीं केरनेरे लेइ ज़ोवरू थियू?

10 एन्चरे ज़ैखन तुस एन सब केरेले ज़ैस केरनेरो तुसन हुक्म दित्तोरो थियो, त ज़ोथ कि, 'असां निकम्मे नौकर आम? असेई तैन्ने कियू ज़ैन केरनु चाते थिये ।' "

~~~~~

- 11 एककी फेरे यीशु त कने तैसेरे चले यरूशलेम नगरेरे पासे ज़लारे थिये । तैना सामरिया ते गलीले इलाके मांमेइं ज़लारे थिये ।
- 12 ज़ैखन तैना एककी इलव्वे मां पुजने वाले थिये त तैड़ी दश कोद्वी मैल्ले ज़ैना दूर खेडोरे थिये ।
- 13 तेनेई बडे ज़ोरे सेइं ज़ोवं, “हे यीशु, हे प्रभु, असन पुड़ दया केर ।”
- 14 यीशुए तैन लेइतां ज़ोवं, “यरूशलेम नगरेरे मन्दरे मां गाथ ते अपनो आप याजकन हिराथ, ते सच्चे एरू भोवं कि गाते बार बत्तां तैन केरू कोद्व साफ भोइ जेवं ।”
- 15 पन तैन मरां अक कोद्वी अपनू कोद्व हेरतां कि, तैसेरू कोद्व साफ भोरोए खुशी भोइतां बडे ज़ोरे सेइं परमेशेरी तारीफ़ केरतो वापस यीशु कां अव
- 16 ते यीशुएरे पावन पुड़ दोग्ग रेखतां शुकर लगो केरने । ए मैन्हु सामरी थियो ।
- 17 यीशुए तैस पुच्छ, “कुन तैन दश कोद्वी केरू कोद्व साफ नई भोवरू? फिरी तैना कोरां जे?”
- 18 कुन एस गैर यहूदी मैनेरे अलावा तैन होरन एत्री हिम्मत न अई, कि गेइतां परमेशेरी महिमा केरम?”
- 19 तेखन यीशुए तैस ज़ोवं, “खडो उठ ते ज़लो गा तीं मीं पुड़ विश्वास कियो तांए तू बेज्जोरोस ।”

?????????? ??? ?????

(?????? 24:23-28,37-41)

- 20 फरीसी लोक यीशु पुच्छने लगे, “कि परमेशेरेरू राज़ केइस एज्जनूए? यीशुए तैन जुवाब दित्तो कि परमेशेरेरू राज़ एरू नई कि कोई तैस लेई बटे ।
- 21 ते ज़ोन कि हेरा इड़ी या उड़ीए एन्चरे नई बल्के परमेशेरेरू राज़ तुश्शे मज़ाटे ।”
- 22 यीशुए अपने चेलन सेइं ज़ोवं, “ते दिहाड़ी भी एज्जनीए कि, ज़ेइस तुस परमेशेरी दिहैइन मरां अक दिहाड़ी हेरनेरी इच्छा रखेले, ज़ेइस मैनेरू मट्टे यानी अवं वापस एज्जोई, पन तुस न लेई बटेले ।
- 23 लोक तुसन सेइं ज़ोले कि, ‘हेरा, मसीह इड़ीए,’ या ‘उड़ीए या हेरा तै इड़ीए!’ पन तुस तैरां न गेइयथ ते न तैन पत्ती न च़ेलथ ।
- 24 किजोकि ज़ेन्चरे बिजली अम्बरे मरां चेमकतां एककी पासेरां होरि पासे ज़ली गाचे, तेन्चरे मैनेरू मट्टू यानी अवं तैस दिहैड़ी बांदो भोलो ।
- 25 पन ज़रूरीए कि तै पेइले दुःख झैल्ले ते इस ज़मानेरे लोक तैस घटिया समझन ।
- 26 ते ज़ेरू इश्शे पूर्वज नूहेरे ज़माने मां भोरू थियूं, तेरहु मैनेरे मट्टेरे ज़माने मां भी भोलू ।
- 27 तेइस भी लोक खाते पीते थिये ते इला भोंते रहते थिये । ते ज़ां तगर नूह किशती मां न थियो जोरो तांतगर सब किछ भोतू राव । ते फिरी तूफान अव ते सब किछ खतम भोइ जेवं ।
- 28 ते ज़ेरू इश्शे पूर्वज लूतेरे ज़माने मां भोरू थियूं, कि लोक खाते पीते थिये बुपार केरते, बागां लाते ते घरां बनाने मां मघन थिये ।
- 29 पन ज़ैस दिहैड़ी लूत सदोम नगरे मरां बेइर निस्सो त पत्रोवं अम्बरेरां गंधकेरी अग बैखतां सब किछ खतम केरि छ़डू ।
- 30 ते मैनेरे मट्टू यानी मेरू वापस एज्जनू भी अचानक भोलू ।
- 31 तैस दिहैड़ी ज़ै लाए पुड़ भोलो त तैसेरो माल सबाब अगर घरे मां भोलो त तैस नेने तै अन्तर न एज्जे, ते ज़ै ऊडारे मां भोलो तै भी वापस न गाए ।
- 32 लूतेरी कुआन्शी सेइं कुन भोवं याद रख्खा ।
- 33 ज़ै अपनि जान बच्चनेरी कोशिश केरलो तै तैस गुवालो, ते ज़ै तैस गुवालो तै तैस बच्चालो ।
- 34 अवं तुसन सेइं ज़ोताई कि तैस राती दई मैन्हु एककी खट्टी पुड़ झुल्लोरे भोले, ते अक नीयो गालो, ते दुइयोवं तैड़ी रालो ।
- 35 दई कुआन्शां हिट्लाट पइती भोली त अक नेनीए ते अक तैड़ी छ़डनिये ।
- 36 दई मैन्हु ऊडारे मां भोले त अक नेनीए ते अक तैड़ी छ़डनोए ।”

37 एन शुन्तां तैनेई यीशुए पुचछ्छ, “हे परभु असन सेइं ज़ो, एन कोडि भोलू?” यीशुए तैन ज़ोवं, “ज़ैडी ज़िगग भोते तैडी इल्लां जम्हां भोइचन ।”

## 18

~~~~~

1 यीशु अपने चलन अक मिसाल देइतां ज़ोवं, कि हिम्मत हारनेरे बगैर प्रार्थना करती रावरी लोडे ।

2 “एक्की नगर मां अक हाकिम रातो थियो । तैन परमेशरे करां डरतो थियो, ते न कोन्ची मैनेरी परवाह करतो थियो ।

3 तेस नगर मां अक विधवा कुआन्श रहती थी ज़ै तैस हाकिमे कां एइती रहती थी, ते तैस कां मिनत करती रहती थी कि, मेरो इन्साफ करतां मीं मेरे दुश्मने करां छुटा ।

4 पेइले त तैनी एतुरो खियाल न कियो पन ज़ैखन ए हिसाब ज़लतो राव, त तैनी अपने मने मां ज़ोवं, ‘अवं न परमेशरे करां डेरि ते न मैनेरी परवाह केरि ।

5 पन ए विधवा कुआन्श मीं परेशान करती रावे, एल्हेरेलेइ अवं एसारो इन्साफ केरेलो, नई त एसां अवं बडो ज़लील केरनोई ।”

6 तैखन परभु यीशुए ज़ोवं, “शुना ए बेईमान हाकिम कुन लोरोए ज़ोने ।

7 बस कुन परमेशर अपने चुनोरे लोकां केरो फैसलो केरने मां ज़िर लालो, ज़ैना रात दिहैडी फरयाद केरते रातन?

8 अवं ज़ोताई, कि तै तैन केरो फैसलो केरेलो ते लूशी केरेलो । पन फिरी भी ज़ेइस मैनेरू मट्टू यानी अवं एज्जेलो त कुन लोक मीं पुइ हेजू तगर विश्वास केरते भोलो?”

~~~~~

9 यीशुए किछ एरे लोकन अक मिसाल दिती कि, ज़ैन अपनो आपे बडो धर्मी समझते थिये ते होरन किछ न थिये बुझते ।

10 “दूई मैन्हु प्रार्थना केरने मन्दरे मां जे अक फरीसी मैन्हु थियो, ते होरो धड़त (टेकस) घिन्ने बालो थियो ।

11 फरीसी मैन्हु खडो भोइतां प्रार्थना केरने ते अपने बारे मां सोचने लगे, कि हे परमेशर अवं तेरू शुक्र केरताई, अवं होरि मैन्हु केरो ज़ेरो नई ज़ैना डैकू, अधर्मी, बदमाशी केरनेबाले, ते इस धड़त नेने बालेरो ज़ेरोई नई,

12 अवं हफते मां दूई बार बरत रखताई, ते अपनि कमैईयरो दशोवं हिस्सो तीजो देताई ।

13 “पन तै धड़त नेनेबालो ज़ै दूर खड़खड़ो थियो, तैनी एतरू भी न केरि बटु, कि अम्बरेरे पासे तक्के बल्के छाती पिट्टतां ज़ोने लगे, ‘हे परमेशर मीं पैपी पुइ दया केरतां माफ़ केर!’

14 अवं तुसन सेइं सज़ ज़ोताई, ए धड़न नेनेबाले मैन्हु तैस फरीसी मैन्हु करां धर्मी निस्तां अपने घरजो जेव । किजोकि ज़ै कोई अपनो आप बडो बनालो तै निकडो बनाव गालो ते ज़ै अपनो आप निकडो बनालो तै बडो बनाव गालो ।”

~~~~~

(~~~~~ 19:13-15; ~~~~~ 10:13-16)

15 फिरी किछ लोक निक्के बच्चन यीशु कां आन्ने लगे ताके यीशु तैन पुइ हथ रेखतां वरकत दे । चलेई तैन लाव त तैन धमकाए ते ठाकू ।

16 पन यीशुए बच्चे एपू कां कुजाए ते चलन सेइं ज़ोवं, “बच्चन मीं कां एजने देथ एन न ठाका, किजोकि परमेशरू राज़ एरां ज़ेरां केरूए ।

17 अवं तुसन सेइं सज़ ज़ोताई, ज़ै कोई परमेशररे राज़ मां गानेरे लेइ अपनो आप निक्के बच्चन बराबर न बनाए, तांतगर परमेशररे राज़े मां दाखल न भोइसखे ।”

XX

(XXXXXXXX 19:16-30; XXXXXXXX 10:17-31)

18 केन्वी यहूदी मैने यीशुए पुच्छू, “हे रोडे गुरू हमेशारी ज़िन्दगी हासिल केरनेरे लेइ अवं कुन केरि?”

19 यीशु जुवाब दित्तो, “तू मीजो रोडू किजो ज़ोतस? परमेशेरे अलावा होरो कोई भी रोडो नई।

20 तू त परमेशेरे हुक्मन ज्ञानतस, यानी ‘खून न केरा, बदमाशी न केरा, चोरी न केरा, झूठी गवाही न देथ, धोखो न देथ, अपने हाज-बव्वां केरि इज्जत केरा।”

21 तैनी मैने ज़ोवं, “एना सब हुक्म अवं बचपनेरो मन्तो ओरोई।”

22 ज़ैखन यीशुए एन शुन्तां ज़ोवं, “तीं मां एक्की गल्लारी कमी आए, तू ज़ैन किछ् तीं कां आए, तैन बेचतां गरीब मैनन् दे, तैखन तीं स्वर्गे मां खज़ानो मैलेलो। ते एइतां मीं पत्ती च़ल।”

23 ए गल शुन्तां तै बड़ो उदास भोइ जेव किजोकि तै बड़ो अमीर थियो।

24 यीशुए तैस हेरतां ज़ोवं, “अमीरां केरू परमेशेरे राज़े मां दाखल भोनू केतूँ आसुखतुए।

25 परमेशेरे राज़े मां अमीर मैनेरू दाखल भोने केरां ऊँटेरू सांधनेरे पाए मरां निस्नू सुखू आए!”

26 ज़ैनेई ए गल शुनी त तैना पुच्छने लगे, “फिरी कसेरी मुक्ति भोइ सख्वे।”

27 यीशुए जुवाब दित्तो, “मैनन् करां त एन न भोइ सके पन परमेशेरे करां सब किछ् भोइ बटते।”

28 पतरसे यीशु सेई ज़ोवं, “हेर असां त सब किछ् छेइतां तीं पत्ती च़लोरैम।”

29 यीशु तैन सेई ज़ोवं, “अवं तुसन सच ज़ोताई, कि एरो कोई नई ज़ैनी परमेशेरे राज़ेरे लेइ अपनू घर या कुआन्श ते हाज या बव, दूला या बच्चे शारोरे भोन।

30 तैस इस दुनियाई मां बड़ जादे, ते एजने वैली दुनियाई मां हमेशारी ज़िन्दगी मैलनीए।”

XX

(XXXXXXXX 20:17-19; XXXXXXXX 10:32-34)

31 यीशुए अपने 12 च़ेले एप्पू सेई साथी निये ते तैन ज़ोने लगे, हेरा, “अस यरूशलेम नगरे जो च़लोरैम ते नेवेई ज़ैन किछ् मैनेरे मट्टेरे बारे मां लिखोरूए तैन पूरू भोलू।

32 ते गैर कौमां केरे हथ्ये देनोए, ते तैना तैसेरो मज़ाक बनाले ते तैस बे इज्जत केरेले ते तैसेरे तुतरे पुइ थुकनूए।

33 तैस कोडे मारेले ते तैस मैरी छुडले पन तै दलेइयोवं दिहाडे फिरी ज़ीतो भोलो।”

34 तेनेई ए गल न सेमझी बटी ते यीशुएरी एस गल्लरो मतलब तैन करां छुप्पोरो राव।

XX

(XXXXXXXX 20:29-34; XXXXXXXX 10:46-52)

35 ते एरू भोवं कि ज़ैखन तैना यरीहो नगरेरे नेडे पुज्जे त अक कानो मैन्हु बत्तारे इलेखी विशोरो भीख मगतो थियो।

36 ज़ैखन तैनी हछ् मैन्हु केरि छेइ शुनी त तै पुच्छने लगे, “ए कोलहेरी शौर लोरी भोने?”

37 लोकेई तैस ज़ोवं, “यीशु नासरी कोस्कोई च़लरोए।”

38 ते चिन्डां मैरतां ज़ोने लगे, “हे यीशु नासरी दाऊदेरा मट्टां मीं पुइ दया केर।”

39 यीशुए सेई साथी च़लने बाले लोक तैस काने मैन्हु झिडकने ते ज़ोने लगे, चुप रा, पन तै मना जादे ज़ोरे-ज़ोरे चिन्डां मैरतां ज़ोने लगे, “हे यीशु नासरी दाऊदेरे मट्टां मीं पुइ दया केर।”

40 यीशु खेडोव ते हुक्म दित्तो, एस मीं कां आनां ज़ैखन तै तैस कां अवं त यीशुए तैस पुच्छू।

41 ज़ो, “अवं तेरे लेइ कुन केरि?” तैनी काने मैने ज़ोवं, “हे प्रभु अवं चाताई कि अपनि एछ्छेई सेई लेई बेटि।”

42 यीशुए तैस सेई ज़ोवं, “बेज्झोई गा तेरे विश्वासे तू बज्झावरिस।”

43 ते तैखने बेज्झोव ते लहने लगे ते परमेशेरी तारीफ़ केरतो यीशु पत्ती च़लो जेव। एन हेरतां सब लोक परमेशेरी तारीफ़ केरने लगे।

19

॥॥॥ ॥॥॥॥॥॥ ॥॥॥॥॥॥

- 1 यीशु यरीहो नगरे मांमेई निस्तां ज़लोरे थियो ।
- 2 तैड़ी अक मैन्हु थियो, ज़ेसेरू नवं जक्कई थियूं, तै धड़त घिन्ने बालां केरो अफसर थियो, तै बड़ो अमीर थियो ।
- 3 तैस यीशु हेरनेरो चाऊ थियो, पन तैसेरू कद छोटू थियूं, तांए तै हछे मैनन् मरां लेई न थियो बटतो ।
- 4 एल्हेरेलेइ तै देवइतां अगर जेव ते फ़ेगरे बुट्टे उबरो गुस्सो किजोकि ज़ैखन यीशु एज्जे त तै तैस रोडेचारे लेई सके ।
- 5 ज़ैखन यीशु तैस ठैरी पुजो त तैनी उबरू तेकतां ज़ोवं, “जक्कई लूशी उन्ढो ओस, किजोकि अज़ मीं तेरे घरे ट्लाहन च़ारेई एज्जूए ।”
- 6 जक्कई तैखने उन्ढो ओस्सो ते यीशु बेड़ि खुशी सेई अपने घरे नीयो ।
- 7 एन हेरतां सब लोक शकैइत केरतां ज़ोने लाए, “कि यीशु त एक्की पैपी मैनेरो मेहमान बनरोए ।”
- 8 जक्कई रोट्टी खांते बारे खड़ो भोइतां प्रभु सेइं ज़ोने लगे, “हे प्रभु यीशु तक अवं अपनि अध्धी जेइदात कंगालन देताई, अगर केन्चेरू किछ् खोरू भोलू त तैस च़ेवरे हिस्से वापस देइलो ।”
- 9 तैखन यीशुए तैस सेइं ज़ोवं, “अज़ इस घरे मां मुक्ति ओरिए, एल्हेरेलेइ इन भी पूर्वज अबराहमेरू अक मट्टूए ।
- 10 किजोकि मैनेरू मट्टू यानी अवं होरि लोकन हमेशारी सज़ाई करां मुक्ति देने एवरोई ।”

॥॥ ॥॥॥॥॥॥ ॥॥॥ ॥॥॥॥॥॥
(॥॥॥॥॥ 25:14-30)

- 11 ज़ैखन लोक यीशुएरी गल्लां शुन्ने लगगोरो थिये त तैनी तैन अक मिसाल देइतां ज़ोवं, किजोकि तैना यरूशलेम नगरेरे नेडे पुजोरे थिये ते लोकां केरो खियाल थियो परमेशेरू राज लूशी एज्जू आए ।
- 12 तैनी तैन ज़ोवं, “अक बड़ो अमीर मैन्हु होरि मुलखे मां ज़लो, ताके तैस मुलखेरो मेंतरेरो ओदो घिन्तां वापस एज्जे ।
- 13 तैनी अपने सेवादारन मरां दश ज़न्हे कुजाए, ते तैन दश मोहरां देइतां ज़ोवं, भेरे वापस एज्जेन तगर इस पेंडसे सेइं कारोबार केरथ ।’
- 14 पन तैस ठैरी लोक तैस सेइं नफरत केरते थिये, तैनेई किछ् लोक भेजतां तैस जो बिस्तार भेजो, कि अस न चाम ए मैन्हु असन पुड़ राज़ केरे ।”
- 15 “ज़ैखन तै हुकुमतरो ओदो हासिल केरतां वापस अव त तैनी अपने सेवादारे जो समाद भेजो । ज़ैना तैनी कारोबाररे लेइ पेंडसे दित्तोरे थिये ताके सेब्मी केरो पतो केरे कि केनि केतूरू कियेरू आए ।
- 16 पेइले मैने एइतां ज़ोवं, ‘हे मालिक मीं तेरी दश अशरेफेइं सेइं दश होरि कमैई ।’
- 17 तैनी तैस सेइं ज़ोवं, ‘तीं दश अशरेफेइं सेइं इमानदेरी सेइं कम कियूं गा तीं दश नगरन पुड़ अधिकार दित्तो गाते ।’
- 18 दुइयोवं मैने एइतां ज़ोवं, ‘हे मालिक मीं तेरी पंज अशरेफेइं सेइं पंज होरि कमैई ।’
- 19 तैनी तैस सेइं भी ज़ोवं, ‘तीं भी पंज नगरन पुड़ अधिकार दित्तो गाते ।’
- 20 तैखन एक्की मैने एइतां ज़ोवं, ‘हे मालिक इना रेइ तेरी अशरेफी मीं एन रूमाले मां बेंधतां रखोरि थी ।’
- 21 किजोकि तू सखत मैनूस ते अवं तीं करां डरतो थियो । किजोकि तू तै चीज़ ज़ै तीं न भोए रखोरि तू तैस भी नेतस ते ज़ैन न भोए बेवरू तू तैन भी लुनतस ।

22 तैनी तैस सेइं ज़ोवं, हे दुष्ट नौकरा अवं तेरी गल्लेईं सेइं तींए मुज़ंम बनताइं। ज़द तीं पतो थियो, कि अवं बडो सखत मैनुहु आईं, ते ज़ै चीज़ मीं नईं रखोरि अवं तैस भी सल्हतां ते ज़ैन नईं वेवरू अवं तैन भी लुनतां।

23 फिरी तीं मेरे रुपैइये केन्ची कां किजो नईं रखोरे ताके अवं वापस एइतां तैस करां सूते समेत उसुल करेथो?"

24 तैखन तैनी तैन सेइं ज़ोवं, 'ज़ैन तैडी खड़खड़े थिये एस करां एन अशुरेफी एन्तां उस देथ ज़ैस कां दश अशुरेफीन।'

25 तैना ज़ोने लगे हे मालिक एस कां पेइली दश अशुरेफीन।

26 तैनी तैन जुवाब दित्तो, अवं तुसन सेइं ज़ोताईं कि, 'ज़ैस कां परमेशेरी मर्ज़ी समझनेरी खुवाइश आए, तैस परमेशर जादे समझ देलो। पन ज़ैस कां परमेशेरी मर्ज़ी समझनेरी खुवाइश नईं, तैस करां, थोड़ी ज़ेरि समझ ज़ै तैस कां आए, तै भी नी गाली।'

27 पन मेरे इन दुश्मन ज़ैन मीं न थिये सुखाते कि, ए असन पुड़ राज़ करे एन इरां आनां ते मेरे सामने एन मैरी छड़डा।"

~~~~~

(~~~~~ 21:1-11; ~~~~~ 11:1-11; ~~~~~ 12:12-19)

28 एना गल्लां ज़ोइतां यीशु अपने चेलन सेइं साथी अग्रोवं जेव कि यरूशलेम नगरे मां गाए।

29 ज़ैखन तैना ज़ेतूनरे पहाड़ बैतफगे ते बैतनिय्याह मां पुजे त यीशुए दूईं चले एन ज़ोइतां अग्रोवं भेजे।

30 "तुस सामने उस ड्लव्वें मां गाथ ते तैडी तुसन अक गधेरो बच्चो बन्धोरो मैलनोए। ज़ैस पुड़ अज़ तगर कोई नईं चढ़ोरो तैस खोलतां इडी मीं कां आनां।

31 ते अगर तुसन कोई पुच्छे, कि तुस एस किजो लोरेथ खोलने त तुस ज़ोइयथ, कि प्रभुए एसेरी ज़रूरत आए।"

32 अग्रोवं गानेबाले चलेईं तैन्ने कियूं ज़ैन यीशुए ज़ोरू थियूं।

33 ज़ैखन तैना गधेरो बच्चे खोलने लगगोरो थिये त तैसेरो मालिक तैन पुच्छेने लगो, "तुस एस बच्चे किजो लोरेथ खोलने?"

34 तैनेईं जुवाब दित्तो, "प्रभुए एसेरी ज़रूरते।"

35 तैनेईं ते बच्चो खोलतां यीशु कां आनां, ते यीशुए तैस पुड़ अपना लिगडां छेइतां तैस पुड़ च़ेइतां च़लो जेव।

36 ज़ैखन तैना च़लोरे थिये त लोकेईं अपना लिगडां बत्ती मां बिछ्वां।

37 ज़ैखन तैना यरूशलेम नगरे नेडे पुजे त ज़ैट्टां बत ज़ैतून पहाड़ पुड़ेरां उन्दी गातीए तैडी सारे चलेईं एना चमत्कार हेरतां ते खुशी भोइतां परमेशेरी तारीफ़ केरने लगे कि,

38 "धने तै राज़ो ज़ै परमेशेरे नव्वें सेइं एइते!  
ते स्वर्गे मां महिमा ते अम्बरे मां शान्ति भोए।"

39 तैन मैनन् मां किछु फरीसी लोक भी थिये। तैना यीशु सेइं ज़ोने लगे, "हे गुरू अपने चेलन ज़ो कि चुप केरन।"

40 यीशुए तैन जुवाब दित्तो, "अवं तुसन ज़ोताईं, अगर एना लोक चुप केरन त इना घोड़ ज़ोरे सेइं परमेशेरी तारीफ़ केरेले।"

~~~~~

41 यरूशलेम नगरे मां पुज़तां यीशु यरूशलेम नगरेरो हाल हेरतां तैस लेरां छुटी।

42 ते ज़ोने लगो, "अगर तुस सिर्फ़ इस दिहैइरे बारे मां ज़ानते बोथे, ज़ै तुसन शेन्तरे पासे नेती!
पन ईं गल हुना तुश्शे एछ्छन करां छ्पोरीए।

43 तीं तैना दिहाड़े हेरने पेनेन ज़ेइस तेरे दुश्मन तेरे च़ेव्रे पासन मोरचो बंधतां ते तीं घेरो देले, ते हर पासरां तीं पुड़ हमलो केरेले।

44 तुशुशे दुशुमन तुसन नाश केरेले, ते सैरी लोकन मारेले, ते तीं पुड घोडे पुड घोड वाकी न रालो । किजोकि जेइस परमेशर तुसन बचानेरे लेइ ओरो थियो तुसेई न पिशानो ।”

XXXXXXXXXXXXXXXXXXXX

(XXXXXXXX 21:12-17; XXXXXXXX 11:15-19; XXXXXXXXXXXX 2:13-22)

45 तैखन तै मन्दरे मां जेव ते तैडी तैने बुपारी ते गाक बेइरोवं कढने शुरू किये ।

46 तैनी तैन सेइं ज़ोवं, “पवित्रशास्त्रे मां लिखोरूए भेरू मन्दर प्रार्थनारू घर भोलू; पन तुसेई त डैकू केरो अडडो बनेइतां रखोरूए ।”

47 ते तै तैस पवित्र दहैडी मन्दरे मां शिक्षा देतो थियो, पन प्रधान याजक ते शास्त्री लोकेई यीशु मारनेरी कोशिश मां लगगोरो थिये ।

48 पन तैन एन केनेरो मौको न थियो मैलतो, किजोकि सारे लोक यीशुएरी गल्लां शुन्नेरे लेइ च़ेवरे पासन विशशोरे रहते थिये ।

20

XXXXXXXXXXXXXXXXXXXX

(XXXXXXXX 21:23-27; XXXXXXXX 11:27-33)

1 एक्की दिहाडे ज़ैखन यीशु मन्दरे मां शिक्षा लोरो थियो देने, ते तैन खुशखबरी लोरो थियो शुनाने त प्रधान याजक ते शास्त्री ते यहूदी बुजुर्ग यीशु कां पुजे ।

2 ते तैना ज़ोने लगे, “तू एन सैरी गल्लां कसेरे अधिकारे सेइं केरतस या तीं ए अधिकारे केनि दित्तोरोए?”

3 यीशु तैन जुवाब दित्तो, “अवं भी तुसन अक गल पुछुतई, मीं ज़ोथ ।

4 यूहन्नारो बपतिस्मो स्वर्गेरे तरफां थियो या मैन्हु केरे तरफां थियो?”

5 तैना एप्पू मामेइं बेंस केनेने लगे, “कि अगर अस ज़ोम, ‘स्वर्गेरे तरफां थियो,’ त तै पुछुलो कि, ‘फिरी तुसेई याकीन की नई कियेरू?’

6 पन अगर अस ज़ोम कि, ‘मैन्हु केरे तरफां थियो,’ त लोकेई असन घोडेई देनिन, किजोकि तैना यूहन्ना नबी मन्ते थिये ।”

7 अल्हेरेलेइ तैनेई जुवाब दित्तो, “कि अस न ज़ानम कि केसरी तरफां थियो ।”

8 यीशु तैन सेइं ज़ोवं, “त अवं भी तुसन सेइं न ज़ोई कि एना कम्मा कसेरे अधिकारे सेइं केरताई ।”

XXXXXXXXXXXXXXXXXXXX

(XXXXXXXX 21:33-46; XXXXXXXX 12:1-12)

9 फिरी यीशु तैन लोकन अक मिसाल देइतां ज़ोने लगे, “एक्की मैने दाछुरी बाग लाई ते तै टेकेदारन टेके पुड देइतां एप्पू खरे च़िरे कोस्कोई दूर मुलखे च़लो जेव ।

10 ज़ेइस दाछू पकनेरो मौसम अव त तैनी अपनो हिस्सो नेनेरे लेइ अक नौकर बागी मां भेजो । पन तैनेई तै खूब कुटो ते खाली वापस भेजो ।

11 ते फिरी तैनी अक होरो नौकर भेजो, पन तैनेई तैसेरी भी बेइजती की, ते तै भी झुस कुट करतां खाली वापस भेजो ।

12 फिरी तैनी अक टूलेइयोवं होरो नौकर भेजो, पन तैनेई तैसेरी भी बेइजती की ते ज़ख्मी करतां कढो ।

13 तैखन बागारे मालिके ज़ोवं, ‘अवं अपनू टूलारू मट्टू भेजताई शैइद तैना तैसेरो लिहाज केरेले ।’

14 पन ज़ैखन टेकेदारें तै लाव त एप्पू मामेइं मुशोरो केनेने लगे, ए मालिके, एज्जा एस्से मारम ताके जेइदात इशुशी भोइ गाए ।

15 तैनेई तैन मट्टू बागी मरां बेइर शैरी छुइइ, ते मारू तुस सोचा कि फिरी बागारे मालिके तैन सेइं कुन केरेलो ।

16 ते मालिक एइतां तैन मैरी छडेलो ते बाग होरि केरे हवाले केरेलो ।" तैनेई एन शुन्तां ज़ोवं, "परमेशर न केरे एरू न भोए ।"

17 तैनी तैन केरे पासे तेकतां ज़ोवं, "फिरी इन कुने ज़ैन पवित्तरशास्तरे मां लिखोरूए कि, 'जै घोड मिस्तरेई रट्टी कियो, तैए घोड कूनेरो घोड भोलो ।'

18 जै मैन्हु इस घोडे पुड बिछडेलो त तैसेरे टुकडे-टुकडे भोइ गाले, ते ज़ैस उन्ढो ए घोड बिछडेलो तैस ए पितां छडेलो ।"

XXXXXXXXXX XX XXXX XXXX

(XXXXXXXX 22:15-22; XXXXXX 12:13-17)

19 शास्तरी लोकेई ते परधान याजकेई यीशु टलानेरी कोशिश की । किजोकि तैना बुझी जोरे थिये, कि तैनी ए मिसाल एन केरे बारे मां शुनेवरी थी, पन तैना लोकन करां डरते थिये ।

20 तैना लोक यीशुए टलानेरो मौको तोपने लोरे थिये, तैनेई विशवैसी केरे रूपे मां जासूस भेजे ताके तैसेरी कोई गल टलेइ सखन ते फिरी राजेरे अधिकारे मां देइ देन ।

21 तैनेई यीशु पुच्छू, "हे गुरू अस ज्ञानतम कि तू सच्चो आस ते सच्चरी शिक्षा देतस, ते केन्चेरी तरफदारी न केरस बल्के सच्चरे सेइ परमेशेरी बत्तरी शिक्षा देतस ।

22 कुन असन महाराजे जो धइत देनी जेइजे कि नेई?"

23 यीशुए तैन केरि ज़लाकी बुझतां तैन जो ज़ोवं ।

24 "मीं अक दीनार हिराथ ते एस पुड केसेरी शकल ते केसेरू नंभ्वे?" तैनेई ज़ोवं, "महाराजेरी ।"

25 यीशु तैन सेइ ज़ोवं, "ज़ैन महाराजेरू तैन महाराजे जो देथ, ते ज़ैन परमेशेरेरू ए, तैन परमेशेरे जो देथ ।"

26 ते तैना लोकां केरे सामने तैसेरी कोई गल न टलेइ सखे बल्के तैसेरे जुवाबे सेइ तैना हैरान भोइतां चुप रेइजे ।

XXXXXXXXXX XXXX XXXXXX XXXX XX XXXX

(XXXXXXXX 22:23-33; XXXXXX 12:18-27)

27 फिरी सदूकी ज़ैन ज़ोते थिये कि मुवारे ज़ीते न भोन ते फिरी किछ, यीशु कां एइतां पुच्छने लगे ।

28 "हे गुरू असन जो मूसेरो हुस्मे कि अगर केन्चेरो द्ला अपनि कुआन्शारे भोते संते ओईटल मेरि गाए त तैसेरो द्ला तैस कुआन्शी सेइ इला बनाए, ताके तै अपन द्लाएरे लेइ औलाद पैदा केरे ।

29 सत द्ला थिये पेइले इला बनाव ते ओईटले मेरि जेव ।

30 फिरी होरे तैस सेइ इला बनाव ।

31 फिरी तैल्ला पत्ती टलेइयोवं तै कुआन्श रख्खी फिरी एन्चरे सेइ सत्तेई ज़नेई इला बनाव, पन सब बेओलाद मेरि जे ।

32 ते आखकार तै कुआन्श भी मेरि जेई ।

33 ते ज़ीते भोने पुड तै केसेरी कुआन्श भोली? किजोकि तै सत्ते दलां केरि कुआन्श बनोरी थी ।"

34 यीशुए तैन सेइ ज़ोवं, "इस दुनियारे लोकन मां त इला बनानेरो दस्तूरे ।

35 पन ज़ैना लोक एजने बैली दुनियारे काबल भोले, ते ज़ैना मुइदन मरां ज़ीते भोले तैना इला न बनाले ।

36 तैना मरेले भी नन्ना एल्हेरेलेइ की तैना स्वर्गदूतां केरे ज़ेरे भोले ते तैन जो ज़ीते भोनेरां ते परमेशेरां मट्टां ज़ोले ।

37 ते ज़ैड़ी तगर मुइदां केरो ज़ीते भोनेरी गल्ले, ज़ेन्चरे मूसा नेबेरे ज़लते झैल्लोवेरे बारे मां, तेन्चरे इशारे कियो किजोकि तै परमेशर अब्राहमेरो परमेशर, इसहाकेरो परमेशर ते याकूबेरो परमेशर ज़ोइतां फुकारतो थियो ।

38 पन परमेशर मुइदां केरो नई बल्के ज़ीतां केरो परमेशेरे । किजोकि तैसेरे नेडे सब ज़ीतेन ।"

39 शास्त्री लोकन मरां किछेई जुवाव दित्तो, “हे गुरू तीं त बडू रोडू ज़ोवं।”

40 फिरी तैन मरां केन्वी हिम्मत न अई, कि एस होरू किछ पुछन।

~~~~~

(~~~~~ 22:41-46; ~~~~~ 12:35-37)

41 फिरी यीशुए तैन सेइं ज़ोवं, “फिरी मसीह जो दाऊदेरू मट्टू केन्चरे सेइं ज़ोतन?

42 किजोकि दाऊद त एप्पू भजना केरे किताबी मां ज़ोते,

परमेशरे मेरे प्रभु सेइं ज़ोवं,

मेरे देइने पासे बिश।

43 कि ज़ां तगर अवं तेरे दुश्मन तेरे पावन हैठ न विशैली।

44 दाऊद त तैस जो प्रभु ज़ोते, फिरी तैन तैसेरू मट्टू केन्चरे भोवं?”

~~~~~

(~~~~~ 23:1-36; ~~~~~ 12:38-40)

45 ज़ैखन सब लोक शुनी राहोरे थिये त यीशुए अपने चेलन सेइं ज़ोवं।

46 “शास्त्री लोकन करां हुशार रेइयथ तैना लम्मे-लम्मे कुरते लाने पसंद केरतन, ते होरू एन चातन कि लोक बज़ारन मां तैन जो नमस्कार ज़ोन, ते तैना प्रार्थना घरे मां उच्ची कुर्सी तोपतन ते धामन मां बड़े खास बन्नु चातन।

47 तैना विधवां कुआन्शां केरां घरां लुटतन ते लोकन हिरानेरे लेइ बड़ी लम्मी प्रार्थना केरतन। तैन हच्छी सज़ा मेलनीए।”

21

~~~~~

(~~~~~ 12:41-44)

1 यीशु अमीर लोकां केरे पासे तकने लगो, ज़ैना-ज़ैना दान-पेट्टी मां दान लोरे थिये छडने।

2 तैनी अक बड़ी गरीब विधवा कुआन्शा लाई ज़ैसां दई पेंडसे यानी अक धेलो ज़ाढो।

3 तैखन यीशुए ज़ोवं, “अवं तुसन सेइं सन्न ज़ोताई कि दान-पेट्टी मां दान देने बालन मरां सेबन करां जादे इस विधवा कुआन्शां दान दित्तू।

4 किजोकि तैनेई त अपनि दौलती मरां सिर्फ धगसेरे पेंडसे परमेशरे घरे मां दित्तोरेन पन इस कुआन्शां अपनि गरीब हालती सेइं ज़ैन किछ एसारे पल्ले थियूं सब किछ देइ छडू।”

~~~~~

(~~~~~ 24:1-2; ~~~~~ 13:1-2)

5 किछ लोक मन्दरे बारे मां ज़ाने लोरे थिये, कि बड़े माघे घोड़ेई सेइं ते दान कियोरी चीज़न सेइं बनोरूए, त यीशुए ज़ोवं।

6 “तैना दिहाड़े एजने बालेन कि इन चीज़ां ज़ैना तुस इड़ी लहने लोरेथ इड़ी घोड़े पुड़ घोड़ नई रानो ज़ै बछोड़ो न गालो।”

~~~~~

(~~~~~ 24:3-14; ~~~~~ 13:3-13)

7 तैनेई यीशुए पुच्छू, “हे गुरू जी एन गल्लां केइस भोनिन? ते तैन केरो दुनियाई मां एजनेरो कुन निशान भोनोए।”

8 यीशुए तैन ज़ोवं, “खबरदार टपलोईयथ नन्ना, किजोकि काई लोक मेरे नव्वे सेइं एजनेन ते तैनेई ज़ोनूए कि अवं मसीह आई, ते मौको भी नेड़े पुज़ोरोए तुस तैन पत्ती न गोइयथ।

9 ते ज़ैखन तुस लड़ेइयरी त उलझनरी अफुवां शुनेले त डेरथ नन्ना, किजोकि एन गल्लां केरू पेइले भोनू ज़रूरीए, पन तेइसे खातमो नई भोनो।”

10 तैखन यीशुए ज़ोवं, “किजोकि कौमी पुड़ कौम, ते राज़े पुड़ राज़ चढहाई केरेलू।

11 ठारी-ठारी बडे-बडे भुंजल एजनेन ते काल पेनोए ते विमारी फैलनिएं ते बुरी-बुरी गल्लां भोनिन ते अम्बरे मां आजीब निशान लेइहोनेन ।

12 एन सब गल्लां भोने करां पेइले तुशे दुश्मन तुसन सिर्फ मेरे नव्वेरे वजाई सेइं ढप्पेले ते तुसन सताले ते प्रार्थना घरेरी आदालती मां हाज़र केरेले ते कैद केरेले ते गवर्नरन ते कने राज़न कां पैश केरेले ।

13 तैखन तुसन मेरी गवाही देनेरो रोडो मौको मैलेलो ।

14 पन तुसन कोई ज़रूरत नई, कि पेइले फिकर करने लगथ कि अस कुन ज़ोमेले ।

15 किजोकि अवं तुसन एरी ज़बान ते अकल देइलो, कि कोई भी मुखालफ तुशे सामने खडो न भोइ सकेलो ते न लोक तुशे खलाफ किछु ज़ोई सकेलो ।

16 ते तुशे हाज़ बव ते दूला ते रिशतेदार ते दोस्त तुसन सेइं बैर केरेले ते तुसन मरां किछन मारेले भी ।

17 ते मेरे नव्वेरे वजाई सेइं सारे लोक तुसन सेइं नफरत केरेले ।

18 पन तुशे दोग्गेरो कोई बाल बांको न भोलो ।

19 सब किछु झेलतां तुस अपनि जान बचेइ साखेलो ।”

☞☞☞☞☞ ☞☞ ☞☞ ☞☞☞☞ ☞☞

(☞☞☞☞ 24:15-21; ☞☞☞☞ 13:14-19)

20 “जेइस तुस यरूशलेम नगर जेवरे पासन फौवजेइं सेइं घेरेरू लाले, त बुझथ कि एस नाश भोनेरे दिहाड़े नेडे ओरेन ।

21 तैस मौके ज़ैन यहूदिया मां भोले तैना पहाड़े पुड़ जो नेशशी गान ते ज़ैना यरूशलेम नगरे मां भोले त तैन बेइरोवं निसन ते ज़ैना इलोव्वन मां भोले त तैना नगर मांजो न गान ।

22 किजोकि एना बदलेरे दिहाड़े भोले, एन मां तैन सब किछु ज़ैन पेइलू पवित्रशास्त्रे मां लिखेरूए तैन पूरू भोनुए ।

23 तैन दिहाड़न मां ज़ैना दोज्जींती त दुद्धु पियाती कुआन्श भोली, तैन केरे लेइ अफ़सोस! किजोकि धेरती पुड़ बडी मुसीबत एजनीए ते एस कौमी पुड़ बडी आफत एजनीए ।

24 तैना सब तलवारी सेइं मारे गाले ते गुलाम बेनतां सेम्भी कौमन मां पुज़ेले ते गैर कौमां केरो मौको पूरो भोने तगर यरूशलेम नगर गैर कौमेई सेइं पस्त भोंतो रालू ।

☞☞☞☞☞ ☞☞☞☞☞☞☞☞ ☞☞☞☞☞

(☞☞☞☞ 24:29-31; ☞☞☞☞ 13:24-27)

25 “दिहाड़े चेंदनरी ते तारन मां निशान बांदे भोनेन ते धेरती पुड़ कौमन बडी तकलीफ पुज़निये, किजोकि समुन्दरेरी लैहरां केरि शौरी सेइं तैना डेरि गानेन ।

26 डेरें मारे एजने बैली मुसीबतरे इंतज़ार करते-करते तैन केरे होश उड़ी गानेन, किजोकि अम्बरेरी सैरी शेक्ति हिल्लेली ।

27 तैखन लोक मैनेरू मटटू बेडि शेक्ति ते महिमा सेइं विदलारी मां एंडतू लाएले ।

28 ज़ैखन एन गल्लां भोनी शुरू भोली त सिधे खडे भोइतां उबरू तेकथ, किजोकि तुशे छुटकारो भोने वालोए ।”

☞☞☞☞☞☞☞☞☞☞☞☞☞☞☞☞☞☞☞☞☞☞

(☞☞☞☞ 24:32-35; ☞☞☞☞ 13:28-31)

29 फिरी यीशुए तैन अक मिसाल देइतां ज़ोवं, “तुस फ़ेगेरे बुट ते होरि बुट्टन भी हेरतथ ।

30 ज़ेरि तैस गुडी लेगनी शुरू भोइचन? त तुस हेरतां बुझतथ कि नेला ओरोए ।

31 एसेरो ज़ेरो, ज़ैखन तुस एना गल्लां, ज़ैना मीं ज़ोई, भोते हेरेले, त तुस बुझ्जी छड्डा कि परमेशेरू राज़ नेडे ओरूए ।

32 अवं तुसन सेइं सज़ ज़ोताई, कि ज़ां तगर एन गल्लां पूरी न भोन, एस कौमरो खातमां न भोलो ।

33 धरती अम्बर टेली गालू पन मेरी गल्लां कधे न टेलेली ।

॥॥॥॥ ॥॥॥

(॥॥॥॥ 24:36-44; ॥॥॥॥ 13:32-37)

- 34 “बस्सा खबरदार भोथ कोस्कोई एरू न भोए कि तुशशो दिल नशे मां मसत भोइतां इस ज़िन्दगरे फिकरे सेई कमज़ोर भोए, ते तैस दिहाड़े तुशशे लेइ अक मुसीबत बने ।
- 35 किजोकि तै इस सैरी धेरती पुड़ ज़ेत्तरे लोकन तैन सभन पुड़ एन्चरे एजनीए ।
- 36 बस्सा, हर वक्त तियार राथ ते प्रार्थना करते राथ, ताके तुस एन गल्लन करां ज़ैना भोने बैलिन बेंचतां राथ, ते मैनेरे मट्ठे कां खड़े भोनेरे काबल भोथ ।”
- 37 यीशु रोज़ मन्दरे मां शिक्षा देतो थियो, ते राती ज़ैतून पहाड़े पुड़ रातो थियो ।
- 38 झेझां सारे लोक यीशुएरी गल्लां शुन्नेरे लेइ मन्दरे मां तैस कां एइते थिये ।

## 22

॥॥॥॥॥ ॥॥॥ ॥॥॥॥॥

(॥॥॥॥ 26:1-5; ॥॥॥॥ 14:1-2; ॥॥॥॥॥ 11:45-53)

- 1 अखमीरी तिहारेरी दिहाड़ी ज़ैस जो फ़सह ज़ोतन नेड़े ओरी थी ।
- 2 प्रधान याजक ते शास्त्री मौको तोपने लोरे थिये कि यीशु केन्चरे मारम । किजोकि तैना लोकन करां डरते थिये ।

॥॥॥॥ ॥॥॥॥॥॥॥॥॥ ॥॥॥॥॥॥

(॥॥॥॥ 26:14-16; ॥॥॥॥ 14:10-11)

- 3 ते शैतान यहूदा मां बेस्सी जेव तैस जो इस्करियोती भी ज़ोते थिये, ते तै यीशुएरे 12 चेलन मां गनो गातो थियो ।
- 4 दे ते प्रधान याजकन ते प्रार्थना घरेरे किछ् खास पुच्छने गन्ने लोकन कां जेव ते तैन सेई मुशोरो केरने लगे कि केन्चरे सेई यीशु तैन केरे हवाले केरी बटते ।
- 5 तैना बड़े खुशी भोए ते तैस पेंडसे देनेरो वादो कियो ।
- 6 तैनी तैन केरि गल मन्नी ते मौको तोपने लगे, कि यीशु केन्चरे सेई तैन केरे हावाले केरे ते केन्ची पतो न लगे ।

॥॥॥॥ ॥॥॥॥ ॥॥॥॥ ॥॥॥॥ ॥॥॥॥॥॥॥ ॥॥॥॥ ॥॥॥

(॥॥॥॥ 26:17-25; ॥॥॥॥ 14:12-21; ॥॥॥॥॥ 13:21-30)

- 7 अखमीरी रोदटरू तिहार नेड़े ओरू थियूं, ज़ैस फ़सह तिहारे मां गबड़ेरू बलिदान देनू ज़रूरी थियूं ।
- 8 यीशुए पतरस ते यूहन्ना एन ज़ोइतां भेजे, “कि गाथ ते इशशे लेइ फ़सह तिहारेरी रोदटी तियार केरा ।”
- 9 चलेई पुच्छ्, “कि तू कोडि चातस कि अस तीजो फ़सह तिहारेरी रोदटी तियार केरम?”
- 10 यीशुए तैन जुवाब दित्तो, “नगर मां गाते तुसन अक मैन्हु मैलनोए ज़ै पैनेरो घडो घिन्तां चलोरो भोनोए, तैस पत्ती गेइयथ ते ज़ैस घरे मां तै गालो तुस भी गेइयथ ।
- 11 तैसेरे मालिके सेई ज़ोइयथ कि गुरे ज़ोरूए कि टलाहना केरि ठार कोडि आए, ज़ैडी अवं अपने चेलन सेई साथी फ़सह तिहारेरी रोदटी खेइ सेखी?
- 12 तै तुसन दोपरे नेइतां अक बड़ो कमरो हिरालो ज़ै खूब रोड़ेचारे सज़ेवरो भोनोए तैडी इशशे लेइ तियारी केरथ ।”
- 13 तैनेई तैडी गेइतां सब किछ् तेरहु लाव ज़ेरू तैनी ज़ोरू थियूं, ते तैडी फ़सह तिहारेरी रोदटी तियार की ।

॥॥॥॥ ॥॥॥

(॥॥॥॥ 26:26-30; ॥॥॥॥ 14:22-26; 1 ॥॥॥॥॥॥॥॥॥ 11:23-25)

- 14 ज़ैखन रोदटी खानेरो मौको अव त यीशु अपने प्रेरितन सेई साथी बिशशेरे थिये ।

15 ते यीशुए तैन सेईं ज़ोवं, “मेरी ए बड़ी इच्छा थी, कि अपनो दुःख झल्लने (मरने) करां पेइले एककी बार फ़सह तिहारेरी रोट्टी तुसन सेईं साथी खेइ।

16 किजोकि अवं तुसन सेईं ज़ोताई, कि अजरेरां पत्ती तांतगर न किछ खेइ सेखी, ज़ां तगर परमेशेरे राज्जेरू कम पूरू न भोए।”

17 फिरी यीशुए दाछरे रसेरो कटोरो टलातो ते परमेशेरेरू शुकर केरतां चलन दित्तो ते ज़ोवं, “यांथ ते एप्पू मांमेईं बंटा।

18 किजोकि अवं तुसन सेईं ज़ोताई कि अजरेरां पत्ती दाछारो ए रस फिरी तांतगर न पीलो ज़ां तगर परमेशेरेरू राज़ न एज्जे।”

19 फिरी यीशुए रोट्टी टलाती ते परमेशेरेरू शुकर केरतां टलोड़ी ते तैसेरे टुकड़े बनेइतां अपने चलन एन ज़ोइतां दिती, “कि ई मेरी जाने ज़ै तुशे लेइ अवं देताई ते तुस भी मेरी यादगैरी मां एन्ने केरते रेइयथ।”

20 एन्न्रे रोट्टी खानेरे बाद तैनी कटोरो टलातो ते चलन कां दित्तो ते ज़ोवं, “कि ई कटोरो मेरो तैस खूनरो नव्वो करारे ज़ै तुशे लेइ दित्तोरोए।

21 पन हेरा मीं टलुवाने बालो मीं सेईं साथी खाने लोरोए।

22 किजोकि मैनेरू मट्टू त हुनी ज़लोरोस ज़ेन्न्रे कि तैसेरेलेइ पेइले एन पक्कू भोरूए पन तैस मेन्हु पुइ अफ़सोस ज़ेसेरे हथेईं ते गिरफ़्तार भोए।”

23 एन शुन्तां तैना एप्पू मांमेईं पुच्छने लगे, “असन मां एरो ज़ेरो कौने ज़ै एन कम केरेलो?”

???? ??

24 तैन एस गल्ली पुइ एप्पू मांमेईं वेंस भोइ कि असन मां बड़ो कौने?

25 यीशु तैन सेईं ज़ोवं, “गैर कौमन पुइ तैन केरे राज़ राज़ केरतन, ते ज़ैन केरो तैन पुइ अधिकारे भोते तैन जो भलाई केरनेवाले ज़ोतन।

26 पन तुसन मां एरू लोड़े भोवरू, तुसन मां ज़ै बड़ोए तै निकड़े बराबर बने ते ज़ै खास आए तै सेवकेरे बराबर बने।

27 किजोकि बड़ो कौने? ज़ै तैस कां साथी विशोरोए या तै ज़ै तैसेरो चेलोए? कुन तै तैस कां नईं विशोरो? पन अवं त तुसन मां अक सेवकेरे बराबर आईं।

28 पन तुस तैना आथ ज़ैना मेरी अज़मैइशेरे मौके बराबर मीं सेईं साथी रातथ।

29 ज़ेन्न्रे बाजी मीं अक राज़ दित्तोरूए अवं भी तुसन अक राज़ देताई।

30 ताके तुस मेरे राज्जे मां मीं सेईं साथी विशतां खाथ पीथ, बल्के बडे-बडे शाही तखतन पुइ विशतां इस्राएलेरे 12 गोत्रां केरो इन्साफ़ केरेले।”

?????? ?????????????

(????? 26:11-35; ?????? 14:27-31; ???????? 13:36-38)

31 “शमौन, शमौन, खबरदार रा, शैताने परमेशेरे करां अजाजत मगगोरीए कि तुसन सेम्बन परखे, कि रोडे बुरे करां अलग केरे ज़ेन्न्रे ज़मीनदार गेहुन करां झाझ अलग केरते।

32 पन मीं तेरे लेइ प्रार्थना की, कि तू मीं पुइ विश्वास केरनो न शारस, ज़ैखन तू मन फिरास त अपने विश्वासी हलान मज़बूत केरां।”

33 पतरसे यीशु सेईं ज़ोवं, “हे परमेशर तीं सेईं अवं कैद भोने बल्के मरनेरे लेइ भी तियार आईं।”

34 पन यीशुए ज़ोवं, “हे पतरस अवं तीं सेईं ज़ोताई कि अज़ कुकड़े बांग देने करां पेइले तू मेरो टलाई बार इन्कार केरेलो कि अवं एस न ज़ैनी।”

?????, ????, ??

35 यीशुए तैन सेईं ज़ोवं, “कि ज़ेइस मीं तुस खुशखबरी शुनाने, बगैर बेटवे, बूटा ते झोल्लेरे बगैर भेजोरे थिये त तुस केन्ची चीज़ारे घटी भोइ?” तैनेईं ज़ोवं, “केन्ची चीज़री नईं।”

36 यीशु तैन सेइं ज़ोवं, “पन हुनी ज़ैस कां बेटवो भोए ते साथी रखे ते एन्चरे झोलो भी ते ज़ैस कां तलवार न भोए तै अपनू कोट बेचतां भी तलवार घिन्ने ।

37 अवं तुसन सेइं ज़ोताई कि ई गल्ले ज़ै पवित्रशास्तुरे मां लिखोरीए, कि तै पूरी भोए । तै बुरे लोकन सेइं साथी गनो जेव ! एन्हरेलेइ मेरे बारे मां लिखोरी गल्लां पूरी भोने लोरिन ।”

38 तैनेई ज़ोवं, “हे प्रभु हेर इडी दूई तलवारन ।” तैनी तैन सेइं ज़ोवं “बेड़ि आन ।”

????????? ?????? ???? ???? ?????????? ??????  
(?????? 26:36-46; ?????? 14:32-42)

39 फिरी तै बेइर निस्सो ते ज़ेन्चरे तैसेरो दस्तूर थियो, तै ज़ैतून पहाड़े पुड़ जो चलो जेव ते तैसेरे चले भी तैस सेइं साथी चले जे ।

40 तैस ठैरी पुजतां तैनी तैन सेइं ज़ोवं, “प्रार्थना केरा ताके तुस अज़मैइशी मां न पेथ ।”

41 यीशुए तैन करां थोड़े जेरे अगगर गेइतां ज़ैधू केरे भारे बिश्तां प्रार्थना केरने लगे ।

42 “हे बाज़ी अगर तेरी मर्ज़ी भोए त ई दुखेरो कटोरो मीं करां दूर केर, पन फिरी भी मेरी मर्ज़ी पूरी न भोए बल्के तेरी मर्ज़ी पूरी भोए ।”

43 तैखन तैनी अम्बरेरां अक स्वर्गदूत लाव ज़ै तैस शक्ति देतो थियो ।

44 ते तै परेशान भोइतां होरि जादे दिले सेइं प्रार्थना केरने लगे ते तैसेरो पिसीनो बुझा कि खूनेरे बड़े-बड़े तेप्पु तल्ले झड़ते थिये ।

45 प्रार्थना केरनेरे बाद यीशु अपने चलन कां वापस अव ते तैना गम्मेरे मारे झुलोरे मैल्ले ।

46 यीशुए तैन सेइं ज़ोवं, “तुस किजो झुल्लोरेथ उठा ते प्रार्थना केरा ताके अज़मैइशी मां न राथ ।”

????? ???? ???? ??????????  
(?????? 26:47-56; ?????? 14:43-50; ?????????? 18:3-12)

47 हेजू यीशुए गल ज़ोने लोरो थियो, त मैन्हु केरो अक जथो तैडी पुजो ते बारहन मरां अक ज़ेसेरू नवं यहूदा थियूं, तैन सेइं अगरी-अगरी थियो, ते तै यीशु फुम्मड़ी देने अगर अव ।

48 पन यीशुए तैस सेइं ज़ोवं, “यहूदा कुन तू एक्की फुम्मड़ी सेइं मीं मैनेरे मट्ठे टलुवातस?”

49 ज़ैखन यीशुएरे सैथेई एन सब हेरू त तैनेई ज़ोवं, “हे प्रभु कुन अस तलवार च़लाम?”

50 ते तैन मरां एक्के महायाजकेरे नौकरे पुड़ तलवारां च़लाई ते तैसेरो तैनी कन्न उड़ाव ।

51 पन यीशुए जुवाव दित्तो, “बस्सा बडू भोइ जेवं ।” ते यीशुए तैसेरो कन्न तैखने हथ लेइतां बझाव ।

52 तैखन यीशुए प्रधान याजकन ते मन्देरेरे सिपाही ते बुज़ुर्ग ज़ैन तैस गिरफ्तार केरने ओरे थिये तैन जो ज़ोवं, “तुस कुन तलवारां ते डंडे घिन्तां मीं डैकू बुझतां टलाने ओरेथ?”

53 ज़ेइस अवं तुसन सेइं साथी मन्देरे मां भोतो थियो, त तुसेईं मीं सेइं हथ न लाव, पन ई त तुशे आंधेरेरे मौकेरो अधिकारे ।”

????????? ??????  
(?????? 26:57-58,69-75; ?????? 14:53-54,66-72; ?????????? 18:12-18,25-27)

54 ज़ैखन तैनेई यीशु टलातो तैस तैट्टां नेइतां महायाजकेरे घरे नीयो, पतरस भी पत्तपति बल्हे-बल्हे तैरां जेव ।

55 तैनेई अंगने मां अग बालोरी थी ते सब बिश्तां अग तपने लोरे थिये ते पतरस भी तैन मां थियो ।

56 ते अक कुआन्शे अगगी कां विशोरी तकने लोरी थी ते पतरसेरां तेकतां ज़ोने लगी, “कि ई मैन्हु भी तैस सेइं साथी थियो ।”

57 पन पतरसे इन्कार केरतां ज़ोवं, “हे कुआन्शे अवं एस न ज़ैनी ए कौने ।”

58 थोड़ी सेइत्तां पत्ती होरे एक्के पतरसेरां तेकतां ज़ोवं, “तू भी तैन्ना केरो साथिस ।” पन पतरसे ज़ोवं, “नई अवं नई ।”

59 कोई एककी घेंटेरे बाद केन्वे होरे बड़े याकीने सेइं ज़ोवं, “ईं मैन्हु पक्को तैस सेइं साथी थियो, किजोकि ए भी गलीली आए।”

60 पन पतरसे इन्कार करतां ज़ोवं, “अवं एस न ज़ैनी तू कुन ज़ोतस?” हेजू पतरसे ए गल ज़ोने लोरो थियो, त कुकड़े बांग दिती।

61 ते प्रभुए फिरतां पतरसेरे पासे तक्कू ते पतरसे परमेशेरी तै गल याद आई, ज़ै तैनी पतरसे सेइं ज़ोरी थी, “कि अज़ कुकड़े बांग देने करां पेडले तू मेरो टूलाई बार इन्कार केरेलो।”

62 ते पतरस बेइर गेइतां ज़ोरे-ज़ोरे लेरां देने लगो।

???????? ???? ???? ?

(?????? 26:67-68; ?????? 14:65)

63 ज़ैने मेनेई यीशु अपने कब्जे मां कियोरो थियो, तैना तैसेरी हासी बनाते थिये ते कने तैस बाते थिये।

64 तैना यीशुएरी एछ्छन पुड़ पट्टी बेन्धतां बाते थिये ते पुछ्छते थिये, “भविष्यवाणी केर ते ज़ो केनि बाहोरिए?”

65 ते तैनेई एन्चरे होरि भी बेड़ि गल्लां ज़ोई ते तैसेरी तुहीन की।

?????????? ??? ???? ?

(?????? 26:59-66; ?????? 14:55-64; ????????? 18:19-24)

66 झेझां बुजुर्ग लोक ते प्रधान याजक ते शास्त्री लोकेई यीशु अपने महासभाई मां आनो,

67 ते ज़ोने लगे, “अगर तू मसीह आस त ज़ो!” यीशुए तैन सेइं ज़ोवं, “अगर अवं तुसन ज़ोई भी त तुस मेरू याकीन न केरेले।

68 ते अगर अवं तुसन पुछ्छी त तुस जुवाबे न देले।

69 पन अज़ोरां बाद मैनेरू मट्टू परमेशेरे देइने पासे विशोरू लाएले।”

70 एस गल्ल्ती पुड़ तैना सब ज़ोने लगे, “तू परमेशेरू मट्टू आस?” यीशुए जुवाब दित्तो, “तुस एप्पू मीजो ज़ोतथ कि तू आस?”

71 तैनेई ज़ोवं, “हुनी असन होरि शाहादतां केरि कुन ज़रूरीए? किजोकि असेई एसेरी ज़वान शुनेरूए।”

## 23

?????????????? ?????? ???? ?

(?????? 27:1-2,11-14; ?????? 15:1-5; ????????? 18:28-38)

1 तैखन तैना सब तैट्टां उठे ते यीशुए पिलातुसे कां घिन्तां जे।

2 ते तैस जो एन ज़ोइतां ए इलज़ाम लांने लगे, “कि ए इश्शे लोकन भड़काते ते महाराजे जो धड़त देनेरे लेइ ठाकते, ते अपने आपे जो मसीह राज़ो ज़ोते।”

3 तैखन पिलातुसे यीशुए पुछ्छ, “तू यहूदी केरो राज़ोस?” यीशु तैस जुवाब दित्तो, “तू एप्पू ज़ोतस!”

4 पिलातुसे प्रधान याजकन ते लोकन सेइं ज़ोवं, “कि अवं एस मैन्हु मां कोई कसूर न लेई।”

5 पन तैना बड़े घमण्डे सेइं ज़ोने लगे, “ए यहूदियारे इलाके करां गलील इलाके तगर बल्के इड़ी तगर लोकन अपनि शिक्षाई सेइं भड़काते।”

6 ज़ैखन पिलातुसे एन शूनू त तैनी पुछ्छ, “कुन ए मैन्हु भी गलील इलाकेरो आए।”

7 ते ज़ोरो तैस पतो लगो, कि ए हेरोदेसेरे इलाकेरो रानेबालोए, त पिलातुसे तै हेरोदेस कांजो भेजो। किजोकि तैस वक्ते मां तै एप्पू भी यरूशलेम नगरे मां थियो।

?????????????? ?????? ???? ?



8 जैसन हेरोदेसे यीशु लाव त बडो खुशी भोव । किजोकि तैस ज़रोक्नी देंती यीशु हेरनेरी इच्छा थी । तैनी तैसेरे बारे मां बेड़ि गल्लां शुनोरी थी, ते तैस बड़ी उमीद थी, कि यीशुएरो कोई चमत्कार हेरे ।

9 तैनी यीशुए बड़ किछ पुच्छ, पन यीशुए तैस कोई जुवाव न दित्तो ।

10 पन याजक ते प्रधान याजक ते कने शास्त्री लोक बड़े ज़ोरे शोरे सेइं यीशु पुड़ इलजाम लाने लगे ।

11 तैखन हेरोदेस भी अपने सैधन सेइं मिलतां यीशुएरी तुहीन की, ते तैसेरी हासी बनाई फिरी तैस अक चमकतो कुरतो लुवेइतां पिलातुसे कां वापस भेजो ।

12 पेइले पिलातुस त हेरोदेस दुश्मन थिये, तैस दिहाड़े तैना दोस्त बेनि जे ।

~~~~~

(~~~~~ 27:15-26; ~~~~~ 15:6-15; ~~~~~ 18:39-19:16)

13 तैखन पिलातुसे प्रधान याजक ते सरदार ते हारे लोक अकोट्टे किये ।

14 “ते पिलातुसे तैन सेइं ज़ोवं तुसेईं ए मैन्हु मीं कां एन ज़ोंतो आनोरोए कि, ए लोकन भडकाते ते मिमी एसेरी पुछ गन की, पन ज़ैस जुर्मोरो दोष तुस एस पुड़ लातथ, अवं एल्हेरो एसमां कोई कसूर न लेईं ।

15 ते न हेरोदेस ज़ैनी ए असन कां भेजोरोए तैस भी कोई दोष न मैल्लो, ते असन कां एरू कोई सबूत बरामद न भोवं, ज़ैस सेइं ए कल्ल कियो गाए ।

16 तैल्हेरेलेइ अवं एस कोड़ेइं बाएतां छैडी देताईं ।”

17 पिलातुस यहूदी केरे फ़सह तिहारेरे मौके पुड़ अक कैदी हथरां छुडतो थियो ।

18 तैना सारे लोक चिन्डां लगे मारने, “कि एस मैन्हु सज़ा देथ ते बरअब्बा इश्शे लेइ हथरां छुडडा ।”

19 बरअब्बा नगर मां गडबडी केरनेरे ते कतलेरे बारे मां पावंद भोरो थियो ।

20 पिलातुसे यीशु हथरां छुडनेरे इरादे सेइं लोकन दुवारू पुच्छ ।

21 पन तैना लोक मना चिन्डां लगे मारने, “कि तू एस क़रूसे पुड़ ज़ाद एस क़रूसे पुड़ ज़ाद ।”

22 तैखन पिलातुसे तैन टलेइयोवं फेरे फिरी ज़ोवं, “किजो आखर एनी कुन जुर्म कियोरोए? हेरा एसमां एरू कोई सबूत बरामद न भोवं, कि ए मौतरे सज़ारो हकदार भोए, तैल्हेरेलेइ अवं एस कुटेइतां छैडी देताईं ।”

23 पन तैना चिन्डां मैरी-मैरी ज़ोने लगे, ए क़रूसे पुड़ ज़ादोरो लोडते, ते तैन केरि चिन्डां मारनेरी उमीद पूरी भोइ ।

24 बस्सा, पिलातुसे ज़ोवं कि तैन केरे मेरज़रे मुताबिक कियूं गाए ।

25 ते ज़ै मैन्हु हुकुमतेरे खलाफ ते खूनेरे जुर्म मां कैद थियो, ते ज़ैस हथरां छुडनेरे लेइ तैनेईं दरखुवास कियोरी थी, तै हथरां छुडडो पन यीशु तैन केरि मेज़ीं सेइं सिपाही केरे हवाले कियो ।

~~~~~

(~~~~~ 27:32-44; ~~~~~ 15:21-32; ~~~~~ 19:17-27)

26 ज़ैखन तैना यीशु नेइतां ज़लोरे थियो, त तैनेईं शमोन कुरेनी ज़ै एक्की इल्लोवेरां ओरो थियो, टलातो ते क़रूसे तैस कां छूने जो दित्तू, कि तू ई क़रूसे छुडतां यीशु पत्ती ज़ला ।

27 ते बड़े लोक तैस पत्ती ज़लोरे थिये ते किछ कुआन्शां भी थी ज़ैना यीशुएरे लेइ शौग बनैती थी ।

28 यीशुए तैन केरे पासे मुडतां ज़ोवं, “हे यरूशलेम नगरेरी कुइयाव मेरे लेइ लेरां न देथ, बल्के अपने बच्चां केरे लेइ लेरां देथ ।

29 किजोकि तैना मुशकिल दिहाड़े एजने बालेन ज़ैखन लोक एन ज़ोले कि, ‘धन आन तैना कुआन्शां ज़ैना बेओलादन ते बच्चे न पाले ।’ ”

30 “तैस वक्ते लोक पहाड़न सेइं ज़ोले,

‘असन उन्दे बिछड़ा ते उच्ची ठारन जो ज़ोले, कि असन छपाथ ।’

31 किजोकि ज़ैखन तैनेई सब्ज बुट्टे सेइ एन करू, त शुककोरे बुट्टे सेइ कुन न करेले?”

32 ते सिपाहेई दई होरे मुर्जम भी यीशु सेइ साथी बलवरे थिये ताके तैन भी मारन ।

33 ज़ैखन तैना तैस टैरी पुजे ज़ैस जो “खोपड़ी” ज़ोतन त तैडी यीशु करूसे पुड़ च़ादो, ते तैना दई मुर्जमन भी एक्की यीशुएरे देइने पासे ते होरि बांए पासे करूसे पुड़ च़ादो ।

34 यीशु ज़ोवं, “हे बाजी एन माफ़ करां एन न ज़ानन् कि एना कुन लोरम करेने ।” ते तैनेई तैसेरे लिगड़ां केरे लेइ परची छेड़तां शर्त रखवू ते एप्पू मांमेइ बंटां ।

35 लोक खड़खड़े एन सब किछ् हेरने लोरे थिये ते सरदार ज़ोरे-जोरे सेइ ज़ोते थिये, “एनी होरे त बच्चाए ते अगर ए मसीहे ते परमेशेरो चुनोरे त अपने आपे किजो न बच्चाए ।”

36 सिपाही भी तैस कां एइतां तैसेरी हासी बनाने लगे (किजोकि तै अपनो आप राज़ो बनातो थियो), ते घटया दाछारो रस पीनेरे लेइ तैस देने लगे ।

37 “ते ज़ोते थिये तू अगर यहूदी केरो राज़ोस त अपनो आप बच्चा !”

38 ते तैस करूसे पुड़ यानी यीशुएरे दोग्गे करां बहा अक पखड़ी लिखतां लेवरी थी, ते तैस पुड़ एन लिखेरू थियूं, “ए यहूदी केरो राज़ आए ।”

ॐ ॐॐॐॐ ॐॐॐ ॐॐॐ

39 तैन दई डैकू ज़ैना मारे जे तैन मरां एक्के यीशु जो तुहीन केरतां ज़ोवं, “अगर तू मसीह आस त एप्पू भी बच्च ते असन भी बच्चा ।”

40 पन होरे दुइयोवं डैके तैस जो झिड़कतां ज़ोवं, “तीं परमेशेरो भी डर नई? ज़ै सज़ा तैस मैलने लावरी तीं भी त तैए सज़ा मैलने लोरीए ।

41 असन त इन्साफेरे मुताबिक अपने बुरे कम्मां केरि सज़ा मैलने लोरी पन एनी त कोई गलत कम नई कियेरू ।”

42 तैखन तैनी ज़ोवं, “हे यीशु ज़ैखन तू अपने राज़े मां एज्जेलो त मीं भी याद केरां ।”

43 यीशुए तैस जो ज़ोवं, “अवं तीं सेइ सच्च ज़ोताई कि तू अजे मीं सेइ साथी स्वर्गें मां भोलो ।”

ॐॐॐ ॐॐॐॐॐ ॐॐ ॐॐॐॐ ॐॐॐ

(ॐॐॐॐ 27:45-56; ॐॐॐॐ 15:33-41; ॐॐॐॐॐॐ 19:28-30)

44 दीसारे 12 बज़ेई सारे मुलखे मां आंधरू भोवं, त टलेइ बज़न तगर रावं ।

45 दिहाड़ो भी कालो भोव ते मन्देरेरो पड़दो बां देता बुन तगर फेटतां दई टुकड़े भोइ जे ।

46 यीशुए बड़े ज़ोरे सेइ ज़ोवं, “हे बाजी अवं अपनि आत्मा तेरे हथ्ये मां सांफताई,” ते एन ज़ोइतां यीशुए प्राण दिते ।

47 ज़ैखन रोमी सूबेदारो एन सब हेरू त परमेशेरी तारीफ़ केरते ज़ोवं, “एमैन्हु सच्चे धर्मी थियो ।”

48 ते सारे लोक ज़ैना तैडी थिये ए अनर्थ हेरतां छाती पिट्टते बल जे ।

49 पन यीशुएरे सारे दोस्त ते तैना कुआन्शां ज़ैना गलील इलाके मरां यीशुए पत्पती ओरी थी दूर ज़ेरे खेड़ोइतां, ज़ैन किछ् भोइ रावरू थियूं सब किछ् हेरी रेवरी थी ।

ॐॐॐ ॐॐॐ

(ॐॐॐॐ 27:57-61; ॐॐॐॐ 15:42-47; ॐॐॐॐॐॐ 19:38-42)

50 अक मैन्हु थियो, ज़ेसरू नवं यूसुफ थियूं, ते यहूदी केरि आदालतरो अक मुलाज़म भी थियो, ते अक बड़ो नेक ते धर्मी मैन्हु थियो ।

51 ते बेडडी आदालत अफसरां केरे फैसलेरे हके मां न थियो । ते यहूदी केरे नगर अरिमतियाह रानेवालो थियो, ते परमेशेरे राज़ेरे तलाशी मां थियो ।

52 तैनी पिलातुसे कां गेइतां यीशुएरी लाश मगी ।

53 ते लाश करूसे पुड़ेरां ओसैलतां मलमलेरे कपड़े मां पलेटतां ते एक्की कबरी मां रख्खी, ज़े एक्की शफ़ड़ी मां बनेवरी थी, तैस कबरी मां पेइले कोई लाश न थी रखोरि ।

- 54 तै तियेरारी दिहाड़ी थी जै आरामेरी दिहाड़ी शुरू भोने बाली थी ।  
 55 ते तैना दूई कुआन्शां जैना गलील इलाके मरां यीशुए पत्पती ओरी थी, यूसुफे पत्पती जेई ते तैनेई तै कबर हेरी, कि यीशुएरी लाश एसमां केन्बरे सेई रखोरीए ।  
 56 तैखन तैना अपने घरे वापस आए, ते खुशबूदार चीजां ते इत्र तियार कियो ते आरामेरे दिहाड़े मूसेरे कानूनेरे मुताबिक आराम कियो ।

## 24

🔍🔍🔍🔍 🔍🔍🔍 🔍🔍

(🔍🔍🔍🔍 28:1-10; 🔍🔍🔍🔍 16:1-8; 🔍🔍🔍🔍 20:1-10)

- 1 हफतेरी पेडले दिहैड़ी झेझां किछ कुआन्शां खुशबूदार चीजां नेइतां जेई, जैना तैनेई तियार कियोरी थी ते एन्तां कबरी कां पुज्जी ।  
 2 पन तैनेई तै घोड कबरी करां बिछ्छोरो लाव ।  
 3 जैखन तैना अन्तर जेई त तैन यीशुएरी लाश न मैल्ली ।  
 4 तैखन तैना एन हेरतां परेशान भोइ त दूई मैन्हु जैन छित्तां लिगडां लेग्गोरां थियां, तैन कुआन्शन कां एइतां खेडोए ।  
 5 तैना कुआन्शां डेरि जेई ते तैना ज़मीनेरे पासे तकने लग्गी । तैन मैनेई तैन जो ज़ोव, "तुस ज़ीते, मुडदन मां किजो लोरिथ तोपने ।  
 6 ते इड़ी नई बल्के ज़ीतो भोरोए तुसन याद नई कि ज़ेइस तै गलीले मां थियो, त तैनी तुसन ज़ोरू थियूं कि,  
 7 मैनेरू मट्टू यानी अवं पापी लोकां केरे हथ्ये देनोए ते करूसे पुड चाद्वनोई ते फिरी टलेइ दिहाड़ा बाद फिरी ज़ीतो भोनोंई ।"  
 8 तैखन तैना यीशुएरी गल्लां याद एई ।  
 9 तैखन तैना कबरी करां ज़ेलि जेई, त तैनेई यीशुएरे 11 चेलन ते बाकी होरि चेलन भी एस गल्लरो पतो दित्तो ।  
 10 ज़ैनेई प्रेरितन सेई गल्लां की, मरियम मगदलीनी योअन्ना ते याकूबेरी अम्मा मरियम ते तैस सेई साथी होरि भी काई कुआन्शां थी ।  
 11 पन तैन, तैन केरि गल्लां कहानी लग्गी, ते तैनेई तैन केरू याकीन न कियूं ।  
 12 पन पतरस उठो ते तै कबरेरे पासे दौवडतो तैस ठैरी कां जेव, ते तैड़ी तैनी लिकतां अन्तर तकू ते सिर्फ कफन तैड़ी लाव, ते एस गल्ली पुड हैरान भोइतां तैट्टां ज़लो जेव ।

🔍🔍🔍🔍🔍 🔍🔍🔍🔍 🔍🔍 🔍🔍

(🔍🔍🔍 16:12-13)

- 13 फिरी एरू भोवं कि तैन मरां दूई चले तैस दिहैड़ी एक्की इल्लोव्वेरे पासे ज़लोरे थिये, तैस इल्लोव्वेरू नवं इम्माऊस थियूं । तैन यरूशलेम नगरेरां 11 किलोमीटर दूर थियूं ।  
 14 तैना एप्पू मांमेई एस्से बारे मां गल्लां करते ज़लोरे थिये ज़ै बितना बीतोरी थी ।  
 15 ज़ैखन तैना गल्लन मां मसत थिये, ते एप्पू मांमेई गलबात लोरे थिये करेने त यीशु एप्पू तैन कां नेडे एइतां तैन सेई साथी-साथी ज़लने लगो ।  
 16 पन तैनेई यीशु न पिशानो किजाकि परमेशरे तैना पिशान्ने करां रोकोरे थिये ।  
 17 यीशुए तैन जो ज़ोव, "तुस लोक एप्पू मांमेई कुन गल्लां करेने लोरेथ?" तैना रुकी जे, ते तैन केरू तुतर उदास लेइहोने लग्गू ।  
 18 तैखन तै ज़ेसेरू नवं क्लियुपास थियूं, तैस सेई ज़ोने लगो, "यरूशलेम नगरे मां सिर्फ तू अक मैन्हु आस ज़ैस पतो नई कि, आखरी दिहाइन मां कुन-कुन भोने लोरूए ।"  
 19 यीशुए ज़ोव, "कुन लोरूए भोने?" तैनेई तैस सेई ज़ोव, "नासरत नगरेरो यीशु, ज़ै नबी थियो, ते परमेशरेरे ते मैन्हु केरे सामने कम्मन मां ते शिक्षा देने मां बेडि शेक्ति बालो थियो ।

20 तै प्रधान याजकेई ते हाकिमेई केन्चरे सेइ रोमी गवनरे हवाले कियो ते तैस जो कतलेरे हुक्म देइतां तै करूस पुइ च्चाढो ।

21 पन असन त उमीद थी कि ए मैनुए, जै इस्राएली लोकन रोमेरे राज्जे करां आज्जाद केरेलो, एन गल्लन अज्ज टलेइयोवं दिहाड़ीए ।

22 हुन्ना असन मरां किछ कुआन्शां अज्ज झेझां कबरी कां जोरी थी, तैन केरे ज़ोने सेइ असां हैरान भोए ।

23 ज़ैखन तैन लाश न मैल्ली त तैना एन ज़ोंती एई, असेई स्वर्गदूत लाए ते तैनेई ज़ोवं, कि यीशु ज़ोंतो भोरोए ।

24 तैखन किछ इश्शे साथी भी कबरी कां जे, ते ज़ेन्चरे कुआन्शेई ज़ोरू थियूं, तेरहु लाव पन यीशु न लाव ।”

25 यीशु तैन दूई चेलन सेइ ज़ोवं, “हे बेअकल लोकव! तुश्शे लेइ पवित्रशास्त्र मां नेवी केरि ज़ोरी गल्लन पुइ भी विश्वास केरनो केतरो मुशकले ।

26 कुन मसीहरे लेइ ज़रूरी न थियूं, कि दुःख झल्लले ते फिरी अपनि महिमा मां दाखल भोए?”

27 यीशु अपने बारे मां तैना सैरी गल्लां समझेइ, जैना पवित्रशास्त्रे मां मूसा करां दैते सारे नेवेई ज़ोरिन ।

28 एतरे मां तैना तैस डलव्वे नैडे पुजे ज़ैडी तैनेई गानू थियूं, तैनेई बुझ कि यीशु अगरोवं गानूए ।

29 पन तैनेई एन ज़ोइतां मजबूर कियो, “कि असन कां बिश किजोकि दिहाड़ी डुबोरीए आंधरू भोने बालूए ।” बस्सा तै बिशनेरे लेइ तैन सेइ साथी अन्तर चलो जेव ।

30 ज़ैखन तै तैन सेइ साथी रोट्टी खाने बिश्शो त तैनी रोट्टी ट्लाती ते बरकत देइतां टलोडी ते तैन देने लगे ।

31 तैखन तैन केरि एछ्छी खुल्ली ते तैनेई तै पिशानो, पन तै तैन करां आलोप भोइ जेव ।

32 तैना एणू मांमेई ज़ोने लगे, “ज़ैखन तै बत्तां असन सेइ साथी गल्लां लोरो थियो केरने, ते असन पवित्रशास्त्रेरो मतलब मसमझातो थियो, त असन केरी उमीद भोरी थी ।”

33 तैना तैखने तैट्टां उठे ते यरूशलेम नगरे मां आए ज़ैडी तैना यारहे चले ते होरे तैन केरे साथी एकवी टैरी मैल्ले ।

34 तैना ज़ोने लोरे थिये, “कि प्रभु सच्चे ज़ोंतो भोरोए ते शमौन पतरसे लाहोरोए ।”

35 तैनेई बत्तरी सेरी गल्लां शुनेई ते फिरी केन्चरे असेई यीशु रोट्टी टलोइते बार पिशानो ।

ⓂⓂⓂⓂ ⓂⓂⓂⓂ ⓂⓂⓂⓂ ⓂⓂⓂⓂ ⓂⓂⓂⓂ ⓂⓂⓂⓂ

(ⓂⓂⓂⓂⓂ 28:16-20; ⓂⓂⓂⓂⓂ 16:14-18; ⓂⓂⓂⓂⓂⓂⓂ 20:19-23; ⓂⓂⓂⓂⓂⓂⓂ 1:6-8)

36 तैना गल्लां केरने लोरे थिये त यीशु तैन केरे मझाटे खड़ा भोइतां ज़ोने लगे, “तुसन शान्ति मैल्ले ।”

37 पन तैना एतरे डेरि जे, कि तैना समझने लगे कि असां आत्मा लहने लोरेम ।

38 यीशुए तैन सेइ ज़ोवं, “तुस किजो डेरेंथ ते तुश्शे मने मां शक किजो भोतीए ।

39 मेरे हथ पाव हेरा अवं तैए आई, मीं हथ लेइतां हेरा, किजोकि आत्माई हड्डी त कने मास न भोए ज़ेरू तुस मीं मां लातथ ।”

40 एन ज़ोनेरे पत्ती तैनी अपने हथ पाव हिराए ।

41 पन खुशी सेइ तैन याकीन न भोवं, कि यीशु ज़ोंतोए, ते तैना हैरान भोए, यीशुए तैन सेइ ज़ोवं, “तुसन कां खाने जो किछ आए?”

42 तैनेई तैस ट्लाडोरी मेछलरो अक टुकडो दित्तो ।

43 तैनी ट्लाती ते तैन केरे सामने खाइ ।

44 तैनी तैन सेइ ज़ोवं, “ज़ैखन अवं तुसन सेइ साथी थियो, त मीं तुसन एना गल्लां ज़ोरी थी, कि मूसरे कानूने मां ते नेवी केरि किताबन मां ते भजना केरि किताबी मां मेरे बारे मां ज़ैन किछ लिखोरूए तैन पूरू भोनू ज़रूरीए ।”

45 तैखन तैनी तैन केरि मद्दत की, ताके पवित्रशास्त्रे सेमझी सखन ।

46 ते तैन सेइं ज़ोवं, “एन पवित्रशास्त्र मां लिखोरूए कि मसीह दुःख झैल्लेलो ते ट्लेइयोवं दिहाड़े मुड़दन मरां जीतो भोलो ।

47 ते तैसेरे नंव्वे सेइं यरूशलेम नगरेरां शुरू केरतां सैरी कौमन मां पापन करां मनफिरानेरे मैफारो प्रचार कियो गालो ।

48 किजोकि तुस एना सैरी गल्लां केरे गवाहथ ।

49 हेरा, अवं एप्पू तुसन पवित्र आत्मा देइलो, जेसेरो वादो बाजी परमेशरे कियोरोए । पन ज़ां तगर स्वर्गेरां शक्ति न मैल्ले तांतगर इस नगर मां राथ ।”

?????? ??????? ?? ???? ?

(?????? 16:19-20; ????????? 1:9-11)

50 फिरी यीशुए तैना नगरेरे बेइर बैतनिय्याह ड्लोव्वेरे नेड़े ने । ते अपनो हथ खडो केरतां तैन बरकत दित्ती ।

51 जैखन तै तैन बरकत देने लोरो थियो, त तैन करां अलग भोइ जेव ते परमेशरे तै स्वर्गे जो नीयो ।

52 चलेई तैसेरी आराधना की ते फिरी खुशी सेइं यरूशलेम नगरे जो वापस चले जे ।

53 ते तैना हर वक्त मन्दरे मां एइतां परमेशेरी तारीफ़ केरते थिये ।

## यूहन्ना

ॐ नमो भगवते वासुदेवाय ॐ नमो भगवते वासुदेवाय ॐ नमो भगवते वासुदेवाय ॐ नमो भगवते वासुदेवाय ॐ नमो भगवते वासुदेवाय

ॐ नमो भगवते वासुदेवाय ॐ नमो भगवते वासुदेवाय ॐ नमो भगवते वासुदेवाय ॐ नमो भगवते वासुदेवाय ॐ नमो भगवते वासुदेवाय

1 (दुनियारे रत्नरे पेडलो) शुरुआती मां वचन थियूं। तैन वचन परमेशरे सेइं साथी थियूं। तैन वचन परमेशर थियूं।

2 शुरुआती मां परमेशरे सेइं साथी तैन वचने थियूं।

3 सब किछ् वचनेरे जिरिये बनाव जेव। त जैन किछ् बनाव ज़ोवं, तैस मरां कोई भी चीज़ तैसेरे बगैर न बनाई जेई।

4 तैस (वचने) मां ज़िन्दगी थी; ते तै ज़िन्दगी सारे मैनन् लौ देचे।

5 त तै लौ आंधरे मां (हमेशा) चमकचे, त आंधरू लोई कधी केबू न केरि सके।

6 परमेशररी तरफां अक मैन्हू भेजो जेव, जेसेरू नवं यूहन्ना थियूं।

7 तै तैस लोअरे बारे मां ज़ोने ओरो थियो, ताके सब लोक तैसेरे जिरिये सेइं (तैस लोई पुड़) विश्वास केरन।

8 तै एप्पू लौ न थियो, पन लोअरे बारे मां लोकन गवाही देने ओरो थियो।

9 सच्च्ची लौ जै हर एककी मैन्हू (परमेशररे बारे मां ज़ान्नेरी) लौ देचे, तै दुनियाई मां एजनेवाली थी।

10 तैन वचन दुनियाई मां (ओरू) थियूं, त दुनिया तैसेरे जिरिये बनाई जेई, पन दुनियारे लोकेई तैन न पिशानू (कि तै कौन आए)।

11 तै अपने लोकन कां अव, पन तैसेरे अपने लोकेई तै कबूल न कियो।

12 पन ज़ेत्ते लोकेई तै कबूल कियो, तैनी तैनन् परमेशररे बच्चे भोनेरू हक दिन्तू; यानी सारे लोकन ज़ैना तैसेरे नंवे पुड़ विश्वास केरतन।

13 तैना न हाज-बव्चे सेइं, न मैन्हू केरे मेर्जी सेइं, न तैस मैनेरे मेर्जी सेइं जै बच्चे पैदा केरनेरी इच्छा रखते, बल्के परमेशररे मेर्जी सेइं पैदा भोरन!

14 तैन वचन मैन्हू बेनतां किछ् वक्त असन सेइं साथी रावं, ते (इस दुनियाई मां) डेरो कियो। तैनी असन पुड़ बडो अनुग्रह कियो ते परमेशररे बारे मां सारी सच्च्चाई हिराई। (जताली तै इडी थियो, तैखन) असेई तैसेरी महिमा लाई। (जेन्चरां की) तै अपने बाजी परमेशरे करां अव, त तैसेरी ज़ेरि महिमा कोन्ची मां नई थी।

15 यूहन्ने तैसेरे बारे मां गवाही दिन्ती, ते ज़ोरे सेइं लोकन सेइं ज़ोवं, “ई तै आए, जेसेरे बारे मां मीं ज़ोरू थियूं, कि जै मेरे बाद एज्जी राओरोए, तै मीं करां बडो महान आए, किजोकि तै मीं करां पेडलो थियो।

16 तैसेरी भरपूरी सेइं (यानी, तैसेरे सारे अनुग्रह ते सच्च्चाई सेइं) असन सेबन आशिर्वाद पत्ती आशिर्वाद मैल्लू।

17 मूसा नेबरे ज़िरिये असन कानून मैल्लो, पन यीशु मसीहरे ज़िरिये असन कां (परमेशरे करां) अनुग्रह ते सच्च्चाई पुज्जी।

18 परमेशर केन्चे कधी भी नई लावरो, पन तैसेरू अक्के मट्टू (यीशु) जैन बाजी परमेशररे कुम्मे मां आए, तैन्ने असन परमेशर हिराव।”

ॐ नमो भगवते वासुदेवाय ॐ नमो भगवते वासुदेवाय ॐ नमो भगवते वासुदेवाय ॐ नमो भगवते वासुदेवाय ॐ नमो भगवते वासुदेवाय

(ॐ नमो भगवते वासुदेवाय 3:1-12; ॐ नमो भगवते वासुदेवाय 1:1-8; ॐ नमो भगवते वासुदेवाय 3:1-18)

19 यूहन्ने यीशु मसीहरे बारे मां ई गवाही दिन्ती, (एकसां) जैखन यहूदी लोकां केरे लीडरेई यरूशलम नगरेरां यूहन्ना कां किछ् याजक त लेवी भेजे, त तैनेई तैस पुच्छ्, “तू कौन आस?”

20 यूहन्ने तैन सेइ सन्न ज़ोवं ते किछ भी छुपानेरी कोशिश न की, त तैनी तैन सेइ ज़ोवं, “अवं मसीह नई।”

21 तैखन तैनेई तैस पुच्छ, “फिरी तू कौन आस? कुन तू एलिय्याह नबी आस?” यूहन्ने तैनन् जुवाब दित्तो, “अवं तै नई।” तैनेई फिरी पुच्छ, “कुन तू कोई नबी आस?” तैनी जुवाब दित्तो, “नई।”

22 तैखन तैनेई तैस पुच्छ, “फिरी तू कौन आस? (असन ज़ो) ताके अस तैनन् जुवाब देम ज़ैनेई अस भेजोरेम। तू अपने बारे मां कुन ज़ोतस?”

23 तैनी जुवाब दित्तो, “जेन्चरे यशायाह नेवे (मेरे बारे मां) ज़ोरूए, तेन्चरे अवं सुनसान ठैरी मां लोकन हक देइतां ज़ोताई कि, ‘तुसन कां प्रभु एजनेबालो आए, तैसेरेलेइ बत तियार केरा।’ (यानी, प्रभुएरे लेइ तुस अपने दिल साफ केरा)”

24 फरीसी लोकां केरे तरफां किछ मैन्हु यूहन्ना कां भेजोरे थियो।

25 तैनेई यूहन्ना पुच्छ, “अगर तू न मसीह आस, न एलिय्याह, त न नबी, त फिरी (तीं कुन अधिकार आए) लोकन बपतिस्मो किजो देतस?”

26 यूहन्ने जुवाब दित्तो, “अवं त (लोकन) पैनी सेइ बपतिस्मो देताई, पन तुसन सेइ साथी रानेबालो अक एरो आए, जैस तुस हकीकित मां न पिशानथ।

27 ई तै आए, जै मेरे बाद एजनेबालो आए, तै मीं करां महान आए। अवं त तैसेरो गुलाम भोनेरे काबल भी नई कि तैसेरे बूटेरे तसमे खोल्ली।”

28 एना गल्लां, यरदन दरियारे पार बैतनिय्याह नगरे मां भोइ, जैड़ी यूहन्ना लोकन बपतिस्मो देतो थियो।

~~~~~

29 एग्री दिहाड़े यूहन्ने यीशु अपने पासे एइतो लाव, त तैनी यीशुएरे बारे मां लोकन सेइ ज़ोवं, “तक्का, परमेशेरे तरफां भेजोरू (बलिदानेरू) गवडू, ज़ैन सैरी दुनियारे लोकां केरे पाप नेते!

30 ई तै आए, जेसेरे बारे मां मीं ज़ोरू थियू कि, ‘अक मैन्हु मेरे बाद एजनेबालो आए, जै मीं करां बडो महान आए, किजोकि तै मीं करां पेइलो थियो।’

31 हुन्ना तगर अवं त एप्पू भी तैस पिशानतो न थियो। पन एल्हरेलेइ अवं (इड़ी) एजतां लोकन पैनी सेइ बपतिस्मो देताई, ताके तै मैन्हु इस्राएलेरे लोकन मां बांदो भोए।”

32 तैखन यूहन्ने लोकां केरे सामने गवाही दित्ती, “मीं पवित् आत्मा कबूतरेरे शकली मां अम्बेरेरां एइतो लाव, ते तै तैस पुइ बिशशो।

33 अवं त एप्पू पिशानतो न थियो कि यीशु हकीकित मां कौन थियो, पन परमेशेरे ज़ैनी अवं लोकन पैनी सेइ बपतिस्मो देने भेजो, तैनी मीं सेइ ज़ोवं, ‘जैस पुइ तू पवित् आत्मा एइतो त बिशतो लाएलो, तैए लोकन पवित् आत्मा सेइ बपतिस्मो देनेबालो आए।’

34 तै मीं लाव, त अवं तुसन गवाही देताई, कि ए मैन्हु परमेशेरेरू मट्टू आए!”

~~~~~

35 दुइयोवं दिहाड़े, फिरी यूहन्ना त तैसेरे चलन मरां दूई तैड़ी खडे भोरे थिये,

36 त यीशु तैलमेइं ज़लोरो थियो। जैखन यूहन्ने यीशु लाव, त तैनी यीशुएरे बारे मां अपने चलन सेइ ज़ोवं, “तक्का, इन परमेशेरे तरफां भेजोरू (बलिदानेरू) गवडू आए!”

37 जैखन यूहन्नारे दुइये चलेई एन शुन्, त तैना यीशु पत्ती ज़ले।

38 यीशुए बेदलोइतां तैना एइते लाए त तैन पुच्छ, “तुस केस लगेरेथ तोपने?” तैनेई ज़ोवं, “हे गुरू, तू कोइ रातस?”

39 तैनी तैन ज़ोवं, “ब्रला तुस एण्पू हेरेले ।” तैखन तैनेई गोइतां तैसेरे रानेरी ठार हेरी, ते तैस दिहाडे तैना तैस साथी राए । तै कोई इलोझी च़ेवरे बज़ां केरो मौको थियो ।

40 तैन दूई चेलन मरां, ज़ैना यूहन्नेरी गल्लां शुन्तां यीशु पत्ती ब्रलोरे थिये, अक अन्दिरयास थियो, ज़ै शमौन-पतरसेरो दूला थियो ।

41 तैनी पेइलू एन कम कियूं कि अपने दूला शमौन-पतरस तोप्तां तैस सेइं ज़ोवं, “असन मसीह मैलोरोए!” \*

42 तैखन अन्दिरयासे यीशु कां शमौन आनो । यीशुए तैसेरे पासे तकू ते ज़ोवं, “तू यूहन्नेरू मट्टू शमौन आस । पन अज़्जेरे बाद तेरू नवं कैफा भोलू ।” यूनानी भाषाई मां कैफारो मतलब “पतरस” आए । (एसेरो मतलब घोड़ ।)

43 होरसां दुइयोवं दिहाडे यीशुए गलील इलाके मां गानू चाव । तैनी फिलिप्पुस लेइतां तैस सेइं ज़ोवं, “मीं सेइं साथी ब्रल (ते मेरो चेलो बन) ।” (फिलिप्पुस यीशु सेइं साथी ब्रलो ।)

44 फिलिप्पुस बैतसैदा नगरे मां रातो थियो, ज़ैडी अन्दिरयास त पतरस भी राते थिये ।

45 तैल्ला पत्ती फिलिप्पुस गोइतां नतनएले सेइं मिलो त ज़ोने लगे, “असन मसीह मैलोरोए, ज़ेसेरे बारे मां (बड़े पेइले) मूसेरे कानूने मां लिखोरोए त कने नेबेई भी अपनि किताबी मां लिखोरोए । तै यूसुफेरू मट्टू नासरत नगरे बालो यीशु आए, ज़ै नासरत नगरेरो आए!”

46 नतनएले तैस सेइं ज़ोवं, “कुन नासरते मरां कोई रोडी चीज़ निस्पी सकतीए?” फिलिप्पुसे ज़ोवं, “एइतां एण्पू हेर ।” (त नतनएल फिलिप्पुसे सेइं साथी ब्रलो ।)

47 यीशुए नतनएल अपने पासे एइतो लाव ते तैनी तैसेरे बारे मां एन ज़ोवं, “ई असली इस्राएली मैन्हु आए, एसमां कोई पाखंड नई!”

48 नतनएले यीशु पुच्छू, “तू मीं केन्चरे ज़ानतस?” यीशुए तैस जुवाब दित्तो, “फिलिप्पुस तीं कुजाने करां पेइले ज़ैखन तू फेगेरे बुट्टे हैठ थियो, मीं तू तैडी लावरो थियो ।”

49 तैखन नतनएले ज़ोवं, “हे गुरू, (हुन्ना अवं ज़ानतां कि) तू परमेशेरेरू मट्टू आस! तू इस्राएल लोकां केरो राज़ो आस!”

50 यीशुए तैस जुवाब दित्तो, “कुन तू मीं पुड़ एल्हेरेलेइ विश्वास केरतस कि मीं तीं सेइं एन ज़ोवं, कि मीं तू फेगेरे बुट्टे हैठ लावरो थियो? तू इस करां भी वेड्डी-वेड्डी गल्लां लाएलो!”

51 फिरी तैल्ला पत्ती यीशुए ज़ोवं, “अवं तुसन सेइं सन्न-सन्न ज़ोताई कि, तुस स्वर्ग खुल्लू त कने परमेशेरेरे स्वर्गदूतन उबरे गाते त मैनेरे मट्टे पुड़, यानी मीं पुड़ उतरते लाएले ।”

## 2

**CHAPTER 2**

1 तैल्ला पत्ती, टलेइयोवं दिहाडे गलील इलाकेर काना नगरे मां केन्चरो इला थियो । यीशुएरी अम्मा भी तैडी थी ।

2 यीशु ते तैसेरे चेलन भी धाम कियोरी थी ।

3 ज़ैखन दाछेरो रस मुक्को, त यीशुएरी अम्मा तैस सेइं लगी ज़ोने, “एन कां दाछेरो रस मुकोरोए ।”

4 यीशु लगे ज़ोने, “अम्मा, मीं तीं सेइं कुन कम? हेजू मेरो वक्त नई ओरो ।”

5 तैसेरे अम्मा नौकरन सेइं ज़ोवं, “ज़ैन किछ यीशु तुसन सेइं ज़ोए, तैन्ने केरथ ।”

6 तैडी नेडे घोड़ां केरे शा (बड़डे) घड़े रखेरे थिये, ज़ैन मां दूई-दूई टलाई-टलाई मन (पानी) लगतू थियूं । यहूदी लोक अपने रुवाज़ेरे मुताबिक (अपने आपे त कने चीज़न) धोनेरे लेइ एन घड़े (मां पानी भरतां) इस्तेमाल केरते थिये ।

7 यीशुए नौकरन सेइं ज़ोवं, “घड़न मां पानी भरा ।” तैनेई पूरे घड़े भरे ।

\* 1:41 1:41 मसीह: यूनानी भाषाई मां मसीहेरो मतलब “ख्रिस्त” आए । (एसेरो मतलब “परमेशेरेरं तरफां भेजोरो राज़ो ।) ”



8 तैखन यीशुए तैन सेइं ज़ोवं, “हुन्ना, घडे मरां किछ पानी केढतां धामारे प्रधाने कां (चखनेरे लेइ) देथ। तैनेई तैस कां नेव।

9 ज़ैखन धामारे प्रधाने तैन पानी च़ख्बु, ज़ैन दाछेरो रस बनोरू थियूं, तैन थियो ज़ानतो कि एन कोट्टां ओरूए, पन नौकर ज़ानते थिये, ज़ैनेई तैन केढतां आनेरू थियूं। एल्हेरेलेइ धामारे प्रधाने लाडो कुजाव, ते तैस सेइं ज़ोवं,

10 ‘हर कोई मैन्हु (आम तौरै, धामी मां) पेइलो रोडो दाछारो रस देते, त ज़ैखन लोक पीतां रज़्जतन, त बादे मां घट रोडो ज़ेरो दाछारो रस देते, पन तीं रोडो हेजू पतरोवं रखोरो थियो!’ ”

11 गलील इलाकेरे काना नगरे मां यीशुए पेइलो चमत्कार कियो। एन केरतां तैनी अपनि महिमा बांदी की, त तैसेरे चलेई तैस पुइ (होरो भी जादे) विश्वास कियो कि तै मसीह आए।

12 तैल्ला पत्ती यीशु त तैरेरी अम्मा ते तैसेरे दूला ते कने तैसेरे चले कफरनहूम नगरे मां जे, ते किछ दिहाडे तैड़ी राए।

~~~~~

(~~~~~ 21:12-13; ~~~~~ 11:15-17; ~~~~~ 19:45-46)

13 ज़ेइस यहूदी लोकां केरू फ़सह तिहार नेडे अव, त यीशु यरूशलेम नगरे जो च़लो जेव।

14 त तैड़ी मन्दरेरे अंगने मां तैनी (बलिदानेरे लेइ) दांत, भेइडां त कबूतर बेचने वाले लाए त कने पेइसे बदलनेवाले भी अपने मेज़न पुइ विश्शोरै लाए।

15 तैखन तैनी रेस्सरो अक कोडो बनेइतां, तैनन् सेबन त भेइडां त दांत मन्दरे मरां बेइर कढे, त बुपारी केरे पेइसे (इरां उरां) शारे, त तैन केरे मेज़ उलटाए।

16 त कबूतर बेचनेवालन सेइं ज़ोवं, “इना इट्टां नेइ गाथ! मेरे बाजी केरे मन्दरे बुपारी लोकां केरू घर न बनाथ!”

17 ज़ैखन तैसेरे चलेई एन शूनू, त तैनन् याद अव कि (परमेशेरी किताबी मां) लिखोरूए कि (मसीहे परमेशेरे सेइं ज़ोवं) “तेरे घरेरे लेइ मेरी भक्ति, (हे परमेशेरे) मेरे अन्तर अगारी ज़ेरि ज़लतीए!”

18 तैखन यहूदी लोकां केरे किछ लीडेई तैस सेइं ज़ोने लगगे, “तू असन कोई निशान (चमत्कार) हिरा कि मन्दरेरे अंगने मरां लोकन कढनेरे लेइ तीं कां परमेशेरेरे तरफां अधिकार आए?”

19 यीशुए तैन जुवाव दित्तो, “एस मन्दरे डोला, ते अवं ट्लेइ दिहैइन मां एस (दुबारा) बनेइलो।”

20 यहूदी लोकेई यीशु जुवाव दित्तो, “कुन इस मन्दरे बन्ने मां 46 साल लगेरेन, कुन तू एस ट्लेइ दिहैइन मां (दुबारा) बनेइ सकतस?”

21 तैनेई गलत समझू यीशुए ज़ैस मन्देरी गल कियोरी थी, तै तैसेरी अपनि जान थी।

22 एल्हेरेलेइ (बादे मां) ज़ैखन यीशु (करूसे पुइ मरो त) मुइदन मरां जींतो भोव, त तैखन तैसेरे चलन याद अवं कि यीशुए (अपने मौत त कने जींतो भोनेरे बारे मां) असन ई गल ज़ोरी थी। त (एसैरे वजाई सेइं) तैनेई पवित्रशास्त्रे मां लिखोरी गल्लन पुइ त कने यीशु मसीहेरी ज़ोरी गल्लन पुइ होरो भी जादे विश्वास कियो।

~~~~~

23 ज़ताली यीशु फ़सह तिहारेरे मौके यरूशलेम नगरे मां थियो, त बडे लोकेई तैसेरे चमत्कार, ज़ैना तैनी किये, लेइतां तैस पुइ विश्वास कियो।

24 पन फिरी भी यीशुए तैन पुइ अतबार न कियो, किजोकि तै सेबभी केरो इन्सानी सोच ज़ानतो थियो।

25 तैस ए ज़रूरत न थी कि कोई मैन्हु तैस केन्ची होरि मैनेरे बारे मां ज़ोए, किजोकि तै (पेइले) मैन्हु केरि सोच ज़ानतो थियो।

## 3

???? ? ? ? ? ? ? ? ? ? ?

1 फरीसी लोकन मां अक मैन्हु थियो जेसेरू नवं नीकुदेमुस थियूं। तै यहूदी लोकां केरो अक लीडर थियो।

2 एक्की राती तै यीशु कां एइतां ज़ोने लगो, “हे गुरू, अस ज्ञानतम कि तू परमेशेरी तरफां गुरू भोइतां ओरोस; किजोकि ज़ैना चमत्कार तू हेरातस, होरो कोई न हेरेई सके, ज्ञातगर परमेशर तैस सेइं साथी न भोए।”

3 यीशुए जुवाब दित्तो, “अवं तुसन सेइं सन्न-सन्न ज़ोतां कि ज्ञातगर कोई मैन्हु दुबारो ज़र्म न धिन्ने, त तै परमेशेरू राज़ न लेई सके।”

4 नीकुदेमुस पुच्छने लगो, “ज़ैखन मैन्हु बुढो भोते, त तै केन्चरे सेइं दुबारो पैदा भोइ सकते? कुन तै अम्मारे पेटे मां गेइतां दुबारो ज़ेरमी सकते?”

5 यीशुए जुवाब दित्तो, “अवं तुसन सेइं सन्न-सन्न ज़ोताई कि ज्ञातगर कोई मैन्हु पैनी सेइं ते आत्माई सेइं पैदा न भोए, तै परमेशेरे राज़े मां दाखल न भोइ सके।

6 किजोकि हाज़-बव अपने बच्चन सिर्फ एस जानेरी ज़िन्दगी देइ सकतन, पन सिर्फ (पवित्तर) आत्मा लोकन आत्मिक ज़िन्दगी देइ सकते।

7 हैरान न भो कि मीं तीं सेइं कुन ज़ोवं कि, ‘तीं दुबारो ज़र्म धिन्नु ज़रूरीए।’

8 हवा ज़ेरां चलनू चातीए तैरां चलचे, त तू तैसारी आवाज़ त शुनतस, पन एन न ज्ञानस कि तै कोट्टां एइचे त कोरां गाचे। तेन्चरे कोई भी न हेरी सके त न समझी सके कि केन्चरां पवित्तर आत्मा लोकन (नव्वीं) ज़िन्दगी देते।”

9 तैखन नीकुदेमुसे पुच्छू, “एना गल्लां केन्चरे सेइं भोइ सेकतन पवित्तर आत्मा केन्चरां लोकन नव्वीं आत्मिक ज़िन्दगी देते?”

10 यीशुए तैस सेइं ज़ोवं, “तू इस्राएली लोकां केरो (अक खास) गुरू भोइतां भी कुन इना गल्लां न समझस?”

11 अवं तीं सेइं सन्न-सन्न ज़ोताई, ज़ैन अस ज्ञानतम तैन्ने (लोकन) ज़ोतम, त ज़ैन असेई लावरूए तैसेरे बारे मां (लोकन) गवाही देतम, पन फिर भी तुस लोक इशगी गवाही न मन्थ।

12 मीं त तुसन सेइं धेतांरी गल्लां केरे बारे मां गल की, त तुसेईं (मीं पुड़) विश्वास न कियूं, त अगर अवं स्वर्गेरी गल्लां ज़ोई त तुस केन्चरे विश्वास केरेले?

13 (स्वर्गेरी गल्लां ज़ान्नेरे लेइ कधी) कोई मैन्हु स्वर्गे मां नई जोरो, सिर्फ तैए ज़ै स्वर्गेरां ओरो, यानी अवं मैनेरू मट्टू ज़ैन स्वर्गे मां आईं।

14 ज़ेन्चरे मूसा सुनसाने मां (परमेशेरे लोकन बन्नानेरे लेइ पितल सेइं बनोरो) सप (खंभे पुड़) उच्चे पुड़ च़ढाव, तेन्चरे एन ज़रूरी आए कि (अवं) मैनेरू मट्टू भी उच्चे पुड़ च़ाढू गाए।

15 ताके ज़ै कोई तैस पुड़ विश्वास केरे, तैस हमेशारी ज़िन्दगी मैल्ले।”

16 “किजोकि परमेशेरे दुनियारे लोकन सेइं एतरो प्यार कियो कि तैनी अपनू अक्के मट्टू दित्तू, ताके ज़ै कोई तैस पुड़ विश्वास केरे, तै नाश न भोए, बल्के हमेशारी ज़िन्दगी हासिल केरे।

17 किजोकि परमेशेरे अपनू मट्टू दुनियाई मां एल्हेरेलेइ नई भेजोरू कि तै दुनियारे लोकन (तैन केरे पापां केरि) सज़ा दे, बल्के एल्हेरेलेइ कि दुनियारे लोक तैसेरे ज़िरिये सेइं (पापां केरि सज़ाई करां) मुक्ति हासिल केरन।

18 ज़ै तैस पुड़ विश्वास केरते, तैस सज़ा न मैल्ले। पन ज़ै मट्टे पुड़ विश्वास न केरे, तै पेइलोए दोषी भोइ जोरोए, किजोकि तैनी परमेशेरे अकैल्ले मट्टेरे नव्वे पुड़ विश्वास नई कियोरो।

19 परमेशर लोकन सज़ा देनेरी वजा ई आए कि ज़ैस जो लौ ज़ोतन तै दुनियाई मां ओरिए, परमेशेरे अपन लौ दुनियाई मां भेजी, पन लोक ते कने तैन केरां कम्मां बुरां थियां, एल्हेरेलेइ तैनेई तैस लोई करां जादे पापेरू आंधरू पसंद कियूं।

20 जै कोई बुरू कम केरते, तै लोई सेइं नफरत केरते त लोअरे नेडे न एज्जे, एरू न भोए कि तैसेरे कम्मन पुड़ दोष लाव गाए ।

21 पन हर कोई जै परमेशेरी सच्च्चाई पुड़ च़लते, तै लोई कां एइते, ताके लोई सेइं बांदो भोए कि तैसेरे सब कम्मां परमेशेरी शक्ति सेइं साथी किये गातन ।”

~~~~~

22 एना गल्लां केरे बाद यीशु त तैसेरे चले यहूदिया इलाके मां आए, त तैड़ी रेइतां लोकन बपतिस्मो देने लगगे ।

23 यूहन्ना भी शालेम नगरेरे नेडे ऐनोन नंब्वेरे ठैरी लोकन बपतिस्मो देतो थियो । किजोकि तैड़ी हच्छु पानी थियूं त लोक बपतिस्मो नेनेरे लेइ तैस कां एइते राते थियो ।

24 किजोकि यूहन्ना हेजू कैदखाने मां न थियो छ्इडोरो ।

25 एक्सां यूहन्नारे चेलां केरि केन्ची यहूदी मैन्हु सेइं (रुवाजरेर मुताबिक) शुद्ध भोनेरे बारे मां बेंस भोइ ।

26 एल्हेरेलेइ यूहन्नारे चले तैस कां एइतां ज़ोने लगगे, “हे गुरू, (तीं पतो आए) तै मैन्हु जै यरदन दरियारे पार तीं सेइं साथी थियो त कने तीं तैसेरे बारे मां गवाही दित्तोरी थी, हेर, तै भी लोकन बपतिस्मो देते त सब लोक तैस कां गातन!”

27 यूहन्ना जुवाब दित्तो, “तै रोड़ी गल आए, किजोकि) मैन्हु किछ् न हासिल केरि सके, ज़ांतगर तैस स्वर्गेरां (यानी परमेशेरे करां) न मैल्ले ।

28 तुस एप्पू मेरे गवाह आथ, कि मीं तुसन सेइं ज़ोरू थियूं कि अवं मसीह नई, पन अवं तैस करां पेइले (परमेशेरेरां तरफां) भेजोरोई ।

29 जेसेरी महरनीए त तै महरावे, पन महरावेरो दोस्त जै खडोए महरावेरी हर गल खुशी सेइं शुनतो रहते; हुनी मेरी ई खुशी पूरी भोइ । (कि सब लोक तैस कां गातन) ।

30 एन ज़रूरीए कि तै बधे ते अवं घैटी ।”

31 “(मसीह) जै स्वर्गेरां एइते तै होरि सेब्बन करां महान भोते । त जै मैन्हु धेरती पुडेरां भोते, तै धेर्तारोए त धेर्तारी गल्लां केरते । जै स्वर्गेरां एइते तै सेब्बना उच्चो महान भोते ।

32 तैनी (परमेशेरे तरफां) ज़ैन किछ् लाव ते शुनेरू, तैसेरे बारे मां लोकन शुनाते, पन तैसेरी गवाही कोई न शुने ।

33 जै कोई तैसेरी गवाही पुड़ विश्वास केरते, तै तैसेरी तसदीक केरते कि परमेशर सच्च्चो आए ।

34 किजोकि (मसीह) जै परमेशेरे भेजोरोए, तै परमेशेरी गल्लां ज़ोते, किजोकि परमेशर तैस पवित्तर आत्मा नैपतां न दे ।

35 (परमेशर) बाजी मट्टे सेइं प्यार रखते, त तैनी सब किछ् तैसेरे हावाले कियोरूए ।

36 जै (परमेशेरेरे) मट्टे पुड़ विश्वास केरते तैस हमेशारी ज़िन्दगी मैलचे, पन जै मट्टे पुड़ विश्वास न केरे तै ज़िन्दगी करां दूर रालो, ते तैस पुड़ परमेशेरो क्रोध (हुन्ना करां लेइतां हमेशा) राते ।”

4

~~~~~

1 फिरी ज़ैखन परभु पतो लगो कि फरीसी लोकेईं शुनोरूए, यीशु, यूहन्ना करां जादे चले बनाते ते बपतिस्मो देते ।

2 (हालांकी सच्च्च एन थियूं यीशु एप्पू नई बल्के तैसेरे चले बपतिस्मो देते थिये),

3 तैखन तैना यहूदिया इलाके शैरतां गलील इलाके जो च़ले जे ।

4 ते तैसेरू सामरिया इलाके मामेईं भोइतां गानू ज़रूरी थियूं ।

5 एल्हेरेलेइ तै सामरिया इलाकेरू सूखार नगर मां अव, तै ठार तैस ज़मीनेरे नेडे थी जै याकूबे अपने मट्टे यूसुफ दित्तोरी थी ।

6 याकूबे जैन खुह बनोरू थियूं तैन तैडी थियूं, ते यीशु सफर केरतां थकोरो थियो, ते तैस खुहे पुड बिग्रशो । तैखन दुपाहरां केरो मौको थियो ।

7 एत्रे मां अक सामरी कुआन्श तैडी पानी भरने आई । यीशुए तैस जो ज़ोवं, “मीं पानी पीया ।”

8 किजोकि तैसेरे चले रोट्टी आन्नेरे लेइ नगर मां जोरे थिये ।

9 तैस सैमरी कुआन्शां तैस जो ज़ोवं, “तू यहूदिस ते अवं त सामरी, तू मीं पानी पीयानेरे लेइ किजो ज़ोतस?” किजोकि यहूदी सैमरन सेइं मिलनू जुलनु न थिये सुखाते ।

10 यीशुए तैस जुवाब दित्तो, “अगर तू ज़ानेथी कि परमेशर तीं कुन देनू चाते, त एन भी ज़ानेथी कि, तीं करां कौन पानी मगने लोरोए, त तू तैस करां मगेथी, ते ते तीं ज़िन्दगरू पानी देथो ।”

11 तैस कुआन्शां ज़ोवं, “हे प्रभु, तीं कां पानी भरनेरे लेइ कोई भांड नई, ते खुह बडू डूघू आए, ते तीं ज़िन्दगरू पानी कोट्टां मैल्लू?”

12 कुन तू इग्रशे पूर्वज याकूबे करां भी बडडोस, ज़ैनी एन खुह असन दित्तेरूए, ते तैनी एण्पू भी ते तैसेरी औलादां ते तैसेरे गोरू गब्बेइं भी एस्से मरां पिव?”

13 यीशुए तैस जुवाब दित्तो, “जै कोई एस खुहे मरां पियेलो तैस फिर भी दलिश रानीए ।

14 पन ज़ै कोई तैन पानी पीते ज़ैन अवं देताई तै हमेशारे लेइ दलिशोरो न रालो, बल्के ज़ैन पानी अवं तैस देलो तैन तैस मां अक नाग बनेलो ज़ै पानी देतो रालो, ज़ैस सेइं तैस हमेशारी ज़िन्दगी मैलेली ।”

15 तैस कुआन्शां यीशु जो ज़ोवं, “हे प्रभु, मीं भी तैन पानी दे ताके मीं दलिश न लगगे ते मीं बार-बार पानी भरने इस खुहे पुड न एजनु पे ।”

16 यीशुए तैस जो ज़ोवं, “गा, अपनो मुन्श कुजा ।”

17 तैसां कुआन्शां जुवाब दित्तो, “मेरो कोई मुन्श नई ।” यीशुए तैस जो ज़ोवं, “तीं सन्न ज़ोवं, कि मेरो कोई मुन्श नई ।”

18 किजोकि तीं पन्न मुन्श बनोरेन ते ज़ैस सेइं साथी तू हुन्ना आस, ते तेरो मुन्श नई, तीं ज़ैन किछ ज़ोवं तैन सच्चे ज़ोरूए ।”

19 तैस कुआन्शा ज़ोवं, “हे प्रभु, मीं लगगते तू कोई नबी आस ।

20 इग्रशे दादे-पडदादेई इस पहाड़े पुड आराधना की, पन तुस यहूदी लोक ज़ोतथ कि ज़ैडी आराधना कियोरी लोइचे, तै ठार सिर्फ यरूशलेम आए ।”

21 यीशुए तैस कुआन्शी जो ज़ोवं, “हे कुआन्श, मेरी गल्लरो विश्वास केर, कि तै मौको भी एज्जी राहोरोए, कि तुस लोक बाजी केरि आराधना न त इस पहाड़े पुड केरेले ते न यरूशलेमे मां केरेले ।


22 तुस सामरी लोक ज़ेसेरी आराधना केरतथ तैस न ज़ानथ, पन अस यहूदी लोक ज़ेसेरी आराधना केरतम तैस ज़ानतम, किजोकि मुक्ति यहूदन मरां आए ।

23 पन तै मौको एज्जी राहोरोए बल्के ओरोए, ज़ैखन सच्चे भक्त बाजेरी आराधना आत्मा ते सच्चै सेइं केरेले, किजोकि बाजी एर ज़ेरे सच्चे भक्त तोपते ।

24 परमेशर आत्मा आए, एल्हेरेलेइ तैसेरे भक्त तैसेरी आराधना आत्मा ते सच्चै सेइं केरन ।”

25 कुआन्शां तैस सेइं ज़ोवं, “अवं ज़ानती कि मसीह, ज़ैस जो खिरस्त ज़ोतन एजनेबालोए, ज़ैखन तै एज्जेलो तै सब किछ समझालो ।”

26 तैखन यीशुए ज़ोवं, “अवं ज़ै तीं सेइं गल्लां लगोरोइं केरने तैए मसीह आई ।”



27 एत्रे मां तैसेरे चले आए ते तैनेई तै एक्की कुआन्शी सेइं गल्लां केरतो लेइतां हैरान राए, पन केन्चे तैस एन न पुच्छू, “तू कुन चातस?” या “एस कुआन्शी सेइं किजो गल्लां लगोरोस केरन?”

28 तै कुआन्श पेनेरो घड़ो तैडी छेडतां वापस नगर मां जेईं ते मैनु सेइं ज़ोने लगी ।

29 “एज्जा, एक्की मैन्हु सेइं मिला तैनी मीं सेइं सब किछ् ज़ोवं ज़ैन मीं अज़ तगर कियेरू थियूं, कुन ए तै मसीह त नईं?”

30 तैना मैन्हु नगर मरां निस्तां यीशु हेरनेरे लेइ तैसेरे पासे चलने लगे ।

31 यीशुएरे चले तैस कां मिनत केरने लगगे, “हे गुरु, रोट्टी खा ।”

32 पन यीशुए तैन सेइं ज़ोवं, “मीं कां खानेरे लेइ अक एरी रोट्टी आए, पन तुसन तैसेरे बारे मां कोई पतो नईं ।”

33 तैखन चले एप्पू मामेइं ज़ोने लगे, “कुन केन्वे पेइलू एसेरे लेइ किछ् खाने जो आनोरूए?”

34 यीशुए तैन सेइं ज़ोवं, “मेरी रोट्टी ईए कि, परमेशेरी मर्जी पूरी केरि ज़ैनी अवं भेजोरोईं ते तैन कम पूरू केरि ज़ैन तैनी दितोरूए ।

35 कुन तुस न ज़ोथ कि, फसल पकने हेजू ज़ेवरे महीन्न बाकिन? अवं तुसन जो ज़ोताईं कि, अपनि एछ्छी घाडा! ते एजनेबाले मैनन् हेरा, ज़ैना पक्कोरे ऊडारां केरि फसलारे ज़ेरे आन ।

36 फसल कटने बालन कम केरतां मज़दूरी मैल्ली राओरीए, यानी तैना लोकन अकोट्टे केरि राओरेन ज़ैना लोकन हमेशारी ज़िन्दगी हासिल केरेले, ताके ज़ै बते ते कटते साथी खुशी मनान ।

37 एल्हेरेलेइ अक कहावते कि बेनेबालो कोईए ते कटने बालो होरो कोईए, तैन सच्चे ।

38 मीं तुस भेजे कि गाथ तैस फसली कट्टा ज़ै तुसेईं नईं बेवरी, होरेईं मेहनती सेइं कम कियूं ते तुसन तैन केरि मेहनतरो फल मैल्लो ।”

~~~~~

39 नगरेरे बडे लोकेईं तैस सेमरी कुआन्थरी गल शुन्तां यीशु पुइ विश्वास कियो, किजोकि तैसां तैन लोकन सेइं ज़ोवं कि तैनी मीं सेइं सब किछ् ज़ोवं, ज़ैन मीं कियेरू थियूं ।

40 ज़ैस नगरेरे सामरी लोक यीशु कां ओरे थिये, मिनत केरतां ज़ोने लगे, असन कां विश्फिरी तै दूईं दिहाडे तैड़ी राव ।

41 होरे भी बडे लोक थिये ज़ैनेईं तैसेरी गल्लां शुन्तां तैस पुइ विश्वास कियो ।

42 तैनेईं तैस कुआन्थरी जो ज़ोवं, “असेईं तेरी गल्लां शुन्तां विश्वास नईं कियोरो, बल्के असेईं अपने कन्नेईं शुनेरूए ते असेईं एन हुनी बुझू कि ए मैन्हु सच्चे दुनियाईं मुक्ति देनेबालोए ।”

43 दूईं दिहैडना बाद यीशु फिरी गलीलेरे पासे चलो जेव ।

44 ते यीशुए एप्पू ज़ोरू थियूं, कि कोई नबी अपने मुलखे मां इज्जतरे काबल न समझो गाए ।

45 ज़ैखन तै गलीले मां अवं त गलीली लोक तैस सेइं खुशी सेइं मिले, एल्हेरेलेइ कि तैनेईं तैन सब किछ् ज़ैन तैनी फ़सहेरे मौके यरूशलेम नगरे मां कियेरू थियूं, तैनेईं अपनि एछ्छेईं सेइं लावरू थियूं तैखन तैना एप्पू भी तैड़ी थिये ।

~~~~~

46 दुइयोवं बार ज़ैखन तै गलील इलाकेरे काना इलव्वं मां ओरो थियो ज़ैड़ी तैनी पानी दाछ्छारो रस बनारो थियूं तैड़ी अक बडो बडो राजेरो अफसर थियो तैसेरू मट्टू कफ़रनहूम नगर मां विमार भोरू थियूं ।

47 ज़ैखन तैनी अफसरे शुनू कि यीशु यहूदिया इलाकेरां गलील इलाके मां ओरोए त तै यीशु कां पुजो ते मिनत केरतां ज़ोने लगे मेरू मट्टू मरने बालूए तू चल ते तैस बज्झा, किजोकि तैन मरने बालू थियूं ।

48 यीशुए तैस सेइं ज़ोवं, “ज़ांतगर तुस लोक निशान ते चमत्कार न लाएले कधे विश्वास न केरेले कि, अवं मसीह आई ।”

49 तैनी बड्डे अफसरे ज़ोवं, “प्रभु लूश केर एरू न भोए कि मेरू मट्टू मेरि गाए ।”

50 यीशुए जुवाब दितो, “चल तेरू मट्टू ज़ीतू भोनूए ।” तैनी तैसेरी गल्लरो विश्वास कियो ते तैट्ठां चलो जेव ।

- 51 तै हेजू बत्तां थियो त तैसेरे नौकर तैस मैल्ले ते ज़ोने लगे, “तेरू मट्टू ज़ीतूए।”
- 52 तैखन तै पुच्छने लगे, “मेरू मट्टू कैखन ज़ेरे बेज्जोने लग्गोरू थियू?” ते तैनेई ज़ोव “तैसेरो भुखार हीज दीसां एक्की बजे उतरी जोरो थियो।”
- 53 तैखन तैसेरे बाजी याद अवं कि, तैए मौको थियो, ज़ैखन यीशुए ज़ोरू थियू, “गा तेरू मट्टू ज़ीतूए।” तैखन तैनी भी ते तैसेरे पूरे टब्बरे यीशु पुड़ विश्वास कियो।
- 54 ई दुइयोवं चमत्कारोरो निशान थियो ज़ै यीशुए यहूदिया इलाकेरां वापस एजनेरां बाद गलील इलाके मां कियोरो थियो।

## 5

### 38

- 1 एन गल्लन पत्ती यहूदी केरू अक तिहार भोवं, ते यीशु यरूशलेम नगरे जो जेव।
- 2 यरूशलेम नगरे मां भेइडां केरे दारे कां अक हावदे, जैस जो इब्रानी भाषाई मां बैतहसदा ज़ोतन, तैसेरां पंज अंगना थियां।
- 3 एन मां बड़े विमार, काने, टोंटे, नीपाते (पानी हीलनेरे इंतज़ारे मां) भोते थिये।
- 4 (किजोकि वक्ते पुड़ परमेशेरो स्वर्गदूत हावदे पुड़ एइतां पानी हिलातो थियो, ते पानी हिलनेरां पत्ती ज़ै कोई पेइलो हवदे मां गातो थियो तै ठीक भोतो थियो, चाए तैसेरी कोई भी विमारी किना भोए)।
- 5 तैड़ी अक मैन्हु थू, ज़ै 38 सालां केरो विमार थू।
- 6 यीशुए तै तैड़ी बिशोरो लाव ते एन ज़ेनतां कि ए बड़ो ज़रोकनो इस हालती मांए, ते तैस पुच्छ, “कुन तू ठीक भोनु चातस?”
- 7 तैने विमारे जुवाव दित्तो, “हे परभु, मीं कां कोई मैन्हु नई, कि ज़ताली पानी हिलावं गाए त मीं कोई हावदे मां गाने लेइ मेरी मद्दत केरे, मेरे पुजते-पुजते तांतगर होरो कोई गाते।”
- 8 यीशुए तैस सेइं ज़ोवं, “उठ अपनि खट सल्ल ते चल फिर।”
- 9 तै मैन्हु तैखने ठीक भोवं, ते अपनि खट छुइतां चलने फिरने लगे।
- 10 ते आरामेरी दिहाड़ी थी एल्हेरेलेइ यहूदी लीडर तैस सेइं ज़ै ठीक भोरो थियो, ज़ोने लग्गे, “अज त आरामेरी दिहाड़ी आए, तीं खट छूनी जेइज नई।”
- 11 तेने तैन जुवाव दित्तो, “ज़ैने अव ठीक कियो, तैने मीं सेइं ज़ोवं, ‘अपनि खट छू ते चल फिर।’”
- 12 तेनेई तैस पुच्छ, “तै कौन मैनुए ज़ैने तीं सेइं ज़ोवं, ‘खट छुइतां चल फिर?’”
- 13 ज़ै ठीक भोरो थियो तै न थियो ज़ानतो कि तै कौन आए, किजोकि तैस ठैरी भीइ भोनेरे वजाई सेइं यीशु तैस ठैरां होरि पासे चुपचारे चलो जोरो थियो।
- 14 एन गल्लन पत्ती यीशु तै मन्देरे अंगने मां मैल्लो, यीशुए तैस सेइं ज़ोवं, “तक, तू ठीक भोरोस, फिरी पाप न करां, एरू न भोए कि, एस करां बड़डी आफत एज्जे।”
- 15 तैने मैने यहूदी लीडरन सेइं ज़ोवं, कि ज़ैने अवं ठीक कियोरोई तै यीशुए।
- 16 एल्हेरेलेइ यहूदी लीडर यीशु सताने लाए, किजोकि तै एरां ज़ेरां कम्मां आरामेरे दिहाड़े केरतो थियो।
- 17 एस पुड़ यीशुए तैन सेइं ज़ोवं, “मेरो बाजी यानी परमेशर हमेशा कम केरते, मीं भी कम कियोरू लोड़े।”
- 18 एस वजाई सेइं यहूदी लीडर मनां जादे तैस मानेरी कोशिश केरने लाए, किजोकि तै न सिर्फ आरामेरे दिहाड़ेरो हुक्म न थियो टलोतो बल्के परमेशरे अपनो बाजी ज़ोतो थियो ते अपनो आप परमेशेरे बराबर बनातो थियो।

19 यीशुए तैन सेइं ज़ोवं, “अवं तुसन सेइं सच्च-सच्च ज़ोताई, मट्टू यानी अवं एप्पू किच्छ न केरि बेटि, सिर्फ तैन ज़ैन बाजी परमेशेर करां केरतू लाताई, किजोकि ज़ैना-ज़ैना कम्मां बाजी करां केरतो लाते तैन मट्टू भी तैस्से तरीके सेइं केरते।

20 किजोकि बाजी, मट्टे सेइं प्यार केरते, ते ज़ैना-ज़ैना कम्मां तै एप्पू केरते, तैना सब मट्टे भी हिराते, ते तैन एस करां भी बड्डां कम्मां हिरालू, ताके तुस हैरान भोथ।

21 किजोकि ज़ेन्चरे बाजी मुड्डन ज़ीतो केरते, तेन्चरे मट्टू भी ज़ैस चाते तैस ज़ीतो केरते।

22 बाजी केन्चेरी इन्साफ न केरे, पन तैने इन्साफ केरनेरू सारू कम मट्टे दित्तेरूए।

23 कि सब लोक ज़ेन्चरे बाजेरी आदर केरतन तेन्चरे मट्टेरी भी आदर केरन, ज़ै मट्टेरी आदर न केरे, तै बाजी केरि ज़ैने तैन भेजोरूए तैसेरी आदर न केरे।

24 अवं तुसन सेइं सच्च ज़ोताई ज़ै मेरू वचन शुन्तां मेरे भेजने वाले पुड विश्वास केरते, हमेशारी ज़िन्दगी तैसेरीए, ते तैस पुड सज़ारो हुक्म न भोए, बल्के तै मौतरां पार भोइतां हमेशारे ज़िन्दगी मां दाखल भोते।”

25 “अवं तुसन सेइं सच्च-सच्च ज़ोताई, कि तै वक्त एजनेबालोए, बल्के हुन्नाए ज़ैस मां मुड्डे परमेशेरने मट्टेरी यानी मेरी आवाज़ शुनेले, ते ज़ैना शुनेले तैना हमेशा ज़ीएले।

26 किजोकि ज़ेन्चरे बाजी अपने आपे मां ज़िन्दगी रखते तेन्चरे तैने मट्टे भी ए अधिकार दित्तोरूए, कि अपने आपे मां ज़िन्दगी रखे एल्हेरेलेइ तैन मैनेरू मट्टूए।

27 बल्के बाजी परमेशेर तैस सेरी लोकां केरि आदालत केरनेरो भी अधिकार दित्तोरूए, एल्हेरेलेइ कि तैन यानी अवं मैनेरू मट्टू आई।

28 एसमां हैरान न भोथ, किजोकि तै वक्त एइते कि ज़ेत्ते कबरन मां आन तैसेरी आवाज़ शुन्तां ज़ीते भोनेन।

29 ज़ैनेई भलाई कियोरीए हमेशारे ज़िन्दगरी लेइ ज़ीते भोनेन ज़ैनेई बुरी ज़िन्दगी ज़ीयोरीए तैना सज़ारी लेइ ज़ीते भोनेन।”

### ~~~~~

30 “अवं अपने आपे सेइं किच्छ न केरि बेटि, ज़ेन्चरे मेरो बाजी मीं ज़ोते तेन्चरे अवं लोकां केरि आदालत केरताई, ते मेरी आदालत सच्च्चीए, किजोकि अवं अपने मेर्जी सेइं नई पन अपने भेजने बालेरी मर्जी सेइं चाताई।

31 अगर अवं अपनि गवाही एप्पू देई, त मेरी गवाही सच्च्ची नई।

32 अक होरो आए, यानी मेरो बाजी ज़ै मेरी गवाही देते, ते अवं ज़ानताई ज़ै गवाही तै मेरे बारे मां देते तै सच्च्चीए।

33 तुसेई मैन्हु यूहन्ना कां मेरे बारे मां पुच्छने भेजे, ते तैनी सच्च्चेरी गवाही दित्तोरूए।

34 पन अवं अपने लेइ मैनेरी गवाही न चैई, पन यूहन्ना ज़ै गवाही दित्ती तैसेरे बारे मां मीं एल्हेरेलेइ ज़ोवं ताके तुसन मुक्ति मैल्ले।

35 तै त बलतो ते चमकतो दीयेरो ज़ेरो थियो, पन तुसन थोडे चिरेरे लेइ तैसेरी लोई मां खुश भोन्नू रोड्डू लग्गू।

36 पन मीं कां ज़ै गवाहीए तै यूहन्नारी गवाही करां भी बड्डीए। किजोकि ज़ैन कम बाजे मीं केरनेरे लेइ दित्तेरू मतलब इन्ने कम्मां ज़ैना अवं केरताई, तैना मेरी गवाही देतन कि बाजे अवं भेजोरोई।

37 ते बाजी ज़ैने अवं भेजोरोई तैने मेरी गवाही दित्तोरूए, तुसेई न कधी तैसेरी आवाज़ शुनोरी, ते न तै आमने सामने लोरूए।

38 तुसेई तैसेरी शिक्षा अपने मने मां नई रखवोरी, किजोकि तुसेई मीं पुड विश्वास न कियो, कि अवं परमेशेर भेजोरोई।

39 तुस पवित्रशास्त्रे मां एन पढतथ, किजोकि तुस सोचतथ कि हमेशारी ज़िन्दगी तैस मां मैलतीए, तै ईए, ज़ै मेरे बारे मां गवाही देते।

40 फिरी भी तुस हमेशारे ज़िन्दगी हासिल केरनेरे लेइ मीं कां न एजन्नू चाथ।

- 41 अवं मैनन करां तारीफ़ न चैई ।  
 42 पन अवं तुसन ज्ञानताई तुशशे दिले मां परमेशेरे लेइ प्यार नई ।  
 43 अवं अपने बाजेरे अधिकारे सेइं ओरोई, ते तुस मेरी गल न मन्थ । अगर होरो कोई अपने अधिकारे सेइं एज्जे, त तैसेरी गल मन्नेले ।  
 44 तुस मीं पुड़ विश्वास न केरि बटथ, किजोकि तुस एक्की होरि करां तारीफ़ चातथ, ते तुस तै तारीफ़ न चाथ जै सिर्फ परमेशेरे तरफांए ।  
 45 इन न समझा कि अवं बाजेरे सामने तुसन पुड़ दोष लेइएलो, तुसन पुड़ दोष लानेवालोए त मूसोए, जैस पुड़ तुसेईं भरोसो रखवोरोए ।  
 46 किजोकि अगर तुसेईं मूसेरो विश्वास कियोरो भोथो, त मेरो भी विश्वास केरेथे, किजोकि तैने मेरे बारे मां लिखोरूए ।  
 47 तुस त तैसेरे कानूनेरे गल्लन पुड़ विश्वास न केरथ, ते फिरी तुस किजो मेरी गल्लन पुड़ विश्वास केरेले?”

## 6

ॐॐॐॐ 5000 ॐॐॐॐ ॐॐॐॐ ॐॐॐॐ

(ॐॐॐॐ 14:13-21; ॐॐॐॐ 6:30-44; ॐॐॐॐ 9:10-17)

- 1 एन गल्लन पत्ती यीशु गलीलेरे समुन्देरे मतलब तिबिरियुसेरे समुन्देरे पार जेव ।  
 2 ते अक बड़ी भीड़ तैस पत्ती चली, किजोकि जैना चमत्कार तै बिमारन पुड़ हीरतो थियो, ते तैना ठीक भोते थिए ते लोक एन हेरते थिए ।  
 3 तैखना यीशु पहाड़े पुड़ चढतां अपने चलन साथी तैड़ी विशशो ।  
 4 ते यहूदी केरे फ़सहेरू तिहार नेडू थियू ।  
 5 जैखन यीशुए अक बड़ी भीड़ अपने पासे एंडती लाई, त तैने फिलिप्पुसे सेइं ज़ोवं, “असां एना केरे लेइ रोट्टी कोट्टां घिन्म?”  
 6 पन तैनी तै गल तैस अज़मानेरे लेइ ज़ोई, किजोकि तै एप्पू ज्ञानतो थियो कि तै कुन केरेलो ।  
 7 फिलिप्पुसे तैस जुवाब दित्तो, “एन केरे लेइ 200 दीनारां केरि रोट्टी भी पूरी न भोली कि तैन थोड़ी-थोड़ी मैली गैली ।”  
 8 तैसेरे चलन मरां शमौन पतरसेरे दूलाए अन्दरयासे तैस सेइं ज़ोवं ।  
 9 “इड़ी अक मट्टूए जैस कां जोआं केरि पंच रोट्टिन, तै दूई मेछलीन, पन एत्ते लोकन जो कुन तैना पूरी भोनिन?”  
 10 यीशुए ज़ोवं, “लोकन विशाला ।” तैड़ी बड़ो घास थियो । तैखन लोक जैना लगभग 5000 मडद विशशारे थिये ।  
 11 तैखन यीशुए रोट्टी दलेइ ते शुकर केरतां बिशने बलना दित्तो, ते तेन्चरे मेछलीन मरां भी ज़ेत्ती तैना चातो थियो बेन्दी ।  
 12 जैखन तैना खेइतां रऊजे त तैनी अपने चलन सेइं ज़ोवं, “बन्नोरे टुकड़े अकोट्टे केरा, ताके किछ शारू न गाए ।”  
 13 ते तैनेई अकोट्टे केरे, ते जोआं केरे पंच रोट्टी केरे टुकड़न मरां जैना खाने बालन करां बन्नोरे थिए 12 टोकरे थिए ।  
 14 तैखन तै चमत्कार जै तैनी कियोरो थियो लोक हेरतां ज़ोने लाए, “तै नवी जै दुनियाई मां एजनेवालो थियो सच्चै ईए ।”  
 15 यीशुए एना ज़ेनतां कि एना मीं राजो बनानेरे लेइ दलानो चातन, फिरी तै अकैल्लो पहाड़े पुड़ जेव ।

ॐॐॐॐॐॐ ॐॐॐॐ ॐॐॐॐ ॐॐॐॐ

(ॐॐॐॐॐ 14:22-33; ॐॐॐॐॐ 6:45-52)



- 16 जैखन इलोझ भोइ, त तैसेरे चले समुन्दरेरे बन्ने जे ।
- 17 ते किशती मां च्छेढतां समुन्दरेरे पार कफरनहूम नगर जो चले, तैस वक्ते आंधरू भोरू थियू, ते यीशु हेजू तगर तैन कां न थियू ओरो ।
- 18 ते बड़ी तेज हवा चलोरी थी ते समुन्दरे मां छेल्ली उठने लेइ ।
- 19 जैखन तै लगभग ट्लाई च्चेवरे मील नेडे अव, त तैनेई यीशु समुन्दरे पुइ चलतो लाव ते किशतरे नेडे एइतो लाव ते डरे ।
- 20 पन यीशुए तैन सेइं ज़ोवं, “अवं आई डरा न ।”
- 21 ते तै तैस किशती मां च्छेढनेरे लेइ तियार भोव, ते तैखने किशती तैस ठैरी पुइ पुजी जैड़ी तैना चलोरे थिये ।
- 22 दुइयोवं दिहाडे तैस मैन्हु केरि भीड़ां जै समुन्दरेरे पार खडी थी, इन हेरतां कि एक्की किशतरे अलावा होरि कोई न थी, यीशु अपने चेलन साथी तैस किशती पुइ न च्छेढोरो थियो, पन सिर्फ तैसेरे चले थिये ।
- 23 (तैखन होरि किशती तिविरियुस नगरेरां तैस ठैरी एई, जैड़ी तैनेई प्रभुएरू शुकर केरतां रोट्टी खोरी थी)
- 24 एल्हेरेलेइ जैखन लोकेई हेरू कि इड़ी न यीशु ते न तैसेरे चले, ते तैना फिरी तैना निक्की-निक्की किशतन पुइ च्छेढतां यीशु तोपते कफरनहूम नगर ए पुजे ।
- 25 समुन्दरेरे पार जैखन तैना तैस मैल्ले त तैने ज़ोवं, “हे गुरू, तू इड़ी कताली अव?”
- 26 यीशुए तैन जुवाव दित्तो, “अवं तुसन सेइं सच्च-सच्च ज़ोताई, तुस मीं एल्हेरेलेइ न तोपथ कि तुसेईं चमत्कार लाव, बल्के एल्हेरेलेइ कि रोट्टी खेइतां रफ़्जे ।
- 27 नाश भोनेवेली रोट्टरे लेइ मेहनत न केरा । पन तैस रोट्टरे लेइ मेहनत केरा जै हमेशारी ज़िन्दगी देतीए, जै मैनेरू मट्टू यानी अवं तुसन देइलो, किजोकि बाजी परमेशरे मीं एन्चरां करनेरो अधिकार दित्तोए ।”
- 28 तैनेई तैस्से सेइं ज़ोवं, “परमेशेरू कम केरनेरे लेइ अस कुन केरम?”
- 29 यीशुए तैन जुवाव दित्तो, “परमेशर तुसन करां एन कम चाते कि तुस तैस पुइ यानी मीं पुइ विश्वास केरा जैनी अवं भेजोरोई ।”
- 30 तैखन तैनेई तैस सेइं ज़ोवं, “फिरी तू कुन निशान हीरातस कि अस तैस हेरतां तेरो विश्वास केरम? तू कोन ज़ेरू कम हीरातस?
- 31 इश्शे दादेई-पड़दादेई जंगले मां स्वर्गेरी रोट्टी खेइ, जैस जो मन्नो ज़ोतन । जेन्चरे पवित्रशास्तरे मां लिखोरूए, तैनी तैन खानेरे लेइ स्वर्गेरां रोट्टी दित्ती ।”
- 32 यीशुए तैन सेइं ज़ोवं, “अवं तुसन सेइं सच्च-सच्च ज़ोताई कि मूसा तुसन तै रोट्टी स्वर्गेरां न दित्ती, पन मेरो बाजी तुसन सच्च्ची रोट्टी स्वर्गेरां देते ।
- 33 किजोकि जै रोट्टी परमेशर देते, ते तै ईए जै स्वर्गेरां एइतां दुनियारे लोकन ज़िन्दगी देतीए ।”
- 34 तैखन तैनी तैस्से सेइं ज़ोवं, “हे प्रभु, ए रोट्टी असन स्वर्गेरां देतो रा ।”
- 35 यीशुए तैन सेइं ज़ोवं, “ज़िन्दगी रोट्टी (जै ज़िन्दगी देनेवाली रोट्टी) अक्वे आई, जै मीं कां एजते तै कधी निअन्नो न भोलो, ते जै मीं पुइ विश्वास केरेलो तै कधी टलिशोरो न भोलो ।
- 36 पन मीं तुसन सेइं पेइलू ज़ोरूए, कि तुसेईं अवं लोरोई फिरी भी मीं पुइ विश्वास न केरथ ।
- 37 जैन किछ बाजी मीं देते तैन सब किछ मीं कां एजनुए, ते जै कोई मीं कां एज्जेलो अवं तैस ज़ेरू कबूल केरेलो ।
- 38 किजोकि अवं अपनि मर्जी नई, बल्के परमेशेरी मर्जी पूरी केरनेरे लेइ स्वर्गेरां ओरोई जैनी अवं भेजोरोई ।
- 39 ईए मेरे बाजेरी मर्जी आए जैनी अवं भेजोरोई कि जैन किछ तैनी मीं दित्तोए तैस मरां अवं किछ न हिरई, पन आखरी दिहेड़ी फिरी तैस ज़ीतो केरेलो ।

40 किजोकि मेरे बाजेरी मर्जी ईए कि जै कोई मट्टे हेरे ते तैस पुड़ विश्वास केरे, तैस हमेशारी ज़िन्दगी मैल्ले, ते अवं तैस आखरी दिहैड़ी फिरी ज़ीतो केरेलो।”

41 एल्हेरेलेइ यहूदी लोक तैस पुड़ कुड़कुड़ाने लगगे, किजोकि तैनी ज़ोरू थियू, “जै रोट्टी स्वर्गंरां ओरिए तै अवं आई।”

42 ते तैनेई ज़ोवं, “कुन एन यूसुफेरू मट्टू यीशु नई, जेसेरे अम्मा बाजी अस ज्ञानतम? त तै केन्चरे ज़ोते कि अवं स्वर्गंरां ओरोई?”

43 यीशुए तैन जुवाब दित्तो, “एप्पू मामेई न कुड़कुड़ाथ।

44 कोई मीं कां न एज्जी बट्टे ज्ञातगर बाजी, जैनी अवं भेजोरोई, तैस मीं कां न आने, ते अवं तैस आखरी दिहैड़ी फिरी ज़ीतो केरेलो।

45 नेवी केरे पवित्रशास्त्रे मां एन लिखोरूए, तैना सब परमेशेरे तरफां शिखोरें भोनेन। जैनी बाजी करां शुनोरूए त शिखोरोरूए तै मीं कां एइते।

46 एसेरो मतलब ई नई कि केन्चे बाजी लोरोरूए, पन जै परमेशेरे तरफांए यानी मीं बाजी लोरोरूए।

47 अवं तुसन सेई सन्न-सन्न ज़ोताई जै कोई विश्वास केरते हमेशारी ज़िन्दगी तैसेरीए।

48 ज़िन्दगरी रोट्टी (ज़िन्दगी देनेवाली रोट्टी) अर्वे आई।

49 तुशुशे दादे-पड़दादेई जंगले मां मन्नो खाऊ ते मरे।

50 ई तै स्वर्गंरी रोट्टीए कि मैन्हु खान ते न मरन।

51 ज़िन्दगरी रोट्टी जै स्वर्गंरां ओरिए अर्वे आई। अगर कोई इस रोट्टी मरां खाए, त हमेशा ज़ीतो रालो, ते ज़ैस रोट्टी सेई दुनियारे लोकन हमेशारी ज़िन्दगी मैलचे, तैन मेरू मासे।”

52 एस पुड़ यहूदी लोक एप्पू मामेई बेंस केरने लाए, “ई मैन्हु असन अपनू मास केन्चरे खाने जो देइ बट्टे?”

53 यीशुए तैन सेई ज़ोवं, “अवं तुसन सेई सन्न-सन्न ज़ोताई, कि ज्ञातगर तुस मैनेरे मट्टेरू यानी मेरू मास न खाले, ते मेरो खून न पीले, तुसन हमेशारी ज़िन्दगी न मैलेली।

54 जै मेरू मास खाते ते मेरो खून पीते हमेशारी ज़िन्दगी तैसेरीए ते आखरी दिहैड़ी अवं फिरी तैस ज़ीतो केरेलो।

55 किजोकि हकीकत मां मेरू मास खानेरी चीजे ते मेरो खून पीनेरी चीजे।

56 जै मेरू मास खाते ते खून पीते तै मीं मां बनोरु राते, ते अवं तैस मां।

57 जेन्चरे ज़ीते बाजी अवं भेजोरोई, ते अवं बाजी केरे कारन ज़ोताई, तेन्चरे तै भी जै मीं खालो मेरे कारन ज़ीतो रालो।

58 जै रोट्टी स्वर्गंरां ओरिए, तैस रोट्टी जेरि नई जै तुशुशे दादे-पड़दादेई खाइ ते बादे मां मरे, पन जै कोई ई रोट्टी खालो तै हमेशा ज़ीतो रालो।”

59 इना गल्लां तैनी कफरनहूम नगरेरे एक्की प्रार्थना घरे मां ज़ोई।

~~~~~

60 एल्हेरेलेइ तैसेरे चलन मरां बडेई एन शुन्तां ज़ोवं, “ए शिक्षा सकते, एस कौन मेन्नी बट्टे?”

61 यीशु अपने मने मां एना बुझतां कि मेरे चले एस गल्ली पुड़ एप्पू मामेई कुड़कुड़ाने लोरें, तैन पुच्छू, “कुन इना गल्लां तुसन मीं पुड़ विश्वास केरने करां रोकतिन?”

62 अगर तुस मैनेरू मट्टू यानी अवं जैड़ी पेइलो थियो उबरे (स्वर्गं) गातो लाएले, त कुन भोलू?

63 परमेशेरी आत्मा त ज़िन्दगी देने वालीए, मैन्हु केरि ताकती सेई किछ न केरोए, जैना गल्लां मीं तुसन सेई ज़ोई तैना परमेशेरी आत्मां तरफां आन ते तैना ज़िन्दगी भी आन।

64 पन तुसन मां किछ एरे आन जैना विश्वास न केरन। किजोकि यीशु पेइलो ज्ञानतो थियो कि जैना विश्वास न थी केरते तैना कौन आन, ते तैस कौन टलवालो।

65 ते तैनी ज़ोवं, “एल्हेरेलेइ मीं तुसन सेई ज़ोरू थियू, ज्ञातगर बाजी केरे तरफां एन वरदान न मैल्ले तातगर कोई मीं कां न एज्जी बट्टे।”

?????? ???????

- 66 एस पुङ तैसेरे चेलन मरां बडे उलटे फिरे, ते तैल्ला पत्ती तैस साथी न चले ।
 67 तैखन यीशुए 12 चेलन सेइं ज़ोवं, “कुन तुस भी च़लू गानू चातथ?”
 68 शमौन पतरस तैस जुवाब दित्तो, “हे प्रभु अस केस कां गाम? हमेशारी ज़िन्दगरी देने बैली गल्लां त तींए कां आन ।
 69 ते असेई तीं पुङ विश्वास कियो ते ज़ानू कि तू परमेशेरो पवित्तर मैन्हु आस ।”
 70 यीशुए तैन जुवाब दित्तो, “कुन मीं तुस 12 न चुने । फिर भी तुसन मरां अक मैन्हु श्रैताने ।”
 71 तैने इन तैस शमौन इस्करियोतेरे मट्ठे यहूदा इस्करियोतेरे बारे मां ज़ोवं । हांलाकि तै तैन 12 चेलन मरां अक थियो, ज़ै यीशु दलुवाने बालो थियो ।

7

???? ?? ??????? ???

- 1 एना गल्लन पत्ती यीशु गलील इलाके मां फिरतो राव, किजोकि यहूदी लीडर तैस मारनेरी कोशिश केरि राओरे थिये, एल्हेरेलेइ तै यहूदिया इलाके मां फिरनू न चातो थियो ।
 2 यहूदी केरू झॉफडी केरू तिहार* (तेम्बु) नेडू थियू ।
 3 एल्हेरेलेइ तैसेरे दूलाएई तैस ज़ोवं, “इडी न रा । यहूदिया इलाके मां गा ज़ैडी तिहार मनाने लौरन, कि ज़ैना चमत्कार तू केरतस तैना तेरे तैना चले भी हेरन, ज़ैना यहूदिया इलाके मां रातन ।
 4 किजोकि एरो कोई न भोलो कि ज़ै मशूर भोनू चाए, ते छेपतां कम केरे । अगर तू कम केरतस, त अपने आप हिरा ।”
 5 किजोकि तैसेरे दूला भी तैसेरो विश्वास न थी केरते ।
 6 तैखन यीशुए तैन सेइं ज़ोवं, “मेरो लेइ ठीक वक्त हेजू नई ओरो, पन तुस केन्ची वक्त मां भी गेइ सकतथ ।
 7 इस दुनियारे लोक तुसन सेइं बैर न केरि सकन, पन मीं सेइं बैर रखतन किजोकि अवं तैन केरे खलाफ इन ज़ोताई कि तैना बुरां कम्मां केरतन ।
 8 तुस तिहारे मां गाथ, मीं हुना एस तिहारे मां नई एज्जू, किजोकि मेरो हेजू ठीक वक्त नई ओरो ।”
 9 ते तै तैन सेइं एना गल्लां केरतां गलीले मां राव ।

?????? ???? ??????? ??? ???? ?

- 10 पन ज़ैखन तैसेरे दूला तिहारे मां च़ले जे त तै बांदो न पन छेपतां जेव ।
 11 यहूदी लीडर तिहारे मां यीशु तोपने लाए । तैना लोकन पुछ्छी राओरे थिये, “तै मैन्हु कोडि आए?”
 12 ते लोकन मां तैसेरे बारे मां बल्हे-बल्हे बेडि गल्लां भोइ, किछ ज़ोते थी, “तै रोडो मैनुए ।” ते किछ ज़ोते थी, “नई तै मैनु गुमरा केरते ।”
 13 फिरी भी यहूदी लोकां केरे प्रधानां केरे डरे सेइं केन्ची भी मैन्हु तैसेरे बारे मां खुलतां तैसेरे बारे मां गल केरनेरी हिम्मत न भोइ ।

?????? ??? ??????? ???????

- 14 ज़ैखन तिहारेरे अध्ये दिहाड़े बीते, त यीशु मन्देरेरे अंगने मां गेइतां शिक्षा देने लगो ।
 15 तैखन यहूदी लीडरेई हैरान भोइतां ज़ोवं, “एनी त पवित्तरशास्त्रेरी शिक्षा केन्ची करां नई पढोरीए, फिरी एस केन्चरे एना गल्लां एई?”

* 7:2 7:2 झॉफडी केरू तिहार: इन तिहार यहूदी लोकां केरे दूलाई खास तिहारन मरां अक आए, ज़ैन यरूशलेम नगरे मां अठ दिहाड़न तगर मनाव गाते । बडे दूरेरां लोक यरूशलेम नगरे मां एइतां अकोट्ठे भोते थिये, तैना लोक निककी-निककी झॉफडी बनेइतां तैन मां रातन । तैस तिहारे मां तैना परमेशेरे याद केरतां खुशी मनाते थिये ।

16 यीशुए तैन जुवाब दित्तो, “मेरी शिक्षा मेरी अपनि नई, बल्के परमेशेरे तरफां आए, जैने अवं भेजोरोई।

17 अगर कोई तैसेरी मेर्जी पुड़ चलनू चाए, त तै इस शिक्षारे बार मां ज्ञानेलो कि ए परमेशेरे तरफां या अवं अपने तरफां ज़ोताई।

18 जै अपने तरफां किछ ज़ोते तै अपनि बड़याई चाते, पन जै अपने भेजने वालेरी बड़याई चाते तै ईमानदार आए, ते तैस मां कोई बेइमानी नई।

19 तुसन मूसे कानून दित्तो, पन तुसन मरां कोई भी तैस पुड़ न चले! पन तुस लोक मीं मारनेरी कोशिश केरतथ।”

20 लोकेई जुवाब दित्तो, “तीं पुड़ भूतेरो सैयोए! कौन तीं मारनेरी कोशिश केरते?”

21 यीशुए जुवाब दित्तो, “मीं अक चमत्कार कियो, ते तुस हैरान भोए।

22 एन्हरेलेइ मूसा तुसन खतनेरो हुक्म दित्तो (एना नई कि मूसेरे तरफांए बल्के बाप दादां करां चलतो ओरोए) ते तुस आरामेरे दिहाड़े मैनेरो खतनो केरतथ।

23 एन्हरेलेइ आरामेरे दिहाड़े मैनेरो खतनो कियो गाते ताके मूसेरे कानूनेरो हुक्म न टले, त तुस मीं पुड़ किजो करोध केरतथ, कि मीं आरामेरे दिहाड़े अक मैन्हु रोड़ेचारे ठीक केरो।

24 नुतर हेरतां इन्साफ न केरा बल्के ठीक-ठीक आदालत केरा।”

☞☞☞ ☞☞☞ “☞☞☞” ☞☞

25 तेखन किछ यरूशलेम नगरेरे रानेवाले एप्पू मामेई एक्की होरि पुच्छने लगे, “कुन ए तै नई, जैस मारनेरी कोशिश च़लोरिए?”

26 पन तक्का, तै त खुले आम गल्लां केरते, ते कोई एस किछ न ज़ोए। कुन लीडरेई सच्च़े, सच्च़े ज़ानू कि ए मसीहे?

27 पन ए मैन्हु मसीहे केन्च़रे भोइ सकते? एस त अस ज़ानतम कि ए कोट्टां ओरोए, पन ज़ेइस मसीहे एज्जेलो त कोई न ज़ानेलो कि तै कोट्टां एज्जेलो।”

28 तेखन यीशुए मन्देरे अंगने मां शिक्षा देते बारे ज़ोरे सेई ज़ोवं, “तुस मीं ज़ानतथ ते इन भी कि अवं कोट्टां ओरोई। अवं एप्पू नई ओरो, पन मेरो भेजने वालो सच्च़ोए, तैस तुस न ज़ानाथ।

29 पन अवं तैस ज़ानताई, किजोकि अवं तैसेरे तरफां ओरोई, ते तैनी अवं भेजोरोई।”

30 एस पुड़ लीडरेई ते ट्लानो चाव, फिरी भी केन्च़े तैस सेई हथ न लव, किजोकि तैसेरो मरनेरो वक्त हेजू न थियो ओरो।

31 फिरी भी भीड़ी मरां बड़े लोकेई तैस पुड़ विश्वास कियो, ते ज़ोने लाए, “मसीहे ज़ैखन एज्जेलो ते एट्टां जादे चमत्कार हिरालो ज़ैना एने हीराहे?”

☞☞☞ ☞☞☞☞☞☞☞☞☞☞☞☞

32 फरीसी लोकेई, लोक तैसेरे बारे मां बल्हे-बल्हे एना गल्लां केरते शुने, ते प्रधान याजकेई ते फरीसी लोकेई तैस ट्लानेरे लेइ मन्देरेरे पहरदार भेजे।

33 एस पुड़ यीशुए ज़ोवं, “अवं थोड़े च़िरे तगर हेजू तुसन साथी आई, फिरी अवं अपने भेजने वाले कां वापस गानोई।

34 तुस मीं तोपेले, पन अवं नई मैलनो, ते ज़ैडी अवं आई, तैडी तुस न एज्जी बटथ।”

35 एस पुड़ यहूदी लीडर एप्पू मामेई ज़ोने लगे, “ए कोरां च़लोरे, ज़ेरां अस न गेइ बटम? कुन ए तैन कां गालो ज़ैना यूनान नगरे मां तितर-बितर भोइतां रातन, ते यूनानेरे लोकन भी शिक्षा देलो?”

36 एस गल्लरो कुन मतलबे ज़ै एनी ज़ोई, कि तुस मीं तोपेले, पन अवं तुसन न मैलेलो, ते ज़ैडी अवं आई तैडी तुस न एज्जी बटतथ?

☞☞☞☞☞☞☞☞☞☞☞☞☞☞☞☞☞☞

37 तिहाररे आखरी दिहाड़े, ज़ै खास दिहाड़ी भोतीए, तेइस यीशु खडो भोइतां ज़ोने लगे, “अगर कोई ट्लिशशोरो भोए त मीं कां एज्जे ते पीये।

38 जै मीं पुड़ विश्वास केरे, जेन्चरे पवित्रशास्त्रे मां लिखेरूए, तैसेरे दिले मरां तै पैनेरे दरिया निस्सेले जैना जिनंदगी देतन ।”

39 यीशुए एना गल्लां पवित्र आत्मारे बारे मां ज़ोई, जै विश्वास केरेने बालन पुड़ एजनेवाली थी, किजोकि पवित्र आत्मा हेजू तगर न थी दित्तोरी, किजोकि यीशु हेजू तगर अपनि महिमा मां वापस न थियो जोरोए ।

40 तैखन मीं डी मरां किछेई एना गल्लां शुन्तां ज़ोवं, “सच्चे ई तै नबी आए, जेसेरे एजनेरी अस उमीदी मां आम ।”

41 किछ लोकेई ज़ोवं, “ई मसीहे,” पन किछेई ज़ोवं, “कुन मसीह गलील इलाकेरां एज्जोए?”

42 पवित्रशास्त्रे मां लिखेरू कि मसीह दाऊदरे खानदाने ते बैतलहम इलव्यें मरां एज्जेलो, ज़ैडी दाऊद राज़ो रातो थियो ।”

43 यीशुएरे बारे मां लोकां केरो अलग-अलग खियाल थियो, एल्हेरेलेइ तैन एप्पू मांमेइ अनबन भोइ ।

44 किछ तैन मरां तैस टलाने चाते थिये, पन केन्चे तैस सेइ हथ न लव ।

~~~~~

45 तैखन मन्दरेरे पहरदार, प्रधान याजकन ते फरीसन कां एडतां तैन सेइ ज़ोवं, “तुसेई तै किजो न आनो?”

46 पहरदारेई जुवाब दित्तो, “केन्चे मैने कधी एत्री रोडो गल्लां न कियोरी, जेरि गल्लां ए मैन्हु केरते ।”

47 फरीसेई तैन जुवाब दित्तो, “कुन तुस भी टेपलोरेथ?”

48 कुन सरदारन ते फरीसन मरां केन्चे तैस पुड़ विश्वास कियोरोए?

49 पन एन लोक जैना मूसेरे कानूने न ज़ानन् तैन पुड़ परमेशेरो फिटकार भोते ।”

50 नीकुदेमुसे ज़ै पेइलो तैस कां राती ओरो थियो, ते तैना मरां अक थियो, तैनी ज़ोवं,

51 “कुन इशे कानून केन्ची मैन्हु सज़ा देनेरी अज़ाज़त देते, ज़ांतगर तैसेरी गल शुन्तां इन न ज़ानम कि तै कुन केरते?”

52 तैनेई तैस जुवाब दित्तो, “कुन तू भी गलील इलाकेरो आस! पवित्रशास्त्रे मां तोप ते ज़ान, कि गलीलेरां कोई नबी त नई निसने बालो!”

53 (तैखन सब अपने-अपने घरे चले जे) ।

## 8

~~~~~

1 पन यीशु अपने चलन सेइं साथी ज़ैतून पहाड़े पुड़ जेव ।

2 होरसां तै झेझां-झेझां मन्दरेरे अंगने मां जेव, बड़े लोक तैस कां आए ते तै बिशतां तैन शिक्षा देने लगे ।

3 तैखन शास्त्री ते फरीसी लोक एक्की कुआन्शी ज़ै बदमेशी मां टलेइयोरी थी, तै मज़ाटे खड़ी केरतां यीशु सेइं ज़ोवं,

4 “हे गुरू, ई कुआन्श बदमाशी केरते वक्त टलोरीए ।

5 मूसेरे कानूने मां मूसा असन हुक्म दित्तोरोए कि एरी ज़ेरि कुआन्शी घोडेई बैइतां मारा, ते तू एस कुआन्शेरे बारे मां कुन ज़ोतस, कि अस एस कुन केरस?”

6 तेनेई यीशु परखनेरे लेइ ए गल ज़ोई, ताके तैस पुड़ दोष लाने जो गल मैल्ले । पन यीशु उन्हे लिक्तां एंगलोई सेइं ज़मीनी पुड़ लिखने लव ।

7 ज़ैखन तैना तैस पुछते राए, त तैनी उबरे तेकतां तैन सेइं ज़ोवं, “तुसन मरां ज़ैनी पाप न भोए कियोरोए, तैए पेइलो घोड़े बाए ।”

8 ते फिरी उन्हे लिक्तां एंगलोई सेइं ज़मीनी पुड़ लिखने लव ।

9 पन तैना एना शुन्तां बड्डन करां निकडन तगर सारे एक्की पत्ती अक तैट्टां जले जे, ते यीशु अकैल्लो राव, ते तै कुआन्श मझाटे खड़ी राई ।

10 यीशुए उबरे तेकतां तैस पुच्छू, “हे कुआन्श, तैना कोरां जे? कुन केन्चे तीं पुड सज्जारो हुक्म न दित्तो?”

11 तैसां ज़ोवं, “हे प्रभु केन्चे नई ।” यीशुए ज़ोवं, “अवं भी तीं सज्जारो हुक्म न देई । अपने घरे जो गा ते फिरी पत्ती पापेरी न ज़िन्दगी ज़ीयां ।”

???? ????????? ?? ??

12 यीशुए फिरी लोकन सेई ज़ोवं, “दुनियारी लौ अर्वें आई, ज़ै मीं पत्ती एज्जेलो त तै आंधरे मां न चलेलो, पन तै लौ हासिल केरेलो ज़ै ज़िन्दगरी देचे ।”

13 फरीसी लोकेई तैस सेई ज़ोवं, “तू अपनि गवाही एप्पू देतस, तेरी गवाही सच्ची नई ।”

14 यीशुए तैन जुवाब दित्तो, “भला अवं अपनि गवाही एप्पू देताई फिरी भी मेरी गवाही सच्चीए, किजोकि अवं ज़ानताई कि अवं कोट्टां ओरोई ते कोरां गाताई? पन तुस न ज़ानाथ कि अवं कोट्टां ओरोई ते कोरां गाताई ।

15 तुस इन्सानेरी सोचरे मुताबिक इन्साफ केरतथ, अवं केन्चेरी इन्साफ न केरि ।

16 ते अगर अवं इन्साफ केरि भी त मेरो इन्साफ सच्चोए, किजोकि अवं अकैल्लो नई, पन अवं ते मेरो बाजीए, ज़ैनी अवं भेजोरोई ।

17 मूसेरे कानूने मां भी लिखोरोए कि दूई ज़नां केरि गवाही मिलतां सच्ची भोतीए ।

18 अक त अवं अपनि गवाही देताई, ते दुइयोवं गवाही मेरो बाजी देते ज़ैनी अवं भेजोरोई ।”

19 तैनेई तैस पुच्छू, “तेरो बाजी कोडि आए?” यीशुए जुवाब दित्तो, “न तुस मीं ज़ानतथ न मेरे बाजी, अगर मीं ज़ानते त मेरे बाजी भी ज़ानते ।”

20 एना गल्लां तैनी मन्दरेरे अंगने मां शिक्षा देते भण्डार घरे मां ज़ोई, ते केन्चे तै न ट्लाव, किजोकि तैसेरो वक्त हेजू न थियो ओरो ।

???? ???? ???? ????????? ???????

21 यीशुए फिरी तैन सेई ज़ोवं, “अवं ज़ानताई कि तुस मीं तोप्पेले ते पाप केरते-केरते मरेले, ज़ैडी अवं गाताई तैडी तुस न एज्जी बटथ ।”

22 एस पुड यहूदी लीडरेई ज़ोवं, “कुन एने अपनो आप मारनोए, ज़ैन ज़ोते कि ज़ैडी अवं गाताई तैडी तुस न एज्जी बटतथ?”

23 यीशुए तैन सेई ज़ोवं, “तुस इस दुनियाई मां ज़मरिथ, अवं स्वर्गेरां ओरोई । तुस दुनियारेथ, अवं दुनियारो नई ।

24 एल्हेरेलेइ मीं तुसन सेई ज़ोरू थियू, कि तुस अपने पापन मां मरेले, किजोकि अगर तुस विश्वास न केरेले कि अवं तैए आई त अपने पापन मां मरेले ।”

25 यहूदी लीडरेई तैस सेई ज़ोवं, “तू कौन आस?” यीशुए तैन सेई ज़ोवं, “ज़ैन शुरु करां ज़ोतो ओरोई, अवं तैए आई ।

26 तुशे बारे मां मीं बडू किछ ज़ोनूए ते फैसलो केरनोए, पन मेरो भेजने बालो सच्चोए, ते ज़ैन मीं तैस करां शुनोरूए तैन दुनियारे लोकन सेई ज़ोताई ।”

27 तैनेई एन न समझू कि असन सेई बाजी केरे बारे मां कुन ज़ोने लोरोए ।

28 तैखन यीशुए ज़ोवं, “ज़ैखन तुस मैनेरे मट्टे यानी मीं उच्चे पुड चाढेले, त ज़ानेले कि अवं तैए आई, अवं अपने आपे सेई किछ न केरि, ज़ेन्चरे मेरो बाजी मीं शिखालते तेन्चरे तैना गल्लां केरताई ।

29 मेरो भेजने बालो मीं साथीए, तैनी अवं अकैल्लो नई शारोरो किजोकि अवं हमेशा तैन कम केरताई ज़ैस सेई तै खुश भोते ।”

30 बड़े लोकेई यीशुएरी तैना गल्लां शुन्ते वक्त जैना तै ज़ोई राओरो थियो तैस पुड़ विश्वास कियो ।

???? ???? ???? ???? ?

31 तैखन यीशुए तैन यहूदन सेइं जैनेई तैस पुड़ विश्वास कियोरो थियो ज़ोवं, “अगर तुस मेरे वचने मां बनेरे राले, त सच्चे मेरे चले भोले ।

32 तुस सच्च ज़ानेले ते सच्च तुसन आज़ाद करेलू ।”

33 तैनेई तैस जुवाब दित्तो, “अस त अब्राहमेरे औलादी मरां आम, ते कधी केन्चरे गुलाम नई भोरे, फिरी तू केन्चरे ज़ोतस कि तुस आज़ाद भोले?”

34 यीशुए तैन जुवाब दित्तो, “अवं तुसन सेइं सच्च-सच्च ज़ोताई कि ज़ै कोई पाप करते तै पापेरो गुलामे ।

35 गुलाम हमेशा घरे न रेइ सके, मट्टू हमेशा रहते ।

36 एल्हेरेलेइ अगर मट्टू तुसन आज़ाद करे त सच्चे तुस आज़ाद भोले ।

37 अवं ज़ानताई कि तुसा अब्राहमेरे औलादी मरां आथ, फिरी भी मेरी शिक्षा तुस मन्नथ, एल्हेरेलेइ तुस मीं मारने चातथ ।

38 अवं तैन्ने ज़ोताई ज़ैन मीं लव, ज़ैखन अवं अपने बाजी सेइं साथी थियो, ते तुस तैन्ने केरतथ ज़ैन तुसेईं अपने बाजी केरां शुनोरूए ।”

39 तैनेई तैस जुवाब दित्तो, “इश्शो पूर्वज त अब्राहमे ।” यीशुए तैन सेइं ज़ोवं, “अगर तुस अब्राहमेरे औलादी मरां भोथे त अब्राहमेरां ज़ेरां कम्मां केरथ ।

40 पन हुन्ना तुस मीं मारनो चातथ, किजोकि मीं तुसन तैना सच्च्नी गल्लां ज़ोई ज़ैना मीं परमेशेरे करां शुनी, एरू त अब्राहमे न थियू कियोरू ।

41 तुस अपने बाजेरां ज़ेरां कम्मां केरतथ ।” तैनेई तैस सेइं ज़ोवं, “अस बदमैशी सेइं नई ज़मारे, इश्शो अक्के बाजीए, ते तै परमेशेरे ।”

42 यीशुए तैन सेइं ज़ोवं, “अगर परमेशेर तुश्शो बाजी भोथो, त तुस मीं सेइं प्यार केरथ, किजोकि अवं परमेशेरेरे करां ओरोई, अवं अपने तरफां नई ओरो, बल्के तैनी भेजोरोई ।

43 तुस मेरी गल्लां किजो न समझथ? एल्हेरेलेइ कि तुस मेरी शिक्षा मन्नी न चाथ ।

44 तुस अपने बाजी शैतानेरेथ, ते तैसेरी मर्जी पूरी केरनि चातथ । तै त शुरु करां खूनी आए त सच्चे पुड़ बनोरो न राव, किजोकि सच्च तैस मां अथ्थी नई । ज़ैखन तै झूठ ज़ोते त अपने सुभावेरे मुताबिक ज़ोते, किजोकि तै झूठो बल्के झूठेरो बाजीए ।

45 पन अवं सच्च ज़ोताई तांए तुस मेरो विश्वास न केरथ ।

46 तुसन मां मीं कौन पापेरो दोष लाते? अगर अवं सच्च ज़ोताई त फिरी मेरो विश्वास की न केरथ?

47 ज़ै परमेशेरेरे तरफां भोते तै परमेशेरेरी गल्लां करते, ते तुस एल्हेरेलेइ न शुनथ किजोकि तुस परमेशेरेरे तरफां नई ।”

???? ? ? ?

48 एना शुन्तां यहूदेई तैस सेइं ज़ोवं, “कुन अस ठीक न थिये ज़ोते, कि तू सामरी मैन्हु आस, ते तीं मां भूते!”

49 यीशुए जुवाब दित्तो, “मीं मां भूत नई, पन अवं अपने बाजेरी इज़्जत केरताई, ते तुस मेरी निरादर केरतथ ।

50 पन अवं अपनि बड़याई न चैई, हाँ अक्के ज़ै चाते कि लोक मेरी बड़याई केरन, ते तै आदालत केरनेवालो भी आए ।

51 अवं तुसन सेइं सच्च-सच्च ज़ोताई कि ज़ै कोई मैन्हु मेरे वचने पुड़ चले तै कथे न मरेलो ।”

52 यहूदेई तैस सेइं ज़ोवं, “हुनी त असेईं बुझू, कि तीं मां भूते, अब्राहम ते नबी भी मरे, ते तू ज़ोतस, अगर कोई मेरे वचने पुड़ ज़ले त तै कधी न मरेलो।

53 इश्शो पूर्वज अब्राहम मरो, कुन तू तैस करां भी बड़डो आस? ते नबी भी मरे, तू अपने बारे मां कुन सोचतस कि तू कौन आस?”

54 यीशुए जुवाब दित्तो, “अगर अवं अपनि बड़याई केरि त मेरी बड़याई किछ भी नई। पन मेरी बड़याई करनेबालो मेरो बाजीए, ज़ैस तुस ज़ोतथ कि तै तुश्शो परमेशरे।

55 तुसेईं त तै न ज़ानो, पन अवं तैस ज़ानताई, अगर अवं ज़ोई कि तैस न ज़ैनी, त तुश्शो ज़ेरो झूटो भोइ। पन अवं तैस ज़ानताई ते तैसेरे वचने पुड़ ज़लताई।

56 तुश्शो पूर्वज अब्राहम मेरी दिहाड़ी हेरनेरे उमीदी पुड़ बड़ी खुश थियो, ते तैनी हेरी, ते खुश भोव।”

57 यहूदेई तैस्से सेइं ज़ोवं, “हेजू तू 50 साला केरो भी नई भोरो फिरी भी तीं अब्राहम लोरोए?”

58 यीशुए तैन सेइं ज़ोवं, “अवं तुसन सेइं सन्न-सन्न ज़ोताई कि अब्राहम पैदा भोने करां पेइलो, अवं आई।”

59 तैखन तैनेईं तैस मारनेरे लेइ घोड़ सल्ले, पन यीशु छेपतां मन्दरे मरां निस्सी जेव।

9

CHAPTER 9

1 फिरी यीशुए अपने चलन सेइं साथी ज़लोरो थियो, ते तैनेईं अक मैन्हु लाव, ज़ै ज़र्मनेरो कानो थियो।

2 तैसेरे चलेईं तैस पुच्छू, “हे गुरू, केने पाप कियो कि ए कानो ज़रमो, एने मैने या एसेरे अम्मा बाजे?”

3 यीशुए जुवाब दित्तो, “न एने पाप कियो, न एसेरे अम्मा-बाजेईं, पन तै एल्हेरेलेइ कानो ज़रमो ताके परमेशरेरे चमत्कार एसमां लेईहोन।

4 ज़ैने अवं भेजोरोई, असेईं तैसेरू कम लूशी केरनू ज़रूरीए, ज़ैन कम तैनी असन दित्तोरूए, तै रात एजने बालीए ज़ैस मां कोई भी कम न केरि सके।

5 ज़ांतगर अवं दुनियाई मां आई, अवं दुनियारी लौ आई।”

6 एन ज़ोइतां तैनी ज़मीनी पुड़ थुकू, ते तैस थुके सेइं मित्ती सन्नी, ते तै मित्ती कानेरे एच्छन पुड़ लाई।

7 ते तैस सेइं ज़ोवं, “गा शीलोह नंव्वेरे हावदे मां अपनू तुत्तर धो” (शीलोहेरे मतलब भेजरो) तैनी गेइतां धोवं, ते लांतो वापस अव।

8 तैखन तैस मैनेरे पड़ोसेईं त ज़ैनेईं तै भीख मगतो लावरो थियो, एक्की होरि सेइं ज़ोने लगगे, “कुन ई तैए मैन्हु नईं ज़े पेइलो विशतां भीख मगतो थियो?”

9 किछ मैन्हु ज़ोने लाए, “ई तैए,” होरेईं ज़ोवं, “नईं तैसेरो ज़ेरो कोई होरो भोनाए,” तैनी ज़ोवं, “अवं तैए आई।”

10 तैखन तैना तैस पुच्छने लगगे, “तेरी एच्छन केन्चरां लौ आई?”

11 तैनी जुवाब दित्तो, “यीशु नंव्वेरे एक्की मैने मित्ती सन्नी, ते मेरी एच्छन पुड़ लेइतां मीं सेइं ज़ोवं, गा शीलोह हावदे मां गेइतां अपनू तुत्तर धो, ते अवं जेव ते मीं तुत्तर धोवं, ते लाने लाव।”

12 तैनेईं तैस पुच्छू, “तै मैन्हु कोइ आए?” तैनी ज़ोवं, “मीं नईं पतो।”

13 लोकेईं तै ज़े पेइलो कानो थियो फरीसी लोकन कां नेव।

14 ज़ैस दिहाड़े यीशुए मित्ती सैनतां तैसेरी एच्छी लौ दित्तो थी, तै आरामेरी दिहाड़ी थी।

15 फिरी फरीसी लोकेईं भी तैस पुच्छू, “तैसेरी एच्छन लौ केन्चरे आई?” तैनी तैन सेइं ज़ोवं, “तैनी मेरी एच्छन पुड़ मित्ती लाई, फिरी मीं तुत्तर धोवं, ते अवं हुनी लाताई।”

16 एस पुड़ किछ फरीसी लोक ज़ोने लगे, “ए मैन्हु परमेशेरे तरफां नई, किजोकि ए आरामेरी दिहाड़ी न मन्ने ।” होरेई ज़ोवं, “एरो ज़ेरो पापी मैन्हु एरे चमत्कार केन्चरे हिरेई बटते?” ते तैन एप्पू मांमेइ अनबन भोइ ।

17 तैनेई काने फिरी पुच्छ, “ज़ैने तेरी एच्छे खोलोरेन, तू तैसेरे बारे मां कुन ज़ोतस?” तैनी ज़ोवं, “तै नबी आए ।”

18 पन यहूदी लीडरन विश्वास न भोव, कि तै कानो थियो ते हुनी लाते, ज़ांतगर तैनेई, तैसेरे अम्मा-बाजी न कुजाए ।

19 तैन पुच्छ, कुन एन तुशू मट्टूए, “ज़ैस तुस ज़ोतथ कि कानो ज़र्मो रू थियू? फिरी हुना केन्चरां लाते?”

20 तैसेरे अम्मा बाजीए जुवाव दित्तो, “असां त ज़ानतम कि एन इशू मट्टूए, ते कानो ज़र्मो रू थियू ।

21 पन अस इन न ज़ानतम कि अज केन्चरे लाते, ते न इन ज़ानतम कि केने एसेरी एच्छेन लौ दित्तो, एन हुनी बड्डूए एस पुछ्छा, ए अपने बारे मां एप्पू ज़ोलो ।”

22 एना गल्लां तैसेरे अम्मा बाजे एल्हेरेलेइ ज़ोई तेना यहूदी लीडरन करां डरते थिये, किजोकि यहूदी लीडर सारे अक भोरे थी, कि अगर कोई ज़ोए, कि ए मसीहे त तै प्रार्थना घरे मरां कड्डो गाए ।

23 एल्हेरेलेइ तैसेरे अम्मा बाजे ज़ोवं, “एन बड्डूए, एस्से पुछ्छा ।”

24 तैखन तैस मैन्हु ज़ै कानो थियो, दुइयोवं वार कुजेइतां ज़ोवं, “सच्च ज़ोइतां परमेशेरेरी बड्डयाई केर, अस ज़ानतम तै मैन्हु पापीए ।”

25 तैनी जुवाव दित्तो, “अवं न ज़ैनी कि ए पापी कि नई, अवं अक गल ज़ानताई, कि अवं कानो थियो हुनी लाताई ।”

26 तैनेई तैस पुच्छ, “तैने तीं सेइं कुन कियू? तैनी केन्चरे तेरी एच्छेन लौ दित्तो?”

27 तैनी तैन सेइं ज़ोवं, “मीं त तुसन सेइं ज़ोवरूए, ते तुसेईं न शुनु, हुनी दुइयोवं वार किजो शुनु चातथ? कुन तुस भी तैसेरे चले बन्ने चातथ?”

28 तैखन तैना तैस बुरू भलू ज़ोने लाए, “तूए तैसेरो चेलोस, अस त मूसेरे चलेम ।”

29 अस ज़ानतम परमेशेरे मूसा सेइं गल्लां की, पन एस न ज़ानम कि ए कोट्टां ओरोए ।

30 तैनी तैन जुवाव दित्तो, “ए त बडी बड्डी गल्ले कि तुस न ज़ानाथ कि ए कोट्टां ओरोए, फिरी भी तैनी मेरी एच्छेन लौ दित्तो ।

31 अस ज़ानतम की परमेशर पापी केरि न शुने, पन कोई परमेशेरो भक्त भोए त तैसेरे मेर्जी पुड़ च़लतो भोए, त परमेशर तै तैसेरी शुनते ।

32 दुनिया रचनेरे वक्ते करां कथे शुन्ने मां नई ओरोए कि केन्चे ज़र्मनेरे कानेरी एच्छेन लौ दित्तोरी,

33 अगर ए मैन्हु परमेशेरे तरफां न भोथो त किछ न केरि सकेथो ।”

34 तैनेई तैस ज़ोवं, “तू त बिलकुल पापन मां ज़र्मोरोस, तू असन शिखालतस?” ते तैनेई तै प्रार्थना घरे मरां बेइरोवं कड्डो ।



35 यीशुए शुनु कि तै बेइरोवं कड्डोरोए, ते ज़ैखन तैसेरी तैस सेइं मुलाकात भोइ, त तैस सेइं ज़ोवं, “कुन तू मैनेरे मट्टे पुड़ विश्वास केरतस?”

36 तैनी तैस जुवाव दित्तो, “हे प्रभु, मीं सेइं ज़ो कि तै कौने, ताके अवं तैस पुड़ विश्वास केरि?”

37 यीशुए तैस सेइं ज़ोवं, “अवं आई, तीं अवं पइलो लोरोई, ज़ै तीं सेइं गल्लां केरि राओरोए ।”

38 तैनी ज़ोवं, “हे प्रभु, अवं तीं पुड़ विश्वास केरताई ।” ते तैस कां मथ्यो टेको ।

39 तैखन यीशुए ज़ोवं, “अवं इस दुनियाई मां ई इन्साफ केरने ओरोई, ज़ैना न लान तैना लान, ते ज़ैना लातन तैना काने भोन।”

40 ज़ैना फरीसी लोक तैस सेई साथी थिये तैनेई ज़ोवं, “कुन तू असन जो भी काने ज़ोतस?”

41 यीशुए तैन सेई ज़ोवं, “अगर तुस काने बोथे त पापी न बोथे, पन हुनी ज़ोतथ कि अस लातम, एल्हेरेलेइ तुशे पाप माफ़ न भोले।”

10

????? ?? ????????? ???? ?????

1 “अवं तुसन सेई सच्च-सच्च ज़ोताई, कि ज़ै कोई दारेरे बत्तां बाड़े मां न गाए, पन होरि बत्तां गाते, तै चोर ते डैकूए।

2 पन भैड्डां केरो पुहाल दारेरे बत्तां गाते।

3 तैसेरेलेइ दरबान दार खोलते, ते भैड्डां तैसेरी गल पिशैनतिन, ते तै अपनि भैड्डन नंवे सेई कुजाते ते बेइर नेते।

4 ते ज़ैखन तै अपनि सैरी भैड्डां बेइर कढते, त तैन केरे अग्री-अग्री चलते, ते भैड्डां तैस पत्ती-पत्ती गैतिन, किजोकि तैना तैसेरी आवाज़ पिशैनचन।

5 तैना बखले पत्ती न गैली, पन तैस करां नशेली, किजोकि तैना बखलेरी आवाज़ न पिशानन्।”

6 यीशुए तैन सेई मिसाल देइतां ज़ोवं, पन तैनेई न समझू कि एसेरी गल्लां केरो कुन मतलबे, ज़ैना तै असन सेई ज़ोते।

7 तैखन यीशुए तैन सेई फिरी ज़ोवं, “अवं तुसन सेई सच्च-सच्च ज़ोताई, भैड्डां केरू दार अवं आई।

8 ज़ेत्तरे मीं करां पेइले आए सब चोर ते डैकून, पन मेरी भैड्डेई तैन केरि न शुनी।

9 दार अवं आई, अगर कोई मेरे ज़िरिये अन्तर गालो, त परमेशर तैस मुक्ति देलो, ते तै अन्तर बेइर एइतो गालो ते खुराक पालो।

10 चोर होरि कोन्वी कम्मरे लेइ न एज्जे, बल्के चोरी केरने ते मारने ते नाश केरने एइते, अवं एल्हेरेलेइ ओरोई कि तैन भरपूर ज़िन्दगी ज़ीन।

11 रोडो पुहाल अवं आई, रोडो पुहाल भैड्डां केरे लेइ अपनि जान देते।

12 ज़ैखन नौकर गिद एंडत् लाते त ते भैड्डां शैरतां नेश्शी गालो। किजोकि तै तैन केरो न पुहाले न मालिके, ते गिद तैन पुड़ हमलो केरतां तितर-बितर केरते।

13 तै एल्हेरेलेइ नशते कि तै नौकर आए, ते तैस भैड्डां केरि फिकर नई।

14 रोडो पुहाल अवं आई, अवं अपनि भैड्डां पिशानताई, ते मेरी भैड्डां मीं पिशैनचन।

15 ज़ेन्बरे बाजी मीं ज़ानाते, तेन्बरे अवं भी तैस ज़ानताई, ते अवं भैड्डां केरे लेइ अपनि जान देताई।

16 ते मेरी होरि भी भैड्डन, ज़ैना इस बाड़े मां नई, मीं तैना भी एनिन ज़रूरिन, तैना मेरी आवाज़ पिशैनेली, फिरी अक्के डेरो ते अक्के पुहाल भोनोए।

17 अवं अपनि जान देताई, एल्हेरेलेइ बाजी मीं सेई प्यार केरते, कि अवं फिरी जीतो भोई।

18 कोई मेरी ज़िन्दगी मीं करां न थसोडे, बल्के अवं एप्पू देताई, मीं तैस देनेरू भी अधिकारे ते नेनेरो भी अधिकारे, ई हुक्म मीं मेरे बाजी करां मैलोरोए।”

19 एल्लां पत्ती, यहूदन मां फिरी अनबन भोइ।

20 तैन मरां बड़े ज़ोनो लाए, “तैस मां भूते, ते तै पागले, तैसेरी किजो शुनातथ?”

21 होरे लोकेई ज़ोवं, “एना गल्लां एरे मैनेरी नई ज़ैस मां भूत भोए, कुन भूत कांना केरि एछ्छी खोल्ली बटते?”

????? ???? ?????????

22 यरूशलेम नगर मां तिहार भोवं, ते हीवतडेरो मौसम थियो।

23 यीशु सुलैमानेरे मन्देरे अंगने मां हंटने फिरने लगगोरो थियो ।

24 तैखन यहूदेई तै घेरो ते पुञ्छू, “तू केइस तगर इशे दिले डामाडोल केरतस? असन सेइं साफ-साफ ज़ो । कुन तू मसीह आस?”

25 यीशुए तैन जुवाव दित्तो, “मीं तुसन सेइं ज़ोवं पन तुस विश्वास न केरथ । ज़ैना कम्मां अवं अपने बाजी केरे अधिकारे सेइं केरताई तैना मेरे गवाह आन ।

26 पन तुस एल्हेरेलेइ विश्वास न केरथ कि मेरी भैडन मरां नई ।

27 मेरी भैडनां मेरी आवाज़ पिशैनचन, अवं तैन ज़ानताई, ते तैना मीं पत्ती-पत्ती ज़ेलचन ।

28 ते अवं तैन हमेशारी ज़िन्दगी देताई, तैना कधी नाश न भोले, ते कोई तैन मेरे हथ्थे मरां न थसोड़ी सके ।

29 मेरो बाजी, ज़ैनी तैना मीं दित्तोरिन, सेबन करां महान आए, ते कोई तैन बाजी केरे हथ्थे मरां न नेइ बटे ।

30 अवं त बाजी अक्के आम ।”

31 दुवारां फिरी, यहूदेई तैस घोडेव देनेरे लेइ फिरी घोड़ सल्ले ।

32 एस पुड़ यीशुए तैन सेइं ज़ोवं, “मीं अपने बाजी केरे तरफां बड़ां रोड़ां कम्मां हिरां, तैन मरां कोस कम्मेरे लेइ घोडेव देतथ?”

33 यहूदेई तैस जुवाव दित्तो, “रोड़ां कम्मां केरे लेइ अस तीं पुड़ घोडेव नई केरने लेवरे, पन परमेशेरी तुहीन केरनेरे लेइ, एल्हेरेलेइ कि मैन्हु भोइतां अपनो आप परमेशर बनातस ।”

34 यीशुए तैन जुवाव दित्तो, “मूसेरे कानूने मां एन लिखेरू कि परमेशेरे अपने लोकां केरे लीडरन सेइं ज़ोवं कि तैना ईश्वरन ।

35 (तुसन पत्तोए पवित्रशास्त्रेरी गल कोई भी वेदली न बटे) अगर परमेशेरे तैन लोकन जो ईश्वर ज़ोवं ज़ैन कां परमेशेरू वचन पुज़्जू,

36 फिरी तुस किजो ज़ोतथ कि तू तुहीन केरतस, ज़ैखन अवं ज़ोताई कि अवं परमेशेरू मट्टू आई? बाजी परमेशेरे अवं पवित्र ठहरेइतां दुनियाई मां भेजो ।

37 अगर अवं अपने बाजेरू कम न केरि, त मेरो विश्वास न केरा ।

38 पन अगर अवं अपने बाजेरू कम केरताई, त चाए तुस मेरो विश्वास न भी केरा, पन तैन कम्पन पुड़ विश्वास केरा । तैखन तुस बुज्झेले ते समझेले कि बाजी मीं मां आए, ते अवं बाजी मां आई ।

39 तैनेई फिरी तैस ट्लानेरी कोशिश की, पन तै तैन करां ज़लो जेव ।”

40 फिरी यीशु यरदन दरियारे पार तैस ठैरी जेव, ज़ैड़ी यूहन्ना पेइले बपतिस्मो देतो थियो, ते तैड़ी राव ।

41 बड़े लोक तैस कां एइतां ज़ोते थिये, “यूहन्ना त कोई चमत्कारी निशान न हिराव, पन ज़ैन किछू यूहन्ना एसेरे बारे मां ज़ोवं, तैन सब सच थियू ।”

42 ते तैड़ी बड़ेई यीशु पुड़ विश्वास कियो ।

11



1 मरियम ते तैसेरी बेइन माथरि डलव्वें बैतनिय्याह मां लाज़र नव्वेरो अक मैन्हु थियो

2 ई तैए मरियम थी ज़ैसां बादे मां प्रभु पुड़ इत्र छेइतां अपने बालन सेइं तैसेरे पाव पूछोरे थी, एसेरो दूला लाज़र बिमार थियो ।

3 तैखन तैसेरी बेइने यीशु कां अक बिस्तार भेजो, “हे प्रभु, ज़ैस सेइं तू प्यार केरतस तै बिमारे ।”

4 ज़ैखन यीशुए एन शुनू त ज़ोवं, “ए बिमारी मरनेरे लेइ नई बल्के परमेशेरी महिमारे लेइ आए, ताके तैसेरे ज़िरिये परमेशेरे मट्टेरी महिमा भोए ।”

5 यीशु मार्था ते तैसेरी बेइन मरियम ते लाज़रे सेइं प्यार केरतो थियू ।

6 ज़ैखन यीशुए शुनू कि, लाज़र बिमारे, पन फिर भी दूई दिहाड़े तैड़ी बिशो ज़ैड़ी ते थियो ।

7 दूई दिहैडना बाद यीशुए अपने चलन सेइं ज़ोवं, “एज्जा, अस फिरी यहूदिया इलाके मां गाम ।”
8 चले ज़ोने लगे, “हे गुरू, थोड़े चिर पेइले यहूदी लीडर तीं घोड़ेईं बाते थिये, ते तू फिरी तैड़ी गानू चातस?”

9 यीशुए जुवाब दित्तो, “कुन दिहैड़ी मां 12 घंटे न भोन? जै दीसां च़लते तैस ठोकर न लगे, एल्हेरेलेइ कि तै दुनियारी लोईं मां च़ेलि सकते ।

10 पन अगर तै राती च़लते त आंधरे मां तैस ठोकर लगचे, किजोकि तैस कां लौ नई ।”

11 तैनी एना गल्लां ज़ोईं, ते अपने चलन सेइं ज़ोने लगे, “इश्शो दोस्त लाज़र झुलोरोए पन अवं तैस बीझाने च़लोरोईं ।”

12 तैसेरे च़ेले ज़ोने लगे, “हे प्रभु अगर तै झुलोरोए त तै बीझेलो ।”

13 यीशुए लाज़रेरे मरनेरे बारे मां ज़ारू थियूं, पन तैसेरे च़ेलेईं बुझू कि तैसेरो मतलब निडलारे बारे मां झुलोरोए, पन अवं तैस बीझाने च़लोरोईं ।

14 तैखन यीशुए रोड़ेच़ारे ज़ोवं, “लाज़र मेरि ज़ेवरोए ।

15 अवं खुश आईं कि तुश्शे लेइ फ़ेइदोए, कि अवं तैड़ी न थियो ज़ैस सेइं विश्वास केरथ । हुनी एज्जा अस तैड़ी गाम ।”

16 तैखन थोमा ज़ैस जो दिदुमुस ज़ोतन, होरि चलन सेइं ज़ोने लगे, “एज्जा, अस भी तैस सेइं साथी मरनेरे लेइ गाम ।”



17 ज़ैखन यीशुए बेतनिय्याह इलव्वं मां पुज्जो त तैस पतो लगे, कि लाज़र दब्बोरे च़ेवरे दिहाडे भोरन

18 बेतनिय्याह यरूशलम नगरेरां कोई टलाई किलोमीटर दूर थियूं ।

19 बड़े यहूदी लोक मार्था ते मरियमी कां तैन केरे दूला लाज़रेरे मरनेरां पत्ती तैना तसल्ली देने ओरे थिये ।

20 ज़ैखन मार्था शून् कि यीशु ओरोए तै तैस सेइं मिलनेरे लेइ बेइर निस्सी, पन मरियम बेइर न निस्सी ।

21 मार्था यीशुए सेइं ज़ोने लगी, “हे प्रभु, अगर तू इड़ी भोथो त मेरो दूला न थियो मरनो ।

22 पन अवं ज़ानती, हुनी ज़ैन किछ तू परमेशे करां मगेलो, ते परमेशर तीं देलो ।”

23 यीशुए तैस ज़ोवं, “तेरो दूला ज़ीतो भोइ गानोए ।”

24 मार्था तैस सेइं ज़ोवं, “अवं ज़ानती तै आदालतरे दिहाडे ज़ेइस सारे लोक ज़ीते भोनेन, तेइस तै भी ज़ीतो भोइ गानोए ।”

25 यीशुए तैस ज़ोवं, “मैनन मुइदन मरां ज़ीते केरनेबालो अव्वं आईं । ज़ै मीं पुइ विश्वास केरते तै मरनेरां बाद भी ज़ीतो रालो ।

26 ते ज़ै कोई ज़ीतोए, ते मीं पुइ विश्वास केरते, तै कथे न मरेलो, कुन तू इस पुइ विश्वास केरचस?”

27 मार्था जुवाब दित्तो, “हाँ प्रभु, मेरो विश्वास तीं पुडे, कि तू परमेशेरू मट्टू मसीह ज़ैन दुनियाई मां एजनेबालू थियूं ।”



28 ज़ैखन तैसां ए गल ज़ोईं त तै वापस च़ली जेईं, ते अपनि बेइन मरियम कनारे कुजेइतां ज़ोने लगी, “गुरू जी ओरेन ते तीं कुजाने लगोरेन ।”

29 तै एन शुन्तां लूशी उट्टतां यीशु सेइं मिलने च़ली आईं ।

30 यीशु हेजू इलव्वं मां न थियो पुजोरो, पन तै तैड़ी थियो ज़ैड़ी मार्था तैस सेइं मिलोरी थी ।

31 तैखन तैना यहूदी लोक ज़ैना मरियमी तस्सली देने ओरे थियो मरियम लूशी खड़ी उट्टतां बेइर जेईं, त तैना भी तैस पत्ती बेइर जे, कि भोइ सकते ए लेरां देने कबरी पुइ च़लोरिए ।

32 ज़ैखन मरियम तैस ठारी पुज्जी ज़ैडी यीशु थियो त तैस लेइतां तै तैसेरे पवन पुड़ विछ्छडी जेई ते ज़ोने लगी, “हे प्रभु अगर तू इडी भोथो त मेरो दूला न थियो मरनो।”

33 ज़ैखन यीशुए तै ते तैस सेइं साथी एजनेबाले यहूदी लोक लेरां देते जाए, तै आत्माई मां उदास भोइतां बडो दुःखी भोव।

34 ते पुच्छू, “तुसेईं लाज़र कोड़ि रखबोरोए?” तैना ज़ोने लगे, “हे प्रभु, असन सेइं साथी एइते एप्पू हेर।”

35 यीशु लेरां देने लगे।

36 तैखन यहूदी लोक ज़ोने लगे, “हेरा, ए लाज़रे सेइं केतरो प्यार केरतो थियो।”

37 पन तैन मरां किछ् ज़ोने लगे, “कुन ज़ैनी कानेरी एछ्छन लौ दित्ती, इन भी न केरि बट्टू, कि ए मैन्हू न मरेथो?”

~~~~~

38 यीशु दुखी दिले सेइं कबूरी कां अव, तै अक कुढ थी, ज़ैस पुड़ अक घोड़ छ्छोरो थियो।

39 यीशु ज़ोने लगे, “घोड़ खडो केरा।” मार्था ज़ै लाज़री बेइन थी तै ज़ोने लगी, “हे प्रभु एस मरां त मुशक लोरीए एजने, किजोकि एस च़ेवरे दिहाड़े मरे भोरेन।”

40 यीशुए तैस सेइं ज़ोवं, किजोकि, “मीं तुसन न थियूं ज़ोरू कि अगर तेरो विश्वास भोलो, त तू परमेशेरी महिमा हेरेली।”

41 तैखन तैनैई तै घोड़ घिसाव, ते यीशुए उबरे तेकतां ज़ोने लगे, “हे बाजी, अवं तेरू शुकर केरतां कि तीं मेरी शुनी।

42 अवं जानतो थियो, कि तू मेरी प्रार्थना शुन्तस पन अवं एन लोकां केरे लेइ ज़ैना च़ेवरे पासन खेड़ोरेन एन ज़ोरू थियूं कि एना भी विश्वास केरन, कि तीं अवं भेज्जोरोई।”

43 एन ज़ोनेरां पत्ती यीशुए ज़ोरे सेइं ज़ोवं, “लाज़र बेइर निस।”

44 ते तै मुओरो लाज़र बेइर निससो ज़ेसेरे हथ पाव कफने सेइं बंधोरे थियो ते दोग्गे अक कपड़ो बंधोरो थियो। यीशुए तैन सेइं ज़ोवं, “एस खोल्ला ते एस गाने देथ।”

~~~~~

(~~~~~ 26:1-5; ~~~~~ 14:1-2; ~~~~~ 22:1-2)

45 बड़े यहूदी लोक ज़ैना मरियम सेइं मिलने ओरे थियो। ते तैसेरां इन्ना कम्मां हेरतां तैस पुड़ विश्वास कियो।

46 पन तैन मरां किछ्छेईं फरीसन कां गोइतां सब शुनावं ज़ैना यीशुए कियेरू थियूं।

47 एस पुड़ प्रधान याजकन ते फरीसी लोक महासभारे लोक अकोट्टे कियो ते ज़ोने लगे, “अस कुन केरम? ए मैन्हू त इडी बड़े चमत्कार लोरोए केरने।

48 अगर अस एस हुन्ना न रोकमेले त सारे लोक तैस पुड़ विश्वास केरेले, कि ए मसीह आए, ते फिरी रोमेइ इडी एइतां इश्शे मन्दरे ते इश्शी कौमी दुइने नाश केरेले।”

49 तैखन तैन केरे टोली मरां अक ज़ेसेरू नवं कैफा थियूं, ज़ै तैस साल मन्दरेरो महायाजक थियो ज़ोने लगे, “तुस लोक किछ्छ न ज़ानाथ,

50 तुसन इन न समझथ कि, तुश्शे लेइ रोडूए, इश्शे लोकां केरे लेइ अक मैन्हू मरे, न कि इश्शे सारे लोक।”

51 ए गल तैनी अपने आपे सेइं न थी ज़ोरी, पन तैस साल महायाजक भोइतां भविष्यद्वाणी, कि यीशु इस्राएलेरे सारे लोकां केरे लेइ अपनि जान देलो।

52 तै सिर्फ इस्राएलेरे लोकां केरे लेइ नई, पन एल्हेरेलेइ भी कि ज़ैना परमेशेरे बच्चे तितर-बितर भोरेन तैन अकोट्टे केरतां अक बनाए।

53 बस्सा, यहूदी लीडरेई तैस दिहाड़ेरे बाद यीशु मारेरो इरादो कियो।

54 एल्हरेलेइ यीशुए तैस वक्ते करां यहूदन मां बांदे मां न फिरो, पन जंगलेरे नेडे एप्रैम नगरे मां जेव, ते अपने चेलन सेइं साथी तैडी राने लगो ।

55 तेइस यहूदी केरू फसह तिहार नेडे अव, ते बडे लोक आसेपासेरे इलाकन मरां यरूशलेम नगरे मांजो चले जे, ताके अपनो आप शुद्ध केरन ।

56 तैना यीशु तोपते थिये तेइस तैना मन्दरे मां अकोट्टे भोए, ते एक्की होरि सेइं ज़ोने लगे, “तुस कुन समझतथ? कोई पत्तोए कुन ते इडी फसह तिहारे मां एज्जेलो कि नई?”

57 ते प्रधान याजकेई ते फरीसी लोकेई हुकम दित्तोरो थियो कि अगर केन्ची पतो लगे कि यीशु कोडि आए त ज़ोथ दे ताके असां तैस गिरफ्तार केरम ।

12

XXXXXXXXXXXX

(XXXXXXXX 26:6-13; XXXXXXX 14:3-9)

1 फसह तिहारे करां शा दिहाडे पेइले यीशु बैतनिय्याह डलव्वें मांजो चलो अव, ज़ैडी लाज़र रातो थियो, ज़ै यीशुए मुडदन मरां ज़ीतो कियोरो थियो ।

2 तैडी तैनेई यीशुएरी खातरदारी केरनेरे लेइ धाम बनाई । ते मारथा सेवा लोरी थी केरने, लाज़र भी तैन मरां अक थियो ज़ैना यीशु सेइं साथी रोट्टी खाने बिशशारे थिये ।

3 तैखन मरियमा जटामासी सेइं बनोरो अड्यो लीटर खुशबूदार इत्र ज़ै बडो कीमती थियो, यीशुएरे पावन मल्लो, ते अपने दोग्गेरे बालन सेइं पोंछने लगी, ते सारू घर रोडी मुशकी सेइं भेरोई जेव ।

4 पन तैसेरे चेलन मरां अक यहूदा इस्करियोती नव्वेरो अक चेलो, ज़ैनी यीशु टलुवेवरो थियो ज़ोने लगो,

5 “ई इत्र 300 दीनारन मां बेचतां गरीबन किजो न दित्तो?”

6 तैनी एना गल्लां एल्हरेलेइ न थी ज़ोरी, कि तैस गरीबां केरो खियाल थियो, पन एल्हरेलेइ ज़ोवं कि तै चोर थियो, तैस कां पेइसां केरि झोली भोती थी, ते ज़ैन किछ तैस मां रखते थी तै कढतो थियो ।

7 यीशुए ज़ोवं, “एस तंग न केरा, एसां वक्तेरे पेइले मेरी जान दव्वेनेरी तियारी कियोरीए ।

8 किजोकि गरीब लोक त तुसन सेइं साथी सदा रातन, पन अवं तुसन सेइं साथी सदा नई रानो ।”

XXXXXXXXXXXX

9 मैन्हु केरि बडी भीडी तैडी आई ज़ैखन तैनेई शुनू कि यीशु तैडी अव । तैना सिर्फ यीशु नई बल्के लाज़रे भी हेरने ओरे थिये, ज़ै तैनी मुडदन मरां ज़ीतो कियोरो थियो ।

10 तैखन प्रधान याजके लाज़र भी मारनेरी सलाह की ।

11 किजोकि बडे लोक यहूदी लीडरन करां चले जे, ते तैनेई यीशु पुड़ विश्वास कियो ।

XXXXXXXXXXXX

(XXXXXXXX 21:1-11; XXXXXX 11:1-11; XXXXX 19:28-40)

12 होरसां मैन्हु केरि बडी भीड तिहारे मां आई । ज़ैखन तैनेई शुनू कि यीशु भी यरूशलेम नगरे मां एजनेवालोए,

13 त तैनेई खजूरां केरि डेलडी हथ्यन मां रेखतां नहरे देते तैस सेइं मिलनेरे लेइ निस्से ते ज़ोने लगे, “होशाना (तारीफ़) धने इस्राएलेरो राज़ो, ज़ै प्रभुएरे नव्वे सेइं एइते ।”

14 ज़ैखन यीशु अक गधरो बच्चो मैल्लो, ते तै तैस पुड़ बिशतां यरूशलेम नगरे मांजो अव, ज़ेन्चरे पवित्तरशास्त्रे मां लिखोरूए तेन्चरे एन भोवं,

15 “हे सिध्योनेरी कुई (यरूशलेमेरे लोक),

तू न डर, हेर,

तेरो राज़ो एज्जी राओरोए,

ते तै गधेरे बच्चे पुङ्ग च्चेदतां एज्जी राओरोए ।”

16 पेडलू त यीशुएरे चेलेई किछ्च न समझ्च, पन ज़ैखन यीशुएरी महिमा बांदी भोइ, तैनेई तैना सैरी गल्लां याद की, एन सब गल्लां तैसेरे बारे मां लिखोरी थी, ते लोकेई एरो ज़ेरो सलूख कियोरो थियो ।

17 तैखन भीडरे लोकेई ज़ैना तैस सेइं थी, ई गवाही दित्ती, कि तैनी लाज़र कबूरी मरां कुजाव, ते मुडन मरां ज़ीतो कियो ।

18 एल्हेरेलेइ लोक तैस सेइं मिलनेरे लेइ आए, किजोकि तैनेई शुनोरू थियूं, तैनी ई चमत्कार कियोरे ।

19 फरीसी लोक एन हेरतां एक्की होरि सेइं ज़ोने लगे, “सोचा, तुस लोक किछ्च नई केरि लोरे बटने, हेरा सारी दुनिया एस पत्ती च़ली ।”

~~~~~

20 ज़ैना लोक फ़सह तिहारे मां यरूशलेम नगरे मां आराधना केरने ओरे थिये, तैन मां किछ्च यूनानी थिये ।

21 तैना फिलिप्पुसे कां जे ज़ै गलीलेरे नगर बैतसैदा मां रातो थियो, तै ज़ोवले हथ केरतां ज़ोने लगे, “जनाब अस यीशु सेइं मिलनू चातम ।”

22 फिलिप्पुसे अन्दिरयासे सेइं ज़ोवं, ते अन्दिरयास फिलिप्पुसे सेइं साथी जेव ते यीशु सेइं ज़ोवं ।

23 यीशुए तैन जुवाब दित्तो, “कि मैनेरे मट्ठेरी यानी मेरी महिमा बांदी भोनेरो वक्त ओरोए ।

24 अवं तुसन सेइं सन्न-सन्न ज़ोताई, कि ज़ांतगर गेहुं केरो ग्लेव मित्ती मां न मरे, तै अक्के रहते, पन ज़ैखन मरते त बड़ो फल आनते, (तेन्चरे मीं सेइं साथी भोनूए)* ।

25 ज़ै अपनि जान टलारी रखते ते अपनि जान गुवाते, पन ज़ै अपनि जानी सेइं बैर रखते ते अक हमेशारी ज़िन्दगी बचालो ।

26 ज़ै कोई मेरी सेवा केरनि चाते त तैसेरेलेइ ज़रूरीए तै मेरो चेलो बने, ताके ज़ैडी अवं आई तैडी मेरो सेवक भी भोए, ज़ै मेरी सेवा केरते मेरो परमेशर तैस इज़्जत देलो ।”

~~~~~

27 “हुना मेरो दिल बड़ो उदास भोरोए । एल्हेरेलेइ अवं कुन ज़ोई? हे बाजी इस दुखेरी घेड़ी करां मीं बच्चा, पन अवं इस दुनियाई मां एल्हेरेलेइ ओरोई कि दुःख झेल्ली ।

28 हे बाजी तू केत्तरो महिमा बालोस इन बांदू केर ।” तैखन स्वर्गेरां अक आवाज़ अई, “मीं तेरी केत्तरी महिमा बांदी कियोरीए ते फिरी भी केरेलो ।

29 तैखन तैडी ज़ैना मैन्हु खड़े भोइतां शुनी रावरे थिये, तैनेई ज़ोवं, गुडने लोरूए,” ते होरेई ज़ोवं, “केन्चे स्वर्गदूते तैस सेइं गल की ।”

30 यीशुए ज़ोवं, “ई आवाज़ मेरे फ़ैइदेरे लेइ नई बल्के तुशुशे लेइ आए ।

31 इस वक्त परमेशर दुनियारे लोकां केरो इन्साफ केरेलो, ते अवं इस शैतानेरी शक्ति नाश केरेलो ज़ै इस दुनियाई पुङ्ग राज़ केरते ।

32 ते ज़ैखन अवं ज़मीनी पुङ्ग उच्चे च़ादो गालो, तैखन अवं सैरी लोकन एप्पू कांजो आनेलो ।”

33 एन ज़ोइतां तैनी साफ च़ारे बांदू कियूं, ते तै केन्चरां मरने बालो ।

34 एस पुङ्ग लोकेई ज़ोवं, “असेई मूसेरे कानूने मां ई गल शुनोरीए, कि मसीह हमेशा रानोए, फिरी तू केन्चरे ज़ोतस कि मैनेरू मट्ठू उच्चे पुङ्ग च़दनू ज़रूरीए? एन मैनेरे मट्ठे कौने?”

35 यीशुए तैन सेइं ज़ोवं, “लौं तुसन कां थोड़े च़िरे तगरे आए, ज़ां तगर लौ तुसन साथीए, तांतगर च़लते राथ, एरू न भोए आंधरू तुसन घेरे, ज़ै आंधरे मां च़लते तै न ज़ाने तै कोरां च़लरोए ।

* 12:24 12:24 यीशु अपने बारे ज़ोने लोरो थियो, कि केन्चरां तैसेरे मरने ते ज़ीते भोनेरे वजाई सेइं होरि कोमां केरे लोक तैस पुङ्ग विश्वास केरेले । † 12:35 12:35 लौ: यीशु अपने बारे मां ज़ोने लोरो थियो ।

36 ज्ञातगर लौ तुसन सेइं साथीए, त लोई पुड़ विश्वास केरा ताके तुस लोअरे बच्चे बनथ ।” इना गल्लां ज़ोइतां यीशु छेप्पी जेव ।

~~~~~

37 तैनी तेन करे सामने बड़ चमत्कार हिराए, फिरी भी तेनेई विश्वास न कियो ।

38 ताके यशायाह नेवेरू ज़ोरू वचन पूरू भोए,

“हे परभु, केन्चे इश्शे खुशखेबरी पुड़ विश्वास न कियो,  
ते बड़े लोकेई परमेशेरी शक्ति हेरतां भी कबूल न की ।”

39 एल्हेरेलेइ तैना विश्वास न केरि सके यशायाह एक्की होरि ठैरी ज़ोते:

40 “तैनी तैन केरि एछ्छी केनि की, ते मन सखत कियोरोए,

एरू न भोए कि तैना एछ्छन सेइं लान ते मने सेइं बुझन,

ते माफ़ी मगन ते अवं तैन बज्झेई ।”

41 यशायाह नबी एल्हेरेलेइ ज़ोतो थियो, कि तैनी यीशुएरी एजनेबाली महिमा लवरी थी, ते तैसेरे बारे मां गल भी की ।

42 फिरी भी लीडरन मरां बड़ेई यीशु पुड़ विश्वास कियो, पन फरीसी लोकां केरे वजाई सेइं बांदे मां न थिये मन्ते, एरू न भोए कि असन प्रार्थना घरे मरां कढन ।

43 किजोकि मैन्हु केरि बड़याई तैन परमेशेरी बड़याई करां जादे रोड़ी लगती थी ।

~~~~~

44 तैखन यीशुए ज़ोरे सेइं ज़ोवं, “ज़ै कोई मीं पुड़ विश्वास केरते तै मीं पुड़ नई पन मेरे भेज़ने बाले परमेशेरे पुड़ विश्वास केरते ।

45 ते ज़ै मीं हेरते तै मेरे भेज़ने बाले हेरते ।

46 अवं दुनियाई मां अक लौ बेनतां ओरोई, ताके ज़ै मीं पुड़ विश्वास केरे तै आंधरे मां न रालो ।

47 अगर कोई मेरी गल्लां शुन्तां तैन पुड़ अमल केरे, त अवं तैस दोष न लेइलो, अवं दुनियारे लोकन पुड़ दोष लाने नई पन मुक्ति देने ओरोई ।

48 ज़ै मेरो इन्कार केरते ते मेरी गल्लां कबूल न केरे, तैस पुड़ दोष लानेबालो अक्के, मतलब ज़ैन वचन मीं ज़ोरूए, तैन आखरी दिहाड़े तैस दोषी ठैरालू ।

49 किजोकि मीं अपने अधिकारे सेइं किछ्च नई ज़ोरू, पन बाजी ज़ैने अवं भेज़ोरोई तैनी मीं हुक्म दित्तोरोए, कि कुन-कुन ज़ोई ते कुन-कुन शुनेई?

50 ते अवं ज़ानताई कि तैसेरो हुक्म मन्ने सेइं हमेशारी ज़िन्दगीए मैलतीए, एल्हेरेलेइ अवं तुसन सेइं तैन्ने ज़ोताई ज़ैन ज़ोनेरो हुक्म मेरे बाजे मीं दित्तोरोए ।”

13

~~~~~

1 फ़सह तिहाररे पेइले दिहाड़े यीशुए ज़ैनी छड़इ, कि मेरो दुनियाई मरां बाजी कां वापस गानेरो वक्त ओरोए । ते अपने लोकन सेइं ज़ैना दुनियाई मां थिये ज़ेरो प्यार केरतो थियो, तेरहो प्यार आखरी तरगर केरतो राव ।

2 शैताने शमोनरे मट्ठे यहूदा इस्करियोतेरे दिले मां पेइले यीशु टलुवानेरो खियाल छड़ोरो थियो । यीशु त कने तैसेरे चले इलाई खानेरो लोरे थिये ।

3 यीशु पतो थियो कि बाजे सैरी चीज़ां तैसेरे हथ्थे मां दित्तोरिन, ते कने तै परमेशेरी तरफां ओरोए ते परमेशेरे कांजो वापस ज़लरोए ।

4 एल्हेरेलेइ तै रोटी छेड़तां खड़ो उठो ते अपनू कोट खोल्लू, ते अक तोलियो अपने लखे सेइं पलैटो ।

5 तैखन तैनी अक भांड टलाव ते तैस मां पानी छाड़ ते अपने चेलां केरे पाव धोइतां लखे बन्धोरे तोलिये सेइं पोंछे ।



- 6 ज़ैखन तै शमौन पतरस कां अब त पतरसे ज़ोवं, “हे प्रभु, कुन तू मेरे पाव धोने लोरस?”
- 7 यीशुए जुवाव दित्तो, “ज़ैन अवं केरने लोरोई तू हुन्ना न बुझस, पन पत्ती तू बुझेलो।”
- 8 पतरसे तैस सेइं ज़ोवं, “तू मेरे पाव कधे न धोई सकस!” यीशुए तैस सेइं ज़ोवं, “अगर अवं तेरे पाव न धोई, त तू मेरो चेलो नई।”
- 9 शमौन पतरस यीशु सेइं ज़ोने लगे, “हे प्रभु, तू मेरे पाव नई बल्के हथ ते दोग भी धो।”
- 10 यीशुए तैस सेइं ज़ोवं, “ज़ैनी निहावरुए, तैस पावां केरे अलावा होरू धोनेरू किछ ज़रूरत नई। तै बिलकुल शुद्धे, ते तुस शुद्धथ, पन सारे नई।”
- 11 तै त टलुवाने बाले ज़ानतो थियो एल्हेरेलेइ तैनी ज़ोवं, “तुस सब शुद्ध नई।”
- 12 ज़ैखन यीशुए सेबमी केरे पाव धोए त अपनू कोट लेइतां अपनि ठैरी विश्शो तैखन तैनी तैन पुच्छ, “कुन तुस समझतथ कि मीं तुसन सेइं कुन कियू?”
- 13 तुस मींजो गुरू, ते प्रभु ज़ोतथ, तुशू ज़ोनू ठीके, किजोकि अवं आई।
- 14 अगर मीं तुशुशो गुरू त कने प्रभु भोइतां तुशुशे पाव धोए, त तुशुशो भी फज़े कि एक्की होरेरे पाव धोथ।
- 15 किजोकि मीं तुसन अक नमूनो हिराव, कि ज़ेन्चरे मीं पाव धोए तुस भी एरू केरथ।
- 16 अवं तुसन सेइं सन्न-सन्न ज़ोताई, कि नौकर अपने मालिके करां बड्डो न भोए, ते न भेजोरो भेजने वाले करां।
- 17 तुस त एना गल्लां ज़ानतथ, ते अगर तैन पुइ अमल केरतथ त तुस धन आथ।
- 18 अवं तुसन सेबमी केरे बारे मां न ज़ोई, ज़ैना मीं चुनोरेन अवं तैन ज़ानताई, पन इन एल्हेरेलेइ आए, कि पवित्रशास्त्रेरू एन वचन पूरू भोए, ज़ैने मेरी रोट्टी खाइ, तैए मेरे खलाफ भोव।
- 19 अवं तैन भोने करां पेइले तुसन ज़ोताई कि ज़ैखन भोए त विश्वास केरथ कि अवं तैए आई।
- 20 अवं तुसन सेइं सन्न-सन्न ज़ोताई कि, ज़ै मेरे भेजोरे कबूल केरते तै मीं कबूल केरते, ते ज़ै मीं कबूल केरते तै मेरे भेजनेवाले बाले कबूल केरते।”

???????????????? ???? ???? ?

(???? 26:20-25; ???? 14:17-21; ???? 22:21-23)

- 21 एना गल्लां ज़ोइतां यीशु आत्माई मां उदास भोइतां बड्डो दुःखी भोव, ते अपने चलन सेइं ज़ोने लगे, “अवं तुसन सेइं सन्न-सन्न ज़ोतां, कि तुसन मरां एक्के अवं टलुवानोई।”
- 22 चले एक्की होरेरे पासे तकने लगे, किजोकि तैन पतो न थियो कि ए केसेरे बारे मां ज़ोने लोरोए।
- 23 तैसेरे चलन मरां अक चेलो ज़ैस सेइं यीशु प्यार केरतो थियो, यीशुएरे नेडे विशोरो थियो।
- 24 तैखन शमौन पतरसे तैसेरे पासे इशारे सेइं पुच्छ, “जो कसेरे बारे मां ज़ोने लोरोए?”
- 25 तैखन तेन्चरे यीशुएरे छैतरे पासे लिकतां पुच्छ, “हे प्रभु, तै कौने?”
- 26 यीशुए जुवाव दित्तो, “ज़ैस अवं ई रोट्टरो टुकडो डोबतां देइलो तैए।” ते यीशुए टुकडो डोबतां शमौनेरे मट्टे यहूदा इस्करियोती दित्तो।
- 27 ते टुकडो नेनेरे पत्ती तै शैतानेरे बस्से मां भोइ जेव, तैखन यीशुए तैस ज़ोवं, “तीं ज़ैन किछ केरनूए, लूशी केर।”
- 28 पन हारि केन्ची ए पतो न लगे कि ए गल यीशुए केसेरे बारे मां की।
- 29 यहूदा कां पेइसां करी थेलडी भोती थी, ते किछेई समझ, कि यीशु तैस सेइं ज़ोते, कि ज़ैन किछ असन तिहारेरे लेइ लोइते तैन धिन्ने, या गरीबन किछ दे।
- 30 तैखन यहूदा टुकडो खेइतां बेइर ज़लो जेव, तै रातरगे वक्त थियो।
- ???????? ???? ?
- 31 ज़ैखन ते बेइर जेव त यीशु ज़ोने लगे, “हुनी मैनेरे मट्टे यानी मेरी महिमा भोइ, ते मेरे ज़िरिये परमेशंरी महिमा भोइ,
- 32 ते परमेशर भी मीं एप्पू महिमा बालो केरेलो, बल्के जल्दी केरेलो।

33 हे मेरे दोस्तव, अवं किछ चिरेरे लेइ हेजू तुसन सेइं साथी आई, फिरी तुस मीं तोप्येले, ते जेन्चरे मीं यहूदन भी ज़ोवं, ज़ैडी अवं गाताई तैडी तुस न एज्जी बटथ, तेन्चरे अवं तुसन सेइं भी ज़ोताई ।

34 अवं तुसन अक नंव्यो हुकम देताई कि, एक्की होरि सेइं प्यार केरा, जेन्चरे मीं तुसन सेइं प्यार कियो तुस भी एक्के होरि सेइं प्यार केरा ।

35 अगर तुस एक्के होरि सेइं प्यार केरेले त सेन्नी लोकन पतो लग्गेलो, कि तुस मेरे चलेथ ।”

~~~~~

(~~~~~ 26:31-35; ~~~~~ 14:27-31; ~~~~~ 22:31-34)

36 शमौन पतरसे तैस पुच्छू, “हे प्रभु तू कोरां चलोरोस?” यीशुए जुवाब दित्तो, “जेरां अवं चलोरोई तू हुना मीं सेइं साथी न एज्जी सकस, पन वादे मां एज्जी सकतस ।”

37 पतरसे ज़ोवं, “हे प्रभु अवं हुना तीं सेइं साथी किना एज्जी सेखी? अवं त तेरे लेइ अपनि जान भी देनेरे लेइ तियार आई ।”

38 यीशुए जुवाब दित्तो, “कुन तू मेरे लेइ अपनि जान देलो, अवं तीं सेइं सन्न-सन्न ज़ोताई कि कुकड़ वांग देने करां पेइले तू मेरो टलेइ बार इन्कार केरेलो ।”

14

~~~~~

1 “तुशशा दिल उदास न भोए, तुस परमेशेरे पुड़ विश्वास करतथ, मीं पुड़ भी विश्वास केरा ।

2 मेरे बाजेरे घरे मां बड़े कमरेन, अगर न भोथी त अवं तुसन सेइं ज़ोथो, किजोकि अवं तुशशे लेइ टार तियार केरने चलोरोई ।

3 अगर गेइतां तुशशे लेइ टार तियार केरि त वापस एइतां तुसन एप्पू सेइं साथी नेलो, ताके ज़ैडी अवं भोलो तुस भी तैडी भोथ ।

4 ते ज़ेरां अवं चलोरोई तुस तैठेरी बत जानतथ ।”

5 थोमा तैस ज़ोवं, “हे प्रभु, असन नई पतो तू कोरां चलोरोस, ते फिरी बत केन्चरे जानम?”

6 यीशुए तैस सेइं ज़ोवं, “बत, सच्चि ते हमेशारी जिन्दगी अखें आई, कोई मेरे जिरियेरे बगैर बाजी कां न एज्जी सके ।

7 अगर तुसेईं अवं पिशानोरो भोथो त मेरे बाजी भी पिशानेथे, पन हुनी तुस तैस जानतथ ते कने लाव भी ।”

8 फिलिप्पुसे तैस सेइं ज़ोवं, “हे प्रभु असन बाजी हिरा, तैन्ने इशशे लेइ बडू आए ।”

9 यीशुए तैस सेइं ज़ोवं, “फिलिप्पुस, एतरे चिरे अवं तुसन सेइं साथी राव कुन तू मीं न जानस ज़ैनी अवं लाव तैनी बाजी भी लाव तू किजो ज़ोतस असन बाजी हिरा?

10 कुन तू विश्वास न केरस, कि अवं बाजी मां आई ते बाजी मीं मां आए? अवं ज़ैना गल्लां तुसन सेइं ज़ोताई तैना गल्लां अवं अधिकारे सेइं न ज़ोई, बल्के बाजी मीं मां रेइतां अपनू कम करते ।

11 मेरो विश्वास केरा, कि अवं बाजी मां आई ते बाजी मीं मां आए, नई त ज़ैना कम्मां केरताई तैन हेरतां मीं पुड़ विश्वास केरा ।”

12 अवं तुसन सेइं सन्न-सन्न ज़ोताई, “कि ज़ै मीं पुड़ विश्वास करते, एना कम्मां ज़ैना अवं केरताई तै भी केरेलो, बल्के मीं करां भी बडां कम्मां केरेलो, किजोकि अवं बाजी कां चलोरोई ।

13 ज़ैन किछ तुस मेरे नंव्ये सेइं मगले अवं तुसन देलो कि बाजी केरि महिमा मट्टेरे वजाई सेइं बांदी भोए ।

14 अगर तुस मेरू नंव्ये सेइं किछ भी मगले त अवं तैन केरेलो ।”

~~~~~

15 “अगर तुस मीं सेइं प्यार करतथ त मेरे हुकमन मन्नेले ।

16 ते अवं बाजी कां प्रार्थना केरेलो ते तै तुसन अक महतगार देलो कि हमेशा तुसन सेइं साथी रालो ।

17 मतलब तै आत्मा जै परमेशेरे बारे मां सन्न बांदू केरेली, जै दुनिया कबूल न केरि सके, किजोकि न तैस लेइहोए न ज्ञाने, तुस तैस ज्ञातथ किजोकि तै तुसन साथी रहती, ते तै तुसन मां भोली ।

18 अवं तुसन अकैल्लो न शेरलो बल्के अवं तुसन कां एज्जेलो ।

19 ई दुनिया किछ् चिरेरां बाद मीं न लाएली, पन तुस मीं लांते राले, किजोकि अवं ज़ीतोई ते तुस भी जीते राले ।

20 ज़ैखन अवं ज़ीतो भोलो तेइस तुसन पतो लग्गेलो, कि अवं अपने बाजी मां आई ते तुस मीं मां आथ ते अवं तुसन मां आई ।

21 ज़ैस कां मेरे हुक्म आन ते तैन मन्ते, त तैए मीं सेइं प्यार करते ते मेरो बाजी तैस सेइं प्यार केरेलो, ते अवं तैस सेइं प्यार केरेलो, ते अपने आप तैस पुड़ बांदो केरेलो ।”

22 तैखन यहूदा (ते यहूदा इस्करियोती न थियो बल्के होरो चेलो थियो) तैस सेइं ज़ोवं, “हे परभु कुन भोव कि तू अपने आप असन पुड़ बांदो केरनो चातस ते दुनियारे लोकन पुड़ नई?”

23 यीशुए जुवाव दित्तो, अगर कोई मीं सेइं प्यार करते त तै मेरी शिक्षाई मन्ते, ते मेरो बाजी भी तैस सेइं प्यार केरेलो, ते अस तैस कां एज्जमेले ते तैस सेइं साथी रामेले ।

24 ज़ै मीं सेइं प्यार न केरे, तै मेरे शिक्षाई न मन्ते, ज़ै शिक्षा तुस शुन्ने लोरेथ, मेरी नई पन मेरे बाजी केरि ज़ैने अवं भेजोरोई ।

25 “एना सैरी गल्लां मीं तुसन साथी रेइतां ज़ोई ।

26 पन तै मद्दतगार यानी पवित्र आत्मा ज़ैस बाजी मेरे ठैरी भेजेलो, तुसन सैरी गल्लां शिखालेलो, ते हर गल ज़ै मीं तुसन सेइं ज़ोरी याद करालो ।”

27 अवं तुसन शान्ति देइतां ज़ै मीं कां आए, जेन्चरे दुनिया देचे तेन्चरे नई, तुश्शो दिल उदास न भोए ते न डेरथ ।

28 तुसेईं शुन, मीं तुसन सेइं ज़ोवं, अवं गाताई तुसन कां फिरी एज्जेलो अगर तुस मीं सेइं प्यार करते भोते त खुशी भोने थिये, कि अवं बाजी कां ज़लोरोई किजोकि बाजी मीं करां बड्डोए ।

29 मीं सैरी गल्लां पेइले तुसन ज़ोरिन कि ज़ैखन तैना पूरी भोन त तुस विश्वास केरेले ।

30 हुनी अवं तुसन सेइं जादे गल्लां न केरेलो, किजोकि शैतान एइते, ज़ै इस दुनियाई पुड़ राज़ केरनेवालोए । मीं पुड़ तैसेरो किछ् अधिकार नई ।

31 जेन्चरे बाजीए मीं हुक्म दित्तो, अवं तेन्चरे केरताई । पन एन एल्हेरेलेइ भोते कि दुनिया ज्ञाने, कि अवं बाजी सेइं प्यार केरताई । ते उठा इट्टां ज़लम ।

15

~~~~~

1 यीशुए ज़ोवं “अवं दाछारू सच्चू बड़ह अव्वे आई, ते मेरो बाजी वागवाने ।

2 ज़ै डालड़ी मीं मां आए, ते तैस फल न लगे, तै कट्टी गानीए, ते ज़ैस फल लगते तैस छ्छांटे कि जादे फल लगे ।

3 तुस तैस शिक्षाई सेइं ज़ै मीं तुसन दित्तोरीए शुद्ध आथ ।

4 तुस मीं मां बनोरे राथ, ते अवं तुसन मां, जेन्चरे डालड़ी अगर बड़हे सेइं बनोरी न राए, त अपने आप सेइं तैस फल न लगे । तेन्चरे तुसन भी अगर मीं मां बनोरे न राले त तुस फलदार न भोइ सकेले ।

5 अवं दाछारू बड़ह आई, तुस डेलड़ी आथ, ज़ै मीं मां बनोरो रहते तैस खूब फल लगते, किजोकि मीं करां अलग भोइतां तुस किछ् न केरि सखत ।

6 अगर कोई मीं मां बनोरो न राए, त तैस डेलड़ो ज़ेरोए ज़ैस केटतां शारतन, ते शुक्की गाचे, ते लोक घेरतां अग्गी मां फुकी छ्छडतन ।

7 अगर तुस मीं मां बनोरे रातथ ते मेरी गल्लां तुसन मां बनोरी रैतन त ज़ैन चाहेले ते मगेले तुसन दित्तू गालू ।

- 8 मेरे बाजेरी महिमा एसमां आए कि तुस हछो फल आनां, फिरी तुस मेरे चले भोले ।  
 9 जेन्चरे बाजे मीं सेइं प्यार कियो, तेन्चरे मीं भी तुसन सेइं प्यार कियो । मेरे प्यारे मां बनोरे राथ ।  
 10 अगर तुस मेरे हुक्मन मन्नेले, त मेरे प्यारे मां बनोरे राले, जेन्चरे मीं अपने बाजेरे हुक्म मन्ने, ते तैसेरे प्यारे मां बनोरो राव ।  
 11 मीं एना गल्लां एल्हेरेलेइ तुसन जोरिन, कि मेरी खुशी तुसन मां बनोरी राए ।”  
 12 “मेरो हुक्मे ई आए जेन्चरे मीं तुसन सेइं प्यार कियो, तुस भी एक्की होरि सेइं प्यार केरा  
 13 एस करां जादे प्यार केन्चे नई कियोरो, कि कोई अपने दोस्तां केरे लेइ अपनि जान दे ।  
 14 जे हुक्म अवं देताई, अगर तुस तैस मन्नथ, त मेरे दोस्त आथ ।  
 15 अज्जेरे बाद अवं तुसन जो नौकर न जोइलो, किजोकि नौकर न जानि कि तैसेरो मालिक कुन करते । मीं तुसन जो दोस्त जोरूए, किजोकि जैन किछ मीं बाजी करां शुनोरूए तुसन भी शुनावरू आए ।  
 16 तुसेईं अवं नई चुनोरो पन मीं तुस चुनोरेथ ते ठहरावरे भी आथ, ताके तुस गेइतां फल आनथ, ते तुशो फल बनोरो राए, कि तुस मेरे नंवे सेइं बाजी करां जैन किछ मगथ, तै तुसन देलो किजो तुस मेरे चलेथ ।  
 17 अवं इन गल्लां केरो हुक्म एल्हेरेलेइ देताई, कि तुस एक्की होरि सेइं प्यार केरा ।”



- 18 “अगर दुनियारे लोक तुसन सेइं दुश्मनी रखतन, त याद रखा कि तैनेई पेइले मीं सेइं दुश्मनी रखोरी ।  
 19 अगर तुस दुनियारे भोथे, त दुनिया अपने लोकन सेइं प्यार केरती, पन हुनी तुस दुनियारे लोक नई किजोकि मीं तुस दुनियाई मरां चुनोरेथ तांए दुनियारे लोक तुसन सेइं दुश्मनी रखतन ।  
 20 तै गल जै मीं तुसन सेइं जोरी थी याद रख्खा, नौकर अपने मालिके करां बड्डो न भोए, अगर दुनियां अवं सतेवरोइं त तैना तुसन भी सताले, अगर तैनेई मेरी गल्ली पुइ अमल कियूं त तुशो गल्ली पुइ भी अमल केरेले ।  
 21 पन तैना लोक तुसन सेइं एरो जेरो बताव केरेले, किजोकि तुस मेरे चलेथ । तैना मेरे भेजने बाले परमेशरे न जानन् ।  
 22 अगर मीं एइतां तैन सेइं गल्लां न भोथी कियोरी त तैना पापी न थिये भोने, पन हुनी तैन केरे पापेरो तैन कां कोई बहानो नई ।  
 23 जै मीं सेइं दुश्मनी रखते, ते तै मेरे बाजी सेइं भी दुश्मनी रखते ।  
 24 अगर मीं तैन केरे सामने तैना चमत्कार न भोथे कियोरे, जैना कधी होरे केन्चे नई कियोरे त तैना पापी न थिये भोने, पन हुनी तैनेई सब किछ लाव, ते मीं भी ते बाजी सेइं दुश्मनी रख्खी ।  
 25 पन एन एल्हेरेलेइ भोवं कि तैन केरे कानूने मां लिखोरी तै गल पूरी भोए, तैनेई मीं सेइं खामखा दुश्मनी रख्खी ।  
 26 पन जैखन तै महत्तगार एज्जेलो जैस अवं अपने बाजेरे तरफां भेजेलो, मतलब सच्चेरी आत्मा, जै बाजी केरि तरफां एइतीए, तै मेरी गवाही देली ।  
 27 ते तुस भी गवाह आथ किजोकि तुस भी शुरू करां मीं सेइं साथी थिये ।”

## 16

- 1 “मीं तुसन एना सैरी गल्लां एल्हेरेलेइ जोई कि तुशो विश्वास न टलुटे ।  
 2 तैनेई तुस प्रार्थना धरन मरां कढनेथ, खास केरतां एरो जेरो वक्त एज्जी राहोरोए, जै तुसन मारेलो ते इन समझेलो कि तै परमेशेरी सेवा केरने लोरोए ।  
 3 तैन एन सब एल्हेरेलेइ केरेले कि न तैनेई कधी मेरो बाजी जानो ते न कधी अवं ।

4 पन मीं एना सैरी गल्लां एल्हेरेलेइ तुसन सेइं जोई, कि ज़ैखन तैना पूरी भोनेरो वक्त एज्जेलो, त तुसन याद एज्जे, कि मीं तुसन एन पेडलू ज़ोरू थियूं, ज़ेइस तुस मेरे चले बनोरे थिये। मीं एना गल्लां केरे बारे मां पेडलू एल्हेरेलेइ न जोवं, कि अवं एप्पू तुसन सेइं साथी थियो।”

?????? ?????????

5 “पन हुन्ना अवं अपने भेजने बाले कां ज़लोरोई, पन तुसेई केन्वे भी न पुच्छू कि तू कोरां ज़लोरोस?

6 पन मीं तुसन सेइं जोई छडेरूए एल्हेरेलेइ तुश्शो मन उदास आए।

7 फिरी भी अवं तुसन सेइं सन्न ज़ोताई कि मेरू इट्टां गानू तुश्शो लेइ फैडदोए, अगर अवं न गेइलो त तै मदतगार तुसन कां नई एज्जो, पन अवं ज़लो जेव त तैस अवं तुसन कां भेजी देलो।

8 ते ज़ैखन तै एज्जेलो त दुनियाई पाप ते धार्मिकता ते इन्साफेरे बारे मां सब किछ बांदू केरेलो।

9 पापेरे बारे मां एल्हेरेलेइ कि दुनियां मीं पुड़ विश्वास न कियो,

10 धार्मिकतारे बारे मां एल्हेरेलेइ कि अवं वापस बाजी कां ज़लोरोई ते तुसेई अवं फिरी नई लहना,

11 इन्साफेरे बारे मां एल्हेरेलेइ कि, शैतान ज़ै दुनियाई पुड़ राज़ करनेवालो मुज़ंम बनोरोए।”

12 “अवं तुसन सेइं होरू भी बडू किछ ज़ोनू चाताई, पन हुन्ना तुसेई तैन झैली नई बटनू।

13 पन ज़ैखन तै मतलब सन्नचेरी आत्मा एज्जेली त तै सन्नचेरी बत हिराली, किजोकि तै अपने तरफां न ज़ोली, पन ज़ैखन किछ परमेशेर करां शुनेली तैन्ने ज़ोली, ते एज्जे बैली गल्लां ज़ोली।

14 ते मेरी महिमा केरेली किजोकि तै मेरी गल्लां ज़ोली, किजोकि तै मेरी गल्लन मरां तुसन सेइं ज़ोली।

15 ज़ैन किछ बाजी केरूए, तैन सब मेरूए, एल्हेरेलेइ मीं जोवं, कि तै मेरी गल्लन मरां शुनालो।”

???? ???? ???? ???? ????????? ???? ???? ???? ???? ?????????

16 “थोडे च़िरेरां पत्ती तुसेई अवं फिरी नई लहनां, ते तैसेरे थोडे च़िरेरां पत्ती तुसेई अवं फिरी लांनोई।”

17 तैखन तैसेरे किछ च़ेलेई एप्पू मामेइं जोवं, इन कुने, “ए कुन ज़ोते, थोडे च़िरेरां पत्ती तुस मीं न लाएले, ते फिरी थोडे च़िरेरां पत्ती तुस मीं लाएले? कि अवं बाजी कां गाताई?”

18 तैखन तैनेई जोवं, “थोडे ज़ेरे च़िरेरां बाद, एन ज़ै ए ज़ोते, कुन आए? अस न जानम कि कुन?”

19 यीशुए एन ज़ैनतां, कि एना मीं पुछनू चातन, “कुन तुस मेरी इस गल्लेरे बारे मां एप्पू मामेइं गलवात करने लोरेथ, कि एस गल्लारो कुन मतलबे, थोडे च़िरेरां पत्ती मीं न लाएले, ते फिरी थोडे च़िरेरां पत्ती लाएले?

20 अवं तुसन सेइं सन्न-सन्न ज़ोताई, कि तुस लेरां देले ते शोग बनाले, पन दुनियारे लोक खुशी भोले, पन ज़ैखन तुस मीं दुबारां लाएले त तुश्शो दुःख, खुशी मां बेदलोई गानोए।

21 ज़ैखन कुआन्श ज़ातीए त तैस बड़ी तकलीफ भोतीए, किजोकि तैसेरे दुःखेरी घडी नेडे पुजोरीए, पन ज़ैखन बच्चो ज़मते त एस खुशी मां कि दुनियाई मां अक मैन्हु पैदा भोरोए अपनि तकलीफ बिस्सरी गाचे।

22 ते तुसन भी हुन्ना तेरही तकलीफे, पन अवं तुसन सेइं फिरी मिलेलो, ते फिरी तुश्शे मने मां खुशी भोली, ते खुशी तुसन करां कोई न नेही सकेलो।

23 तैस वक्ते तुस मीं कोई किछ न पुछेलो, अवं तुसन सेइं सन्न-सन्न ज़ोताई, तुस मेरे नंवे सेइं बाजी करां ज़ैन किछ मगथ, तै तुसन देलो किजो तुस मेरे च़ेलेथ।

24 तुसेई मेरू नवं घिन्तां हुना तगर बाजी करां किछ नई मगेरू, मगेले त तुसन मैल्ली गालू, ते तुश्शी खुशी पूरी भोली।”

???????? ???? ???? ???? ?

25 “अवं तुसन एना गल्लां मिसाल देइतां ज़ोताई, पन तै वक्त ओरोए कि अवं कहैन्न मां फिरी न ज़ोइलो, पन रोडे च़ारे बाजेरे बारे मां तुसन सेइं गल्लां केरेलो।

26 तैस वक्ते तुस मेरू नव घिन्तां प्रार्थना केरेले, अवं इन न ज़ोई, कि तुशु शेइ बाजी सेइं बिनती केरि।

27 किजोकि बाजी परमेशर तुसन सेइं एप्पू प्यार केरते, एल्हेरेलेइ कि तुसेईं मीं सेइं प्यार कियो, ते तुसेईं विश्वास कियोरोए कि अवं परमेशररी तरफां ओरोई।

28 अवं बाजी करां दुनियाईं मां ओरोई, हुनी दुनियाईं मरां भोइतां वापस बाजी कां ज़लोरोई।”

29 तैसेरे चलेईं ज़ोवं, “हुन्ना तू साफ-साफ गल लोरस केरने, ते कोई मिसाल देइतां न ज़ोस।

30 हुन्ना असेईं बुझू कि तीं सब किछ् पत्तोए, ते ज़रूरत नईं कि कोई तीं पुछ्छे, असां विश्वास केरतम कि तू परमेशर करां ओरोस।”

31 यीशुए तैन सेइं ज़ोवं, “हुनी तुस विश्वास केरतथ!

32 हेरा, तै वक्त एज्जी राओरोए बल्के पुजोरोए, कि तुस सब नेशतां अपने-अपने बत्तां गानेथ, ते अवं अकैल्लो शारनोईं पन फिरी भी अवं अकैल्लो नईं, किजोकि मेरो बाजी मीं सेइं साथीए।

33 मीं तुसन एना गल्लां एल्हेरेलेइ ज़ोईं, ताके तुसन शान्ति मैल्ले, किजो तुस मेरे चलेथ, तुस दुनियाईं मां मुसीबत त उठाताथ, पन हिम्मत रखा, मीं शैताने पुइ ज़ीत हासिल कियोरीए, ज़ै इस दुनियाईं पुइ राज़ केरते।”

## 17

### XXXXXXXXXXXXXXXXXXXX

1 ज़ैखन यीशुए अपने चलन सेइं एना सब गल्लां ज़ोईं, त तैनी उबरू स्वर्गेंरां तेकतां ज़ोवं, “हे बाजी हुन्ना तै वक्त ओरोए कि तू अपने मट्टेरी महिमा केर, कि मट्टू भी तेरी महिमा केरे।

2 किजोकि तीं तैस सेब्मी मैनन् पुइ अधिकार दित्तोरोए, ज़ैना तीं तैस दित्तोरेन हमेशारी ज़िन्दगी दे।

3 ते हमेशारी ज़िन्दगी तै आए, कि तैना सिर्फ तीं एक्की सच्च्चे परमेशरे ज़ानन् ते यीशु मसीहे भी ज़ानन् ज़ै तीं भेजोरोए।

4 मीं तैन कम ज़ैन तीं मीं दित्तेरू थियूं मुकेइतां धेरतली पुइ तेरी महिमा की।

5 ते हुनी हे बाजी मीं एप्पू सेइं साथी मेरी तै महिमा केर ज़ै दुनियारे पेइली मेरी तीं साथी थी।”

### XXXXXXXXXXXXXXXXXXXX

6 “मीं तेरू नवं तैन कां बांदू कियूं, ज़ैना तीं दुनियाईं मरां चुनतां मीं दित्तोरेन तैना तेरे थियो, पन तीं मींजो दित्तोरेन ते तैनेईं तेरे बचने पुइ अमल भी कियोरूए।

7 हुनी तैना ज़ानतन, कि ज़ैन किछ् तीं मीं दित्तेरू तैन सब तेरी तरफांए।

8 एल्हेरेलेइ मीं तैना गल्लां ज़ैना तीं मीं दित्तोरी थी, मीं तैन पुज्जेईं ते तैनेईं तैन पुइ विश्वास कियो, ते सज़ पिशानू, कि अवं तेरी तरफां ओरोई, ते ईं भी विश्वास कियो कि तीं अवं भेजोरोई।

9 अवं तैन केरे लेइ प्रार्थना केरताईं, दुनियारे लोकां केरे लेइ न केरि, पन तैन केरे लेइ ज़ैना तीं मीं दित्तोरेन, किजोकि तैना सब तेरे आन।

10 ते ज़ैन किछ् मेरू आए, तैन सब किछ् तेरूए, ते ज़ैन तेरू तैन मेरूए, ते इन सेइं मेरी महिमा बांदी भोईं।

11 मीं हुनी इस दुनियाईं मां नईं रानू, पन तैना हेजू इस दुनियाईं मां आन, ते अवं तीं कां एजताईं, हे पवित्तर बाजी, अपने तैस नव्वे सेइं ज़ैन तीं मीं दित्तोरूए, तैन केरि हफ़ाज़त केर, कि तैना असन बराबर भोन।

12 ज़ैखन अवं तैन सेइं साथी थियो, मीं तेरे तैस नव्वे सेइं, ज़ैन तीं मीं दित्तोरूए, तैन केरि हफ़ाज़त की, मीं तैन केरि देख भाल की, नाश भोनेबाले मैनेरे अलावा कोई नाश न भोव, एल्हेरेलेइ पवित्तरशास्त्रेरी गल पूरी भोइ।

13 पन हुन्ना अवं तीं कां एजताईं, ते इना गल्लां अवं दुनिया मां ज़ोताईं, कि तैना मेरी खुशी एप्पू मां पूरी केरन।

- 14 मीं तैन तेरू वचन तैन कां पुजेवरुए, ते दुनियारे लोकेई तैन सेइं दुश्मनी रख्खी, किजोकि जेन्चरे अवं दुनियारो नई, तैना भी नई।
- 15 मेरी प्रार्थना ई नई कि तू तैन दुनियाई मरां ने, पन तू तैन शैताने करां बच्चेइतां रख।
- 16 जेन्चरे अवं दुनियारो नई तैन भी इस दुनियारे नई।
- 17 तेरू वचन सच्चे। सच्चेरे जिरिये सेइं तैन पवित्र केर।
- 18 जेन्चरे तीं अवं दुनियाई मां भेजोरोई तेन्चरे मीं भी तैना दुनियाई मां भेजोरेन।
- 19 अवं अपना आप तैन केरे लेइ पवित्र करताई, ताके तैना भी सच्चेरे जिरिये सेइं पवित्र भोन।”

~~~~~

- 20 “मेरी प्रार्थना सिर्फ चले केर लेइ नई, पन तैन केरे लेइ भी जैना तैन वचनेरे जिरिये मीं पुइ विश्वास केरेले।
- 21 कि तैना सब अक भोन, जेन्चरे तू बाजी मीं मां आस, ते अवं तीं मां आई तेन्चरे तैना असन मां भोन, एल्हेरेलेइ दुनियारे लोक विश्वास केरन, कि तींए अवं भेजोरोई।
- 22 ते ते महिमा जै तीं मीं दित्तोरीए, कि जेन्चरे अस अक आम तैन भी अक भोन।
- 23 अवं तैन मां भोइलो, ते तू मीं मां भोलो, ताके तैन पूरो अकीजो भोए, ते दुनिया ज्ञाने कि तीं अवं भेजोरोई। जेन्चरे तीं मीं सेइं प्यार कियो, तेन्चरे तीं तैन सेइं भी प्यार कियो।
- 24 हे बाजी अवं चाताई कि जैना तीं मीं दित्तोरेन, जैडी अवं आई तैडी तैना भी मीं सेइं साथी भोन, कि तैना भी मेरी महिमा हेरन, जै तीं मीं दित्तोरीए। दुनियारे रखने करां भी पेइले तीं, मीं सेइं प्यार कियोरोए।
- 25 हे धर्मी बाजी, दुनियां तू न पिशानो, पन मीं तू पिशानो, ते तैन चलेई भी अवं पिशानो कि तीं अवं भेजोरोई।
- 26 मीं तैन पुइ बांदू कियू, कि तू कौन आस, ते बांदू केरतो रालो, जैस प्यारे सेइं तीं मीं प्यार कियो, तै तैन मां भोए, ते अवं तैन मां बनोरो रेई।”

18

~~~~~

(~~~~~ 26:47-56; ~~~~~ 14:43-50; ~~~~~ 22:47-53)

- 1 यीशुए ए प्रार्थना केरतां झाड़ी, त अपने चलन सेइं साथी किद्रोन वैदरे पार जेव। तैडी अक बाग थी ते ते तैसेरे चले तैडी जे।
- 2 तैस टलुवाने बालो यहूदा तैस ठारारो बाकम थियो, किजोकि यीशु अपने चलन सेइं साथी तैडी केही फेरेई जोरो थियो।
- 3 तैखन यहूदे, रोमी सिपाही ते किछू प्रधान याजक ते फरीसी केरे तरफां भेजोरे लोकन सेइं साथी एन्तां दीये ते मिसालां ते हथियार धिन्तां तैडी पुजाए।
- 4 तैखन यीशु सब गल्लां जैना तैस सेइं भोनेबेली थी, बुझतां तैन सेइं ज्ञाने लगे, “तुस केस लोरेथ तोपने?”
- 5 तैनेई तैस जुवाब दित्तो, “यीशु नासरी।” यीशुए तैन सेइं ज्ञोवं, “अवं तैए आई।” तैस टलुवाने बालो यहूदा भी तैन सेइं साथी खड़खड़ो थियो।
- 6 जैखन यीशुए ज्ञोवं, “अवं तैए आई,” तैना पत्त्रोवं जमीनी पुइ झडे।
- 7 एल्हेरेलेइ तैनी फिरी पुच्छू, “तुस केस लोरेथ तोपने?” तैनेई जुवाब दित्तो, “यीशु नासरी।”
- 8 यीशुए जुवाब दित्तो, “मीं त ज्ञोवं कि अवं तैए आई, अगर तुस मीं तोप्पतथ, त एन लोकन गाने देथ।”
- 9 एन एल्हेरेलेइ भोवं, कि तैन वचन पूरू भोए, “जैना तीं मीं दित्ते, तैन मरां मीं अक भी न हिरव।”
- 10 शमौन पतरसे कां अक तलवार थी, तैनी तलवार केडतां महायाजकेरे नौकरे बाई ते तैसेरो देइने कन्न केटव। तैस नौकरे नवं मलखुस थियूं।

11 तैखन यीशुए पतरसे ज़ोवं, “अपनि तलवार मियाने मां रख, कुन अवं तै दुखेरो कटोरो न पीं ज़ै मेरे बाजे मीं पीनेरे लेइ दितोए?”

~~~~~

12 तैखन रोमी फौवजी ते तैन केरे सूबेदार ते यहूदी केरे लीडेई यीशु टलाव तै बंधे।

13 ते पेइलो हन्ना कां नीयो किजोकि तै कैफारो शेरहो थियो ज़ै तैस सालेरो महायाजक थियो।

14 ई तैए कैफाए ज़ैनी यहूदन सलाह दित्तोरी थी, कि इश्शे लोकां केरे लेइ एक्की मैनेरू मरनू रोडू आए।

~~~~~

(~~~~~ 26:69-70; ~~~~~ 14:66-68; ~~~~~ 22:55-57)

15 शमौन पतरस ते अक होरो चेलो यीशु पत्ती जे। तै चेलो महायाजकेरो बाकम थियो, तै यीशु सेइं साथी महायाजकेरे अंगने मां जेव।

16 पन पतरस बेइर दारे पुइ खडो थियो, तै होरो चेलो ज़ै महायाजकेरो बाकम थियो वापस अव, ते तैस नौकरैनी सेइं ज़ै दारे पुइ थी गल केरतां पतरस अन्तर नीयो।

17 तैस नौकरेनां ज़ै दारे पुइ थी पतरसे पुच्छू, “कुन तू भी तैसेरे चलन मरां आस?” पतरस ज़ोवं, “नई अवं नई।”

18 ठंडारे वजाई सेइं नौकरेई ते मन्देरेरे पहरदारेई अग बालोरी थी, ते पतरस भी तैन सेइं साथी अग लोरो थियो तपने।

~~~~~

(~~~~~ 26:59-66; ~~~~~ 14:55-64; ~~~~~ 22:66-71)

19 तैखन महायाजक यीशुएरे चेलां त कने तैसेरी शिक्षारे बारे मां पुच्छने लगो।

20 यीशुए जुवाब दित्तो, “मीं त सेब्बी केरे सामने सैरी गल्लां कियोरिन, मीं त रोज़ तुश्शे प्रार्थना घरन ते मन्देरे मां, ते ज़ैडी यहूदी अकोट्टे भोतन तैडी शिक्षा दित्ती, ते छेपतां किछू भी न ज़ोवं।

21 तू मीं ए सवाल किजो पुछतस? शुन्नेबालन पुच्छू, कि मीं तैन सेइं कुन ज़ोवरूए? हेर तैन पतोए, कि मीं कुन ज़ोवरूए।”

22 ज़ैखन तैनी ज़ोवं, त मन्देरेरे पहरदारन मरां अक ज़ै तैडी खडो थियो, तैनी यीशुए थप्पड़ वैइतां ज़ोवं, “कुन तू महायाजक एन्चरे जुवाब देतस?”

23 यीशुए तैस जुवाब दित्तो, “अगर मीं किछू बुरू ज़ोरूए त साबत केर, पन अगर रोडू ज़ोरूए त थप्पड़ किजो वातस?”

24 तैसेरां बाद हन्ना यीशुएरे हेजू बन्धोरो थियो तेन्चरे महायाजक कैफा कां भेजो।

~~~~~

(~~~~~ 26:71-75; ~~~~~ 14:69-72; ~~~~~ 22:58-62)

25 शमौन पतरस खडखडो अग लोरो थियो तपने। तैखन केन्चे तैस पुच्छू, “कुन तू भी तैसेरे चलन मरां आस?” पतरस इन्कार केरतां ज़ोवं, “नई अवं नई।”

26 महायाजकेरे नौकरन मरां अक ज़ै तैसेरो रिश्तेदार थियो, जेसेरो कन्न पतरसे तलवारी सेइं कटोरो थियो, ज़ोने लगो, “कुन मीं तू बागी मां यीशु साथी नई लाहोरो?”

27 पतरसे फिरी इन्कार कियो, ते तैखन कुकड़े भी बांग दित्ती।

~~~~~

(~~~~~ 27:1-2, 11-14; ~~~~~ 15:1-5; ~~~~~ 23:1-5)

28 तेनेई यीशु झेझां कैफा करां रोमी गवर्नर पिलातुसेरे महले मां नीयो, पन तैना एप्पू अन्तर न जे, ताके भिटे न भोन, ते फ़सह तिहारेरी रोट्टी खेइ बटन।

29 तैखन पिलातुस तैन कां बेइर अव ते ज़ोने लगो, “तुस इस मैन्हु पुइ कुन इलज़ाम लातथ?”

30 तेनेई तैस जुवाब दित्तो, “ए मैन्हु मुज़म न भोथो त असेई ए तीं कां न थियो आन्नो।”

31 पिलातुसे तैन सेइं ज़ोने लगो, “तुस एस नेथ ते अपने कानूनेरे हिसाबे सेइं फैसलो केरा।” यहूदी लीडर ज़ोने लगे, “असन त केन्वी भी मारनेरी अज़ाज़त नई।”

32 एन एल्हेरेलेइ भोवं कि ज़ैन गल्लां यीशुए ज़ोरी थी, कि तै केरही मौतां मरेलो पूरी भोन।

33 तैखन पिलातुस फिरी महले मां जेव ते तैनी यीशु कुजेइतां तैस पुच्छ, “कुन तू यहूदी केरो राज़ोस?”

34 यीशुए जुवाब दित्तो, “तू ए गल अपनि भोती ज़ोने लोरोस कि होरेई मेरे बारे मां तीं सेइं जेवरीए?”

35 पिलातुसे जुवाब दित्तो, “कुन अवं यहूदी आई? तेरी कौमरे ते प्रधान याजकेई तू मेरे हवाले कियोरोस, तू ज़ो तीं कुन कियोरूए?”

36 यीशुए जुवाब दित्तो, “मेरू राज़ इस दुनियारू नई, अगर दुनियारू भोथू त मेरे चले जंग केरेथे, ते मीं यहूदी लोकां केरे प्रधानां केरे हथ्ये टलेयोने न देथे, पन हुन्ना मेरू राज़ इट्टेरू नई।”

37 पिलातुसे ज़ोवं, “त कुन तू राज़ोस?” यीशुए जुवाब दित्तो, “तू ज़ोतस कि, अवं राज़ोई, अवं एल्हेरेलेइ ज़रमोरोई, ते एल्हेरेलेइ दुनियाई मां ओरोई कि सच्चेरे बारे मां शिक्षा देई। ज़ैना सच्चे मन्तन तैना मेरी गल शुन्तन।”

38 पिलातुसे पुच्छ, “सच्च कुने?”

~~~~~

(~~~~~ 27:15-31; ~~~~~ 15:6-20; ~~~~~ 23:13-25)

एन ज़ोइतां तै यहूदी लीडरन कां जेव ते ज़ोने लगो, “अवं त एस मैन्हु मुरज़म न सेमझी।”

39 पन तुशशे रीतेरे मुताबिक अवं फ़सह तिहारेरे मौके पुड़ अक कैदी हथरां छड़ताई। कुन तुस चातथ कि अवं तुशशे लेइ यहूदी केरे राज़े हथरां छड़डी?

40 तैना फिरी ज़ोरे-ज़ोरे सेइं ज़ोने लगे, ए नन्ना इशशे लेइ वरअब्बा हथरां छड़। वरअब्बा अक डैकू थियो।

## 19

1 पिलातुसे सिपेहिन हुक्म दित्तो, कि यीशु नेइतां कोड़े बान।

2 ते सिपाहीयेईं कंटां केरू ताज बनेइतां यीशुएरे दोग्गे पुड़ रखू, ते तैस बैजनी रंगेरां लिगड़ां लुवां।

3 ते तैन केरे सामने तैन कां एइतां ज़ोने लगो, “हे यहूदी केरे राज़ा, नमस्कार!” ते तैस थप्पड़ बाहे।

4 तैखन पिलातुसे फिरी बेइर गेइतां लोकन सेइं ज़ोवं, हेरा, “अवं तैस तुसन कां फिरी बेइर आनताई, तुसन पतो लगे कि मीं एसमां कोई ज़ुरम न लेइहोव।”

5 ज़ैखन यीशु कंटां केरू ताज दोग्गे पुड़ रेखतां ते बैजनी लिगड़ां लेइतां बेइर आनो त पिलातुसे तैन सेइं ज़ोवं, “हेरा ई मैन्हु।”

6 ज़ैखन प्रधान याजक ते मन्दरेरे पहरदारेई यीशु लाव त ज़ोरे-ज़ोरे चिन्डां मैरतां ज़ोने लगे, “एस क़रूसे पुड़ ज़ादा, एस क़रूसे पुड़ ज़ादा!” पिलातुसे तैन सेइं ज़ोवं, “तुसे एस नेथ ते क़रूसे पुड़ ज़ादा, किजोकि अवं एसमां कोई दोष न लेहीं।”

7 यहूदी लीडर ज़ोने लगे, “इशशो भी कानूने, ते तैसेरे कानूनेरे मुताबिक ए मौतरे सज़ारे काबले। किजोकि ए अपने आपे जो परमेशेरू मट्टू ज़ोते।”

8 ज़ैखन पिलातुसे एन शुनू त तै मन्ना डरो।

9 ते फिरी अपने महले मां जेव ते यीशु सेइं फिरी ज़ोवं, “तू कोट्टां ओरोस?” पन यीशुए तैस किछ जुवाब न दित्तो।

10 पिलातुसे तैस सेइं ज़ोवं, “तू मीं सेइं गल कि न केरस? कुन तीं पतो नई कि मीं अधिकार कि अवं तीं हथरां छैडी या कूरुसे पुड़ च़ैदेई।”

11 यीशुए जुवाब दित्तो, “अगर ए अधिकार तीं परमेशेर करानं भोथो मैलोरो त तेरो कोई अधिकार मीं पुड़ न थियो भोनो, पन ज़ैनी अवं तेरे हवाले कियोरोई ते हच्छे पापेरो हकदार भोरोए।”

12 तैसेरां बाद पिलातुसे यीशु हथरां छुडनो चाव, पन यहूदी लोक चिन्डां मेरतां ज़ोने लगे, “अगर तू एस मैन्हु हथरां छाडेलो त तू महाराज्जेरे पासे नई, ज़ै कोई अपनो आप राज्जो बनाते तै महाराज्जेरे खलाफ़ भोते।”

13 ज़ैखन पिलातुसे एन शुनू त तैनी यीशु वेइर कुजेइतां अपने आदालतरे तखते पुड़ विश्शो ज़ैस जो इब्रानी भाषाई मां, गब्बता, ज़ोतन।

14 तै फ़सह तिहारैरी तियैरारी दिहाडी थी ते दुपाहरां केरे करीब थियो, तैखन पिलातुसे यहूदी लोकन जो ज़ोवं, “हेरा, ई तुशुशो राज्जो!”

15 पन तैना ज़ोरे-ज़ोरे सेइं ज़ोने लगे, “एस इट्ठां दूर ने! इट्ठां दूर ने! ते एस कूरुसे पुड़ च़ाढ़!” पिलातुसे ज़ोवं, “कुन अवं तैस ज़ै तुशुशो राज्जो कूरुसे पुड़ च़ैदी?” प्रधान याजकेई ज़ोवं, “महाराज्जेरे अलावा इशुशो कोई राज्जो नई।”

16 एसेरां बाद पिलातुसे यीशु तैन केरे हवाले कियो, ताके तैना तैस कूरुसे पुड़ च़ाढ़न।

ⓂⓂⓂⓂⓂⓂ ⓂⓂⓂⓂ ⓂⓂⓂⓂⓂⓂ ⓂⓂⓂⓂ

(ⓂⓂⓂⓂⓂ 27:32-44; ⓂⓂⓂⓂⓂ 15:21-32; ⓂⓂⓂⓂ 23:26-43)

17 यीशु अपनू कूरुस छुडतां खोपडी जो च़लो ज़ैस जो इब्रानी मां गुलगुता ज़ोतन।

18 तैडी तैनेई यीशु ते तैस सेइं साथी दूई डैकू भी कूरुसे पुड़ च़ाढ़ो, अक तैसेरे देइने पासे होरो बांए पासे ते यीशु मज़्जाटे।

19 पिलातुसे एक्की पेखडी पुड़ तैसेरो दोष लिखतां कूरुसे पुड़ लाई तैस पुड़ लिखोरू थियूं, “यीशु नासरी यहूदी केरो राज्जो।”

20 काई यहूदेई तैन पढ़, किजोकि ज़ैस जगाई यीशु कूरुसे पुड़ च़दोरो थियो ते जगा यरूशलेम नगरेरे नेडे थी, ते पेखडी पुड़ इब्रानी, लातीनी ते यूनानी भाषाई मां लिखोरू थियूं।

21 यहूदी केरे प्रधान याजकेई पिलातुसे कां दरखुवास की, “यहूदी केरो राज्जो न लिखा पन एन लिखा कि ए ज़ोते, ‘अवं यहूदी केरो राज्जोई।’”

22 पिलातुसे जुवाब दित्तो, “मीं ज़ैन लिखी छाडु, तैन लिखू।”

23 ज़ैखन स्पेहियेई यीशु कूरुसे पुड़ च़ाढ़ो त तैनेई यीशुएरे लिगडा बंटां ते तैन केरे च़ेवरे हिस्से किये, ताके सेबन अक-अक हिस्सो मैल्ले सिर्फ तैसेरू कोट बाकी राऊं, ज़ैन वा ते बुना तगर अक्के थियूं।

24 तैना एप्पू मामेइं ज़ोने लगे, “एसेरे टोटे केरनेरे बजाए शर्त रखम ज़ेसेरे नव्वे पुड़ परची निसेली लिगडां तैस भोलां।” एन एल्हेरेलेइ भोवं कि ज़ैन पवित्रशास्त्रे मां लिखोरू थियूं तैन पूरू भोए कि, “तैनेई मेरां लिगडां बंटा ते मेरे कोटेरे लेइ शर्त रखू ते सपैहीयेइ एन कियूं।”

25 यीशुएरे कूरुसे कां तैसेरी अम्मा ते तैसेरी अम्मारी बेइन मरियम ज़ै क्लोपासेरी कुआन्श थी, मरियम मगदलीनी खडखडी थी।

26 यीशुए अपनि अम्मा ते अक अपनो चेलो ज़ैस सेइं तै प्यार केरतो थियो, तैस कां नेडे खडखडो लाव त तैनी अपने अम्मा सेइं ज़ोवं, “हे कुआन्श, हेर, तेरू मट्टूए।”

27 ते चले जो ज़ोवं, “अज़ेरां बाद, ई तेरी अम्मा आए, तैनी चले तैखने तै अपने घरे नेइ।”

ⓂⓂⓂⓂⓂⓂ ⓂⓂⓂ

(ⓂⓂⓂⓂⓂ 27:45-56; ⓂⓂⓂⓂⓂ 15:33-41; ⓂⓂⓂⓂ 23:44-49)

28 ज़ैखन यीशुए ज़ानू कि हुनी सेरी गल्लां पूरी भोइजइ, एल्हेरेलेइ ज़ेन्चरे पवित्रशास्त्रेरे मां लिखोरू थियूं तैन पूरू भोवं त तैनी ज़ोवं, “मीं टलिश लगगोरीए।”

29 तैड़ी अक भांड सिरके सेइं भेरतां रखोरू थियूं, केन्चे जूफेरी डालडी तैस मां डोबतां यीशुएरे ऐशी सेइं हुराई।

30 ज़ैखन यीशुए च़ख्वू त तैनी ज़ाव, “पूरू भोव” ते क्रोड़ी टलोइतां अपने प्राण दित्ते।

???? ???? ?

31 ते एल्हेरेलेइ कि तै तियेरारी दिहाड़ी थी, होरसां आरामेरी दिहाड़ी ते कने फ़सह तिहार थियूं। ई यहूदी केरे लेइ खास दिहाड़ी थी, यहूदी न थिये चाते कि आरामेरे दिहाड़े लाशां कूरूसन पुड़ टंगोरी रान, एल्हेरेलेइ तैनेई पिलातुसे कां गइतां ज़ाव, कि मुर्जमां केरि ज़न्धां टलोइतां तैन केरि लाशां उन्डी उसालम।

32 सिपाही आए तैनेई पेइले मैनेरी ज़न्धां टलोड़ी, फिरी होरेरी भी, ज़ैना यीशु सेइं साथी कूरूसे पुड़ चाढोरे थिये।

33 पन ज़ैखन यीशुएरी वारी अई त तैनेई हेरू कि ते पेइले मेरि जेवरोए, ते तैनेई तैसेरी ज़न्धां न टलोड़ी।

34 पन सिपेहिन मरां एक्के अपनि बलम एन्तां यीशुएरे देल्लोड़ी मां बाई ते तैखने खून त पानी बगने लगू।

35 ज़ैनी मैने एन हेरू, तैनी गवाही दित्ती, ते तैसेरी गवाही सञ्जीए, ते तै ज़ानते, कि सञ्ज ज़ोते कि तुस भी विश्वास केरा।

36 एना सैरी गल्लां एल्हेरेलेइ भोइ कि पवित्रशास्त्रे मां लिखोरू पूरू भोए, “तैसेरी कोई हडी न टलोड़ी गाए।”

37 पवित्रशास्त्रेरे एक्की होरि वचने मां लिखोरूए, “तैस ज़ैनेई बलमी सेइं बाई तैना तैस हेरेले।”

???? ???? ?

(???? 27:57-61; ????? 15:42-47; ????? 23:50-56)

38 एना गल्लां केरे पत्ती अक मैन्हु यूसुफ नंखेरो ज़ै अरिमतियाह इलंखेरो रानेबालो थियो, पिलातुसे कां बिनती केरने लगो, कि यीशुएरी लाश दे, ए मैन्हु यहूदी लोकां केरे प्रधानां केरे डरे सेइं छेपतां यीशुएरो चेलो थियूं, तै पिलातुसे तैस अज़ाज़त दित्ती, ते तैनी यीशुएरी लाश नेही।

39 नीकुदेमुस भी अव, ज़ैनी एक्की बार राती यीशु सेइं मुलाकात कियोरी थी, तैनी गन्धरस ते एलवा आनोरे थिये, एन तेत्ती किल्लो थियूं।

40 तैखन तैनेई यीशुएरी लाश नेइतां यहूदी केरे दबनेरे रसमेरे मुताबिक तैस खुशबूदार चीज़ां लेइतां कफने मां पलेटतां रख्वी।

41 ज़ैड़ी यीशु कूरूस पुड़ चाढोरे थियो तैड़ी बागी मां अक नंखी कब्र थी, ज़ैस मां पेइली कोई लाश न थी।

42 ते ए यहूदी केरि आरामेरी तियेरारी दिहाड़ी थी ते कब्र भी नेडे थी तैनेई यीशुएरी लाश तैड़ी रख्वी।

## 20

???? ???? ?

(???? 28:1-8; ????? 16:1-8; ????? 24:1-12)

1 हफतेरी पेइली दिहैड़ी झेझां हेजू आंधरू थियूं मगदलीन इलंखेरी मरियम कवरी पुड़ आई, तैसां हेरू कि कवरी करां घोड भी खडो कियोरोए।

2 ते दौवइती शमौन पतरस ते होरि चले कां पुज़ी ज़ै यीशु सेइं प्यार केरतो थियो, ज़ोने लगी, “तैनेई प्रभुएरी लाश कवरी मरां केढतां नीयोरो, ते असन नई पतो ते कोडि रख्वोरोए।”

3 एना शुन्तां पतरस त अक होरो चेलो कब्रारे पासे चले।

4 ते दुइये साथी-साथी दौवइतां च़लोरे थिये, पन ते होरो दुइयोव चेलो पतरस करां अग्रोव निस्ती जेव, ते तैस करां पेइलो कवरी पुड़ पुज़ी।

5 तैनी लिकतां तक्कू ते कफन लाव ते अन्तर न जेव ।

6 तैखन शमौन पतरस भी पत्ती-पत्ती तैड़ी पुजो ते सिधो कबरी मां जेव तैनी हेरू कि तैड़ी लिगड़ां धियां ।

7 ते कफनेरो तै रुमाल भी जै यीशुएरे दोगे सेइं पलेटोरो धियो, लिगड़ां मां नईं पन अलग ठैरी धियो ।

8 तैखन तै होरो चेलो भी जै कबरी पुड़ पेडलो पुजोरो धियूं अन्तर जेव तैस भी लेइतां याकीन भोवं ।

9 किजोकि तैनेईं पवित्तरशास्त्रेरी ए गल न थी समझोरी जेसेरे बारे मां यीशुएरू मुइदन मरां ज्रीतू भोनू ज़रूरी धियूं ।

10 तैखन एना चले वापस घरजो ज़ले जे ।

*Matthew 28:9-10; Mark 16:9-11*

(*Matthew 28:9-10; Mark 16:9-11*)

11 पन मरियम कबरी करां बेइर लेरां देंती थी । लेरां देंती-देंती तैसां लिकतां कबरी मांजो तक्कू ।

12 त तैड़ी तैसां दूईं स्वर्गदूत लाए जैन छित्तां लिगड़ां लग्गोरां धियां, जैड़ी यीशुएरी लाश रखोरि थी तैड़ी अक शरेइंते ते होरो परेइंते विशशोरे लाए ।

13 तैनेईं तैस पुच्छ, “हे कुआन्शे तू किजो लोरिस लेरां देने?” मरियमा ज़ोवं, “तैनेईं मेरे प्रभुएरी लाश नेवरीए ते पतो नईं कोडि रख्वोरोए ।”

14 एना ज़ोते तै पत्रोवं बेदलोईं त तैड़ी यीशु खडखडो लाव, पन तैस पिशान न आई कि ए यीशुए ।

15 यीशुए ज़ोवं, “हे कुआन्शे तू किजो लेरां देने लोरिस? तू केस तोपने लोरिस?” तैसां समझू कि कोई बागवाने, तैसां ज़ोवं, “हे जनाब अगर तीं तै नीयोरोए त ज़ो कि तीं कोडि रख्वोरोए ते अवं तैस नेइ ।”

16 यीशुए तैस सेइं ज़ोवं, “मरियम!” तैसां तैसेरे पासे फिरतां इब्रानी मां ज़ोवं, “रख्वनी!” जेसेरो मतलबे हे गुरू ।

17 यीशुए ज़ोवं, “मीं सेइं न हुरा किजोकि अवं बाजी कां बाह हेजू नईं जोरो, पन मेरे दूलान गेइतां ज़ो कि अवं अपने बाजी ते तुश्शे बाजी ते अपने परमेशर ते तुश्शे परमेशरे कां बा ज़लरोईं ।”

18 मरियम मगदलीनी तैट्टां ज़ली जेईं ते चलन कां गेइतां तैन पतो दित्तो, “मीं प्रभु लाहोरोए ते तैनी मीं सेइं एना गल्लां की ।”

*Matthew 28:16-20; Mark 16:14-18; Luke 24:36-49*

(*Matthew 28:16-20; Mark 16:14-18; Luke 24:36-49*)

19 तेस्से दिहैड़ी जै हफतेरी पेडली दिहाड़ी थी इलोझरे मौके सारे चले एक्की ठैरी धिये, ते यहूदी लोकां केरे प्रधानां केरे डरे सेइं दार बन्द केरतां विशशोरे धिये, तैखन यीशु अव ते मझाटे खडो भोइतां ज़ोने लगो, “तुसन शान्ति मैलती राए ।”

20 एन ज़ोइतां तैनी अपने हथ ते अपनि देल्लोड़ी तैन हिराई, चले तैस हेरतां खुशी भोए ।

21 यीशुए फिरी ज़ोवं, “तुसन शान्ति मैलती राए, जेन्चरे बाजी अवं भेजोरोईं, तेन्चरे अवं भी तुसन भी इस दुनियाईं मां भेजताईं ।”

22 एन ज़ोइतां तैनी तैन जो फुक दित्ती ते ज़ोवं, “पवित्तर आत्मा नेथ ।

23 जैन केरे पाप तुस माफ़ केरेले त तैन केरे पाप माफ़ भोले, जैन केरे तुस रखेले तैना राले ।”

*Matthew 28:16-20; Mark 16:14-18; Luke 24:36-49*

(*Matthew 28:16-20; Mark 16:14-18; Luke 24:36-49*)

24 पन बादे मां 12 चलन मरां अक मैन्हु मतलब थोमा जैस दिदुमुस ज़ोतन, जैखन यीशु अव त

तै तैन साथी न धियो ।

25 जैखन होरि चले तैस सेइं ज़ोवं, “कि असेईं प्रभु लाव,” तैखन तैनेईं ज़ोवं, “ज़ां तगर अवं तैसेरे हथ्थन मां कीलां करां गत्तन मां एंगलोईं न छेड्डी, तातगर विश्वास न केरि ।”

26 अठ दिहैइना बाद यीशुएरे चले एक्की बार फिरी तैस्से टैरी बिश्शोरे थिये, ते थोमा भी तैड़ी थियो ते दार भी बंद थियूं, ते यीशु एइतां तैन मझाटे खडो भोव, ते तैन जो ज़ोने लगो, “तुसन शान्ति मैल्ले।”

27 फिरी तैनी थोमा जो ज़ोवं, “अपनि अंग्लोई आन ते मेरो हथ हेर ते अपने हथ्थे सेइं मेरी दल्लोड़ी हेर, शक न केर बल्के मीं पुड़ विश्वास केर।”

28 थोमा तैस जो ज़ोवं, “हे मेरे प्रभु हे मेरे परमेशर!”

29 यीशुए तैस जो ज़ोवं, “तीं लेइतां तीं मीं पुड़ विश्वास कियो, धन तैना ज़ैना बगैर लाहने मीं पुड़ विश्वास केरन।”



30 यीशुए अपने चेलां केरे सामने होरे भी बड़े चमत्कार कियोरे थिये, ज़ैना इस किताबी मां नई लिखोरे।

31 पन ज़ैना लिखोरन, एल्हेरेलेइ लिखोरन, कि तुस विश्वास केरथ, कि यीशु परमेशेरू मट्टू, मसीहे आए, ते विश्वास केरतां तैसेरे नंब्वे सेइं हमेशारी जिन्दगी हासिल केरथ।

## 21



1 बांदे मां यीशुए एप्पू एक्की फेरे फिरी अपने चलन पुड़ तिविरियुस समुन्दरेो बन्ने एन्चरे बांदो भोव।

2 शमौन पतरस, थोमा ज़ैस जो दिदुमुस ज़ोतन, नतनएल ज़ै गलीलेरे काना नगर मां रातो थियूं, ते जेब्वेरू मट्टू ते होरे चले भी तैड़ी थिये।

3 शमौन पतरसे तैन सेइं ज़ोवं, “अवं मेछली टलाने गाताई।” तैनेई ज़ोवं, “अस भी तीं साथी च़लतम।” तैना तैट्टां निस्से ते किशती मां च़दतां जे, पन तैस राती तैन किछ न मैल्लू।

4 झेझां सुबेलो यीशु बन्ने पुड़ एइतां खडो भोव, पन चलेई न पिशानो कि ए यीशुए।

5 तैखन यीशुए तैन ज़ोवं, “हे बच्चव, कुन तुसन कां किछ खाने जो आए?” तैनेई जुवाव दित्तो, “नई।”

6 यीशुए ज़ोवं, “ज़ाल किशतरे देइने पासे छडथ त तुसन किछ मेछली मैलनिन।” तैनेई ज़ाल छड्डु ते मेछली एत्ती ज़ाले मां लेगि कि ज़ाल खिचोने न लगू।

7 तैखन यीशु ज़ैस चले सेइं प्यार केरतो थियो तैनी पतरस सेइं ज़ोवं, “ए त प्रभुए।” ज़ेरू शमौन पतरसे शुन्नु कि प्रभुए, तैनी अपनो चोगो, ज़ै कम केरनेरे लेइ खोल्लोरो थियो लाव ते पैनी मांजो छाल मारी।

8 होरे चले ज़ैना किशती मां थिये ज़ाल ज़ैना मेछलेई सेइं भेरतां थियूं तैनेई खिचतां आनु, किजोकि तैना 100 मीटर दूर थिये।

9 ज़ैखन तैना बन्ने पुड़ ओस्से, त तैनेई मूरन पुड़ मेछली रेखोरिन ते इलेखी रोट्टी भी लेई।

10 यीशुए तैन सेइं ज़ोवं, “ज़ैना मेछली तुसेई टलेतोरिन तैन मरां किछ इरां आनां।”

11 शमौन पतरस किशती मां च़दो ते ज़ाल इलेखी पुड़ खिचतां आनु ज़ैस मां 153 मेछली लेगोरी थी, ते फिरी भी ज़ाल नई छ़ीदोरू।

12 यीशुए तैन सेइं ज़ोवं, “एज्जा केलोव खाथ।” पन चलन मरां केन्वी हिम्मत न अई कि पुछन, “कि तू कौन आस?” तैना ज़ानते थिये कि ए प्रभुए।

13 यीशुए रोट्टी दलाती ते तैना भी दिती ते मेछली भी दिती।

14 यीशु मुडदन मरां जीतो भोनेरां पत्ती टलेइयोवं फेरे अपने चलन पुड़ बांदो भोइ जेव।



15 जैखन तैनेई केलोव खाव, त यीशुए शमौन पतरसे सेइं ज़ोवं, “शमौन,” यूहन्नेरे मट्टा, “कुन तू होरि चेलन करां जादे मीं सेइं प्यार केरतस?” तैनी ज़ोवं, “हाँ प्रभु तू त मीं ज़ानतस कि अवं तीं सेइं प्यार केरताई।” यीशुए ज़ोवं, “मेरां गबडां चार।”

16 यीशुए फिरि तैन सेइं ज़ोवं, “शमौन, यूहन्नेरे मट्टा, कुन तू मीं सेइं प्यार केरतस?” तैनी ज़ोवं, “हाँ प्रभु, अवं तीं सेइं प्यार केरताई।” यीशुए तैस सेइं ज़ोवं, “मेरी भैड्डां सम्भाल।”

17 तैनी टलेइयोवं फेरे फिरि पुच्छू, “शमौन यूहन्नेरे मट्टा, कुन तू मीं सेइं प्यार केरतस?” पतरस दुःखी भोइतां ज़ोवं, “प्रभु तू एप्पू सैरी गल्लां ज़ानतस, तू ज़ानतस, कि अवं तीं सेइं प्यार केरताई,” यीशुए ज़ोवं, “मेरी भैड्डां चार।”

18 अवं तीं सेइं सच्च ज़ोताई, जैखन तू नौजवान थियो त अपनू मज्ज एप्पू बंधतो थियो, ते ज़ैडी चातो थियो, एप्पू गातो थियो, पन जैखन तू बुढो भोलो, त अपने हथ अग्रोवं केरेलो, ते होरो तेरू मज्ज बंधेलो ज़ैडी तू न चालो तैडी तीं नेले।

19 यीशुए ए गल ज़ोइतां इशारो कियो कि पतरस कोस मौतां मेरतां परमेशेरी महिमा बांदी केरेलो। तैखन यीशुए ज़ोवं, “मीं पत्ती च़ल!”

~~~~~

20 पतरसे फिरतां तक्कू, कि यीशु सेइं प्यार केरनेबालो चेलो तैस पत्ती च़लोरोए थियो, ए तै चेलो थियो ज़ैनी रोट्टी खाते यीशुएरे पासे लिकतां पुच्छेरू थियू, “हे प्रभु तै कौने, ज़ै तीं टलुवालो?”

21 पतरसे तैसेरे पासे तेकतां यीशुए पुच्छू, “हे प्रभु एस चले सेइं कुन भोलू।”

22 यीशुए ज़ुवाब दित्तो, अगर अवं चैई कि, “अगर मेरे वापस एज्जेने तगर ज़ीतो राव त एसमां तीं कुन? तू मीं पत्ती च़ल।”

23 एन्नेरे दूलान मां ए गल सेभीए फैली जेई, कि ए चेलो न मरेलो, पन यीशुए एन न थियू ज़ोरू, कि तै न मरेलो अगर अवं चैई कि, “अगर मेरे वापस एज्जेने तगर ज़ीतो राव, त एसमां तीं कुन?”

~~~~~

24 ई ते चलोए, ज़े इना गल्लां केरि गवाही देते, ते ज़ैनी एना गल्लां लिखोरिन, असां ज़ानतम कि तैसेरी गवाही सच्चिीए।

25 यीशुए होरां भी बडां कम्मां कियोरां थियां, अगर सेब्मी केरे बारे मां लिखनू भोए त अवं समझताई, कि तैना किताबां अज़ भोथी त तैन केरे लेइ इस दुनियाई मां ठार न थी भोनी।

## प्रेरितां केरां कम्मां



1 जनाब थियुफिलुस, मीं अपनि पेडली किताब मां तैना सैरी गल्लां लिखोरिन, जैना यीशु शुरू मां केरतो ते शिखालतो राब,

2 तैस दिहैड़ी तगर जेइस तै स्वर्गे मांजो नीयो जेव । तैस करां पेडले तैनी अपने चुनोरे प्रेरितन पवित्र आत्मार शेक्तेरे जिरिये सेइं किछ्हु हुक्म भी दित्तोरे थी ।

3 यीशुए दुःख झैलनेरां ते मौतरे बाद तैनी अपने जीते भोनेरां काई पक्कां सबूतां तैन हिरां, ते 40 दिहाइन तगर तैन लेइहोतो राब, ते परमेशेरे राज्जरे गल्लां शुनातो राब ।

4 एक्की फेरे जैखन यीशुए अपने चेलन सेइं साथी थियो तैनी तैन ठाकू, “कि तुस यरूशलेम नगरे मरां बेइर न गेइयथ ते मेरे बाजी परमेशेरो तै वादो पूरो भोनेरो इंतजार केरथ, जेसेरे बारे मां तुसेईं मीं करां शुनोरू भी आए ।

5 किजोकि यूहन्ना त लोकन पैनी सेइं बपतिस्मो दित्तो, पन तुसन थोडे दिहैड़ना पत्ती पवित्र आत्मा सेइं बपतिस्मो दित्तो गालो (यानी परमेशर पवित्र आत्मा भेजेलो जै तुसन सेइं साथी रालो)”



6 जताली प्रेरित दुबारा यीशु सेइं मिले, त तैनेईं तैस पुच्छ्हु, “हे प्रभु, कुन तू इस वक्ते फिरी इस्राएले तैसेरू राज देने बालोस?”

7 तैनी तैन सेइं ज़ोवं, “तैस वक्तेरो या जेइस तैना गल्लां भोली, तैन केरे बारे मां तुसन ज़ान्नेरी कोई ज़रूरत नई, जैना बाजी परमेशेरे अपने अधिकार मां रेखोरिन ।

8 पन पवित्र आत्मा जैखन तुसन पुड़ उतरेली त तुसन शक्ति मैलेली, ते तुस यरूशलेम नगर ते सारे यहूदिया ते सामरिया इलाकन मां बल्के धेरतारे हर पासे मेरे गवाह भोले ।”

9 एना गल्लां ज़ोनेरां पत्ती यीशु तैन केरे सामने हेरते-हेरते परमेशेरे तै स्वर्गे जो नीयो, ते विदलारां तै तैन केरे एछ्छन करां छुपाव ।

10 जैखन तैना यीशुए अम्बरे मांजो गांतो तकने लोरे थिये, त अचानक, दईं मडद जैन छित्तां लिगड़ां लगगोरां थियां तैन कां एइतां खड़े भोए ।

11 ते ज़ोने लगे, “हे गलीली मडदाव तुस खइखइ अम्बरेरे पासे कुन तकने लोरेथ? एहे यीशु जेन्चरे तुश्शे सामने परमेशेरे, स्वर्गे मांजो नीयो, जेन्चरे तुसेईं स्वर्गे मांजो गांतो लाहोरोए तेन्चरे फिरी एइतो लाएले ।”



12 जैखन चेल जेतून पहाड़ पुड़रां जैन यरूशलेम नगरेरे नेडे एक्की किलोमीटर दूरे, यरूशलेम नगरे मांजो वापस आए ।

13 नगरे मां एइतां तैना तैस कमेरे मां जे जैड़ी तैना रहते थिये, तै कमरो दुइयोवं छते थियो । तैना प्रेरित इना थिये, पतरस, यूहन्ना, याकूब, अन्दरयास, फिलिप्पुस थोमा, बरतुल्मै, मत्ती ते हलफईरू मट्टू याकूब ते शमौन जेलोतेस ते याकूबेरू मट्टू यहूदा रहते थिये ।

14 एना सब मडद ते किछ्हु होरि कुआन्शां जैनेईं यीशुएरी महत कियोरी थी, ते यीशुएरी अम्मा मरियम ते यीशुएरे दलान सेइं साथी अक मन भोइतां लगातार प्रार्थनाईं मां लगगोरे थिये ।

15 ते तैन्ने दिहाइन मां पतरस तैन दूलां केरि टोली मां जैन केरि तैधात कोई 120 थिये, पतरस खड़ो भोइतां ज़ोने लगे ।

16 “हे मेरे दूलाव, पवित्रशास्त्रेरी तै गल जै पवित्र आत्मा दाऊद राजेरी जिरिये पेइले ज़ोरी थी, पूरी भोनी ज़रूरी थी, तै गल यहूदारे बारे मां ज़ोरी थी, ज़ैनी यीशुएरे ट्लुवाने बालां केरि मद्दत कियोरी थी ।

17 तै असन सेइं साथी सेवा केरनेबालो थियो, ते असन साथी तै गनो गातो थियो ।

18 तेनी नीच कमेयरे लेइ यीशु ट्लुवाव, ते फिरी तेनी तेना पेइसे यहूदी लीडरन वापस दित्ते, ते तेनेई तैन पेइसां केरू अक ऊडार घिन्नु, ज़ैडी तै दोगगरे भारे खिरकोरो थियो, ते तैसेरू पेट फेटतां तैसेरी एंटलोडी बेइर निस्सी ।”

19 यरूशलेम नगरेरे सारे लोकन ए पतो लगगोरो थियो, तेनेई अपने भाषाई मां तैस उडारेरू नवं हकलदमा रख्वू, ज़ेसेरो मतलबे, “खूनेरू ऊडार ।”

20 किजोकि दाऊदे भजना केरि किताबी मां लिखोरूए कि,  
“तैसेरू घर उजड़े,

ते तैस मां कोई बसने बालो न भोए,

ते इन भी लिखोरूए, तैसेरी पदवी कोई होरो ने ।”

21 एल्हरेलेइ एन ज़रूरीए कि अक एरो मैन्हु चुनो गाए, जै प्रभु यीशुएरे सारे कम्मां केरे गवाह भोए, यानी यीशुएरो यूहन्ना करां बपतिस्मो नेने करां लेइतां असन करां यीशुएरे स्वर्गे गाने तगर

22 तैन मरां अक मैन्हु चुनो गाए, जै असन सेइं साथी यीशुएरे ज़ीते भोनेरो गवाह भोए ।


23 तेखन तेनेई दुइये ज़ने नामज़द किये, अक यूसुफ ज़ैस जो बरसबास ज़ोते थियो, ज़ेसेरो खताव यूस्तुस थियो, ते दुइयोवं मत्तियाह थियो ।

24 ते एन ज़ोइतां प्रार्थना की, “हे प्रभु, तू सेब्भी केरे दिले ज़ानतस ते असन पुइ बांद केर, कि इन दुईन मां तीं कौन ज़ेरो चुनोरोए ।

25 कि तै इस सेवकाई ते प्रेरिताइयोरो पद ने, जै यहूदा शैरतां अपने ठैरी जेवरोए ।”

26 तेनेई तैसेरे बारे मां शर्त रखेरू थियूं, ज़ैन मत्तियाह नंब्वे पुइ निस्सू, एल्हरेलेइ ते 12 प्रेरितन सेइं साथी गनो जेव ।

## 2



1 ज़ेइस यहूदी केरे पिन्तेकुस्त तिहारेरी दिहाड़ी अई, त तैना सब एक्की ठैरी अकोट्टे थिये ।

2 अचानक अम्बेरां आवाज़ आई, ज़ेन्चरे बडो बात च़लने लोगोरो थियो, ते तैस सेइं सारू घर घुमने लगू ज़ैडी तैना बिश़ोरे थिये ।

3 ते तेनेई अगारी लप्परी ज़ेरि ज़िभां लेई, ज़ैना अलग-अलग भोइतां तैन सेब्बन पुइ एइतां टिकी ।

4 ते तैना सब पवित्र आत्माई सेइं भरपूर भोए, ते आत्माे वरदाने सेइं तैना अलग-अलग भाषा केरने लगे ।

5 तैस वक्ते मां, बडे यहूदी भक्त ज़ैना तिहारे मां दुनियारी सैरी मुलखन मरां ओरे थिये, तैना यरूशलेम नगरे मां राने लोरे थिये ।

6 ज़ैखन तेनेई ए बातेरी ज़ेरि आवाज़ शुनी त बडे लोक ज़म्हां भोए, ते सब लोक बडे हैरान रेइजे, किजोकि हर कोई चलन अपने-अपने भाषाई मां गल्लां केरते शुन्ने लोरे थियो ।

7 ते सब बडे हैरान भोइतां ज़ोने लगे, हेरा, “कुन एना ज़ोनेबाले सारे गलील इलाकेरे रानेबाले नई?

8 फिरी एन कुन भोइ रावरूए कि, असन मरां हर कोई अपनि-अपनि भाषा शुन्ने लोरोए ।

9 असन मरां किच्छ इन इलाकन मरां आन, पारथी, मेदी, एलामी ते मेसोपोटामिया, यहूदिया, कप्पदकिया, पुन्तुस ते आसिया,



10 फरूगिया, पंफूलिया, मिस्र मुलख, ते लीबिया मुलखे जै कुरेन नगरेरे नेडे, इन सब मुलखां केरे रानेबाले ते रोमी मुसाफर,

11 कुन यहूदी, ते कुन यहूदी पंथ धारण केरनेबाले, कुरेती ते अरब मुलखेरे लोक भी आन, पन अस अपनि-अपनि भाषाई मां तैन करां परमेशेरां बड्डां-बड्डां कम्मां केरि चर्चा शुन्ने लोरेम ।”

12 तैना सब बडे हैरान भोइ जे ते घबरेइतां एक्की होरि पुच्छने लगे, “कि एन कुन भोइ रावरूए?”

13 पन किछ तैन केरि हासी बनेइतां ज़ोने लगे, “कि एनेई सज़री शराप पियोरीए ।”

~~~~~

14 तैखन पतरस 11 प्रेरितन सेइं साथी खडो भोव, ते बडे ज़ोरे सेइं ज़ोने लगे, “हे लोकव हे यहूदियारे रानेबालव ते हे यरूशलेम नगरेरे राने बालाव, मेरी गल ध्याने सेइं शुना, अवं तुसन ज़ोताई इड़ी एन कुन भोने लोरूए ।

15 ज़ैन तुस बुझने लोरेथ तैन नई, एना मैन्हु नशे मां नई, किजोकि हुन्ना त झेझेरे नौ बज़ोरेन,

16 बल्के ए तै गल्ले, ज़ै परमेशेरे योएल नेबेरे ज़िरिये ज़ोरी थी,

17 परमेशर ज़ोते कि, आखरी दिहैइन मां एरू भोलू,

अवं अपनि आत्मा सेबी लोकन देइलो,
ते तुशशां मट्टां कुइयां भविष्यवाणी केरेलां,
ते तुशशे नौजवान दर्शन हेरेले,
ते बुढे सुपना हेरेले ।

18 बल्के अवं तैन दिहैइन मां अपने सेवादार मड्डन ते सेवादार कुआन्शन पुड
अपनि आत्मा उतरेलो, ते तैना भविष्यवाणी केरेले ।

19 अवं अम्बेरे मां आजीब-आजीब कम्मां
ते ज़मीनी पुड निशान,

यानी अग, खून ते कालो तूएरी बिदलार हिरयेलो ।

20 प्रभुएरी दिहाड़ी एजने करां पेइले,
दिहाडो आंधरो भोइ गानोए,
ते चाँदनी खूनेरी ज़ेरि भोनीए,
तै अक महान ते खास दिहाड़ी भोनीए ।

21 ते ज़ै कोई परमेशेरू नवं घिन्नेलो तैस मुक्ति मैलेली ।”

22 “हे इस्राएलेरे लोकव, इना गल्लां शुना, यीशु नासरत नगरेरो अक मैन्हु थियो, ज़ै परमेशर तुशशे लेइ भेजोरो थियो, ते एस गल्लारी तसदीक तैसेरे खास चमत्कारां केरे सबूतेई सेइं भोचे, ज़ैना परमेशेरे तैसेरे ज़िरिये सेइं इशशे सामने हिरां, जेन्चरे कि तुस एप्पू भी ज़ानतथ ।

23 ज़ैखन तै परमेशेरे इंतज़ामेरे पूरे मौके पुड ज़ानेरे हिसाबे सेइं ट्लुवाव, ते तुसेई तै अधर्मी लोकां केरे हथ्थे करूसे पुड टंगेइतां माराव ।

24 पन परमेशेरे तै मौतरे सकेंजे मरां छुटेइतां ज़ीतो कियो, किजोकि एन भोइ न थियू सकतु, कि तै मौतरे कब्जे मां राए ।

25 किजोकि दाऊद मसीहेरे बारे मां एन ज़ोते,
हेरा, प्रभु हर वक्त मेरे सामने,
अवं तैन लोकन करां न डरेलो ज़ैना मेरो नुकसान चातन ।

26 तांए मेरो दिल बडो खुश भोव, ते अवं खुशी सेइं ज़ोइलो,
बल्के मेरी जान उमीदी सेइं ज़ीएली ।

27 किजोकि तू मेरे प्राणन पाताले मां राने न देलो,
ते न अपने पवित्तर मैन्हु शड़ने देलो!

28 तीं मीं ज़िन्दगरी बत हेरेवरिए,

तू अपने हज़ूरी सेइं मीं भरपूर केरेलो ।”

29 “हे मेरे ढूलाव, अवं कौमारे बुजुर्ग दाऊदेरे बारे मां तुसन सेइं साफ-साफ ज़ाई सकताई, कि तै मेरि भी जेव, ते दब्बो भी ते तैसेरी कबर अज़ तगर इश्शो सामने मौजूद ।

30 तै नबी थियो, ते तै ज्ञानतो थियो, कि परमेशेरे तैस सेइं वादो कियोरो थियो, ‘अवं तेरी खानदेंनी मरां अक मैन्हू तैसेरे तखते पुड़ विशैलेलो ।’

31 तैनी पेडले भोनेबैली गल्लां ते मसीहेरे मुड़दन मरां ज़ीते भोनेरे बारे मां बियांन कियेरू थियूं, कि न तै पाताले मां राने देलो, ते न अपने पवित्र मैन्हू शड़ने देलो!

32 “एहे यीशु परमेशेरे ज़ीतो कियो ज़ेसेरे अस सब गवाह आम ।

33 ते हुना ते स्वर्गे मां खास टैरी यानी परमेशेरे देइने पासे आए । ते तैने बाजी परमेशेरे करां पवित्र आत्मा हासिल की, ज़ेसेरो तैने वादो कियोरो थियो, यीशुए असन पवित्र आत्मा भरपूरी सेइं दित्तोरीए, ज़ैन तुस लातथ ते शुन्तथ ।

34 किजोकि दाऊद त एप्पू स्वर्गे मां नई ज़ोरो, पन फिर भी तै एप्पू ज़ोते, प्रभु परमेशेरे मेरे प्रभु सेइं ज़ोवं, मीं सेइं साथी राज़ कर ।

35 ज़ांतगर अवं तेरे दुश्मन तेरे अधीन न केरि ।

36 एल्हेरेलेइ, इस्राएलेरे सारे लोकन पतो लगगे, कि परमेशेरे, यीशु ज़ै तुसेईं क़रुसे पुड़ चाढ़ो ते प्रभु भी कियो ते मसीह भी कियो ।”

37 एना गल्लां शुन्तां तैन बड़ो एसास भोव कि तैना पापिन, तैखन तैनेई पतरसे ते होरि प्रेरितन सेइं ज़ोवं, “हे ढूलाव अस कुन केरम?”

38 पतरसे तैन सेइं ज़ोवं, “पापन करां मनफिराथ ते तुसन मरां सारे यीशु मसीहेरे नब्बे सेइं बपतिस्मो घिन्ना, त परमेशर तुसन माफ़ केरेलो ते पवित्र आत्मा तुसन इनामे मां मैलेली ।

39 एल्हेरेलेइ कि ए वादो तुसन त तुश्शी औलादी सेइं आए ते तैन सेबन सेइं ज़ैना दूर-दूर रातन, ते ज़ैन इश्शो प्रभु परमेशेरे एप्पू कां कुजाते ।”

40 पतरसे होरि भी बेड़ि गल्लां केरि गवाही दित्ती, ते तैन बार-बार ज़ोवं, कि अपनो आप एस टैरी कौमी करां बचाथ ।

41 ते तैनेई तैसेरी गल्लां कबूल की, तैनी तैन बपतिस्मो दित्तो, तैस दिहैडी लगभग कोई 3000 मैन्हू तैन मां शामिल भोए ।

42 एना लोक प्रेरितन करां शिक्षा हासिल केरते थिये, ते संगती रखते थिये, ते साथी रोट्टी खाते थिये, ते प्रभु भोज मनाते थिये ते प्रार्थना केरने मां मघन रहते थिये ।

~~~~~

43 प्रेरितां केरे ज़िरिये सेइं बड़ चमत्कार ते निशान भोते थिये, ते यरूशलेमेरे सारे लोक डेरि जे ।

44 यीशु मसीह पुड़ विश्वास केरनेवाले सारे अकोट्टे रहते थिये, ते सैरी चीज़न मां एक्की होरि बराबर हिस्सेदार रखते थिये ।

45 ते तैना अपनि जेइदात ते माल सबाव बेचतां एक्की होरेरी ज़रूरतेर मुताबिक रकम बेंटतां सेबनी केरि ज़रूरत पूरी केरते थिये ।

46 तैना रोज़ अक मन भोइतां मन्देरे मां अकोट्टे भोते थिये, ते घरन मां साथी रोट्टी खाते थिये ते प्रभु भोज मनाते थिये, ते अकोट्टे भोइतां खुशी सेइं खाते थिये ।

47 तैना परमेशेरेरी तारीफ़ केरते थिये, तैना सैरी केरि नज़री मां रोडे थिये । ज़ैन पापन करां मुक्ति मैलती थी, परमेशर तैन लोकन तैन केरि टोली मां शामिल केरतो थियो ।

### 3

~~~~~

1 एक्की दिहाइ पतरस ते यूहन्ना प्रार्थना केरने दीसेरे ट्लेइ बज़ेइ मन्देरे मांजो च़लारे थिये ।

2 ते मैनेई अक जर्मनेरो टोटो छुइतां आनोरोए थियो, ते तैस मन्देरे दारे पुइ छुइते थिये, जैस दारे नव "रोड्डू" थियू, ताके अन्तर गाने बालन करां भीख मगगे।

3 जैखन तैनी पतरस ते यूहन्ना मन्देरे मांजो गांते लाए त तैन करां भीख मगने लगगे।

4 पतरस ते यूहन्ना तैसेरे पासे खेडोइतां ज़ोने लगे, "इशशे पासे तक।"

5 ते तैस उमीद भोइजेइ कि एन करां किछ मैलेलू, तै तैन केरे पासे तकने लगगे।

6 पतरसे ज़ाव, "सोन्नू चाँदी त असन कां अथ्थी नई, पन ज़ैन मीं कां आए तैन अवं तीं देताई, तू यीशु मसीह नैसेरे नव्वे सेइ खडो उठ ते च़ल फिर।"

7 पतरसे ज़ेरो तैसेरो देइनो हथ टलेइतां खडो कियो, त तैसेरे पावन मां ते गुडन मां ताकत आई।

8 ते तै तैखने खडो भोव, ते च़लने फिरने लगगे, ते फिरी छालां मारतो ते परमेशेरी तारीफ़ करतो तैन सेइ साथी मन्देरे अंगने मां च़लो जेव।

9 ते सेम्भी लोकेई तै च़लतो फिरतो ते परमेशेरी तारीफ़ करतो लाव।

10 ते पिशानो ई त तैए, जै मन्देरे रोडे दारे पुइ विशतां भीख मगतो थियो, ते जै चमत्कार एन लोकां केरे सामने भोव, त तैना लोक बडे हैरान राए।

~~~~~

11 जैखन ते मैन्हु पतरस ते यूहन्ना टलेइतां खडखडो थियो, त सब लोक जैना तैडी खडखडे थिये, बडे हैरान भोइतां सुलैमानी अंगने मां देवइतां तैन कां आए।

12 पतरसे एन हेरू त तै लोकन कां एन्चरे खडो भोव, ते ज़ोने लगगे, "हे इस्राएली लोकव तुस एस गल्ली पुइ किजो हैरान भोरेथ, ते असन एन्चरे किजो तकने लोरेथ, असेई अपने शक्ति या भक्ति सेइ ए टोटो मैन्हु च़लने फिरनेरे काबल नई बनेवरोए।

13 अब्राहम ते इसहाक ते याकूबेरे परमेशेरे ते इशशे पूर्वजां केरे परमेशर अपने दासे यीशु महिमा दित्ती, पन तुसेई तै यहूदी लीडन कां दित्तो कि तैना तैस मारन। पिलातुसे तै हथरां छुइनेरो इरादो कियो, पन तुसेई यीशुएरो इन्कार कियो।

14 तुसेई यीशु अक एरो पवित्र ते धर्मी मैन्हु रद कियो, ते पिलातुसे कां दरखुवास की, कि तै तुशशे लेइ अक कातली हथरां छुडे।

15 तुसेई त ज़िन्दगी देनेबालो मारो, पन अस गवाह आम, कि परमेशेरे तै मुइदन मरां ज़ीतो कियो।

16 तैसेरे नव्वेरी शक्ति एस टोटो, जै तुशशे सामने ते जैस तुस ज़ानतथ शिफा दित्तोरिये ते ए मैन्हु यीशुएरे नव्वे सेइ ते यीशु पुइ विश्वास केरने सेइ बिलकुल ठीक भोव, ते ए एप्पू तुशशे सामने।

17 "हे मेरे दूलाव अवं ज़ानताई कि ज़ैन किछ तुसेई ते तुशशे लीडेई यीशु सेइ कियू, तैन तुसेई अनज़ान भोइतां कियू। किजोकि तुसन न थियो पतो कि तै मसीह आए।

18 पन परमेशेरे एना सैरी गल्लां जैना तैनी अपने नेबी केरे ज़िरिये ज़ोरी थी, कि मसीह दुःख ऊठालो ते मरेलो ते तैनी तैना एन्चरे पूरी की।

19 बस्सा पापन करां मनफिराथ ते परमेशेरे पासे फिरा ते तै तुशशे पाप माफ़ केरेलो, ते परमेशेरी तरफां तुशशे लेइ परमेशेरे तरफां रोडे दिहाडे एज्जेले।

20 ते तै मसीह यानी यीशु जै तैनी ठहरावरो आए, तुशशे लेइ भेजे।

21 पन ज़ांतगर तैना सैरी चीज़ां बहाल न केरे, ज़ैन केरे बारे मां परमेशेरे बडे पेइले अपने पवित्र नेबी केरि ज़बानी ज़ोरूए, तांतगर यीशुएरू स्वर्गे मां रानू ज़रूरीए।

22 जेन्चरे मूसा एस बारे मां ज़ोरू थियू, परभु परमेशर तुशशे दूलान मरां तुशशे लेइ मेरो ज़ेरो अक नबी भेजेलो, ज़ैन किछ तै तुसन सेइ ज़ोए, तुस तैसेरी गल शुनथ।

23 पन ज़ै तैस नेबेरी गल न शुनेलो, तै लोकन मरां नाश कियो गालो।

24 ते शम्पूएल परमेशेरी गल्लां ज़ोनेबाले करां देइतां पेइले तमाम नेबेई इन दिहाडां केरे बारे मां शुनावरू।

25 तुस नेवी केरि खानदेंनी ते ज़ै करार परमेशरे इशशे पूर्वजन सेइं कियोरो थियो, तैस मां तुस सब शामलथ, परमेशरे अब्राहमे सेइं जोरू थियूं, कि तेरे मट्ठेरे ज़िरिये सेइं दुनियारी तमाम कौमन बरकत मैलेली।

26 परमेशरे अपनो सेवक मुडदन मरां ज़ीतो कियो ते पेइलो तुसन कां भेजो, ताके तुसन तै बरकत दे, कि तुसन मरां हर कोई पापेरी ज़िन्दगी शैरतां परमेशरेरे पासे फिरे।”

4

???????? ???? ???? ?

1 हेजू पतरस ते यूहन्ना लोकन सेइं गल्लां केरते थिये, त किछ याजक ते मन्देरेरे पेरहेदार ते किछ सद्की लोक तैड़ी पुजे।

2 तैना बडे सेरकोए, कि पतरस ते यूहन्ना लोकन एरी शिक्षा देते कि परमेशरे मरें लोकन ज़ीतो केरेलो, जेन्चरे तैनी यीशु मुडदन मरां ज़ीतो कियोरोए।

3 तैनेई तैना दुइयोवं दिहेड़ी तगर गिरफ्तार रखे, किजोकि तै डलोझारो मौको थियो।

4 पन केही लोकेई वचन शुन्तां यीशु पुड विश्वास कियो, ते तैन केरि तैधात 5000 मडद भोइ।

5 होरसां एरू भोवं कि तैन केरे लीडर ते बुजुर्ग ते शास्त्री यरूशलेम नगरे मां जम्हां भोए।

6 हन्ना महायाजक तैड़ी थियो, ते कैफा ते यूहन्ना महायाजक ते सिकन्दर ते खानदेंनेरे हारे लोक भी तैड़ी थिये।

7 तैनेई पतरस ते यूहन्ना मझाटे खडे किये ते तैन पुच्छू, “तुसेईं केसेरे शेक्ति या केसेरे अधिकारे सेइं एन कम कियोरूए?”

8 तैखन पतरस पवित्तर आत्माई सेइं भरपूर भोइतां तैन एन्चरे सेइं ज़ोने लगो, “हे कौमरे लीडराव ते बुजुर्गव।

9 अगर अज असन एल्हेरेलेइ पूछ ताछ की गातीए, कि असां एक्की रोडे कम्मरो जुवाव देम, ज़ैन असेईं एक्की टोंटे मैनेरे लेइ कमाव ते तैस शिफ़ा दित्ती।

10 ते तुसन ते सारे इसराएलिन ए पतो लगगे, कि ए मैन्हु यीशु मसीह नैसरेरे नखेरी शक्ति सेइं बेज्जोइतां तुशशे सामने खडोए, ज़ै यीशु तुसेईं कूरूसे पुड चाढारो थियो, पन परमेशरे तै मुडदन मरां ज़ीतो कियोरोए।

11 ए तैए घोडे, ज़ै तुसेईं मिस्त्रेई रद्दी कियोरो थियो, पन तैए घोड कूनेरो खास घोड भोइ जेव।

12 ते पापां केरि माफ़ी केन्ची होरेरे ज़िरिये सेइं नई, किजोकि अम्बेरां बुन मैनन मां कोई होरू दुइयोवं नवं नई दित्तरे, ज़ेसेरे ज़िरिये सेइं मुक्ति मैल्ले, सिर्फ़ यीशुएरे नखे सेइं मुक्ति आए।”

13 ज़ैखन तैनेई पतरस ते यूहन्नारी दिलेरी हेरी, त तैखन तैन पतो लगगे, कि एना त अनपड ते मामुली मैन्हु आन ते तैना बडे हैरान भोए, तैखन तैनेई बुझू कि एना लोक यीशु सेइं साथी राहारेन।

14 तैनेई पतरस ते यूहन्नारे खलाफ किछ न ज़ोई बट, एल्हेरेलेइ कि ज़ै मैन्हु बेज्जोरो थियो, तै मैन्हु तैन सेइं साथी खडखडो थियो।

15 तैखन तैनेई पतरस ते यूहन्ना महासभा करां बेइर नेनेरे लेइ ज़ोवं, ते एप्पू मामेईं मुशोरो करेने लगगे।

16 “असां एन लोकन सेइं कुन केरम? यरूशलेम नगरेरे सब लोक ज़ानतन कि एन लोकेई अक बडो चमत्कार कियोरोए, ज़ेसेरो अस इन्कार न केरि बटम।

17 पन एल्हेरेलेइ अस एन न चाम कि ए गल लोकन मां जादे मुशूर न भोए, रोडू त एन्ने कि अस एन धमकेइतां ज़ोम कि अज़ेरे बाद एन नवं घिन्तां केन्ची सेइं गल न केरन।”

18 तैखन तैनेई पतरस ते यूहन्ना अन्तर कुजेइतां हदैयत दित्ती, “यीशुएरू नवं घिन्तां केन्ची सेइं गल न केरथ, ते न शिक्षा देइयथ।”

19 पन पतरस ते यूहन्ना तैन जुवाव दित्तो, “तुस एप्पू ए फैसलो केरा, कि कुन ए गल परमेशरेरी नज़री मां ठीके, फिरी अस तुशशी गल मन्म कि परमेशरेरी?

20 किजोकि एन नई कि जैन किछ असेई शुनू ते लाहू, ते तैसेरे बारे मां ज़ोतम ।”

21 तैखन तैनेई पतरस ते यूहन्ना धमकेइतां हथरां छुडे, दरासले मां तैना फैसलो न केरि सके, कि एन सज़ा त देम पन केन्चरे देम, किजोकि तमाम लोक ए चमत्कार हेरतां परमेशेरी महिमा केरते थियो।

22 किजोकि ज़ैस मेन्हु पुइ शिफ़ा देनेरो चमत्कार हिरावरो थियो, ते 40 सालन करां जादे उमरारो थियो।

???????? ????????????? ????? ?????????????

23 पतरस ते यूहन्ना तेट्टा छुटनेरां बाद अपने लोकन कां चले जे, ते ज़ैन किछ प्रधान याजक ते बुजुर्गेई तैन ज़ोरू थियू, तैन सेई शुनावं।

24 ज़ैखन तैनेई एना गल्लां शुनी त अक भोइतां बड़े ज़ोरे सेई परमेशेरे कां प्रार्थना केरने लगे, तीं धरती त कने अम्बर ते समुन्द्रे ते ज़ैन किछ एसमां आए बनोरूए।

25 तीं पवित्तर आत्माेरे ज़िरिये सेई अपने सेवक इश्शे पूर्वज दाऊदरी ज़िरिये ज़ोरू थियू,

“कि कौमेई किजो हैल्लो मच्चाव?

ते मुलखां-मुलखां केरे लोक किजो बेफैइदे खियाल केरतन?

26 ज़मीनेरे राजे, प्रभु ते तैसेरे मसीहेरे खलाफ खड़े भोए ते हाकिम साथी खड़े भोए।’

27 “एन सच्चे कि हेरोदेस पुन्तियुस ते पिलातुस भी गैर यहूदी ते सब इस्राएली लोकन सेई साथी तेरे पवित्तर सेवक यीशुएरे खलाफ नगर-नगरे मां खड़े भोए, ज़ै तीं मसीह ठहरावरो थियो।

28 तैना एल्हेरेलेइ अकोट्टे भोरे थियो कि ज़ैन किछ तू अपनि कुदरतारो इरादेरे मुताबिक पेइले तैनी ठहरावरू थियू, तैस पुइ अमल केरम।

29 हुनी हे प्रभु, तैन केरि धेमकी शुन, ते अपने दासन इन वरदान दे, कि तेरू बच्चन बेइ दिलेरी सेई लोकन शुनेई बटम।

30 अपनो हथ अग्रोवं रख, ते अपने पवित्तर सेवक यीशुएरे नव्वे सेई शिफ़ा दे, ते चमत्कार ते निशान हिरा।”

31 ते ज़ैखन तैनेई प्रार्थना की, त ज़ैस ठैरी तैना अकोट्टे जम्हां थियो, त तै ठार हिल्ली, ते तैना सब पवित्तर आत्माई सेई भेरोए, ते परमेशेरेरू बच्चन बेइ दिलेरी सेई शुनाने लगे।

???????????? ????????? ????????? ?????????

32 विश्वास केरनेवालां केरि मण्डली अक मन ते अक जान थी, कोई भी एरो न थियो ज़ै अपनो माल अपनो समझतो भोए, बल्के होरन भी सैरी चीजन मां शामिल रखते थियो।

33 ते प्रेरित बेइ शेक्ति सेई प्रभु यीशुएरे मुइदन मरां ज़ीते भोनेरी गवाही देते थियो, ते तैन पुइ परमेशेरो बड़ो अनुग्रह थियो।

34 तैन मरां कोई भी गरीब न थियो, किजोकि ज़मीना केरे त घरां केरे मालिक तैन बेचतां तैन केरि कीमत प्रेरितन कां आनते थियो।

35 ते तैना तै रकम प्रेरितन देते थियो, ते हर केन्वी तैसेरी ज़ुरतराे मुताबिक बेटतां देते थियो।

36 यूसूफ नव्वेरो अक लेवी थियो, ज़ै साइ प्रसेरो रानेवालो थियो, ते प्रेरितेई तैसेरू नवं बरनबास रखेरू थियू, (जेसेरो मतलबे शैनतरु मट्टू)।

37 तैनी अपनू ऊडार बेचू, ते कीमत एन्तां प्रेरितन दिती।

5

???????????? ???? ???????

1 हनन्याह नव्वेरो अक मेन्हु थियो, ते तैसेरी कुआन्शरू नवं सफ़ीरा थियू ते तैनेई अपनि जेईदातरो किछ हिस्सो बेञ्जी छुइडो।

2 ते कीमती मरां किछ पेंइसे एप्पू कां रखे, जेसेरो तैसेरी कुआन्शी भी पतो थियो, ते बाकी हॉरे पेंइसे एन्तां प्रेरितन दिते।

3 पन पतरसे तैस सेइं ज़ोवं, “हे हनन्याह! शैताने तेरे मने मां ए गल केन्चरे छुडी, कि तू पवित्तर आत्माई सेइं झूठ ज़ोस, ते ज़मीनारे पेंडसन मरां किछ रेख्वी छुडस?”

4 कुन बेचनेरां करां पेइले ज़मीन तेरी न थी, पन बेचनेरां बाद कुन पेंडसो तेरो न भोव? तीं अपने मने मां किजो सोचू? तीं मैन्हु सेइं नईं बल्के परमेशरे सेइं झूठ ज़ोरूए।”

5 हनन्याह एन शुनते खिरकी जेव, ते तैसेरे प्राण निस्से, ते ज़ैन लोकेई एन शुनू त तैना बड़े डेरि जे।

6 तैखन किछ नौजवान आए ते तैनेई तैसेरी लाश कफने मां पलेटतां ते बेइरोवं नेइतां देवतां छुडी।

7 टलेइ घैन्टना पत्ती तैसेरी कुआन्श आई, ते तैस एस बारे मां कोई पतो न थियो।

8 पतरसे तैस पुच्छू, “मीं ज़ो, कुन तुसेईं दुइयेई ज़मीन एतरे मां बेचोरी थी?” तैसां ज़ोवं, “हाँ कुल कीमत एतरी मैल्लोरी थी।”

9 पतरसे तैस सेइं ज़ोवं, “परभुएरी आत्मा अज़मानेरे लेइ तुस केन्चरे सेइं राज़ी भोए, ते ज़ैन लोकेई तेरो मुन्श दबोरोए, तैन करे पाव हेर दारे पुड़ आन, ते तैना तीं भी बेइरोवं धिनी गाले।”

10 ते कुआन्श तैखने तल्ले विछुडी, ते तैसारे भी प्राण निस्से, ते ज़ैखन नौजवान अन्तर आए त ते कुआन्श मरीं लेइतां ते भी छुइतां तैसारे मुन्श इलाखोरां देवतां छुडी।

11 सैरी यरूशलेमेरी कलीसिया ते एन गल्लां करे शुन्ने बाले बड़े डेरि जे।

XXXXXXXXXXXXXXXXXXXX

12 प्रेरितां करे ज़िरिये बड़े चमत्कार ते निशान बांदे भोए, ते सारे विश्वासी अक भोइतां सुलैमानी अंगने मां जम्हां भोते थिये।

13 हालांकी हारे लोक तैन केरि बड़ी इज़्जत करते थिये, पन केन्ची हिम्मत न आई कि तैन मां शामिल भोन।

14 बड़े मड़देइं ते कुआन्शेई विश्वास कियो ते तैन लोकां केरि मेनडली मां शामिल भोए, ते परमेशर मन्ने बालां केरि तैधात बद्धती चली।

15 ज़ैन प्रेरितेई कियूं तैसेरो नितीजो ई भोव, कि लोक बिमारन खट्टन पुड़ ते पिट्टी पुड़ छुइतां सड़की मां रखते थिये, कि पतरस ज़ैखन तैस बत्तां एज्जे त तैसेरी छाव त तैन पुड़ पे।

16 यरूशलेम नगरेरे च़ेवरे पासना इलोंवां करे बड़े लोक बिमारन ते ज़ैन पुड़ भूतां केरो सैयो, एप्पू सेइं साथी आनते थिये, ते तैना सब बेज्जोते थिये।

XXXXXXXXXXXXXXXXXXXX

17 तैखन महायाजक ते तैसेरे साथी ज़ैना सद्की करे फिरके मरां थिये, तैन बड़ी जलन भोने लगी ते तैना प्रेरितां करे खलाफ खड़े भोए।

18 ते तैनेई प्रेरित दलुवेइतां कैद मां छेइडी दित्ते।

19 पन प्रभुएरो राती स्वर्गदूत कैदखाने मां दार खोलतां प्रेरितन कां जेव, ते तैना बेइर केढतां तैन सेइं ज़ोने लगो।

20 “गाथ ते मन्दरेरे अंगने मां खड़े भोइतां हमेशारे ज़िन्दगरे बारे मां लोकन बिस्तार देथ।”

21 तैना एन शुन्तां झेझां मन्दरेरे अंगने मां पुजे ते ज़ेन्चरे तैन स्वर्गदूते हुक्म दित्तोरो थियो, तेन्चरे लोकन शिक्षा देने लगे, ते ज़ैखन इस्राएली महायाजक ते तैसेरे साथी तेड़ी आए, त तैनेई महासभा ते सब यहूदी करे सारे बुजुर्ग कुजाए, ते तैनेई यीशुएरे प्रेरित कैदखाने मरां कुजाए।

22 ज़ैखन मन्दरेरे परहेदार कैदखाने मां पुजे त तैन प्रेरित तेड़ी न मैल्ले, ते वापस एइतां तैन खबर दित्ती।

23 “असेई कैदखानो रोडेचारे बंद कियोरी थियो, ते परहेदार भी असन दारे मां खड़खड़े मैल्ले, पन ज़ैखन असेई कैदखानो खोल्लो त अन्तर कोई न मैल्लो।”

24 एना गल्लां शुन्तां मन्दरेरे पहरदारों केरो प्रधान, प्रधान याजक ते सारे लोक हैरान रेइजे, ते तैन केरि फिक्री मां पे कि हुनी कुन भोनूए!

25 तैखन केन्चे एइतां ज़ोवं, "तैना मैन्हु ज़ैना तुसेई कैदे मां छुडोरे थिये, तैना मन्दरे मां खडे भोइतां शिक्षा देने लगोरेन।"

26 तैखन मन्दरेरे पहरेदारां केरे प्रधान अपने सिपाही साथी घिन्तां जे, ते प्रेरित कुजेइतां आने पन ज़बरदस्ती नई, किजोकि तैना लोकन करां डरते थिये, कि एरू न भोए एना असन घोडेई वान।

27 तैनेई प्रेरित एन्तां महासभा मां पेश किये, ते महायाजके तैन पुच्छू।

28 "असेई तुसन ठाकेरू थियूं, कि यीशुएरू नवं घिन्तां शिक्षा न देइयथ? फिरी भी हेरा, तुसेई सारे यरूशलेम नगरे मां अपनि शिक्षा फैलाई, ते तैस मैनेरो खूनेरो दोष असन पुड लानो चातथ।"

29 पतरस ते होरि प्रेरितेई जुवाब दित्तो, "असन मैन्हु केरो हुक्म मन्नेरे बजाहे परमेशेरो हुक्म मन्नो जादे ज़रूरीए।

30 इश्शे दादे-पड़दादां केरे परमेशेरे ए यीशु मुइदन मरां ज़ीतो कियो, ज़ै तुसेई करूसे पुड च़ेदतां मारो।

31 तैए परमेशेरे, प्रभु ते मुक्ति देनेवालो बनेइतां अपने देइने पासे विशालो, ताके तै इस्राएलिन मन फिराने ते पापां केरि मैफारो मौको दे।

32 असां एन गल्लां केरे गवाह आम, ते पवित्र आत्मा भी, ज़ै परमेशेरे तैनी अपनो हुक्म मन्ने बालन दित्तोरीए।"

33 ज़ैखन तैनेई एन शुनू त फुकोई जे, ते तैन केरि मर्जीं लगी ज़ोने कि एन मैरी छुडम।

34 पन अक फरीसी मैन्हु ज़ेसेरू नवं गमलीएल थियूं, ते ज़ै शास्त्री भी थियो, ते ज़ै सेब्मी लोकन मां इज़्जतदार थियो, तैनी महासभा मां खडे भोइतां हुक्म दित्तो कि एना मैन्हु थोडे च़िरे बेडर भेज़ा।

35 तै एन ज़ोने लगो, "हे इस्राएली लोकव तुस ज़ैन किछ् एन मैनन् सेई केरनू चातथ तैन रोडेच़ोरे सोचा।

36 किजोकि थोडे च़िरे पेइले थियूदास इन ज़ोइतां खडो भोरो थियो, ते ज़ोतो थियो, अवं भी किछ् आई, ते लगभग 400 मैन्हु तैस सेई मिले, पन तै मारो जेव, ते तैसेरे मन्नेवाले सारे तितर-वितर भोइ जे, ते तैन केरो नामो निशान मिटी जेव।

37 तैसेरां पत्ती मैन्हु केरे गिनतरे वक्ते गलील इलाकेरो यहूदा निसोरो थियो, ते तैनी काई लोक अपने पासे खिचोरे थिये, तै भी मारो जेव, ते तैसेरे ज़ेतरे साथी थिये, सब तितर-वितर भोइ जे।

38 हुनी अवं तुसन एन्ने ज़ोताई कि एन मैनन् करां दूर भोथ, ते एन गाने देथ, किजोकि अगर एना चमत्कार, मैन्हु केरि तरफां भोले त एणू खतम भोइ गानेन।


39 पन अगर एना कम्मां परमेशेरी तरफां भोलां, त तुस एन मैन्हु केरू किछ् न विगैडी सकत, ते तुस परमेशेरे खलाफ लइनेवाले भोले, तैनेई तैसेरी सल्लाह मन्नी।"

40 ते प्रेरित अन्तर कुजेइतां तैन डंडेई बावैहीतां तैन ज़ोवं, कि अज़ेरां बाद यीशुएरे नव्वे सेई कोई गल न केरथ, ते तैना हथरां छुडे।

41 प्रेरित महासभा मरां च़ले जे, तैना एस गल्ली पुड खुशी थिये, कि असां यीशुएरे नव्वे सेई बेइज़त भोनेरे काबल त भोए।

42 तैनेई शिक्षा देनी बंद न की, बल्के रोज़ मन्दरे मां गोइतां ते घर-घर गोइतां लगातार खुशखबरी शुनाते राए कि यीशु ही मसीह आए।

6



1 ई गल तेइसेरीए ज़ेइस च़ेले केरि गिनती बधने लगोरी थी, यूनानी भाषा ज़ोनेवालो यहूदी च़ेलेई इब्रानी भाषा ज़ोनेवाले यहूदी च़ेलां केरि शकैइत करेने लगो, कि हर दिहैडरे सेवाई मां विधवां केरि खबर न की गाए।

2 एन शुन्तां 12 प्रेरितेईं सारे यरूशलेमेरे सारे विश्वासी लोक (चेत्ले) अकोट्टे किये, ते ज़ोवं, “इश्शं लेइ एन मुनासब नई कि अस परमेशेरी वचनेरू प्रचार केरनो छेडतां खाने पीनेरी सेवाई मां लगगम।”

3 एल्हेरेलेइ हे मेरे दलाव, अपने लोकन मरां सत भलमानस मैन्हु चुना, ज़ैना पवित्र आत्माई सेई भरपूर ते अक्लमन्द भोन, ताके आस तैन एस कम्मेरी ज़िमेवारी सॉफम।”

4 पन अस त प्रार्थना केरने ते वचन शुनानेरी ते शिक्षा देनेरी सेवाई मां लगगोरो रानेम।

5 ए गल सारे लोकन पसंद आई, ते तैनेई अक स्तिफनुस ज़ै विश्वास ते पवित्र आत्माई सेई भरपूर थियो चुनो, ते होरे ज़ैना चुने तैन केरां नव्वां इना आन, फिलिप्पुस पूरुखरुस, नीकानोर, तीमान, परमिनास ते नीकुलाउस ज़ै अन्ताकिया नगरेरो रानेबालो थियो, ते यहूदी फिरके मां ओरो थियो।

6 ते तैना प्रेरितन कां हाज़र किये, ते तैन केरे लेइ तैनेई प्रार्थना की, ते तैन पुड़ हथ रख्बे।

7 एन्त्रे सेई परमेशेरू वचन फैलतु जेवं, ते यरूशलेम नगरे मां चेलां केरि गिनती बद्धती जेई, ते याजकां केरि अक टोली विश्वासे मां आई ते मसीही भोइजेइ।

XXXXXXXXXXXXXXXXXXXX

8 स्तिफनुस अनुग्रह ते शक्ति सेई भरपूर भोइतां लोकन चमत्कार ते निशान हिरातो थियो।

9 आज़ाद भोरे यहूदी लोकां केरू अक प्रार्थना घर थियूं, कुरेनी ते सिकन्दरिया ते किलिकियारे ते आसियारे किछ लोकन मरां किछ स्तिफनुसे सेई बेंस केरने लगे।

10 तैना तैन गल्लां केरो जुवाव न देइ बटे, ज़ैना पवित्र आत्मा तैस ज़ोनेरी समझ दित्ती।

11 तैखन तैनेई किछ लोक शिखाले, कि तुस झूठ ज़ोइयथ कि, “असेई स्तिफनुस मूसेरे त कने परमेशेरे खलाफ तुहीन केरते शुनोरोए।”

12 तैखन तैनेई किछ लोक, बुज़ुर्ग ते शास्त्री स्तिफनुसेरां खलाफ बमकाए ते तै टलेइतां महासभा मां पैश कियो।

13 तैनेई बडे झूठे गवाह पैश किये, “ते तैनेई गवाही दित्ती कि ए मैन्हु पवित्र ठारारे ते मूसेरे कानूनेरे खलाफ तुहीन केरने केरां बाज़ न एज्जे।

14 ते असेई एस मैन्हु करां एन भी ज़ोतू शुनु, कि यीशु नासरी इस मन्दरे डोलेलो, ते तैना रसमां ज़ैना मूसा नेवे दित्तोरिन बदलेलो।”

15 तैखन लोक ज़ैना महासभा मां विश्शोरे थी, तैसेरे पासे तकू कि तैसेरू तुतर स्वर्गदूतेरे ज़ेरू लेइहोतू थियूं।

7

XXXXXXXXXXXXXXXXXXXX

1 तैखन महायाजके स्तिफनुसे सवाल पुछ्छो, “कुन एना इलज़ाम सच्चे आन?”

2 तैनी ज़ोवं, “हे दलाव ते मेरे बुज़ुर्गाव, मेरी गल शुना, इश्शो पूर्वज अब्राहमे हारान नगरे मां बसने केरां पेइलो मेसोपोटामिया इलाके मां थियो, ते महिमा बाले परमेशेरे तैस दर्शन दिनु

3 ते परमेशेरे तैस सेई ज़ोवं, अपना देश त अपने रिशतेदारन शेरतां तैस मुखखे मां गा, ज़ै अवं तीं हेइलो।

4 तांए तै कसिदी केरे मुखखे शेरतां हाराने मां बसोरो थियो, तैसेरे बाजरे मरनेरां पत्ती परमेशेरे तै तैस मुखखे मां आनो ज़ैस मां अज़ तुस बसोरेथ।

5 पन परमेशेरे तैस इड़ी किछ भी जेइदात न दित्ती, बल्के पाव रखने जो भी ज़मीन न दित्ती, पन वादो ज़रूर कियो कि ई ज़मीन अवं तीं ते तेरी औलादी कब्जे मां देलो हालांकी तेइस अब्राहमे कोई औलाद न थी।

6 परमेशेरे इन भी ज़ोवं, तेरी औलाद एक्की बखले देशे मां परदेशी भोली, तैना तैन गुलाम बनाले, ते 400 सालन तगर तैन दुख देले।

7 फिरी परमेशेरे ज़ोवं, जै कौम तैन गुलाम बनानी तैन अब सज़ा देइलो, ते तैसेरां बाद तैना तैस मुलखे मरां निस्सतां इड़ी एज्जेले ते मेरी आराधना करेले ।

8 ते परमेशेरे अब्राहमे सेइं करार कियो ते तैस सेइं ज़ोवं, कि निशानेरे रूपे मां सेब्मी घरानेरे नर मैन्हु केरो खतनो केर । ज़ैखन इसहाक ज़रमो ते अटे दिहैड़ी केरो भोव, त अब्राहमे तैसेरो खतनो कियो, ते एन्चरे इसहाके अपने मट्टे याकूबेरो खतनो कियो, ते याकूबेरे अपने 12 मट्टां केरो खतनो कियो ।

9 याकूबेरे मट्टेई जलनी सेइं अपने दूला यूसुफ मिस्र मुलखे जो गाने बालन जो बेचो, ते तैनेई यूसुफ मिस्रें मां नेइतां गुलाम बनाव? पन परमेशर यूसुफे सेइं साथी थियो ।

10 परमेशेरे तै सैरी मुसीबतन करां छुटेइतां, ते तैस बड़ी अक्ल दिती, ते मिस्रें फ़िरौन राजेरे सामने बड़ी काबलीत दिती, ते फ़िरौन राजे, यूसुफ मिस्र मुलखेरो ते अपने महलेरो गवर्नर बनाव ।

11 ज़ैस वक्ते यूसुफ थियो त मिस्र मुलख ते कनानेरे सारे मुलखे मां काल पेव, ते बड़ी मुसीबत आई, ते इश्शे दादे-पड़दादन खाने जो अन न मैल्लू ।

12 ज़ैखन याकूबे शुनु कि मिस्रें मां अन्न आए, त तैनी इश्शे पूर्वज मिस्र मुलखे मां पेइली बार भेजे, तैना यूसुफ सेइं मिले ते अन आनु पन तैनेई तै न पिशानो ।

13 ज़ैखन तैना दुइयोवं फेरे मिस्र मुलखे मां अन्न आन्ने जे, त यूसुफे अपने आप तैन पिशानाव, ते फ़िरौने भी यूसुफेरी कौमरो पतो लगे कि ए इब्रानी आए ।

14 तैसेरां बाद यूसुफे अपने बाजी याकूब ते तैसेरे 75 मैन्हु केरू टब्बर मिस्र मुलखां मांजो एजनेरो बिस्तार भेजो ।

15 किछ वक्तेरां बाद याकूब मिस्र मुलखे मां जेव, ते तै त इश्शे दादे-पड़दादे तैड़ी मेरि जे ।

16 तैन केरि लाशां तैट्टां इश्शे मुलख कनाने मां वापस एन्ही, ते तैनेई याकूब, तैस ठैरी दफन कियो, जै ठार अब्राहमे चाँदी देइतां घिन्नोरी थी, ते याकूबेरां मट्टां शेकेम नगरेरे तैस ठैरी दफन कियां, जै याकूबे हामोरेरी औलादी करां घिन्नोरी थी ।”

17 “परमेशेरे अब्राहमे सेइं अक वादो कियोरो थियो, तैस वादेरो पूरो भोनेरो मौको अव त मिस्रें मां इश्शे लोकां केरि गिनती भी बड़ी बेद्वी जेई ।

18 तैस मौके अक होरो राजो मिस्र देशे मां राज करेने लगे, जै यूसुफे न थियो ज्ञानतो ।

19 तैनी इश्शी कौमी सेइं एरी चलाकी कि ते इश्शे दादन-पड़दादन सेइं एरी बदसलूकी की, तैना एतरे मजबूर किये कि तैना अपने ज़र्मते बच्चे बेइरोवं शारन ताके तैना मेरि गान ।

20 तैने दिहैइन मां मूसा पैदा भोव, तै परमेशेरी नज़री मां बड़ो रोड़ो थियो, ते तै टूलाई महीन्न तगर अपने बाजेरे घरे मां छेपतां पलतो राव ।

21 पन ज़ैखन जादे चिरे तगर छुपेई न बटे, तै दरियाए मां शारो त फ़िरौनेरे कुइयां तै नेव ते अपने मट्टेरो ज़ेरो पालो ।

22 मूसा नबी मिस्री केरि सैरी शिक्षारो ते तैन केरि सैरी गल्लां केरि वाकफित भोइजेइ, ते गलवाती ते कम्मे मां मज़बूत थियो ।”

23 “ज़ैखन मूसा नबी 40 सालां केरो भोव, त तैसेरे मने मां ए गल आई, कि अवं अपने इस्राएली दूलां केरो हाल पतो केरि ।

24 मूसा एक्की इस्राएली मैन्हु पुड़ ज़ुलम भोंतो लाहू त तैनी तै बन्नाव, ते तै ज़ालम मिस्री मैरतां ज़ैस पुड़ ज़ुलम भोरो थियो बदलो घिनो ।

25 तैनी सोच, कि तैसेरे दूलां समझेले, कि परमेशेरे तैसेरे ज़िरिये सेइं तैन मिस्री केरि गुलैमी करां तैन मुक्ति देलो, पन तैनेई न समझू ।

26 मूसा होरसां दूई इस्राएली एप्पू मांमेइं लइते लाए, ते तैन समझानेरी कोशिश की, ते मूसा तैन ज़ोवं, हे जवानव तुस त एप्पू मांमेइं दूला भोतथ, ते तुस किजो एक्की होरि पुड़ ज़ुलम केरतथ?

27 पन जै मैन्हु अपने पड़ोसी पुड़ जुलम केरने लोरो थियो, त तैनी मैने मूसा जो धमकेइतां ज़ोवं, तू केनि असन पुड़ हुकूमत केरनेबालो या हाकिम बनेवरोस?

28 जेन्चरे तीं तै मिस्रेरो रानेबालो हीज मारोरो थियो, तेन्चरे तू अज्र मीं मारने चातस?

29 ए गल शुनते मूसा तैट्टां नश्शो, ते मिद्यान मुलखे मां परदेशी भोइतां राने लगो, ते तैडी तैसेरां दूई मट्टां पैदा भुआं ।

30 40 साल मिद्यान मुलखे मां रानेरे बाद तैस सीनै पहाड़ेरे सुनसान ठारी मां एक्की झल्लेरी अग्गी स्वर्गदूत लाव, ते परमेशेरे स्वर्गदूतेरे जिरिये तैस सेइं गल की ।

31 मूसा झल्लेरी अग्गी लेइतां कि झल फुकोने नई लोरू त तै हैरान रेइ जेव, ते ज़ैखन तै हेरनेरे लेइ नेइ जेव त तैनी प्रभुएरी आवाज्र शुनी ।

32 अवं तेरे दादे-पड़दादां केरो यानी अब्राहम, इसहाक ते याकूबेरो परमेशर आई, " तैखन मूसा डेरतां कम्बने लगो, इन तगर कि तैस हेरनेरी हिम्मत न भोइ ।

33 तैखन प्रभुए तैस जो ज़ोवं, अपने पांवां केरी जुट्टी खोल्ल, किजोकि ज़ैस ठैरी तू खड़ोस तै पवित्र टारे ।

34 मीं मिस्र मुलखे मां अपने लोकां केरि बुरी हालत हेरी, मीं तैन केरू कर लानू ते लेरां शुनोरिन, एल्हेरेलेइ अवं तैन छुटानेरे लेइ उन्दो ओरोई, हुनी एई अवं तीं फिरी वापस मिस्र मुलखे जो भेजताई ।

35 "एहे तै मूसो आए ज़ेसेरो इस्राएली लोकेई पेइलो इन्कार कियोरो थियो, कि तू केनि असन पुड़ हुकूमत केरनेबालो या हाकिम बनेवरोस, ते एहे तै मूसा परमेशेरे अपने स्वर्गदूतेरे जिरिये सेइं ज़े तैनी बलते झैल्लोए मां लाहोरो थियो, ते छुटानेबालो बनेइतां भेजो ।

36 एनी मैने मिस्र मुलखे ते लाल समुन्द्रे मां 40 सालन तगर सुनसान ठैरी मां चमत्कार ते निशान हिराए ।

37 एनी मूसा इस्राएली लोकन सेइं ज़ोरू थियूं, परमेशर तुश्शे दलान मरां तुश्शे लेइ अक मेरो ज़ेरो नबी खड़ो केरेलो ।

38 एहे मूसा, इश्शे दादा पड़दादां केरो नबी राव ज़ैखन तैन सुनसान ठारी मां अकोट्टे भोरोए, परमेशेरे एक्की स्वर्गदूत सीनै पहाड़े पुड़ मूसे कानून दित्तो ते तैनी इश्शे दादे पड़दादन तैन कानून दित्तो, मूसे ज़िन्दगी देनेबाले वचन मैल्ले, तैनी तैना असन तगर पुजाए ।

39 पन इश्शे दादे-पड़दादेई तैसेरो हुकम न मन्नो चाव, बल्के इकरार कियो, ते तैना मिस्र मुलखेरे जो वापस गानू चाते थिये ।

40 तैनेई मूसेरे दूलाए हारूने सेइं ज़ोवं, तू इश्शे लेइ अक देबतो बना, ज़ै असन अग्गी-अग्गी मिस्र मुलखे जो ब्रले, किजोकि अस न ज़ानम कि मूसा ज़ैनी असां मिस्र मुलखे मरां केदतां आनोरेम, तैस कुन भोवं?

41 तैस वक्ते तैनेई बछड़ेरी अक मूरत बनाई, ते तैस कां बलिदान ज़ादू, ते अपने हथ्यां केरे बनेवरी मूरती कां बड़ी खुशी मनाने लाए ।

42 एल्हेरेलेइ परमेशेरे तैन करां अपनू तुतर फिराव, ते तैना दिहाड़ेरी ते च़ैदनरे ते अम्बेरेरे तारां केरि ईश्वरेरे रूपे मां तैन केरि आराधना केरनेरे लेइ शारे, जेन्चरे नेवी केरि किताबी मां लिखोरूए, हे इस्राएली लोकव,

कुन तुस 40 सालन तगर सुनसान ठैरी मां जानवरां केरू बलिदान ते होरू बलिदान मेरे लेइ केरते राए?

43 बल्के तुसेई एप्पू सेइं साथी मोलेक देबतेरी मूरती ते रिफान देबतेरे तारे छुइतां ब्रलते थिये,

एना तैना मूरतिन ज़ैन कां तुस मथ्यो टेकते थिये,

एल्हेरेलेइ अवं तुसन बाबेले करां भी दूर बसेइलो ।"

44 “सुनसान ठारी मां इशशे दादन पडदादन कां गवाहेरो तेम्बु थियो, परमेशेरे तै ठहराव ते तैनी मूसा सेइं ज़ोवं, जेन्चरे तीं लोरूए तैसेरे मुताबिक बना ।

45 बडे सालना बाद तैए तेम्बु इशशे दादे-पडदादेईं यहोशु सेइं साथी इडी आनो, जैस वक्ते तैनेईं गैर कौमन पुड अधिकार हासिल कियो, जैना परमेशेरे इशशे दादे-पडदादां केरे सामने कडे, ते तै तेम्बु दाऊद राजेरे वक्ते तगर राव ।

46 दाऊदे पुड परमेशेरे अनुग्रह कियो, ते तैनी मिनत की, कि अवं याकूबेरे परमेशेरे लेइ अक घर बनेईं ।

47 पन तैसेरे मटटे सुलैमाने तैसेरेलेइ मन्दर बनाव ।

48 पन परमप्रधान परमेशर हथ्यां केरे बनेवेरे मन्दरन मां न राए, जेन्चरे यशायाह नेबेरे किताबी मां लिखोरूए,

49 प्रभु ज़ोते, स्वर्ग मेरो तखते,
ते ज़मीन मेरे पांवां केरि चौकीए,

तुस फिरि मेरे लेइ केरू जेरू मन्दर बनाले?

ते मेरे आराम केनेरी ठार केरही जेरि भोली?

50 कुन मीं एप्पू सैरी चीज़ां नईं बनेवरी?

51 “हे ढीठ लोकव, तुस तैसेरी शुन्नी ते मन्नी न चाथ, तुस पवितर आत्मारी हमेशा खलाफत केरतथ । जेन्चरे तुशशे दादे-पडदादे केरते थिये, तुस भी तेन्चरे केरतथ ।

52 नेबन मरां को तुशशे दादे-पडदादेईं नईं स्तेवरो? जैनेईं तैस एजनेबाले मसीहेरे वारे मां ज़ोवं ज़ै धर्मी आए, ते ज़ैखन मसीह अव ते तुसेईं धोखे सेइं तै टलुवेइतां मारो ।

53 तुसन स्वर्गदूतन करां मूसेरे कानून त मैल्लो, पन तैस पुड अमल न कियूं ।”

~~~~~

54 ज़ैखन तेनेईं एना गल्लां शुन्नी त यहूदी लीडर फुकोई जे, ते स्तिफनुसे जो दंत लगे ज़ापने ।

55 पन तैनी पवितर आत्माईं सेइं भेरोइतां अम्बेरेरे पासे तक्कू, ते तैनी परमेशेरेरी महिमा ते यीशु परमेशेरेरे देइने पासे खडखडो लाव ।

56 तैनी ज़ोवं, “हेरा, अवं स्वर्ग सुल्लू लाताईं, ते मैनेरे मटटे परमेशेरेरे देइने पासे खडखडो लाताईं ।”

57 एन शुन्तां तैना ज़ोरे सेइं चिन्डां मारने लगे, ते अक भोइतां सेभेईं तैस पुड हमलो कियो ।

58 ते तै दीलतां यरूशलेम नगर करां बेइर नीयो ते तैस जो घोडेईं बाने लगे ते तै मारो, तैखन तैस पुड दोष लाने बालेईं अपने चोगे खोलतां शाऊल नव्वेरे एक्की मैन्हु कां रेखतां छुडडे ।

59 ते ज़ैखन तैना स्तिफनुसे जो घोडेईं बाने लगगोरो थिये, ते तै स्तिफनुस इन ज़ोइतां प्रार्थना करने लगो, “हे प्रभु यीशु, मेरी आत्मा कबूल केर ।

60 फिरि तैनी ज़ैधू केरे भारे बिश्तां ज़ोरे सेइं ज़ोवं, ‘हे प्रभु एन इस पापेरो दोषी न बनेइयां ।’ एन ज़ोनेरां पत्ती तैनी प्राण दित्ते ।

## 8

~~~~~

1 शाऊल तैसेरी मांती सेइं राजी थियो । तैस्से दिहाडे यरूशलेम नगरेरे कलीसियाईं पुड ज़ुलम भोने लाव ते प्रेरितां केरे अलावा सारे लोक यहूदिया ते सामरियारे इलाकन मांजो तितर-बितर भोए ।

2 किछ परमेशेरेरे भक्त मैनेईं स्तिफनुस नेइतां देवतां छुडडो, ते तैसेरे मरने पुड बडो शोग कियो ।

3 पन शाऊल कलीसियाईं सताने लोरो थियो, ते तै घर-घर गातो थियो, ते विश्वासी मडदन ते कुआन्शन बेइरोवं घसीटतो थियो, ते कैद केरतां छुडतो थियो ।

~~~~~

4 पन ज़ैना विश्वासी तितर-बितर भाते थिये तैना खुशखबरी शुनाते ज़ले ।

5 ते फिलिप्पुस सामरियारे एककी नगर मां गेइतां मसीहेरो प्रचार करने लगे।

6 जैना गल्लां तैन लोकेई फिलिप्पुसेरी करां शुनी, ते जैना निशान तै हिरातो थियो, तैन हेरी-हेरी, तैनेई अक भोइतां मन लाव।

7 जैखन फिलिप्पुसे हुक्म दित्तो, त बड़े लोकन मरां भूतां चिन्डां मैरतां निस्सी जेआं, ते बड़े लोक अधरंगी ते टोंटे बेज्झोइ जे।

8 ते तैन केरे वजाई सेइं नगरेरे बड़े लोक खुश भोइजेइ।

??????

9 शमौन नर्वरेरे एककी मैने सामरियारे नगर मां सारे लोक अपने जैदेइं सेइं हैरान कियारे थिये, ते अपने आपे बड़ो खास मैन्हु बनातो थियो।

10 निक्के बड़े सब तैसेरे पासे भोइतां ज़ोने लगे, “ए मैन्हु परमेशेरी तै शक्ति ज़ैस ज़ो महान ज़ोतन।”

11 तैनी अपने जैदू सेइं बड़े चिरेरां देंते सब हैरान कियारे थिये, एल्हेरेलेइ तैना लोक तैसेरी बड़ी इज्जत करते थिये।

12 पन जैखन फिलिप्पुसे परमेशेरे राज्जेरे ते यीशु मसीहेरी खुशखबरी प्रचार की त लोकेई विश्वास कियो, ते मड़देइं कुआन्शेई बपतिस्मो नेव।

13 तैखन शमौने भी फिलिप्पुसेरे प्रचारे पुड़ विश्वास कियो, ते बपतिस्मो नेइतां फिलिप्पुसे सेइं साथी राने लगे ते तै बड़े चमत्कार ते निशान हेरतां हैरान रेइ जेव।

????????

14 जैखन यरूशलेम नगरे मां प्रेरितेई शुनू कि सामरियारे लोकेई परमेशेरे वचन कबूल कियोरूए ते तैनेई पतरस त यूहन्ना तैन कां भेजे।

15 जैखन तैना तैड़ी पुजे त तैनेई तैन लोकां केरे लेइ प्रार्थना की, कि एन पुड़ पवित्र आत्मा उतरे।

16 एल्हेरेलेइ कि तैन पुड़ पवित्र आत्मा हेजू न थी उतरोरी, तैनेई सिर्फ प्रभु यीशु मसीहेरे नन्वे सेइं बपतिस्मो निहीयोरो थियो।

17 तैखन यूहन्ना ते पतरसे तैन पुड़ हथ रेखतां प्रार्थना की, ते तैन भी पवित्र आत्मा उतरी।

18 जैखन शमौने हेरू कि प्रेरितां केरे हथ रखने सेइं पवित्र आत्मा उतरते, त शमौने पेंइसे एन्तां प्रेरितन कां पैश किये।

19 ते शमौन ज़ोने लगे, “मीं भी शक्ति देथ, कि अवं भी ज़ैस पुड़ हथ रेखवी त तैस पुड़ पवित्र आत्मा उतरे।”

20 पतरसे तैस सेइं ज़ोवं, “तेरे पेंइसे तीं सेइं साथी गर्क भोन, किजोकि तू पेंइसन सेइं परमेशेरे दान घिन्नु चातस।

21 एस सेवाई मां तेरो कोई भी हिस्सो नई किजोकि तेरो मन परमेशेरे कां साफ नई।

22 तू अपनि इस बुरेई करां मनफिरा, ते प्रभु कां प्रार्थना केर, शैइद प्रभु तेरी इस बुरे खियाले माफ़ केरे।

23 मनफिरा अवं हेरताई कि तू बड़े जलनी ते पापेरी गुलैमी मां आस।”

24 तैखन शमौने जुवाब दित्तो, “मेरे लेइ प्रभु कां प्रार्थना केरा, कि ज़ैन किछ तुसेईं ज़ोरूए, तैन मीं पुड़ न एज्जे।”

25 ते पतरस ते यूहन्ना गवाही देइतां ते प्रभु यीशुएरू वचन शुनेइतां यरूशलेम नगरे मां वापस आए, ते एइते बारे सामरी लोकां केरे बड़े इलोव्वन मां खुशखबरी शुनाई।

????????

26 फिरी एरू भोवं कि परमेशेरे एककी स्वर्गदूते फिलिप्पुसे सेइं ज़ोवं, “उठ ते दक्षिणरे बत्तां गा, ज़े यरूशलेम नगरेरां गाज़ा नगरे जो गातीए। ई रेगिस्तानी बत आए।”

27 तै उटो ते ज़लो जेव, ते बत्ती मां तैस अक कूश मुलखेरो खोजो मैल्लो, जै कूशी केरि रानी कन्दाकारो खजानची थियो, तै आराधना करेने यरूशलेम नगरे मां ओरो थियो।

28 तै अपने रथे पुड़ ज़ेदतां अपने मुलखे जो वापस ओरो थियो, ते यशायाह नेबेरी किताब ज़ोरे-जोरे सेइं पढ़ने लगगोरो थियो।

29 पवित्र आत्मा फिलिप्पुसे सेइं ज़ोवं, “नेडे गोइतां रथे सेइं साथी ज़ल।”

30 फिलिप्पुस देवइतां रथे कां नेडे पुजो, त तैस करां यशायाह नेबेरी किताब पढ़ती शुनी, ते तैस पुच्छ, “तू ज़ैन पढ़ने लोरोस कुन तैन समझतस?”

31 तैनी ज़ोवं, “ज़ां तगर कोई मीं न समझाए त अवं केन्चरे सेमझी?” ते तैनी फिलिप्पुसे कां मिनत की, कि एईं रथे पुड़ विश।

32 पवित्रशास्त्रे मरां ज़ैन ते पढ़ने लगगोरो थियो, त तैन इन थियुं, “तैनेईं तै भेडारो ज़ेरो मारने जो नीयो, जेन्चरे गवडू अपनि उन्ना बरधाने बालां केरे सामने चुप राते, तेन्चरे तैनी भी अपनू आशी न खोल्लू।”

33 तै घटया समझो जेव ते तैस कोई इन्साफ न मैल्लो, ते कोई भी तैसेरे वंशरे बारे मां न ज़ोईं सके, किजोकि धेरती पुड़ तैसेरे वंश भोने करां तैस मारतन।

34 खोजे फिलिप्पुसे पुच्छ, “अवं तीं कां मिनत केरतां, मीं सेइं ज़ो कि ए नबी कसेरे बारे मां ज़ोते, अपने या होरि केन्चरे बारे मां ज़ोते?”

35 तैखन फिलिप्पुसे ज़ोनू शुरू कियुं, तैनी पवित्रशास्त्रे करां शुरू केरतां यीशुएरो खुशखबरी शुनाई। खोजे तैना गल्लां शुनी ते विश्वास कियो।

36 बत्तां ज़लते-ज़लते तैना एककी तालाबे कां पुजे, तैखन खोजे ज़ोवं, “इड़ी तालाब आए, हुनी मीं बपतिस्मो नेने करां कौन रोकी सकते?”

37 फिलिप्पुसे ज़ोवं, “अगर तू पूरे दिले सेइं विश्वास केरतस त बपतिस्मो नेही सकतस,” तैनी जुवाब दित्तो, “अवं विश्वास केरताईं कि यीशु ही परमेशेरे मट्टूए।”

38 फिरी तैनी रथे रोकनेरे लेइ हुकम दित्तो, ते खोजो ते फिलिप्पुस दुइये तालाबे मां जे, ते फिलिप्पुसे तैस बपतिस्मो दित्तो।

39 ज़ैखन तैना पैनी मरां बेइर निस्से त पूरभुएरी पवित्र आत्मा फिलिप्पुस तैट्टां नेव, ते खोजे तै फिरी न लाव, परमेशेरे तै बच्चाव ते तै बडी खुशी सेइं वापस अपने मुलखे जो जेव।

40 ते फिलिप्पुस अशदोदे मामेइं निसतो ज़लतो सारे इलॉब्न मां खुशखबरी शुनातो कैसरिया मां पुजो।

## 9

?????? 22:6-16; 26:12-18)

(??????)

1 शाऊल पूरभुएरे चलन धमकाने ते मारने मां मघन थियो, ते तै महायाजके कां जेव।

2 ते तैस करां दमिश्क नगरेरे प्रार्थना घरां केरे लेइ चिट्ठी मेग्गी, कि चाए कोई मडइ भोए या कुआन्श ज़ै यीशु पत्ती ज़लने बालो भोए, तैस टलेइतां यरूशलेम नगरे मां आने।

3 ज़ैखन तै ज़लतो-ज़लतो दमिश्क नगरेरे नेडे पुजो, त अचानक अम्बेरां लौ आईं ते तैसेरे ज़ेवरे पासन चमकने लगी।

4 ते शाऊल ज़मीनी पुड़ खिरको, ते तैस पूरभुएरी आवाज़ आई, “हे शाऊल, हे शाऊल तू मीं किजो स्तातस?”

5 शाऊले एन पुच्छ, “हे पूरभु, तू कौन आस?” तैनी ज़ोवं, “अवं यीशु आईं, ज़ैस तू सतातस।

6 हुनी उठ ते नगरे मां गा, तैड़ी तीं सेइं ज़ोवं गालू, कि तीं कुन केरनूए।”

7 जैना लोक तैस सेइं साथी थिये, तैना चुपचारे रेइजे, तैन आवाज त शुनोती थी, पन लेइहोतु किछ भी न थियूं।

8 तैखन शाऊल ज़मीनी पुड़ां खडे उठो, त तैनी अपनि एछ्छी घैडी त तैस किछ भी न लगू लेइहोने, ते तै तैसेरे सैथेई हथेरां दलेइतां दमिश्क नगरे मां पुजाव।

9 ते तैनी दलाई दिहाइन तगर न लेई बटु, ते न तैनी किछ खाव ते पिव।

10 दमिश्क नगरे मां यीशुएरो अक चेलो रातो थियो, प्रभु यीशुए तैस दर्शन देइतां ज़ोवं, “हे हनन्याह!” तैनी ज़ोवं, “हाँ प्रभु ज़ो।”

11 तैखन प्रभुए तैस जो ज़ोवं, “उस गेली मां गा ज़ैस जो ‘सिद्धी’ ज़ोतन, ते यहूदारे घरे गा तैड़ी शाऊल नव्वेरो अक मैनुए, ज़ै तरसुस नगरेरो रानेबालोए, तू तैसेरे बारे मां पुछां, किजोकि हेरा ते प्रार्थना करने लोरोए।

12 तैनी हनन्याह नव्वेरो अक मैनुए अन्तर एइतो लाव, ते एप्पू पुड़ हथ रखतो लाहोरोए कि ते अपनि एछ्छेई सेइं फिरी लाए।”

13 हनन्याहे जुवाब दितो, “हे प्रभु, मीं एस मैनेरे बारे मां लोकन करां बेड़ि गल्लां केरती शुनोरिन, ते एन भी कि एनी तेरे लोकन सेइं यरूशलेम नगरे मां कुन-कुन बुरू कियोरूए।

14 एस प्रधान याजकन करां अधिकार मैलोरोए, कि इड़ी भी जैना लोक तीं पुड़ विश्वास केरतन, तैन गिरफ्तार केरतां यरूशलेम नगरे जो ने।”

15 पन प्रभुए तैस सेइं ज़ोवं, “तू गा किजोकि मीं तै मैनु चुनोरोए, कि ते गैर कौमन, राजन, ते इस्राएलेरे लोकन मेरे बारे मां प्रचार केरे, ते तै मीं चुनोरोए कि ते मेरी सेवा केरे।

16 ते अवं तैस ज़ोइलो, लोकन मेरे बारे मां ज़ोनेरे वजाई तैस केतरे-केतरे दुःख झैलनो पेनोए।”

17 तैखन हनन्याह तैस घरे मां जेव, ज़ैड़ी शाऊल थियो, ते तैस पुड़ हथ रखतां ज़ोवं, “हे दला शाऊल, प्रभु, मतलब यीशु, ज़ैस बत्तां तू ओरोस ते तीं लेइहोरो थियो, तैनी अवं भेजोरोई, कि तू फिरी लास ते पवित्तर आत्माई सेइं भेरोस।”

18 ते तैखन तैसेरे एछ्छन मरां ज़ेरां शेकड़ां झड़ां ते तै लहने लगो, ते खडे उठतां बपतिस्मो नीयो।

19 ते किछ रोट्टी खेइतां तैस हिम्मत आई, ते किछ दिहाडे तै चलन सेइं साथी दमिश्क नगरे मां राव।

~~~~~

20 तैसेरां बाद अकदम तै दमिश्क नगरेरे प्रार्थना घरन मां प्रचार करने लगो, कि यीशु परमेशेरू मट्टूए।

21 सब शुन्ने वाले हैरान भोइतां ज़ोने लगगे, “कुन ई तैए मैनु नई, ज़ै यरूशलेम नगरे मां ज़ैना यीशु मसीह पुड़ विश्वास केरते थिये मारतो थियो? ते इड़ी भी एल्हरेलेइ ओरो थियो, कि एन लोकन दलेइतां प्रधान याजकां केरे हवाले केरे?”

22 पन एसेरां बाद शाऊल होरो भी शेक्ति सेइं प्रचार केरतो राव, ते एस गल्लरू सबूत देइ-देइ कि यीशु ही मसीह, दमिश्क नगरेरे रानेबालां यहूदी केरू आशी बंद केरतो राव।

23 ज़ैखन शाऊले दश्मके मां बड़ो वक्त बीतो त यहूदेई मिलतां तैस मारनेरो मुशोरो कियो।

24 पन शाऊले एस गल्लरो पतो लगो, तैना त तैस मारनेरे लेइ रात दिहैड़ी दारन पुड़ रहते थिये।

25 पन राती तैसेरे चलेई तै टोकरे मां रख्खो, ते नगरेरे दुवारी पुड़ां रस्से सेइं टोकरा मां ओसैलतां वुन पुजाव।

~~~~~

26 ज़ैखन शाऊल यरूशलेम नगरे मां पुजो त तैनी चलन सेइं मिलनेरो इंतज़ाम कियो, पन सब तैस करां डरते थी कि ते भी चेलोए।

27 पन बरनबासे शाऊल एप्पू सेइं साथी प्रेरितन कां आनो ते तैन ज़ोवं, कि केन्न्वेरे दमिश्क नगरेरे बत्तां च़लते-च़लते एस प्रभु यीशु लेइहोरोए, ते प्रभुए एस सेइं गल्लां कियोरिन, ते एनी केतरे दिलेरी सेइं दमिश्क नगरे मां यीशुएरे नव्वेरो प्रचार कियोरोए ।

28 प्रेरितेई बरनबासेरी गल्लां केरो विश्वास कियो, ते शाऊल तैन सेइं साथी राव, ते यरूशलेम नगरे मां गातो राव ।

29 ते यूनानी भाषा केरनेबाले यहूदन सेइं भी गलवात केरतो थियो, दिलेर भोइतां प्रभुएरो प्रचार केरतो थियो, पन तैना तैस मारनेरी कोशिश मां रहते थी ।

30 एल्हेरेलेइ विश्वासी दूलाएई तै केसरिया नगरे मांजो नीयो, ते तैट्टां तरसुसे नगरे जो भेजो ।

31 त सारे यहूदिया इलाके मां ते गलील इलाके ते सामरिया इलाकेरी कलीसियान मां चैन भोव, ते तरक्की भोती जेई, ते तै प्रभुएरे डरे मां ते पवित्र आत्मारे शैन्ति मां च़लती ते बड़े लोकेई यीशु मसीह पुड़ विश्वास कियो ।

~~~~~

32 फिरी एरू भोवं कि पतरस सारे इलाके मां हठतो फिरो, ते तैन पवित्र लोकन साथी भी पुजो, ज़ैना लुद्दा नगरे मां रहते थिये ।

33 त तैस तैड़ी ऐनियास नव्वेरो अक मैन्हु मैल्लो, तैस अधरंग थियो, ते अठे सालां केरो दंतो खट्टी पुड़ राहोरो थियो ।

34 पतरसे तैस जो ज़ोवं, “हे ऐनियास! यीशु मसीह तीं बज़ाते, उठ अपनू बछ़ान खडू केर,” तैखने तै बेच़्छोइतां खडो भोव ।

35 तैखन लुद्दा नगरेरे ते शारोनेरे राने बालेई एन हेरतां प्रभु यीशु पुड़ विश्वास कियो ।

36 याफा नगरे मां अक कुआन्श थी, जेसारू नवं तबीता थियू (यूनानी भाषाई तैसेरू दोरकास थियू, जेसेरो मतलब हिरनी) तै विश्वासी थी, ते रोड़ां-रोड़ां कम्मां केरती ते गरीबां केरि महत केरती थी ।

37 तैने दिहाइन मां जेइस पतरस लुद्दा मां थियो, तै बिमार भोइतां मेरि जेई, ते तैसारी लाश नेइतां दोपेरेरे कमरे मां रखोरी थी ।

38 लुद्दा याफारे नेडे थियू, ते ज़ैखन चेलेई शुनू कि पतरस लुद्दा मां आए, त दूई मैन्हु भेजतां मिनत की, “कि असन कां एजने मां ठढ न ला ।”

39 तैखन पतरस तैन सेइं साथी च़लो जेव, ते ज़ैखन तैड़ी पुजो त तै बा तैस कमरे मां नीयो, सैरी विधवां कुआन्शां लेरां देती थी, ते तैस इलखमेइं खेड़ि थी, ते तैना लिगड़ां ज़ैना दोरकास सियोरां थियां हिराने लेगि ।

40 पतरसे तैना सब बेइरोवं कढे, ते एप्पू ज़ैधू केरे भारे प्रार्थना केरने लगो, फिरी तैनी लाशारे पासे तुत्तर फरेइतां ज़ोवं, “हे तबीता, उठ ।” तैखन तैसां अपनि एच्छी खोल्ली, ते पतरसे तेकतां खडो भोइ ।

41 पतरसे हथेरां दलेइतां खडो की, ते विश्वासी ते विधवां कुआन्शां कुजेइतां ज़ीती ते होशी मां तैन केरे सुपुर्द की ।

42 एस गल्लरी खबर सारे याफा नगरे मां फैली जेई, ते बड़े लोकेई प्रभु यीशु पुड़ विश्वास कियो ।

43 पतरस किछ् च़िरे तगर याफा नगरे मां शमीन नव्वेरो एक्की मैनेरे कां राव, ज़ै चमड़ेरू कम केरतो थियो ।

10

~~~~~

1 केसरिया नगरे मां अक मैन्हु थियो, तैसेरू नवं कुरनेलियुस थियू, ते तै अक इतालियानी फौवजरो सूबेदार थियो ।

2 कुरनेलियुस त तैसेरे घेरे सारे लोक परमेशेरे करां डरने बाले थिये, कुरनेलियुस यहूदी लोकन बडू दान देतो थियो, ते परमेशेरे कां लगातार प्रार्थना केरतो रातो थियो ।

3 एक्की दिहाड़े कुरनेलियुस दीसां अक रोडे च़ारे दर्शन हेरू, परमेशेरो अक स्वर्गदूत तैस कां अव, ते ज़ोने लगो, “हे कुरनेलियुस ।”

4 तैनी ते रोडे-च़ारे लाव ते डेरतां ज़ोवं, “हे मालिक कुने?” तैनी तैस सेइं ज़ोवं, “तेरी प्रार्थना ते तेरू दान यादगैरियर लेइ परमेशेरे कां पुजेरू आए ।

5 हुनी तू मैन्हु याफा नगरे मां भेजतां तैस मैन्हु ज़ेसेरू नवं शमौन पतरसे अपने घरे कुजा ।

6 तै शमौनेरे घरे बिशोरो थियो, ज़ै चमड़ेरू कम केरनेबालो थियो, ज़ेसेरू घर समुदरेरे बन्ने ।”

7 ज़ैखन स्वर्गदूत एना गल्लां केरतां च़लो जेव, त कुरनेलियुस अपने दूई सेवकन ते अपने सिपेहिन मरां अक भक्त सिपाही कुजाव ।

8 ते तैन सारो बिस्तार ज़ोइतां याफा नगरे जो भेजे, कि पतरसे कुजान ।

### XXXXXXXXXXXX

9 होरसां ज़ैखन तैना भेजोरे लोक च़लते-च़लते नगर नेडे पुजे । तै दुपारहरां केरो वक्त थियो, तैस वक्ते पतरस बा छ्ती पुइ प्रार्थना केरने लावरो थियो ।

10 तैस दलुख लगगी ते तै किछ् खानू चातो थियो, पन ज़ैखन मैन्हु रोटी बनाने लगे त तैस बेहोशी ज़ेरि भोइजेइ ।

11 ते तैनी हेरू कि अम्बर खुल्लूए, ते अक चादर लाई ज़ै ज़ेवरे कूना टेंगोरी अम्बेरेरे पासेरां उन्डी ज़मीनेरे पासे ओरी ।

12 ज़ैस मां ज़मीनेरे सारे जानवर ते पेटेरे भारे च़लने बाले जन्तू ते अम्बेरां चुड़ोलू तैस चादरी मां थियां ।

13 तैखन अक आवाज़ आई, “हे पतरस, उठ ते मार ते खा ।”

14 पन पतरसे जुवाव दितो, “नई प्रभु, कधे नई, किजोकि मीं अज तगर कोई अपवित्तर ते भिट्टी चीज नई खोरी ।”

15 फिरी दुइयोवं बार तैनी आवाज़ शुनी, “ज़ैन किछ् परमेशेरे शुद्ध कियोरूए, तू तैस जो भिट्टू न ज़ो ।”

16 टलेइ बार ए आवाज़ आई, ते फिरी तै चादर अम्बेरेरे पासे च़ली जेई ।

17 पतरस दिले मां सोचने लगगोरो थियो, कि एस दर्शनेरो कुन मतलब भोइ सकते, ज़ैन अज मीं लाव, एतरे मां कुरनेलियुसेरे भेजोरे मैन्हु शमौनेरू घर तोपते-तोपते दारे मां पुजे ।

18 तेनेई हक देइतां पुच्छ्, “शमौन ज़ैस जो पतरस ज़ोतन इडी तुशुशे कां आए?”

19 हेज् पतरस दर्शनेरे बारे मां सोचने लगगोरो थियो, त पवित्तर आत्मा तैस जो ज़ोवं, “शमौन, हेर टलाई मैन्हु तीं पुच्छ्ने लगोरेन ।

20 खडो उठ ते बुन गा, तैन सेइं साथी गाने करां न डेरां, किजोकि तैना मीं भेजोरेन ।”

21 पतरस बुन अव, ते तैन मैनन् सेइं ज़ोने लगो, “ज़ैस मैन्हु तुस तोपने लगेरथ तै अवं आई, ते तुस किजो ओरथ?”

22 तेनेई जुवाव दितो, “असां कुरनेलियुस सूबेदारे ज़ै धर्मी ते परमेशेरे करां डरने बालोए, ते सारे यहूदी तैसेरी तारीफ़ केरतन, एक्के पवित्तर स्वर्गदूते तैस जो ज़ोरूए, तू शमौन पतरसे अपने घरे कुजेइतां तैसेरी गल्लां शुन ।”

23 तैखन पतरसे तैना अन्तर कुजाए, ते तैन केरि खातरदारी की । होरसां पतरस तैन सेइं साथी च़लो जेव, ते याफा नगरेरे काई दलान मरां किछ् तैस सेइं साथी च़ले जे ।

### XXXXXXXXXXXXXXXXXXXXXXXXXXXX

24 एग्री दिहाड़े तैना कैसरिया नगरे मां पुजे, कुरनेलियुस अपने रिशतेदारन ते अपने दोस्तन अकोट्टे केरतां तैन बलगने लाव ।

25 पतरस ज़ैखन कुरनेलियुसेरे घरे पुजो, त कुरनेलियुसे तैसेरी बडी आदर खातरी सेइं इज्जत की, ते करोड़ी पव्वन कां रेखतां तैस कां मथ्यो टेको ।



26 पन पतरसे तै खडो कियो ते ज़ोवं, “खडो भो किजोकि अवं भी त अक मैन्हु आई।”

27 फिरी तै कुरनेलियुसे सेइं गल्लां केरतो अन्तर जेव, तैड़ी बडे लोक अकोट्टे विशशोरे लेइतां,

28 तैस सेइं ज़ोवं, “तुसन पत्तोए इश्शे यहूदी केरे लेइ गैर कौमी सेइं मिलनू जुलनु कानूनेरे खलाफे, पन परमेशेरे मीं सेइं ज़ोरूए कि अवं केन्वी मैन्हु जो अपवित्तर या भिट्टो ज़ोई।

29 एल्हेरेलेइ तुसेईं अवं कुजाव त अवं चुपचारे ज़लो अव। हुनी अवं तुसन पुच्छताई कि तुसेईं अवं किजो कुजेवरोई?”

30 कुरनेलियुसे ज़ोवं, “अवं च़ेवरे दिहाइना पेइले अपने घरे मां इस मौके कोई टलेइ वजेइं प्रार्थना लोरो थियो करेने, त अचानक अक मैन्हु चमकतां लिगड़ा लगगोरो मेरे तुत्तरे अगर खडो भोव।

31 ते ज़ोने लगो, हे कुरनेलियुस, तेरी प्रार्थना परमेशेरे शुनोरीए ते तेरू दान भी कबूल कियोरूए।

32 एल्हेरेलेइ कोन्वी याफा नगरे मां भेजतां शमौन ज़ैस जो पतरस ज़ोतन, कुजा। तै शमौनेरे कांए ज़ै चमड़ेरू कम करेनेबालो, ते समुदरेरे बन्ने रहते। (ज़ैखन तै एज्जेलो त तै परमेशेरे बारे मां ज़ोलो)

33 तैखन मीं मैन्हु भेजे, ते तीं बडू रोडू कियू कि तू अव। हुनी अस परमेशेरेरे सामनेम, ताके ज़ैन किछ परमेशेरे ज़ोरू तैन शुनम।”

**XXXXXXXXXXXXXXXXXXXX**

34 तैखन पतरस ज़ोने लगो, हुनी मीं याकीन भोव, कि परमेशेरे केन्चेरो तरफदार नई।

35 बल्के हर कौमी मरां ज़ै परमेशेरे करां डरते ते रोडं कम्मां केरते परमेशेरे तैस कबूल केरते।

36 इसराएली लोकां केरे लेइ परमेशेरेरे भेजोरे सन्देशेरे बारे मां तुसन पतो आए। परमेशेरे यीशु मसीहेरे ज़िरिये सेइं ज़ै सेम्बी केरो प्रभुए शैनतरी खुशखबरी शुनाई।

37 यहून्नारे बपतिस्मेरो प्रचार करेने करां लेइतां गलील इलाके करां शुरु भोइतां सारे यहूदिया इलाके मां कुन-कुन भोवं, तुस भी ज़ानतथ।

38 केन्चेरे प्रभु यीशु नासरी पवित्तर आत्माई सेइं ते शक्ति सेइं अभिषेक कियू, ते तै लोकां केरू भलू केरतो राव, तेनी सब ज़ैना शैतानेरे ज़ाले मां फासोरे थिये, तैना छुटाए, किजोकि परमेशेरे तैस सेइं साथी थियो।

39 तैनी ज़ैन किछ यहूदी केरे मुलखे मां ते यरूशलेम नगरे मां कमाव, असां तैसेरे गवाह आम, ते तैए यहूदी लीडेईं यरूशलेमे मां करूसे पुड़ टेंगेइतां माराव।

40 परमेशेरे तैए टलेइयोवं दिहाइ फिरी ज़ीतो केरतां हिराव।

**XXXXXXXXXXXXXXXXXXXXXXXXXXXXXXXXXXXXXXXXXXXXXXXXXXXX**

41 तै सैरी लोकेईं नई बल्के गवाहईं लाव, ज़ैना परमेशेरे पेइले चुनतां रखोरे थिये, यानी असां ज़ैनेईं तैसेरे मुडदन मरां ज़ीते भोनेरां बाद तैस सेइं साथी रोट्टी खोरीए।

42 ते तैनी असन हुक्म दित्तो कि लोकन मां प्रचार केरम ते गवाही देम, कि ई तैए ज़ै परमेशेरे ज़ीते ते फटरां केरो हाकिम भोए।

43 सारे नवी तैसेरे बारे मां गवाही देतन, कि ज़ै कोई तैस पुड़ विश्वास केरेलो त तैस तैसेरे नब्बे सेइं पापां केरि माफ़ी मैले।

44 पतरस हेजू एन ज़ोतो थियो, त पवित्तर आत्मा तैन पुड़ उतरी, ज़ैना बच्चन शुन्ने लोरे थिये।

45 ते ज़ेत्तरे यहूदी विश्वासी पतरसे सेइं साथी ओरे थी, तैना सब हैरान भोए कि गैर कौमन पुड़ भी पवित्तर आत्मा उतरोरीए।

46 किजोकि तैनेईं तैना किसमे-किसमेरी भाषां केरते, ते परमेशेरेरी तारीफ़ केरते शुनोरी थिये, तैखन पतरसे ज़ोवं।

47 “ज़ेन्चेरे परमेशेरे असन पवित्तर आत्मा दित्तोरीए तेन्चेरे तैन भी दित्तोरीए, कुन कोई एन मैनन् पेनेरो बपतिस्मो नेने करां रोकी सकते?”

48 एन्हरेलेइ पतरसे हुक्म दित्तो, कि एन लोकन यीशु मसीहेरे नंब्वे सेइं बपतिस्मो देथ, तैखन तैनेई पतरसे कां मिनत की, कि किछ् दिहाड़े असन कां हेजू बिश।

## 11

???????? ????????? ????????? ?????????

1 यहूदिया मां रानेवाले प्रेरितेई ते विश्वासी दूलाएई ए खबर शुनी, कि गैर यहूदेई भी परमेशेरू वचन कबूल कियूं।

2 ते जैखन पतरस वापस यरूशलेम नगरे मां अव, त यहूदी विश्वासी लोक तैस सेइं बेस करेने लगे।

3 “तू गैर कौमां केरे घरे जेव, ते तैन सेइं साथी बिश्तां रोट्टी भी खाइ।”

4 पतरसे तैन सेइं सारो बिस्तार पतरां देतो ते आखरी तगर एन्हरे शुनाव, कि कुरनियुसेरे घरे कुन भोवं।

5 “अवं याफा नगर मां प्रार्थना करेने मां मघन थियो, त मीं किछ् बेहोशी जेरि भोइजेइ, ते मीं अक दर्शन लाव, ते अक चादर जेरि च़ेवरे कूना टेंगोइतां अम्बरेरे पासेरां उन्दी एइतां मीं तगर पुजी।

6 अवं तैस मां तकने लगे त कुन हेरताई कि, तैस मां ज़मीनेरे सारे च़ेवरे ज़ंघेइं चलने वाले जानवर ते पेटेरे भारे चलने वाले जीप ते अम्बरे मां उडरने वालां चुड़ोलू थियो।

7 तैखन मींजेइ अक आवाज आई, जै ज़ोने लगी, हे पतरस खड़ो उठ ते इन मार ते खा।”

8 मीं जुवाब दित्तो, प्रभु नई, किजोकि मीं अज़ तगर कोई भी अपवित्र या भिट्टी चीज़ नई खोरी।

9 एसेरे जुवाबे मां अम्बरेरां होरि आवाज आई, ज़ैन किछ् परमेशेरे पवित्र बनेवरीए, तू तैस जो भिट्ट न ज़ो।”

10 ए आवाज टलेइ बार आई, ते फिरी ते चादर अम्बरेरे पासे खिचोइतां च़ली जेई।

11 ठीक तैस्से मौके टलाई मैन्हू ज़ैना कैसरिया नगरे मरां कुरनुलियुसे मीं कां भेज़ोरे थिये, तैस घरे कां सामने खड़े भोए, ज़ैडी अवं थियो।

12 तैखन पवित्र आत्मा मीं सेइं ज़ोवं, बेधड़क च़ारे एन सेइं साथी गा, एना 6 दूला भी मीं सेइं साथी आए, ते असां तैस मैनेरे घरे जे।

13 तैनी असन सेइं ज़ोवं, कि केन्हरे सेइं तैनी अक स्वर्गदूत घरे लाव ते ज़ोने लगे, याफा मां केन्ची मैन्हू भेज़तां शमौन ज़ैस जो पतरस ज़ोतन, तैस अपने घरे कुजा।

14 ते एइतां तीं अक एरो बिस्तार देलो, ज़ेसेरे ज़ोने सेइं तेरी खानदानेरे सारे मैनन् परमेशर मुक्ति देलो।

15 ज़ैखन मीं तैडी गेइतां तैन सेइं गल्लां शुरू की, त पवित्र आत्मा तैन पुड़ उतरी, ज़ेन्हरे पेइले असन पुड़ उतरोरी थी।

16 तैखन मीं प्रभुएरू तैन वचन याद आऊं, ज़ैन तैने ज़ोवरो थियूं, कि यूहन्ना त पैनी सेइं बपतिस्मो दित्तो, पन तुसन पवित्र आत्माई सेइं बपतिस्मो मैलेलो।

17 बस्सा अगर परमेशेरे तैन भी तैए तोफो दित्तो, ज़ै असन प्रभु यीशु मसीह पुड़ विश्वास करेने सेइं मैल्लो, त अवं कौन भोताई कि परमेशेरे रोकी?”

18 ज़ैखन यहूदी विश्वासी लोकेई एन शुनू त चुप रेइजे, “ते परमेशेरेरी तारीफ़ करेने लगे, तां त सच्च़े कि परमेशेरे गैर कौमन भी पापन करां मन फिरेइतां यीशु पुड़ विश्वास केरतां हमेशारी जिन्दगी हासिल करेनेरो तोफो दित्तोरोए।”

???????? ????????? ?????????

19 त तैना लोक ज़ैना तैस दुखेरे मारे ज़ै स्तिफनुसेरे मौतरे वक्ते शुरू भोरो थियो, तितर-बितर भोइजेइ, ते च़लते-च़लते फीनीके इलाके ते साइप्रस ते अन्ताकिया नगरे तगर पुजे, पन तैना यहूदी केरे अलावा होरन परमेशेरू वचन न थिये शुनाते।

20 पन तैन मरां किछ् साइप्रसरे रानेबाले ते किछ् कुरेनेरे रानेबाले थिये, जैना अन्ताकिया नगरे मां एइतां यूनानी लोकन भी प्रभु यीशु मसीहेरी खुशखबरी शुनाने लगे ।

21 ते प्रभुएरी शक्ति तैन पुइ थी, ते बडे गैर कौमरे लोकेई तैन केरे सनदेशे पुइ विश्वास कियो, ते प्रभु यीशु पुइ भरोसो केरनां शुरू कियो ।

22 तैखन तैन केरि खबर यरूशलेम नगरेरे कलीसियारे लोकन तगर पुज्जी, ते तैनेई बरनबास अन्ताकिया नगरे जो भेजो ।

23 ते तैडी पुज्जतां, ते परमेशेरो अनुग्रह हेरतां बडो खुशी भोव, ते तैन ए गल ज़ोई कि अपने तने मने सेई प्रभु सेई लिपटोरे रान ।

24 बरनबास अक रोडो मैन्हु थियो, तै पवित्र आत्माई ते विश्वासे सेई भरपूर थियो, ते बडे लोक प्रभु मां आए ।

25 तैखन बरनबास अन्ताकिया नगर शैरतां शाऊले तोपने तरसुस नगरे जो चलो जेव ।

26 तैनी शाऊल तोप्तां अन्ताकिया नगरे मां आनो, तैडी तैना एक्की साले तगर दुइये ज़न्हे कलीसियाई मां लोकन प्रभु यीशुएरी शिक्षा देते राए, ते लोक चलन जो सेभन करां पेइले अन्ताकिया नगरे मां मसीही ज़ोने लगे ।

27 तैन्ने दिहाइन मां किछ् विश्वासी जैना नबी थिये, यरूशलेम नगरेरां अन्ताकिया नगरे मां आए ।

28 तैन मरां अक नबी जेसेरू नवं अगबुस थियूं खडे भोइतां ते पवित्र आत्माए ज़ोने सेई एन ज़ोने लगे, कि सैरी दुनियाई मां अक बडो काल पेनोए । ए काल क्लौदियुस हाकिमेरे वक्ते पेव ।

29 तैल्हेरेलेइ चेलेई फैसलो कियो कि, असन मरां हर कोई अपनि-अपनि हैसयतरे मुताबिक किछ् दान देथ, ताके यहूदिया इलाके मां रानेबाले मसीही दूलां केरि महत भोइसखे ।

30 बस्सा तैनेई किछ् रकम अकोटटी की ते बरनबास ते शाऊलेरे हथ्थे यरूशलेम नगरेरे बुजुर्गन कांजो भेजो ।

## 12

???????? ???? ???? ???? ???? ???? ?

1 तेस्से वक्ते मां हेरोदेस राजो कलीसियारे किछ् मैन्नु दुःख देनेरे लेइ तैना टलाने शुरू कीए ।

2 ते यूहन्ना प्रेरितेरो दूला याकूब तलवारी सेई मराव ।

3 जैखन तैनी हेरू कि यहूदन ए गल बडी खुशी अई, त तैन दिहाइन मां पतरस भी टलाव । तैना दिहेई अखमीरी रोट्टरी तिहारेरी थी ।

4 ते तैस टलानेरां बाद हेरोदेस तै कैदखाने मां छुड्डो, ते तैसेरी निगरेनारे लेइ च़ेवरे टोली बनाई, हर टोली च़ेव-च़ेव सिपाही केरि थी, हेरोदेसेरो खियाल थियो कि फ़सह तिहारेरे बाद तै केदे मरां केदतां लोकां केरे सामने पेश केरे ।

5 कैदखाने मां पतरस बडे दिहाइन तगर पेरेहे मां थियो, पन सारी कलीसिया तैसेरेलेइ परमेशेरां प्पार्थना केरने लगोरी थी ।

6 हेरोदेसे, पतरस लोकां केरे सामने आने करां पेइले अक रात जैखन पतरस दूई पहेरेदारां केरे मज़ाटे बंधोरो झुलोरो थियो, ते सिपाही कैदखानेरे डेवढी पुइ पैरहो देते थिये ।

7 त अचानक परमेशेरो स्वर्गदूत कैदखाने मां अव, ते सारो कैदखानो टलकडो भोइ जेव, स्वर्गदूते पतरसे खिती देइतां बीझाव ते ज़ोवं, “उठ, ते लूश केर ।” ते शंगलां पतरसेरे हथ्थन सैहीयेरां खुल्ली जेई ।

8 स्वर्गदूते पतरसे सेई ज़ोवं, “अपनु मज़ बन्ध ते बूट ला ।” पतरसे तैन्ने कियूं, ते फिरी ज़ोवं, “अपनो चोगो ला ते मीं पत्पती एई ।”

9 पतरस स्वर्गदूत पत्पती कैदखाने मरां बेइर अव, पन तैस ए पतो न थियो, कि स्वर्गदूते ज़ैन केरने लगेरोए एन सच्चे या कोई दर्शन हेरने लगेरोई ।

10 तै दुइयोवं परहेदारे करां बेइर निस्तां अव, ते लोंहेरे फाटके कां पुजो, जै नगरेरे पासे खुलतो थियो, तै फाटक तैन केरे लेइ अपने आप खुल्लो, ते तैना तैट्ठां निस्तां दूर पुजे, स्वर्गदूत पतरसे तैड़ी पुजेइतां गैइव भोइ जेव ।

11 तैखन पतरस होशी मां अव, ते ज़ोने लगे, “हुनी मीं पूरू याकीन भोवं, कि परमेशेरे अपनो स्वर्गदूत भेजतां अवं हेरोदेसेरे हथ्थे मरां छुटाव, ते यहूदी लीडरेई ज़ैन सोचेरू थियूं, तैन बन्ने न दित्तू ।”

12 ज़ैखन तै एस बारे मां सोचने लगगोरो थियो, त मरियमेरे घरे पुजो, जै यूहन्ना ज़ैस जो मरकुस ज़ोते थिये तैसेरी अम्मा थी । तैड़ी बडे विश्वासी लोक अकोट्टे भोइतां प्रार्थना करने लगगोरो थिये ।

13 पतरसे बेइरू दार गुडकावं त अक नौकरानी ज़ेसारू नवं रूदे थियूं, तै दार खोलने आई ।

14 तैसां पतरसेरी गल शुनी ते तैसां गल पिशानी ते बगैर दार खोलनेरां दौवइती खुशी भोइतां आई, ते ज़ोने लगी, पतरस बेइर दारे मां ओरोए ।

15 तैना मैन्हू ज़ोने लगे, “तू कुन पागल भोरिस ।” पन ज़ैखन तैसां रोडेचारे ज़ोवं, कि तै पतरसे, त तैना ज़ोने लगे “पतरस त नई पन पतरसेरो स्वर्गदूत भोलो ।”

16 ते पतरस बेइर दार गुडकातो राव, ते ज़ैखन तैनेई दार खोल्लू त पतरस लेइतां हैरान रेइजे ।

17 पतरसे तैन जो हथ्थे सेइं इशारो कियो, कि चुप राथ, ते फिरी अन्तर एइतां सारो बिस्तार शुनाव, कि अवं केन्नेरे परमेशेरे कैदखाने मरां बेइर कदो, ते फिरी ज़ोवं, “थाकूबे त तैसेरे होरि मसीह दूलान भी पतो देइयथ ।” ते एप्पू केन्वी होरि जगाई जो चलो जेव ।

18 ज़ैखन झेइ भोइ त सिपेहिन एप्पू मांमेइं खलबली मेचि जेई, कि पतरस कोरां जेव ।

19 ज़ैखन हेरोदेसे तैस तोप्पनेरो हुक्म दित्तो त तैनी सिपेही केरू बियांन घिन्नेरां पत्ती तैन जो कतलेरो हुक्म दित्तो, ते पतरस यहूदिया इलाके मरां कैसरिया नगरे जो चलो जेव, ते किछ्चि तगर तैड़ी राने लाव ।



20 हेरोदेस सूर ते सेदारे नगरेरे लोकन पुइ बडो नाराज थियो, तैखन तैना लोक मिलतां तैस कां आए, ते बलास्तुसे ज़ै राजेरो खास मैन्हू थियो, मनेइतां मेल केरनो चाव, किजोकि राजो एरे मुलखेरां तैन केरे मुलखे खर्चां मैलतो थियो ।

21 तैखन तैनी अक दिहाड़ी टुवहलाई ते हेरोदेस राजो अपना राजेरां लिगइं लेइतां आदालतरे तखते पुइ बिशतां लोकन सेइं ज़ोने लगे ।

22 तैनेई ज़ैखन शुनू त ज़ोने लगे, “ए मैन्हू केरि आवाज नई बल्के परमेशेरेरी आवाजे ।”

23 किजोकि हेरोदेसे परमेशेरेरी तारीफ़ न की, तैल्हेरेलेइ तैस परमेशेरे स्वर्गदूतेरी एरी मार पेई कि तैसेरी सैरी जानी कीडे लगगे, ते तै मेरि जेव ।

24 पन परमेशेरेरू बच्चन अग्रोवं बद्धतू जेवं, ते विश्वासी लोकां केरि गिनती बद्धती जेई ।

25 ज़ैखन बरनबास ते शाऊल अपनि सेवा ज़ै तैन केरे सुपुर्द कियोरी थी, तैनेई पूरी की त अन्ताकिया नगरेरां यरूशलेम नगरे जो वापस आए, ते यूहन्ना ज़ैस जो मरकुस ज़ोते थिये, एप्पू सेइं साथी आनो ।

## 13



1 अन्ताकिया नगरेरे कलीसियाई मां काई नवी ते गुरू थिये, मतलब बरनबास, शमौन ज़ैस जो नीगर भी ज़ोतन, लूकियुस कुरेनी, ते मनाहेम ज़ै मुलखेरे च़ेवरोवं हिसे पुइ हाकिम थियो ज़ै हेरोदेसेरो दुइ दूला थियो, ते शाऊल थियो ।

2 जैखन तैना बरत रेखतां परभुएरी आराधना करेने लगगोरो थिये, त पवित्तर आत्मा तैन सेइं ज़ोवं, “जैस सेवारे लेइ बरनबास ते शाऊल मीं कुजोरेन, तैसेरेलेइ तैन अलग केरा।”

3 तैखन तैनेई बरत रेखतां प्रार्थना की, ते तैन पुइ हथ रेखतां तैना परमेशेरे कम्मरे लेइ भेजे।

~~~~~

4 शाऊल ते बरनबास पवित्तर आत्माारी तरफां भेजोरे सिलूकिया नगरे जो जे, ते तैट्ठां तैना जिहाजे पुइ चेट्ठां साइपरस टैपू जो चले।

5 जैखन तैना सलमीसे मां पुजे, त तैड़ी तैना यहूदी केरे प्रार्थना घरे मां परमेशेरू वचन शुनाव, ते यहून्ना मरकुस भी तैन केरि मद्दत करेनेरे लेइ तैड़ी थियो।

6 जैखन तैनेई सारे जज़ीरे ते नगरन-नगरन मां हट्टु फिरू, त तैना पाफुसे नगरे मां पुजे, त तैन केरि मुलाकात एक्की डैइनोइ यहूदी ते झूटे नेबी सेइं भोइ, जेसेरू नवं बार-थीशु थियूं।

7 ते तैट्ठेरे हाकिम सिरगियुस, पौलुस सेइं साथी थियो, जै अक अक्लमन्द मैन्हु थियो, ते तैनी बरनबास ते शाऊल कुजाए ते परमेशेरू वचन शुन्नु चाऊ।

8 पन एलीमास डैइनोइ (किजोकि तैसेरे नव्वेरो मतलब डैइनोइ ए) तैन केरि खलाफत करेने लगे, तैने हाकिम थीशु पुइ विश्वास करेने करां रोकनो चाव।

9 तैखन शाऊल जेसेरू नवं पौलुस भी आए, पवित्तर आत्माई सेइं भेरोइतां ध्याने सेइं एलीमास डैइनोइरे पास तकने लगे, ते तैस सेइं ज़ोवं,

10 “हे शैतानेरे कोआ, तू हर किसमेरी पाखंडे सेइं ते च़लैकी सेइं भेरतस, ते नेकारो दुश्मन, कुन तू परमेशेरी बत बगाइने करां बाज़ न एजस?”

11 हुनी प्रभु तेरे खलाफ, तू कानो भोइगानोस, ते किछ् च़िरे तगर तू दिहाइो न लाएलो।” तैखने तैस आंधरू लेइयोने लगे, ते तै इरां-उरां तोपने लगे, ताके कोई तैस हथेरां दलेइतां च़लाए।

12 तैखन हाकिमे एन हेरतां, ते प्रभुएरी शिक्षा शुन्तां हैरान राव, ते प्रभु थीशु पुइ विश्वास कमाव।

~~~~~

13 पौलुस ते तैसेरो साथी पाफुस नगरेरां जिहाजे मां पंफूलिया इलाकेरे पिरगा नगरे मां आए, ते यहून्ना तैन शैरतां वापस यरूशलेम नगरे जो च़लो जेव।

14 ते तैना पिरगा नगरेरां निस्तां पिसिदिया इलाकेरे अन्ताकिया नगरे मां पुजे जै गलतिया इलाके मां आए। ते आरामेरे दिहाइे प्रार्थना घरे मां गेइतां बिशजी जे।

15 मूसरो कानून ते नेबी केरि किताबी मां पढनेरे बाद तैट्ठेरे प्रार्थना घरेरे प्रधाने तैन ज़ोवं, “अगर मैन्हु केरि भलैइयरे लेइ तुस भी किछ् ज़ोनु चातथ त ज़ोथ।”

16 तैखन पौलुस खइो उठो ते हथ्ये सेइं इशारो केरो कि चुप रान ते ज़ोने लगे, “हे इस्राएली लोकव ते परमेशेरो डर मन्नेबाले गैर कौमां केरे लोकव मेरी गल शुना।

17 इन इस्राएली लोकां केरे परमेशेरे इशेरे दादे-पड़दादे चुने, जैखन तैना मिस्र मुलखे मां परदेशी भोइतां रहते थिये, तैन परमेशेरे तरक्की दित्ती, ते बडे शेक्ति सेइं तैट्ठां कढे।

18 ते तै सुनसान टैरी मां लगभग 40 सालन तगर तैन केरि झैल्लतो राव, तैना बार-बार हुक्म दलोइते राए।

19 कनान मुलखे मां परमेशेरे सत कौमां नाश केरतां तैन केरि ज़मीन अपने इस्राएली लोकन विरासती मां दित्ती।

20 एना गल्लां पूरी भोने लगभग 450 साल लगे, तैसेरां बाद परमेशेरे तैन केरे लेइ शमूएल नेबेरे वक्ते तगर हाकिम रखे।

21 जैखन हेजू शमूएल तैन केरो हाकिम थियो त तैन लोकेई राज़ो बनानेरे लेइ दरखुवास की, ते परमेशेरे विन्यामीनेरे गोत्रे मरां कीशेरू मट्टू शाऊल राज़ो बनावं ते तैनी 40 साल यरूशलेम नगरे मां राज़ कियूं।

22 फिरी तैनी शाऊल हटेइतां दाऊद तैसेरी ठैरी तैन केरो राज्जो बनाव, जेसेरे बारे मां तैनी गवाही दिती, मीं थियेरू मट्टू दाऊद मेरे मनरे मुताबिक मैलोरूए, तैस पुड अवं खुश आई, ते तैए मेरी मर्जी पूरी केरेलो ।

23 परमेशेरे अपने वादेरे मुताबिक तैसेरे वंशेरे मरां पापन करां मुक्ति देनेरे लेइ इस्राएले कां यीशु मसीह भेजो ।

24 जेसेरे एजने करां पेइले यूहन्ना इस्राएलेरे सारे लोकन प्रचार कियो, कि पापन करां मनफिराथ ते बपतिस्मो नेथ ।”

25 जैखन यूहन्नारू कम पूरू भोनेबालू थियूं, त तैनी ज़ोवं, “तुस मीं कुन समझतथ? ‘अवं मसीह नई!’ बल्के हेरा, तै मेरे बाद एजनेबालोए, किजोकि अवं त एस काबल नई कि तैसेरे बूटां केरे तसमे भी खोल्ली सेखी ।”

26 “हे मेरे ढलाव, तुस जैना अब्राहमेरे औलादारे लोकव, ते परमेशेरो डर मन्नेबाले गैर कौमां केरे लोकव, इस मुक्तरो विस्तार तुसन कां भेजरोए ।

27 यरूशलेम नगरेरे रानेबाले लोकेई ते तैन केरे प्रधानेई यीशु मसीह न पिशानो, ते न नेवी केरि गल्लां समझी, जैना हर आरामेरे दिहाड़े पेढतां शुनेई गैती थी ।

28 हालांकी तैन मौतरी सज़ारे काबल सबूत न मैल्लू, पन फिरी भी तैनेई पिलातुस गवर्नरे कां दरखुवास की, कि ए मारो गाए ।

29 ते तैनेई सब किछु जैन तैसेरे बारे मां पवित्रशास्त्रे मां लिखोरू थियूं, पूरू कियूं, त तै कूरुसे पुड कील देइतां मारो, ते ओसैलतां एक्की कबरी मां छुडो ।

30 पन परमेशेरे तै मुडदन मरां भी ज़ीतो कियो ।

31 ते जैना लोक गलील इलाके मरां तैस सेइ साथी यरूशलेम नगरे मां ओरे थिये, तैन चलन काई दिहाड़न तगर यीशु लेइयोतो राव, ते हुनी तैना लोक जैनेई तै लाहोरोए गवाही देतन ।

32 असां तुसन खुशखबरी शुनातम, कि जै वादो परमेशेरे इश्शे दादे-पड़दादन सेइ कियोरो थियो ।

33 कि परमेशेरे यीशु मसीह मुडदन मरां ज़ीतो केरतां तै वादो पूरू कियो, ते भजना केरि किताबी मां परमेशर मसीहेरे बारे मां ज़ोते, तू मेरू मट्टूस ते अवं तेरो बाजी भोव ।

34 एन सच्चे, कि परमेशेरे तै मुडदन मरां भी ज़ीतो कियो, ताके तै न शड़, परमेशेरे बचने मां एन्ने बियांन कियोरूए,

कि अवं तीं पवित्र ते सच्ची बरकत देलो, जैन केरो वादो परमेशेरे दाऊदे सेइ कियोरो थियो ।

35 ते होरि भजने मां दाऊद ज़ोते,

तू अपने पवित्र मैन्हु शड़ने न देलो ।

36 किजोकि दाऊद त अपने वक्ते मां परमेशेरी मर्जी पूरी केरनेरां पत्ती मेरि जेव, ते अपने दादन-पड़दादन सेइ साथी दफन भोव, ते तैसेरी जान शैडी जेई ।

37 पन जै (यीशु मसीह) परमेशेरे मुडदन मरां ज़ीतो कियो, त तैसेरे शड़नेरी नौबत न आई ।

38 “एल्हेरेलेइ, हे ढलाव, बुझा कि यीशुएरे ज़िरिये सेइ तुसन पापां केरि मैफारी खबर शुनाई गाचे ।

39 तुस मूसा नेबेरे कानूने मुताबिक धर्मी न थी भोने, पन जै कोई यीशु पुड विश्वास केरे तै धर्मी भोए ।

40 “एल्हेरेलेइ खबरदार राथ, कोस्कोई एरू न भोए कि नेवी केरि ए गल तुसन पुड सच्चे बीते,

41 तुस जैना होरि केरि तुहीन करतथ, हेरा, ते हैरान भोथ, ते बरबाद भोथ,

किजोकि अवं तुश्शे ज़ीते ज़ागते एरू कम केरनेबालोई,

कि अगर कोई तुसन सेइ तैसेरे बारे मां गलबात भी केरे, त तुस कथे विश्वास न केरेले ।”

42 जैखन पौलुस ते बरनबास प्रार्थना धरे मरां चले, त लोक तैन कां मिनत केरतां ज़ोने लगे, कि होरि आरामेरी दिहाड़ी भी एन्ने गल्लां केरे बारे मां ज़ोवं गाए ।

43 जैखन लोक आराधनारे बाद बेइर निस्से, त बडे लोक पौलुस ते बरनबासे पत्ती चले, ते तैन मां किछ यहूदी थिये, ते किछ नब्बे यहूदी पंथ धारण कियारे थिये, ते तैनेई तैन सेइ गलवात केरतां तैन समझाव, कि परमेशेरे अनुग्रहे मां बनारे राथ।

44 हारि आरामेरे दिहाइ लगभग सारू नगर परमेशेरू वचन शुन्नेरे लेइ अकोट्टू भोवं।

45 जैखन यहूदी लीडरेई एतरे हछे, लोक लाए त तैन जलन भोइ, ते पौलुसेरे खलाफ गल्लां लगगे केरने।

46 तैखन पौलुस ते बरनबासे दिलेर भोइतां तैन ज़ोवं, “जरूरी एन थियूं, कि असां पेइले तुसन परमेशेरू बच्चन शुनाम, पन तुस त इन्कार केरने लोरेथ, ते अपनो आप हमेशारी ज़िन्दगरे काबल न समझथ, त हेरा हुनी असां गैर कौमां केरे पासे गातम।

47 किजोकि प्रभुए असन ई हुक्म दित्तोरोए,

मीं तू मीं तू गैर कौमां केरे लेइ लौ बनोरस,

ताके तुशे ज़िरिये सारे ज़मीनी पुइ मुक्ति आनी गाए, ते तू ज़मीनरे हर पासे मुक्तरू दार भोस।”

48 इन शुन्तां गैर कौमां केरे लोक बडे खुशी भोए, ते परमेशेरी तारीफ़ केरने लगगे, ते ज़ैना परमेशेरे हमेशारी ज़िन्दगरे लेइ ठहरावरे थिये, तैनेई विश्वास कियो।

49 ते प्रभुएरू बच्चन सारे मुखे मां फैली जेवं।

50 पन यहूदी लीडरेई बडे भक्त ते इज़्जतदार कुआन्शां ते नगरेरे काई खास मैन्हु भइकाए, तैनेई पौलुस ते बरनबासे सितेइतां तैना तैस इलाके मरां भी केढी छडे।

51 तैखन पौलुस ते बरनबासे तैन केरे सामने अपने पावां केरि धूइ टुइकतां\* तैना इकुनियुम नगरे जो चले जे।

52 ते चले इकुनियुम नगरे मां खुशी ते पवित्तर आत्माई सेइ भरपूर भोते राए।

## 14

44444444 4444 44 4444 44 44444

1 इकुनियुम नगरे मां पौलुस ते बरनबास दुइये जने प्रार्थना घरे मां जे, ते एरू भाषण केरने लगगे ते बडे यहूदी लोकेई ते यूनानी लोकेई विश्वास कियो।

2 पन विश्वास न केरनेवाले यहूदेई, गैर यहूदी लोक भइकाए ते तैनेई विश्वासी मैन्हु विश्वासे करां दूर किये, ते तैन केरे खलाफ क्रोध पैदा कियो।

3 ते पौलुस ते बरनबास काई दिहाइ तैड़ी राए, ते प्रभुएरी भरोसे पुइ दिलेरी सेइ गल्लां केरते थिये, ते प्रभु तैन केरे ज़िरिये चमत्कार ते निशान करेइतां अपने अनुग्रहेरे वचने सञ्जो साबत केरतो राव।

4 पन नगरेरे लोकन एप्पू मांमेइ फूट भोइजेइ, किछ लोक यहूदी केरे पासे भोए, ते किछ प्रेरितां केरे पासे भोए।

5 यहूदी ते गैर यहूदी अपने प्रथान्न् सेइ मिलतां तैन बेइज्जत केरने ते तै घोडेई बाने लगगे।

6 त तैन एस गल्लरो पतो लागो, तैना तैट्टां नेश्शी जे, ते लुकाउनिया इलाकेरे नगरन लुस्त्रा ते दिरबे मां ते तैसेरे आसे-पासेरे इलाके मां चले जे।

7 ते तैड़ी तैना खुशखबरी शुनाने लगगे।

44444444 4444 44 44444 4444 44 44444444 44444444

8 लुस्त्रा नगरे मां अक मैन्हु विशोरो थियो, जे पावां केरो कमज़ोर थियो, तै जर्मनेरो टोन्टो थियो, ते तै कधी न थियो चलोरो।

\* 13:51 13:51 धूइ टुइकतां: इन हियेरे लेइ कि परमेशेरे तैन लोकां केरो इन्कार कियोरोए।

9 तै पौलुसेरी गल्लां ध्याने सेइं शुन्ने लगगोरो थियो, पौलुसे तैसेरे पासे ध्याने सेइं तक्कू त जानू, कि एसमां एतरो विश्वासे कि ए बेज्जोइ सकते।

10 ते पौलुसे तैस मैन्हु ज़ोरे सेइं ज़ोवं, “अपने पावन पुड़ खड़ो भो।” ते तै तैखने खड़ो भोव, ते च़लने लगो।

11 ज़ैखन लोकेई पौलुसेरू एन कम हेरू त लुकाउनिया भाषाई मां ज़ोरे सेइं ज़ोने लगे, “कि देबतो असन कां मैनेरो शकली मां ओरोए।”

12 ते तैन लोकेई बरनबासेरू नवं ज्यूस रख्वू, (जैन यूनानी देबतेरू नवं थियूं), ते पौलुसेरू हिमेंस नवं रख्वू, (जै होरि देबतां केरो बिस्तार देने बालन मरां प्रधान थियो) किजोकि तै गल्लां केरने मां जादे माहिर थियो।

13 ते ज्यूस देबतेरू मन्दर नगरेरे सामने थियूं, तैसेरो पुजारी दांत ते फूडू केरे हार एन्तां नगरेरे फाटके पुड़ पुजो, किजोकि तैना लोक चाते थिये कि असां प्रेरितां केरे लेइ बलिदान केरन।

14 ज़ैखन बरनबास ते पौलुस प्रेरितेई एन शुनू, त तैना दुखी भोए, ते तैनेई अपना लिगड़ां छिन्दां ते मैनन् मां जे ते ज़ोरे-ज़ोरे ज़ोने लगे।

15 “लोकव तुस एन कुन केरने लगोरेथ? असां भी तुशे ज़ेरे दुःख सुख झैल्लने वाले मैन्हु आम, ते तुसन खुशखबरी शुनातम, ताके तुस एना फुज़ूल चीज़ां शैरतां ज़ीते परमेशेरे पासे एज्जथ, ज़ैनी धरती त कने अम्बर ते समुन्दरे ते ज़ैन किछ् भी एसमां आए तैनी बनोरूए।

16 तैनी बीतोरे वक्ते मां सैरी कौमन अपनि-अपनि बत्तां च़लने दिन्तू।

17 फिरी भी तैनी अपनो आप बेगवाह न बनाव, पन अपनि भलाई हेरानेरे लेइ तैनी अम्बेरां झड़ि दिती, ते फसलां केरे लेइ मौसम बनाए, ताके तुसन हछ्छ् अन भोए ते तुशे दिल खुशी सेइं भरे।”

18 एना गल्लां ज़ोइतां तैनेई लोक बेड़ि मुशकली सेइं रोके, कि एना इशे लेइ बलिदान न देन।

19 तैखन किछ् यहूदी अन्ताकिया नगरे ते इकुनियुम नगरे मरां आए, ते तैनेई लोक अपने पासे केरतां पौलुसे पुड़ पथराव केरने लगे, ते तै मुओरो बुझतां नगर करां बेइरोवं घसीटतां नीयो।

20 ज़ैखन चेले तैड़ी पुजे त तैनेई पौलुस घरे मां आनो ते तै खड़ो उठो ते वापस नगर मां अव, ते होरसां बरनबासे सेइं साथी दिरबे नगरे जो च़लो जेव।

~~~~~

21 पौलुस ते बरनबासे तैस नगर मां खुशखबरी शुनाई ते बड़े चेले बनाए, ते तैसेरां बाद तैना लुस्तुरा ते इकुनियुम नगरे ते अन्ताकिया नगरे मां वापस आए।

22 तैना हर एककी नगरेरे चेलां केरे मन मज़बूत केरते ते ई शिक्षा देते थिये कि विश्वासे मां बनोरे राथ, ते इन ज़ोते थी, “ते असेई बड़ो दुःख झैल्लतां परमेशेरे राज्जे मां दाखल भोनूए।”

23 ते तैनेई हर कलीसियाई मां तैन केरे बुज़ुर्गां ठहराए, ते बरतां रेखतां प्रार्थना की, ते तैना प्रभुएरे सुपुद किये, ज़ैस पुड़ तैनेई विश्वास कियोरो थियो।

24 फिरी तैना पिसिदिया इलाके मरां निस्तां पंफूलिया इलाके मां पुजे।

25 ते पिरगा नगरे मां वचन शुनेइतां त अत्तलिया नगरे मां आए।

26 तैट्टां ज़िहाज़े मां च़ेइतां वापस अन्ताकिया नगरे मां आए, ते तैड़ी तैनेई तैस सेवारे लेइ ज़ै तैनेई पूरी कियोरी थी, परमेशेरे अनुग्रहेरे सुपुद कियोरी थी।

27 अन्ताकिया नगरे मां पुजतां तैनेई कलीसियारे लोक अकोट्टे किये, कि परमेशेरे असन सेइं साथी भोइतां केरहां-केरहां बड़ां कम्मां कियां! ते गैर कौमां केरे लेइ बत खोल्ली, कि तैना भी यीशु पुड़ विश्वास केरन।

28 ते तैना चेलन सेइं साथी बड़े दिहाइन तगर राए।

1 फिरी किछ लोक यहूदिया इलाके मरां आए, ते विश्वासी दूलाण ए शिक्षा देने लगे, “अगर मूसेरे रसमेरे मुताबिक तुश्शो खतनो नई भोरो त तुसन मुक्ति न मैल्ली बटे।”

2 एस गल्ली पुड़ पौलुस ते बरनबासेरो तैन लोकन सेइं बड़ो मतभेद ते बड़ी बेंस भोइ, ते कलीसियारे लोकेई पौलुस ते बरनबास ते किछ होरे मैन्हु चुने कि तैना यरूशलेम नगरे मां गेइतां तैड़ी एस मसले पुड़ प्रेरितन ते बुजुर्गन सेइं गलवात केरतां हल कढन।

3 तैखन कलीसियारे लोकेई तैना खर्चो देइतां भेजे, ते जैखन तैना फीनीके ते सामरियारे इलाकन मांमेइं त्रलोरे थिये, तैनेई ज़ोवं, कि केन्चरे गैर कौमां केरे लोक खुशखबरी शुन्तां मसीह पुड़ विश्वास कियो, ते कलीसियाई मां शामिल भोए, एन शुन्तां सारे मसीह दूला बड़े खुश किये।

4 जैखन तैना यरूशलेम नगरे मां पुजे, त तैठेरी कलीसियारे लोक ते प्रेरित ते बुजुर्ग तैन सेइं बेड़ि खुशी सेइं मिले, ते तैखन पौलुस ते बरनबासे सब किछ बिस्तार दित्तो, कि परमेशेर तैन केरे ज़िरिये सेइं केत्रा-केत्रा कम्मां कियो।

5 पन फरीसी पंथेरे किछ लोकेई जैनेई विश्वास कियोरो थियो, तैन मरां किछ ज़ोने लगे, “गैर कौमन मरां विश्वास केरनेवालां केरो खतनो कियोरो लोडे, ते एन मूसा नेबेरे कानून पुड़ अमल केरनेरो हुक्म दित्तोरो लोडते।”

6 तैखन प्रेरित ते बुजुर्ग ए गलवात केरनेरे लेइ अकोट्टे भोए।

7 बड़ी बेंस भोनेरे बाद पतरसे तैन खड़े भोइतां ज़ोवं, “हे मेरे दूलाव, तुस जानतथ कि बड़े चिरे पेइले परमेशेरे अवं तुसन लोकन मरां चुनो, ताके गैर कौमन मेरे ज़िरिये खुशखबरी शुनाई गाए ते तैना विश्वास केरन।

8 परमेशेर जै दिलेरो हाल जानते, तैनी तैन भी इश्शी ज़ेरि पवित्तर आत्मा देइतां इन हिराव, कि परमेशेर तैना अपने लोकां केरे ज़ेरे कबूल किये।

9 ते विश्वास केरनेरे ज़िरिये सेइं तैन केरे मन पवित्तर केरतां असन मां ते तैन मां कोई फर्क न रख्खो।

10 त हुनी तुस परमेशेरी अज़मैइश किजो केरतथ? कि गैर कौमन मरां ओरे चलन (यानी विश्वासी लोकन) पुड़ एतरो बोझ किजो रखतथ, जै न असेई छुड़योए ते न इश्शे दादे-पड़दादे छुड़योए।

11 एरू केरनू ठीक नई, किजोकि इश्शू याकीन त इने कि प्रभु यीशु मसीहेरे अनुग्रह सेइं तैन केरे पापां केरि मुक्ति भोली, तेन्चरे इश्शी मुक्ति भोली, न कि मूसेरे कानून सेइं।”

12 तैखन सारे लोक चुपचाप बरनबास ते पौलुसेरी गल्लां शुन्ने लगगे, कि परमेशेरे केन्चरे गैर कौमन मां तैन केरे ज़िरिये केरहे-केरहे निशान ते चमत्कार किये।

13 जैखन तैना चुप भोए त याकूब ज़ोने लगे, “मेरे दूलाव मेरी गल शुना।”

14 शमौन पतरसे रोड़ेचारे ज़ोवं, कि परमेशेर पेइले केन्चरे गैर कौमन पुड़ सिद्धी नज़र की, ताके तैन मरां मैन्हु चुनतां अपने लोक बनाए।

15 नेबी केरू बच्चन भी एसेरू जेरूए ज़ेन्चरे लिखोरूए कि।

16 एसेरां बाद अवं फिरी एइतां दाऊदेरू राज बनेइलो,

जै तैसेरे दुश्मनेई नाश कियोरू थियूं।

17 ताके बाकी सारे लोक ते गैर कौमन समेत जैना मीं कुजोरेन मेरे लोक भोन, ते मीं तोप्पन।

18 ए तैए प्रभु ज़ोते जै दुनियारे शुरुआती करां इन गल्लां केरि खबर देतो अव।

19 “एल्हेरेलेइ मेरो खियाल ईए, गैर कौमन मरां जैना लोक परमेशेरे कां एइतन, तैन अस यहूदी केरो कानून मन्नेरे लेइ मजबूर न केरम।

20 बल्के तैन चिट्ठी लिखतां एन ज़ोम कि मूरतन कां चैदोरी चीज़ां करां दूर रान, ते बदमैशी ते गलचैटी देइतां मारोरे जानवरां केरू मास न खान ते खून न खान।

41 पौलुस सीरिया ते किलिकिया इलाकन मांमेइं निस्सो च़लतो ते कलीसियां केरे विश्वासी लोकन मज़बूत केरतो जेव ।

16

~~~~~

1 तैना फ़िरो दिरबे नगरे ते लुस्तुरा नगरे मां आए, तेड़ी अक चेलो तीमुथियुस नव्वेरो रातो थियो, तैसेरी अम्मा यहूदी थी, ते तै मसीह पुड़ विश्वास केरती थी, पन तैसेरो बाजी यूनान मुलखेरो रानेवालो थियो ।

2 तीमुथियुस लुस्तुरा नगरे मां ते इकुनियुम नगरेरे विश्वासी दलान मां बड़ो रोड़ो मैन्हु थियो ।

3 पौलुसेरी इच्छा ई थी, कि ते तैस साथी ने, तैन यहूदी केरि वजाई ज़ैना तेड़ी रहते तैसेरो खतनो कियो, किजोकि तैना सब ज़ानते थी कि तैसेरो बाजी यूनान मुलखेरो रानेवालो थियो ।

4 पौलुस ते तैसेरे साथी नगर-नगरे मांमेइं च़लते जे, तेदुटेरे विश्वासी लोकन तैना हुक्मां केरे बारे मां ज़ोंते जे, ज़ैना यरूशलेम नगरे मां परेरितेईं ते बुज़ुर्गईं मिलतां ठहरावरे थिये, ताके लोक तैन पुड़ अमल केरन ।

5 बस्सा कलीसियां विश्वासे मां पेक्की भोती जेई, ते तैन केरि कलीसियां केरि तैधात बद्धती जेई ।

~~~~~

6 पौलुस ते तैसेरे साथी फ़रुगिया ते गलातिया इलाकन मांमेइं निस्तां जे, किजोकि पवित्र आत्मा तैना आसिया इलाके मां बच्चन शुनाने करां रोकोरे थिये ।

7 ते तैना मूसिया इलाकेरे नेडे पुज़तां, बितूनिया इलाके मां गानू चाते थिये, पन यीशुएरे आत्मा गाने न दिते ।

8 एल्हेरलेइ तैना मूसिया इलाकेरे नेडेरां तुरोआस नगरे मांजो च़ले जे ।

9 राती पौलुसे अक मैन्हु दर्शने मां लाव, “तै मकिदुनी इलाकेरो थियो, तै खडो भोइतां पौलुसे कां मिनत केरने लोरो थियो, कि पार समुन्दरेरे मकिदुनिया इलाके मां एइते इश्शी महत केर ।”

10 तैसेरे इस दर्शन हेरनेरां पत्ती लूशी अस पार मकिदुनिया इलाके मां गानेरे लेइ तियार भोइ जे, किजोकि असेईं बुझ् कि परमेशेरी असां तेड़ी खुशखबरी शुनानेरे लेइ कुजवरेम ।

~~~~~

11 असां तुरोआस नगरेरां जिहाज़ मां जे, ते पैनरू सफर केरतां सुमात्राके टैपू पुड़ आए, ते तैदटां होरसां नियापुलिस नगरे मां आए ।

12 तैदटां असां फ़िलिप्पी नगरे मां पुजे, ज़ैन मकिदुनिया इलाके मां खास नगरे, ते रोमी केरि बेसती मांए, ते अस तैस नगरे मां किछ् दिहाड़े राए ।

13 आरामेरे दिहाड़े असां नगरेरे फाटके मरां निस्तां दरियाए पुड़ पुजे, किजोकि असन उमीद थी कि तेड़ी यहूदी केरि प्रार्थना केरनेरी कोई ठार भोनीए, असां तेड़ी गेइतां विश्शी जे, तेड़ी किछ् कुआन्शां थी, असां तैन सेइं गल्लां केरने लगे ।

14 इश्शी गल्लां शुन्ने बैली कुआन्शन मां अक परमेशेरी भक्त लुदिया नव्वेरी थी, तै धुआतीरा नगरेरी राने वाली थी, ते बैंगनी लिगाड़ां बेचने वाली थी, ते प्रभुए तैसेरो मन खोल्लो, कि तै पौलुसेरे गल्लन पुड़ ध्यान केरे ।

15 ज़ैखन तैसां ते तैसारे पूरे टब्बेरे वपतिस्मो नीयो त तै बिनती केरतां ज़ोने लगी, “अगर तुस लोक मीं प्रभुएरी ईमानदार दासी समझतथ, त मेरे घरे च़ला ते विश्शी राथ,” ते तैसारी मिनत शुन्तां असां खुशी भोए ।

~~~~~

16 एक्की फरे असां प्रार्थना केरनेरी ठारी जो च़लोरे थिये त असन अक दासी मैल्ली ज़ै भूतां केरे महती सेइं एजनेवाले वक्तेरे बारे मां ज़ोती थी । ते अपने मालिकां केरे लेइ बड़े पेंडसे कमाती थी ।

17 तै पौलुसे पत्ती ते असन पत्ती ज़ली ते ज़ोने लगी, “ए मैन्हु परमप्रधान परमेशेरो दासे, ते एना असन पापां केरि मुक्तरी बत हिरातन।”

18 तै काई दिहाड़े एन्ने केरती राई, पन पौलुसे जिच भोव, ते मुडतां तैस भूते जो ज़ोवं, “अवं तीं यीशु मसीहेरे नंब्वे सेइं हुकम देताई निस्सी गा, ते तै तैखने तैस मरां निस्सी जेई।”

19 ज़ैखन तैसेरे मालिकेई हेरू कि इश्री कमेइयरी उमीद ट्लुटी जेई, त तैनेई पौलुस ते सीलास ट्लेइतां चौके मां प्रधानां केरे हवाले किये।

20 तैनेई पौलुस ते सीलास हाकिमन कां पैश किये, ते ज़ोने लगे, “एना यहूदीन ते इशशे नगर मां वड़ी खलबली मचाने लगोरें।

21 ते एरे रुवाज़ेरी शिक्षा देतन, ज़ैन केरू केरनू ते मन्नू असन रोमे मां रानेवालान केरे इशशे लेइ बिलकुल भी ठीक नई।”

22 एन शुन्तां सारे लोक पौलुस ते सीलासेरे खलाफ अकोट्टे भोए, ते हाकिमेई तैन केरां लिगड़ां खोलतां छिन्दां ते सोटेईं बानेरो हुकम दित्तो।

23 सिपैहीयेई तैन खूब बेंतेई बैही ते कैदखाने मां छुडे, ते कैदखानेरे प्रधाने हुकम दित्तो, कि रोड़ेचारे परहो दित्तो गाए।

24 ते हुकम शुन्तां तैना आंधरी कोठी मां छुडे, ते तैन केरे पावन लेकड़ी बेड़ि लेइ।

~~~~~

25 एध्नी राती पौलुस ते सीलास प्रार्थना केरने मां मघन थिये, ते परमेशेरां भजना लोरे थी ज़ोने, ते होरे कैदी भी शुन्ने लोरे थिये।

26 अचानक अक भुंजल अव, ते कैदखानेरे बुनीयाद हिल्ली ते सारां दारां खुल्ली जेआं, ते सैरी कैदी केरि बेड़ि भी खुल्ली जेई।

27 कैदखानेरो प्रधान वींझो ते खडो उठो, ते तकने लगे, ते हेरते कि कैदखानेरां दारां खुल्ली जोरेन, त तैनी समझू कि सारे कैदी नशशोरें, ते तैनी अपनि तलवार खिचची कि अवं अपनो आप मैरी छेड़डी।

28 पन पौलुसे ज़ोरे सेइं ज़ोवं, “अपनो आप न मार किजोकि असां सब इड़ी आम।”

29 तैखन तै दीयो बैलतां अन्तर जेव, ते पौलुसे ते सीलासेरे पावन पुड़ पेव,

30 फिरी तैनी तैना बेइर आने ते ज़ोने लगे, “जनाव अवं कुन केरि, कि मेरी मुक्ति भोए?”

31 तैनेई ज़ोवं, “प्रभु यीशु मसीह पुड़ विश्वास केर, त तीं ते तेरे टब्बरे पापन करां मुक्ति मैल्लनीए।”

32 ते तैनेई तैस त तैसेरे टब्बरे प्रभुएरू वचन शुनाव।

33 तैखने तैने राती पौलुस ते सीलास नेइतां तैन केरे ज़खम धोए, ते तैनी तैसेरे सारे टब्बरे वपतिस्मो नीयो।

34 फिरी तैनी तैना अपने घरे ने, ते तैन खाने जो रोट्टी दित्ती, ते सारे टब्बरे परमेशेरे पुड़ विश्वास केरतां बड़े खुश थिये।

35 होरसां झेझ हाकिमेई सिपाही भेजतां बिस्तार भेजो, कि तैन मैननू हथरां छैड़ी देथ।

36 दरोगा पौलुसे जो ज़ोवं, “हाकिमे हुकम दित्तोरोए कि पौलुस ते सीलास कैदखाने मरां हथरां छुडा, एल्हेरेलेइ तुस खुशी सेइं चले गाथ।”

37 पन पौलुसे तैन सेइं ज़ोवं, “तैनेई अस ज़ैना रोम मुलखेरे राने बालेम, बगैर कसूरे सेब्भी केरे सामने मारे कुटे ते कैदखाने मां छुडे, ते हुनी चुपचारे हथरां छुडने चाते? पन एन न भोइसखे, तै एण्णू एज्जे ते असन बेइर कडे।”

38 सिपैहीयेई गोइतां हाकिमन बिस्तार दित्तो, कि पौलुस ते सीलास रोम मुलखेरे राने बालेन, ते तैना डेरि जे।

39 तैनेई तैड़ी एडतां तैन करां माफ़ी मग्गी, ते फिरी तैना कैदखाने मरां बेइर आने ते मिनत की, कि नगर मरां चले गाथ ।

40 बस्सा पौलुस ते सीलास कैदखाने मरां बेइर निस्से ते लुदियारे घरे जे, ते तैड़ी विश्वासी दलान सेइं मिले ते तैन शान्ति देइतां चले जे ।

## 17

?????????????? ???? ???? ???? ? ???? ???? ?

1 पौलुस ते सीलास तैसेरां बाद अम्फिपुलिस ते अपुल्लोनिया नगरन मामेइं गेइतां थिस्सलुनीके नगरे मां आए, तैड़ी यहूदी केरू अक प्रार्थना घर थियूं ।

2 पौलुस अपने रीतरे मुताबिक प्रार्थना घरे मां दलाई आरामेरे दिहाइन तगर पवित्रशास्त्रेरी किताबी मरां तैन सेइं बेंस करतो राव ।

3 पौलुस तैन केरो मतलब खोल्ली-खोल्ली समझातो थियो, “कि यीशु मसीहेरो दुःख झैल्लनो ते मुडदन मरां ज़ीतू भोनू ज़रूरी थियूं, कि ज़ैस यीशुएरे बारे मां अवं प्रचार करतम, तैए मसीह आए ।”

4 तैन मरां किछ यहूदी ते गैर कौमां केरे लोक ज़ैनेई विश्वास कियोरो थियो, ते होरि भी बेइड भक्त कुआन्शां ज़ैनेई विश्वास कियोरो थियो पौलुसे ते सीलासे सेइं मिली जेई ।

5 पन यहूदेई जलनी सेइं काई नगरन मां बुरे लोक अकोटटे केरतां हंगामो केरनो शुरू कियो । तैनेई यासोनेरे घरे पुड़ हमलो कियो ताके पौलुसे ते सीलासे लोकां केरे सामने आनन ।

6 पन ज़ैखन तैना न मैल्ले त यासोन त काई होरे विश्वासी दला घसीटतां नगरेरे हाकिमन कां आने, ते ज़ोरे-ज़ोरे सेइं ज़ोने लगे, “एन मैनेई हर टैरी परेशानी फैलावरी, ते अज इड़ी भी पुजोरेन ।

7 ते एना यासोने अपने घरे मां रखोरेन, ते एना लोक महाराज्जेरे हुक्मेरी खलाफत करतन, ते ज़ोतन कि राज़ो त यीशु आए ।”

8 ए गल शुन्तां नगरेरे हाकिम ते सारे लोक परेशान भोए ।

9 ते तैनेई यासोन ते बाकी लोक ज़मानती पुड़ हथरां छुडे ।

???????? ???? ???? ???? ? ???? ?

10 इलोझा विश्वासी दलाएई पौलुस ते सीलास तैट्टां बिरीया नगरे जो भेजे, ज़ैखन तैना तैड़ी पुजे त तैना यहूदी केरे प्रार्थना घरे मां जे ।

11 बिरीया नगरेरे लोक थिस्सलुनीके नगरेरे यहूदन करां भले थिये, तांए तैनेई खुशखबरी बेइड खुशी सेइं कबूल की, तैना रोज एना गल्लां केरे बारे मां गलबात करते थिये, कि पौलुसेरी गल्लां सच्च्ची आन कि नई ।

12 एल्हेरेलेइ काई यहूदेई ते काई होरि यूनानी इज्जतदार कुआन्शेई भी यीशु पुड़ विश्वास कियो ।

13 ज़ैखन थिस्सलुनीके नगरेरे यहूदन पतो लगो कि पौलुस बिरीया नगरे मां परमेशेरू वचन शुनाते, ते तैना लोकन भटकाने ते हलचल मचाने लग्गे ।

14 तैखन विश्वासी दलाएई पौलुस समुन्दरेरे वन्ने भेजो, पन सीलास त तीमुथियुस तैड़ी राए ।

15 ते पौलुसेरी मदत केरनेवाले एथेंस नगरे तगर जे, ते सीलास ते तीमुथियुसेरे लेइ बिस्तार नेइतां चले जे, कि मीं कां जल्दी एज्जे ।

???????? ???? ???? ???? ?

16 ज़ैखन पौलुस एथेंस नगरे मां तैन बलगने लग्गोरो थियो, त एन तकते कि सारू नगर मूरती सेइं भेरतांए त तैसेरो दिल बडो उदास भोव ।

17 एल्हेरेलेइ तै प्रार्थना घरे मां यहूदन ते तैन सेइं ज़ैना परमेशेरू डर मन्नेवाले (भक्त) गैर कौमन मरां यहूदन मां ओरे थिये चौके मां गेइतां मिलतो थियो, ते तैन सेइं रोज बेंस करतो थियो ।

18 किछ इपिकूरी ते किछ स्तोईकी उस्ताद तैस सेइ बेंस केरने लगे, ते तैन मरां किछ ज़ोने लगे, “बकवादी कुन ज़ोनु चाते?” ते किछ ज़ोने लगे, “ए त होरि देबतां केरो पतो देनेबालो भोइ सकते, किजोकि पौलुस यीशुएरो ते कने ज़ीते भोनेरी खुशखबरी शुनातो थियो।”

19 तैखन तैनेई तै एप्पू सेइं साथी अरियुपगुस नव्वेरे मन्दरे मां नेव, ते तैस पुचछू, “कुन अस ज़ैनी सकतम कि ज़ैस नव्वे पंथेरी तू शिक्षा देतस, तै कुने?

20 असां तेरे ऐशेरां बेड़ि आजीव गल्लां शुन्ने लोरेंम, ते असां एन ज़ाननू चातम कि एन केरो कुन मतलवे?”

21 (द्रासले मां एथेसेरे लोक कुन देशी कुन परदेशी अपनि फुरस्तरो सारो मौको होरि कम्मां केरे बजाहे सिफं नव्वीं-नव्वीं गल्लां ज़ोने ते शुन्ने मां गुज़ारते थिये।)

~~~~~

22 तैखन पौलुस अरियुपगुसे नव्वेरे मन्दरे मझाटि खडो भोइतां ज़ोने लगे, “हे एथेसेरे लोकव, अवं हेरताई कि तुस हर गल्लीं मां देबतन बडो उच्चो द्रजो देतथ।

23 ज़ैखन अवं तुशे नगर मां हंठतो फिरतो थियो, त मेरी नज़र तुशे पूज़नेरी चीज़न पुड़ ते बलिदानेरी ठारी पुड़ पेई, ज़ैस पुड़ लिखोरू थियूं, अनज़ान परमेशेरे लेइ, बस्सा तुस ज़ैस ज़ानथ नन्ना ते तैसेरी पूजा केरतथ, अवं तुसन तैसेरे बारे मां ज़ोताई।

24 ज़ैनी परमेशेरे दुनिया ते सैरी चीज़ां बनेवरिन, तै धेरतरो ते अम्बेरेरो मालिके, तै हथ्यां केरे बनेवरे मन्दरन मां न राए।

25 तैस मैनेरे महदतरी ज़रूरत नई, किजोकि तै केन्वी चीज़री ज़रूरत नई, तै सैरन ज़िन्दगी ते सांस ते सब किछ देते।

26 तेनी एक्की मैन्हू सेइं हर कौमारे लोक पैदा किये, ताके सारे ज़मीनी पुड़ आबाद भोन, तैनी तैन केरि ज़िन्दगरे दिहाड़े बनाए ते रानेरे लेइ ठार बनाई।

27 परमेशेरे एन कियूं ताके लोक तैस तोपपन ते शैइद तोपते-तोपते तैन मैल्ली गाए, हालांकी ते असन केन्वी करां दूर नई।

28 किजोकि तै असन सेइं साथी आए ते ज़ीते रातम ते च़लतम फिरतम, ज़ेन्वरे कि तुशे लिखने वालेई भी ज़ोरूए, “असां त तैसेरे बच्चेम।”

29 ते परमेशेरे बच्चे भोइतां सोचेरू लोडे, कि ईश्वरत्व सोन्ने, चैंदरी, या घोड़ेरी मूरतरीए ते ज़ै केन्वी मैनेरे हाथां केरि कारीगिरीए ते खियाले सेइं आए।

30 एल्हेरेलेइ परमेशेरे लोकां अज़ानतारे वक्ते पुड़ ध्यान न दित्तू, ते हुनी तै मैनन् सेब्भी टैरन हुक्म देते कि मन फिरान।

31 किजोकि तेनी अक दिहाड़ी ठुवालेवरीए ज़ैखन तै सच्चे सेइं दुनियारो इन्साफ एक्की एरे मैनेरे ज़िरिये सेइं केरेलो, ज़ै तेनी रखोरूए, ते ते तेनी मुड़दन मरां ज़ीतो केरतां ए गल सैरी मैनन् साबत कियोरीए।”

32 ज़ैखन तैनेई मुड़दां केरि आदालतरे बारे मां शुनू त तैन मरां किछ एस गल्लरी मज़ाक बनाने लगे, ते किछेई ज़ोवं, “अस एस बारे मां फिरी कोस्कोई शुन्मले।”

33 एन हेरतां पौलुस तैट्टां निस्तां च़लो जेव।

34 एन किछ लोक तैस सेइं मिली जे, ते तैनेई प्रभु पुड़ विश्वास कियो, तैन मरां अक दियुनुसियुस ज़ै अरियुपगुसेरो प्रधान थियो, ते अक कुआन्श थी, तैसारू नवं दमरिस थियूं, ते तैन केरे अलावा होरे भी बडे मैन्हू थिये।

18

~~~~~

1 तैसेरां बाद पौलुस एथेस नगरे मरां निस्तां कुरिन्थुस नगरे मां अव।

2 तैड़ी तैस अक यहूदी मैल्लो, तैसेरू नवं अक्विला थियूं, ते तै पुन्तुस इलाकेरो रानेबालो थियो, ते तैसेरी कुआन्शरू नवं पिरस्किल्ला थियूं, ते दुइये साथी इतालिया इलाकेरां ओरां थियां, किजोकि क्लौदियुस हाकिमे हुक्म दित्तोरो थियो, कि सारे यहूदी रोमे मरां च्ले गान ते पौलुस तैन कां जेव ।

3 किजोकि पौलुसेरो ते अक्विलारो तेम्बु बनानेरो बुपार थियो, तांए पौलुस तैस सेई साथी राव, तैना कम करने लगे ।

4 ते पौलुस हर आरामेरे दिहाडे तैन केरे प्रार्थना घरे मां गातो थियो, ते यहूदी लोकन ते यूनानी लोकन समझाने लगे कि, यीशु पुड़ विश्वास केरा ।

5 जैखन सीलास ते तीमुथियुस मकिदुनिया इलाके मां आए, त पौलुस वचन शुनाने मां मघन थियो, ते लगातार यहूदन सेई एन ज़ोतो थियो कि यीशु ही मसीह आए ।

6 पन जैखन यहूदी खलाफत त कने तुहीन करने लगे, त पौलुसे अपना लिगड़ां टुडकां\* ते ज़ोने लगे, “तुशुओ खून तुशुओ दोगगे पुड़ भोए! अवं बेइलज़ाम आई, अज़्जेरे बाद अवं गैर कौमन कां गेइलो ।”

7 तैखन प्रार्थना घरे मरां निस्तां तीतुस यूस्तुस नंब्वेरे एक्की परमेशेरे भक्त मैनेरे घरे जेव, जै गैर कौमी मरां थियो, ज़ेसेरू घर प्रार्थना घरे सेई साथी थियूं ।

8 एस प्रार्थना घरेरो प्रधान किरस्पुसे ते तैसेरे सारे टब्बेरे प्रभु पुड़ विश्वास कियो, ते बडे कुरिन्थिसेरे लोकेई शुन्तां विश्वास कियो ते वपतिस्मो नीयो ।

9 एक्की राती प्रभुए पौलुसे सेई दर्शने मां गल की, ते ज़ोवं, “डर नन्ना ते तू ज़ो ते चुप न रा,

10 किजोकि अवं तीं सेई साथी आई, ते कोई तीं पुड़ हमलो केरतां नुकसान न पुज़ेई सकेलो, किजोकि इस नगर मां बडे लोकन जैना मीं पुड़ भरोसो रख्वेले ।”

11 पौलुस तैड़ी डैढ साल राव, ते तैन परमेशेरी खुशखबरी शिखालतो राव ।

12 जैखन गल्लियो, अखाया इलाकेरो हाकिम थियो, त यहूदेई मिलतां पौलुसे पुड़ हमलो कमाव, ते पौलुस टलेइतां आदालतरे तखते कां नीयो, ते ज़ोने लगे ।

13 “एन लोकन समझाते, कि परमेशेरी आराधना एन्चरे केरा, जै मूसेरे कानूनेरे बिलकुल बरखलाफे ।”

14 पौलुस जैखन किछ ज़ोने बालो थियो, त गल्लियोए यहूदन सेई ज़ोवं, “हे यहूदी लोकव, अगर केन्ची जुमेंरी या कोई बड़ी बुरी गल भोथी त अवं तुशुओ शुनेथो ।

15 पन तुशुओ इलज़ाम त सिर्फ खाली गल्लां केरो ते नंब्वां केरो ते तुशुओ कानूनेरे बारे मां आए, ते अवं न ज़ैनी, किजोकि अवं एन गल्लां केरो हाकिम बन्नो न चैई ।”

16 ते गल्लियो हुक्म दित्तो कि एन तखते करां बेइरोवं कडे ।

17 तैखन तैनेई सेम्भेई प्रार्थना घरेरो प्रधान सोस्थिनेस इन्साफेरे तखतेरे सामने कुटो, पन गल्लियोए एन गल्लां केरि किछ भी परवाह न कमाई ।

\*\*\*\*\*

18 पौलुस काई दिहाडे कुरिन्थुस नगरे मां राव, ते फिरी तै विश्वासी दूलान करां च्लो जेव ते किखिरया मां अपनि मिनत पूरी केनेरे लेइ अपने दोगेरी टिड बनाई । ते बादे मां समुन्दरी ज़िहाजे मां सीरिया इलाके जो च्लो जेव, ते पिरस्किल्ला ते अक्विला भी तैस सेई साथी थियां ।

19 जैखन तैना इफिसुस नगरे मां पुजे त पौलुसे पिरस्किल्ला ते अक्विला तैड़ी छड़ां, ते पौलुस एक्की प्रार्थना घरे मां जेव ते यहूदन सेई बेंस करने लगे ।

20 जैखन तैन लोकेई तैस कां मिनत की, “कि तू हेजू किछ दिहाडे असन कां विश ।” त पौलुसे तैन सेई मन्नु,

\* 18:6 18:6 लिगड़ां टुडकां: परमेशर तैन लोकन सेई खुश न भोव एन्हरो ई निशाने ।

21 पन जैखन पौलुस तैट्टां ज़लो त तैनी तैन सेइं वादो कियो, “अगर परमेशेरी मर्जी भोइ त अवं फिरी तुसन कां एज्जेलो।” ते फिरी पौलुस ज़िहाज्जे मां च़ेदतां इफिसुसे जो ज़लो जेव।

22 ते कैसरिया नगरे मां ज़िहाज्जे मरां ओस्सो त तैनी यरूशलेम नगरे मां गोइतां तैन केरि कलीसियारे लोकन सेइं मिलने जेव, ते फिरी ते अन्ताकिया नगरे मां अव।

????? ?????? ?????? ??? ?????????? ??? ?????

23 अन्ताकिया नगरे मां किछ् च़िर वितनेरे बाद ते तैट्टां ज़लो जेव, ते गलातिया ते फ़रुगिया इलाकां केरे सब चेलन मजबूत केरतो जेव।

??????? ??? ??? ?????????

24 अपुल्लोस नंवेरे अक यहूदी थियो, तैसेरू ज़र्म सिकन्दरिया नगरे मां भोरू थियूं, ते बडो ज्ञानी मैन्हु थियो, ते पवित्रशास्त्रेरे बारे मां बडो ज्ञानकार थियो, ते इफिसुस मां अव।

25 तैनी प्रभुएरे बत्तरी शिक्षा शिक्षोरी थी, ते लगातार यीशुएरे बारे मां ठीक-ठीक शुनातो ते शिक्षालतो थियो, पन ते सिर्फ़ यूहन्नारे बपतिस्मे तगर ज्ञानतो थियो।

26 ते प्रार्थना घरे मां बेधडक च़ारे ज़ोने लगो, पन पिरस्कल्ला ते अक्विला तैसेरी गल्लां शुन्तां, तैनेई ते अपने घरे नीयो, ते परमेशेरी बत्तारे बारे तैस होरू भी रोडे च़ारे ज़ोवं।

27 जैखन तैनी थापू कि पार ओस्तां अखाया इलाके जो गाए ते विश्वासी दलाएई तैस हिम्मत दित्ती, ते तैट्टेरे चेलन जो चिट्ठी लिखी, कि एस सेइं रोडेच़ारे मिलाथ, ते तैनी तैड़ी पुजतां तैन केरि बड़ी मद्दत की, ज़ैनेई अनुगरहेरे वजाई सेइं विश्वास कियोरो थियो।

28 किजोकि ते बडे ज़ोरे शोरे सेइं यहूदन सेइं बेंस केरतां खुल्ले आम पवित्रशास्त्रे सेइं साबत केरतो थियो, कि यीशु ही मसीहे।

## 19

??????? ??? ??? ?????

1 जैखन अपुल्लोस कुरिन्थुस नगरे मां थियो, त पौलुस बेइएं सारे इलाकन मेइं इफिसुस नगरे मां अव, तैसेरी तैड़ी होरे भी काई चेलन सेइं मुलाकत भोइ।

2 तैनी तैन पुच्छ्, “कुन विश्वास केरते वार तुसन पुइ पवित्र आत्मा उतरोरी थी?” तैनेई जुवाब दित्तो, “असेई त पवित्र आत्मारे बारे मां शुनेरू भी नई।”

3 तैखन पौलुसे ज़ोवं, “फिरी तुसेईं कोस किसमेरो बपतिस्मो नीयो?” तैनेई जुवाब दित्तो, “यूहन्नारो।”

4 पौलुसे ज़ोवं, “यूहन्ना त तैन लोकन बपतिस्मो दित्तो ज़ैनेई पापन करां मनफिराथ, ते यूहन्ना इस्राएली लोकन ज़ोवं, ज़ै मेरे बाद एजनेबालोए, तैस पुइ विश्वास केरा, ज़ै मसीह आए।”

5 एन शुन्तां तैनेई प्रभु यीशु मसीहेरे नंवे सेइं बपतिस्मो नीयो।

6 ते जैखन पौलुसे तैन पुइ हथ रखे त पवित्र आत्मा तैन पुइ उतरी, त तैना अलग-अलग भाषा केरने लगे, ते भविष्यवाणी केरने लगे।

7 एना सब लगभग 12 मैन्हु थिये।

8 फिरी पौलुसे प्रार्थना घरे मां गोइतां ट्लेइ महीन्न तगर बडे निडर भोइतां परमेशेरे राज़ेरे बारे मां लोकन सेइं बेंस केरने समझाने लाव।

9 पन तैन मरां किछ् सकत दिलेरे भोइ जे, ते तैनेई विश्वास केरनेरे बजाहे इन्कार कमाव, ते एस पंथेरे बारे मां बुरू ज़ोने लगे, एल्हेरेलेइ पौलुस तैन करां कनारे भोइ जेव, ते चेले भी कनारे किये ते तुरन्नुसेरे सुकुले मां बेंस केरतो ते तैन शिक्षालतो राव।

10 दूई सालन तगर एरू भोतू राव, एड़ी तगर कि आसिया इलाकेरे रानेबाले कुन यहूदी ते कुन यूनानी सेभेई प्रभुएरू बच्चन शुनू।

11 ते परमेशर पौलुसेरे ज़िरिये सेइं बडा-बडां कम्मां ते चमत्कार हिरातो थियो।



12 एड़ी तगर कि पौलुस ज़ैस रूमाले सेइं या फटके सेइं हथ लातो थियो, त तैना बिमारन पुड़ छुड़ते थिये, त तैना बिमार बेज्झोते थिये, ते अगर तैन पुड़ भूतां केरो सैयो भोतो थियो, त तैना लोक ठीक भोते थिये।

13 पन किछु यहूदी मइद ज़ैना फुक-फुक करते थीं, ते एन केरने लगे कि, ज़ैन पुड़ भूतां केरो सैयो भी भोए तैन पुड़ यीशुएरे नंब्वे इन ज़ोइतां फुक फुक देने लाए, “ज़ैस यीशुएरो प्रचार पौलुस केरते, अवं तेसेरी कसम देताई।”

14 यहूदी प्रधान याजक ज़ेसेरू नवं स्क्कवा थियूं, तैसेरां सत मट्टां थियां, तैना एन्ने कम्मां केरतां थियां।

15 ते भूते जुवाब दित्तो ते ज़ोवं, “अवं यीशु मसीह भी ज़ानताई ते पौलुसे भी ज़ानताई, पन तुस कौन आथ?”

16 तैखन ते मैन्हु ज़ैस पुड़ भूतेरो सैयो थियो, तैन्न यीशुएरे नंब्वे सेइं फुक-फुक देने बालन जो पेव, ते तैना अपने कब्जे मां केरतां एतरे कुट्टे कि तैना ज़ख्मी भोइतां नगनगे तैट्टां नश्शे।

17 ज़ैखन इफिसुस नगरेरे रानेबाले यहूदन ते यूनानी लोकन एस गल्लरो पतो लगो, त तैना डेरि जे, ते परभु यीशु मसीहेरी बड़याई की।

18 ते ज़ैनेई विश्वास कियोरो थियो, तैनेई एइतां अपने-अपने बुरे कम्मां केरो इकारार सेब्मी केरे सामने कियो।

19 ते केही लोकेई ज़ैना जैदू केरते थिये, तैना किताबां सैरेई एन्तां सेब्मी केरे सामने फुकी, ते ज़ैखन तैन किताबां केरि कीमतारो हिसाब लाव त कोई 50000 चैदरे सिकन करां जादे थी।

20 एन्चरे परभुएरो वचन बड़े तकड़े चारे फैलतो जेव ते भारी राव।

21 एन गल्लां केरे बाद पौलुसे फैसलो कियो, कि अवं मकिदुनिया ते अखाया इलाकां केरे विश्वासी लोकन सेइं मिलतां यरूशलेम नगरे जो गेइ, ते तै ज़ोवं, “यरूशलेम नगर मां गेइतां रोम नगर भी मां गानू भी ज़रूरीए।”

22 एल्हेरेलेइ अपने सैथन मरां तीमुथियुस ते इरास्तुस दूई मैन्हु मकिदुनिया इलाके जो एप्पू करां पेडले भेजे, ते एप्पू भी किछु चिरे आसिया इलाके मां राव।

??????

23 तैस वक्ते तैस पंथेरे बारे मां हंगामो भोव।

24 किजोकि अक चैदरो करीगिर थियो, तैसेरू नवं दिमेटिरियुस थियूं, ते अरतिमिस \*देवारे मन्देरी मूरती बनेइतां, कारीगिरन बड़ू कम दुवेरू थियूं, ज़ैस सेइं तैन केरो बड़ो बुपार चलोरो थियो।

25 तैनी एन कम ज़ान्ने बाले सारे कारीगिर अकोट्टे कमाए ते ज़ोने लगो, “हे मेरे दूलाव असां इन कम केरतां बड़े पंडसे कमातम।

26 पन तुस हेरतथ ते शुन्तन कि एना दूई मैन्हु पौलुसेरे ज़ेरे केन्चरे इफिसुस नगरे ते लगभग सारे आसिया इलाकेरे नगरन मां लोकन टपलाने लोरेन ते ज़ोतन कि ज़ै हथेरां केरि कारीगिरीए, तै ईश्वर नई।

27 डर एस गल्लरो नई, सिर्फ कि इश्शे पैशेरी बदनामी भोली, बल्के पुरानी देवी अरतिमिस, ज़ै आए तैसारू मन्दर भी घटया समझू गालू, ज़ेसेरी पूजा सारे आसिया इलाके मां ते सारे दुनियाई मां केरतन, तैसेरी इज्जत भी खतम भोइगानिये।”

28 ज़ैखन तैन लोकेई शुनू त तैना सरकी सेइं भेरोई जे, ते ज़ोरे-ज़ोरे नहरे देने लगे, “इफिसी केरि देवी अरतिमिस, महान आए!”

29 हेरते-हेरते सारे नगर मां हलचल मेचि जेई, लोकेई गयुस ते अरिस्तर्खुस, मकिदुनी इलाके ज़ैना पौलुसे सेइं साथी ओरे थिये, तैना टलेइतां घसीटते तमाशां हेरनेरी ठैरी जो दौवइते ने।

30 पौलुस भी सभाई मां गानू चातो थियो पन चलेई तै रोको।

\* 19:24 19:24 अरतिमिस: यूनानेरी देवी

31 ते आसिया इलाकेरे हाकिमन मरां भी तैसेरे काई दोस्तेई तैस जो बिस्तार भेजतां ते मिनत केरतां ज़ोवं, कि तमाशो हेरने न गेइयां किजोकि तैड़ी बडो खतरोए ।

32 तैड़ी पैन्चयती मां खलबली मच्चौरी थी, किजोकि किछ लोक नहरे देते थियो, ते बडे लोकन पतो न थियो कि तैना तैड़ी किजो अकोट्टे भोरेन ।

33 तेखन तैनेई सिकन्दर, जै यहूदी लोकेई खडो कियोरो थियो, भीड़ी मरां किछ लोकेई तै अग्रोवं कियो, ते सिकन्दर हथ्थे सेइं इशारो केरतां लोकां केरे सामने जुवाब देनो चातो थियो ।

34 पन ज़ेरो लोकन पतो लगे कि ए यहूदी आए, त सब ज़ोरे-जोरे लगभग दूई घंटन तगर चिन्डां मारने लगगे, “इफिसुस नगरेरे देवी अरतिमिस, महान आए ।”

35 तैखन एक्की मंत्री नगरेरे लोकन चुप करेइतां ज़ोने लगे, “कि इफिसुस नगरेरे रानेवालो कौन न ज़ाने कि इफिसुस नगर लोक अरतिमिस देवारू मन्दरे, ते एसेरे मूरतरो बडो रखावेलेन, ज़ैन अम्बेरां बिछडोरो थी ।

36 ज़ैखन एना गल्लां केरे खलाफ केन्चे किछ न ज़ोवं त ठीक थियूं कि तुस चुप राथ ते बगैर सोच सेमझतां किछ न केरेथ ।

37 तुसेई ज़ैना मैन्हु इडी आनोरेन तैनेई न मन्दरे लुटेरूए न इश्री देवारे खलाफ तुहीन कियोरीए ।

38 अगर दिमेतिरयुस ते एसेरे कारीगिन केन्ची पुड़ दाओ केरनोए त आदालतरू दार खुल्लूए, ते हाकिम भी आन, ज़ैड़ी तुस एक्की होरि पुड़ दाओ केरि सकतथ ।

39 पन अगर तुस होरि कोन्ची चीज़ेरे बारे मां पुछ्नू चातथ त तैसेरो फैसलो भी पंचैइती मां कियो गालो ।”

40 मां इस गल्लरो डरे कि अगर हाकिम इस हंगामेरे बारे मां शुनेलो त ज़ोलो कि अस रोमी सराकारारी खलाफवर्ज़ी केनेरी कोशिश केरने लोरेम, ते अस एत्रे लोकां केरे अकोट्टे भोनेरो कुन जुवाब देमेले ।

41 एन ज़ोनेरां बाद तैनी पैन्चैयत खतम कमाई ।

## 20

*XXXXXXXXXXXXXXXXXXXXXXXXXXXXXXXXXXXXXXXXXXXXXXXXXXXXXXXXXXXX*

1 ज़ैखन हंगामो मुक्को त पौलुसे चले कुजाए ते तैन केरो होसलो बधव, ते तैन बिश्शा ज़ोइतां मकिदुनिया इलाके जो ज़लो जेव ।

2 तैस सारे मुलखे मांमेइं चलन होसलो देइतां यूनान इलाके मां (जैस जो अखाया इलाको भी ज़ोतन) अव ।

3 तैड़ी तै टलाई महीने राव, ते ज़ैखन तै समुन्दरी ज़िहाजे मां सीरिया इलाकेरे पासे गानेवालो थियो, त यहूदी केरे लीडरेई तैस बत्तां मारनेरी साज़िश बनाई, तैस पतो लगे त एल्हेरेलेइ तैनी एन रोड़ समझू कि मकिदुनिया इलाके मांमेइं जो सीरिया इलाके जो गाए ।

4 बिरीया नगरेरे रानेवाले पुरूसरू मट्टू सोपतरुस, ते थिस्सलुनीकि मांमेइं अरिस्तर्खुस ते सिकुन्दुस ते दिरवे नगरेरो गयुस, ते तीमुथियुस ते आसियारो तुखिकुस ते त्रुफिमुस आसिया इलाके तगर असन सेइं साथी ज़ले जे (लूका भी तैन सेइं साथी थियो) ।

5 पन तैना अग्रोवं गेइतां त्रोआस नगरे मां असन बलगते राए ।

6 ते अस अखमीरी रोट्टी केरे तिहारे बाद फिलिप्पी नगरे मरां सफर केरतां पंज दिहैड़ी मां त्रोआस नगरे मां तैन कां पुजे, ते रात दिहैड़ी तैड़ी राए ।

*XXXXXXXXXXXXXXXXXXXXXXXXXXXXXXXXXXXXXXXXXXXXXXXXXXXXXXXXXXXX*

7 हफतेरे पेइले दिहाइ असां प्रभु भोजेरे लेइ अकोट्टे भोए, ते पौलुसे होरसां तैट्टां अग्रोवं गानू थियूं, त एल्हेरेलेइ तै तैन सेइं गल्लां केरने लाव ते एथ्थी राती तगर तैन शिक्षा देने लाव ।

8 दोपरे ज़ैड़ी असां सब अकोट्टे बिश्शारे थियो, त तैड़ी काई दीये बलते थियो ।

9 त अक नौजवान दैरी मां बिशोरो थियो, ते तैसेरू नवं यूतुखुस थियूं, तै पौलुसेरो प्रचार ठड्डी तगर शुन्तां तैस निडल आई, ते टलेइयोवं छतरां उन्ढो खिरको, ते तै मेरि जेव ।

10 पौलुस बुन अव ते तै नौजवान टलेइतां तैस सेइं लिपटो ते ज्ञाने लगो, “कि डरा नन्ना ए ज़ीतोए ।”

11 फिरी तैनेईं वा गोइतां सेब्भेईं मिलतां रोट्टी खाइ, ते फिरी टलेकडोने तगर बच्चन शुनाने लगो, तैखन तै तैट्टां चलो जेव ।

12 लोकेईं तै नौजवान ज़ीतो घरजो नीयो, ते तैन बडी खुशी भोइ ।

~~~~~

13 असां अगगर गोइतां ज़िहाजे मां सुवार भोइ जे, ते अस्सुस नगरे जो चले जे, ताके तैडी पौलुसे भी ज़िहाजे मां च़ादम, किजोकि पौलुसे पेइले पैदल गानेरो बिस्तार कियोरो थियो ।

14 ज़ैखन तै असन अस्सुस नगरे मां मैल्लो त तै असेईं ज़िहाजे मां च़ादो ते असां मितुलेन नगरे मां आए ।

15 तैट्टां असां ज़िहाजे मां सुवार भोइ जे ते अस खियुस जज़ीरेरे सामने पुजे, ते अग्री दिहाडे असां सामुसे मां पुजे, ते होरसां अस मीलेतुस नगरे मां आए ।

16 पौलुसे थापेरू थियूं, कि अवं इफिसुस नगरे मां उतरेलो, किजोकि तै आसिया इलाके मां जादे वक्त बीतानो न थियो चातो, किजोकि तै जल्दी मां थियो, कि अगर भोइसखे, त तै पिन्तेकुस्त तिहारेरे दिहाडे यरूशलेम नगरे मां राए ।

~~~~~

17 ज़ैखन अस मीलेतुस नगरे मां ओस्स, त पौलुसे इफिसुस नगरेरे कलीसियारे बुजुर्गन जो बिस्तार भेजो कि तैना एज्जन ।

18 ज़ैखन तैना तैस कां आए, त तैनी तैन सेइं ज़ोवं, तुस ज़ानतथ कि पेइले दिहाडेरां ज़ैखन अवं आसिया इलाके मां पुजो, अवं तेइसेरो देंतो अज़ तगर हर वक्त तुसन सेइं साथी केन्वरां राव ।

19 मतलब बडे नेरमी सेइं, ते ऐंखरू बछ्छोडी-बछ्छोडी, ते तैन अजमैइश मां ज़ैना यहूदी केरि च़लैकी सेइं मीं पुइ एई, अवं प्रभुएरी सेवा केरतो राव ।

20 ते ज़ैना-ज़ैना गल्लां तुशे लेइ फैइदेरी थी, तैना मीं तुसन सेइं बगैर केन्वेरे डरे तुसन सेइं जोई छेइडी, ते बल्के ज़ैन किछ भी शिखालू दिले सेइं ते घर-घर गोइतां शिखालू ।

21 बल्के अवं यहूदी लोकां ते यूनानी लोकां केरे दुइयां केरे सामने गवाही देताई कि तैना परमेशेरेरे सामने पापन करां मन फिरान, ते इशे प्रभु यीशु मसीह पुइ विश्वास केरन ।

22 हेरा हुनी अवं पवित्तर आत्माारी गल मेन्तां यरूशलेम नगरे जो गाताई, ते मीं पतो नई कि तैडी मीं पुइ केरि-केरि गुजरेली ।

23 अवं सिर्फ एतूरू ज़ानताई कि पवित्तर आत्मा मीं हर नगर मां एन ज़ोती राई, कि बन्धना ते मुसीबत मेरे लेइ तियारन ।

24 पन मेरी जान, मेरे लेइ कोई कदर कीमत न रखवे, त बस्सा अवं एन चाताई कि मेरी दौइ पूरी भोए ते तैस सेवाई पूरी केरि, जै मीं परमेशेरेरे अनुग्रहेरे खुशखबरी पुइ गवाही देनेरे लेइ प्रभु यीशु करां मैल्ली ।

25 ते हुनी अवं ज़ानताई, कि तुसेईं अवं ज़ैन मां परमेशेरेरे अनुग्रहेरी खुशखबरी हर पासे शुनातो राव, त मीं फिरी न लाएले ।

26 एल्हेरेलेइ अवं तुसन साफ-साफ जोई छडताई, कि ज़ैना लोक यीशु पुइ विश्वास केरने बगैर मेरेले, त अवं तैन केरे ज़िमेवार नई ।

27 किजोकि अवं बगैर केन्वी डेरां तुसन शिखालतो राव, कि परमेशेरी मर्जी तुशे लेइ कुने ।

28 बस्सा अपनो ते सारे विश्वासी लोकां केरो खियाल रखा, ज़ेसेरे लेइ तुस पवित्तर आत्माारे तरफां चुनोरेथ, कि परमेशेरी कलीसियारी रखवाली केरा, ज़ै लोक तैनी अपने खून सेइं धिन्नोरेन ।

29 अवं ज्ञानताई कि मेरे गानेरां बाद झूठे उस्ताद मारने बालां गिदां केरे ज़ेरे तुसन मां एज्जले, ते ज़ेन्चरे तैना भैड्डन मारतन तेन्चरे तैना झूठे उस्ताद तुसन नुकसान पुज्जाले।

30 बल्के तुसन मरां भी एरे लोक खड़े भोले ज़ैना सच्च टलोड मरोड केरतां छडेले, ताके चलन अपने पासे केरन।

31 एल्हरेलेड बीङ्गे राथ ते याद रखा, कि अवं टलाई साल लेरां देतो रात दिहैड़ी हर एककी तैन खबरदार केरतो राव।

32 हुनी अवं तुसन परमेशेरे, ते तैसेरे अनुग्रहरे वचनेरे सुपुर्द केरताई, कि ज़ै तुसन विश्वासे मां मज्जबूत केरि सकते, ते तुसन तैस जागिरारो हकदार बनेइ सकते, जेसेरो वादो तैनी कियोरोए ज़ैनी तुस पवित्र कियोरेथ।

33 मीं केन्चरे सोन्ने चेंदारू या लिगडां केरू लालच नई कियेरू।

34 तुस एप्पू ज्ञानतथ कि मीं अपने हथेइं सेइं अपने ते अपने सैथी केरि हर अक ज़रूरत पूरी कियोरीए।

35 मीं तुसन सब किछ् केरतां हिराव, कि एन्चरे सेइं कमजोरन समैली सकतम, कि प्रभु यीशु मसीहेरी गल्लां याद रखम, “कि देनू नेने करां जादे धने।”

36 एन गल्लां केरे बाद पौलुसे ज़ैधू केरे भारे विश्तां तैन सेब्भन सेइं साथी प्रार्थना की।

37 तैना सब गले मिलतां लेरां देने लगे, ते पौलुसे फुम्मड़ी देने लगे।

38 खास केरतां तैना इस गल्ली सेइं दुखी थी, ज़ैना तैनी ज़ोरी थी, कि तुस मीं फिरी कधी न लाएले, ते तैनेई तै ज़िहाजे तगर पज्जाव।

## 21



1 ज़ैखन असां तैन करां चले जे त समुन्दरेरे सफर शुरू कियूं, त सिधे बत्तां कोस जज़ीरे मां आए, ते होरसां अस रूदुस मां पुजे, ते फिरी तैट्टां पतरा जज़ीरे मां चले जे।

2 ते अक ज़िहाजे फीनीके इलाके जो गांतू मैल्लू, त असां तैस पुड् चेटतां सफर शुरू कियूं।

3 ज़ैखन इश्शी नज़र साइपरस जज़ीरे पुड् पेई, त अस तैस बांए हथ्ये ओसैलतां सीरिया इलाके जो चले जे, सूर नगरे मां ओस्से, किजोकि इश्शे ज़िहाजे तैड़ी किछ् बोझ उसालनो थियो।

4 तैड़ी असन चले मैल्ले ते तैन कां असां सत दिहाड़े राए। तैनेई पवित्र आत्मा ज़ोने मुताबिक पौलुसे यरूशलेम नगरे मां गानेरे लेइ ठाको।

5 सत दिहैड्डना बाद कुआन्शां मट्ठन समेत नगरेरे बेइर तगर साथी आए, ते समुन्दरेरे बन्ने पुजतां असेई ज़ैधू केरे भारे विश्तां प्रार्थना की।

6 फिरी असां तैन करां अलग भोए त ज़िहाजे मां चेटतां चले जे, ते तैना भी अपने-अपने घरजो चले जे।

7 ज़ैखन असां सूर नगरे मरां सफर पूरू केरतां पतुलिमयिस मां पुजे, ते विश्वासी दलान जो नमस्कार केरतां तैन सेइं साथी अक दिहाड़ी राए।

8 ते होरसां असां तैट्टां चेलतां कैसरिया नगरे मां आए, ते फिलिप्पुस खुशखबरी प्रचार केरनेबालेरे धरे जे ते तैड़ी राए, ज़ै सत्तन मरां अक थियो।

9 तैसेरी च़ेवरे कुवैरी कुइयां थी, ते तैना भविष्यवाणी केरती थी।

10 ज़ैखन अस तैड़ी काई दिहाड़े राए, त तैड़ी अक नबी थियो, जेसेरू नवं अगबुस थियूं, ते यहूदिया इलाकेरां ओरो थियो।

11 तैनी असन कां एडतां पौलुसेरे मजे सेइं अपने हथ पाव बंधे ते ज़ोने लगे, “पवित्र आत्मा इन ज़ोतीए कि ज़ैस मैनेरू इन मज्ज आए, तैस यरूशलेम नगरेरे यहूदी इसेरे ज़ेरे बंधेले, ते गैर कौमां केरे लोकां केरे हवाले केरेले।”

12 जैखन असेई एना गल्लां शुनी, त असेई ते होरि लोकेई पौलुसे कां मिनत की, कि यरूशलेम नगरे मां न गेइयां ।

13 पन पौलुसे जुवाब दित्तो, “तुस एन कुन करेने लोरेथ? तुस किजो लेरां देइ-देइ मेरो दिल टलोइने लोरेथ? अवं यरूशलेम नगरे मां प्रभु यीशु मसीहेरे नव्वे सेइं सिर्फ बंधोनेरे लेइ नईं बल्के मरनेरे लेइ भी तियार आई ।”

14 जैखन तैनी न मन्नू त असां चुप राए, “कि प्रभुएरी मर्जी पूरी भोए ।”

15 किछ् दिहाइना बाद असां सफरेरी तियारी करेने लगे, ते फिरी असां यरूशलेम नगरे जो चले जे ।

16 कैसरिया नगरेरे किछ् चले असन सेइं साथी चले, ते असेई मनासोन नव्वेरो साइप्रसेरो अक पुरानो चेलो साथी आनो कि अस तैसेरे घरे रहम ।

### ~~~~~

17 ते जैखन असां यरूशलेम नगरे मां पुजे, त इशे विश्वासी ढला बडे खुशी सेइं असन सेइं मिलने आए ।

18 होरसां असां पौलुसे साथी नेइतां याकूबे सेइं मिलने जे, तैड़ी सब बुजुर्ग अकोटटे भोरे थिये ।

19 तैखन तैनी नमस्कार केरतां, जैना-जैना कम्मां परमेशेरे तैसेरी सेवारे जिरिये सेइं गैर कौमन मां कियोरां थी, अक-अक केरतां सब ज़ोआं ।

20 तैनेई इन शुन्तां परमेशेरी तारीफ़ की, ते फिरी पौलुसे सेइं ज़ोने लगे, “हे ढला तू ज्ञानतस, कि यहूदन मरां हज़ारेई लोकेई विश्वास कियोरोए, ते तैना सब मूसेरे कानूने पुइ अमल करेने मां मघनन् ।

21 ते तैन तेरे बारे शिखालेरू कि तू गैर कौमन मां रानेबाले सारे यहूदन ए शिक्षा देंतो ओरोस, कि मूसा नेबेरे कानूनेरे शारने, ते अपने मट्टां केरो खतनो न केरा, ते न यहूदी केरे रीतन पुइ न चला ।

22 त फिरी कुन कियूं गाए? लोकेई ज़रूर शुनेले कि इड़ी ओरोस ।

23 एल्हेरेलेइ जैन अस तीं सेइं ज़ोतम, तैन केर । इशे इड़ी ज़ेवरे मैन्हु आन जैनेई मिनत मगोरीए ।

24 तू तैन एप्पू सेइं साथी ने ते तैन सेइं मिलतां अपनो आप शुद्ध केर, ते तैन केरो खर्चां भी दे, ताके तैना अपनो दोगेरी टिंड बनान । तैखन सेबन पतो लगनोए कि जैना गल्लां तेरे खलाफ़ फैलेवरिन, तैन केरि कोई बुनीयाद नई, ते तू एप्पू भी सच्चे दिले सेइं मूसेरे कानूने पुइ अमल केरतस ।

25 ते ज़ैड़ी तगर तैन गैर कौमां केरो सवाले, कि जैनेई विश्वास कियोरोए, तैन केरे बारे मां असेई पेडले फैसलो केरतां लिखतां भेजू, कि तैना मूरतन कां बलिदान कियेरू मास ते खूने करां ते गलचैटी देइतां मारोरे जानवरां केरे मासे करां परहेज करेन, ते बदमाशी न केरन ।

26 होरसां पौलुसे तैना मैन्हु साथी ने, ते तैन सेइं साथी अपने आपे शुद्ध केरतां मन्देरे मां जेव, ते खबर दित्ती कि तैन केरे शुद्ध भोनेरे बाद चढतल चढनेरे दिहाडे केइस पूरे भोनेन ।”

### ~~~~~

27 जैखन शुद्ध भोनेरे सत दिहाडे पूरे भोनेबाले थिये, त आसिया इलाकेरे यहूदेई पौलुस मन्देरे मां लाव त लोक भडकाए, ते तैस टलेइतां चिन्डां मारने लगे ।

28 “हे इस्राएली लोकव इशेरी मद्दत केरा, ईए तै मैनुए, जै हर टैरी लोकन इशे कानूनेरे खलाफ़ ते मन्देरेरे खलाफ़ शिक्षा देंतो रहते, ते एनी एसेरां अलावा गैर कौमां केरे लोक इशे मन्देरे मां एन्तां तै पवित् टार अपवित् कराते ।”

29 तैनेई एन एल्हेरेलेइ ज़ोवं कि तैनेई पौलुस इफिसुस नगरेरे रानेबाले त्फिमस सेइं साथी लाहोरो थियो, ते समझते थिये कि पौलुसे तै ज़रूरी मन्देरे मां नीयोरो भोनों ।

30 तैखन सारे नगर मां हलचल मेचि जई, ते मैन्हु देवइतां जम्हां भोए, ते पौलुस टलेइतां मन्देरे मरां घसीटतां बेइर आनो, ते लूशी दारां बंद कियां ।

31 जैखन तैना तैस मारनेरी कोशिश करने लवरे थिये, त फौजी टोलरे सरदारे कां खबर पुज्जी, कि बड़े लोकेई यरूशलेम नगरे मां खलबली मचोरीए ।

32 तैखन तैना सिपेहिन ते सुबेदारन एन्तां तैन कांजो दौडो, ते तैनेई फौजी टोलरे सरदारे ते सिपाही लेइतां पौलुस मारनो कुटनो बंद कियो ।

33 फौजी टोलरे सरदारे नेडे गोइतां पौलुस अपने कब्जे मां कियो, ते तैस दूई शांगलेइं सेइं बंधनेरो हुक्म दित्तो, ते फिरी तैनी पुच्छू, “ए मैन्हु कौने ते एनी कुन कियेरू आए?”

34 तैस भीड़ी मां किछ लोक चिन्डां मारते थिये, ते एत्री शौर मचोरी थी, कि तैस पूरो पतो न लगो ते तैनी हुक्म दित्तो, कि पौलुसे किल्लै मां पुज्जाथ ।

35 जैखन पौलुस सिपाहीयेइं पेवड़न उबरो जलेवरो थियो, त लोकां केरे वजाई सेइं सिपाहीयेइं पौलुस उबरो छुइतां नेव ।

36 सारे लोक जैना पौलुसे पत्ती पेवरे थिये, तैना चिन्डां मारते थिये, “एस मार ।”

37 पौलुसे सिपाही किल्लै मां पुजाने बाले थिये, त तैनी फौजी टोलरे सरदारे सेइं ज़ोव, “कुन मी अज़ाज़ते कि अवं तीं सेइं किछ ज़ोई?” ते तैनी पुच्छू, “तू यूनानी भाषा जानतस?”

38 कुन तू तै मिस्र मुलखेरो रानेबालो नई, जैनी किछ चिरे पेइले सरकारी खलाफत कियोरी थी, ते 4000 मैनु जैन कां हथियार थिये तैना जंगले मां नीयोरे थिये?

39 पौलुसे ज़ोव, “अवं त यहूदी आई, ते तरसुस नगरेरो राने बालोई, जैन किलिकिया इलाकेरू मुशूर नगर, अवं तीं कां मिनत करताई मीं लोकन सेइं गल केरने दे ।”

40 जैखन तैनी अज़ाज़त दित्ती, त पौलुस पेवड़न पुड़ खडो भोइतां लोकन जो हथ्ये सेइं इशारो कमाव कि चुप रान । ते जैखन तैनेई चुप कमाई त पौलुसे इव्रानी भाषाई मां ज़ोनू शुरु कमाव:

## 22

~~~~~

1 “मेरे दलाव ते बुजुर्गाव, मेरी गल शुना, जै अवं अपनि सफेई मां पेश लोरोई केरने ।”

2 जैखन लोकेई तैस करां इव्रानी भाषा ज़ोती शुनी त तैना चुप रेइजे, तैखन पौलुसे ज़ोव:

3 “अवं त यहूदी आई, ते अवं किलिकिया इलाकेरे तरसुस नगरे मां ज़रमो, पन इस नगर मां गमलीएल करां शिक्षा हासिल की, ते अपने दादां-पड़दादां केरे कानूने ठीक तरीके सेइं शिखोरीए, ते अवं भी परमेशेरे लेइ एरो मघन थियो, जेरे अज़ तुस आथ ।

4 मीं मइदन ते कुआन्शन बंधतां, ते कैद केरतां, ई पंथ इड़ी तगर सताए, ते तैना माराए भी ।

5 एप्पू महायाजक ते सब बुजुर्ग एस गल्लेरे गवाह आन, कि मीं दमिश्क नगरे मां रानेबाले यहूदी दलां केरे लेइ चिट्ठी एन्होरी थी, ते अवं तैड़ी एस नीती सेइं जोरो थियो, ते जैना तैड़ी भोन तैन सज़ा देनेरे लेइ बेन्धतां यरूशलेम नगरे जो नेही ।”

~~~~~

(प्रेरितां. 9:1-19; 26:12-18)

6 “अवं जैखन सफर केरते-केरते दमिश्क नगरेरे नेडे पुजो, त तै दुपाहरां केरो मौको थियो । ते अम्बेरां अक बड़ी लौ आई ते मेरे जेवरे पासन बलने लगी ।

7 ते अवं तल्ले बिछड़ी जेव, ते मीं अक आवाज़ शुनी, जै मींजो ज़ोने लोरी थी, हे शाऊल, हे शाऊल तू मीं किजो स्तातस?

8 त मीं पुच्छू, हे प्रभु तू कौन आस? त तैनी मींजो जुवाव दित्तो, अवं यीशु नासरी आई, जैस तू सतातस ।

9 मेरे सैथेई लौ त लाई पन तैन कोई गल न समझी, कि तै आवाज़ मीं सेइं कुन लोरीए ज़ोने?

10 त मीं पुच्छू, हे प्रभु अवं कुन कम्मेई, प्रभुए ज़ोव, उठ दमिश्क नगरे मां गा तैड़ी तीं जैन तेरे केरनेरे लेइ रखेरू तैड़ी तीं सेइं ज़ोवं गालू ।

11 मेरे सैथेई अवं हथ्थेरो टलेइतां दमिश्क नगर मां पुजाव । किजोकि तैस बडे महिमारे वजाई सेइं मीं किछ न लेइयोवं ।”

12 “तैडी अक मैन्हु हनन्याह नव्वेरो कानूनेरे मुताबिक भक्त मैन्हु अव, ते तैट्टेरे यहूदन मां बडो इज्जतदार थियो ।

13 तै मीं कां खडो भोइतां ज़ोने लगे, हे ढला, शाऊल, अपनि एछ्छी खोल्ल, ते मेरी एछ्छी तैखने खुल्ली जेई, ते अवं तैस लहने लगे ।

14 तैखन तैनी ज़ोवं, इश्शे बुज़ुरगां केरे परमेशेरे तू चुनोरोस, ताके तू तैसेरी मर्जी पूरी केरस ते मसीह लास ते तैसेरी गल्लां शुनस ।

15 किजोकि तू सैरी लोकन मां तैसेरो गवाह भोलो, ते तैन ज़ोलो कि तीं कुन लाहेरूए ते कुन शुनेरूए ।

16 हुनी च़िर किजो लातस? उठ, ते बपतिस्मो ने ते तेरे पाप माफ़ भोन ।”

~~~~~

17 “ते ज़ैखन अवं यरूशलम नगरे मां वापस अव, ते अवं मन्दरे मां प्रार्थना करेने लोरो थियो, त मीं दर्शन लावं ।

18 ते तै लाव ते एन ज़ोतू शुनू कि लूश केर, ते यरूशलम नगरे मरां लूशी निस, किजोकि एना लोक मेरे बारे मां तेरी गवाही कबूल न केरेले ।

19 मीं ज़ोवं, हे प्रभु एना लोक जानतन कि अवं हर प्रार्थना घरे मां गातो थियो, ते केन्चरे अवं तेरे मन्ने बालन कैद केरतो ते कुटतो थियो ।

20 ते ज़ैखन तेरे गवाह स्तिफनुस मारने लोरे थिये, त अवं भी तैडी थियो, ते तैसेरे मारने मां खुशी थियो । ते अवं मारने बालां केरां लिगडां पहरतो थियो ।

21 ते प्रभुए मीं सेइं ज़ोवं, ‘गा अवं तीं गैर कौमन कां दूर-दूर भेजेलो ।”

22 सारे लोक तैसेरी गल्लां शुन्ने लोरे थिये, पन ज़ैखन तै इडी तगर पुजो त सारे लोक ज़ोरे-ज़ोरे चिन्डां मारने लगे, “ए ज़ीतो रखनेरे काबल नई!” एस मार ।

23 ज़ैखन लोकां केरि शौर ते चिन्डां च़ेलती रेइ, त तैना चोगे शैरतां धूइ आसमाने उडारने लगे ।

24 त फौजी पलटनरे सरदारै पौलुस किल्लै मां नेनेरो हुकम दित्तो, “एस कोडेइं सेइं बाथ ते एसेरू बियांन घिन्ना ताके पतो लगे, कि लोक किजो चिन्डां मारने लोरेन ।”

25 ज़ैखन तैना कोडेइं सेइं बानेरे लेइ पौलुस रेसी सेइं बंधो, त तैनी एककी सूबेदारै सेइं ज़ोवं ज़ै तैडी नेडे थियो । “कुन अक रोमी नगररे मैन्हु बगैर कसूरे झुसनो जेइज्जै?”

26 ज़ैखन तैनी सूबेदारै एन शुनू त तै फौजी पलटनरे सरदारै कां जेव, “तू कुन ज़ोतस? ए त अक रोमी मैनुए ।”

27 फौजी पलटनरे सरदारै पौलुसे कां एइतां पुच़्छ, “कुन तू रोमीस?” तैनी ज़ोवं, “हाँ ।”

28 इन शुन्तां फौजी पलटनरे सरदारै ज़ोवं, “कि मीं रोमी भोनेरी पदवी बडे पेंडसे देइतां हासिल कियोरीए ।” ते पौलुसे ज़ोवं, “पन अवं त ज़र्मनेरो रोमी ।”

29 ज़ैना लोक पौलुसेरू बियांन घिन्ने बाले थिये, तैना नेश्शी जे, फौजी पलटनरे सरदारै भी इन बुज्जतां कि ई रोमीए, ते तैनी तै बंधो, ते डेरि जेव ।

~~~~~

30 हारसां तै ठीक-ठीक ज़ान्नीरी इच्छा सेइं कि यहूदी तैस पुइ किजो दोष लातन, एल्हेरेलेइ तैनी तै खोल्लो, ते प्रधान याजक ते सारी महासभा अकोट्टी केनेरो हुकम दित्तो, ते पौलुस बुन गेइतां तैन केरे सामने खडो कियो ।

## 23

1 पौलुसे महासभारे लोकां केरे पासे रोडेच़ारे तकतां ज़ोवं, “हे ढलाव अवं बेडि नेक नीती सेइं परमेशेरे हुकमां केरे मुताबिक जिन्दगी गुज़ारतो ओरोई ।”

2 महायाजक हनन्याह पौलुसेरी एना गल्लां शुन्तां पौलुसे कां खडे भोरे लोकन हुक्म दित्तो, कि एसेरे तुत्तरे पुड थप्पड बाथ।

3 पौलुसे तैस सेइं ज़ोवं, “हे पाखंडी, परमेशर तीं बाए। तू इडी बिशोरोस कि मूसेरे कानूनेरे मुताबिक मेरो इन्साफ केरस, ते कुन तू मूसेरे कानूनेरे खलाफ बानेरो हुक्म देतस?”

4 ज़ैना तैडी खडखडे थिये, त तैना ज़ोने लगे, “कुन तू परमेशरेरे महायाजकेरी तुहीन केरतस?”

5 पौलुसे तैन सेइं ज़ोवं, “द्लाव मीं पतो न थियो, कि ए महायाजक, किजोकि लिखोरूए, तू अपने लोकां केरे प्रधाने जो बुरू न ज़ो।”

6 पौलुस ज्ञानतो थियो, कि तैन मां किछ् सदकी भी आन, ते किछ् फरीसी लोक भी आन ते तै महासभाई मां ज़ोरे सेइं ज़ोने लगे, “हे द्लाव अवं त फरीसी लोकां केरे खानदेनी मरां आई, ते मीं पुड एनेई एल्हेरेलेइ मुकदमेो ज़लेवरोए, कि अवं उमीद रखताई कि मुडदे फिरी ज़ीति भोले।”

7 पौलुसेरू एन ज़ोते फरीसी ते सदकी लोकन एप्पू मांमेइं लडाईं शुरु भोइजेइ, ते सेब्बन एप्पू मांमेइं खल बनो।

8 किजोकि सदकी ज़ोतन कि मुडदे ज़ीते नईं भोने, ते न स्वर्गदूतन ते न कोई आत्मा आए, पन फरीसी लोक एन दुइये गल्लन पुड विश्वास केरतन।

9 तैखन तैना बेंस केरने लगगे, शास्त्री लोकन मरां ज़ैना फरीसी लोकन मां थिये, तैना खडे भोइतां लडाईं केरतां ज़ोने लगे, “असां इस मैन्हु मां कोई कसूर न लहम, अगर केन्ची आत्मा या स्वर्गदूते एस सेइं कोई गल कियोरीए त फिरी कुन भोवं?”

10 गल एत्री बेद्वी जेई, कि फौजी पलटनरे सरदारे बुझ्, कि एरू न भोए कि पौलुसेरे टोटे-टोटे बनान, त तैनी हुक्म दित्तो कि बुन गाथ ते पौलुसे ज़बरदस्ती तैट्ठां कढा ते किल्लै मांजो आनां।

11 तेस्से राती प्रभु यीशुए पौलुसे कां एइतां ज़ोवं, “हे पौलुस हिम्मत रख ज़ेन्त्रेरे तीं यरुशलेम नगरे मां मेरी गवाही दित्तोरीए, तेन्त्रेरे तीं रोमे मां भी गवाही देनी भोली।”



12 होरसां झंझां किछ् यहूदी मैनेईं मिलतां फैसलो कियो, ते कसम कमाईं कि ज़ांतगर असां पौलुसे कल्ल न केरम, तांतगर किछ् न खाम ते न पीम।

13 एस साजिशी मां 40 मेनन् करां जादे थिये।

14 तैना प्रखान याजकन ते बुज्जुर्गन कां जे, ते ज़ोने लगे, “असन पुड लानत भोए, अगर असां पौलुसे मारनेरे बगैर किछ् खाम या पीम, असेईं त तैस खतम केरनेरी कसम कमेवरीए।

15 एल्हेरेलेइ तुस सब महासभा मां मिलतां फौजी पलटनारे सरदारे कां दरखुवास देथ, कि तै पौलुसे लोकां केरे सामने आने, ताके एस मुकदमेरी सारी हकिकत फिरी पतो ज़ले, एस करां पेडले पौलुस इडी पैश कियो गाए, असां तियार आम, कि तैस मारम।”

16 पन ज़ैखन पौलुसेरे बेइनारे मट्टे एस साजशरो पतो लगगे, त तैनी किल्लै मां गेइतां पौलुसे पतो दित्तो, कि तैना लोक तैस मारनो चातन।

17 तैखन पौलुसे सूबेदारन मरां अक कुजाव, ते तैस सेइं ज़ोवं, “कि इस जवाने फौजी पलटनरे सरदारे कां नेथ, किजोकि ए किछ् ज़ोनेरे लेइ ओरोए।”

18 बस्सा, तैनी तै फौजी पलटनरे सरदारे कां साथी नीयो, ते ज़ोने लगे, “अवं पौलुसे ज़ै कैदी आए, तैनी अवं कुजाव, ते तैनी मीं कां दरखुवास कियोरीए, कि इस जवाने अवं तीं कां एन्ही, किजोकि ए किछ् तीं सेइं ज़ोनू चाते।”

19 फौजी पलटनरे सरदारे तैस जवानेरो हथ टलेइतां तै कनारे ज़ोरे नीयो ते तैस पुच्छने लगगे, “तू मीं सेइं कुन ज़ोनू चातस?”

20 तैनी जवाने ज़ोवं, “यहूदी लीडरेईं अकोट्टे भोइतां तीं कां दरखुवास देनेरो फैसलो कियोरोए। कि तू पौलुसेरी पुच्छ् गन केरनेरे बहाने तैस महासभा मां आनस।



21 तू तैन केरि गल न मेन्ना, किजोकि कोई 40 मैन्न करं जादे यहूदी तैस पुड़ हमलो केरनेरी कोशिशी मां आन, तैनेई कसम कमेवरी कि ज्रांतगर असां पौलुसे न मारम तांतगर असां किछ्ख खाम या पीम, त असन लानत भोए, हुनी तैना तियारन, सिर्फ तेरे वादेरो इंतजारे ।”

22 फौजी पलटनरे सरदारो तै जवान वापस भेज्जो, ते तैस ज़ोव कि गा, “एना गल्लां केरो जैना तीं मीं सेइं ज़ोई, होरि केन्ची पतो न लोड़ी लग्गोरो ।”

????? ??????? ??? ???????

23 तैखन तैनी दूई सूबदार कुजाए, ते तैन सेइं ज़ोव, “तुस 200 सिपाही ते 70 सुवार ते 200 भाले च़लानेवाले तियार रख्खा, तैनेई राती 9 बज़ेई कैसरिया नगरे मां गानूए ।

24 ते पौलुसेरे लेइ घोड़े तियार रखा, ताके तै गवर्नर फेलिक्स कां हफ़ाज़ती सेइं पुज़ाव गाए ।”

25 ते फौजरे प्रधाने अक चिट्ठी एस तरिकेरी लिखी ।

26 “श्रीमान फेलिक्स गवर्नर क्लौदियुस लूसियासे जो नमस्कार ।

27 ए तै मैनुए, ज़ै यहूदेई दलातोरो थियो, ते एस तैना मारनेवाले थिये, त अवं सिपाही नेइतां साथी जेव, ते तै छुटाव, किजोकि मीं पतो थियो, कि तै अक रोमेरो रानेवालोए, त फौजी पलटन नेइतां छुटाव ।

28 लिहाज़ा एन ज़ान्नेरी केरनेरे लेइ कि तैना तैस पुड़ कुन इलज़ाम लातन, मीं तै तैन केरि महासभा मां पेश कियो ।

29 ते पतो लगो, कि तैन केरो इलज़ाम तैन केरे कानूनेरे मुताबिक एसेरे खलाफ कोई एरो इलज़ाम नई, कि ज़ेसेरे ज़िरिये सेइं असां तैस कैद केरम या मौतरी सज़ा देइ सखम ।

30 मीं पतो लग्गोरोए कि एसेरे खलाफ कोई साज़िश भोइ राहोरीए, ते मीं ए जल्दी तीं कांजो भेज्जोरोए, ते मीं तैस पुड़ दाओ करेनेवालन भी ज़ोरूए, कि तैना भी तीं कां अपनो मुकदमो पेश केरन ।”

31 सिपाही, फौजी पलटनरे सरदारोरे हुक्मेरे मुताबिक पौलुसे एप्पू सेइं साथी नेइतां रातो रात अन्तिपत्रिस नगरे मां पुज़ाव ।

32 होरसां दीसां घोड़ सुवारन तैस सेइं साथी अग्री-अग्री गानेरो हुक्म दित्तो, ते तै एप्पू किल्लै मांजो वापस च़लो जेव ।

33 ज़ैखन घोड़ सुवार कैसरिया नगरे मां पुजे त तैनेई गवर्नर कां चिट्ठी देइतां पौलुस तैस कां पेश कियो ।

34 गवर्नर चिट्ठी पेढ़तां पुच्छ्छ, “ए कौस इलाकेरो रानेवालोए?” ज़ैखन तैस पतो लगो कि ए किलिकिया इलाकेरो रानेवालोए ।

35 त तैनी ज़ोव, कि अवं तेरो मुकदमो तैखन शुनेलो, “ज़ैखन तीं पुड़ दोष लाने वाले भी इड़ी हाज़र भोले ।” तैखन तैनी हुक्म दित्तो कि पौलुसे हेरोदेसेरे पहेर मां रख्खा ।

## 24

?????? ?????????????? ?????? ??????

1 पंचे दिहेइना बाद हनन्याह महायाजके किछ्ख बुज़ुर्ग ते तिरतुल्लुस नन्वेरो वकील साथी कैसरिया नगरे मां पुजे, ते गवर्नर कां पेश भोइतां पौलुसेरां खलाफ फरयाद कमाई ।

2 ज़ैखन पौलुस पेश कियो त तिरतुल्लुस इलज़ाम लेइतां ज़ोने लाव, “हे महान फेलिक्स, तेरे वजाई सेइं अस बड़े खुशी सेइं रातम, ते तेरे ज़िरिये सेइं इस कौमरी केत्री बुरैई सुधैरी गैतिन ।

3 एन अस हर ठैरी हर किसमे सेइं मन्तम ।

4 पन हुनी अवं तेरो जादे वक्त नेनो न चैई, अवं तेरी मिनत केरताई कि इश्री अक दूई गल शुन ।

5 असेईं लाहेरूए कि ई मैनुह बड़ो फसाद केरनेवालोए, ई दुनियारे सारे यहूदन मां फितनावाजे, ते नासरी कुपंथेरो प्रधान आए ।

6 एनी त मन्दरे भी अशुद्ध केरनेरी कोशिश की, ते एल्हेरेलेइ असेई ए ट्लेइतां एस पुइ अस अपने कानूनेरे मुताबिक मुकदमो चलानो चाते थिये।

7 पन फौजी पलटनरो सरदार लूसियास असन करां ज़बरदस्ती नेही जेव।

8 ते इस पुइ दोष लाने वाले तीं कां हाज़र भोनेरो हुकम दे। इन सेभी गल्लां केरे बारे मां अस एस पुइ दोष लातम, तू एप्पू सन्न ज्ञान।”

9 यहूदी लोकेई भी तैस सेइं साथी भोइतां ज़ोवं, कि एना गल्लां केन्वां भोइ सेकतिन।

**XXXXXXXXXXXXXXXXXXXXXXXXXXXXXXXX**

10 ज़ैखन गवर्नरे पौलुसे वियान देनरे लेइ इशारो कियो, त पौलुसे जुवाव दित्तो, “अवं ज्ञानताई कि तू केही सालां केरो देतो इस कौमरो इन्साफ केरनेबालो आस, एल्हेरेलेइ अवं अपनि सफाई तीं कां पैश करताई।

11 तू एप्पू पतो केरि सखत्स कि अवं 12 दिहाडे पेइले यरूशलेम नगररे मन्दरे मां आराधना केरनेरे लेइ ज़ोरो थियो।

12 मेरे मुदेइयेइ अवं मन्दरे मां केन्वी सेइं भी बेंस केरतो नई लाहोरो, ते प्रार्थना घरे मां ते नगर मां इरां उरां लड़ाई केरतो भी नई लाहोरो।

13 हुनी एना इलज़ाम ज़ैना मीं पुइ लाने लोरेन, ते तेरे सामने साबत न केरि सखे।

14 हाँ अवं इकरार ज़रूर केरताई कि ज़ैस पंथे एना कुपंथ ज़ोतन, अवं तैसेरे मुताबिक अपने दादे-पड़दादां केरे परमेशेरी आराधना केरताई, ते ज़ैन किछ् मूसेरे कानूने ते नेवी केरि किताबी मां लिखेरूए, तैन सेब्बन पुइ मेरो विश्वास आए।

15 अवं परमेशेरे पुइ तैए भरोसो रखताई, ज़ै तैना रखतन कि धर्मी लोकन ते पापी लोकन परमेशेर मुइदन मरां ज़ीतो केरेलो।

16 ते एल्हेरेलेइ मेरो ज़मीर परमेशेरे कां भी ते इन्साने कां भी बेइलज़ाम राए।

17 केही सालां केरे बाद अवं अपने गरीब लोकन दान पुजाने, ते चढ़तल च़ादने ओरो थियो।

18 तैखन एनेई अवं मन्दरे मां लाव, त अवं शुद्ध भोनेरी रीत पूरी केरने लोरो थियो, बगैर लोक अकोट्टे केरतां ते बगैर कोन्वी हंगामे इन कम केरतो लाव। पन तैना आसिया इलाकेरे किछ् यहूदी थी, ते तैन जाईज थियूं।

19 अगर मीं किछ् गलत कियेरू भोथू त तैनेई इडी तेरे सामने मीं पुइ दोष लोरो लोइतो थियो, किजोकि तैनेई एप्पू लावरूए कि मीं मन्दरे मां कुन कियूं।

20 इना लोक ज़ैना इडी ओरेन, एना ज़ोन कि ज़ैखन अवं महासभा मां पैश भोरो थियो, त एनेई मीं मां कुन कसूर लाहोरो थियो?

21 सुवाए इस गल्लेरे कि ज़ै मीं बड़े ज़ोरे सेइं आवाज़ देइतां ज़ोरी थी, कि अवं ई विश्वास केरताई परमेशेर मुइदन ज़ीते केरते, एल्हेरेलेइ मीं पुइ मुकदमो चलाने लगोरें।”

22 फलिक्स ज़ै इस पंथेरे बारे मां ठीक-ठीक ज़ानतो थियो, एन ज़ोइतां मुकदमो बंद कियो, “ज़ैखन फौजी पलटनरो सरदार लूसियास इडी एज्जेलो त अवं तुशेशे सामने इस मुकदमेरो फैसलो केरेलो।”

23 तैनी सूबेदारे हुकम दित्तो, कि पौलुसे परहे मां रख्खा, ते तैसेरे दोस्तन मरां केन्वी भी तैसेरी सेवा केरनेरे लेइ न रोकथ।

**XXXXXXXXXX XX XXXXXXXXXXXXXXXXXXXXXXXXXXXXXXX**

24 केही दिहेइना बाद गवर्नर फलिक्स अपनि कुआन्श दरुसिल्ला ज़ै यहूदी थी, ते तैस सेइं साथी कैसरिया मां अव, तैनी पौलुसे जो समाद भेजो ते यीशु मसीह पुइ विश्वास केरनेरे बारे मां गल्लां शुनाए।

25 ज़ैखन पौलुस एन ज़ोवं, कि परमेशेरी नज़री मां कुन रोइए ते अपने इच्छा कैवू केरनेरे बारे मां ते एजनेबाले परमेशेरे इन्साफेरे बारे मां भी ज़ोवं, त फलिक्स डेरि जेव, ते ज़ोने लगो, “हुनी तू गा, अगर फुसंत मैलेली त अवं तीं फिरी तीं कुजेइलो।”

26 तैस पौलुसे करां किछ्छ् मैलनेरी उमीद थी, एल्हेरेलेइ तै तैस बार-बार कुजातो थियो, ते तैस सेइं गल्लां केरतो थियो।

27 पूरे दूई सालना बाद पुरकियुस फेस्तुस, फेलिक्सेरे ठैरी गवर्नर बनो, ते फेलिक्से यहूदी खुश केरनेरे लेइ पौलुस कैदखाने मां रख्खो।

## 25

??????????

1 फेस्तुस तैस इलाके मां पुजतां टलेइ दिहैइना बाद कैसरिया नगरेरां यरूशलेम नगरे मांजो जेव।

2 जैडी प्रधान याजकेई ते यहूदी लीडर तैस कां एइतां पौलुसेरे खलाफ दोष लाने लगे।

3 तैना तैस कां मिनत केरने लगे, कि लूशी पौलुसे यरूशलेम नगरे मां हाज़र भोनेरो हुक्म दे, दरासले मां तैनेई तैस बत्तां मारनेरी साज़िश कियोरी थी।

4 फेस्तुसे जुवाब दित्तो, “पौलुस कैसरिया नगरे मां कैदे, ते अवं भी तैडी लूशी गाने बालोई।”

5 फिरी ज़ोवं कि तुसन मरां किछ्छ् खास अधिकार रखनेवाले मीं सेइं साथी चलन, “अगर सच्चे तैनी कोई गलत कम कियेरू भोए त तैस पुड़ दोष लान।”

6 ते फेस्तुस अठ दश दिहाड़े यरूशलेम नगरे मां राव, ते फिरी कैसरिया नगरे जो चलो जेव, तैडी ते दुइयोवं दिहाड़े आदालतरी तखते पुड़ बिशो, ते हुक्म दित्तो कि पौलुसे हाज़र केरा।

7 जैखन पौलुस हाज़र भोव, त यरूशलेम नगरेरे यहूदी लीडरेई तैस चुफुरतां घेरो देइतां बड़े झूठे इलज़ाम लाने शुरू कियो। पन कोई पक्कू सबूत न मैल्लू।

8 पौलुसे अपन सफाई देते बार यहूदी केरे झूठे इलज़ामा केरे लेइ इन्कार कियो, ते ज़ोवं, “मीं त यहूदी केरे कानूनेरे खलाफ कोई कसूर नई कियोरो, ते न मन्देरेरे खलाफ ते न महाराज़ेरे खलाफ कोई कसूर कियोरोए।”

9 पन फेस्तुस एप्पू यहूदी लीडरन खुश केरनेरे लेइ पौलुसे पुच्छ्छ्, “तीं यरूशलेम नगरे जो गानू मन्जुरे, ताके अवं एस मुकदमेरो फैसलो तैडी केरि?”

10 पौलुसे ज़ोवं, “अवं इडी महाराज़ेरे इन्साफेरे तखतेरे सामने खडो आई, ते मेरे मुकदमेरो फैसलो इस्से ठैरी भोरो लोइते, जैडी रोमी मैनेरो इन्साफ भोरो लोइते, तू एप्पू भी रोइच्चारे ज्ञानतस कि मीं यहूदी केरो कोई कसूर नई कियोरो।

11 अगर अवं कुसुरवार आई त मौतरी सज़ारे कावल आई त मेरो मरनेरो इन्कार नई, पन अगर जैना झूठे इलज़ाम यहूदी मीं पुड़ लाने लगोरेंन ते अगर तैना झूठेन त केन्ची हक नई कि मीं तैन केरे हवाले केरे। ते अवं इडी महाराज़े कां बिनती केरताई, कि मेरो इन्साफ इडी कियो गाए।”

12 तैखन फेस्तुस सल्लाकारन करां मुशोरो केरतां जुवाब दित्तो, “तीं महाराज़े कां बिनती कियोरीए त तू महाराज़े कां गालो।”

????????????????

13 किछ्छ् दिहैइना बाद अगिरप्पा राजो ते तैसेरी निकडी बेइन बिरनीके कैसरिया नगरे मां एइतां फेस्तुसे सेइं मुलाकात की।

14 तैन केरे बड़े दिहाड़े तैडी रानेरे बाद फेस्तुसे पौलुसेरे बारे मां राजे ज़ोवं, “अक मैन्हु आए, जै फेलिक्से कैद कियोरोए।

15 जैखन अवं यरूशलेम नगरे मां थियो, त प्रधान याजक ते यहूदी बुजुर्ग तैस पुड़ दोष लगे लाने, कि एस सज़ा दित्ती गाए।

16 पन मीं तैन ज़ोरू थियू, कि रोमी केरे दस्तूरेरे मुताबिक कोई मैन्हु सज़ा देनेरे लेइ हवाले न कियो गाए, ज्ञातगर तैस अपने मुदेइ केरे सामने तैन इलज़ामा केरे बारे मां अपन सफाई पैश केरनेरो मौको न दित्तो गाए।

17 एल्हेरेलेइ जैखन यहूदी लीडर इड़ी आए, त मीं ठढ न लाई, पन होरसां इन्साफेरे तखते पुड़ बिश्तां हुक्म दित्तो, कि पौलुस आदालती मां आनो गाए।

18 जैखन तैसेरे मुदेइ अपनो दाओ पैश केरनेरे लेइ खड़ भोए त, तैनेई कोई एरो इलजाम तैस पुड़ न लाव, जेसेरी बारे मां अवं समझतो थियो।

19 पन अपने फिरकेरे बल्के तैन केरि लड़ाई तैन केरे अपने धर्मेरे केन्वी यीशु नव्वेरे मैनेरे बारे मां थी। तै मेरि जेवरोए, पन पौलुस तैस जो जीतो ज्रोते।

20 अवं बेड़ि उलझनी मां राहोरोइ कि केन्वरे एन गल्लां केरो पतो केरि, एल्हेरेलेइ मीं पौलुसे पुच्छू, कि तीं यरूशलेम नगरे मां गानू मन्जुरे, ताके एन गल्लां केरो फैसलो तैड़ी भोए?

21 पन पौलुसे बिनती कमाई कि इस मुकदमेरो फैसलो महाराज्जे कां लोइते भोरो, एल्हेरेलेइ मीं हुक्म दित्तो कि तै महाराज्जे कां गाने तगर इड़ी पाबंद राए।”

22 अग्रिप्पा राज्जे फेस्तुसे सेइं ज़ोवं, “अवं भी एस मैनेरी गल्लां शुननी चाताई।” तैनी जुवाव दित्तो, “तू तैसेरी गल्लां कालां शुनी सखत्स।”

23 होरसां अग्रिप्पा राज्जे ते कने बिरनीके बेड़ि शानी सेइं आए, ते फौजी पलटनेरे सरदारैइ ते नगरेरे खास लोक सभा मां दाखल भोए, फेस्तुसे हुक्म दित्तो कि पौलुसे हाज़र केरा।

24 फिरी फेस्तुस ज़ोवं, “हे अग्रिप्पा राज्जा ते बाकी लोकव तुस इस मैन्हु हेरतथ एसेरे खलाफ सैरी यहूदी कौमां मीं कां यरूशलेम नगरे मां भी ते इड़ी भी चिन्डां मैरतां दरखुवास कियोरी थी, कि ए मैन्हु जीतो रखनो ठीक नई।

25 पन मीं पतो लगो कि एनी कोई एरू गलत कम नई कियेरू, कि ए कल्ल कियो गाए, एल्हेरेलेइ एनी इड़ी बिनती कियोरीए, त अवं ठीक समझतां कि एस रोम नगरे मां भेजी।

26 पन मीं तैसेरे बारे मां कोई ठीक गल न मैल्ली, कि महाराज्जे जो लिखी, एल्हेरेलेइ मीं तै तुशे सामने ते खास केरतां अग्रिप्पा राज्जा, तेरे सामने पैश कियोरोए, ताके पुच्छू गन केरनेरे बाद अगर कोई खास गल भोए त अवं लिखी।

27 किजोकि केन्वी कैदी भेजते बार तैसेरे इलजाम अगर अवं केन्वी न शुनेई त मेरी लेइ ठीक नई।”

## 26

?????????? ?????? ????? ?????????? ???????

1 अग्रिप्पा राज्जे पौलुसे जो ज़ोवं, “तीं अपने बारे मां ज़ोनेरी अज़ाज़ते।” तैखन पौलुस अपनो हथे सेइं इशारे केरतां अपनि सफाई पैश केरने लगो।

2 “हे अग्रिप्पा राज्जा, अवं अपनो आप खुश किस्मत समझताई, कि तेरे सामने खड़ो भोइतां यहूदी लोकां केरे प्रधानां केरे इलजामां केरे खलाफ अपनि सफाई पैश केरने लगोरोइ।

3 खास केरतां तू सारे यहूदी केरि रीति रुवाज़ेरे बारे मां ज़ानतस, ते एल्हेरेलेइ अवं तीं कां मिनत केरताई, कि तू सवरी सेइं मेरी गल शुन।

4 यहूदी मीं रोडेज़ारे ज़ानतन कि पेइले अवं अपने लोकन मां ते यरूशलेम नगरे मां ते मेरी जवँनरो चालचलन केरहो थियो।

5 तैना पेइले देते मीं ज़ानतन ते अगर चान त मेरे हके मां गवाही देइ सकतन, कि अवं अपने पंथेरे मुताबिक फरीसी भोइतां अपने धर्मेरे सच्चे पंथे सेइं ज़िन्दगी गुज़रतो ओरोई।

6 परमेशेरे इशे दादे-पड़दादन सेइं अक वादो कियोरो थियो, मीं उमीदे कि तै पूरो भोलो, तैस उमीदारी वजाई सेइं मीं पुड़ मुकदमो चलेवरोए।

7 एस वादेरे पूरे भोनेरी उमीद इशे 12 केरे 12 गोत्रने, एल्हेरेलेइ तैना दिले सेइं रात दिहाड़ी परमेशेरी सेवा केरते रातन। हे अग्रिप्पा राज्जा मेरी इस उमीदेरे लेइ यहूदी मीं पुड़ दोष लातन।

8 ज़ां कि परमेशर मुड़दन फिरी जीते केरते, तुस इस गल्ली पुड़ विश्वास कि न केरथ?

9 “पेड़ले अवं भी समझतो थियो, कि यीशु नैसरेरे नव्वेरी हर तरीके मुखालफत केरनि मेरो फरजे ।

10 एल्हेरेलेइ अवं यरूशलेम नगरे मां एन्ने केरतो राव, मीं प्रधान याजकन करां अजाजत एन्तां बड़े परमेशेरे सेवक कैद केरतां छुडे, ते जैखन तैना मारे गाते थियो, त अवं भी तैड़ी खलाफत केरतो थियो ।

11 अवं प्रार्थना घरन मां गातो थियो, ते तैन केरि तुहीन केरतो थियो । ते लोकन यीशुएरे खलाफ तुहीन केरनेरे लेइ मजबूर केरतो थियो । ते मसीही लोकां केरि मुखालफत केरने सेइं मीं एत्री खुशी भोती थी, कि अवं दूर-दूर नगरन मां गेइतां तैन सतातो थियो ।”

ॐॐॐॐ ॐॐॐॐॐॐॐॐ ॐॐॐ ॐॐॐ  
(ॐॐॐॐॐॐ. 9:1-19; 22:6-16)

12 “एक्की बार प्रधान याजकन करां अधिकार एन्तां एस्से कम्मेरे लेइ दमिशक नगरेरे सफर केरने लगगोरो थियो ।

13 त हे राजा अवं हेजू बत्तां थियो, त मीं दुपहरां केरे मौके अम्बेरां अक लौ एंडती लाई, जै दिहाडेरी लौई करां भी जादे थी, ते ते इश्शे जेवरे पासन चमकने लगी ।

14 असां सब जमीनी पुड़ बिछड़ी जे, ते मीं अक आवाज शुनी, जै मीं सेइं इव्रानी भाषाई मां एन ज़ोने लगेरी थी । कि हे शाऊल हे शाऊल तू मीं किजो स्तातस? मीं सेइं लड़ाई केरनि तेरे लेइ बकारे ।

15 “त मीं जुवाब दित्तो, हे प्रभु तू कौन आस, त प्रभुए मीं जुवाब दित्तो अवं यीशु आई जैस तू सतातस?

16 पन उठ ते अपने पवन पुड़ खड़ो भो, किजोकि मीं तीं एल्हेरेलेइ दर्शन दित्तोरूप, कि तीं अवं अपनो सेवक बनेइं, ते जैन किछ तीं लाहेरूप तू तैसेरो गवाह बनस ।

17 अवं तीं तेरे लोकन करां ते गैर कौमन करां बचातो रेइलो अवं तीं तैन मां भेजताई ।

18 ताके तू तैन केरि एच्छी खोल्लस ते तैन आंधरे मरां लौई मां आनस ते कने शैताने करां छुटेइतां परमेशेरे पासे आनस, ताके तैना मीं पुड़ विश्वास केरन ते परमेशर तैन केरे पाप माफ केरे, ते तैन लोकन मां शामिल भोन जैना पवित्तर कियोरेन, तैना विरासत हासिल केरन ।”

ॐॐॐ ॐॐॐॐॐ ॐॐॐ ॐॐॐ ॐॐॐ

19 ते एल्हेरेलेइ, “हे अग्रिप्पा राजा मीं एस स्वर्गेरे दर्शनेरो इन्कार नई कमेवरो ।

20 ते पेड़ले मीं दमिशक नगरेरे लोकन मां ते फिरी यरूशलेम नगरेरे ते सारे यहूदिया इलाकेरे रानेबालो ते गैर कौमन भी प्रचार केरतो कियो । कि पापन करां मनफिराथ, ते परमेशेरे पासे फिरा ते अपने स्वावे सेइं साबत केरा कि तुसेईं पापन करां मन फिरावरोए ।

21 एन्ने गल्लां केरे लेइ यहूदेई अवं मन्दरे मां टलातो ते मारनेरी कोशिश की ।

22 “पन अवं परमेशेरी किर्पाई सेइं अज तगर जीतोई, ते सेभी निक्के बड्डन कां अवं गवाही देताई, कि जैना गल्लां अवं ज़ोताई कि जैना नेवेई ज़ोरी थी, ते मूसा नेवे भी ज़ोरी थी ।

23 कि मसीह बड़ो दुख भोगेलो, ते सेभन करां पेड़लो मुड्डन मरां जीतो भोइतां यहूदी कौमी त गैर कौमां केरे लोकन बचालो जै लौअरो ज़ेरो आए ।”

24 जैखन पौलुस एन ज़ोने लगगोरो थियो, त फेस्तुस ज़ोरे सेइं ज़ोवं, “तू पागल भोइ जेव । जादे ज्ञाने सेइं तू पागल भोइजेवरोस ।”

25 पौलुसे जुवाब दित्तो, “जनाव फेस्तुस साहब अवं पागल नई भोरो, अवं जैन किछ ज़ोने लगगोरोई तैन सच्चे ते ज्ञाने सेइं आए ।

26 राजा भी ज़ेसरे सामने अवं निडर भोइतां एन गल्लां ज्ञानते, ते मीं याकीने कि एन मरां कोई भी गल तैस करां छुपोरी नई, किजोकि ए चमत्कार कोई एरो नई भोरो ।

27 हे अग्रिप्पा राजा कुन तू नेबी केरो, अवं ज्ञानताई कि तू मनतस?”

28 अग्रिप्पा राजे पौलुसे सेइं ज़ोवं, “कुन तू थोड़ी जेरि गल्लेई सेइं मीं तू मसीही बनानो चातस?”

29 पौलुसे जुवाव दित्तो, चाए थोड़ी ज़ेरि या जादे गल्लेई सेइं, “पन अवं त परमेशेरे कां प्रार्थना केरताई कि, न सिर्फ तू बल्के जेतरे भी अज मेरी गल्लां शुनी रावरेन सब मेरे जेरे मसीही भोन, पन इन शंगलां केरे बगैर ।”

30 तैखन अगिरप्पा राजो ते गवर्नर ते विरनीके ते तैस सेइं साथी होरे भी खड़े भोए ते चले जे ।

31 ते बेडर निस्तां एक्की होरि सेइं जोने लगे, “कि ए मैन्हु कोई एरू कम त नई लोरो केरने, कि एस मौतरी सजा दित्ती गाए, या कैदखाने मां रखवो गाए ।

32 अगिरप्पा राजे फेस्तुस सेइं ज़ोवं, अगर एनी मैने महाराजे कां फरयाद न भोथी कियोरी त ए छुट्टी सकतो थियो ।”

## 27

~~~~~

1 ज़ैखन फिस्तुस हाकिमेरे ज़िरिये ए बिस्तार बनो कि असां लोक ज़िहाजे मां इतालिया जो गाम, त पौलुस त होरे कैदी यूलियुस नंवे औगुस्तुस फौजी पलटनरे सरदाररे एक्की सूबेदाररे सुपुर्द किये ।

2 असां अद्रमुत्तियुम नगरेरां एक्की समुन्दरी ज़िहाजे मां च़ेदतां आसिया इलाकेरे नेडरे ठैरी गानेबाले थिये, त अरिस्तर्खुस नंवे थिस्सलुनीके नगरेरो अक मकिदुनी असन सेइं साथी थियो ।

3 होरसां ज़ैखन ज़िहाजे सैदा मां रुकी जेवं, त यूलियुसे पौलुसे पुइ महरबानी केरतां तैस अपने दोस्तन सेइं मुलाकात केरनेरी अजाजत दित्ती, ताके तैसेरे ज़िरिये सेइं पतो लगगे ।

4 तैट्टां फिरी असां ज़िहाजे मां च़ेदतां च़ले जे, ते साइप्रसेरे आडी मांमेइं निस्से, किजोकि हवा बड़ी ज़बरदस्त थी ।

5 फिरी किलिकिया नगरे ते पंफूलिया नगरेरे नेडे समुन्दरेरी बत्तां निस्तां अग्रोवं च़ले जे, त लूसिया इलाकेरे मूरा नगर मां ओस्से ।

6 तैडी सूबेदाररे सिकन्दरिया नगरेरू अक ज़िहाजे इतालिया इलाके जो च़लेरू मैल्लू, तैनी असां तैस मां चाढ़े ।

7 असां बडे दिहाइन तगर बल्हे-बल्हे अग्रोवं च़लते राए, ते कनिदुस नगरेरे सामने पुजे । पन तेज हवा च़लने सेइं असन अग्रोवं गानेरी मुशकिल भोइजेइ, ते एल्हेरेलेइ असां सलमानेरे सामने निस्तां करेतेरी आडी मां निस्से ।

8 ते वेडि मुशकली सेइं समुन्दरेरे बन्ने-बन्ने अग्रोवं च़लते शुभलंगरबारी नंवेरी एक्की ठैरी पुजे, ज़ैट्टां लसया नगर नेडू थियू ।

9 तैडी असन केही दिहाइ बीते, पैनेरे सफरे मां मुशकिल एल्हेरेलेइ भोती थी, कि छुटकारेरी दिहाइ तिहारेरे बरतेरे दिहाइ बीतोरे थी, ते पौलुसे तेन एन ज़ोइतां खबरदारी दित्ती,

10 “जनाब मीं एरू लगते कि इश्शू सफर बडू खतरनाक भोलू, कि न सिर्फ इश्शे माल सबाब ते ज़िहाजे बल्के इश्शी जानी भी खतराए ।”

11 पन सूबेदाररे कपताने ते ज़िहाजेरे मालिकेरी गल पौलुसेरी गल करां जादे मन्नी ।

12 किजोकि ते बंदरगह ठंढारो मौसम कटनेरे लेइ रोड़ी न थी, एल्हेरेलेइ इश्शो फैसलो ए थियो, कि असां केन्वी तरीके अग्रोवं निस्सम ते असन उमीद थी, कि फीनिक्स मां पुजतां हीवतंडेरो मौसम तैडी गुजैरी गामेले । ए करेते अक बंदरगह थी, जैसेरां दारां क्षिण-पश्चिम ते उत्तर-पश्चिम पासे खुलतां थियां ।

~~~~~

13 ज़ैखन दक्षिणी पासरां हवा च़लने लगी, त तैनेई सोचू कि तैन केरि मर्जी पूरी केरनेरे लेइ रोडो वक्ते, ते तैनेई ज़िहाजेरू लैंगर तैट्टां खडू कियू, ते समुन्दरेरे बन्ने अग्रोवं च़लते जे ।

14 पन लूशी अक बड़ी तूफानी हवा च़ली ज़ैस जो यूरकुलीन ज़ोतन ।

15 ज़ैखन तैने ज़िहाज़्र अपने पलैटटे मां कियू, ते ज़िहाज़्र दलैक्कां खाने लगू, ते असेई ज़िहाज़्र हावारे बहावे पुड़ छुड़ ।

16 तैखन कौदा नंवेरो अक निकडो टैपू अव, त असेई भी रुडते-रुडते तै डुंगी ज़ै ज़िहाज़्रे पत्तोरों बंधोरी थी, त वेडि मुशकली सेइ कैबू मां की ।

17 ते ज़िहाज़्रे टोलरे मैनेई तै उबरी च़ेदतां ज़िहाज़्र टलुटने करां बचनेरे लेइ रेस्सेइ सेइ बंधतां छुड़ । किजोकि तैन डर थियो, कि एरू न भोए, कि ज़िहाज़्र सुरतिसेरे रेती मां डुबी गाए, एल्हेरेलेइ तैनेई भारी सामान ओसालू ते ज़िहाज़्रे मां रुडते-रुडते च़ले जे ।

18 ज़ैखन तूफानी हवाई सेइ ज़िहाज़्र जादे दलैक्कां खाने लगू, त होरसां असेई ज़िहाज़रो माल समुन्द्रे मांजो शारनो शुरू कियो,

19 टलेइयोवं दिहाड़े तैनेई ज़िहाज़रू सामान भी समुन्द्रे मांजो शैरी छुड़ ।

20 त काई दिहाड़े न असेई दिहाड़ो लाव ते न तारे ते तूफान भी मन्ना जादे ज़ोर करने लगगोरो थियो, ते असन बचनेरी हुनी कोई उमीद न राई ।

21 रोट्टी खाने काई दिहाड़े भोर थिये, एल्हेरेलेइ पौलुसे तैन मां खड़े भोइतां ज़ोवं, “दलाव अगर तुसेई मेरू ज़ोनू मन्नोरू भोधू, ते क़रेते मरां अग्रोवं न ओरे भोधे, त ई नुकसान ते ई तकलीफ किजो भानी थी?”

22 “पन अव तुसन कां मिनत केरताई कि, हिम्मत न हारा तुसन मरां कोई भी न मरेलो, चाए ज़िहाज़्र डुबी किना गाए ।

23 किजोकि ज़ैस परमेशेरी अव आराधना केरताई, तैसेरो स्वर्गदूत हीज राती मीं कां ओरो थियो ।

24 ते तै ज़ोने लगो, हे पौलुस डर नन्ना तू महाराज़े कां ज़रूर पैश भोलो ते परमेशर तेरी वजाई सेइ एन सेम्बी केरि जान बचालो, ज़ैना ज़िहाज़्रे मां तीं सेइ साथी आन ।

25 एल्हेरेलेइ हे जनाव तुस हिम्मत रखा कि मेरे परमेशेरे ज़ैन किछ् मीं सेइ ज़ोरूए तैन्ने भोलू ।

26 असां ज़रूर केन्वी टैपू पुड़ पुज़ी गामेले ।”



27 च़ेवधोवं राती ज़ैखन असां अदिरया समुन्द्रे मां इरां उरां फिरते थिये, त ज़िहाज़्रे बाले मैनेई अंदाज़ो लाव कि असां बन्नेरे नेड़े पुज़ी जोरेम ।

28 तैनेई पानी रेसी सेइ नापू त 37 मीटर निससू ते थोड़े अग्गर गेइतां नापू त 27 मीटर निससू ।

29 एस डरे सेइ कि कोस्कोई शफ़ड़ी सेइ न बज्म, ते तैनेई ज़िहाज़्रे पैतरी पासे च़ेवरे लैंग्रां समुन्द्रे मां छुड़ां ते झेझेरे लौअरे लेइ प्रार्थना करने लगे ।

30 ज़िहाज़्र च़लानेवाले मुझाटेरां वेइरोवं निसनेरे लेइ डोगी उन्दी ओसाली । पन तैना ज़िहाज़्रे एग्री पासेरां लैंग्र पैनी मां छुड़नू चाते थिये ।

31 तैखन पौलुसे सूबेदारे ते सिपेहिन सेइ ज़ोवं, “अगर इना लोक ज़िहाज़्रे मां न भोले त तुशू लोकां केरू बचनू मुशकले ।”

32 एल्हेरेलेइ सिपेहीयेइं डूगारी रेस्सी केटतां समुन्द्रे मांजो शैरी दित्ती ।

33 झेझ भोने करां पेइले पौलुसे सेबन कां मिनत कमाई, कि तुस किछ् रोट्टी खाथ । तैनी ज़ोवं, “तुस च़ेवधे दिहैडी केरे देते बचनेरे खियाले मां पेवरेथ, ते तुस रोट्टी सेइ हुरोरे भी नई ।

34 अव तुसन कां मिनत केरताई कि तुस रोट्टी खाथ, किजोकि तुशो लेइ रोडू एन्ने कि याकीन केरा कि तुशो बाल बिंगो न भोलो ।”

35 ज़ैखन तैनी एन ज़ोवं, त तैनी रोट्टी टलाई ते सेम्बी केरे सामने परमेशेरू शुकर केरतां टलोडी ते खाने लगे ।

36 तैस करां लेइतां होरन भी हिम्मत आई, ते तैना भी रोट्टी खाने लगे ।

37 असां सब मिलतां कोई 276 मैन्हु थिये, ज़ैना इस ज़िहाज़्रे मां सुवार थिये ।

38 जैखन तैनेई रेजतां रोट्टी खाइ त तैनेई सारे गेहुं समुन्दरे मांजो शारने शुरू किये, ताके जिहाज पोल्नु भोए ।

39 जैखन दिहाजो निस्सो त तैनेई तै ठार न पिशानी, पन अक ठार लाई ते तै पासो साफ थियो, तैनेई बिस्तार कमाव कि अगर भोइसखे त असां जिहाज एस पुइ च्चादम ।

40 बस्सा लैगर खोलतां समुन्दरे मां छैडी दित्तू, ते पत्रवारां केरि रेसी भी दिल्ली छैडी, एग्रीयों बादबांन भी वा चैदी छुड्डो, ते एप्पू बन्नेरे पासे जो चले ।

41 पन जिहाज खुशकी पुइ गेइतां रेती पुइ टिकी जेवं, ते जिहाजेरो एग्रीयों पासो रेती मां डुबी जेवं ते पैतरीयों पासो छेल्लेई सेइं बज्जकने लगो ।

42 सिपेही केरि सल्लाह थी कि कैदन मारम ताके तैन मरां कोई तारी देइतां नेशी न गान ।

43 पन सूबेदारे पौलुसेरी जान बच्चानेरे लेइ एन न दित्तू केरने, ते हुक्म दित्तो कि जै तारी जानते त तै पेइलो छाल मारे, ते खुशकी पुइ पुजतां अपनि जान बच्चाए ।

44 ते बाकी होरे लेकडारे तखतन पुइ ते जिहाजेरी होरि चीजां केरि मइती सेइं अपनि जान बच्चाथ, ते बस्सा सब एस तरीके सेइं खुशकी पुइ ठीक टाक पुजी जे ।

## 28

?????? ?????? ??? ??????

1 जैखन असां ठीक टाक बन्ने पुइ पुजे, त असन पतो चलो कि इस टैपू जो माल्टा ज़ोतन ।

2 तैटठेरे राने बालेई असन सेइं बड़ो रोडो बर्ताव कियो, झड़ी लगगोरी थी, ते ठंड भी बड़ी थी, तैनेई अग बाली ते इशशी बड़ी आदर कमाई ।

3 पौलुसे कैडु केरो अक लेगगु बनावं, ते जैखन तै तैना कैडु अगगी मां छुड्डने लगो त अगारे सेके सेइं तैन कैडन मरां अक सप निस्सो, ते पौलुसेरे हथ्थे सेइं पलेटोव ।

4 जैखन तैन लोकेई सप पौलुसेरे हथ्थे सेइं पलेटोरो लव, त एप्पू मामेई ज़ोने लगे, “ए मैन्हु ज़रूर कोई खूनी आए, ए समुन्दरे मां गर्क भोने करां त बच्चोरोए, पन इन्साफि ए ज़ीतो न राने न दित्तो ।”

5 पन तैनी तैस सप्पे अगगी मांजो घिल देइतां टलटटो, ते तैस किछ नुकसान न भोव ।

6 तैना लोक बलगने लगगोरो थिये, कि एसेरी सारी जान एफरी गानीए ते ए मेरि गानोए, ते बड़े चिरे तगर बलगनेरे बाद पौलुसे किछ न भोवं, त तैना लोक सोचने लगे, “ए ज़रूर कोई देबतोए ।”

7 तैस टैरारे आसे-पासेरे टैपेरी प्रधान पुबलियुसेरी ज़मीन थी, तैनी असां अपने घरे ने ते ट्लाई दिहाड़े इशशी आदर खातर की ।

8 पुबलियुसेरे बाजी भुखार ते पैचसी सेइं बड़ो बिमार भोरो थियो, ते पौलुसे तैस कां गेइतां तैसेरेलेइ प्रार्थना की, ते तैस पुइ हथ रेखतां तै बच्चाव ।

9 फिरी तैस टैपेरे बाकी बिमार लोक आए ते तैना ठीक भोइ जे ।

10 तैन लोकेई इशशी बड़ी इज्जत की, ते असां तैटटां अग्रोवं गानेरे लेइ तियार भोए, त तैनेई इशशी ज़रूरतरी सैरी चीजां जिहाजे मां छैडी दित्ती ।

?????? ?????? ????? ??????? ?????

11 इशशू जिहाज बिगडनेरे टलेइ महिना बाद असां सिकन्दरियारे एक्की जिहाजे मां चले जे, जैन ठंड मुकने तगर तैस टैपू मां रुकेरु थियूं, तैस मां यूनैनी केरि दूई अकोट्टी देबतेरी मूरतां बनोरी थी ।

12 पेइले असां सुरकूसा नगरे मां पुजे, ते ट्लाई दिहाड़े तैड़ी राए ।

13 तैटटां असां चलते-चलते रेगियुम नगरे मां पुजे, ते होरसां दक्षिणी हवा चलने लगी ते असां होरसां पुतियुली नगरे मां पुजे ।

14 तैड़ी असन किछ दूला भी मैल्ले, तैनेई असां कुजाए ते असां तैड़ी सत दिहाड़े राए, ते तैसेरां बाद असां रोमे मां पुजे ।



15 तैट्ठेरे मसीही दलान पतो लगो, कि असां ओरेम त तैना असन अगराने अप्पियुसेरे चौके ते ट्लेइ धर्मशालन तगर आए, पौलुसे तैना लेइतां परमेशेरे शुकूर कियूं ते तैस बड़ी हिम्मत भोइ ।

16 जैखन अस रोम नगरे मां पुजे ते पौलुसे अजाजत मैल्ली, कि तै एककी पैरहेदारी निगरेनी मां जैड़ी चाए गेइ सकते ।

\*\*\*

17 जैखन ट्लाई दिहाइ बीते त पौलुसे यहूदी केरे प्रधान कुजाए, ते जैखन तैना अकोटटे भोए त पौलुसे तैन सेइं ज़ोवं, “दलाव मीं अपनि कौमरे ते अपने दादे-पड़दादां केरि रसमरे खलाफ कोई कम नई कियेरू त फिर भी अवं पाबंद केरतां यरूशलेम नगरे मां रोमी सरकारारे हवाले कियो ।

18 तैनेई पुछ्गन केरनेरे बाद अवं हथरां छडनो थियो । किजोकि मीं कोई एरू कम न थियूं कियेरू कि जैस सेइं मीं मौतरी सजा देथे ।

19 पन जैखन यहूदेई मुखालफत की, त मीं महाराजे कां बिनती की । पन एल्हेरेलेइ नई कि अवं अपनि कौमी पुड़ कोई इलजाम लांनो चातो थियो ।

20 एल्हेरेलेइ मीं एन रोडू समझू, कि तुसन सेइं मिलतां गल केरि, अवं इस्राएलेरी एककी उमीदी जै मसीह आए शांगलन सेइं बंधोरोइं ।”

21 तैनेई तैस सेइं ज़ोवं, “असन यहूदन करां न कोई चिट्ठी मैल्ली ते न तैट्ठां एजनेवाले इश्शे लोकेई तेरे बारे मां कोई खबर दित्ती, ते न तेरे खलाफ किछ् ज़ोवं ।

22 पन असां तेरे बारे मां ज्ञाननू चातम, ए त असन पत्तोए, कि लोक सेव्भी टैरन एस पंथेरे खलाफ गल्लां केरतन ।”

23 तैखन यहूदी लोकेई पौलुसेरी गल्लां शुन्नेरे लेइ अक दिहाड़ी टुवहलाई, जैखन तै दिहाड़ी आई, त लोक पेइले लोकन करां भी जादे अकोटटे भोए । पौलुसे तैन परमेशेरे राज्जेरे बारे मां समझाव, ते साथी यीशुएरे बारे मां मूसेरे कानूने ते नेबी केरे किताबन मरां तैन रोडेचारे समझेइतां झेझां करां इलोझी तगर गल्लां शुनातो राव ।

24 किछ् तैसेरी गल्लां शुन्तां मघन भोइ जे ते मन्नु ते किछ्ई विश्वास भी कियो ।

25 जैखन तैना एप्पू मांमेइं अक न भोए, त पौलुसे तैन गाने करां पेइले अक गल ज़ोई, “पवित्र आत्मारें ज़िरिये यशायाह नबी तुश्शे दादे-पड़दादां केरे बारे मां ठीके ज़ोरू थियूं ।”

26 एन लोकन कां गा, ते एन ज़ो कि,

“तुस शुन्ते त राले, पन समझले न,

ते तुकते त राले पन पिशानेले न ।

27 किजोकि एन लोकां केरे दिले मोट्टे भोरारेन,

ते एना टोव्ने भोरारेन,

ते एनेई अपनि एछ्छी निकोल कियोरिन ।

किजोकि एरू न भोए,

कि एना लहन ते कन्न सेइं शुन्न ते दिले सेइं समझन,

ते एना मेरे पासे फिरन ते अवं एन शिफ्रा देई ।

28 “एल्हेरेलेइ अवं चाताई कि तुस ज्ञानथ कि परमेशेरी मुक्ति गैर कौमन कां भी भेजोरोए ते तैना तैस शुनेले ।”

29 जैखन पौलुसे एन ज़ोवं, त यहूदी एप्पू मांमेइं बेंस केरते तैट्ठां ब्रले जे ।

30 पौलुस पूरे दूई सालन तगर करेइयेरे मुकाने मां राव,

31 ते जै भी तैस सेइं मिलने एइतो थियो, पौलुस तैस सेइं मिलतो थियो, ते बेधइक भोइतां परमेशेरे राज्जेरी खुशखबरी शुनातो थियो, ते प्रभु यीशु मसीहेरे बारे मां शिक्षा देतो राव ।

## रोमियो

ॐॐॐॐॐॐॐॐ

1 अवं पौलुस यीशु मसीहेरो दास आई, ते प्रेरित भोनेरे लेइ परमेशेरे चुनोरोई, ते परमेशेरी खुशखबरी प्रचार केरनेरे लेइ ठहरावरो आई ।

2 जेसेरी तैने पेइले अपने नेवी केरे जिरिये पवित्तरशास्त्रे मां,

3 अपने मट्टे इश्शे प्रभु यीशुएरे बारे मां वादो कियोरो थियो, जै जिसमेरे मुताबिक त दाऊदेरे खानदाने मरां पैदा भोव ।

4 ते पवित्तर आत्माके जिरिये सेइं मुड्दन मरां जीतो भोनेरे वजाई सेइं ते शक्ति सेइं परमेशेरे मट्टू भोव ।

5 जेसेरे जिरिये असन अनुग्रह ते प्रेरिताई मैल्ली; कि तैसेरे नब्बे सेइं सब कौमां केरे लोक विश्वास केरतां तैसेरी मन्न ।

6 जैन मरां तुस भी यीशु मसीहेरे भोनेरे लेइ कुजोरेथ ।

7 अवं ई चिट्ठी तुश्शे सेब्भी केरे नब्बे लिखताई, जैना तुस रोम नगरे मां रातथ, ते परमेशेरे टलारेथ, ते पवित्तर भोनेरे लेइ चुनोरेथ । इश्शे बाजी परमेशर ते प्रभु यीशु मसीहेरे तरफां तुसन शान्ति ते अनुग्रह मैलतो राए ।

ॐॐॐॐॐॐॐॐ ॐॐॐॐॐॐॐॐ

8 पेइलो अवं तुश्शे सेब्भी केरे लेइ यीशु मसीहेरे जिरिये परमेशेरे शुक्र केरताई, किजोकि तुश्शो विश्वास जै यीशु मसीह पुइ आए, तैसेरी चर्चा हर पासे भोने लोरी ।

9 परमेशर जेसेरी सेवा अवं अपने पूरे दिले सेइं तैसेरे मट्टेरी खुशखबरी प्रचार केरतां केरताई, ते मेरो गवाहे; कि अवं तुसन कोस तरीके सेइं लगातर प्रार्थनाई मां याद केरताई ।

10 ते लगातर अपने प्रार्थनान मां बिनती केरतो राताई, कि केन्चरे हेजू भी तुसन कां एजनेरे लेइ मेरू सफर परमेशेरे तरफां कामयाब भोए ।

11 किजोकि अवं तुसन सेइं मिलनेरे लेइ कोशिश केरताई, कि अवं तुसन कोई आत्मिक वरदान देई, जैस सेइं तुस विश्वासे मां मजबूत भोथ ।

12 मतलब इन, कि अवं तुसन कां एइतां तुसन सेइं साथी तैस विश्वासेरे जिरिये, जै मीं मां ते तुसन मांए, तैसेरे जिरिये अस हिम्मत हासिल केरम ।

13 ते दूलाव ते बेइनव, अवं चाताई तुस ज्ञानथ, कि मीं तुसन कां बार-बार एजनु चाव । जेन्चरे मीं गैर कोमरे लोकन विश्वास केरनेरे लेइ बद्धनेरी मद्दत की, तेन्चरे तुश्शी भी मद्दत केरि, पन हुना तगर रुकोरो राव ।

14 अवं संस्कारी लोकन ते असंस्कारी लोकन, पढोरे लोकन या अनपड लोकन सेब्भन खुशखबरी शुनेइलो ।

15 ते अवं तुसन भी जैना रोम नगरे मां रातथ, खुशखबरी शुनानेरे लेइ हर वक्त तियार आई ।

ॐॐॐॐॐॐॐॐ ॐॐॐॐॐॐॐॐ

16 किजोकि अवं यीशु मसीहेरी खुशखबरी प्रचार केरने करां न शरमेई, एल्हेरेलेइ परमेशर अपने शक्ति सेइं तैन लोकन मुक्ति देते, जैना खुशखबरी पुइ विश्वास केरतन, पेइले यहूदन फिरी गैर यहूदन ।

17 किजोकि खुशखबरे जिरिये परमेशर असन अपने नजरी मां धर्मी बनाते, जैन शुरू करां आखरी तगर विश्वासे सेइं भोते । जेन्चरे पवित्तरशास्त्रे मां लिखोरूए, “जै मैन्हु विश्वासेरे जिरिये सेइं परमेशेरे सामने धर्मी बनाव गाते तैए जीतो रालो ।”

ॐॐॐॐॐॐॐॐ ॐॐॐॐॐॐॐॐ

18 परमेशेरो कुरोध तैन लोकन पुड़ स्वर्गोरां एइते, जैना बुरां ते दुष्टेरां कम्मां केरतन, ते जैना सच्चे अधर्मे सेइं दबेइतां रखतन।

19 किजोकि परमेशेरे बारे मां ज्ञान तैन मैन्हु केरे मन्न मां बांदूए, एल्हेरेलेइ कि परमेशेरे तैन पुड़ बांदू कियोरूए।

20 किजोकि तैसेरे आहरे गुण, मतलब तैसेरी सदारी शक्ति, ते परमेशेरो सुभाव दुनियाई बनानेरे वक्तेरे देंतो तैसेरे कम्मन सेइं हेरने मां एइते, इड़ी तगर कि तैन लोकन कां कोई बहानो नई।

21 हांलाकि तैनेई परमेशेर त पिशातो, पन परमेशेरी तैस काबल बडयाई न की, ते न शुकर कियूं, पन बेकार सोचने लाए, इड़ी तगर कि तैन केरो बेअक्ल मन आंधरो भोव (मतलब तैना गलत सोचने लगे)।

22 तैना अपने आपे अक्लमन्द सेमझतां बेवकूफ बने।

23 ते न मरने वाले परमेशेरी महिमा मरने वाले मैन्हु, ते चुडोलू ते जानवरां, ते पेटेरे भारे चलने वाले जीपां केरे मूरतन मां बदली।

24 एल्हेरेलेइ परमेशेरे तैना तैन केरे मनरे खुवैइशां केरे मुताबिक अशुद्ध भोनेरे लेइ शारे कि, एप्पू मांमेइं अपने जानां केरी अनादर केरन।

25 किजोकि तैनेई परमेशेरी सच्च्चाई वेदलतां झूठ बनाई, ते सृष्टारी पूजा ते आराधना केरि, न कि तैस बनाने वालेरी, जै हर वक्त धन ते रोड़ोए। आमीन।

26 एल्हेरेलेइ परमेशेरे तैना नीच खुवाइशन मां शारे, इड़ी तगर कि तैन केरि कुआन्शेई भी स्भाविक कम्मां वेदलतां तैन केरे जैना स्भाविक आन तैन केरे खलाफ बदला।

27 तेन्त्रे तैन केरे मडद भी कुआन्शन सेइं सुभाविक कम्मां शैरतां एप्पू मांमेइं गंदे कम्मन मां मसत भोए, मतलब कि मडदेइं, मडदन सेइं रिशतो रेखतां प्रभु करां ठीक बदलो नेव।

28 ते तैनेई इन जेइज न समझू कि परमेशेरे कबूल केरन, एल्हेरेलेइ परमेशेरे भी तैना तैन केरे मनरे हालती पुड़ शारे; कि बुरां कम्मां केरन।

29 ते तैना हर किसमेरे अधर्मे, दुष्टे, लालचे, बैरे सेइं भेरोई जे; ते कपट, ते खून केरनो, ते लड़ाई केरनि, ते धोखो देनो, ते जलनी सेइं भेरोए, ते चोगलखोर,

30 बदनाम केरनेवाले, परमेशेरे सेइं नफरत केरनेवाले, जैन केरि इज्जत केरी लोड़ तैन केरि इज्जत न केरनेवाले, घमण्डी, बडकां मारनेवाले, बुरी-बुरी गल्लां बनाने वाले, अम्मा बैपू केरो हुक्म न मन्नेवाले।

31 बेवकूफ, धोखो देनेवाले, सच्च्चे प्यारे करां खाली, दया न केरनेवाले भोइजेइ।

32 हालांकी तैना परमेशेरो ई हुक्म ज्ञातन, कि एरां जेरां कम्मां केरनेवाले मौतरे सजारे लाइकन, फिरी भी न सिर्फ एप्पू एरां कम्मां केरतन बल्के एरां कम्मां केरनेवालन सेइं भी खुश भोतन।

## 2

### ??????????

1 एल्हेरेलेइ हे दोष लाने वाला, तू कोई की न भोस; तीं कां कोई बहानो नई, किजोकि जैस गल्लरो तू होरन पुड़ दोष लातस, तैस्से गल्ली पुड़ तू अपनो आप भी दोषी बनातस, एल्हेरेलेइ तू एप्पू भी तैन्ने कम केरतस।

2 ते अस ज्ञानतम कि, जैना एरां कम्मां केरतन परमेशेर तैन केरो इन्साफे केरतां तैन सजा देते।

3 ते हे मैन्हु, तू जै बुरां-बुरां कम्मां केरनेवालन पुड़ दोष लातस, ते एप्पू भी तैन्ने कम केरतस; कुन तू समझतस, कि तू परमेशेरे सजाई करां बचेलो?

4 कुन तू परमेशेरी कृपा, ते बरदाश केरनु, ते सबरारू धन घटया समझतस, ते कुन इन न समझस, कि परमेशेरी कृपा तीं पापन करां मन फिरानो शिखालतीए?

5 पन त् ज़िद्दी आस ते अपने पापन करां मन फिरानेरो इन्कार केरतस, ज़ैस दिहाड़े परमेशर अपनो क्रोध हिरालो, तैस मां परमेशरेरो सच्चो इन्साफ बांदो भोलो, त परमेशर तेरो रोड़ेचारे इन्साफ केरेलो।

6 परमेशर हर एक्की तैसेरे कम्मां केरे मुताबिक बदलो देलो।

7 ज़ैना लोक रोड़ां कम्मां केरतां परमेशरेरी तरफां मैलने बैली महिमा, ते आदर, ते कधे न खतम भोने बाली ज़िन्दगरे तोपी मां रातन, परमेशरे तैन हमेशारी ज़िन्दगी देलो।

8 पन ज़ैना खुदगरज़न, ते सच्चे न मन्नेवालेन, बल्के बुराई केरनि चातन, तैन पुड़ परमेशरेरो क्रोध, ते कोप एज्जेलो।

9 ते मुसीबत ते दुःख हर एक्की मैन्हु पुड़ एज्जेलो ज़ै बुराई केरते। परमेशर पेइलो यहूदी लोकां केरो इन्साफ केरेलो फिरी गैर यहूदी लोकां केरो इन्साफ केरेलो।

10 हर अक मैन्हु ज़ै रोड़ां कम्मां केरते तैस महिमा, आदर, ते शान्ति मैलेली, पन परमेशर इना सैरी चीज़ां पेइले यहूदी लोकन देलो फिरी गैर यहूदी लोकन।

11 किजोकि परमेशर केन्चेरी तरफदारी न केरे।

12 एल्हेरेलेइ कि ज़ैन गैर कौमारे लोकेई बगैर मूसेरो कानून मेलतां पाप कियो, परमेशर तैन बगैर मूसेरो कानूने सज़ा देलो, ते ज़ैनेई मूसेरो कानून मेलतां पाप कियो, परमेशर तैन सज़ा भी मूसेरे कानूनेरे मुताबिक देलो।

13 किजोकि परमेशरेरे नज़री मां मूसेरो कानून शुनेने वाले धर्मी नई, बल्के मूसेरे कानूने पुड़ च़लने वाले धर्मी ठहराए गानेन।

14 फिरी ज़ैखन होरि कौमां केरे लोक ज़ैन कां मूसेरो कानून नई, सुभावे सेइं किछ् मूसेरे कानूनेरे गल्लन पुड़ च़लतन, ते मूसेरो कानून तैन कां न भोनेरे बावजूद भी अपने लेइ एप्पू कानून आन।

15 तैना इन हिरातन कि परमेशरेरो कानून तैन केरे दिलन मां लिखोरोए, ते तैन केरे ज़मीर भी इस गल्ली पुड़ गवाही देतन, किजोकि तैन केरे अपने खियाल भी तैन पुड़ दोष लातन या बेइलज़ाम ठहरातन।

16 एरू तेइस भोलू ज़ेइस परमेशर ज़ै खुशखबरी मीं शुनावरीए तैसेरे मुताबिक यीशु मसीहेरे ज़िरिये मैन्हु केरि छेपारी गल्लां केरो इन्साफ केरेलो।

### ????? ?? ?????? ?????

17 तू एप्पू जो यहूदी ज़ोतस, ते मूसेरे कानूने पुड़ तेरो विश्वासे, ते तू अपने आपे पुड़ घमण्ड केरतथ, कि तू परमेशरेरो खास मैन्हु आस।

18 ते तू परमेशरेरी मर्ज़ी ज़ानतस, ते तू इन भी ज़ानतस कि कोनां गल्लां रोड़ी आन, किजोकि तीं इना गल्लां केरू ज़ान मूसेरे कानूने करां मैलोरिन।

19 ते तू भरोसो रखतस, कि तू कान्न परमेशरेरी बत हिरानेबालोस, ते ज़ैना आंधरे मां आन तैन केरे लेइ लोअरो ज़ेरे आस।

20 ते बेअक्लन शिखालने बालोस, ते बच्चां केरो उस्तादातस, ते तीं पक्को पतो कि परमेशरेरो कानून तीं पूरू ज़ान ते सच्च़ाई शिखालते।

21 ते ज़ैन तू होरन शिखालतस, अपने आपे की न शिखालस? तू होरन शिक्षा देतस कि च़ोरी नई केरनि, कुन तू च़ोरी केतस?

22 तू ज़ै ज़ोतस, “बदमाशी नई केरनि,” कुन तू बदमाशी केरतस? तू ज़ै मूरतन सेइं नफरत केरतस, कुन तू मन्दरन लुटतस?

23 तू ज़ै घमण्ड केरतस कि तू परमेशरेरे कानूने ज़ानतस, एप्पू किजो कानून न मेन्तां, परमेशरेरी तुहीन केरतस?

24 “किजोकि तुश्शे यहूदी लोकां केरे वजाई सेइं गैर कौमन मां परमेशरेरे नब्बेरी तुहीन भोतीए,” एल्हेरेलेइ पवित्रशास्त्रे मां एरू लिखोरूए।

25 अगर तू मूसेरे कानून पुड़ च़लस, त खतनो कराने सेइं तीं फैइदो त आए, पन अगर तू मूसेरो कानून न मन्स त तीं मां ते तैस मां, ज़ेसेरो खतनो नईं भोरो कोई फर्क नईं ।

26 ते अगर कोई मैन्हु ज़ेसेरो खतनो न भोए भोरो, त तै मूसेरे कानून पुड़ च़ले, त परमेशेरे लेइ ते मैन्हु ते ज़ेसेरो खतनो भोरोए दुइये बराबर आन ।

27 ते ज़ैस मैनेरो खतनो नईं भोरो, अगर तै मूसेरे कानून पूरू केरे, त तै तीं दोषी ठहरालो । किजोकि तीं कां मूसेरो कानून ते तेरो खतनो भी भोरोए, पन फिरी भी तू कानून पुड़ न च़लस ।

28 किजोकि सच्चो यहूदी तै नईं ज़ेसेरू ज़र्म यहूदन मां भोरू या ज़ेसेरो खतनो भोरोए ।

29 बलके सच्चो यहूदी तैए, ज़ेसेरो मन परमेशेरे कां सच्चोए, ते सच्चो खतनो तैए ज़ै पवित्तर आत्मारें कम्मां केरे ज़िरिये दिलेरो भोरोए, न की मूसेरो कानून मन्ने सेइं भोरोए । एरे लोकां केरि बड़याई लोक नईं बल्के परमेशेर एप्पू केरते ।

### 3

1 (किछ़ लोक पुछ़तन) यहूदी केरि कुन बड़याई, या खतनेरो कुन फैइदो?

2 हर किसमे सेइं बड़़ किछ़ । पेइलू त इन कि सारू परमेशेरू वचन तैन सोंफू ।

3 अगर किछ़ यहूदी परमेशेरे कां ईमानदार न निस्से त कुन भोवं? कुन तैन केरे ईमानदार न राने सेइं परमेशेर तैन केरे लेइ अपने वादे पूरे करने मां झूठो भोव?

4 नईं, कधे नईं! बल्के परमेशेर हमेशा सच्च ज़ोते, ते हर अक मैन्हु झूठो भोव, ज़ेन्चरे पवित्तरशास्त्रे मां परमेशेरे बारे मां लिखोरूए,

“ज़ैस सेइं तू एपनी गल्लन मां धर्मी भोस,

ते इन्साफेरे वक्ते तीं ज़ींत मैल्ले ।”

5 अगर इश्शां बुरां कम्मां परमेशेरी धार्मिकता ठहराते, त अस कुन ज़ोम? कुन इन कि परमेशेर क्रोध केरते ते असन सज़ा देते । (इन अवं इन्सानेरी रीति पुड़ ज़ोताई) ।

6 नईं, कधे नईं! अगर परमेशेर इश्शो यहूदी केरो इन्साफ रोड़े च़ारे न केरेलो, त तै किजो दुनियारो इन्साफ केरेलो?

7 किछ़ ज़ोतन, अगर मेरे झूठेरे वजाई सेइं परमेशेरी सच्च़ाई बांदी भोतीए ते तैसेरी महिमा भोतीए, त फिरी किजो पैपी केरो ज़ेरो मीं पुड़ हुक्म दित्तो गाते?

8 “एज्जा, अस बुराई केरम, कि इस सेइं भलाई पैदा भोए?” पन असन पुड़ दोष भी लव गाते, ते केत्रे ज़ोतन, कि एन केरू भी एने ज़ोनू आए । पन एरे ज़ेरेन पुड़ दोष लानो ठीक आए ।

~~~~~

9 त फिरी अस कुन ज़ोम? कुन अस यहूदी होरन करां रोडेम? नईं, कधी नईं; किजोकि असेईं यहूदी लोकन पुड़ ते गैर यहूदी लोकन पुड़ ईं दोष लोरोए, कि तैना सारे पापेरे कब्जे मां आन ।

10 ज़ेन्चरे पवित्तरशास्त्रे मां लिखोरूए,
“कोई परमेशेरे सामने धर्मी नईं, अक भी नईं ।

11 कोई सच्चे समझदार नईं,
कोई परमेशेरे तोपने बालो नईं ।

12 सारे परमेशेरे करां दूर भोरिन, सारे निकम्मे बनोरिन,
कोई भलाई करनेवालो नईं, अक भी नईं ।

13 तैन केरू गाल खुल्ली कबरे,
तैनेईं अपने ऐशी सेइं धोखो दित्तो,
तैन केरे ओठन पुड़ सप्पां केरू ज़ेरे ।

14 ते तैन केरू भाषण लानती, ते टलिटे सेइं भेरतांए ।

15 तैन केरे पव खून केरने लेइ तेज़न ।

16 तैना जेरां भी गातन तुबाही ते कलेश तैन पत्ती गाते ।

17 तैन न ज्ञानन् श्रैन्ति सेइं केन्चरां ज्रीतन ।

18 तैन मां परमेशेरो डर बिलकुल भी नई ।”

19 अस ज्ञानतम, कि मूसेरो कानून जैन किछ ज़ोते, तैन्ने सेइं ज़ोते, जैना तैस मन्तन, एल्हेरेलेइ कि केन्ची कां कोई बहानो न भोए, ते सारी दुनिया परमेशेरे सज़ारे लायिक भोए ।

20 किजोकि मूसेरे कानूनेरे मुताबिक कम्मां केरने सेइं कोई मैन्हु परमेशेरे सामने धर्मी नई भोनो, एल्हेरेलेइ कि मूसेरे कानूने सेइं पिशान भोतीए कि अस पापी आम ।

~~~~~

21 पन हुनी बगेर मूसेरो कानून मन्ने सेइं तै धार्मिकता बांदी भोरीए जै परमेशेरे तरफां एइतीए, ज़ेसेरे बारे मां मूसेरे कानूने ते नेबी केरि किवातन मां लिखोरूए ।

22 मतलब परमेशेरी तै धार्मिकता जै यीशु मसीह पुइ विश्वास केरनेवालां केरे लेइए; किजोकि तैन मां किछ भेद भाव नई ।

23 एल्हेरेलेइ कि सेब्भेई पाप कियो, ते तैस महिमा करां दूर आन जै परमेशर देते ।

24 पन परमेशेरे अपने अनुग्रहे सेइं अस पापां केरि सज़ाई करां यीशु मसीहेरे ज़िरिये छुटाए ते मुफ्ते मां धर्मी ठहराए ।

25 परमेशेरे मसीहेरे खूनेरे वजाई सेइं अक एरो छुटकारो ठहराव, जै विश्वास केरने सेइं फैइदामंद भोते, कि जैना पाप पेइले केरे, ते जैना परमेशेरे अपने बर्दाशती सेइं टाले; तैन केरे बारे मां तै अपनि धार्मिकता बांदी केरते ।

26 बल्के इस्से वक्ते तैसेरी धार्मिकता बांदी भोए; कि जैस सेइं तै एप्पू धर्मी ठहरे, ते जै यीशु पुइ विश्वास केरे, तैसेरो धर्मी ठहराने बालो भोए ।

27 ते घमण्ड केरनू कोइ राव? तैसेरी त ठारे नई । कोस कानूनेरे वजाई सेइं? कुन मूसेरो कानून मन्ने सेइं? नई, बल्के विश्वासेरे वजाई सेइं ।

28 एल्हेरेलेइ अस ज्ञानतम, कि मैन्हु मूसेरो कानूनेरे मुताबिक कम्मां केरनेरे बगेर यीशु मसीह पुइ विश्वास केरने सेइं धर्मी भोते ।

29 कुन परमेशर सिर्फ यहूदी केरोए? कुन गैर कौमां केरो नई? हाँ गैर कौमां केरो भी आए ।

30 किजोकि अक्के परमेशेरे, जै खतने बालन भी विश्वासे सेइं, ते जैन केरो खतनो नई भोरो तैन भी विश्वासे सेइं धर्मी ठहरालो ।

31 ते कुन अस विश्वासे सेइं मूसेरे कानूने रद केरतम? नई, कधे नई; बल्के मूसेरे कानूने बनोरू रखतम ।

## 4

~~~~~

1 त अस कुन ज़ोम, कि इश्शे पूर्वज अब्राहमे कुन मैल्नू?

2 किजोकि अगर अब्राहम रोइ कम्मन सेइं धर्मी ठहरावरो भोथो, त तैस घमण्ड केरनेरी ठार भोथी, पन रोइं कम्मां केरू घमण्ड परमेशेरे सामने नई ।

3 पवित्रशास्त्र कुन ज़ोते, इन कि “अब्राहमे परमेशेरे वादन पुइ विश्वास कियो, ते तै तैसेरेलेइ धार्मिकता गनो ज़ेव ।”

4 कम केरनेवालेरी मज़दूरी देनी दान नई, पन हक समझू गाते ।

5 पन जै (पुन्नेरू) कम न केरे बल्के पापी मैन्हु धर्मी ठहराने बाले पुइ विश्वास केरते, तैसेरो विश्वास तैसेरेलेइ धार्मिकता गनो गाते ।

6 जैस परमेशर बगेर (पुन्नेरे) कम्मां केरे धर्मी ठहराते, तैस दाऊद भी धन ज़ोते ।

7 “धने तै ज़ेसेरे अधर्म माफ़ भोए,

ते जैन केरे पाप ढके जे ।

8 धने तै मैन्हु जैस परमेशर पापी न ठहराए ।”

9 ते इन धन ज़ोनु, कुन खतने बालां केरे लेइ आए, या ज़ैन केरो खतनो नई भोरो तैन केरे लेइ भी आए? अस पवित्रशास्त्रे मरां ज़ोतम, “अब्राहमे परमेशेरे वादन पुइ विश्वास कियो ते तै तैसेरेलेइ धार्मिकता गनो जेव ।”

10 इन तैसेरो खतनो भोने करां पेइलू भोव न कि खतनो भोनेरे बाद ।

11 परमेशेरे तै पेइलो कबूल कियो ते धर्मी ठहराव, ज़ेइस हेजू तैसेरो खतनो न थियो भोरो, ते तैस खतनेरो निशान मैलो, कि तैस धार्मिकता पुइ छाप भोए, किजोकि तै तैन सेम्भी केरो (आत्मिक) बाजी ठहरे ज़ैना विश्वास त केरतन पन तैन केरो खतनो नई भोरो । तैना भी तैन केरे विश्वासेरे वजाई सेइ धर्मी भोन ।

12 ते ज़ैन केरो खतनो भोरोए तैन केरो पूर्वज भोए, ज़ैन केरो न सिर्फ खतनो कियोरोए, पन ज़ैन इश्शे पूर्वज अब्राहमेरो ज़ेरो विश्वास आए, ज़ै तैनी बगैर खतनेरी हालती मां कियोरी थियो ।

XXXXXXXXXXXXXXXXXXXX

13 परमेशेरे अब्राहमे ते तैसेरे वंश सेइ वादो कियोरो थियो कि तैना दुनियारे बारस भोले । ई वादे एल्हेरेलेइ नई दित्तोरो कि अब्राहमे मूसेरो कानून मन्नो, बल्के तैसेरो विश्वास ज़ै परमेशेरे पुइ थियो तैसेरे वजाई सेइ तै धर्मी ठहराव जेव ।

14 ज़ै वादो परमेशेरे दित्तोरो थियो कि तैना दुनियारे बारस भोले अगर मूसेरो कानून मन्ने सेइ आए, त फिरि विश्वास बेमतलब, ते वादो बेकार भोव ।

15 परमेशेरे तैस पुइ क्रोध केरते ज़ै कानूने रोडे चारे न मन्ने, ते ज़ैडी कानून नई, तैडी तैसेरू टलोइनू भी नई ।

16 एल्हेरेलेइ परमेशेरे वादे विश्वासेरे ज़िरिये हासिल भोतन, ताके तैना वादे अनुग्रहेरे ज़िरिये पक्के भोन, ते सारे वादे अब्राहमेरे वंशेरे लेइ आन, न सिर्फ यहूदी केरे लेइ, ज़ैना मूसेरू कानून मन्तन बल्के तैन सेम्भी केरे लेइ भी आन, ज़ैना अब्राहमेरो ज़ेरो विश्वास केरनेबालन, तैए इश्शो सेम्भी केरो पूर्वजे ।

17 ज़ेन्चरे पवित्रशास्त्रे मां लिखोरूए, “मीं तू बेइडि कौमां केरो पूर्वज बनेवरोस” परमेशेरे पुइ तैन विश्वास कियो, ते ज़ै मुइदन ज़ीतो केरते ते ज़ैना चीजां वाजूद नई, तैन भी हाज़र केरते ।

18 परमेशेरे वचनेरे मुताबिक कि “तेरू खानदान एरू भोलू” तैना बेइडि कौमां केरे पूर्वज भोन । तैनी न उमीदी मां भी उमीदी रेखतां विश्वास कियो,

19 ते अब्राहम ज़ै लगभग 100 सालेरो थियो, अपने मरे जानी, ते सारारे मरे पेटेरे हालीती पुइ भी विश्वासे मां कमज़ोर न भोव ।

20 ते गैर विश्वासी भोइतां परमेशेरे वादे पुइ शक न की, पन विश्वासे मां मज़बूत भोइतां परमेशेरी बडयाई की ।

21 ते तैस पूरो भरोसो भोव, कि ज़ैस गल्लरो वादो परमेशेरे कियोरोए, तै तैस पूरो केरनेरी शक्ति भी रखते ।

22 अब्राहमेरो विश्वास तैसेरेलेइ धार्मिकता गनो जेव ।

23 ते ई वचन, “विश्वास तैसेरेलेइ धार्मिकता गनो जेव,” न सिर्फ तैसेरेलेइ लिखो जेव ।

24 बल्के इश्शे लेइ भी ज़ैन केरे लेइ विश्वास धार्मिकता गनो जेव, मतलब इश्शे लेइ ज़ैना अस परमेशेरे पुइ विश्वास केरतम, ज़ैने इश्शो प्रभु यीशु मसीह मुइदन मरां ज़ीतो कियो ।

25 यीशु इश्शे पापां केरे लेइ मारनेरे लेइ टलुवाव जेव, ते असन धर्मी ठहरानेरे लेइ परमेशेरे ज़ीतो भी कियो ।

5

XXXXXXXXXXXXXXXXXXXX

1 एल्हेरेलेइ असां विश्वासे सेइ धर्मी भोए, ते ज़ैन किछ इश्शे प्रभु यीशु मसीहे इश्शे लेइ कियोरू तैसेरे ज़िरिये इश्शो मेल मलाप परमेशेरे सेइ भोरोए ।

2 ते इश्शे विश्वासेरे वजाई सेइं मसीहे अस इस अनुग्रहे तगर पुजाए, जैड़ी अज्र अस खडे भी आम, ते असां पूरे याकीने ते आनन्दे सेइं परमेशेरी महिमा बंटनेरे लेइ उमीदी मां रातम।

3 सिर्फ एन्ने नई, बल्के मुसीबतन मां भी अस आनन्द केरम, किजोकि अस ज्ञानतम कि मुसीबतन सेइं सबर बद्धती।

4 परमेशर असन रोडे समझते किजोकि केन्चरे सबर केरनि असेईं शिखरीए, ते तै असन रोडे समझते तांए असन उमीदे।

5 ई उमीदी असन शरमिन्दा न केरे, किजोकि पवित्र आत्मा जै परमेशरे असन दित्तोरोए तैसेरे जिरिये सेइं तैसेरो प्यार इश्शे दिलन मां भरोरोए।

6 किजोकि जैखन अस अपनो आप बचानेरे लेइ कमजोर थिये, त मसीह परमेशेरे ठहरावरे वक्ते पुइ इश्शे पैपी केरे लेइ मरो।

7 केन्ची धर्मी मैनेरे लेइ भी कोई मरे, इन बडू मुशकले, पन शैइद केन्ची धर्मी मैनेरे लेइ कोई अपनि जान देनेरी जुरत केरे।

8 पन परमेशरे अपनो महान प्यार एन्चरे बांदो कियो, कि जैखन असां पापी थिये तैखन मसीह इश्शे लेइ मरो।

9 ते अस तैसेरे खूने सेइं धर्मी ठहरे, त मसीहेरे जिरिये सेइं परमेशेरे हमेशारी सजाई करां जरूर बचमेले

10 किजोकि जैखन अस परमेशेरे दुश्मन थिये त तैसेरे मटठरे मौती सेइं इश्शो मेल तैस सेइं भोव, ते फिरी मेल मलाप भोरोए त तैसेरे जिन्दगी सेइं असन पक्की मुक्ति मैलेली।

11 ते सिर्फ इन्ने नई, पन हुनी परभू यीशु मसीहेरे जिरिये सेइं इश्शो मेल परमेशरे सेइं भोरोए, एल्हेरेलेइ अस परमेशरे मां आनन्द केरतम।

12 एल्हेरेलेइ जेन्चरे एककी मैनेरे जिरिये यानी आदमेरे जिरिये पाप दुनियाई मां अव, ते पापे सेइं मौत आई, ते एन्चरे मौत सेभी मैनन मां फैली। किजोकि सेभेईं पाप केरो।

13 मूसेरो कानून देने करां पेइले पाप दुनियाई मां त थियो, पन जैड़ी कानून नई, तैड़ी पाप गनो न गाए।

14 फिरी भी आदमे करां मूसा तगर सेभी लोकेईं पाप कियो ते सब लोक मरे, जैन लोकेईं तैस आदमेरो जेरो पाप न कियो तैना भी मरे, आदम मसीहेरो जेरो थियो, जै मसीह एजनेबालो थियो।

15 पन परमेशेरू वरदान आदमेरे पापेरू जेरू नई, इन सच्चे कि एककी मैन्हु यानी आदमेरे पापेरे वजाई सेइं बडे लोक मरे। पन परमेशेरे अनुग्रह त कने तैसेरू वरदान बडे लोकां केरे लेइ महान आए जैन एककी मैन्हु यानी यीशु मसीहेरे अनुग्रहे सेइं एइते।

16 जैन वरदान परमेशरे असन दित्तू तैन आदमेरे पापेरू जेरू नई, किजोकि एककी मैनेरो पाप सजा घिन्तां अव। पन हालांकी असेईं भी बडे पाप कियोरेन फिरी भी परमेशरे असन एरू वरदान दित्तोरूए जैन असन परमेशेरी नजरी मां धर्मी ठहराते।

17 किजोकि एककी मैनेरे पापेरे वजाई सेइं सब लोक मरे, त जैन लोकन अनुग्रहेरू ते धार्मिकतारू बडू वरदान एककी मैनेरे जिरिये मैलते, तैना लोक जीते राले ते एककी मैन्हु यानी यीशु मसीहेरे जिरिये राज केरेले।

18 एल्हेरेलेइ जेन्चरे एककी मैनेरो पाप सेभी मैनेरू केरे लेइ सजा आनते, तेन्चरे मसीहेरे धार्मिकतारू कम सेभी मैनेरू केरे लेइ धर्मी ठहराने लेइ वजा बनू, जैस सेइं जिन्दगी मैलतीए।

19 किजोकि जेन्चरे एककी मैनेरे हुकम न मन्ने सेइं बडे लोक पापी भोए, तेन्चरे एककी मैनेरे हुकम मन्ने सेइं बडे लोक धर्मी भोले।

20 मूसेरो कानून एल्हेरेलेइ दित्तोरो थियो कि सारे लोकन पतो लगगे कि तैना केतरे पापिन। पन जेन्चरे लोकेईं जेतरे जादे पाप किये तेन्चरे परमेशेरो अनुग्रह तैस करां भी बडो जादे भोवं,

21 कि जेन्चरे सेबमी लोकेई पाप किये ते मरे, तेन्चरे परमेशेरो अनुग्रह राज करते ते परमेशेरे अस इशे प्रभु यीशु मसीहेरे वजाई सेई धर्मी ठहरावरेम। मतलब असन हमेशारी जिनंदगी मैलेली।

6

QUESTION

- 1 त अस कुन ज़ोम? कुन अस पाप करते रहम, कि परमेशेरो अनुग्रह बद्धतो गाए?
- 2 नई, कधी नई! अस ज़ैखन पापेरे लेइ मरे ते फिरी किजो अग्रोवं जो पापे मां जिनंदगी बीताम?
- 3 तुस ज़ानतम कि ज़ैखन असेई सेबमी लोकेई यीशु मसीहे सेई साथी अक भोनेरे लेइ वपतिस्मो नीयोरो थियो, तैखन अस तैस सेई साथी मरे थिये।
- 4 ज़ैखन असेई वपतिस्मो नीयोरो थियो तैखन अस मसीह सेई साथी मरे ते दबे जे, ताके अस भी नर्वीं जिनंदगी ज़ीम, जेन्चरे मसीह बाजी परमेशेरी महिमा सेई मुडदन मरां ज़ीतो कियो।
- 5 किजोकि अगर अस वपतिस्मेरे ज़िरिये मसीहेरी मौती मां शामिल भोरेम, त अस भी पक्के तैसेरे ज़ेरे ज़ीते भोमेले।
- 6 अस ज़ानतम कि इशो पुरानी इन्सानयत यीशु मसीह सेई साथी करूसे पुइ चादोरीए, ताके पापेरो जिसम बेफाइदो भोए, ते अस अग्रोवं जो पापेरे गुलेमी मां न रहम।
- 7 ज़ैखन मैन्हु मरते त तैखन तै पापेरी शेक्ति करां आज़ाद भोते।
- 8 एल्हेरेलेइ अगर अस मसीह सेई साथी मरे, ते इशो विश्वास ईए कि तैस सेई साथी ज़ीते भी भोमेले।
- 9 किजोकि अस एन ज़ानतम, कि मसीह मुडदन मरां ज़ीतो भोरोए ते तै फिरी न मरेलो, ते तैस पुइ फिरी मौतरू राज़ नई भोनू।
- 10 ज़ैखन मसीह मरो त तै एक्की बार सेबमी केरे पापेरे लेइ मरो; पन हुनी तै ज़ीतोए, ते सिर्फ परमेशेरे लेइ ज़ीतोए।
- 11 एन्चरे तुस अपने बारे मां भी सोचा कि तुस पापेरे लेइ त मरोरेथ, पन यीशु मसीहे तुसन जिनंदगी दितोरीए ते तुस परमेशेरे लेइ ज़ीते आथ।
- 12 एल्हेरेलेइ तुस अपने जानी मां पापेरी इच्छान राज़ केरने न देथ, ते तुस तैन केरे मुताबिक न चला।
- 13 ते अपने जिसमेरे अंगन बुरे कम्मां केरे लेइ पापे न सोंफा, पन अपने आपे मुडदन मरां ज़ीते सेमझतां परमेशेरे सोंफा। ते अपने जिसमेरे अंगन धार्मिकतारे कम्मां केरे लेइ परमेशेरे सोंफा।
- 14 ते तुसन पुइ पापेरू राज़ न भोलू, किजोकि तुस मूसेरे कानूनेरे अधीन नई बल्के अनुग्रहेरे अधीन आथ।

ANSWER

- 15 त कुन भोव कि अस एल्हेरेलेइ पाप केरम, कि असां मूसेरे कानूनेरे अधीन नई बल्के अनुग्रहेरे? नई, कधे नई।
- 16 तुस ज़ानथ, कि ज़ैखन तुस जेसेरो हुक्म मन्नेरे लेइ अपनो आप गुलामां केरे ज़ेरे सोफतथ त तुस तैसेरे गुलाम आथ। चाए पापेरी जेसेरो अन्त मौते, चाए हुक्म मन्नेरे जेसेरो अन्त धार्मिकताए।
- 17 तुस त पेइले पापेरे गुलाम थिये पन हुनी तुसन ज़ै शिक्षा मैलोरी थी तैस पूरे दिले सेई मन्नेबाले भोए, एल्हेरेलेइ अवं परमेशेरेरू शुकर केरताई।
- 18 ते हुनी परमेशेरे तुस पापेरी शेक्ति करां छुटेइतां आज़ाद किये, ते तुस परमेशेरे गुलाम बने ताके तुस ज़ैन रोडू तैन केरि बटथ।
- 19 अवं ई मिसाल एल्हेरेलेइ इस्तेमाल केरने लोरोई, किजोकि तुशे लेइ इन समझनू मुशिकले। जेन्चरे तुसेई पेइले अपनो आप गुलामेरे ज़ेरो बुरां कम्मां केरे लेइ अथमे ते बुरैडारे लेइ सोंफोरे थियो, तेन्चरे हुनी तुस अपने आपे परमेशेरी सेवारे लेइ सोंफा ताके तुस पूरे तरीके सेई तैसेरे भोथ।
- 20 ज़ेइस तुस पापेरे गुलाम थिये, त तुसन परमेशेर खुश केरनेरी कोई ज़रूरत न थी।

21 तुसन पुरैनी ज़िन्दगी सेइं कुन फैइदो मैलो? सिर्फ तुस शरमातथ, किजोकि ज़ैन तुसेईं कियूं तैसेरो नितीजो सिर्फ मौते ।

22 पन हुनी तुस पापे करां आज़ाद भोरैथ ते तुस परमेशेरे दास बनोरैथ । किजोकि इना गल्लां तुसन पवित्तर बनैली ते तुसन हमेशारी ज़िन्दगी मैलेली ।

23 किजोकि पापेरी मज़दूरी त मौते, पन परमेशेरू वरदान इशे प्रभु यीशु मसीह मां हमेशारी ज़िन्दगी आए ।

7

XXXXXXXXXXXXXXXXXXXX

1 हे ढलाव ते बेइनव, कुन तुस न ज़ानथ अवं मूसेरो कानून ज़ान्ने बालन सेइं ज़ोताई, कि ज़ांतगर मैन्हु ज़ींतो रहते, तांतगर तैस पुड़ मूसेरे कानूनेरो अधिकार भोते?

2 मिसालेरे तोरे पुड़, इलावरी कुआन्श कानूनेरे मुताबिक ज़ांतगर तैसेरो मुन्श ज़ींतोए तांतगर तैसेरी पाबंदे । पन अगर मुन्श मेरि गाए, त तै मुन्शेरे कानूने करां छुटी जेई ।

3 ते अगर मुन्श हेजू ज़ींतो ते होरि मड़देरी भोए त तै बदमाश भोतीए, पन मुन्श मेरि गाए, त तैसेरे कानूने करां छुटी, इडी तगर कि होरि मड़देरी भोए, फिरी भी बदमाश न ठहरेली ।

4 हे ढलाव ते बेइनव, ज़ैखन तुस मसीह सेइं साथी मरे, त तुस कानूनेरे लेइ मरे । हुनी तुस मसीहेरे आथ ज़ै मुड़दन मरां ज़ींतो कियोरोए, ताके तुस परमेशेरे लेइ फलदार ज़िन्दगी ज़ीथ ।

5 किजोकि ज़ेइस अस अपने सुभावेरे मुताबिक चलते थिये, त पापी सुभाव असन मां कम केरतो थियो, ते कानूने तैना पापी इच्छां उकसेईं, ते ज़ैन किछ् असेईं कियूं तैसेरो फल मौत थियो ।

6 पन ज़ेसेरे बंधने मां अस थिये, तैसेरेलेइ मेरतां, हुनी कानूने करां एरे छुटोरेम, पन आत्मार नव्वे तरीके पुड़ सेवा केरतम, न कि लफसन सेइं ।

XXXXXXXXXXXX XXXX

7 त अस कुन ज़ोम? कुन मूसेरो कानून पापे? नई, कधी नई! बल्के बगैर मूसेरे कानूने अवं पापे न पिशैनी, अगर मूसेरो कानून न ज़ोथो कि “लालच न केर” त अवं लालच न ज़ैनेथो ।

8 पन पापे मौको लेइतां हुकमे सेइं मीं मां हर किसमेरू लालच पैदा कियूं, किजोकि बगैर मूसेरे कानूने पाप मरों आए ।

9 अवं त मूसेरे कानूने बगैर पेइलो ज़ींतो थियो, पन ज़ैखन हुकम अव, त पाप ज़ींतो भोव ते अवं मरो ।

10 ते तैए हुकम ज़ै ज़िन्दगरे लेइ थियो, मेरे लेइ मौतरी वजा बनो ।

11 किजोकि पापे मौको मेलतां हुकमे सेइं मीं धोखो दित्तो, ते तैस सेइं अवं आत्मिक तोरे पुड़ मरो ।

12 एल्हेरेलेइ मूसेरो कानून पवित्तर आए, ते हुकम भी पवित्तर, ठीक ते रोड़ोए ।

13 ते कुन ज़ै चीज़ रोड़ी थी मेरे लेइ मौत बनी? नई, कधे नई! पन पापे तैस रोड़ी चीज़ी सेइं मेरे लेइ मौत पैदा केरतां अवं मारो, कि तैसेरो पाप भोना बांदो भोए, ते हुकमे सेइं पाप बड़ो जादे बुझोए ।

XXXXXXXXXXXX XXXX XXXX

14 किजोकि अस ज़ानतम कि मूसेरो कानून त आत्मिके, पन अवं जिसमानी ते पापेरो गुलाम भोनेरे लेइ बिकोरोई ।

15 ते ज़ैन अवं केरताई, तैस न ज़ैनी, किजोकि ज़ैन अवं चाताई, तैन न केरि, पन ज़ैस सेइं मीं नफरते, तैन्ने केरताई ।

16 ते अगर, ज़ैन अवं न चेईं तैने केरताई, त अवं मनताई, कि मूसेरो कानून रोड़ो आए ।

17 ते एस हालती मां बुरी चीज़ां केरनेबालो अवं नई, बल्के पापे, ज़ै मीं मांए ।

18 किजोकि अवं ज्ञानताई, कि मीं मां मतलब मेरे जिसमे मां कोई रोड़ी चीज़ नई, रोड़ू केरनेरी इच्छा त मीं मां आए, पन मीं करां न केरोए।

19 किजोकि ज़ैस रोड़े कम्मरी इच्छा अवं केरताई, तैन मीं करां न बने, पन ज़ैस बुरैइयरी इच्छा भी न केरि तैस केरताई।

20 पन अगर अवं तैन्ने केरताई, ज़ेसेरी इच्छा न केरि, ते तैन केरनेवालो अवं नई, बल्के पापे ज़ै मीं मांए।

21 ते मीं ई कानून मैलते, कि ज़ैखन रोड़े कम्मरी इच्छा केरताई, त अवं बुराई केरताई।

22 किजोकि अवं ज़मीरे सेई त परमेशेरे कानूने सेई बड़ो खुश भोताई।

23 पन मीं अपने जिसमेरे अंगन मां होरि ज़ेरो कानून लेइहोते, ज़ै मेरी अक्लरे कानूने सेई लइते, ते मीं पापेरे गुलैमरे कानूने मां छुड़ते ज़ै मेरे जिसमेरे अंगन मांए।

24 अवं केरो नुभाघ मैन्हु आई, मीं इस जिसमे करां ज़ै मौतरे पासे नेते कौन छुटालो?

25 अवं परमेशेरे शुक्र केरताई ज़ैने यीशु मसीहेरे ज़िरिये अवं बचाव, ते अवं अपनि अक्ली सेई त परमेशेरे कानूनेरो इस्तेमाल केरताई, पन अपने जिसमे सेई पापेरी कानूनेरो इस्तेमाल केरताई।

8

XX

1 एल्हेरेलेइ हुनी ज़ैना मसीह यीशु मां आन, तैन पुड़ सज़ारो हुक्म नई।

2 किजोकि पवित्तर आत्मा तुसन ज़िन्दगी देलो, ज़ै यीशु मसीह करां एइती ते तै तुसन पाप ते मौती करां आज़ाद केरेलो।

3 किजोकि ज़ैन कम कानूने इश्शे पापी सुभावेरे वजाई सेई कमज़ोर भोइतां न केरि बटु, तैन परमेशेरे कियू, मतलब अपने मट्टे इश्शे पैपी केरो ज़ेरो भोनेरे लेइ, ते पापेरे बलिदानेरे लेइ भेजू, परमेशेरे मसीहेरे जिसमे मां पापेरी सज़ा दिक्ती।

4 परमेशेरे एन एल्हेरेलेइ कियू ताके अस अपने पापी सुभावेरे मुताबिक नई, पन पवित्तर आत्माे मुताबिक च़लतां ज़ै हुक्म कानून देते तैस केरि बटम।

5 किजोकि ज़ैना लोक पापी सुभावेरे मुताबिक ज़िन्दगी बीतातन, तैना पापेरे बारे मां सोचतन, पन ज़ैना लोक पवित्तर आत्माे मुताबिक ज़िन्दगी बीतातन, तैना आत्मिक गल्लां केरे बारे मां सोचतन।

6 अगर इश्शो मन इश्शे पापी सुभावेरे मुताबिक च़लते त अस मरमेले, पन अगर इश्शो मन आत्माे मुताबिक च़लते त असन कां ज़िन्दगी ते शान्ति मैलेली।

7 किजोकि पापी सुभावेरे मुताबिक च़लनू परमेशेरे सेई बैर रखनोए, किजोकि न त पापी सुभाव परमेशेरे कानूनेरे अधीने, ते न कानूनेरे मुताबिक च़लि बटते।

8 ते ज़ैना पापी सुभावेरे मुताबिक च़लतन तैना परमेशेरे खुश न केरि बटन।

9 पन ज़ैखन परमेशेरो आत्मा तुसन मां बस्सते, ते तुस पापी सुभावेरे मुताबिक न च़लथ बल्के पवित्तर आत्माे मुताबिक च़लतथ, अगर कोन्ची मां पवित्तर आत्मा नई त तै मसीहेरो मैन्हु नई।

10 ते अगर मसीह तुसन मांए, त जिसम पापेरे वजाई सेई मरेलो, पन आत्मा धार्मिकतारे वजाई सेई ज़ीतीए।

11 ते अगर तैसेरी आत्मा ज़ैने यीशु मुड़दन मरां ज़ीतो कियो तुसन मांए। ते ज़ै मसीह तैन मुड़दन मरां ज़ीतो कियो, तैए तुश्शे भी नाश भोनेवाले जिसमे अपनि आत्मा सेई ज़ीतो केरेलो, ज़ै तुसन मांए।

12 हे दलाव ते वेइनव, असेई एन्चरे न लोड़े ज़ीयेरू ज़ेन्चरे अस अपने पापी सुभावेरे मुताबिक ज़ीनू चातम, पन असेई एन्चरे ज़ीयोेरू लोड़े ज़ेन्चरे परमेशेरो आत्मा चाते।

13 किजोकि अगर तुस अपने पापी सुभावेरे मुताबिक ज़ीले त तुस मरेले, पन अगर तुस पवित्तर आत्माे मुताबिक च़लले त तुस अपने पापी सुभावेरां कम्मां केरनां बंद केरेले ते फिरी तुस ज़ीते राले।

- 14 किजोकि जेतरे परमेशेरे आत्माे चलाने सेइं चलतन तैन्ना परमेशेरे बच्चेन ।
- 15 किजोकि जै आत्मा तुसन मैलोरोए तुसन फिरी गुलाम बेनतां रानेरे लेइ नई, बल्के तै तुसन परमेशेरे बच्चे बनाते । तैसेरे जिरिये अस परमेशेरे जो हे अब्बा, हे बाजी ज़ोतम ।
- 16 पवित्तर आत्मा एप्पू इश्शी आत्मा सेइं मिलतां गवाही देते, कि अस परमेशेरे बच्चेम ।
- 17 किजोकि अस परमेशेरे बच्चेम ते असां तैना बरकतां हासिल केरमेले जैना परमेशर अपने लोकां केरे लेइ रखोरिन, ते मसीहेरे लेइ भी जैन परमेशर रखोरुए, तैन भी अस मसीह सेइं साथी हासिल केरमेले; किजोकि अगर अस मसीहेरे जेरे दुःख झैलमेले त अस भी मसीहे साथी महिमा हासिल केरमेले ।

????????? ?????? ??? ?????? ?????? ?????? ??????

- 18 मीं पूरू याकीने, कि जैना दुःख अस झैल्लने लोरिम, तैस महिमारे सामने, जै परमेशर असन देनेवालोए, किछ् भी नई ।
- 19 किजोकि सैरी रचनारी चीज्जां बडे बे सबरी सेइं तैस वक्तेरो इंतज़ार केरने लोरिन, कि ज़ेइस परमेशेरे इन बांदो केरनू तैसेरे सच्चे बच्चे कौन आन ।
- 20 किजोकि जैन किछ् परमेशेरे बनाव, तैन सैरी चीजेइं अपनि कीमत गवाइ, एल्हेरेलेइ नई कि तैना अपने आप बैती थी, पन परमेशेरे एन भोने दिचू । पन फिरी भी उमीदे ।
- 21 कि सृष्टि एप्पू भी खुश आए कि विनाशे करां छुटकारो हासिल केरतां, परमेशेरे बच्चां केरे महिमारी अज़ैदी मां खुशी मनाली ।
- 22 किजोकि अस ज्ञानतम कि सारी सृष्टि मिलतां हुना तगर कर लातीए ते तकलीफी मां तडफतीए, जेन्चरे दोज़ींती गल्हे विशनेरी तकलीफ भोतीए ।
- 23 सिर्फ तैन्ना नई पन अस भी जैन एजने बैली महिमारो पेइले फलेरो स्वाद चखनेरे लेइ पवित्तर आत्मा दिचो, पन अस हेजू भी परमेशेरे वक्ते बलगने लोरिम ज़ैखन परमेशर अपने बच्चे केरे रूपे मां कबूल केरेलो, ते असन जिसमेरे बुरैई करां छुटकारो देलो ।
- 24 हुनी परमेशेरे असन मुक्ति दिचोरीए, असन ई उमीदे । पन अगर तुस कोन्ची चीज़ी हासिल केरनेरे लेइ उमीद केरथ जै तुसन कां पेइली आए, त फिरी तै उमीद नई । किजोकि ज़ैस चीज़ी कोई हेरने लोरोए तैसेरी उमीद कुन केरे?
- 25 पन ज़ैस चीज़ी अस न लहम, अगर तैसेरी उमीद रखतम, त सबरी सेइं तैस बलगते भी रातम ।
- 26 एन्चरे पवित्तर आत्मा इश्शी महदत केरते ज़ैखन अस परमेशेरे पुइ भरोसो रखने मां कमज़ोर भोतम, किजोकि अस न ज्ञानम, कि प्रार्थना केन्चरे केरतन; पन पवित्तर आत्मा एप्पू कर लेइतां जै बयानेरे बेइरे, इश्शे लेइ बिनती केरतीए ।
- 27 ते परमेशर जै मनां केरो ज्ञान्ने बालोए ज्ञानते, कि पवित्तर आत्मा कुन लोरो ज़ोने । किजोकि तै पवित्तर लोकां केरे लेइ परमेशेरे मेर्जी सेइं बिनती केरते ।
- 28 ते अस ज्ञानतम, कि जैना लोक परमेशेरे सेइं प्यार केरतन, परमेशर तैन केरे लेइ सब गल्लां केरे ज़िरिये भलाई पैदा केरते; मतलब तैन केरे लेइ जैना तैनी अपने मेरज़ारे मुताबिक चुनोरिन ।
- 29 किजोकि तैने जैना पेइले चुने, ते पेइले ठहराए भी कि तैसेरे मट्ठरे रूपे मां भोन, ताके तै बडे द्लान मां ज़ेठो भोए ।
- 30 फिरी जैना तैने पेइले ठहराए, तैना चुने भी, ते जैना चुने, तैना धर्मी भी ठहराए, ते जैना धर्मी ठहराए तैन महिमा भी दिचोरीए ।

????????? ??????

- 31 ते अस एन गल्लां केरे बारे मां कुन ज़ोम? अगर परमेशर इश्शे पासे, ते इश्शो खलाफ कौन भोइ बटते?
- 32 परमेशेरे अपनू मट्ठू भी अपने लेइ न रखवू, बल्के तैन इश्शे सेबभी केरे लेइ तैसेरे दुश्मना केरे हवाले दिचू, ते तै मसीह सेइं असन तैन सब किछ् देलो जेसेरो वादो तैने असन सेइं कियोरोए ।

33 अस परमेशेरे चुनोरम, कोई असन पुड़ परमेशेरे सामने दोष न लेई बटे, किजोकि तैए ज़ैने अस धर्मी ठहरावरेम।

34 फिरी कौने ज़ै सज़ारो हुक्म देलो? कोई नई, यीशु मसीह तैए ज़ै मरो, बल्के मुडदन मरां ज़ीतो भोव, ते परमेशेरे देइने पासे, ते इशे लेइ बिनती भी केरते।

35 कौन असन मसीहेरे प्यारे करां अलग केरि बटते? मुसीबत या तंगी, या जुलम, या काल, या नगूपन, या खतरो, या तलवार? इन मरां कोई भी चीज़ असन मसीहेरे प्यारे करां अलग न केरि बटे।

36 ज़ेन्चरे पवित्रशास्त्रे मां लिखोरूए, “तेरे लेइ अस हर वक्त मौतरे खतरे मां रातम; अस मैरोने बैली भैडडां केरे ज़ेरे गने जोरेम।”

37 पन ज़ैने असन सेइं प्यार कियोरोए, तैसेरे ज़िरिये असन पूरे तरीके सेइं एन सैरी बुरी गल्लां पुड़ ज़ीत हासिल आए।

38 किजोकि मीं पूरू याकीने, कि न मौत, न ज़िन्दगी, न स्वर्गदूत, न हकोमतां, न ज़ै वक्त चलोरोए, न एजनेबालो वक्त, न शेक्ति, न उचार,

39 न डुघार ते न कोई होरि सृष्टि, असन परमेशेरे प्यारे करां ज़ै इशे प्रभु यीशु मसीह मांए अलग केरि सकेली।

9

????????????????????????????

1 अवं मसीह मां सत्र ज़ोताई, झूठ न ज़ोई, ते मेरो ज़मीर भी पवित्र आत्माई मां गवाही देते।

2 कि मीं बड़ो दुःखे, ते मेरो दिल लगातार मेरे लोकां केरे लेइ उदास भोते।

3 किजोकि मेरे यहूदी दूला ते बेइनां केरे लेइ, अवं हमेशेरे लेइ श्रापित भोथो ते मसीह करां अलग भोथो अगर तैन इस वजाई सेइं तैन मुक्ति मैलती।

4 तैना इस्राएलिन; ते तैना परमेशेरे लेपलक बच्चे भोनेरे लेइ चुनोरन, ते परमेशेरे अपनि महिमा तैन पुड़ बांवी की। ते तैनी तैस सेइं करार कियो, ते तैन मूसेरो कानून दित्तो। ते तैनी तैन अपनि आराधना ते अपने खूबसूत वादे पूरे केरनेरे लेइ हासिल केरनेरो मौको दित्तो।

5 अब्राहम, इसहाक ते याकूब तैन केरे दादे पड़दादे थिये, ते मसीह भी जिसमेरे लिहाज़े सेइं तैने मरां अवं, तै परमेशेरे ते सेब्बन करां बाए ज़ै सेब्बन पुड़ राज़ केरते, तैसेरी महिमा हमेशा भोती राए। आमीन।

6 पन इन नई, कि परमेशेरे वचन टलू कि, सारे ज़ैना इस्राएलेरे वंशन, तैना सब सच्चे इस्राएली नई।

7 ते न अब्राहमेरे वंश मां ज़र्म भोने सेइं सब परमेशेरे बच्चे भोन। पन पवित्रशास्त्रे मां परमेश अब्राहमे सेइं ज़ोते, “ज़ैना इसहाकेरे वंशे मरां पैदा भोले तैन्ने तेरू वंश मन्नु गालू।”

8 मतलब ज़ैना कुदुरती तरीके सेइं ज़र्म धिन्तन तैना परमेशेरे बच्चे नई, पन सिर्फ वादेरे बच्चे अब्राहमेरे बच्चे गने गातन।

9 किजोकि वादेरू वचन इने, “अवं एग्री साल इस वक्ते फिरी एज्जेलो, ते सारारू अक मट्टू भोनूए।”

10 ते सिर्फ एन नई, पन ज़ेइस रिबका भी एक्की सेइं मतलब इसहाके सेइं दोज़ीती थी ते तैसेरे पेटे मां दूई बच्चे थिये।

11-12 ते हेजू तगर तैना बच्चे न थिये ज़र्मोरो, ते न तैनेई रोडू या बुरू कियेरू थियू, कि परमेशेरे रिबका सेइं ज़ोव, तेरू बड़ू मट्टू निकडेरी सेवा केरेलू। परमेशेरे एन एल्हेरेलेइ ज़ोव कि एन हिराए, कि तै अपनि मेर्ज़ी सेइं फैसले केरते ते इन तैन मट्टां केरे रोडां या बुरे कम्मां केरे वजाई सेइं न थियू।

13 ज़ेन्चरे पवित्रशास्त्रे मां लिखोरूए, “मीं याकूबे सेइं प्यार कियो, पन एसावेरो इन्कार कियो।”

14 ते अस कुन ज़ोम, कि परमेशेरे बेइन्साफे कि ते ज़ैस चाते चुनते? नई, कधे नई!

15 किजोकि परमेश्वर मुसे सेइं ज़ोते, “अवं ज़ैस केन्वी पुड़ दया केरनि चैई, तैस पुड़ दया केरेलो ते ज़ैस पुड़ तरस केरनो चैई तैस पुड़ तरस केरेलो।”

16 एल्हेरेलेइ परमेश्वर तैस चुनेलो ज़ैस पुड़ तै दया हिरानी चाते; तैसेरी इच्छा लोक ज़ैन चातन या केनेरी कोशिश केरतन तैस पुड़ निर्भर नई।

17 किजोकि पवित्रशास्त्रे मां परमेश्वरे मिस्ररे राजे फ़िरौन* सेइं ज़ोवं, “मीं तू एल्हेरेलेइ राज़ो बनोरोस, कि तीं मां अपनि शक्ति हिरेई, ते मेरे नंवेरो प्रचार सैरी ज़मीनी पुड़ भोए।”

18 ते ज़ैस पुड़ तै चाते, तैस पुड़ दया केरते; ते ज़ैस चाते ढीठ केरते।

19 ते किछ्छ लोक मीं सेइं ज़ोले, “अगर एन्चरे, त फिरी परमेश्वर केन्चरे फैसलो केरि बटते कि अस गलत आम? एल्हेरेलेइ कोई भी तैस ज़ैन तै चाते केरने करां न रोकी बटे।”

20 हे मैन्हू, तू कौन आस, जै तू परमेश्वरे सेइं बेंस केरतस? कुन वानोरी चीज़ बनाने वाले सेइं ज़ोई बटतीए, “तीं अवं एरी किजो बनाई?”

21 कुन कुम्हारे मिती पुड़ अधिकार नई, कि एक्की लुनदे मरां, अक भांड आदरारे लेइ बनाए, ते होरू नरादराए लेइ बनाए?

22 (परमेश्वरे अपने बनावरो लोकन सेइं ज़ैन तै चाए तैन केरनेरो अधिकारे) ज़ैना नाश भोनेरे काबल थिये, तैन केरे खलाफ परमेश्वर अपनो क्रोध हिरानो ते अपनि सामर्थ बांदी केरनेरी चातो थियो, पन तैसेरे बदले मां तैनी सबर की।

23 (तेनी एन कियूं) किजोकि ते हिरानू चातो थियो (मसीहरे मौतरे बलिदानेरे ज़िरिये) तै केतूरो महान आए, ज़ैखन ते तैन लोकन पुड़ दया केरते ज़ैना तैनी अपनि महिमा मां शामिल भोने लेइ चुनोरेन।

24 मतलब असन पुड़ ज़ैना तैने न सिर्फ़ यहूदन मरां बल्के गैर कौमन मरां भी चुने।

25 ज़ेन्चरे ते होशे नेबेरे किताबी मां ज़ोते,

“ज़ैना मेरे लोक न थी, तैन अवं अपने लोक ज़ोलो।

ते ज़ैना लोक मेरे टलारे न थिये, तैन जो टलारे ज़ोइलो।

26 ते तैस्से टैरी ज़ैडी परमेश्वरे ज़ोरू थियूं, तुस मेरे लोक नई, तैस्से टैरी ज़ींतो परमेश्वर तैन ज़ोलो तुस मेरे बच्चे।”

27 ते यशायाह नबी इस्राएली लोकां केरे बारे मां ज़ोते, “चाए इस्राएलेरी कुटमेरी गिनती समुदरेरे किनारे रेतरी ज़ेरि बडी जादे भोली फिर भी तैन मरां थोडे बच्चेले।

28 किजोकि परभू जल्दी दुनियारे सेभी लोकां केरो सेखती सेइं इन्साफ केरेलो।”

29 ज़ेन्चरे यशायाह नेबे पेइलू भी ज़ोरू थियूं, “कि सर्वशक्तिमान परमेश्वरे इश्शे लेइ इश्शू वंश न बाचाथो, त अस सदोम ते अमोरा नगरां केरे ज़ेरे भोने थिये, ज़ैना परमेश्वरे पूरे तरीके सेइं बरबाद कियां।”

30 ते अस कुन ज़ोम? इन कि ज़ैना गैर कौमां केरे लोक ज़ैना धार्मिकता न थी तोपते, तैनेई धार्मिकता हासिल की, मतलब तै धार्मिकता ज़ै विश्वासे सेइं आए।

31 पन इस्राएली लोक मूसरो कानून मेन्तां परमेश्वरेरे करां धर्मी ज़ुवानू चाते थिये, पन तैन न भोइ बटु।

32 किजो नई? एल्हेरेलेइ कि तैना विश्वासे सेइं नई, पन मूसरो कानून मेन्तां धर्मी भोनेरी कोशिश केरते थिये, तैनेई तैस टोकर खानेबाले घोडे सेइं टोकर खाइ।

33 ज़ेन्चरे पवित्रशास्त्रे मां लिखोरूए; “तका अवं सिय्योने मां अक टेस लानेबालो घोड़, ते टोकर खाने वाली चट्टान रखताई; ते ज़ै तैस पुड़ विश्वास केरेलो, तै शरमिन्दा न भोलो।”

* 9:17 9:17 फ़िरौन: फ़िरौन मैनेरू नवं नई, मिस्ररे राज़ेरे पेदवरू नवं आए।

10

1 हे ढूलाव ते बेइनव मेरे मनेरी इच्छा ते इस्राएली लोकां केरे लेइ परमेशेरे का मेरी ई प्रार्थनाए, कि तैन मुक्ति मैल्ले ।

2 अवं ज्ञानताई कि तैना परमेशेरे लेइ जोशे मां रहतन, पन सच्चे ज्ञाने सेइं नईं ।

3 किजोकि तैना तैस धार्मिकताई करां अनज्ञान राए जै परमेशेरे तरफां मैलतीए, ते तैनेईं अपनि धार्मिकता बनानेरी कोशिश की, एल्हेरेलेइ तैनेईं अपनो आप परमेशेरेरी धार्मिकतारे अधीन न कियो ।

4 किजोकि मसीहे ते मकसद पूरो कियोरोए जेसेरे लेइ मूसेरो कानून दित्तोरो थियो, ताके जै कोई मसीह पुइ विश्वास केरे ते परमेशेरेरी नजरी मां धर्मी भोए ।

XXXXXXXXXX

5 किजोकि मूसे इन लिखोरूए, “जै मैन्हू तैस धार्मिकता मुताबिक चलते जै कानूनेरे जिरिये आए, ते तैसेरे जिरिये सेइं जीतो रालो ।”

6 पन जै धार्मिकता विश्वासे सेइं आए, तैसेरे बारे मां पवित्रशास्त्र इन ज़ोते, “तू अपने मने मां इन न ज़ोइयां कि स्वर्गे पुइ कौन चढेले?” (मतलब मसीह आन्ने)

7 या इन न ज़ोइयां “पाताले मां कौन गालो?” (मतलब मसीह मुइदन मरां ज़ीतो केरतां बा आने)

8 पन पवित्रशास्त्र इन ज़ोते “परमेशेरू वचन तेरे नेडे, ते तेरे ऐशी मां ते मने मां आए,” इन तैन वचने जैन असन परमेशेरे पुइ विश्वास केरनेरे बारे मां ज़ोते, जेसेरो अस प्रचार केरतम ।

9 अगर तू अपने ज़बाना यीशुए, परभु जेनतां मन्सस ते अपने दिल सेइं विश्वास केरस, कि परमेशेरे ते मुइदन मरां ज़ीतो कियो, त तीं परमेशर पक्की मुक्ति देलो ।

10 किजोकि इश्शे विश्वासेरे जिरिये सेइं अस परमेशेरेरी नजरी मां धर्मी भोतम, ते इश्शे इकारा केरने सेइं मुक्ति मैलोरीए ।

11 किजोकि पवित्रशास्त्र इन ज़ोते, “जै कोई तैस पुइ विश्वास केरे, ते शरमिन्दो न भोलो ।”

12 इन एल्हेरेलेइ आए कि यहूदन ते गैर कौमन मां कोई फर्क नईं, किजोकि परमेशर सेव्मी केरो परभुए; ते जैना तैसेरू नवं घिन्तन ते तैन बरकत देते ।

13 जेन्चरे पवित्रशास्त्र ज़ोते, “जै कोई परभुएरू नवं घिन्नेलो, तैस मुक्ति मैलेली ।”

14 पन परभु पुइ लोकेईं विश्वास न कियो त तैना तैसेरू नवं किजो घिन्न? ते जेसेरे बारे मां तैनेईं शुनोरू नईं तैस पुइ केन्चरां विश्वास केरेले? ते अगर तैसेरे बारे मां कोई प्रचार न केरे त तैना केन्चरां शुनी बटतन?

15 ते अगर कोई प्रचार केरनेरे भेजो न गाए त तैना केन्चरे शुनेईं बटतन? जेन्चरे पवित्रशास्त्र ज़ोते, “तैन केरे पव केतरे रोडेन, जैना शुशखबरी शुनातन!”

16 पन सेव्भेईं ते शुशखबरी कबूल न की । यशायाह नबी ज़ोते, “हे परभु कोई इश्शे सन्देशे पुइ विश्वास न केरे ।”

17 एल्हेरेलेइ मसीहेरे बारे मां सन्देशे शुन्नेरे बगैर कोई भी तैस पुइ विश्वास न केरि बटे ।

18 पन अवं पुछ्तईं, “कुन इस्राएली लोकेईं न शुनू?” हाँ तैनेईं ज़रूर शुनू, पन पवित्रशास्त्रे मां लिखोरूए “तैन केरू वचन सैरी ज़मीनी पुइ, ते तैन केरि गल्लां दुनियाए हर पासे पुजोरिन ।”

19 अवं फिरी पुछ्तईं, कुन इस्राएली लोकेईं तैन वचन न समझू? पेइलो त परभुए मूसेरे जिरिये ईं जुवाब देते, “अवं तैन केरे जिरिये जै कौम नईं, इस्राएली लोकन जलन करालो, अवं बेवकूफ गैर कौमां केरे लोकां केरे जिरिये तुसन सरकालो ।”

20 फिरी यशायाह बड़े दिलेरी सेइं परमेशेरे लेइ ज़ोते, “जैना मीं न थी तोपते, तैन अवं मैलो, ते जैना मीं पुछ्ते भी न थी, तैन पुइ अवं बांदो भोव ।”

21 पन इस्राएलेरे बारे मां परमेशर इन ज़ोते, “अवं हुक्म न मन्नेबाले ते बेस केरनेबाले लोकन सैरी दिहैड़ी कुजातो राव ।”

19 फिरी तू ज़ोलो, “डैलडी एल्हेरेलेइ टलोडी, कि अवं कलम भोई।”

20 इन सच्चे, तैना त विश्वास न केनेरे वजाई सेइं टलोडी जेई, पन तू विश्वासे सेइं बनोरो रातस, एल्हेरेलेइ घमण्ड न केर, पन डर केर।

21 किजोकि परमेशेरे असली डैलडन पुड़ दया न की, त तुसन पुड़ भी दया न केरेलो ज़ैना कलम कियोरेथ।

22 एल्हेरेलेइ परमेशेरी दया ते सखती हेर! ज़ैना पाप केनेरे वजाई सेइं झड़े तैन पुड़ सखती, पन तेरे लेइ दया, ते तू अपने आपे पुड़ तैसेरी दया बनोरी राने दे, नई त तू भी कटो गालो।

23 ते अगर यहूदी लोक फिरी विश्वास केरन, त कलम केरे गानेन किजोकि परमेशेरे एन केनेरे लेइ शेक्ति बालो आए।

24 किजोकि अगर तू तैस ज़ैतून, ज़ै सुभावे सेइं जंगलीए कटो जेव, ते ज़ै असलीए तैसेरे खलाफ रोड़े ज़ैतूने मां लव जेव, ते इना असली डैलडी आन अपने ज़ैतून मां किजो न लेई गेली।

~~~~~

25 हे दूलाव ते बेइनव, अवं न चैई कि तुस गैर कौमरे लोक अपने बारे मां घमण्ड केरेथ। इस्राएली लोकन सेइं कुन भोव, अवं एस भेदेरे बारे मां तुसन सेइं ज़ोताई, कि ज़ांतगर गैर कौमां केरे बड़े लोक मसीह कां न एजन, तांतगर किछ इस्राएली लोकां केरो दिल सखत रालो।

26 ते एन्चरे सैरी इस्राएली लोकन मुक्ति मैल्लनीए; ज़ेन्चरे पवित्रशास्त्रे मां लिखोरूए, “छुटानेबालो सिय्योनेरां (यरूशलेम) एज्जेलो, ते अभक्ति इस्राएली लोकन करां दूर केरेलो।

27 ते तैन सेइं मेरो ई करार भोलो, कि अवं तैन केरे पाप माफ़ केरेलो।”

28 खुशखेबारां वजाई त तैना तुशे लेइ परमेशेरे वैरिन, पन परमेशेरे चुनेरे वजाई सेइं ते तैन केरे बुज़ुर्गान दित्तोरे वचनेरे वजाई सेइं परमेशेरे तैन सेइं हेजू भी प्यार केरते।

29 किजोकि परमेशेरे अपने वरदान्न करां ते अपने कुजाने करां कधे अपनो मन न बदले।

30 किजोकि ज़ेन्चरे पेइले तुसेईं परमेशेरो हुकम न थियो मनोरो, पन हुना इस्राएली लोकां केरे हुकमन मन्ने सेइं तुसन पुड़ दया भोइ।

31 तैना हेजू भी हुकम न मन्नेबालेन कि ज़ै दया तुसन पुड़ भोरीए तैन पुड़ भोली।

32 किजोकि सेब्भी लोकेई हुकम नई मन्नोरो एल्हेरेलेइ तैना कैदी केरे ज़ेरे बनोरेन। पन परमेशेरे एन एल्हेरेलेइ कियूं ताके तैन सेब्भन पुड़ दया केरि बटे।

~~~~~

33 वाह! परमेशेरे सेब्भी केरे लेइ भलो आए ते ज़ानी ते अक्लमन्दे, कोई भी तैसेरे खियालन बियांन न केरि बटे ते कोई तैसेरी बत्तां न सेमझी बटे।

34 ज़ेन्चरे पवित्रशास्त्रे मां लिखोरूए

“कोई न ज़ाने पूरभुएरे मने मां कुने

या तैस सलाह देनेबालो कौने?

35 या केने पेइले तैस किछ दित्तू

ज़ेसेरो बदलो तैस दित्तो गाए?”

36 किजोकि सब किछ परमेशेरी तरफां आए। तैन्नी सब किछ बनाव, ते तैसेरे ज़िरिये, ते तैसेरेलेइ सब किछे। तैसेरी आदर सदा भोती राए। आमीन।

12

~~~~~

1 एल्हेरेलेइ हे दूलाव ते बेइनव, अवं तुसन कां परमेशेरी दया याद केरताई बिनती केरतां ज़ोताई, कि अपनि ज़िन्दगी पवित्र, ते ज़ेरू परमेशेरे पसंद एइते, बलिदान केरतां चाढ़ा; ईए परमेशेरी आराधना केनेरो सही तरीको आए।

2 ते इस दुनियारे तरीके पुङ न ज़ला, पन परमेशर तुशशी सोच बदलेरे ज़िरिये सेइं तुशशो चालचलन भी बेदलोए, ताके तुस ज्ञानथ कि परमेशर तुसन करां कुन चाते, या ज़ै रोड़ी ते ज़ैन तैस पसंद एइते, ते सिद्ध आए ।

3 किजोकि अवं तैस परमेशरेरे अनुग्रहरे वजाई सेइं ज़ै मीं मैलो, तुसन मरां हर एक्की सेइं ज़ोताई, कि ज़ेन्चरे समझो रू लोडे, तैस करां कोई भी अपनो आप जादे न समझे, यानी कि ज़ेतरो विश्वास परमेशरे तुसन दित्तोरोए तैसेरे मुताबिक अपने आपे समझा ।

4 किजोकि ज़ेन्चरे इशशे एक्की जिसमे मां बड़े अंगन, ते सेब्भी अंगां केरू अक्कां ज़ेरू कम नईं ।

5 तेन्चरे अस ज़ैना मसीह पुङ विश्वास केरतम, अस भी तैसेरे जिसमेरे ज़ेरे बने, ते अस तैसेरे अंग आम ते अस एक्की होरि सेइं जुडोरेम ।

6 ते ज़ैखन कि तैस अनुग्रहरे मुताबिक ज़ै परमेशरे असन दित्तोरूए, असन अलग-अलग वरदाना मैलोरन । ते ज़ैस भविष्यवैनरू वरदान मैलोरूए, तै विश्वासेरे मुताबिक भविष्यवाणी केरे ।

7 अगर सेवा केरनेरू वरदान मैलेरूए, त होरि केरि सेवाई मां लगगोरो राए, अगर कोई शिखालने वालो भोए, त शिखालने मां लगगोरो राए ।

8 अगर तुशशू वरदान हिम्मत देने बालू भोए त तुसेईं हिम्मत देती लोडे रावरी, अगर कोन्ची दान देनेरू वरदान मैलोरू भोए तैने खुल्ले दिले सेइं लोडे दितोरू, अगर केन्ची अगवाई केरनेवालोए, तै जोशे सेइं अगवाई केरे, ते ज़ै दया केरे तै खुशी सेइं दया केरे ।

9 तुशशो प्यार सच्चो भोए; बुरैई सेइं नफरत केरा; भलाई केरने मां लगगोरो राथ ।

10 भाईचारेरे प्यारे सेइं एक्की होरि सेइं प्यार केरा; आदरी सेइं होरन एप्पू करां रोडो समझा ।

11 मेहनत केरने मां आलस न केरा; आत्मिक जोशे सेइं भेरोरे राथ; पूरे दिले सेइं प्रभुएरी सेवा करते राथ ।

12 ज़ै उमीद तुसन आए तैस मां मघन राथ; मुसीबती मां मजबूत राथ; प्रार्थना केरने मां लगातार लगगोरो राथ ।

13 परमेशरेरे लोकन ज़ैन किछ् ज़रूरी भोए, तैस मां तैन केरि महत केरा; मेहमानां केरि आदर करते राथ ।

14 अपने सताने बालन बरकत देथ; बरकत देथ फिटकार न देथ ।

15 आनन्द केरनेबालन सेइं साथी आनन्द केरा, ते लेरां देने बालन सेइं साथी लेरां देथ ।

16 एप्पू मांमेइं मेल मलाप रखा; घमण्ड न केरा; गरीब लोकन सेइं साथी साथ रखा; इन न समझा कि तुस बड़े अक्लमन्द आथ ।

17 बुरैइयरे बदले केन्ची सेइं बुराई न केरा; ध्यान देथ ते तैन्ने केरा ज़ैन गल्लां सेब्भी केरि नज़री मां रोड़िन ।

18 ज़ेतूरू भोइ सकते, सेब्भी मैनन् सेइं साथी मेल मलाप रखा ।

19 हे ट्लारव अपनो बदलो न नेथ; पन परमेशरे तुशशे लेइ बदलो नेने देथ, किजोकि पवित्रशास्त्रे मां प्रभु ज़ोते, “बदलो नेनो मेरू कम्मे, ते अर्वे बदलो देइलो ।”

20 पन पवित्रशास्त्र ज़ोते


“अगर तेरो दुश्मन हलुखोरो त तैस रोट्टी खूवा;

अगर ट्लिशोरो भोए, त तैस पानी पीया;

किजोकि एरू केरने सेइं तू तैस शरमिन्दो केरतस ।”

21 बुरैई करां न हारा पन बुराई भलैई सेइं ज़ीतां ।

## 13



1 हर कोई मैन्हु प्रधान अधिकारी केरे अधीन राए; किजोकि कोई अधिकार एरो नईं, ज़ै परमेशरेरे तरफां न भोए; ते ज़ैना अधिकारी आन, तैना परमेशरे ठहराबरेन ।

2 एल्हेरेलेइ जै कोई अधिकैरी केरि खलाफत केरते, तै परमेशेरे कानूनेरी खलाफत केरते, ते जैना लोक परमेशेरे कानूनेरी खलाफत केरतन तैन सज़ा मैल्लनीए।

3 किजोकि हेरा हाकिम तैस मैन्हु जै भलाई केरते तैस न डराए, पन तैस मैन्हु डराते जै बुरू कम केरते। अगर तुस हाकिमे करां डरनू न चाथ त भलाई केरते राथ ते तुसन हाकिमे करां शाबाश मैलेली

4 हाकिम परमेशेरो सेवके ते तेरू भलू केरनेरे लेइ आए, पन अगर तू बुराई केरस, त तू डर, किजोकि तैस कां तलवार बेफैइदी नई, ते तै परमेशेरो सेवके; जै बुरू कम केरनेवाले पुइ कोप आनते।

5 एल्हेरेलेइ हाकिमेरे लेइ तुशू समर्पण ज़रूरी आए न सिर्फ परमेशेरे सज़ारे वजाई सेइं बल्के तुशू अपने ज़मीरेरे वजाई सेइं।

6 एल्हेरेलेइ धड़त भी देतथ, किजोकि हकोमत केरनेवाले परमेशेरे सेवकन, ते सदा एस्से कम्मे मां लगगोरो रातन।

7 एल्हेरेलेइ हर केन्चेरू हक देथ, जेसेरी धड़त बनतीए तैस धड़त देथ; जेसेरी चुंगी बनतीए तैस चुंगी देथ; जेसेरी इज़्जत ते आदर केरी लोडे तैसेरी इज़्जत ते आदर केरा।

~~~~~

8 एप्पू मामेई प्यारेरे अलावा ते केन्ची गल्ली मां कोन्ची चीज़ेरे कर्जदार न राथ; किजोकि जै होरन सेइं प्यार केरते, तैने परमेशेरे दित्तोरे कानूनेरे हुक्म पूरे किये।

9 किजोकि मूसेरे कानूने मां बडे हुक्म दित्तोरेन जेन्चरे कि “बदमाशी न केर, कल्ल न केर, चोरी न केरा, लालच न केर,” ते एन केरे अलावा होरो कोई भी हुक्म भोए त तैन सैरी केरि बुनीयाद इस्से गल्ली मांए, “अपने पड़ोसी सेइं अपने बराबर प्यार केर।”

10 प्यार पड़ोसेरी किछ भी बुराई न केरे, एल्हेरेलेइ जै प्यार केरते तै परमेशेरो दित्तोरो कानून पूरे केरते।

11 एल्हेरेलेइ वक्त पिशैनतां इन केरा। तुशू लेइ निडली मरां बीङ्गनेरो वक्त ओरोए, किजोकि जैस वक्ते असेई विश्वास कियोरो थियो, तैस वक्तेरे खियाले सेइं हुनी इशू मुक्ति नेडीए।

12 इस बुरे दुनियाई मां रानेरो इशू वक्त लगभग खतम भोरोए, जेन्चरे रात टलेकड़ोने वालीए, ते लौ भोने वाली आए ते मसीहेरो वापस एजनेरो वक्त नेडे ओरोए, एल्हेरेलेइ असां तैना कम्मां शास्र जैना लोक आंधरे मां केरतन ते तैना हथियार बंधम जैना लोई मां इस्तेमाल भोतन।

13 एल्हेरेलेइ अस भी तैन लोकां केरो जेरो बर्ताव केरम, जैना लोई मां जिन्दगी जीतन न कि आंधरे मां, न कि नचने, नशो केरने, न बदमाशी केरने मां, ते लुचपने, लडैई, ते जलनी मां मसत भोम

14 बल्के जेन्चरे प्रभु यीशु मसीहे जीवं तेन्चरे तुस भी जीथ, ते जिसमेरी खुवैइशां पूरी केरनेरी कोशिश न केरा।

14

~~~~~

1 जै विश्वासे मां कमज़ोरे, तैस तुस कबूल केरा, पन तैस कुन कियेरू लोडे ते कुन न लोडे कियेरू तैस पुइ बेंस केरनेरे लेइ नई।

2 किजोकि एक्की विश्वासे, कि सब किछ खानू जेइजे, पन जै विश्वासे मां कमज़ोरे, तै सिर्फ शागां खाते।

3 सब किछ खाने बालो तैस पुइ दोष न लाए जै सब किछ न खाए, किजोकि परमेशेरे तैना दुइये कबूल कियोरेन।

4 तू कौन आस जै होरेरे नौकरे पुइ दोष लातस? तैनी खरू कियूं या बुरू इसेरो फैसलो तैसेरो मालिके केरेलो, बल्के तै कामयाब भोलो; किजोकि प्रभु ते इस काबल बनोरोए।

5 एन्चरे किछ लोक एक्की दिहाड़ी होरि करां बेधतां मन्तन, ते किछ सब दिहाड़े बराबर मन्तन, हर केन्ची इन याकीन कियेरू लोडे कि जैन तैना सोचतन तैन ठीके।

6 जै कोन्ची दिहाड़े मन्ते, तै परभुए इज्जत देनेरे लेइ मन्ते। जै सब किछ खाते, तै भी परभुए इज्जत देनेरे लेइ खाते, किजोकि तै परमेशेरू शुक्र करते, ते जै सब किछ न खाए, परभुएरे लेइ न खाए ते परमेशेरू शुक्र करते।

7 किजोकि असन मरां कोई न अपने लेइ जीते, ते न कोई अपने लेइ मरते।

8 किजोकि अगर अस जीतिम त, परभुएरे लेइ जीतिम; ते अगर अस जीमि या मरम, अस परभुएरेम।

9 किजोकि मसीह एल्हेरेलेइ मरो ते जीतो भी भोव, ताके मरारे ते जीतां दुइयां केरो परभु भोए।

10 तू अपने विश्वासी द्वालाए पुड़ किजो दोष लातस? या तू फिरी किजो अपने विश्वासी द्वालाए घटिया समझतस? अस सब परमेशेरू आदालतरे तखतरे सामने खड़े भोनेम।

11 जेन्चरे पवित्रशास्त्रे मां लिखोरूए,

कि परभु ज्ञाते, “अवं एप्पू तुसन सेइं वादो केरताई,

हर कोई मीं कां जैधू टिकेली,

ते हर अक जिभ परमेशेरी इकरार केरेली।”

12 ते असन मरां हर केन्ची अपने-अपने कम्मां केरो लेखो परमेशेरे देलो पेनोए।

*~~~~~*

13 एल्हेरेलेइ अगरोवं जो अस एक्की हारि पुड़ दोष न लाम, पन तुस एने थापा, कि कोई भी तुशे वजाई सेइं तुशो विश्वासी द्वाला या बेडन पाप न केरे।

14 अवं ज्ञानताई, ते परभु यीशुएरे तरफां मीं पक्कू याकीन भोवं, कि कोई खानेरी चीज अपने आपे सेइं अशुद्ध नई, पन जै तैस अशुद्ध समझते, तैसेरेलेइ अशुद्ध आए।

15 अगर तेरो विश्वासी द्वालाए या बेडन तेरे खाने सेइं दुःख पुजे ते तै अगरोवं जो परमेशेरे पुड़ विश्वास केरनो शारे, त फिरी तू प्यारेरे रिति पुड़ न चलस, एरी चीजां न खा। जेसेरे लेइ मसीह मरो ते तू अपने खाने सेइं तैस नाश न केरे।

16 एल्हेरेलेइ जैन कम तुशे लेइ रोडू आए ते जेइजे, तैसेरे बारे मां होरन तुहीन केनेरो मौको न दे।

17 किजोकि परमेशेरे राज्जे मां खानू पीनू माईने न रखे; माईने रखते धार्मिकतारी जिन्दगी जीनी ते मेल मलाप, ते आनन्द तै आए जै पवित्र आत्मा देते।

18 जै कोई इस रिति सेइं मसीहेरी सेवा करते, तैस सेइं परमेशेरे खुश भोते, ते मैन्हु भी तैसेरे बारे मां रोडू ज़ोतन।

19 एल्हेरेलेइ असेईं तैना कम्मां कियोरां लोइन जैन सेइं लोक मेल मिलापे सेइं रेइ बटन, ते एक्की हारि विश्वासे मां मज़बूत केरम।

20 तुस जेरू खानू चातथ तैसेरे वजाई सेइं परमेशेरू कम न बगाड़ा। सब किछ शुद्ध त आए, पन तुशे खाने सेइं अगर होरो कोई मैन्हु परमेशेरे पुड़ विश्वास केरनो शारे त तैसेरेलेइ बुरू आए।

21 रोडू त इन्ने, कि तू न मास खास, ते न शराब पीस, जेसेरे वजाई सेइं तेरे द्वाला या बेडन पाप केरे।

22 तेरो इन चीजां केरे बारे मां जै विश्वासे, तै तेरे ते परमेशेरे दरमियाने मां आए, धने तैए, जै तैस गल्ली मां, जै तै ठीक समझे, अपने आपे दोषी न ठहराए।

23 पन जै शक केरतां खाते, तै सज़ारे काबल भोइ जेव, किजोकि तै विश्वासे सेइं न खाए, ते जैन किछ केरस ते विश्वास केरस कि एन ठीक नई त तू पाप केरतस।

## 15

*~~~~~*

1 एन्चरे अस जैना विश्वासे मां मज़बूत आम, असेईं एन कियोरू लोड़े कि जैना विश्वासे मां कमज़ोर आन तैन केरि मद्दत केरम; न कि अपनी आप खुश केरम।

2 असन मरां हर कोई अपने विश्वासी दलान ते बेइन्न खुश केरनेरे लेइ मद्दत केरे ज़ैस सेइं तैन केरो विश्वास मज़बूत भोए ।

3 किजोकि मसीहे भी अपनो आप खुश न कियो, पन ज़ेन्चरे पवित्रशास्त्रे मां लिखोरूए, “तेरे तुहीन केरनेबालोई मेरी भी तुहीन की ।”

4 ज़ेत्तरी गल्लां पेइली पवित्रशास्त्रे मां लिखोरिन, तैना इश्शे शिक्षारे लेइ लिखोरिन, कि अस सबरी ते पवित्रशास्त्रे करां हिम्मत हासिल केरम ताके असन उमीद भोए (परमेशर तैन्ने केरेलो ज़ेसेरे बारे मां तैनी वादो कियोरोए) ।

5 अवं प्रार्थना केरताई कि परमेशर तुसन सबर ते हिम्मत दे, ताके तुस यीशु मसीह पत्ती बल्लते-बल्लते अक भोइतां ज़ीथ ।

6 ते तुस सारे अकोट्टे भोइतां अक भोइतां एक्की आवाज़ी मां परमेशर, इश्शे प्रभु यीशु मसीहेरे बाजेरी बड़याई केरा ।

~~~~~

7 एल्हेरेलेइ, एक्की होरि कबूल केरा, ज़ेन्चरे मसीहे तुस कबूल कियोरेथ; एल्हेरेलेइ एन केरा ताके लोक परमेशररी बड़याई केरन ।

8 अवं ज़ोताई, कि ज़ैना वादे दादन पड़दादन दित्तोरे थिये, तैना वादे पूरे केरनेरे लेइ ते इन वांद् केरनेरे लेइ कि परमेशर सच्चो, मसीह खतनो कियोरे लोकां केरो (यानी यहूदी केरो) सेवक बनो ।

9 ते गैर कौमां भी परमेशरेरे दयारे वजाई सेइं परमेशररी बड़याई केरन, ज़ेन्चरे पवित्रशास्त्रे मां लिखोरूए,

“गैर कौमन मां अवं तेरू शुकर केरेलो,

ते तेरे नव्येरू भजन केरेलो ।”

10 फिरी होरि ठेरी लिखोरूए,

“हे गैर कौमां केरे लोकव, परमेशरेरे लोकन सेइं साथी आनन्द केरा ।”

11 ते फिरी पवित्रशास्त्रे ज़ोते,

“हे गैर कौमां केरे लोकव, प्रभुएरी बड़याई केरा;

ते हे मुलखां-मुलखां केरे सब लोकव; तैसेरी बड़याई केरा ।”

12 ते फिरी यशायाह नबी पवित्रशास्त्रे मां लिखोरूए;

“यिश्शेरू अक वंश निसेलू,

ते तै गैर कौमन पुड़ हकोमत केरेलो ।

तैस पुड़ गैर कौमां उमीद रेखेली ।”

13 अवं प्रार्थना केरताई परमेशर ज़ै उमीदरो देनेबालोए तुसन तैस पुड़ विश्वास केरनेरे वजाई सेइं सब किसमेरे आनन्द ते शैनति सेइं भरे, कि पवित्र आत्मारि शक्ति सेइं तुश्शी उमीद बद्धती गाए ।

~~~~~

14 हे मेरे दूलाव ते बेइनव, अवं एप्पू भी तुश्शे बारे मां ज़ानताई, कि तुस भी भलैई सेइं भेरतथ, ते तुसेईं कुन कियेरू लोडे तुस रोडे च़ारे ज़ानतथ ते एक्की होरि शिखैली बटतथ ।

15 फिरी भी मीं ज़ैखन कैखन याद करानेरे लेइ तुसन बडे दिलेरी सेइं लिखू, इन तैस अनुग़रहेरे वजाई सेइं भोवं, ज़ै परमेशरे मीं दित्तोरोए ।

16 कि अवं गैर कौमां केरे लेइ यीशु मसीहेरो सेवक भोइतां परमेशरेरे खुशखेबरारी सेवा याजकेरी ज़ेरि केरि; ज़ैस सेइं गैर कौमां केरे लोक परमेशरे दानेरे रूपे मां दित्ते गाले, ज़ैस सेइं तै खुश भोलो, ज़ैना पवित्र आत्मा पवित्र बनोरेन ।

17 अवं यीशु मसीहेरे वजाई सेइं परमेशररी सेवाई पुड़ घमण्ड केरि बटताई ।

18 किजोकि तैन गल्लां केरे अलावा मीं होरि कोन्ची गल्लां केरे बारे मां ज़ोनेरी दिलेरी नई, ज़ैना मसीहे गैर कौमन केरे लेइ वचन, ते कर्म,

19 ते निशान ते बडे-बडे कम्मां केरे शक्ति सेइं, ते पवित्र आत्मारे शेक्तेरे जिरिये कियां, इडी तगर कि मीं यरूशलेम नगरे मरां देइतां चेंवरे पासन इल्लुरिकुम इलाके तगर मसीहेरो खुशखबरापो पूरो-पूरो प्रचार कियो।

20 पन मेरे मनेरी उमंगे, कि जैडी-जैडी यीशु मसीहेरी खुशखबरी प्रचार नई भोरो, तैडी खुशखबरी शुनेई; एरू न भोए होरेरे मुनीयादी पुड घर बनेइं।

21 पन जेन्चरे पवित्रशास्त्रे मां लिखोरूए, तेन्चरे भोए,  
“जैन तैसेरे बारे मां कधी नई ज़ोरू, तैना लालहे,  
ते ज़ैनेई तैसेरे बारे मां नई शुनोरू तैना समझेले।”

**एरू एरू एरू एरू एरू एरू एरू एरू एरू एरू एरू**

22 एल्हेरेलेइ अवं तुसन कां एजनेरे लेइ बार-बार रुकोरो राव।

23 पन हुनी मीं इन इलाकन मां तैन लोकन खुशखबरी शुनेइतां अपनू कम पूरू कियूं, ज़ैनेई मसीहेरे बारे मां न थियूं शुनोरू, ते मीं बडे सालां केरि तुसन कां एजनेरी इच्छाए।

24 एल्हेरेलेइ ज़ैखन अवं इसपानिया मुलखे मां गेइ त तुसन मेइं एइते गेइलो, किजोकि मीं उमीदे, कि तैस सफेरे मां तुसन सेइं मिली, ते ज़ैखन तुसन सेइं मिली त अवं खुश भोई, ते अवं चाताई तुस मेरे इसपानिया गानेरे सफेरे लेइ मेरी मद्दत केरा।

25 पन हुनी त परमेशेरे लोकां केरि सेवा केरनेरे लेइ यरूशलेम नगरे गाताई।

26 किजोकि मकिदुनिया ते अखाया इलाकेरे केरे विश्वासी लोकन इन रोडू लग्गू, कि यरूशलेम नगरेरे परमेशेरे लोकां केरे लेइ ज़ैना गरीब आन, किछ् चन्दो केरन।

27 तेनेई एन खुशी सेइं कियूं, तैना यरूशलेम नगरेरे लोकां केरे कर्जदारन, यहूदी लोकेई गैर कौमरे लोकन परमेशेरे तरफां रोडी चीजां दिती, ते इन रोडी कि गैर कौमां केरे लोक इस दुनियारी रोडी चीजां यहूदन देन।

28 अवं पेइलो यरूशलेम नगरे जो चलोरोई ताके ज़ै चन्दो अकोट्टो कियोरोए तैन देई, तैट्टां पत्ती अवं तुसन कां रोम नगरे मां एइतां इसपानिया मुलखे जो गेइलो।

29 ते अवं जानताई, कि ज़ैखन तुसन कां एज्जेलो, त मेरे एजनेरे वजाई सेइं मसीह तुसन पूरे तरीके सेइं बरकत देलो।

30 ते हे ढलाव ते बेइनव, प्रभु यीशु मसीह पुड इश्शे विश्वासेरे वजाई सेइं ते पवित्र आत्मारे दित्तारे प्यारेरे वजाई सेइं अवं तुसन कां विनती केरताई, कि मीं सेइं साथी मेरे लेइ परमेशेरे कां लगातार प्रार्थना केरा।

31 कि अवं यहूदिया इलाकेरे गैर विश्वासी लोकन करां बच्चोरो रेई, परमेशेरे तैना लोक ज़ैना यरूशलेम नगरे मां आन खुशी सेइं तै मद्दत कबूल केरन ज़ै अवं तैन कां नेइलो।

32 ते अवं परमेशेरी मेर्जी सेइं आनन्दे कां एज्जी ते मीं तुसन साथी आराम मैल्ले।

33 अवं प्रार्थना केरताई, कि शान्ति देनेवालो परमेशर तुसन सेब्बन सेइं साथी भोए। आमीन।

## 16

**एरू एरू एरू एरू एरू एरू एरू एरू एरू एरू**

1 अवं तुसन सेइं फोबेरे बारे मां, ज़ै इश्शी विश्वासी बेइने ते किखिरया नगरेरे कलीसियारी सेवकाए, अवं चाताई तुस तैसेरी इज्जत केरा।

2 कि तुस जेन्चरे पवित्र लोकन सेइं कियेरू लोडे, तैस प्रभु मां कबूल केरा; ते ज़ैस गल्ली मां तैस तुसन करां केन्चेरी मद्दती ज़रूरत भोए, तैसेरी मद्दत केरा; किजोकि तै भी बडां केरि मद्दत केरनेवाली बल्के मेरी भी मद्दत केरनेवाली भोरीए।

3 पिरिस्क्ल्ला ते अक्विला ज़ैना प्रभु यीशु मसीह मां मेरे मद्दगारन, नमस्कार।

4 तैनेई मेरे जान बचानेरे लेइ अपनि जान खतरे मां रखोरि थी। सिर्फ अवं ए नई, बल्के गैर कौमां केरि सैरी कलीसियां भी तैन केरू शुकर केरतिन।

5 ते तैस कलीसिया भी नमस्कार जैना तैन केरे घरे मां अकोट्टी भोतीए। मेरे टलारे इपैनि तुसे भी जै आसिया इलाकेरो मसीह पुइ विश्वास केरनेबालो पेइलो विश्वासी ए, नमस्कार।

6 मरियम जैसां तुशे लेइ बड़ी मेहनत केरि, नमस्कार।

7 अन्दरुनीकुस ते युनियासे जै मेरो कुटमेरोए, ते मीं सेइं साथी कैद भोरो थियो, ते परेरितन मां मुशूर, ते मीं करां पेइले मसीह मां थी, नमस्कार।

8 अम्पलियातुसे, जै प्रभु मां मेरो टलारोए, नमस्कार।

9 उरवानुसे, जै मसीह मां इशशो मद्दतगार, ते मेरे टलारो इस्तखुसे नमस्कार।

10 अपिल्लेसे जै मसीह मां ईमानदार निस्सो, नमस्कार। अरिस्तुबुलुस ते तैसेरे टब्बरे जो नमस्कार।

11 मेरे कुटमेरे हेरोदियोने नमस्कार। नरकिस्सुसेरे टब्बरे जैना लोक प्रभु मां आन, तैन नमस्कार।

12 तरूफैना ते तरूफोसा जैन कुआन्शेई प्रभु मां बड़ी मेहनत की, नमस्कार। टलारी मसीही बेइन पिरसिस जैसां प्रभु मां बड़ी मेहनत की नमस्कार।

13 रूफुसे जै प्रभु मां चुनोरोए, ते तैसेरी अम्मा जै मेरी अम्मारी जेरि ए, दुइयन नमस्कार।

14 असुंकिरतुस ते फिलगोन ते हिमांस ते पतरुवास ते हर्मांस ते तैन केरे सैथी विश्वासी लोकन नमस्कार।

15 फिलुलुगुस ते यूलिया ते नेर्युस ते तैसेरी बेइन, ते उलुम्पास ते तैन केरे साथी सब परमेशरेरे लोकन नमस्कार।

16 मसीहेरे प्यारे सेइं एक्की होरि जो नमस्कार केरा। तुसन भी मसीहेरे सैरी कलीसियारे तरफां नमस्कार।

~~~~~

17 हुनी हे द्वालाव ते बेइनव, अवं तुसन कां विनती केरताई, कि जैना लोक तैस शिक्षारे खलाफ जै तुसन मांए, खलबली बनातन, ते ठोकर खानेरी वजा भोतन, तैन करां खबरदार राथ; ते तैन करां दूर राथ।

18 किजोकि एरे लोक इशशे प्रभु यीशु मसीहेरी नई, पन अपने फैइदेरे लेइ सेवा केरतन; ते तैना रोड़ी-रोड़ी गल्लां केरतन ते चापलूसी सेइं सिधे सादे लोकन धोखो देतन।

19 तुशे हुक्म मन्नेरे बारे मां सेब्मी लोकन पतो ज़लोरोए; एल्हेरेलेइ अवं तुशे बारे मां आनन्द केरताई; पन अवं इन चाताई, कि तुस भलाई केरनेरे लेइ अक्लमन्द बना, पन बुराई केरनेरे लेइ सादे बना।

20 शान्ति देनेबालो परमेशर शैताने जल्दी तुशे पवन सेइं इलेन्बालो। इशशे प्रभु यीशु मसीहेरो अनुग्रह तुसन पुइ भोतो राए।

21 तीमुथियुस जै मीं सेइं साथी कम केरते, ते लूकियुस ते यासोन ते सोसिपतरुस मेरे कुटुमबी केरे तरफां तुसन नमस्कार।

22 मेरे चिट्टी लिखने बाले तिरतियुसेरू प्रभु मां तुसन नमस्कार।

23 गयुस भी तुसन नमस्कार जोते जेसेरे घरे मां अवं राताई, तैडी कलीसियारे लोक अकोट्टे भोतन। इरास्तुस जै नगरेरो भण्डारीए, ते द्वाला क्वारतुसेरू तुसन नमस्कार।

24 अवं प्रार्थना केरताई, इशशे प्रभु यीशु मसीहेरो अनुग्रह तुसन पुइ भोतो राए। आमीन।

~~~~~

25 हुनी तुसन जै खुशखबरी मीं प्रचार की, मतलब यीशु मसीहेरे प्रचारेरे मुताबिक विश्वासे मां मज़बूत केरि बटते, तैस भेदेरे प्रकाशेरे मुताबिक जै बड़े पेइलो देंतो छुप्पोरो राव।

26 पन हुनी बांदो भोइतां सनातन परमेशरेरे हुक्मे सेइं नेबी केरे किताबां केरे ज़िरिये सेब्मी कौमन जोवरोए, कि तैना विश्वासेरे ज़िरिये सेइं हुक्म मन्नेबाले भोइ गान।

27 तैस्से एक्की बड़े अक्लमन्द परमेशरेरी यीशु मसीहेरे ज़िरिये सदा महिमा भोती राए। आमीन।

## 1 कुरिन्थियों

\*\*\*\*\*

1 अवं पौलुस ई चिट्ठी लिखने लोरोई। अवं, यीशु मसीहेरो प्रेरित भोनेरे लेइ परमेशेरे मेर्जी सेइं कुजावरोई। मेरो विश्वासी साथी सोस्थिनेस भी मीं सेइं साथी आए (जै मेरी मद्दत करने लोरोए)।

2 तुस जैना कुरिन्थुस नगरेरे कलीसियारे विश्वासी आथ, परमेशेरे तुस यीशु मसीह मां अपने लोकां केरे रूपे मां अलग कियोरेथ, ते कने पवित्र भोनेरे लेइ कुजोरेथ। तैन सेब्मी केरां नंब्वे जैना हर ठैरी इश्शे त कने अपने प्रभु यीशुएरे नंब्वे सेइं प्रार्थना केरतन।

3 इश्शे बाजी परमेशेरे, ते प्रभु यीशु मसीहेरे तरफां तुसन अनुग्रह ते शान्ति मैलती राए।

\*\*\*\*\*

4 अवं तुश्शे बारे मां अपने परमेशेरे हर वक्त शुक्र केरताई, एल्हेरेलेइ कि परमेशेरो ई अनुग्रह तुसन पुइ यीशु मसीह मां भोव।

5 किजोकि तुसेईं हर लिहाजे सेइं बेड़ि बरकतां हासिल कियोरिन, किजोकि तुस मसीह सेइं साथी अक आथ। एल्हेरेलेइ तैने तुसन अपनु वचन ज़ोनेरी ते समझनेरी खास काबलीत दित्तोरीए।

6 एन्चरे परमेशेरे तुश्शे लेइ पक्कू कियूं, कि मसीहेरे बारे मां सन्देश सच्चे।

7 हुनी तुसन कां सारां आत्मिक वरदानां आन, किजोकि तुस इश्शे प्रभु यीशु मसीह बांदो भोनेरे बड़े ईतजारे मां आथ।

8 परमेशेरे तुसन आखरी तगर विश्वासे मां मज़बूत भी केरेलो, कि तुस इश्शे प्रभु यीशु मसीहेरे वापस एजनेरे दिहाड़े बेइलजाम भोथ।

9 परमेशेरे एन्चरे केरेलो, किजोकि ज़ैन किछ्छ तै ज़ोते, तैस केरनेरे मां तै वफादारे। ते तैन्ने तुस अपने मट्ठे इश्शे प्रभु यीशु मसीहेरे संगती मां कुजावरेथ।

\*\*\*\*\*

10 हे ढूलाव ते बेइनव, अवं इश्शे प्रभु यीशु मसीहेरे अधिकारे सेइं इन केरनेरी विनती केरताई, कि सब एक्की होरि सेइं राज़ामंद भोथ; ते तुसन मां फिरके न भोन, पन अक मन भोथ, ते अक्के खियाल रख्वा।

11 किजोकि हे मेरे ढूलाव ते बेइनव, खलोएरे टब्बेरे लोकेईं मीं तुश्शे बारे मां ज़ोवरूपे, कि तुसन मां लड़ाई लोरिन भोने।

12 मेरू ज़ोनेरो मतलब ई आए, कि तुसन मरां कोई त अपनो आप, “पौलुसेरे ज़ोते,” कोई “अपुल्लोसेरो,” कोई “कैफारो,” कोई “मसीहेरो ज़ोते।”

13 ज़ैन तुस केरतथ तैन ठीक नई, कुन मसीह वेनटोव? कुन पौलुस क़रूसे पुइ च़ादो जेव? या तुसन पौलुसेरे नंब्वे पुइ बपतिस्मो मैलो?

14 अवं परमेशेरे शुक्र केरताई, कि किरस्पुस ते गयुसेरू अलावा, मीं तुसन मरां केन्ची बपतिस्मो नई दित्तोरो।

15 कि एरू न भोए, कोई ज़ोए, कि तुसन मेरे चेले बन्नेरे लेइ बपतिस्मो मैलो।

16 हाँ मीं याद आऊं, मीं स्तिफनासेरे टब्बेरे भी बपतिस्मो दित्तो; एन केरे अलावा, अवं न ज़ैनी कि मीं होरि केन्ची बपतिस्मो दित्तो।

17 किजोकि मसीहे अवं बपतिस्मो देनेरे लेइ नई, बल्के खुशखबरी शुनानेरे लेइ भेजोरोई, ज़ैखन अवं लोकन परमेशेरो सन्देश शुनाताई त अवं मैन्हु केरे च़लाक खियालां केरो इस्तेमाल न केरि, एरू न भोए कि मसीहेरू क़रूसे वैफ़ेइदू भोए।

\*\*\*\*\*



18 किजोकि कुरूसेरी कथा नाश भोने भालां केरे लेइ बेवकूफीए, पन असन मुक्ति मैलने वालां केरे लेइ परमेशेरी शक्ति आए।

19 किजोकि पवित्रशास्त्रे मां परमेशर जोते,  
“अवं इन हिरेइलो दुनियारे लोकां केरे खियालन कि तैना सोचतन कि तैना ज्ञानी आन, हकीकति मां तैना बेकार खियाल आन।  
अवं साबत केरलो कि तैना अक्लमन्द नई।”

20 त फिरी, अक्लमन्द मैन्हु केरे बारे मां अस कुन ज़ोम? यहूदी केरे कानूनेरे महिर मैन्हु केरे बारे मां अस कुन ज़ोम? इस दुनियारो लोकां केरे बारे मां कुन ज़ोम ज़ैना ज़ोने मां ज़लाकन? परमेशेरे तैना सारे बेवकूफ बनाए ते तैन केरि अक्ल बेफैइदी बकवास साबत की

21 किजोकि ज़ैखन परमेशेरे ज्ञानेरे मुताबिक दुनियां ज्ञान सेइं परमेशर न ज़ानो, त परमेशेरे इन रोडू लग्गु, इस प्रचारेरे बेवकूफेरे मुताबिक विश्वास केरनेबालन मुक्ति दे।

22 यहूदी त निशान चातन, ते गैर कौमां ज्ञानेरे तोपी मां आन।

23 पन अस त तैस कुरूसे पुइ ज़ादोरे मसीहेरो प्रचार केरतम ज़ै यहूदी केरे लेइ ठोकरारी वजाए, ते गैर कौमां केरे लेइ बेवकूफीए।

24 पन ज़ैना परमेशेरे (अपने लोक भोनेरे लेइ) कुजोरेन, कुन यहूदी, कुन गैर कौमां, तैन केरे लेइ मसीह परमेशेरी शक्ति, ते परमेशेरेरू ज्ञाने।

25 किजोकि परमेशेरी बेवकूफी मैन्हु केरे ज्ञाने करां जादे ज्ञान वालीए; ते परमेशेरी कमज़ोरी मैन्हु केरे शेक्ति करां जादे ज़ोरे वालीए।

26 हे दलाव ते बेइनव, इस बारे मां सोचा ज़ेइस परमेशेरे तुस कुजाए तुस केरे थिये, कि न जिसमेरे मुताबिक बडे ज्ञानी, ते न बेइ शक्तिबाले, ते न इज़्जतदार घरेरे कुजाए।

27 ज्ञाने बालन शरमिन्दा केरनेरे लेइ परमेशेरे तैना चुने ज़ैना दुनियारे नज़री मां बेवकूफन। ते ताकतबरन शरमिन्दा केरनेरे लेइ परमेशेरे तैना चुने ज़ैना दुनियारे नज़री मां कमज़ोरन।

28 परमेशेरे तैना चुने ज़ैना दुनियारी नज़री मां नीच्च ते घटिया आन, बल्के ज़ैना अथ्यी भी नई तैना भी चुने, कि तैन ज़ैना आन, बेकार केरन।

29 परमेशेरे एन केरू ताके कोई प्राणी परमेशेरेरे सामने घमण्ड न केरि सके।

30 पन परमेशेरे तुस यीशु मसीह सेइं अक कियोरेथ, ते मसीहेरे ज़िरिये तैने अपनू ज्ञान दित्तोरूए। परमेशर अपने नज़री मां असन धर्मी भी बनाते। मसीहेरे ज़िरिये अस पवित्र किये जे, ते तै असन इशशे पापन करां आज़ाद केरते।

31 ताके ज़ेन्चरे पवित्रशास्त्रे मां लिखोरए, तेन्चरे भोए, “कि ज़ै घमण्ड केरे ते तैस पुइ घमण्ड केरे ज़ैन प्रभुए कियोरूए।”

## 2

~~~~~

1 हे दलाव ते बेइनव, ज़ैखन मीं तुसन परमेशेरेरे बारे मां सन्देश शुनव, त मीं बेइ गल्लां इस्तेमाल न की, कि अवं अपने आपे ज्ञानी हिरेई।

2 किजोकि मीं इन थापेरू थियूं, कि तुसन मां यीशु मसीह, बल्के कुरूसे पुइ ज़ादोरे मसीहेरे अलावा होरि कोई गल न केरि।

3 ते कमज़ोरी ते डरे सेइं तुसन सेइं साथी, ते बडो थरकतो तुसन सेइं साथी राव।

4 ते मेरे शिक्षाई, ते मेरे प्रचारे मां ज्ञानेरी लालचानेरी बैली गल्लां न थी; पन पवित्र आत्मा शेक्ति सेइं इन हिरावं कि ज़ै सन्देश मीं शुनव तै सज़ थियो।

5 एल्हेरेलेइ की तुशशो विश्वास मैन्हु केरे ज्ञाने सेइं नई, पन परमेशेरेरे शेक्ति पुइ निर्भर भोए।

~~~~~

6 फिरी भी अवं आत्मिक सिद्ध लोकन ज्ञानेरो सन्देश शुनाताई, पन इस दुनियारे लोकां केरो नई, ते इस दुनियारे हाकिमां केरू नई जैना नाश भोनेन ।

7 पन अस परमेशेरू तैन छुपेरू ज्ञान भेदेरे रीति पुड़ ज़ोतम, जैन परमेशेरे दुनिया बनाने करां पेड़लू इशे महिमारे लेइ ठहराव ।

8 परमेशेरो ई मकसद इस दुनियारे हाकिमन मरां केन्चे भी न समझो, किजोकि अगर समझते भोथे, त महिमा बालो प्रभु करूस पुड़ न चाढ़थे ।

9 पन जेन्चरे पवित्रशास्त्रेरे मां लिखोरूए,

“कि जैन न एछ्छेई लाव,

न कन्नेई शुनू,

ते जैना गल्लां मैन्हु केरे दिले मां न एई,

तैना सब परमेशेरे तैन केरे लेइ तियार की, जैना तैस सेइं प्यार करतन ।”

10 पन परमेशेरे पवित्र आत्माे ज़िरिये सेइं असन पुड़ बांद् कियूं; किजोकि पवित्र आत्मा सब गल्लां, बल्के परमेशेरी डुगी गल्लां ज्ञानते ।

11 मैनन् मरां कौन केसेरी गल्लां ज्ञानते, सिर्फ मैनेरी आत्मा जै तैस मांए, तेन्चरे परमेशेरी गल्लां भी कोई न ज्ञाने, सिर्फ परमेशेरो आत्मा ।

12 पन असन दुनियारी आत्मा नई, पन तै आत्मा मैलोरोए, जै परमेशेरे तरफांए, कि आस तैन गल्लन समझम, जैना परमेशेरे असन दितोरिन ।

13 एन्हरेलेइ अस मैन्हु केरे ज्ञानेरी शिखेलोरी गल्लन मरां नई, पन पवित्र आत्माे शिखेलोरी गल्लन मरां आत्मिक गल्लां आत्मिक ज्ञाने सेइं समझातम ।

14 पन जिसमानी मैन्हु परमेशेरे आत्माी सच्च्चाई कबूल न केरे, किजोकि तैसेरेलेइ तै बेवकूफीए, ते न तै तैन सेमझी सके, किजोकि तैना सिर्फ पवित्र आत्माे ज़िरिये सेमझी गैतिन ।


15 पन जैन लोकन पवित्र आत्मा मैलोरो तैना, तैन सैरी गल्लन परखतन जैना पवित्र आत्मा शिखालते । पन जैन लोकन पवित्र आत्मा नई मैलोरो तैना, तैन न सेझी बटन जैन पवित्र आत्मा मैलोरोए ।

16 इन सच्च्चा आए, किजोकि पवित्रशास्त्र ज़ोते,

“कोई न ज्ञाने प्रभुएरे मने मां कुने ।”

पन पवित्र आत्मा असन विश्वासी लोकन मसीहेरो मने दितोरिए ।

### 3



1 हे दलाव ते बेइनव, जैखन अवं तुसन कां थियो त तुसन सेइं एन्हरे सब गल्लां न केरि बटो, जेन्चरे आत्मिक लोकन सेइं; पन जेन्चरे तैन सेइं जैना मसीह मां बच्चेन ।

2 मीं तुसन परमेशेरे वचने मरां सिर्फ बुनियादी गल्लां केरि शिक्षा दित्ती ते डुगी सच्च्चाई नई । किजोकि तैस वक्ते तुस तै शिक्षा हासिल केनेरे ते समझनेरे काबल न थियो, बल्के हेजू भी हासिल केनेरे काबल नई ।

3 किजोकि हेजू तगर भी गैर विश्वासी केरे जेरे आथ । एन्हरेलेइ कि जैखन तुसन मां बैर, ते लड़ाइयन, त कुन तुस गैर विश्वासी केरे जेरे न भोए? तुस एरे लोकां केरि जेरी ज़िन्दगी ज़िने लोरेथ, जैन केरो रिश्तो प्रभु सेइं न भोए ।

4 एन्हरेलेइ अक ज़ोते, “अवं पौलुसेरोई,” ते होरो ज़ोते, “अवं अपुल्लोसेरो आई,” त कुन तुस एरे लोकां केरि जेरी ज़िन्दगी ज़िने बाले न भोए, जैन केरो रिश्तो प्रभु सेइं न भोए!

5 अपुल्लोस कौने? ते पौलुस कौने? सिर्फ सेवक, जैन केरे ज़िरिये तुसेईं प्रभु पुड़ विश्वास कियो, असन मरां हर केन्चे कम कियूं जेन्चरे परमेशेरे केनेरे लेइ दित्तू ।

6 अगर अवं तुशशी तुलना ऊडारे सेइं केरि त मीं बीज बेवं, अपुल्लोसे सगू, पन परमेशेरे बडावं ।

7 एल्हेरेलेइ न त लानेबालो किछे, ते न सगगने बालो किछे, पन परमेशर जै बडाने बालोए ।

8 लानेबालो ते सगगने बालो दुइये अक्कन; पन हर मैन्हु अपने-अपने मज्दूरारो फल मैलनोए ।

9 किजोकि अस परमेशरे सेइं साथी कम केरनेबाले आम, तुस एरे ऊडारां केरे जेरे आथ जैन केरो तलक परमेशरे सेइं आए, ते इसेरे आलाव तुशशी तुलना एरे घरे सेइं केरताईं जैन परमेशरे बनावरूपे ।

10 परमेशरे जैन कम मीं केरनेरे लेइ दितोरू थियूं, मीं तैन अक्लमन्दी सेइं कियूं; अवं माहिर मिसरेरो जेरो आईं, मीं तुशशे नगरे मां खुशखबरी प्रचार की ते शुरू मां तुसन यीशु पुइ विश्वास केरनेरे लेइ मदत की, तैटटां बाद जैस कम्मेरी शुरुआत मीं कियोरी थी, होरे मसीही सेवा केरनेबाले तैस बुनियादी पुइ लगातार कम केरते राए । पन असन मरां हर एक्की कम केरनेबाले ध्याने सेइं सोचोरू लोडे, कि असेईं परमेशरेरू कम केन्चरे लोडे कियोरू ।

11 किजोकि यीशु मसीह सच्चि बुनियाद आए, ते होरो कोई होरि बुनियाद न बनेइ सके, तैन इन आए, कोई तुसन मुक्ति हासिल केरनेरे लेइ नव्वीं शिक्षा न शिखैली बटे, मीं तुसन सेइं पेइलू ज़ोवरू कि परमेशर असन यीशु मसीहेरे ज़िरिये मुक्ति देते ।

12 ते अगर कोई इस मुनीयादी पुइ सोन्नु चाँदी या कीमती घोड या कैडु या घास फूसरो रदो रखते ।

13 जैखन मसीह फिरि वापस एज्जेलो, त अग हर एक्केरे कम्मे परखेली, ते अग हर मैनेरे कम्मेरी कीमत हिराली ।

14 जेसेरू कम तैस अग्गी सेइं न फुकोलू, तैस मज्दूरी मैलनीए ।

15 ते अगर केन्चेरू कम फुकोलू, त तैस नुकसान भोलो; पन तै एप्पू बन्नोए पन फुकोते-फुकोते ।

16 कुन तुस न ज्ञानथ, कि तुस परमेशरेरू मन्दरथ, ते परमेशरो आत्मा तुसन मां रहते?

17 अगर कोई तुसन नुकसान पुजाए, त परमेशर तैस नाश केरेलो; किजोकि परमेशरेरू मन्दर पवित्ते, ते तैन तुस आथ ।

18 कोई अपने आपे धोखो न दे, अगर तुसन मरां कोई इस दुनियारे लोकन मां अपनो आप अक्लमन्द समझे, त तैस दुनियारी नज़री मां बेवकूफ बनोरू लोडे; ताके परमेशरेरे नज़री मां सच्चे ज्ञानी बने ।

19 किजोकि इस दुनियारी अक्ल परमेशरे कां बेवकूफीए, जेन्चरे पवित्तरशास्त्रे मां लिखोरूए; “परमेशर जैन्न तैन केरे ज़लैकी मां फसाते ।”

20 ते फिरि पवित्तरशास्त्र इन भी ज़ोते, “परभु जैनी केरे खियालन ज्ञानते कि बेफैइदेन ।”

21 एल्हेरेलेइ कोई मैनन् पुइ घमण्ड न केरे, किजोकि किछ परमेशरे तुशशू भलेरे लेइ दितोरूए ।

22 तैन इन आए कुन अवं पौलुस, कुन अपुल्लोस, कुन कैफा, कुन दुनिया, कुन ज़ीनू, कुन मरनू, कुन ई वक्त, कुन एजनेबालो वक्त, सब किछ तुशशूए ।

23 ते तुस मसीहेरेथ, ते मसीह परमेशरोए ।

## 4

???????? ????????

1 मैन्हु असन मसीहेरे सेवक, ते परमेशरेरे भेदां केरे भण्डारी समझन ।

2 जेन्चरे कि जैस मैन्हु तैसेरे मालिके जैन कम दितोरें भोए, तैन तैन कम केरने मां वफादार लोडे रावरू, जेसेरो तैस हुक्म दितो जेवरोए ।

3 पन मेरे खियाले मां ई गल निकडीए, कि तुस या मैनन् मरां कोई फैसलो केरनेबालो मीं परखे, बल्के अवं अपने आपे न परखी ।

4 किजोकि मेरो ज़मीर मीं कोन्वी गल्ली मां दोषी न ठहराए, पन इस सेइं अवं बेइलजाम न ठहरी, किजोकि मेरो परखने बालो परभुए ।

5 ते ज्ञातगर प्रभु वापस न एज्जे, पेइली केन्चेरो इन्साफ न केरा, तैए लोकां केरे सारे खियाल साफ तरीके ज़ोलो, ज़ैन केरे बारे मां होरो कोई तैन न ज़ाने, ते तैन केरे दिलां केरे इरादे बांदे केरेलो । तैखन परमेशेरी तरफां हर केन्चेरी तारीफ़ भोनीए ।

6 हे दलाव ते बेइनव, मीं इन गल्लन मां तुशशे लेइ अपनि ते अपुल्लोसेरी बेंस, मिसालारे रीति पुइ कियोरीए, एल्हेरेलेइ कि तुस इशशे ज़िरिये सेइं शिखा, कि ज़ैन पवित्रशास्त्रे मां लिखोरे करां अग्रोवं न बधा, ते एक्केरे पासे ते होरेरे खलाफ घमण्ड न केरथ ।

7 केन्चे तू होरन करां रोडो नई बनोरो । सब किछ् तीं परमेशेरे तरफां दित्तू जोरूए, अगर तीं सब किछ् परमेशेरे दितोरू त तुसन घमण्ड केरनेरो अधिकार नई ।

8 तुस त रजोरेथ; तुस दौलतमन्द भोइजेइ, तुसेईं इशशे बगैर राज़ कियूं; पन रोडू भोथू कि तुस राज़ केरेथे ते अस भी तुसन सेइं साथी भोथे!

9 मेरी समझी मां परमेशेरे अस प्रेरित लोक सेब्बना पत्ती तैन लोकां केरे ज़ेरे ठहरावरेम, ज़ैन केरे मौतरो हुक्म भोइ जेवरोए; किजोकि अस दुनियारे ते स्वर्गदूतां, ते मैन्हु केरे लेइ अक तमाशो बनोरेम!

10 लोक असन बेवकूफ समझतन किजोकि अस मसीहेरे बारे मां प्रचार केरतम, पन तुस गेतली सेइं सोचतथ कि तुस अक्लमन्द मसीही आथ! बड़े लोक समझतन कि असन कां कोई अधिकार नई । पन तुस घमण्ड सेइं ज़ोतथ कि तुसन कां परमेशेरे तरफां शक्ति आए, तैना इशशी आदर न केरन पन तुशशी आदर केरतन ।

11 अस इस वक्ते तगर नियन्ने-ट्लिशोरे, ते छिनदोरे लिगइन मां आम, ते धक्के खातम, ते असन कां घर नई;

12 ते अपने हथेईं सेइं कम केरतां मेहनत केरतम । लोक बुरू ज़ोतन, अस तैन बरकत देतम; तैना सतातन, अस झैल्लतम ।

13 तैना बदनाम केरतन, अस नेरमी सेइं गल केरतम, इडी तगर कि, अज़ तगर लोक हेजू भी इशशी इज्जत न केरन, तैना ज़ोतन कि इशशी कोई कीमत नई ।

14 मेरी इना गल्लां लिखनेरो मकसद ई नई कि तुसन छिथेईं, पन अवं तुसन सुधारने चाताई, किजोकि तुस मेरे बच्चां केरे ज़ेरे आथ ज़ैन सेइं अवं प्यार केरताई ।

15 किजोकि अगर मसीह मां तुशशे शिखालनेवाले दश हज़ार भी भोथे, फिरी भी तुशशे बड़े बाजी नई, एल्हेरेलेइ कि मसीह यीशु मां खुशखेबरी सेइं अवं तुशशो बाजी करो ज़ेरो भोव ।

16 एल्हेरेलेइ अवं तुसन कां मिनत केरताई, कि मेरी ज़ेरि चाल च़ला ।

17 एल्हेरेलेइ मीं तीमुथियुसे ज़ैन प्रभु मां मेरू ट़लारू, ते वफादार मट्टूए, तुसन कां भेजोरूए, ते तै तुसन यीशु मसीह मां मेरू चालचलन याद करालो, ज़ेन्च़ेरे कि अवं हर एक्की ठेरी हर कलीसिया मां शिक्षा देताई ।

18 तुसन मरां बड़े लोक सोचतन कि अवं तुसन कां नई एज्नो, एल्हेरेलेइ तैना घमण्ड केरतन ।

19 पन प्रभु चाए त मीं तुसन कां जल्दी एज्नूए, ते न सिर्फ़ तैन घमण्ड केरनेवालां केरि गल्लां नई, पन तैन केरि शेक्ति भी ज़ैनेलो ।

20 किजोकि परमेशेरेरू राज़ गल्लां केरू नई, पन शेक्ति मांए ।

21 अगर हेजू भी तुसेईं बुरी बत नई शारोरी, अवं तुस सेखती सेइं झिडक देइलो । पन अगर तुसेईं बुरी बत शारी त अवं तुसन सेइं नेरमी त कने प्यारे सेइं बर्ताव केरेलो ।

## 5

1 इडी तगर शुन्ने मां ओरूए, कि तुसन मां बदमाशी भोचे, मतलब एरी बदमाशी ज़ेरि गैर विश्वासी लोकन मां भी न भोए, कि अक मैन्हु अपने बेवानी-अम्मा रखते ।

2 तुसेईं त दुःख कियोरो लोइतो थियो ते उदास भोरू लोइतू थियूं, ते ज़ैनी मैने एरू कियूं तै कदोरो लोइतो थियो, पन इसेरे बदले तुस घमण्ड केरतथ ।

3 चाए अवं तुस सेइं साथी नई, पन मेरे विचार तुसन सेइं साथी आन, चाए अवं तैड़ी नई, फिरी भी मने मां इन आए, कि एरू कम करनेवालेरे बारे मां फैसलो करने लोरोई।

4 इन तैन आए जैन केरनेरी ज़रूरत आए। हकीकति मां इशे प्रभु यीशु मसीहेरो अधिकार तुसन कां आए, इन पिशैनतां विश्वासी केरे रूपां अकोटठे भोथ। इन एरू आए कि अवं भी अपने मने मां तैड़ी आई। ते फिरी प्रभु यीशु मसीहेरे ज़िरिये।

5 तैस मैन्हु जैने पापी बर्ताव कियोरो, तैस अपने टोली मरां कढा ते तैस मैन्हु शैतानेरे अधिकारे मां वापस देथ, इस उमीदी सेइं कि तै अपने पापन करां मन फिरालो। किजोकि अगर तै पापन करां मन फिरालो त तैस प्रभु यीशु मसीहेरे इन्साफेरे दिहाड़े मुक्ति मैलेली।

6 घमण्ड केरनू बंद केरा, कि तुस न ज्ञानथ, कि थोड़ जेरू खमीर पूरे सन्नोरे अट्टे खमीर केरते।

7 परानू खमीर केढतां, अपनो आप साफ केरा, कि नंखू सनोरू अट्टू बना; ताके तुस अखमीर राथ, किजोकि इशे भी फ़सह जै मसीहे, तै बलिदान भोरोए।

8 ते एज्जा अस तिहारे मां आनन्द मनाम, न पुराने खमीर सेइं न बुरेई, ते दुष्टेरे खमीर सेइं, पन सिधीयैई, ते सन्नैइयरे बगैर खमीरेरे रोट्टी सेइं।

9 मीं अपने पेइले चिट्ठी मां लिखोरूए, कि बदमाशी केरनेवालां केरि संगती न केरथ।

10 इन नई, कि तुस बिलकुल इस दुनियारे बदमाशी केरनेवाले, या लालच केरनेवाले, या धोखो केरनेवालन, या मूरती पुजने वालां केरि संगती न केरा; किजोकि एन्चरे तुसेई इस दुनियाई मरां निसनू पेथू।

11 मेरू ज़ोनू त इन्ने, कि अगर कोई अपने आपे विश्वासी ज़ोते, ते बदमाशी केरनेवालो, या लालची, या मूरती पुजने वालो, या गैई देनेवालो, या पीने वालो, या धोखो केरनेवालो भोए, त तैस सेइं साथ न रेखतथ, बल्के एरे मैन्हु सेइं साथी रोट्टी भी न खेइयथ।

12 ई मेरी ज़िमेवारी नई, कि जैना लोक विश्वासी नई तैन केरि निन्दा केरि। पन हकीकति मां तुसेई तैन लोकन सज़ा दित्तोरी लोड़े जैना तुशे कलीसियारे हिस्सो आन।

13 पन जैना विश्वासी नई तैन केरो इन्साफ परमेशर केरते पन पवित्रशास्त्र ज़ोते, बुरू कम केरनेवाले मैन्हु अपने टोली मां एजने न देथ।

## 6

### ~~~~~

1 अगर तुसन मरां केन्चरी होरि विश्वासी सेइं लड़ाई भोए, त तुसेई फैसलेरे लेइ अधर्मी हाकिमन कां न लोड़े ज़ोवरू; तुसेई अपने कलीसियारे विश्वासी लोकन ज़ोवरू लोड़े कि तैना तुशे मुकदमेरो फैसलो केरन कि कौन सही ते कौन गलते।

2 कुन तुस न ज्ञानथ, कि परमेशरेरे लोकेई दुनियारे लोकां केरो इन्साफ केरेनोए? ते अगर तुसेई दुनियारे लोकां केरो इन्साफ केरनोए, ते कुन तुस निकड़े करां निकड़े लड़ेइयरो फैसलो केरनेरी कावल नई?

3 तुस ज्ञानतथ कि एजनेवाले वक्ते मां असेई तैन स्वर्गदूतां केरो इन्साफ केरनोए जैना स्वर्गे मरां शारोरे थिये, त पक्को तुस रोज़ेरी आम गल्लां केरो फैसलो केरि बटतथ।

4 अगर एरी गल्लां भोन, त तुसेई तैन केरो फैसलो केरनेरे लेइ तैन कां न लोड़े जेवरी जैन केरि आदर कलीसियारे लोकन मां न की गाए।

5 अवं तुसन छिथानेरे लेइ इन ज़ोताई, कि सन्नै तुसन मां अक भी अक्लमन्द न मैल्लो, जै विश्वासी लोकां केरो फैसलो केरे।

6 बल्के विश्वासी लोकन एप्पू मामेई मुकदमे भोतन, ते तैना भी गैर विश्वासी लोकां केरे सामने।

7 पन सन्नै तुसन मां बड़ी दोष त ईए, एप्पू मामेई मुकदमे केरतथ, बल्के बेइन्साफ किजो न झैल्लथ? अपनो नुकसान किजो न झैल्लथ?

8 बल्के बेइन्साफ केरतथ, ते नुकसान पुज़ातथ, ते तै भी विश्वासी लोकन।

9 कुन तुस न ज्ञानथ, कि वेइन्साफ लोक, परमेशेरे रे राज्जेरे बारिस नई भोने? धोखो न खाथ, न वेश्यागामी, न मूरती केरि पूजा केरनेबाले, न आयाश, न लुच्चे, न तैना जैना मडद मडदन सेइं जिसमानी रिशतो रखतन।

10 न चोर, न लालची, न पीने बाले, न गैई देनेबाले, न अंधेर केरनेबाले परमेशेरे राज्जेरे बारिस भोनेन।

11 तुसन मरां पेइले किछ एरे थिये, पन प्रभु यीशु मसीहेरे नन्वे ते इशे परमेशेरी आत्माई सेइं तुशे पाप धोए जे, ते तुस पवित्तर भोए ते धर्मी ठहराए।

*~~~~~*

12 तुसन मरां किछ ज़ाई बटतन, कि सब चीजां मेरे लेइ जेइज त आन, पन सब चीजां फैइदेरी नई, सब चीजां मेरे लेइ जेइज त आन, पन अवं कोन्ची भी चीजरो गुलाम बेनेलो।

13 तुसन मरां किछ ज़ाई बटतन, खानू पेटेरे लेइए, ते पेट खानेरे लेइ, एन सच्चे, पन परमेशर रोटी भी ते पेटे भी नाश केरेलो, पन जिसम बदमाशी केरनेरे लेइ नई, बल्के प्रभुएरे लेइए; ते प्रभु जिसमेरे लेइए।

14 ते परमेशे, प्रभु यीशु अपने शेक्ति सेइं ज़ीतो केरो, ते तै असन भी ज़ीतो केरेलो।

15 कुन तुस न ज्ञानथ, कि तुशशी जाना मसीहेरे अंगन? ते कुन अवं मसीहेरे अंगन वेश्यारे अंगन सेइं शामिल केरि? नई, कधी नई।

16 कुन तुस न ज्ञानथ, कि ज़ै कोई वेश्याए सेइं न जेइज रिशतो रखते, तै तैस सेइं अक जान भोते? किजोकि पवित्तरशास्त्र ज़ोते, “कि तैना दुइये अक जान भोलां।”

17 ते ज़ै प्रभुएरी संगती मां रहते, तै तैस सेइं साथी अक आत्मा भोते।

18 बदमाशी केरने करां दूर राथ, ज़ैतरे होरे पाप मैन्हु केरते, तैना जानरे बेइरन, पन बदमाशी केरनेबालो अपने जानरे खलाफ पाप केरते।

19 कुन तुस न ज्ञानथ, कि तुशशी जान पवित्तर आत्मारू मन्दरे; ज़ै तुसन मां आए, ते तुसन परमेशेरी तरफां मैलोरोए? ते तुस अपने नई पन तुस परमेशेरे आथ;

20 किजोकि प्रभुए अपनि जानरी कीमत देइतां तुस घिनोरेथ, एल्हेरेलेइ अपने जानरे ज़िरिये सेइं परमेशेरी आदर केरा।

## 7

*~~~~~*

1 हुनी अवं तुशे तैन सवालां केरो जुवाब देताई, ज़ैना तुसेईं अपने चिट्ठी मां पुच्छे, तुसेईं पुच्छे, इन रोडू आए कि लोक इला न बनान?

2 हां इन ज़रूरी आए कि बदमाशी केरनेरे डरे सेइं हर मइदेरी कुआन्श, ते हर कुआन्शरो मुन्श भोए।

3 मुन्श अपने कुआन्शरू हक पूरू केरे; ते तेन्चरे कुआन्श भी अपने मुन्शेरू।

4 कुआन्शी अपने जिसमे पुइ अधिकार नई, पन तेसेरे मनशेरो अधिकारे; तेन्चरे मुन्शे भी अपने जिसमे पुइ अधिकार नई, पन कुआन्शी।

5 तुस एक्की होरि करां अलग न भोथ; पन सिर्फ थोडे चिरेरे लेइ बिस्तारे सेइं कि प्रार्थनारे लेइ फुर्सत मैल्ले, ते फिरी अकोटटे भोथ, कि एरू न भोए, शैतान तुसन परखे।

6 पन ज़ैन अवं इन ज़ोने लोरोई ई सुझावे, न कि हुक्म।

7 अवं इन चाताई, कि ज़ेरो अवं अइलाव आई, तेरहे सब मैन्हु भोन; पन परमेशेरे किछन इला केरनू वरदान दित्तरूए, ते किछन अकैल्लू रानेरू वरदान दितोरू।

8 मेरी सल्लाह अइलां ते विधवां केरे ई आए, कि तैना अइलाए रान, जेन्चरे अवं आई।

9 पन अगर तैना अपनी आप कैबू न केरि बटन, त इला बनान, किजोकि इला बनानो इच्छान मां मसत राने करां रोडोए।

10 जैन केरो इला भोरोए, तैन केरे लेइ अवं नई, बल्के प्रभु हुक्म देते, कि कुआन्श अपने मुन्शे करां अलग न भोए।

11 (अगर अलग भोइ गाए, त होरो इला न बनाए; या अपने मुन्शे सेइं फिरी मेल मिलाप केरे) ते मुन्श अपने कुआन्शी न शारे।

12 होरन सेइं प्रभु नई, पन अवं ज़ोताई, अगर केन्ची विश्वासी द्वालाएरी कुआन्श विश्वासी न भोए, ते तै कुआन्श तैस साथी राने सेइं खुश भोए, त तै तैस न शारे।

13 ते ज़ैस कुआन्शरो मुन्श विश्वासी न भोए, ते तै मैन्हु तैस साथी राने सेइं खुश भोए; तै मुन्शे न शारे।

14 किजोकि एरो मुन्श ज़ै विश्वासी न भोए, परमेशर तैस सेइं एरो बताव करते जेन्चरे अपने लोकन सेइं, किजोकि तैसेरी कुआन्श मसीही आए, ते एरी कुआन्श ज़ै विश्वासी न भोए, परमेशर तैस सेइं एरो बताव करते जेन्चरे अपने लोकन सेइं, किजोकि तैसेरो मुन्श मसीही आए। अगर एरू न भोथू कि विश्वास न केरनेबालो मुन्श या कुआन्श परमेशरेरे लोक न भोथे, तैखन तुशे बच्चे भी परमेशरेरे न भोथे। पन हुनी तुशे बच्चे भी परमेशरेरे भोइ जे।

15 पन ज़ै मइद ते कुआन्श विश्वासी न भोए, अगर तैना अलग भोन, त अलग भोने देथ, एस हालती मां कोई विश्वासी द्वालाए या वेइन बन्धने मां नई। पन परमेशरे अस कुजोरेम कि सुखे सेइं ज़ीम।

16 हे कुआन्शव तुस इस गल्ली याद रखा कि तुशे मुन्श तुशे वजाई सेइं मुक्ति हासिल केरि बटतन, ते हे मुन्शव तुस याद रखा कि तुशे वजाई सेइं तुशे कुआन्शां मुक्ति हासिल केरि बेटतन।

~~~~~

17 जैन किछ अवं ज़ोने लोरोई तैसेरो नचोइ ई आए: हर मैन्हु तैस हालती मां रावरो लोइ ज़ै प्रभुए तैस दित्तोरीए ज़ेइस तैनी परमेशेरू कुजानू शुनु। अवं इन सेबभी कलीसियान मां एन्चरे टहराताई।

18 अगर कोई मैन्हु ज़ै खतनो कियेरे कुजोरो; त तै प्रभु यीशु पुइ विश्वास केरते, तैस अपनो आप बगैर खतने बालो हिरानेरी ज़रूरत नई; ते अगर कोई मैन्हु ज़ेसरो खतनो नई भोरो, ते तै प्रभु यीशु पुइ विश्वास केरते, तैस खतनो कराने ज़रूरत नई।

19 न खतनो किछ चीजे, ते न खतनो न करानो, बल्के परमेशरेरे हुक्म मन्ने बडे ज़रूरिन।

20 हर अक ज़ैस हालती मां कुजावरोए, तेन्चरे राए।

21 तू गुलाम थियो ज़ेइस परमेशरे कुजावरो थियो, फिरी भी परेशान न भोथ; पन अगर तू आज़ाद भोइ सकतस, त भो।

22 किजोकि ज़ैना गुलामेरे हालती मां कुजोरेन, तैना प्रभु मां आज़ादन, तेन्चरे ज़ैना प्रभु मां आज़ाद कुजोरेन, तैना मसीहेरे गुलामन।

23 परमेशरे तुस बड़ी कीमत देइतां धिनोरेथ, मैन्हु केरे गुलाम न बना, पन परमेशरेरे गुलाम बना।

24 हे द्वालाव ते बेइनव, ज़ै ज़ैस हालती मां परमेशरे कुजवरोए, तै तैस्से हालती मां परमेशरे सेइं साथी राए।

~~~~~

25 कुवेरी केरे लेइ मीं प्रभु करां कोई हुक्म नई मैल्लेरो, पन प्रभुए दयाई सेइं मीं अक्ल दित्तोरीए, ज़ैस पुइ भरोसो कियो गाते, ते अवं ई सलाह देताई।

26 किजोकि इन दिहाइन मां विश्वासी लोकां केरे लेइ बुरू गल्लां भोने लोरिन, एन्हेरेलेइ मीं लगते कि इन तुशे लेइ रोडूए, अवं ई सलाह देताई कि ज़ैना ज़ेरे आन तैना एन्चरे रान।

27 अगर तेरी कुआन्श, त तू तैस करां अलग भोनेरी कोशिश न केर, ते अगर तेरी कुआन्श नई त तू कुआन्शी न तोप।

28 पन अगर तू इला भी केरस, त पाप नई; ते अगर कुवारी इलाई गाए त कोई पाप नई; पन एरे लोकन इस दुनियाई मां बड़ी परेशनी भोली, ते अवं बचाने चाताई।

29 हे दलाव ते बेइनव, अवं इन ज़ोताई, इशशो इस दुनियाई मां जादे वक्त नई रावरो, एल्हेरेलेइ जादे फिकर न केरा कि तुशशी कुआन्शां आन या नई, पन प्रभुएरी सेवारे बारे मां सोचते राथ।

30 ते तैना ज़ैना लेरां देतन या ज़ैना खुश आन, या ज़ैना अपनि बनानेरे लेइ चीज़न धिन्तन, इन सेम्भी गल्लां केरे बारे मां जादे लोड़े सोचोरू (किजोकि इना सब गल्लां प्रभुएरी सेवा केरनि विसरैली)।

31 तैना ज़ैना दुनियारी चीज़ां इस्तेमाल केरतन, तैनेई तैन सेई लगाव न लोड़े रखेरो, किजोकि ज़ेन्चरे अस ज्ञानतम ई दुनिया जल्दी खतम भोनेवालीए।

32 मेरी इच्छा ई आए कि तुस दुनियारे ज़िन्दगरी खुवाइशन करां आज़ाद राथ, अइलाव मैन्हु प्रभुएरी सेवा केन्चरे केरनि ई फिकर केरते कि प्रभुए खुश केरे।

33 पन इलावरो मैन्हु दुनियारी गल्लां केरि फिकरी मां रहते, कि केन्चरे अपने कुआन्शी खुश रखे।

34 तैने दई चीज़ां केरे बारे मां सोचोरू लोड़े, अपनि कुआन्श खुश केरनेरे बारे मां ते प्रभु खुश केरनेरे बारे मां। इलावरी ते अइलाई मां भी फर्के, अइलाई प्रभुएरी फिकरी मां रहतीए, कि केन्चरे अपनि आत्मा, ते जिसम दुइये पवित्र रखे, पन इलावरी दुनियारे फिकरी मां रहतीए, कि अपने मुन्श खुश रखे।

35 ई गल तुशशे फेइदेरे लेइ ज़ोताई, न कि तुसन फसानेरे लेइ, बल्के एल्हेरेलेइ ज़ेन्चरे लोड़े तेन्चरे कियूं गाए, ताके तुस अक मन भोइतां प्रभुएरी सेवाई मां लोगोरे राथ।

36 ते अगर कोई इन समझे कि, अवं एपनी तैस कुवैरारू हक लोरोई मारने ज़ेसेरी जवानी लोरी दलने, त ज़ेन्चरे चाए तै केरे, इस मां पाप नई, तै तैसेरो इला भोने दे।

37 पन अगर ज़ैने बाजी अपने मने मां पक्को फैसलो कियोरोए, कोन्ची होरेरे दबावेरे अलावा तै केरते, त तैस कां तै अधिकारे ज़ैन तै केरनु चाते। ते अगर तै फैसलो केरते कि तैसेरी कुई ज़ेरि आए तेरही रखे, तै परमेशेरी नज़री मां रोडू कम केरेलो।

38 ज़ै अपनि कुवैरारो इला कराते, तै रोडू केरते, ते ज़ै न कराए तै भी रोडू केरते।

39 ज़ांतगर कोन्ची कुआन्शरो मुन्श ज़ीतो रहते, तांतगर तैस सेई साथी रावरू लोड़े, पन ज़ेइस तैसेरो मुन्श मेरि गाए, ज़ैस सेई चाए इला केरि बटतीए, सिर्फ विश्वासी लोकन मां।

40 पन अगर तै फिरी दुबारां इला न केरे, त मेरे खियाले मां बड़ी धने ते अवं समझताई, कि परमेशेरो आत्मा मीं च़लाने लोरीए।

## 8



1 तुसेई अपने चिट्ठी मां मूरतन कां च़ादोरी चीज़ां केरे बारे मां पुछोरू थियूं, इस बारे मां अस ज्ञानतम, पन ज्ञान असन अपने बारे मां घमण्डी बनाते, पन प्यार सेई होरि केरि तरक्की भोतीए।

2 अगर कोई समझे, कि अवं किछ ज्ञानताई, ते ज़ेरू ज्ञानेरू लोड़े तेरू हेजू तगर न ज्ञाने।

3 पन अगर कोई परमेशेरे सेई प्यार केरते, ते तैस परमेशर पिशानते।

4 एल्हेरेलेइ अवं खानेरे बारे मां जुवाब देनो चाताई, अस मूरती केरे सामने बलिदान कियोरी चीज़ां केरे खानेरे बारे मां ज्ञानतम, कि अस ज्ञानतम कि मूरती सच्चो परमेशर नई, सिर्फ एक्के सच्चो परमेशेरे।

5-6 पन फिरी भी अम्बरे ते धेरतली पुड़ लोक बड़े देवते ते प्रभु ज़ोतन, पन इशशे लेइ अक्के परमेशर, ते इशशो बाजी आए। तैने सैरी चीज़ां बनेइ, अस तैसेरे ज़िरिये ज़ीते रातम। एन्चरे असन कां अक्के प्रभुए ते तै प्रभु यीशु मसीहे। तैसेरे ज़िरिये सब किछ बनव जेवं, अस तैसेरेलेइ ज़ीतेम।



7 पन सेम्भी विश्वासी लोकन इसेरू ज्ञान नई; पन किछ लोक हेजू तगर मूरतन असली भोनेरी सोचनेरी आदते, एल्हेरेलेइ जैखन लोक मूरतन कां चादतन, त तैना असली देबतन पूजा केरे रूपे मां सोचतन ते तैन केरो जमीर कमजोर भोइतां अशुद्ध भोइ गाते ।

8 पन खानू असन परमेशेरे कां न पुजाए, अगर अस न खाम, त असन किछ नुकसान नई, ते अगर खाम त कोई फैइदो भी नई ।

9 पन हुशार राथ, एरू न भोए, कि तुशशी ई आज्ञादी कमजोर विश्वासे वालां केरे लेइ पाप केरनेरे लेइ वजा बने ।

10 किजोकि अगर तीं जैनी मन्देरे मां मूरतन कां चादोरू खातो लाए, ते तै विश्वासे मां कमजोर मैन्हु भोए, ते कुन तैसेरे जमीरे मां मूरती केरे सामने चैद्वोरी चीजां केरे खानेरी दिलेरी न भोली ।

11 एस रीति सेइं तेरे ज्ञानेरे वजाई सेइं तै विश्वासे मां कमजोर दूला जेसेरे लेइ मसीह मरो तै मसीह पुइ विश्वास केरनो न शारे ।

12 एन्चरे तुस अपने विश्वासी लोकन ठोकर पुजेइतां न सिर्फ तैन केरे पापी भोए, बल्के मसीहेरे भी पापी भोले ।

13 इस वजाई सेइं अगर खानू कोन्ची विश्वास केरनेबालेरे लेइ ठोकर भोए, ते अवं कोन्ची तरीके सेइं कधी मास न खेइलो, एरू न भोए कि मेरू खानू कोन्ची विश्वास केरनेबालेरे लेइ ठोकरारी वजा बने ।

## 9

### ????????? ???? ???? ? ? ?

1 अवं जैन केरनु चाताई तैन केरनेरे लेइ आज्ञाद आई । अवं अक प्रेरित आई, मीं प्रभु यीशु लावरोए जे इशुओ प्रभुए, जैन कम मीं प्रभुएरे लेइ कियुं तुस तैसेरो नतीजोथ ।

2 अगर होरे लोक इस गल्ली न मनन कि अवं प्रभु यीशुएरो प्रेरित आई, त दूलाव तुसेईं त लोडे मनोरू । किजोकि मीं ए तुसन कां खुशखबरी आनोरी थी । तुशुओ प्रभु विश्वास इस गल्ली साफ केरते कि अवं हकीकति मां तैसेरो प्रेरित आई ।

3 जैना लोक मेरे प्रेरित भोनेरे अधिकारे पुइ सवाल पुच्छतन, तैन केरे लेइ मेरो ईए फैसलो आए ।

4 कुन असन खाने पीनेरू हक नई?

5 कुन असन अधिकार नई, कि कोन्ची मसीही कुआन्शी सेइं इला बनाम, जेन्चरे होरे प्रेरित, ते प्रभुएरे दूला ते कैफा (यानी पतरस) केरतन?

6 या सिर्फ मीं ते बरनवासे जिनंदगी जीनेरे लेइ कम कियोरू लोडे?

7 को जेरो फौजी अपनु खेइतां जंग केरते? या कौन बाग लेइतां तैसेरो फल न खाए? कौन भैड्डा रेखतां तैन केरू दुद्ध न पीए?

8 अवं इना गल्लां मैन्हु केरि रीति पुइ नई लोरो जेने, मूसेरो कानून भी इन्ने जोते ।

9 एल्हेरेलेइ मूसेरो कानून जोते, तैस मां इन लिखोरूए, "तुस खल्ले मां चलते बार दांतेरू आशी न बँदथ ।" कुन परमेशर दांतां केरि फिकर केरते? नई ।

10 या खास केरतां इशुओ बारे मां लिखोरू, हाँ इशुओ लेइ लिखोरूए, किजोकि ठीके कि जोटलने बालो उमीदी सेइं जोटले, उपाने बालो उमीदी सेइं उपाए ।

11 असेईं तुसन परमेशरओ सन्देश शुनोवरोए । जेन्चरे लोक बीज बेतन तेन्चरे असेईं तुसन मां परमेशरओ वचनेरू बीज बेव । एल्हेरेलेइ तुशुओ फरजे कि इशुओ रोजेरो खर्चा असन देथ ।

12 जां कि तुसेईं होरि लोकां केरि महत की, जैनेईं तुसन प्रचार कियो, त मेरू त कने बरनवासेरू जादे हके । किजोकि अस तुशुओ पेइले प्रेरित आम, फिर भी असेईं अपने जरूरतरे चीजां केरे लेइ ज़बरदस्ती न की, तैसेरे बदले अपने मेर्जी सेइं सब किछ झैल्लू कि मसीहेरे खुशखबरी पुइ विश्वास केरनेरे लेइ केन्चरे लेइ रुकावट बनम ।

13 कुन तुस न ज्ञानथ कि ज़ै पवित्तर चीज़ां केरि सेवा केरते; तै मन्दरे मरां खाते; ते ज़ै बलिदान केरनेरे ठारारी सेवा केरते; तै बलिदान केरनेरे ठारी सेइं शामिल भोते ।

14 एन्चरे परभुए ठहराव, कि ज़ैना लोक खुशखबरी शुनान, तैन केरि ज़िन्दगरो गुज़ारो भी तैन लोकन करां लोड़े भोरो ज़ैना लोक खुशखबरी शुन्तन ।

15 पन मीं इन अधिकारन मरां कोई भी इस्तेमाल न कियो । ते मीं एना गल्लां एल्हरेलेइ नईं लिखोरी, कि मेरे लेइ एरू कियूं गाए । बिलकुल नईं! किजोकि इस करां त मेरू मरनू रोडूए; कि कोई मेरू घमण्ड बेफैइद् ठहराए ।

16 ते अगर अवं खुशखबरी शुनेई, त मेरू किछु घमण्ड नईं, किजोकि इन त मेरे लेइ ज़रूरीए, ते अगर अवं खुशखबरी न शुनेई, त मीं पुड़ अफ़सोस ।

17 किजोकि अगर अवं इन कम अपने मेज़ीं सेइं केरताई, त मीं इनाम मैलेलू । पन अगर इन मेरी मेज़ीं सेइं नईं, पन अगर परमेशेरे ई ज़िमेदारी दित्तोरीए, त अवं कोन्ची इनामेरी उमीद न रेख्खी बेटि ।

18 ते फिरी मेरू कुन इनामे? कि खुशखबरी शुनाने मां मसीहेरी खुशखबरी मुफ्त बेंटी; इड़ी तगर कि ज़ैन खुशखबरी मां मेरू हक्के, तैसेरो पूरो इस्तेमाल केरि ।

19 किजोकि सेब्बन करां आज़ाद भोने पुड़ भी मीं अपनो आप सेब्बी केरो गुलाम बनाव; कि जादे करां जादे लोकन खिचतां ऐनीं ।

20 अवं यहूदी केरे लेइ यहूदी बनो ताके यहूदन खिचतां मसीह मां ऐनीं, ज़ैना लोक यहूदी केरे कानूनेरे अधीन्न तैन केरे लेइ कानूनेरे अधीन न भोने पुड़ भी अधीन भोव, कि तैन ज़ैना कानूनेरे अधीन्न तैन खिचतां मसीह मां ऐनीं ।

21 ज़ैना कानूनेरे अधीन नईं तैन केरे लेइ अवं (पन अवं ज्ञानताई कि अवं परमेशेरे कानूने करां हीन नईं, किजोकि अवं मसीहेरे कानूनेरे अधीन आईं) तेरो बनो, कि तैन खिचतां मसीह मां ऐनीं ।

22 अवं विश्वासे मां कमज़ोरां केरे लेइ कमज़ोर बनो, ताके कमज़ोरन खिचतां मसीह मां ऐनीं, अवं सेब्बी मैन्हु केरे लेइ सब किछु बनो, कि कोन्ची न कोन्ची तरीके सेइं लोकन मुक्ति मैल्ली ।

23 ते अवं सब किछु मसीहेरे खुशखबरेरे लेइ केरताई, कि अवं होरन सेइं साथीं तैन बरकतां केरो हिसेदार भोईं ।

??????

24 कुन तुस न ज्ञानथ, कि दौड़ी मां त सब दौड़तन, पन इनाम अक्के नेते, तुस तेरहु दौड़ा, कि ज़ींतथ ।

25 ते हर अक पलवान हर किसमेरो परेज़ रखते, तै त अक शुकने बाले ताजेरे लेइ इन सब किछु केरते, पन अस त तैस ताजेरे लेइ केरतम ज़ैन कधी नईं शुकनू ।

26 एन्हरेलेइ अवं एन्चरे दौड़ताई, पन बगैर मकसदे नईं, अवं भी एन्चरे मुकन सेइं लड़ताई, पन तैसेरो ज़ेरो नईं ज़ै हवाईं मां लड़ते ।

27 पन अवं अपने जानरी खुवेइशन मारताई, ते कैवू मां केरताई; एरू न भोए कि होरन प्रचार केरि, ते मीं इनाम न मैलेले ।

## 10

????????????????????????????????????????????????????????????

1 हे द्दलाव ते बेइनव, अवं तुसन याद करानू चाताई, इश्शे दादे-पड़दादन सेइं बड़े पेइले सुनसान ठैरी मां कुन भोवं, परमेशेरे तैन केरे अग्री-अग्री बिदलार भेजतां तैन सेब्बन बत हिराई, ते तैना सब लाल समुन्दरेरे पैनीं मामेईं एन्चरे पार किये जेन्चरे शुक्कोरी ज़मीनीं मामेईं ।

2 ते तैन सेब्बेईं बिदलारी मां, ते समुन्दरे मां मूसेरो बपतिस्मो नेव ।

3 ते तैन सेब्बेईं तै रोट्टी खाइ, ज़ै परमेशेरे तैन स्वर्गेरां दित्ती ।

4 तैन सेम्बेई अक्के पानी पिव जैन परमेशर तैन दिन्तू, किजोकि तैना आत्मिक चट्टानी मरां पीते थिये, जै तैन सेइं साथी-साथी चलती थी; ते तै चट्टान मसीह थियो ।

5 पन परमेशर तैन मरां बडन सेइं खुश न भोव, एल्हेरेलेइ तैना रेगिस्ताने मां मेरि जे ।

6 इना गल्लां इश्शे लेइ खबरदारी भोइ, कि जेन्चरे तैनेईं लालच कियू, तेन्चरे अस बुरी चीजां केरू लालच न केरम ।

7 ते न मूरती केरि पूजा केरनेबाले बनम; जेन्चरे तैना किछ बनोंरे थिये, जेन्चरे पवित्रशास्त्रे मां लिखोरूए, “लोक तिहारे मां खाने पीने विश्शे, ते फिरी वुरू केरनेरे लेइ उठे ।”

8 ते न असां बदमाशी केरम; जेन्चरे तैन मरां किछेईं की, कि एक्की दिहाड़ी मां 23000 मरे ।

9 ते न अस प्रभु यीशु मसीह अजमाम; जेन्चरे तैन मरां किछेईं अजमाव, ते तैना सपन सेइं मेरि जे ।

10 ते न तुस कुडकडथ, जेन्चरे तैन मरां किछेईं कुडकडव, ते परमेशरे तरफां भेजोरे स्वर्गदूते तैना मारे ।

11 पन इना सब गल्लां, जैना तैन पुड बीती, तैना खबरदारी जेरि थी, ते तैना इश्शी लेइ हदैइयत भी आन, जैना अस दुनियारे आखरी वक्ते मां रातम लिखी जेई ।

12 एल्हेरेलेइ जै विश्वासी समझते, “कि अवं विश्वासे मां मजबूताई,” तै खबरदार राए; कि तैस्से पापे मां फिरी न बिछड़े ।

13 तुसन पुइ एरी अजमैइश नई ओरी, जै मैन्हू केरे झल्लनेरे बेइरे, परमेशर वाफदार, तै तुसन शेक्ति करां जादे अजमैइशी मां गाने न देलो, बल्के अजमैइशी सेइं साथी तैस मरां कढेलो भी; कि तुस झेल्ली भी बटथ ।

~~~~~

14 एल्हेरेलेइ, हे मेरे टलाराव, मूरती पूजने करां बँचते राथ ।

15 अवं समझदार बुझतां, तुसन सेइं ज़ोताई, जैन अवं ज़ोताई, तुस तैसरे बारे मां सोचा कि सही आए या नई ।

16 जैखन अस यीशु मसीहेरे मौती याद केरनेरे लेइ अकोटटे भोतम, त अस दाछारो रस कटोरे सेइं पीतम, जेसरे बारे मां असेईं परमेशेरू शुक्र कियोरूए, ते अस टलोड़ोरी रोट्टी भी खातम, ई तैन बरकतन मां शामिल भोनेरो निशाने, जैना मसीहेरे जानी ते खूने करां एइतिन?

17 एल्हेरेलेइ, कि अक्के रोट्टीए जै मसीहे, चाए अस बडेम, अस अक जान भोतम किजोकि अस तैए अक्के रोट्टी खातम ।

18 इसराएलेरे लोकां केरे बारे मां सोचा, जैखन सारे लोक परमेशरेरे लेइ चाढोरी रोट्टी खातन, तैना परमेशरेरे आराधनारे हिस्सेदार भोतन, तेन्चरे जैना लोक मूरतन कां बलिदान कियोरी चीजन खातन तैना मूरती केरि पूजाई मां हिस्सेदार भोतन ।

19 फिरी अवं कुन ज़ोताई? कि मूरतरी बलिदान किछे, या मूरती किछे?

20 नई, बल्के इन, कि तैना जैन बलिदान केरतन, तैना परमेशरेरे लेइ नई, पन भूतां केरे लेइ केरतन, ते अवं न चैई कि तुस भूतन सेइं साथी शामिल भोथ ।

21 तुस प्रभुएरे कटोरे, ते भूतां केरे कटोरे दुइयन मरां न पी बटथ! तुस प्रभुएरे मेजे ते भूतां केरे मेजे मां शामिल न भोइ बटतथ ।

22 कुन अस प्रभु सरकातम? कुन अस तैस करां जादे शेक्ति बालेम?

~~~~~

23 तुस ज़ोतथ, अस किछ भी केरनेरे लेइ आजाद आम, हाँ, पन सब किछ इश्शे लेइ रोडू नई । अस किछ भी केरनेरे लेइ आजाद आम, पन सब किछ इश्शे विश्वासे जै परमेशरे पुडे मजबूत न केरे ।

24 कोई अपने भलेरे बारे मां न सोचे बल्के होरि केरे भलेरे लेइ सोचे ।

25 जैन किछु किसैई केरे दुकान्न पुड़ बिकते, तैन खाथ, ते इन न पुच्छा कि मास कोट्टां आनोरू ते अपनो जमीरे शुद्ध रखा ।

26 तुस तैन खाथ किजोकि पवित्रशास्त्र जोते, “धरती ते सैरी चीजां परभुएरी आन ।”

27 ते अगर गैर विश्वासी लोकन मरां तुसन कोई धाम जोए, त तुस गानू चातथ, त जैन किछु तुशे सामने रखू गाए तैन खाथ, ते किछु न पुछा, कि कोट्टां आनोरूए ।

28 पन अगर कोई तुसन सेइं जोए, “इना त मूरतन कां बलिदान कियोरू;” त तुस तैस न खाथ, तुशे जमीरेरे वजाई सेइं नईं बल्के जैने तुसन सेइं जोवं तैसेरे जमीरेरे वजाई सेइं ।

29 मेरो मतलब, तेरो जमीर नईं, बल्के तैस होरेरो । भला, मेरी आज्ञादी होरि मैनेरे जिरिये किजो परखी गाए?

30 अगर अवं शुक्र केरतां खाताई, त जैस पुड़ अवं शुक्र केरताई, तैसेरे वजाई सेइं मेरी बदनामी किजो भोतीए?

31 आखरी मां अवं इन जोताई, तुस चाए खाथ, चाए पीथ, या चाए जैन किछु केरा परमेशेरी महिमारे लेइ केरा ।

32-33 अवं जैन किछु केरताई, हर केन्ची खुश केरनेरी कोशिश केरताई, अपने भलेरे बारे मां न सोची बल्के होरि केरे भलेरे बारे मां सोचताई, ताके सेबन मुक्ति मैल्ले । एन्चरे तुस भी जीथ ताके तुशे वजाई सेइं न यहूदन, न गैर यहूदन न परमेशेरे कलीसियाई परेशानी भोए ।

## 11

1 जेन्चरे अवं मसीहेरी जेरि चाल चलताई तुस भी मेरी जेरि चाल चला ।

~~~~~

2 हे दूलाव ते बेइनव, अवं तुशेरी तारीफ़ केरताई, किजोकि तुस मीं हर वक्त याद केरते रातथ; ते जै शिक्षां मीं तुसन दिची तैन केरे मुताबिक चलतथ ।

3 ते अवं चाताई, कि तुस इन ज्ञानथ, हर एक्के मड़देरी क्रोड़ी मसीहे, ते कुआन्शरी क्रोड़ी मड़दे, ते मसीहेरी क्रोड़ी परमेशेरे ।

4 जै मड़द क्रोड़ी ढेकतां प्रार्थना या भविष्यवाणी केरते, तै अपने क्रोड़री अनादर केरते, किजोकि तैन घमण्डेरे बराबरे ।

5 पन जै कुआन्श बगैर दोग ढेकतां प्रार्थना या भविष्यवाणी केरतीए, तै अपने क्रोड़री अनादर केरती, किजोकि तैन टिनडी भोनेरे बराबरे ।

6 अगर कुआन्श ओड़नी न ओड़े, त दोग भी कटे; अगर कुआन्शरे लेइ दोग कट्टानो शरमरी गल्ले, त ओड़नी ओड़े ।

7 हां मड़दे अपनो दोग ढकनो जेइज नईं, किजोकि तै परमेशेरू रूप ते शोभाए; पन कुआन्श मड़देरी शोभाए!

8 किजोकि मड़द कुआन्शी मरां नईं, बल्के कुआन्श मड़दे मरां निसोरिए ।

9 ते मड़द कुआन्शरे लेइ नईं पन कुआन्श मड़देरे लेइ बनेवरीए ।

10 एन्चरेलेइ स्वर्गदूतां केरे वजाई सेइं कुआन्शरे लेइ इन ठीके कि अपने दोग ढक्के, ताके इस सेइं बांद्र भोए कि तै मड़देरे अधीने ।

11 फिरी भी परभु पुड़ विश्वास केरनेबालन मां कुआन्श मड़दे करां अलग नईं, ते न मड़द कुआन्शरी करां अलगे ।

12 किजोकि जेन्चरे पेइली कुआन्श मड़दे मरांए, पन हुनी मड़दन कुआन्श जर्म देतीए । सब चीजां परमेशेरे करां आन ।

13 तुस एप्पू फेसलो केरा, कुन कुआन्शी खुले आम आराधनाई मां बगैर दोग ढेकतां परमेशेरे कां प्रार्थना केरनि शोभतीए?

14 कुन तुस भी न ज्ञानथ, कि अगर मड़द लमो दोग रखे त तैसेरेलेइ शरमे ।

15 पन अगर कुआन्श लमो दोग रखे; ते तैसेरेलेइ शोभाए किजोकि बाल तैसेरे ढकनेरे लेइ दित्तोरेन ।

16 पन अगर कोई मीं सेइं राज्जी न भोए, त इन समझे न इश्शी न इश्शे परमेशेरी कलीसियां केरि एरी रीतए ।

~~~~~

(~~~~~ 26:26-29; ~~~~~ 14:22-25; ~~~~~ 22:14-20)

17 इस बारे मां अवं तुसन इन ज़ोताई, अवं तुश्शी तारीफ़ न केरि, एल्हेरेलेइ कि तुश्शे अकोट्टे भोने सेइं भलाई नई, बल्के नुकसान भोते ।

18 किजोकि पेइलू त अवं इन शुनताई, कि ज़ैखन तुस कलीसिया मां आराधनारे लेइ अकोट्टे भोतथ, त तुसन मां अन-बन भोतीए ते अवं किछ हदी तगर याकीन केरताई ।

19 पन, बिलकुल तुसन मां बटवारो भोरो लोइ, ताके तुसन ज़ैन कां परमेशेरी मन्जूरीए पिशाने गाथ ।

20 ते ज़ैखन तुस इश्शे प्रभु यीशुएरी मौती याद केरनेरे लेइ एक्की ठैरी अकोट्टे भोतथ, त तुश्शे बर्तावे सेइं इन न लग्गे कि प्रभु भोज खानेरे लेइ अकोट्टे भोरेथ ।

21 किजोकि खानेरे वक्ते हर कोई अपना इलाछ्छो होरन करां पेइलो खाते, ते किछ त नियन्नो रहतन, ते किछ मतवालो भोइ गाते ।

22 कुन खाने पीनेरे लेइ तुसन घर नई या परमेशेरी कलीसियाई घटिया समझतथ, कि ज़ैन कां नई तैन छितातथ अवं तुसन कुन ज़ोई? कुन इस गल्ली मां तुश्शी तारीफ़ केरि? अवं तारीफ़ न केरि ।

23 ज़ै शिक्षा मीं प्रभु करां पुज़ी तै शिक्षा मीं तुसन दित्ती, कि प्रभु यीशुए ज़ैस राती तै द्लुवाव जेव तैने रोट्टी नी ।

24 ते शुक्र केरतां टलोड़ी, ते ज़ोवं; “कि ई रोट्टी मेरे जानी हिराती, ज़ै तुश्शे मुक्तेरे लेइ बलिदान की गातीए, मेरी यादी मां इन्ने केरा ।”

25 ते एन्चरे ज़ैखन तैनेई रोट्टी खाइ, यीशुए दाछ्छारो कटोरो भी नेव, ते ज़ोवं; “ई कटोरो मेरे खूने मां नब्बो कराए, ज़ैखन भी पीथ, मेरे यादी मां इन्ने केरा ।”

26 किजोकि ज़ैखन ई रोट्टी खाथ, ते इस कटोरे मरां पीथ, त प्रभुएरे मौती ज़ांतगर तै न एज्जे, इस बारे मां ज़ोते राथ ।

27 एल्हेरेलेइ ज़ै कोई प्रभुएरे रोट्टी नाजाइज तरीके सेइं खाए, या प्रभुएरे कटोरे मरां पीये, तै प्रभुएरे जानरो ते खूनेरे खलाफ़ पापी भोलो ।

28 एल्हेरेलेइ मैन्हू अपने बर्तावे परखे ते एन्चरे इस रोट्टी मरां खाए, ते इस कटोरे मरां पीये ।

29 किजोकि ज़ै इस रोट्टी खाते ते कटोरे मरां पीते बार इन न पिशाने कि तैसेरो रिश्तो प्रभुएरी जानी सेइं केरोए, तै इस खाने पीने सेइं एप्पू पुइ आफत आनते ।

30 एल्हेरेलेइ तुसन मरां बड़े कमज़ोर ते रोगी आन, ते बड़े मेरि भी जे ।

31 एल्हेरेलेइ अगर अस पेइले अपना आप परखम त परमेशर असन सज़ा न देलो ।

32 पन प्रभु असन सज़ा देइतां शिखालते एल्हेरेलेइ कि अस दुनियाई सेइं साथी दोषी न भोम ।

33 ते हे मेरे द्लाव ते बेइनव, ज़ैखन तुस प्रभुएरी रोट्टी खानेरे लेइ अकोट्टे भोतथ, एक्की होरि बलगा ।

34 अगर कोई नियन्नो भोए त अपने घरे मां खाए, ज़ैस सेइं तुस अकोट्टे भोथ, रोइ च़ारे बर्ताव केरा, ज़ैस सेइं प्रभु तुसन सज़ा न दे, ते होरि गल्लां अवं एइतां ठीक केरेलो ।

## 12

~~~~~

1 हे मेरे द्लाव ते बेइनव, हुनी तुश्शे तैस सवाल्लेरे बारे मां ज़ै तुसेई पवित्र आत्मारे वरदानां केरे बारे मां पुच्छो, अवं चाताई तुस रोइ च़ारे समझा ।

2 तुस ज्ञानतथ, कि तुस विश्वास केरने करां पेइले तुसन जेन्वरे जीते थिये तुसन पुइ भूतां केरो अस्सर भोतो थियो, कि तुस मूरती केरि पूजा केरथ, जैना जीती न भोन ।

3 एल्हेरेलेइ अवं चाताई तुस ज्ञानथ, कि जै कोई परमेशरेरे आत्माे जुवाने सेइं ज़ोते, तै न ज़ोए, कि यीशु लानतीए, सिर्फ एककैलो पवित् आत्मा आए, जै इस काबल बनाते, कि कोई भी इन ज़ोई सकते कि “यीशु प्रभुए ।”

4 वरदाना त बड़े किसमां केरन, पन इना सब परमेशरेरो आत्मा देते ।

5 अस बड़े किसमां केरू कम परमेशरेरे लेइ केरतम, पन अस तैस्से एककी प्रभुएरी सेवा केरतम ।

6 परमेशर इश्शे ज़िन्दगी मां अलग-अलग किसमे सेइं कम केरते, पन तैए परमेशर जै असन सेब्बन तैसेरेलेइ कम केरनेरी काबलीत देते ।

7 असन सेब्बन अक एरी काबलीत दित्तोरिए, जैस सेइं पवित् आत्माारी हज़ूरी साबत भोती, ताके अस अपने सैथी विश्वासी लोकां केरि मइत केरम ।

8 किजोकि परमेशरेरे आत्माे ज़िरिये एककी मैन्हु समझदैरारो सन्देश शुनानेरी काबलीत दित्तोरिए, ते होरि मैन्हु तैस्से आत्माे ज़िरिये सेइं ज्ञानेरो सन्देश शुनानेरी काबलीत दित्तोरिए ।

9 तैए आत्मा एककी मैन्हु मसीह पुइ मज़बूती सेइं विश्वास केरनेरी काबलीत देते, ते तैए होरि मैन्हु, बिमार लोकन बज़ानेरी काबलीत देते ।

10 आत्मा एककी मैन्हु चमत्कारेरां कम्मां केरनेरी शक्ति देते, ते होरि परमेशरेरो सन्देश शुनानेरू वरदान, ते कोन्ची आत्मां केरि परख, ते कोन्ची मैन्हु बड़े किसमां केरि भाषां ज़ोनेरी काबलीत दित्ती, जैना तैने नई पेद्वोरी, ते होरि मैन्हु तैन भाषां केरो मतलब समझानेरी काबलीत दित्ती, जैना तैनेई नई पेद्वोरी ।

11 सब वरदानां तैस्से एककी पवित् आत्मारू कम्मे । तैए जेन्वरे चाते सेब्बी विश्वासी लोकन वरदान देते ।

12 किजोकि जेन्वरे इश्शे जिसम त अक्के ते तैसेरे अंग बडेन, ते तैस एककी जिसमेरे अंग हछ्छे भोने सेइं भी सब मिलतां अक्के जिसमे, तेन्वरे मसीह भी आए, ते तैना भी जैना तैस पुइ विश्वास केरतन ।

13 किजोकि असेईं सेब्बेईं कुन यहूदी, कुन गैर कौमां, कुन गुलाम, कुन आज़ाद अक्के आत्माे ज़िरिये अक जिसम भोनेरे लेइ बपतिस्मो नेवरोए, ते असन सेब्बन अक्के आत्मा मैल्ली ।

14 इश्शे जिसमे मां अक्के अंग नई, बल्के बडेन ।

15 अगर पव ज़ोए अवं हथ नई, एल्हेरेलेइ अवं जिसमेरो अंग नई । त कुन तैसेरे ज़ोने सेइं तै जिसमेरो अंग न राए ?

16 ते अगर कन्न ज़ोए; “अवं अछ्छ नई, एल्हेरेलेइ अवं जिसमेरो अंग नई,” त कुन तैसेरू एरू ज़ोने सेइं तै जिसमेरो न राए ?

17 अगर सारो जिसम अछ्छे भोथी त शुन्नू कोट्टां भोथू ? ते अगर सारो जिसम कन्न भोथो त शीघन्नू कोट्टां भोथू ?

18 पन सच्चे परमेशरे इश्शे जिसमे मां अंग अपने मेर्जी सेइं अक-अक केरतां इश्शे जिसमे मां अपने-अपने ठैरी रखोरन ।

19 अगर तैना सभे अक्के अंग भोथे, त फिरी जिसम न भोथो ।

20 एल्हेरेलेइ, जिसमेरे बड़े अंग भोने सेइं अक जिसम बनते ।

21 अछ्छ हथ्थे सेइं न ज़ोई सके, “मीं तेरी ज़रूरत नई,” ते न करोड़ी पवन सेइं ज़ोई बटतीए, “मीं तेरी ज़रूरत नई ।”

22 पन जिसमेरे अंग जैना होरन करां कमज़ोर लेइहोतन, बड़े ज़रूरिन ।

23 ते जिसमेरे ज़ैन अंगन अस आदरारो काबल न समझम तैन केरि अस जादे आदर देतम; ते इश्शे अशोबते अंग होरे भी रोडे भोतन ।

24 फिरी इश्शे शोबते अंगन एसेरी ज़रूरत नई, पन परमेशेरे जिसम बनोवरोए, कि ज़ैस अंगे घटी थी तैस होरि भी जादे आदर भोए।

25 परमेशेरे एन कियूं ताके जिसमेरे अंगन मां अन-बन न भोए, पन तैना एक्की होरेरी देख-भाल केरन।

26 एल्हेरेलेइ अगर जिसमेरे एक्की अंगे दुःख मैलते, त सारी जान ते सब अंग तैस सेइं साथी दुखी भोतन; ते अगर एक्की अंगेरी बड़याईं भोतीए; त तैस साथी सब अंग आनन्द केरतन।

27 एन्चरे तुस सब मिलतां मसीहेरो जिसमथ, ते तैसेरे जिसमेरे अंगथ।

28 मसीहेरी जानी मां यानी कलीसियाईं मां, परमेशेरे असन अलग-अलग कम केरने जो दित्तोरूए, पेइले प्रेरित, दुइयोवं नबी, दलेइयोवं शिक्षा देनेवाले, फिरी तैना, ज़ैन चमत्कार केरनेरो अधिकार दित्तोरूए। फिरी तैनी तैना ज़ैन बझानेरो अधिकार दित्तोरूए, ते तैना ज़ैन होरि केरि मद्दत केरनेरी काबलीत दित्तोरूए, ज़ैना प्रधान्, तैना ज़ैन पवित्तर आत्मार तरफां अलग-अलग किसमां केरि भाषां ज़ोनेरी काबलीत मैली।

29 हर कोई प्रेरित नई। हर कोई नबी नई। हर कोई शिक्षा देनेवालो नई। हर कोई चमत्कार केरनेवालो नई।

30 कुन सेभन बझानेरू वरदान मैलेरू। हर कोई अलग-अलग भाषां केरनेवालो नई। हर कोई भाषां केरो मतलब समझानेवालो नई।

31 सेभन कां तरजमो केरनेरी काबलीत नई, रोडू त इन आए पवित्तर आत्मां करां वरदानां हासिल केरनेरी वेडि इच्छाईं मां राथ। पन सच्चे रोडू कुने, तैन अवं हुनी ज़ोताईं।

13

CHAPTER 13

1 अगर अवं मैन्हू, ते स्वर्गदूतां केरि भाषां केरि, ते प्यार न रेख्खी, त अवं ठन-ठन केरनेवाली पितल, ते झन-झन केरनेवाली झाझाईं।

2 ते अगर अवं भविष्यवाणी केरि सेखी, ते सब भेद ज़ैनी ते, मीं इड़ी तगर पूरो विश्वास भोए, कि पहाड़न घासेईं, पन प्यार न रेख्खी, त अवं किछ भी नई।

3 ते अगर अवं अपनि सारी जेइदाद कंगालन देई, या अपनो जिसम फुकनेरे लेइ देई, ते प्यार न रेख्खी, त इन मेरे कोन्ची कम्मेरू नई।

4 ज़ैना लोक होरन सेइं प्यार केरतन तैना सबर ते दयाईं सेइं कम केरतन, तैना जलन न केरन, तैना अपनि बडीयाईं न केरन, ते न घमण्ड केरन।

5 तैना होरन बेइज्जत न केरन, तैना खुदगरज न भोन, जल्दी क्रोध न केरन ते ज़ैना बुरी गल्लां तैन केरे खलाफ भोइ, तैन तैना याद न केरन। ते तैन केरे खलाफ ज़ैना पाप केरतन तैना, तैन बडे आसान तरीके सेइं माफ़ केरतन।

6 तैना खुश न भोन ज़ैखन लोक वुरू केरतन, पन तैना तैखन खुश भोतन ज़ैखन लोक तैन केरतन ज़ैन ठीक ते सच्चू।

7 तैना सब गल्लां झैल्लतन, प्यार विश्वास कधी न गुवाए, ते असन परमेशेरे पुड भरोसो केरनेरे काबल बनाते, मुशकलन ते तकलीफन मां सबर रखते।

8 भविष्यवेनी ते गैर भाषां ते खास ज्ञान बेकार भोलू। पन प्यार हमेशेरे लेइ रालो!

9-10 किजोकि इश्शू ज्ञान ते इश्शी भविष्यवाणी केरनेरी काबलीत अध्धीए, पन ज़ैखन सिद्ध एज्जेलो, त ज़ैन अध्धूरूए तैसेरी ज़रूरत नई।

11 इन मैनेरे वेडोनेरू ज़ेरू आए। ज़ैखन अवं बच्चो थियो, त बच्चां केरो ज़ेरो ज़ोतो ते सोचतो ते समझतो थियो। पन ज़ैखन अस बड्डे भोतम, त बच्चां केरि गल्लां शारतम।

12 एन्चरे असन सेइं भी आए ज़ैना अस विश्वास केरतम, किजोकि अस तैस मैनेरे ज़ेरे आम ज़ै खराब शीशे मां शकल हेरते, (किजोकि अस सब किछ रोडे चारे न ज्ञानम) सिर्फ एजनेवाले वक्ते मां,

अस सब किछ समझमेले, एल्हेरेलेइ असेई परमेशर आमने सामने हेरनोए। हुना मेरू ज्ञान पूरू नई। पन तैस एजनेबाले वक्ते मां (जैखन तै दिहाड़ी एज्जेली) रोडेचारे जैनेलो, परमेशर भी मीं ज्ञानेलो।

13 लिहाजा, हुनी, ट्लाई किसमां केरि चीज्जन जैना असेई जरूरी केरनिन, परमेशरे पुड विश्वास, परमेशरे वानन पुड उमीद, ते परमेशरे ते होरन सेइं प्यार। पन इन ट्लाई गल्लन मां जै महाने, तै ई आए: परमेशरे ते होरन सेइं प्यार केरन।

14

?????????????? ?? ??? ???? ?

1 एक्की होरि सेइं प्यार केनेरी कोशिश केरा। ते आत्मिक वरदानां केरि बड़ी इच्छा रखा, खास केरतां इन, कि भविष्यवाणी केरा।

2 किजोकि, जै गैर भाषाई मां गल्लां केरते; तै मैनन् सेइं नई, बल्के परमेशरे सेइं गल्लां केरते; एल्हेरेलेइ कि तैसेरी कोई न समझे; किजोकि तै भेदेरी गल्लां पवित्तर आत्मारे शेक्ति सेइं ज़ोते।

3 पन जै परमेशरेरे तरफां सन्देश शुनाते, तै विश्वासी लोकन, विश्वासे मां मज़बूत भोनेरे लेइ मद्दत केरते, ते होरि विश्वासी लोकां केरि हिम्मत बद्धाते ते तस्सली देते।

4 जै गैर भाषाई मां ज़ोते, तै अपने विश्वासे मज़बूत केरते। पन जै भविष्यवाणी केरते, तै कलीसियारे विश्वासी लोकां केरे विश्वासे मज़बूत केरते।

5 अवं चाताई, कि तुस गैर भाषाई मां गल्लां केरा, पन जादे इन चाताई कि भविष्यवाणी केरा: किजोकि अगर गैर भाषा ज़ोनेबालो कलीसियारे विश्वासी लोकां केरे विश्वासे मां मज़बूत भोनेरे लेइ तरजमो न केरे त भविष्यवाणी केनेबालो तैस करां जादे खास कम केरि रावरोए।

6 एल्हेरेलेइ हे दूलाव ते बेडनव, अगर अवं तुसन कां एडतां गैर भाषाई मां गल्लां केरि त तुसन मीं करां कुन फैडदो भोलो। पन अगर अवं प्रकाश या खास ज्ञान, या परमेशरेरो सन्देश शुनेई या शिक्षा देई त इस सेइं तुशशी मद्दत भोली।

7 एन्चरे, अगर तुस बाज़ो बज़ाथ ज़ेन्चरे बेडशोई या सारंगी, अगर तैन रोडे चारे न बज़ाव गाए त ज़ैन बज़ाव लावरू गाने त तैन केन्चरे पिशानेले बेडशोई या सारंगी मां कुन लावरू बज़ने।

8 जंगी मां अगर नडशिनोरी आवाज़ साफ न भोए, त फौजी जंगरे लेइ तियार न भोइ सकन।

9 एन्चरे, जैखन तुस तैना गल्लां केरथ जैना होरि लोकन समझ न एजन, त ज़ैन किछ ज़ोवं गाते तैसेरी कोई कीमत नई।

10 दुनियाई मां बेड़ि भाषा आन, त हर भाषारो मतलबे।

11 पन अगर अस तैस भाषाई न समझम जै होरे ज़ोने लोरेन, त एन एरू भोलु, कि ज़ेन्चरे तैना इशशे लेइ परदेशी भोले ते अस तैन केरे लेइ परदेशी भोले।

12 एन्चरे तुस भी जैखन पवित्तर आत्मारे वरदानां केरे लेइ बड़ी इच्छा रखतथ, त तैन वरदानां केरि इच्छा रखा ज़ैन सेइं कलीसियारे विश्वासी लोक विश्वासे मां मज़बूत भोन।

13 एल्हेरेलेइ जै गैर भाषा केरते, तै प्रार्थना केरे, कि ज़ैन किछ तैने ज़ोवं, तैसेरो मतलब समझेनेरे काबल भी भोइ सके।

14 किजोकि अगर अवं गैर भाषाई मां प्रार्थना केने लोरोई, त मेरी आत्मा प्रार्थना केरतीए, पन मेरी सोचरे लेइ फैडदो नई, किजोकि इन मीं समझ न एज्जे।

15 त फिरी मीं कुन कियोरू लोडे? एरो भी वक्त भोते जैखन मीं अपने आत्माई सेइं प्रार्थना कियोरी लोडे, एरो वक्त भी भोते जैखन मीं अपने अक्ली सेइं भी प्रार्थना कियोरी लोडे। किछ वक्ते मीं अपने आत्माई सेइं गीतां ज़ोवरां लोडे, ते होरि वक्ते मीं अक्ली सेइं भी गीत ज़ोवरां लोइन।

16 मन्ना कि जैखन किछ आम मैन्हु तुशशे आराधनाई मां एजन, जैखन तुस अपने आत्माई सेइं परमेशरेरी बडयाई केरथ। अगर तैना तुशशी न समझे, त तुशशे परमेशेरू शुक्र केनेरे बाद तैना केन्चरे बुझेले कि किताली, “आमीन” ज़ोनु, किजोकि तैना न समझे तुस कुन लोरेथ ज़ोने।

17 तुशू परमेशेरू शुकर केरनू रोडूए, पन इन होरि केरे विश्वासे मजबूत केरनेरे लेइ मद्दत न केरेलू ।

18 अवं अपने परमेशेरू शुकर केरताई, कि अवं तुसन सेबन करां जादे गैर भाषां केरताई ।

19 पन कलीसियाई मां गैर भाषा केरने मां दश हज़ार गल्लां केरे ज़ोनेरे केरतां इन मीं होरू भी रोडू लगते, कि होरन शिखालनेरे लेइ अक्ली सेइ पंचे गल्लां ज़ोई ।

20 हे द्वाव ते बेइनव, तुस इना गल्लां समझने मां बच्चे न बना, पन बुरैई केरनेरे लेइ बच्चां केरे बना, पन इस किसमेरी गल्लां समझनेरे लेइ समझदार बना ।

21 कानूने मां प्रभु ज़ोते;

“अवं बखलां केरे ज़िरिये ज़ोइलो,


ज़ैना गैर भाषां केरेले, पन फिरी भी तैना मेरी न शुनेले।”

22 एल्हेरेलेइ असन मरां किछु गैर भाषा केरन ज़ै पवित्र आत्मा रे तरफां आए, इशे शब्द तैन लोकां केरे लेइ प्रभुएरे शेक्तिरो निशाने, ज़ैना प्रभु पुइ विश्वास न केरन ।

23 ते अगर कलीसिया एककी ठेरी अकोट्टी भोए, ते सब गैर भाषा केरन, त आम लोक ज़ैना ई भाषा न समझन या गैर विश्वासी लोक अन्तर एजन त कुन तैना इन न सोचले कि तुस पागल अथ ।

24 ते अगर सब भविष्यवाणी केरन, ते आम लोक या गैर विश्वासी लोक अन्तर एजन, त तैन एसास भोलो कि तैना पापिन, ते ज़ैन तैनेई ज़ोवं तेसेरे वजाई सेइ अपनि बत बदलेले ।

25 ते परमेशेररे सन्देशे सेइ तैन एसास भोलो कि तैनेई बुरू कियोरू तैन केरे मनेरे भेद बांदो भोइ गाले, ते तैन एसास भोलो कि तैना पापी आन त कने पापन करां मन फिराले । ते तैना मथ्यो टेकतां परमेशेरी आराधना केरेले, ते मनेले कि परमेशर तुसन मां आए ।



26 हे द्वाव ते बेइनव कुन कियोरू लोडूए? ज़ैखन तुस आराधना केरने लेइ अकोट्टे भोतथ, त किछु भजन ज़ोन, किछु उपदेश देन, ते किछु ज़ैन प्रकाशन परमेशेररे तरफां आए तैस देन, ते किछु गैर भाषाई मां गल्लां केरन ते किछु तैसेरो तरजमो केरन, तुस इन सब एल्हेरेलेइ केरा कि कलीसियारे लोकन विश्वासे मां मजबूत भोनेरे लेइ मद्दत भोए ।

27 अगर कोई गैर भाषाई मां ज़ोने लोरोए, त दूई या ट्लाई ज़ने बैरी-बैरी सेइ ज़ोन, ते इन ज़रूरी कि अक मैन्हु तैस भाषारो मतलब ज़ोए ।

28 पन अगर तरजमो केरनेबालो न भोए, ते गैर भाषा ज़ोने बालो कलीसियाई मां चुप राए, ते चुपचारे अपने मने सेइ परमेशेर सेइ गल्लां केरे ।

29 नेबन मरां दूई या ट्लाई ज़ोन, इन ज़रूरी आए कि हर कोई शुने, ते सोचन ते परखन कि ज़ैन किछु ज़ोवं लोरू गाने सही आए या नई ।

30 पन अगर कोई ज़ै तैड़ी सभाई मां विशोरौए, तैस परमेशेररे तरफां सन्देश मैल्ले, त ज़ै ज़ोने लोरोए तै चुप भोए, ते तैस ज़ोने दे ।

31 किजोकि तुस सब अक-अक भविष्यवाणी केरि बटतथ, पन अक-अक भोइतां ताके सब शिखन, ते हिम्मत बद्धे ।

32 ज़ै नवी परमेशेररो सन्देश शुनाते, तै अपने आपे वशे मां रखते । तै इस काबले कि अपने मेर्जी सेइ ज़ोई बटते ते चुप रेइ बटते ।

33 किजोकि परमेशर गडबड केरनेबालो नई, पन शान्ति देनेबालोए; ई तै कानूने ज़ैस परमेशेररे सैरी कलीसियारे लोक मन्तन ।

34 कुआन्शां कलीसियारे सभाई मां चुप रान, किजोकि तैन गल्लां केरनेरो हुक्म नई, ज़ेन्चरे कानूने मां लिखोरू भी आए ।

35 ते अगर तैना किछु सवाल पुच्छने चान, त सभाई मां न पुच्छन पन घरे अपने-अपने मुन्शन पुच्छन, किजोकि कलीसिया मां कुआन्शां केरि जादे गल्लां केरनि ठीक नई ।

36 एरू किजो आए तुसन मरां किछ लोक पेइले ज़ोरे नियमन किजो न मन्नु चान? कुन तुस सोचतथ कि तुस पेइले लोक आथ ज़ैनेई परमेशेरू वचन दित्तू? या सिर्फ तुसन दित्तू?

37 अगर कोई मैंहु अपनो आप नबी समझे, या इन समझे कि मीं पवित्तर आत्मारे तरफां वरदान मैलोरूए, त इन समझे, कि ज़ैना गल्लां अवं तुसन लिखताई, तैना प्रभुएरे हुकमन ।

38 पन अगर कोई इन गल्लन न मन्ने, त तैन पुड़ विश्वास न केर ।

39 एल्हेरेलेइ हे द्लाव ते बेइनव, भविष्यवाणी केरनेरी बडी इच्छा रखा, ते गैर भाषाई केरनेरे लेइ न टाका ।

40 पन तैन सब किछ ज़ैन तुस कलीसियाई मां केरतथ तरीके सेइं कियूं गाए ।

15

~~~~~

1 हे द्लाव ते बेइनव, अवं तुसन तैए खुशखबरी याद कराताई ज़ै मीं तुसन शुनावरी थी, ते ज़ैस सन्देशे पुड़ तुसेई विश्वास कियोरो थियो, ते ज़ैस पुड़ तुस तुसेई लगातार भरोसो रखबोरोए ।

2 अगर तुस तैस खुशखबरी पुड़ लगातार विश्वास केरते राले, ज़ै मीं प्रचार की, त परमेशेर तुसन बजालो । नई त तुशशो विश्वास केरनो बेफैइदो भोव ।

3 एल्हेरेलेइ मीं तुसन खास सन्देश दित्तो, ज़ै मीं प्रभु यीशु मसीह करां मैल्लो । तै सन्देश ई आए, कि पवित्तरशास्त्रेरे मुताबिक यीशु मसीह इशशे पापां केरे लेइ मरो

4 ते दबो जेव, ते पवित्तरशास्त्रेरे मुताबिक दलेइयोवं दिहाइ मुडदन मरां ज़ींतो भोव ।

5 ते कैफा (यानी पतरस) ते 12 चेलन लेइहोव ।

6 फिरी 500 करां जादे चेलन एक्की साथी लेइहोव, ज़ैन मरां हेजू बडे ज़ींतन ते किछ मेरि ज़ोरेन ।

7 फिरी याकूबे लेइहोव फिरी सेब्भी प्रेरितन लेइहोव ।

8 ते आखरी मां तैनी अपनो आप मीं पुड़ भी पुड़ बांदो कियो, अवं ज़ै तैस वच्चेरे ज़ोरो आई ज़ै ठीक वक्ते पुड़ नई ज़मोरू ।

9 किजोकि अवं प्रेरितन मरां सेब्भना निकोडोई, बल्के प्रेरित ज़वानेरे काबल भी नई, किजोकि अवं परमेशेरे कलीसियारे विश्वासी लोकन सतातो थियो ।

10 पन परमेशेरे अनुग्रह सेइं अवं प्रेरित आई । ते तैसेरो अनुग्रहरो अस्सर ई भोव कि, मीं तैन होरि प्रेरितन करां बेद्धतां मेहनत भी की, ते ई मेहनत मीं अपने तरफां न की, बल्के परमेशेरे मेरी मदद की, कि अवं इन केरि ।

11 ते चाए अवं भोइ, चाए होरे प्रेरित भोन, अस तैस मसीहेरे बारे मां सन्देश प्रचार केरतम, ते इस्से पुड़ तुसेई भी विश्वास कियो ।

~~~~~

12 एल्हेरेलेइ हुनो अवं पुछताई, ज़ैखन मसीहेरो ई प्रचार कियो गाते, कि तै मुडदन मरां ज़ींतो भोव, ते तुसन मरां किछ किजो ज़ोतन, कि मुडदां केरू ज़ींतू भोनू अथ्थी नई?

13 अगर मुडदां केरू ज़ींतू भोनू अथ्थी नई, ते फिरी मसीह भी नई ज़ींतो भोरो ।

14 ते अगर मसीह भी मुडदन मरां ज़ींतो नई भोरो, त फिरी इशशो सन्देश प्रचार केरनो भी बे फैइदोए; ते तुशशो मसीह पुड़ विश्वास केरनो भी बे फैइदोए ।

15 अगर मुडदे ज़ीते न भोन, त असेई इन ज़ोइतां परमेशेरे बारे मां झूठ ज़ोवं, कि परमेशेरे मसीह ज़ींतो कियो ज़ैन तैनी हकीकत मां नई कियोरू ।

16 अवं दुबारां फिरी ज़ोताई, अगर कोई मुडदन मरां ज़ींतो न भोए, ते फिरी मसीह भी मुडन मरां ज़ींतो नई भोरो ।

17 ते अगर मसीह मुडदन मरां ज़ींतो नई भोरो, त तुशशो मसीह पुड़ विश्वास भी बे फैइदोए, ते तुस हेजू तगर अपने पापन मां ज़ीने लोरेथ ।

18 बल्के ज़ैना मसीह पुड़ विश्वास केरनेवाले मरेंन, तैना भी नाश भोए ।

19 अगर अस सिर्फ इस ज़िन्दगी मां मसीह करां उमीद रखतम ते फिरी अस सेबमी मैनु करां नुभागम।

20 पन सन्न त इन आए कि परमेशेरे मसीह मुडदन मरां इन साबत केरनेरे लेइ ज़ीतो कियोरो, ते ज़ैना मरेंन, तैन मां पेडलो फल भोए।

21 किजोकि ज़ैन पेडले मैने यानी आदमे कियुं, तैसेरे वजाई सेइं सब मैन्हु मरे, एन्चरे ज़ैना विश्वासी लोक एजनेबाले वक्ते मां मुडदन मरां ज़ीते किये गाले, तैन भी एक्की मैनेरे केरनेरे वजाई सेइं आए, ते तै मैन्हु मसीह आए।

22 एल्हेरेलेइ एक्की मैनेरे पापेरे यानी आदमेरे वजाई सेइं सब मैन्हु मरतन, तेन्चरे एक्की मैनेरे केरनेरे सेइं यानी यीशु मसीहे वजाई सेइं सारे फिरी मुडदे ज़ीते किये गाले।

23 पन हर कोई ठीक तरीके सेइं ज़िन्दगरे लेइ वापस एज्जेलो, पन मसीह मुडदन मरां ज़ीतो भोनेबालो पेडलोए, फिरी ज़ैन लोकां केरो रिशतो तैस सेइं साथी आए, तैना भी ज़ीते भोले।

24 एसेरां पत्ती, मसीह सैरी दुष्ट शेक्ति नाश केरेलो ज़ैना परमेशेरेरी खलाफत केरतिन। ते दुनियारां खातमों भोलो। तैखन मसीह, अपने बाजी परमेशर अपनू राज, राज केरनेरे लेइ पूरे तरीके सेइं देलो।

25 मसीहे तेइस तगर राजेरू जेरू राज केरनू जरूरीए, ज़ांतगर परमेशर तैसेरे सारे दुश्मन्न् तैसेरे अधीन न केरे।

26 सेबभना आखरी ज़ै दुश्मन खतम कियो गालो तै मौते।

27 ज़ैखन पवित्रशास्त्र ज़ोते परमेशेरे सब किछ तैसेरे अधीन मां केरेलो त इस मां परमेशर नई, किजोकि सब किछ मसीहेरे अधीन केरनेबालो परमेशेरे।

28 ते सब किछ परमेशेरेरे मट्टेरे अधिकारे मां केरनेरे बाद, तैखन तै अपनो आप रोडे च़रे परमेशेरेरे अधिकारे मां केरेलो, ज़ैने तैस अधिकार दित्तो। सिर्फ परमेशर अकैल्लो प्रभुए तैए हर एक्की मां, ते हर गल्ली मां कम केरते।

29 हुनी तुस इस बारे मां सोचा, तुसन मां किछ एरे आन ज़ैना मरें लोकां केरे लेइ वपतिस्मो नेतन, ते कोई तैन वपतिस्मो देते, अगर ज़ेन्चरे किछ लोक ज़ोतन, विश्वासी लोक मुडदन मरां ज़ीते नई भोने, त फिरी एन केरनेरी कोई कीमत नई ते फिरी एन केरनेरी वजा नई।

30 ते इशे लेइ, अगर मुडदे ज़ीते किये गान त अपनो आप खतरे मां रखनो बेवकूफी आए।

31 हे दुलाव ते बेडनव, इन पक्कू आए कि तुशे बारे मां घमण्ड केरताई, किजोकि तुस इशे प्रभु यीशु मसीह मां आध, इन भी पक्कू आए कि अवं रोज मौतरे खतरे मां राताई।

32 मीं इफिसुस नगरे मां बेडि तैन केरे वजाई सेइं मुशकलां झैल्ली ज़ैना मेरी खलाफत केरते थिये, तैना जंगली जानवरां केरे ज़ेरे थिये। लोकां केरे खियाले सेइं मीं तैन मुशकलन सेइं कुन हासिल कियुं? किछ भी नई। एल्हेरेलेइ इन साफे कि मुडदे दुबारां ज़ीते न किये गान, त इन रोडूए ज़ैन लोक ज़ोने लोरेन, “एज्जा, खाम पीम, किजोकि असेईं कालां मरनू आए ते इन सब खतम भानू।”

33 ज़ैना एरी गल्लां ज़ोतन तैन केरे वजाई सेइं बेवकूफ न बना, “बुरी संगती रोडे चाल-चलने बगाडतीए।”

34 तुस अपने सोचरे रोडी बत्तां वापस एज्जा ते पाप केरनो शारा। किजोकि तुसन मां किछ एरे आन ज़ैन केरो रिशतो परमेशेरे सेइं साथी नई। अवं तुसन छिथानेरे लेइ इन ज़ोताई।

~~~~~

35 पन किछ पुछतन, “कि मुडदे केन्चरे ज़ीते भोतन, ते केरहे जिसमे मां एडतन?”

36 हे बे समझाव, बीजे पुड ध्यान देथ, ज़ैखन बीज बेवं गाते, त पोदो बन्ने करां पेडलू तैस मरनू पते।

37 ते ज़ैन तू बेतस, चाए इन गेहुं भोन या होरू किछ। इन ज़ै भोनेबालो पोदोए एन तैसेरू जेरू नई।

38 तैस बेनेरे पत्ती परमेशर तैस एपनी मेरजरे मुताबिक बडाते ज्ञातगर गेहुं केरि या होरि आन्नेरे डाल बांदे न भोन ।

39 इस दुनियाई मां हर ज़ीती चीजां अलग-अलग आन इन सेब्भी केरो जिसम अक्कां ज़ेरे नई । मैन्हु केरो जिसम केरो जिसम जानवरां केरो ज़ेरो नई । ज़लोडू केरो जिसम, मेच्छली केरो जिसम करां अलगे ।

40 जेन्चरे इस धेरतली पुड बडे किसमां केरे जिसम भोतन तेन्चरे अम्बरे मां भी दिहाडो चाँदनी, ते तारे आन, पन अम्बेरी चीजां केरि शोभा होरि ज़ेरीए ते धेरतरे चीजां केरि शोभा होरि ज़ेरि आए ।

41 ते दिहाडेरी शोभा होरीए, चेंदनी शोभा होरीए, ते तारां केरि शोभा होरीए, किजोकि तारे-तारेरी शोभाई मां फर्के ।

42 मुडदां केरू ज़ीतू भोनू भी एरू आए । ज़ै जिसम नाश भोनेरे हालती मां दबो गाते, पन ज़ैखन ज़ीतो कियो गालो त कधी नाश न भोलो ।

43 ज़ैखन अस मरतम (इश्शो जिसम) बदसूरत ते कमज़ोर भोतन । पन ज़ैखन तै दुबारां ज़ीतो भोतो त तै बडे खूबसूत ते मज़बूत भोते ।

44 जेन्चरे इश्शो जिसमे मास ते खूने सेइं आन, एरे जिसम आन ज़ैन परमेशेरो आत्मा ज़िन्दगी देते । ते इश्शो जिसम ज़ै मासे त कने खूनेरोए तैस जिसमे मां बेदलोलो, ज़ै परमेशेरो आत्मारे तरफां दित्तो गाते ।

45 पवित्रशास्त्रे मां इन भी लिखोरूए, “कि पेइलो मैन्हु, मतलब आदम, ज़ीतो प्राणी बनो,” त आखरी आदम, यानी मसीह, हमेशारी ज़िन्दगी देनेबालो बनो ।

46 मासे ते खूने सेइं साथी पेइले जिसम वजूदे मां आए फिरी तैना जिसम ज़ैना परमेशेरो आत्मा देते ।

47 पेइलो मैन्हु ज़मीनरो मतलब मिच्ची सेइं बनरो थियो, तेन्चरे दुइयोवं मैन्हु यानी मसीह, स्वर्गेरां ओरो थियो ।

48 लोक ज़ैना इस धेरतरेन तैना धेरतरे पेइले मैन्हु आदमेरे ज़ेरेन । पन ज़ैना लोक स्वर्गेरि तैना स्वर्गेरि मैन्हु यानी मसीहेरे ज़ेरे आन ।

49 ते जेन्चरे असेईं तैसेरू रूप ज़ै मितारो थियू धारण कियू, तेन्चरे तैस ज़ै स्वर्गेरोए तैसेरू रूप धारण केरेमेले ।

50 हे दूलाव ते बेइनव, इश्शो जिसम इस धेरती पुड मास ते खूने सेइं बनरो भोते, अस एरे ज़ेरे जिसमे सेइं साथी स्वर्गे मां परमेशेरे राज़े मां रानेरे काबल न भोले । अस स्वर्गे मां अपने मरने बाले जिसमे सेइं साथी न रेइ बटमेले, ज़ै मरते, किजोकि तैडी कोई मौत नई ।

51 शुना, अवं तुसन सेइं भेदेरी गल जोताई, अस सब नई मरने, पन ज़ैखन आखरी नइशिंगेरी आवाज़ भोली, त अस सब एक्की पले मां बेदलोनेम,

52 ते इन एक्की पले मां, जेन्चरे कोई चिप करते, ज़ैखन आखरी नइशिंगेरो बज़ाव गालो त ज़ैना मरे थिये तैना ज़ीते भोनेन ताके हमेशारे लेइ ज़ीते रान, ते अस ज़ैना ज़ीतेम, इश्शो जिसम बेदलोनेन ।

53 किजोकि इश्शो जिसम ऐसैनी सेइं मरते ते शडते, ते ई तैस जिसमे मां बेदलोई गालो ज़ै कधे न मरे ते न शडे ।

54 ज़ैखन इन भोलू, तैखन पवित्रशास्त्रे मां लिखोरू परमेशेरू तैन वचन पूरू भोलू, ज़ैन ज़ोते, “मौत रोडे च़ारे हाराई गाली ते तैसेरू कोई वजूद न रालू ।”

55 एन्चरे ज़ैन पवित्रशास्त्रे मां लिखोरू तैन पूरू भोलू,

“हे मौत तेरी ज़ीत कोडि राई?

हे मौत तेरो डस कोडि राव?”

56 मौती तकलीफ देनेरी शक्ति पापे करां मैलतीए, ते पापे कानूने करां शक्ति मैलतीए ।

57 पन परमेशेरू शुक्र भोए, ज़ै इश्शो प्रभु यीशु मसीहेरे ज़िरिये पापे ते मौत पुड ज़ीत देते ।

58 हे मेरे दूतारे दूलाव ते बेइनव, विश्वासे मां मज़बूत राथ ते गलत शिक्षाई सेइं न टेपलोथ, ते हमेशा प्रभुएरू कम जोशे सेइं केरा, किजोकि तुस इन ज्ञानतथ, कि ज़ैन किछ तुसेईं प्रभुएरे लेइ कियूं तैन बेफैडदू नईं ।

16

~~~~~

1 हुनी तुशश तैस चन्देर सवालरे बारे मां जै यरूशलेम नगरेरे परमेशेरे लोकां केरे लेइ कियो गाते, तुसेईं भी तेन्चरे कियोरू लोडे जेन्चरे मीं गलातियारे कलीसियान हुकम दित्तो ।

2 हफतेरे पेइले दिहाडे तुसन मरां हर कोई अपने आमदनेरे मुताबिक किछ एप्पू कां रखा, कि मेरे एजने पुड चन्दो अकोट्टो न केरनो पे ।

3 जैखन अवं तैडी भोईं, अवं किछ लोकन भेजेलो ज़ैन तुस चुनेले कि एना भरोसेरे कावलन, चन्दो घिन्तां यरूशलेम नगरे जो गान । अवं तैन कां चिट्टी भी भेजेलो ताके विश्वासी लोक तैन केरे बारे मां ज्ञानन् ।

4 ते अगर मेरू भी गानू ज़रूरीए, त तैना मीं सेइं साथी गाले ।

~~~~~

5 ते मकिदुनिया गानेरे बाद अवं तुसन कां एज्जी रावरोईं, किजोकि मीं मकिदुनिया मेइं गानेरो बिस्तार बनोरोए ।

6 भोइ सकते, अवं तुसन सेइं साथी किछ चिरे रुकेलो, शैइद पूरे हिवतडो, फिरी तुस जेरां मीं गानू भोलू, तेरहां मीं भेजां ।

7 अगर ई परमेशेरी मर्जी भोली, ते मीं उमीदे अवं वादे मां जादे चिरेरे लेइ तुसन कां एज्जेलो, न कि इस वक्ते थोडे चिरेरे लेइ ।

8 पन अवं पेन्तिकुसत तिहारे तगर इफिसुस नगरे मां रानोईं ।

9 किजोकि मीं बडो रोडो मौको मैलोरे ज़ैस सेइं अवं तैन कम केरि सकताईं जेसेरो अस्सर बडोए, चाए बडे लोक मेरी खलाफत केरनेबाले आन ।

10 अगर तीमुथियुस एज्जे, त तैस कबूल केरा, तैसेरी रोडे च़ारे आदर केरा, किजोकि तै मेरो ज़ेरो प्रभुएरू कम केरते ।

11 एल्हेरेलेइ कोई तैस घटिया न समझे, पन तैन केरे सफेरे लेइ जै ज़रूरते तैन खुशी सेइं देथ । ताके मीं कां एज्जन, किजोकि अवं तैस लोरोईं बलगने, कि तै विश्वासी दूलान सेइं साथी एज्जे ।

12 ते विश्वासी साथी अपुल्लोसे सेइं मीं बडी बिनती की, कि तुसन कां होरि विश्वासी मैनन् सेइं साथी गाए ज़ैना तुसन सेइं मिलने ओरेन । पन तैनी इस वक्ते गानू न चाव, पन ज़ैखन ठीक वक्त भोलो, तैखन एज्जेलो ।

~~~~~

13 खबरदार राथ, विश्वासे मां मज़बूत भोथ, हिम्मत रखा, मज़बूत भोथ ।

14 ज़ैन किछ केरतथ तैन प्यारे सेइं केरा ।

15 हे दूलाव ते बेइनव, तुस स्तिफनासेरे टब्बरे ज्ञानतथ, कि तैना अखाया इलाकेरे, पेइले मसीह पुड विश्वास केरनेबालेन, ते परमेशेरे लोकां केरि मद्दत केरनेरे लेइ ज़ैन किछ केरि बटते थिये तैनेईं तैन कियूं ।

16 अवं तुसन कां बिनती केरताईं कि एरे लोकां केरे अधीन राथ, बल्के तैन केरे भी ज़ैना इस कम्मे मां मेहनत केरतन ते मद्दत केरनेबालेन ।

17 ते अस स्तिफनास ते फूरतूनातुस ते अखइकुसेरे एजने सेइं खुश आईं, किजोकि जेइस तुस इडी न थिये, तैनेईं मेरी ज़रूरतां पूरी केरनेरे लेइ मेरी मद्दत की ।

18 जेन्चरे तुसेईं अवं खुश कियो, तेन्चरे तेनेईं भी अवं खुश कियो, एल्हेरेलेइ एरे लोकां केरि तारीफ़ केरा ।

19 आसिया इलाकेरे कलीसियां केरे सारे विश्वासी लोकां केरे तरफां तुसन नमस्कार; अक्विला ते तैसेरी कुआन्श पिरस्कारे तरफां ते तैन केरे घरे कलीसियाई भी तुसन प्रभु मां हछु-हछु नमस्कार।

20 इट्टेरे विश्वासी लोक तुसन नमस्कार ज़ोतन, मसीहेरे प्यारे सेइं एक्की होरि जो नमस्कार केरा।

21 अवं पौलुस अपने हथ्थे सेइं नमस्कार लिखताई।

22 अगर कोई प्रभु सेइं प्यार न रखे ते लानती भोए, हे इशशे प्रभु एईं!

23 प्रभु यीशुएरो अनुग्रह तुसन पुङ्ग भोतो राए।

24 अवं तुसन सेबन सेइं प्यार केरताई ज़ैन केरो रिशतो यीशु मसीह सेइं साथीए। आमीन।

## 2 कुरिन्थियों

~~~~~

1 अवं पोल्स परमेशेरे मेर्जी सेइं यीशु मसीहेरो प्रेरिताई, मेरे त कने ढला तीमुथियुसेरे तरफां ई चिट्ठी परमेशेरी तैस कलीसियोरे नंवे, जै कुरिन्थुस मांए, ते सारे अखाया इलाकेरे सब पवित्र लोकां केरे नंवे,

2 इशे वाजी परमेशर ते प्रभु यीशु मसीहेरे तरफां तुसन अनुग्रह ते शान्ति मैलती राए ।

~~~~~

3 परमेशेरू शुकर भोए जै इशे प्रभु यीशु मसीहेरो वाजी, जै दया केरनेवालो वाजीए, ते जै असन हमेशा तसल्ली देनेवालो परमेशेरे ।

4 ते इशे सेभी मुसीबतन मां असन तसल्ली देते; ताके अस तैस तसेल्लेरे वजाई सेइं जै परमेशर असन देते, तैन भी तसल्ली देइ बटम, जैना कोन्ची वजाई सेइं मुसीबतन मां आन ।

5 किजोकि जेन्नेरे मसीहे दुःख झेल्लेरेन तेन्नेरे अस भी दुःख झेल्लतम, एल्हेरेलेइ असन तसल्ली भी मसीहेरे जिरिये जादे भोतीए ।

6 अगर अस दुःख झेल्लतम, ते ई तुशे तसल्लेरे ते तुशे मुक्तेरे लेइए ते अगर असन तसल्ली मैलतीए, ते ई तुशे तसल्लेरे लेइ आए; जेसेरे अस्सेरे सेइं तुस सबरी सेइं तैना दुखन झल्लतथ, जैना अस भी झल्लतम ।

7 ते इशे उमीद तुशे बारे मां पक्कीए; किजोकि अस जानतम, कि जेरे दुःखन तुसेईं असन सेइं साथी झेल्ले, तेरी तसल्ली तुसन भी असन सेइं साथी मैलेली, जै असन परमेशर देलो ।

8 हे ढलाव ते बेइनव, अस न चाम कि तुस इशे तैस दुखे करां अनजान राथ, जै आसिया इलाके मां असन पुइ अव, कि एरो भारी बोझ असन पुइ ओरोए थियो, जै इशे लेइ छूनो मुशकिल थियो, इड़ी तगर कि असन अग्रोवं जो ज़ीनेरी कोई उमीद न थी ।

9 बल्के असेईं अपने मने मां समझोरू थियू, कि अस मारे गानेम ते अस अपनो भरोसो न रखम, बल्के परमेशेरे पुइ भरोसो रखम जै मुइदन जीते केरते ।

10 तैने अस एतरे बडे मौतरे खतरे करां बचाए, ते बचालो; ते तैस करां इशे ई उमीदे, कि तै अग्रोवं भी बचातो रालो ।

11 तुस भी मिलतां प्रार्थनाई सेइं इशे मद्दत केरेले, कि जैना बरकतां असन बड़ां लोकां केरे जिरिये मैली, किजोकि परमेशेरे अनुग्रहे सेइं इशे हाफजतरे लेइ बेइ प्रार्थनां शुन्नी, तैल्हेरेलेइ बडे लोक इशे भोतू परमेशेरू शुकर केरन ।

~~~~~

12 किजोकि अस अपने इस ज़मीरेरे गुवेही पुइ घमण्ड करतम, कि दुनियाई मां, खास केरतां तुसन मां इशे चालचलन परमेशेरे लायिक ते पवित्रतैईं ते सचैईं सेइं थियो । जै दुनियारे ज्ञाने सेइं नईं, बल्के परमेशेरेरे अनुग्रह सेइं साथी थियो ।

13 अस हमेशा तुसन इन लिखतम ताके तुस पढथ ते समझथ, ते मीं उमीदे, कि आखरी तगर समझते भी राले ।

14 जेन्नेरे तुसन मरां केतरेईं मन्नोरू भी आए, कि अस तुशे धुमण्डेरी वजाम; तेन्नेरे तुस भी प्रभु यीशुएरे वापस एजनेरे दिहाड़े इशे लेइ घमण्डेरी वजा भोले ।

~~~~~

15 ते इस भरोस सेइं, अवं चातो थियो कि पेइलो तुसन कां एज्जी; कि तुसन दुगनी बरकत मैल्ले ।

16 ते तुसन मेइं निस्तां मकिदुनिया इलाके जो गेईं ते फिरी मकिदुनियारां तुसन कां एज्जी, ते तुस मेरी सफररी ज़रुतरे मुताबिक मद्दत केरतां यहूदिया इलाकेरे पासे किछ दूर पुजाथ ।

17 एल्हरेलेइ मीं ज़ैने ई इच्छा कियोरी थी कुन मीं चंचलता हिराई? या ज़ैन केरनु चाताई कुन दुनियारे लोकां केरे ज़ेरू केरनु चाताई, कि अवं गल्ली मां हाँ, हाँ भी केरि; नई, नई भी केरि?

18 ज़ेन्वरे परमेशर वफादारे, तेन्वरे कि इश्शे तैस वचने मां ज़ै तुसन सेइं ज़ोवं, “हाँ” ते “नई” दुइये न मैल्ले ।

19 किजोकि परमेशेरू मट्टू यीशु मसीह ज़ेसेरो इश्शे ज़िरिये मतलब मेरे ते सिलवानुस ते तीमुथियुसेरे ज़िरिये तुसन मां प्रचार भोव; तैस मां “हाँ” ते “नई” दुइये न थी; पन तैस मां “हाँ” ए “हाँ” भोइ ।

20 किजोकि परमेशेरू ज़ेत्ते वादेन, मसीह मां हांए सेइं आन, एल्हरेलेइ मसीहेरे ज़िरिये आमीन भी भोइ, कि इश्शे ज़िरिये परमेशेरूरी महिमा भोए ।

21 ते ज़ै असन तुसन सेइं साथी मसीह मां मज़वूत करते, ते ज़ैने इश्शू अभिषेक कियोरूए, तैए परमेशेरू ।

22 ज़ैने असन पुइ छाप भी की, ते ज़ेन्वरे कोन्ची चीजरे लेइ साई देतन तेन्वरे तैनी पेइली आत्मा इश्शे मने मां दिती ।

23 परमेशर मेरे इस सच्चैइयरो गवाहे कि अवं कुरिन्थुस नगरे मां दुबारां एल्हरेलेइ नई ओरोए कि अवं तुसन दुःख देनो चातो थियो ।

24 इन नई, कि अस विश्वासेरे बारे मां तुसन पुइ राज़ केरनु चातम; पन तुश्शे आनन्दे मां तुश्शी मद्दत केरनेवाले आम, किजोकि तुस विश्वासे सेइं मज़वूत रातथ ।

## 2

1 मीं अपने मने मां इन थापेरू थियूं, कि फिरी तुसन कां एइतां तुसन दुख न देईं ।

2 किजोकि अगर अवं तुसन दुखी केरि, त मीं आनन्द देनेवालो कोन भोलो, सिर्फ तैए ज़ै मीं दुखी कियोरूए?

3 ते मीं ई गल तुसन एल्हरेलेइ लिखी, कि एरू न भोए, कि मेरे एजने पुइ ज़ैन सेइं आनन्द मैल्लेरो लोइतो थियो, अवं तैन करां दुखी भोई; किजोकि मीं तुसन सेबन पुइ इस गल्लरो भरोसोए, कि ज़ै मेरो आनन्दे, तैए तुश्शो सैरी केरो भी आए ।

4 मीं बडे दुःख, ते मनेरे कष्टे सेइं, बडे ऐखरन सेइं तुसन चिट्ठी लिखोरी थी, एल्हरेलेइ नई, कि तुस दुखी भोथ, पन एल्हरेलेइ कि तुस तैस बडे प्यारे ज़ानथ, ज़ै मीं तुसन सेइं आए ।

### \*\*\*\*\*

5 ते अगर केन्चे दुखी कियोरूई, त अवं नई बल्के (तैस सेइं बडी सखती न केरि) किछ-किछ तुस सब दुखी कियोरेथ ।

6 एरे मैनेरे लेइ ई सज़ा ज़ै विश्वासी दलान मरां बडेईं दिती, सुद्धी आए ।

7 एल्हरेलेइ इस करां इन रोडूए कि तैसेरो पाप माफ़ केरा; ते तैस तसल्ली देथ, एरू न भोए कि एरो मैन्हु उदैसी मां डुवे ।

8 एल्हरेलेइ अवं तुसन कां बिनती केरताई, कि तैस अपने प्यारू सबूत देथ ।

9 किजोकि मीं एल्हरेलेइ भी लिखेरू थियूं, कि तुसन पेरखी, कि तुस मेरे सब गल्लां मन्नेरे लेइ तियार आथ या नई ।

10 ज़ैस तुस माफ़ केरतथ तैस अवं भी माफ़ केरताई, किजोकि मीं भी ज़ैन किछ माफ़ कियोरूए, अगर कियेरू भोए, त तुश्शे वजाई सेइं मसीहेरे ठैरी भोइतां कियोरूए ।

11 कि शैतानेरो असन पुइ दावो न चले, किजोकि अस तैसेरी चालन करां अनजान नई ।

### \*\*\*\*\*

12 ते ज़ैखन अवं मसीहेरी खुशखबरी शुनाने त्रोआस नगरे मां अव, ते प्रभुए मेरे लेइ अक वत खोल्ली ।



13 त मेरे मने मां चैन न भोइ, एल्हेरेलेइ कि मेरे विश्वासी दूला तीतुसे तुश्शे एट्टां कोई खबर घिन्तां न अव; ते अव त्रोआसेरे विश्वासी लोकन करां अलग भोइतां अव वापस मकिदुनिया इलाके मां अव ।

????? ???? ???? ?? ???? ?

14 परमेशेरू शुक्र भोए, जै मसीह मां सदा असन ज़ीतारे जशने मां चलाते, ते अपने ज्ञानेरे खुशबू इश्शे ज़िरिये हर ठैरी फैलाते ।

15 किजोकि अस परमेशेरे कां मुक्ति मैलने बालां, ते नाश भोने बालन कां, दुइयां केरे लेइ मसीहेरी खुशबू आम ।

16 केत्रा केरे लेइ त मरनेरे मुशक, ते केत्रन जो ज़िन्दगरे लेइ ज़िन्दगरी खुशबू, ते इन गल्लां केरे काबल कौने?

17 किजोकि अस तैन केरे ज़ेरे नई, ज़ैना परमेशेरू वचन पेइसां केरे लेइ प्रचार केरतन, पन अस मनेरी सन्नैई सेइं, ते परमेशेरे तरफां परमेशर हाज़र समझतां मसीह मां ज़ोतम ।

### 3

?????? ???? ?

1 कुन अस दुबारा फिरी अपनि बड़याई करेने लगम? या असेईं केत्रा केरि ज़ेरि सुपारशारी चिट्टी तुसन कां ऐनिन या तुसन करां नेनिन?

2 तुस एप्पू इश्शी लेइ चिट्टी केरे ज़ेरेथ, ज़ैना इश्शे लेइ सुपारश केरतिन, ज़ैना इश्शे दिले पुड़ लिखोरिथ, तैन हर कोई पेढी सकते ते ज़ैना रोड़ां कम्मां असेईं कियोरन, तैन लोक पिशैनी सकतन ।

3 इन बांदूए, कि तुस मसीहेरे चिट्टी केरे ज़ेरेथ, ज़ैना असेईं सेवकां केरि ज़ेरि लिखी; ते ज़ैना शैही सेइं नई, पन ज़ीते परमेशेरी आत्माई सेइं घोड़ां केरे तेख्ती पुड़ नई, बल्के दिलेरे मासेरे तेख्ती पुड़ लिखोरिन ।

4 अस मसीहेरे ज़िरिये परमेशेरे पुड़ एरू याकीन रखतम ।

5 इन नई, कि अस अपने आपे सेइं इस काबलम, कि एप्पू कोन्ची गल्लेरे वारे मां सोची बटम; पन इश्शी काबलीत परमेशेरे तरफां आए ।

6 ज़ैनी अस नव्वे करारेरे सेवक भोनेरे काबल भी किये, मूसेरे कानूनेरे सेवक नई बल्के पवित्तर आत्मा सेइं; किजोकि मूसेरो कानून न मन्नेरो नितीजो मौत भोते, पन पवित्तर आत्मा हमेशारी ज़िन्दगी देते ।

7 ज़ैखन मूसेरो कानून ज़ेसेरे ज़िरिये मौत एइती ज़ेसेरे लफस घोड़ां केरे तेखतिन पुड़ घेइतां लिखोरे थिये, इड़ी तगर महिमा बाले भोए, कि इस्राएली लोक मूसेरे तुतरेरां तेकि न थी बटते, पन तै जादे वक्ते तगर न राव,

8 ते आत्मारो करार होरो भी महिमा बालो किना भोलो?

9 किजोकि दोषी ठहराने बालो करार महिमा बालो थियो, ते धर्मी बाने बालो करार होरो भी महिमा बालो किना भोए!

10 ते ज़ै पुरानो महिमा बालो करार थियो, तै नव्वे करारे करां महिमा बालो न भोव ।

11 किजोकि मूसेरू कानूने ज़ेसेरी महिमा थोड़े वक्तेरे लेइ थी, महिमा बालो थियो, त तै नव्वो करार ज़ै कायम रालो, होरू भी महिमा बालू किजो न भोलो!

12 एल्हेरेलेइ एरी उमीद रेखतां अस दिलेरी सेइं ज़ोतम ।

13 अस मूसेरे ज़ेरे नई, ज़ैने अपने तुतरे पुड़ पड़दो रखोरो थियो ताके इस्राएली लोक तैस घटने बैली महिमारो अन्त न लहन ।

14 पन तैन केरे मन सखत भोए, किजोकि अज़ तगर पुरानो नियम पढ़ते बार तैन केरे मन्न पुड़ तैए पड़दो रहते; पन पड़दो सिर्फ तै मसीह पुड़ विश्वास करेने सेइं उठते ।

15 ते अज़ तगर ज़ैखन भी मूसेरो कानून पढ़ो गाते, ते तैन केरे मन्न पुड़ सदा पड़दो रहते ते तैन रोड़े च़ारे समझ न एज्जे ।

- 16 पन जैखन भी तैना प्रभु यीशु पुड़ विश्वास केरेले, तैखन तै पड़दो दूर भोलो ।  
 17 प्रभु त आत्मा आए, ते जैड़ी भी प्रभुएरो आत्माए तैड़ी कानूने करां आजादी आए ।  
 18 पन जैखन इश्शे सेब्बी केरे बगैर पड़दे तुतरन सेइं प्रभुएरू प्रकाश बांदू भोते, जेन्चरे शीशे मां, ते प्रभुएरे जिरिये जै आत्माए, अस प्रभुएरे महिमा बाले रूपे मां थोड़े-थोड़े बदलते रातम ।

## 4

?????? ???? ???? ??

- 1 एल्हेरेलेइ अगर असन पुड़ एरी दया भोइ, कि असन ई खुशखबरी शुनानेरी सेवा मैल्ली, त अस दिलेरी न शारम ।  
 2 पन असेईं शरमराँ छुपोरां कम्मां शारोन, ते न बलैकी सेइं चलते, ते न परमेशेरे वचन मां मलावट केरम । पन परमेशर इश्शो गवाहे कि अस सच्च जोतम, ते हर कोई गवाही देते कि इन सच्चे ।  
 3 पन अगर इश्शे खुशखबरी पुड़ पड़दोए, त ई नाश भोने बालां केरे लेइए ।  
 4 ते तैन विश्वास न केरनेबालां केरे लेइ, जैन केरे अक्ल इस दुनियारे ईश्वर शैताने कानी कियोरीए, ताके मसीह जै परमेशेरे रूपे, तैसेरी महिमा खुशखबरी लौ तैन पुड़ न चमके ।  
 5 किजोकि अस अपनो नई, बल्के यीशु मसीहेरो प्रचार केरतम, कि तै प्रभुए; अस यीशु मसीहेरे वजाईं सेइं तुश्शे सेवकम ।  
 6 एल्हेरेलेइ कि परमेशर तै आए जैनी जोवं, “कि आंधरे मरां लौ चमके,” ते परमेशेरे इश्शे दिलन मां लोअरी जेरि समझ दिती, कि अस परमेशेरी महिमा पिशानम जै यीशु मसीह मां लेइहोई ।  
 7 पन अस मितारे भांडां केरे जेरेम जैन मां धन रखेए, कि ई हछ्छी शक्ति इश्शे तरफां नई, बल्के परमेशेरे तरफां भोए ।  
 8 अस जेवरे पासना दुःख त झल्लतम, पन मुशकली मां न पेम; धवरातम, पन न उमीद न भोम ।  
 9 सताए त गातम, पन शारे न गाम, बछ्छोडे त गातम पन नाश न भोम ।  
 10 अस यीशु मसीहेरी मौत अपनि जानी मां हर वक्त चलातम; कि जैन किछ अस केरतम तैसेरे जिरिये लोक यीशुएरी जिन्दगी हेरेले ।  
 11 किजोकि इश्शे जीते सांसेइं, सदा यीशुएरे वजाईं सेइं असन मौतरे खतरो भोतो थियो, कि यीशुएरी जिन्दगी भी इश्शे नाश भोनेबाले जानी मां बांदी भोए ।  
 12 अस त मौतरे खतरे मां जीतम पन इसेरो नितीजो तुश्शे लेइ हमेशारी जिन्दगीए ।  
 13 ते एल्हेरेलेइ कि असन मां तैए विश्वासेरी आत्माए, “जेसेरे बारे मां पवित्रशास्त्रे मां लिखोरूए, कि मीं विश्वास कियो, एल्हेरेलेइ मीं जोवं” एल्हेरेलेइ अस भी विश्वास केरतम ते जोतम ।  
 14 किजोकि अस ज्ञानतम, जैने प्रभु यीशु मुडदन मरां जीतो कियो, तैए असन भी यीशु मसीह मां हिसेदार सेमझतां जीते केरेलो, ते तुसन सेइं साथी अपने सामने हाजर केरेलो ।  
 15 किजोकि सारे दुःख जैना असन पुड़ आन, तुश्शे लेइ आन, ताके परमेशेरो अनुग्रह जादे करां जादे लोकन मसीह कां आने, ते बड़े लोक परमेशेरू शुक्र केरेले ।  
 16 एल्हेरेलेइ अस दिलेरी न शारम; अगर इश्शी वेडरीं इन्सानयत नाश भी भोए, त फिरी भी इश्शी एनतरीं इन्सानयत रोज नर्वीं भोती रहतीए ।  
 17 किजोकि इश्शो एक्की पलेरो थोडो जेरो दुःख बड़ी ते हमेशारी महिमा पैदा केरते, जेसेरी तुलना केन्वी सेइं न केरोए ।  
 18 ते अस त लेवरी चीजन नई पन अलैई चीजन लाते रातम, किजोकि लेवरी चीजां थोड़े दिहाडां केरे लेइ आन, पन अलैई चीजां हमेशारे लेई आन ।

## 5

????? ?????????? ?

1 किजोकि अस ज्ञानतम, कि ज़ैखन इश्शो जिसम ज़ै धेरतली पुड़े ते तेम्बेरो ज़ेरो आए मेरतां नाश भोलो, त असन परमेशरी तरफां स्वर्गे मां अक भवन मैलनोए, ज़ै हथ्यां केरो बनावरो नई बल्के हमेशारोए ।

2 इस मां अस बड़ कर लातम, ते बड़ी इच्छा केरतम; कि असन एरो जिसम मैले ज़ै स्वर्गेर घरेरो ज़ेरो भोए ।

3 कि ज़ैखन असन स्वर्गेरो जिसम मैल्ले त अस नग्गे न लेइहोम ।

4 ते अस इस तेम्बेरे ज़ेरे घरे मां रेइतां बोझे सेइ देबोइतां कर लाते रातम; किजोकि अस दुनियारो जिसम शारनो न चाम, बल्के इन चातम कि परमेशर असन स्वर्गेरो जिसम दे, ताके ज़ै मरने बालो जिसमे तै न मरे बल्के हमेशारे ज़िन्दगी मां बेदलोए ।

5 ते ज़ैनी अस इस नव्वे जिसमेरे लेइ तियार कियोरेम ज़ै असन मैलनोए, तै परमेशरे, ज़ैने असन ज़ेन्नेरे साई देतन तेन्नेरे पवित्र आत्मा भी दित्तोरोए ।

6 असन सदा पूरू याकीने ते इन ज्ञानतम; कि ज्ञांतगर अस जिसमे मां रातम, तांतगर अस प्रभु करां अलग आम ज़ै स्वर्गे मां आए ।

7 किजोकि अस शकल हेरतां नई, पन विश्वासे सेइं ज़ीतम ।

8 एल्हेरेलेइ अस हिम्मत केरते रातम, ते जिसमे करां अलग भोइतां ज़ैखन अस मरमेले त प्रभु सेइं साथी रानू जादे रोडू समझतम ।

9 एल्हेरेलेइ इश्शो मनेरी उमंग ईए, कि चाए अस स्वर्गे मां तैस सेइं साथी रहम, चाए अलग इड़ी धेरती पुड़ रहम पन अस तैस पसंद एइते रहम ।

10 किजोकि ज़रूरीए, कि इश्शो सेब्मी केरो हाल मसीहेरे आदालतरे तखतरे सामने खुल्ले, कि हर कोन्ची मैन्हु अपने रोड़ां बुरां कम्मां केरो बदलो मैल्ले ज़ैना तैने जिसमे सेइं कियोरन ।

????? ??? ?????????? ???????

11 अस प्रभुएरो डर मेन्तां लोकन कां बिनती केरतम कि सच्चे पुड़ विश्वास केरन, ते परमेशर रोड़े चारे ज्ञानते; ते मेरी उमीद ईए, कि तुस भी अपने दिले मां असन रोड़े चारे ज्ञानथ ।

12 अस फिरी भी अपनि बड़याई तुशे सामने न केरम, बल्के अस अपने बारे मां तुसन घमण्ड केरनेरो मौको देतम, कि तुस तैन जुवाब देइ बटतथ, ज़ैना मने पुड़ नई, बल्के दिखवटी गल्लन पुड़ घमण्ड केरतन ।

13 अगर कोई ज़ोते कि अस पागलम, त परमेशरेरे लेइ अहम; ते अगर कोई ज़ोते कि अस रोड़े अहम त तुशेरे लेइ आम ।

14 किजोकि मसीहेरो प्यार असन मजबूर केरते; एल्हेरेलेइ कि असन याकीने कि ज़ैखन अक मैन्हु सेब्मी केरे लेइ मरो जेव त सब मेरि जे ।

15 ते मसीह एन्नेरे सेब्मी केरे लेइ मरो, कि ज़ैना ज़ीते आन, तैना अग्रोवं जो अपने लेइ न ज़ीन पन तैसेरेलेइ ज़ै तैन केरे लेइ मरो ते फिरी ज़ीतो भोव ।

16 एल्हेरेलेइ अज़ेरां पत्ती अस कोन्ची दुनियारे मुताबिक न समझाम, ते अगर असेई भी मसीह दुनियारे मुताबिक ज्ञानोरो थियो त फिरी भी अज़ेरे पत्ती फिरी एरू न ज्ञानम ।

17 ते अगर कोई मसीह मां आए त तै नव्वीं सर्ष्टि आए, पुरैनी गल्लां बीती जेई; हेरा, तैना सब नेव्वीं भोइजेइ ।

18 ते सब गल्लां परमेशरेरी तरफन, ज़ैने मसीह भेजतां फिरी इश्शो मेल मलाप एप्पू सेइं कराव, ते लोक तैस सेइं मेल मिलाप केरन ई सेवा परमेशरे असन सौफोरोए ।

19 मतलब परमेशरे मसीह मां भोइतां एप्पू सेइं साथी दुनियारो मेल मिलाप कियोरोए, ते लोकां केरे पापां केरो दोष तैन पुड़ नई लोरो, ते परमेशरे मेल मलापेरो बिस्तार असन सौफोरोए ।

20 अस मसीहेरे राजदूत अहम; मन्ना कि परमेशर इशशे ज़िरिये बिनती केरते कि तुस तैसेरो सन्देश कबूल केरथ, अस मसीहेरे तरफां बिनती केरतम, कि परमेशरे सेइं साथी मेल मिलाप केरा।

21 मसीह पापे करां अनजान थियो, तैए परमेशरे इशशे लेइ पापी ठहराव, कि अस परमेशरेरी नज़री मां धर्मी बनम किजोकि मसीहे इशशी पापां केरि सज़ा भुगतोरीए।

## 6

1 अस ज़ैना परमेशरे सेइं साथी कम केरनेवाले आम ई भी बिनती केरतम, कि परमेशरेरो अनुग्रह ज़ै तुसन पुड़ भोरोए, ज़ैया न भोने देथ।

2 किजोकि परमेशर पवित्रशास्त्रे मां ज़ोते,

“कबूल केरनेरे वक्ते मीं तेरी शुनी,  
ते मुक्तेरे दिहाड़े मीं तेरी मदत की,”

हेरा, हुना तै कबूल केरनेरो वक्ते, हेरा, हुना तै मुक्तेरी दिहाड़ीए।

3 अस परमेशरे सेइं साथी कम केरनेवाले केन्वी भी गल्ली मां कोई भी मौको न देम, कि इशशी सेवाई पुड़ कोई दोष लाए।

4 पन हर गल्ली सेइं परमेशरेरे सेवकां केरे ज़ेरे अपने रोड़े गुन्न बांदे केरतम, बड़े सबरी सेइं, दुःख सेइं, शारे गाने मां, मुशकलन सेइं।

5 कोड़े खाने सेइं, केद भोने सेइं, हैल्लन सेइं मेहनती सेइं, बीझे विशने सेइं, बरत रखने सेइं।

6 पवित्रतैई सेइं, ज्ञाने सेइं, सबरी सेइं, दयाई सेइं, पवित्र आत्मा सेइं।

7 सच्चे प्यारे सेइं, सच्चे वचने सेइं, परमेशरेरे शेक्ति सेइं; अस धार्मिकतारे हथियारन इस्तेमाल केरतम, देइने हथ्ये सेइं हमलो केरनेरे लेइ ते खिशड़े हथ्ये सेइं अपनो आप बचानेरे लेइ।

8 ते ज़ैखन लोक इशशी इज़्जत केरतन या असन बेइज़्जत केरतन, ज़ैखन लोक ज़ोतन अस रोड़ेम या बुरे मैनुम, अस ईमानदारम फिरी भी लोक झूठ ज़ोतम।

9 अनजाना केरे ज़ेरेम; फिरी भी मुशूरम, मरने वालां केरे ज़ेरेम पन हेरा ज़ीतेम, मार खाने वालां केरे ज़ेरेम, पन जानी सेइं न मैरोम।

10 दुःख केरनेवालां केरे ज़ेरेम, पन सदा आनन्द केरतम, कंगालम, पन बड़े लोकन आत्मिक धनी केरतम; एरेम कि असन कां किछ भी नई फिरी भी सब किछ रखतम।

11 हे कुरिन्थिस नगरेरे विश्वास लोकव, असेईं तुसन सेइं खुलतां गल्लां कमेईं, अस तुसन सेइं पूरे दिले सेइं प्यार केरतम।

12 इशशे मने मां तुशशे लेइ बड़ी ठारे, पन तुशशे मन्न मां नई।

13 पन अवं बच्चे समझतां तुसन सेइं ज़ोताई, कि तुस भी तैसेरे बदले असन सेइं प्यार केरा।

~~~~~

14 ज़ेर विश्वासी लाकां केरे संगती मां न गाथ, किजोकि धार्मिकता ते अधमेंरो कुन मेल जोल? या लौ ते आंधेरो कुन साथ?

15 ते मसीहे शैताने सेइं कुन लगाव? या विश्वास केरनेवालेरो विश्वास न केरनेवाले सेइं कुन तालमेल?

16 ते परमेशरे मन्दरेरे मां मूरती केरे लेइ कोई ठार नई, किजोकि अस त ज़ीते परमेशरेरां मन्दर अहम; ज़ेन्चरे परमेशरे पवित्रशास्त्रे ज़ोवं,
“अवं तैन लोकन साथी रेइलो ते तैन मां चलेलो फिरेलो;
ते अवं तैन केरो परमेशर भोनोई,
ते तैना मेरे लोक भोले।”

17 एल्हरेलेइ प्रभु पवित्रशास्त्रेरे ज़िरिये ज़ोते,
“विश्वास न केरनेवालन मरां निस्सा
ते अलग राथ;
ते अशुद्ध चीज़न करां दूर राथ;

ते अवं तुसन कबूल केरेलो ।

18 ते तुश्शो बाजी भोइलो,

ते तुस मेरां मट्टां ते कुइयां भोलां,

इन सर्वशक्तिमान प्रभु परमेशेरू वचने ।”

7

1 किजोकि हे ट्लाराव परमेशेरे वादो कियोरो कि तै असन अपने वच्चां केरे रूपे मां कबूल केरेलो, त एज्जा, अस अपने आपे ते जिसमेरी ते आत्माारी सब गंदगी शुद्ध केरम, ते परमेशेरे डर मेन्तां ते इज्जत केरतां, ते परमेशेरेरी वत्तां बलनेरे लेइ पूरे तरीके सेइं पवित्र ज़िन्दगी ज़ीम ।

~~~~~

2 असन अपने दिल मां ठार देथ, असेईं केन्वी सेइं बेइन्साफी नईं कियोरीए, न केन्वेरू किछ् बिगाड़ेरूए, ते न कोई टगगोरोए ।

3 अवं तुसन दोषी बनानेरे लेइ इन नईं लगगोरो ज़ोने, किजोकि मीं इन पेइलू ज़ोरूए, कि तुस इश्शे मने मां बसोरेथ कि अस तुसन साथी मरने ज़ीनेरे लेइ तियारम ।

4 अवं तुसन सेइं वडे दिलेरी सेइं ज़ोने लोरोईं, मीं तुसन पुइ वडू घमण्डे, अवं तसल्ली सेइं भेरोईं जोरोईं; अपने सारे दुखन मां अवं आनन्दे सेइं भरपूर राताईं ।

5 किजोकि ज़ैखन अस त्रअस शैरतां मकिदुनिया इलाके मां आए, तैखन भी इश्शे जानी चैन न भोइ, पन अस च़ेवरे पासना दुःख झल्लते राए, बेइर लडेईं थी, अन्तर बेइ-बेइ गल्लां थी ।

6 फिरी भी उदासन तसल्ली देनेवाले परमेशेरे तीतुसेरे एजने सेइं असन तसल्ली दिती ।

7 ते न सिर्फ तैसेरे एजने सेइं पन तैसेरी तैस तसल्ली सेइं, ज़ै तैस तुसन करां मैलती थी; ते तैनी तुश्शी इच्छा ते तुश्शे दुःख ते मीं सेइं मिलनेरे जोशेरी खबर असन शुनाईं, ज़ैस सेइं होरो भी आनन्द भोव ।

8 किजोकि अगर मीं एपनी चिट्ठी सेइं तुस दुखी किये, पन तैस करां पसतेईं न, ज़ेन्चरे पेइलो पसतातो थियो, किजोकि अवं हेरताईं तैस चिट्ठी सेइं तुसन दुःख त भोव पन तै थोडे च़िरेरे लेइ थियो ।

9 हुनी अवं खुशी आईं पन एल्हेरेलेइ नईं कि तुसन दुःख पुजो, बल्के एल्हेरेलेइ कि तैस्से दुखेरे वजाईं तुसेईं पापन करां मन फिराव । किजोकि तुश्शो दुःख परमेशेरेरे मेर्जी सेइं थियो, कि इश्शे पासरां तुसन कोई नुकसान न पुज्जे ।

10 किजोकि परमेशेरेरे भेक्त्रो दुःख एरी पसतावो पैदा केरते ज़ैस सेइं मुक्ति मैलतीए, फिरी तैस सेइं पसतानू न पे, पन दुनियारो दुःख हमेशारी मौत पैदा केरते ।

11 ते हेरा, इस्से गल्ली सेइं तुसन परमेशेरेरे भेक्त्रो दुःख भोव, कि तुसन केत्रो जोश, उज़र, सरक, डर, इच्छा, मघन भोनू, ते सज़ा देनेरो खियाल पैदा भोव? तुसेईं सेबमी तरीके सेइं इन सिद्ध कियूं, कि तुस इस गल्ली मां बेकसूर आथ ।

12 फिरी मीं ज़ैन तुसन जो सेखती सेइं लिखेरू थियूं, तैन न तैसेरे वजाईं सेइं लिखू, ज़ैने बेइन्साफी की, ते न तैसेरे वजाईं सेइं ज़ैस सेइं बेइन्साफी भोइ, पन एल्हेरेलेइ कि तुश्शी सरगरमी ज़ै इश्शे लेइए, ते परमेशेरेरे सामने तुसन पुइ बादी भोए ।

13 एल्हेरेलेइ असन हिम्मत मैल्ली;

ते इश्शी इस हिम्मती सेइं साथी तीतुसेरे आनन्द सेइं होरो भी आनन्द भोव किजोकि तैसेरो मन तुश्शे वजाईं सेइं हरो भरोए ।

14 किजोकि अगर मीं तैसेरे सामने तुश्शे बारे मां किछ् घमण्ड हिराव, त छिथोव न, पन ज़ेन्चरे असेईं तुसन सेइं सब गल्लां सज़-सज़ जोरी थी, तेन्चरे इश्शू घमण्ड हिरानू तीतुसेरे सामने भी सज़ निस्सू ।

- 15 ते ज़ैखन तैस तुशशो सेब्भी केरू हुक्मन मन्नेबाले भोनु याद एइते; किजोकि तुसेई थरकते-थरकते तैस सेइं मुलाकात की; तैसेरो प्यार तुशशे पासेरां होरो भी बद्धतो गाते ।
- 16 अवं खुश भोताई, किजोकि तुसन करां मीं हर गल्ली मां भरोसो भोते ।

## 8

\*\*\*\*\*

- 1 हुनी मेरे दूलाव बेइनव, अस तुसन परमेशेरे अनुग्रहेरी खबर देतम, जैन मकिदुनिया इलाकेरे कलीसियारे लोकन पुड़ भोरोए ।
- 2 कि ज़ैखन बेड़ि मुसीबतां केरे ज़िरिये परखे जे, त तैना बड़े खुशी भोए, चाए तैना बड़े गरीब थिये फिरी भी होरि विश्वासी लोकां केरि मद्दत केरनेरे लेइ खुल्ले दिले सेइं पेइंसो दित्तो ।
- 3 ते तैन केरे बारे मां मेरी ई गवाहीए, कि तैनेई अपने काबलीतरे मुताबिक बल्के अपने काबलीती करां भी जादे मने सेइं दित्तू ।
- 4 ते इस दाने मां ते पवित्र लोकां ज़ैना यहूदिया इलाके मां आन तैन केरे सेवाई मां मद्दत केरनेरे बारे मां असन सेइं बार-बार बड़ी बिनती की ।
- 5 ते ज़ेन्चरे असेई उमीद न थी कियोरी, कि तैनेई पेइलो अपनो आप प्रभुएरी सेवा केरनेरे लेइ समर्पण कियो, फिरी परमेशेरेरी मेज़ीं सेइं असन पत्ती चलनेरे लेइ अपनो आप समर्पण कियो ।
- 6 एल्हरेलेइ असेई तीतुस समझव, कि ज़ेन्चरे तेने पेइलू शुरू कियोरू थियूं, तेन्चरे इस दानेरे कम्मे पूरू भी केरे ।
- 7 ज़ेन्चरे हर गल्ली मां मतलब विश्वासे, वचन प्रचार केरनेरे काबलीत, ज्ञाने ते सेब्भी किसमेरे कोशिश मां, ते तैस प्यारे मां, ज़ै तुस असन सेइं केरतथ, बद्धते गातथ, तेन्चरे विश्वासी लोकन दान देनेरे कम्मे मां बद्धते राथ ।
- 8 अवं हुक्मेरे तरीके पुड़ नई, पन होरि केरे हिम्मतेरे लेइ ते तुशशे प्यार ते सचैई परखनेरे लेइ ज़ोताई ।
- 9 तुस इशशे प्रभु यीशु मसीहेरे अनुग्रह ज्ञानतथ, कि तै धनी भोइतां भी तुशशे लेइ गरीब बनो ताके तैसेरे गरीब भोने सेइं तुस धनी भोथ ।
- 10 ते इस गल्ली मां मेरो खियाल ईए, किजोकि तुशशे लेइ रोडूए; ज़ै एक्की साले करां न सिर्फ इस कम्मे केरने मां, बल्के इस गल्लेरे चाने मां भी पेइले भोरे थी ।
- 11 एल्हरेलेइ हुनी इन कम पूरू केरा; ज़ेन्चरे तुस इच्छा केरने तियार थिये, तेन्चरे अपने-अपने हैसियतेरे मुताबिक पूरू भी केरा ।
- 12 किजोकि अगर मनेरी तियारी भोए त दान तैसेरे मुताबिक कबूल भी भोते ज़ैन तैस कां आए न कि तैसेरे मुताबिक ज़ैन तैस कां अथ्थी नई ।
- 13 अवं इन न चैई होरि केरि ज़िन्दगी आसान बनानेरे लेइ तुस अपने ज़िन्दगी मुशकिल बनाथ ।
- 14 पन बराबर भोनेरे खियालन सेइं इस वक्ते तुशशू जादे तैन केरि घाटे मां कम्मे एज्जे, ताके तैन केरू जादे तुशशे घाटे मां कम्मे एज्जे, कि बराबरी भोए ।
- 15 ज़ेन्चरे पवित्रशास्त्रे मां लिखोरूए,  
“ज़ैनी बड़ अकोट्टू कियूं तैसेरू जादे न निससू,  
ते ज़ैने थोडू अकोट्टू कियूं तैसेरू घट न निस्सू ।”

\*\*\*\*\*

- 16 परमेशेरू शुक्र भोए, ज़ैने तुशशे लेइ ज़ै सोच मेरे मने मां आए तैए जोश तीतुसेरे मने मां छड़ोरोए ।
- 17 कि ज़ैखन असेई तैस तुसन कां एजनेरे लेइ मिनत की त तैनी इशशी गल मन्नी बल्के अपने मेज़ीं सेइं ते बड़े जोशे सेइं तुसन कां अवं ।

18 ते अस तैस सेइं साथी अक होरो विश्वासी दूला भेजने लोरेम, जेसेरू नवं खुशखबरी शुनानेरे बारे मां कलीसियारे लोकन मां फैलोरूए।

19 ते एतूरू नईं, पन तै कलीसियां केरे लोकेईं ठहरावरो भी आए, कि इस दानेरे कम्मरे लेइ असन सेइं साथी गाए ते अस ई सेवा एल्हेरेलेइ केरतम, कि प्रभुएरी महिमा भोए, ते इन हिरानेरे लेइ कि अस यरूशलेमेरे विश्वासी लोकां केरि मद्दत चातम।

20 अस इस गल्ली मां हुशार रातम, ते तीतुसे सेइं साथी विश्वासी लोक भेजने सेइं इस दान देनेबाले कम्मरे बारे मां जै सेवा अस केरतम, ताके कोई असन पुइ दोष न लेइ सखे।

21 किजोकि जैना गल्लां सिर्फ प्रभुएरे नजर मां रोड़ी नईं बल्के मैन्हु केरे नजरी मां रोड़ी आन, अस तैन केरि फिकर केरतम।

22 ते अस तैन सेइं साथी अक होरो विश्वासी दूला भी भेजरी राओरेम, जै असेईं बार-बार परखो ते बेइ गल्लन मां जोशे बालो निस्सो; पन हुनी तुसन पुइ तैस बड़ो भरोसोए एल्हेरेलेइ तै दिले सेइं जोशे बालोए।

23 अगर कोई तीतुसेरे बारे मां पुछे, त तै मेरो साथीए, ते तुशेरे लेइ मेरो मद्दतगार, ते अगर इशेरे विश्वासी दूलां केरे बारे मां कोई पुछे, त तैना कलीसियां केरो भेजोरोए ते तैन केरि जिन्दगी सेइं मसीहेरी महिमा भोतीए।

24 एल्हेरेलेइ अपनो प्यार तैन हिराथ, सारे कलीसियां केरे विश्वासी लोकन सबूत देथ कि इशू तैन घमण्ड जैन तुशेरे बारे मांए सच्चे।

## 9

????? ???? ???? ??? ???? ?

1 हुनी तैस सेवारे बारे मां जै यरूशलेमेरे विश्वासी लोकन जो दान देनेरे बारे मां की गातीए, मीं तुसन जो लिखनू जरूरीए नईं।

2 किजोकि अवं तुशेरे मनेरे तियैरारे बारे मां जानताईं, जेसेरे वजाईं सेइं अवं तुशेरे बारे मां मकिदुनिया इलाकेरे विश्वासी लोकां केरे सामने घमण्ड हिराताईं, कि तुस अखाया इलाकेरे लोक एक्की साले करां तियार भोरेथ, ते तुशेरे जोशे होरन भी जोश बनेवरोए।

3 पन मीं तीतुस ते दईं होरे दूला तुसन कां एल्हेरेलेइ भेजे, कि असेईं जैन घमण्ड तुशेरे बारे मां हिराव, तैन इस गल्ली मां बेफेइदे न भोए; पन जेन्चरे मीं ज़ोवं; तेन्चरे तुस यरूशलेम नगरेरे विश्वासी लोकां केरे लेइ दान देने जो तियार राथ।

4 एरू न भोए, कि अगर किछ मकिदुनया इलाकेरे विश्वासी लोक मीं सेइं साथी एज्जन, ते तुशू दान तियार न भोए, त अस तुसन पुइ भरोसेरे केरनेरे वजाईं छिथोम, पन तुस असन करां भी जादे छिथोले।

5 एल्हेरेलेइ मीं विश्वासी दूलान सेइं ई बिनती केरनि जरूरी समझी, कि तैना पेइले तुसन कां गान, ते तुशेरे खुल्ले दिले सेइं दान देनेरे बारे मां, जेसेरे बारे मां पेइलो वादो कियोरो थियो, तियार केरतां रखा, कि इन दबावे सेइं नईं बल्के इच्छाईं सेइं भोए।

??? ???? ???? ?

6 पन गल त ईए, कि जै थोडू बेते तै कटेलो भी थोडू; ते जै हछु बेते तै हछु कटेलो।

7 हर अक मैन्हु जेन्चरे मने मां थापेरू भोते तेन्चरे दान दे, न कुइ-कुइ केरतां, ते न दबावे सेइं, किजोकि परमेशर खुशी सेइं देने बालन पुइ खुश भोते।

8 परमेशर जैन किछ तुसन जरूरते तैसेरो अनुग्रह देइ बटते, जैस सेइं हर गल्ली मां ते हर वक्त, सब किछ, जेसेरी तुसन जरूरत भोए, तुसन कां राए, ते हर एक्की रोइ कम्मरे लेइ तुसन कां बड़ किछ भोए।

9 जेन्चरे पवित्रशास्त्रे मां लिखोरूए,

“परमेश्वर जैन ज़रूरते तैन हच्छु देते,  
जैन तै केरते तैन ठीके ते तैन हमशा रालू ।”

10 आखरी, जै बनेवालो बीज, ते खानेरे लेइ रोटी देते, तै तुसन बीज देलो, ते तैस सेइ फलवन्त केरेलो, ते तुशे धार्मिकतारो फल बधालो ।

11 तुसन हर गल्ली मां बरकत मैलेली जैस सेइ तुस जादे दान देनेरे काबल बनेले, ते जैखन अस तुशे हच्छे दाने तैन कां नेमले जैन ज़रूरते त तैना लोक परमेश्वर शुकूर केरेले ।

12 किजोकि सेवारे पूरे केरने सेइ, न सिर्फ परमेश्वरे लोकां केरो घाटो पूरो भोते, पन लोकां केरे तरफां परमेश्वर बड़ शुकूर भोते ।

13 किजोकि होरि लोकन दान देनेरी मद्दतरी सेवारू सबूत कबूल केरतां तैना परमेश्वेरी महिमा बांदी केरतन, कि तुस मसीहेरी खुशखबरी मेन्तां तैसेरे अधीन रातथ, ते गरीब विश्वासी लोकां केरि, ते सेबी केरि मद्दत केरने मां हच्छु देनू बांदू केरतथ ।

14 ते तैना तुशे लेइ परमेश्वरे कां प्रार्थना केरेले; तैना तुसन सेइ प्यार केरतन, किजोकि परमेश्वरे तुसन पुइ अनुग्रह कियोरोए ।

15 परमेश्वरे तैसेरे तैस दानेरे लेइ जैन समझी करां बेइर शुकूर भोए ।

## 10

### ???????? ???? ?

1 अवं तैए पौलुस जै तुशे सामने दीन आई, पन तुसन करां दूर भोताई सेखती सेइ ज़ोताई । अवं तुसन मसीहेरी नमूरता ते नरमी याद केइतां तुसन कां मिनत केरताई ।

2 अवं ई बिनती केरताई, कि तुशे सामने नझक भोइतां दिलेर न भोनु पे; जेन्चरे अवं केत्तन पुइ जैना असन दुनियारे लोकां केरे जेरे चलने वाले समझतन, बहदरी हिरानेरी खियाल केरताई ।

3 किजोकि अगर अस दुनियाई मां ज़ीतम, पन फिरी भी अपने दुश्मन् सेइ दुनियारे मुताबिक न लइम ।

4 किजोकि इश्री लइइरे हथियार मैन्हु केरे नई, पन गइ बछोइनेरे लेइ परमेश्वेरी शक्ति ।

5 ते अस खियालन, ते हर एक्की उच्ची गल्ली, जैना परमेश्वेरी पिशानेरे खलाफ उट्टतन, खतम केरतम; ते हर एक्की खियाले कब्जे मां केरतम, ते मसीहेरो हुक्म मन्ने बालो बनातम ।

6 ते तियार रातम कि जैखन तुस पूरे तरीके सेइ अपनो आप मसीहेरो हुक्म मन्नेबाले बनातथ, त अस मसीहेरे हुक्म न मन्ने बालन सज़ा देनेरे लेइ तियार रामेले ।

7 तुस बेइरयू रूप हेरतथ, अगर केन्ची एप्पु पुइ ई भरोसे, कि अवं मसीहेरोई, तै इन भी ज़ाने, कि जेरो तै मसीहेरोए, तेन्चरे अस भी मसीहेरेम आम ।

8 किजोकि अगर अवं तैस अधिकारेरे बारे मां होरू भी घमण्ड हिरेई, जै प्रभुए तुशे विश्वास नाश केरनेरे लेइ नई बल्के विश्वासे बद्धानेरे लेइ असन दित्तोरुए, त शरमिन्दे न भोलो ।

9 इन अवं एल्हेरेलेइ ज़ोताई, कि चिट्ठी केरे ज़िरिये तुसन डराने बालो न भोई ।

10 किजोकि किछु लोक ज़ोतन, “कि तैसेरी चिट्ठी त ज़रूरिन ते अस्सर केरने बैलिन; पन जैखन हेरतन, त तै कमज़ोर मैन्हु आए, ते तैसेरां भाषाना बेकारन ।”

11 ते जै एरू ज़ोते, तै ई समझ रखते, जेन्चरे ठीक इशे चिट्ठन मां इशो वचन आए, तेन्चरे तुशे सामने इशशां कम्मां भी भोलां ।

12 किजोकि असन ई दिलेरी नई कि अपनो आप तैन सेइ साथी गनम, या तैन सेइ अपनो आप मिलाम, जैना अपनि तारीफ़ केरतन, ते अपनो आप एक्की होरि सेइ तुलोइतां बेवकूफ बन्तन ।

13 अस परमेश्वरे दित्तोर कम्मे करां बेइर घमण्ड कधी न केरमेले, पन तैसेसे हदी तगर जै परमेश्वरे इशे लेइ बनोरीए, ते तैस मां तुस भी ओरथ ते तैसेरे मुताबिक घमण्ड भी केरेले ।



14 किजोकि अस एपनी हदी करां बेइर अपनो आप बधानो न चाम, जेन्चरे कि तुसन तगर न पुजनेरी हालती मां भोते, बल्के अस पेइले थिये जैना कुरिन्थुस नगरे मां मसीहेरी खुशखबरी शुनाते तुसन तगर पुज्जी जोरेम।

15 ते अस हदी करां जादे होरि केरे मेहनती पुड़ घमण्ड न केरम; बल्के असन उमीदे, जेन्चरे-जेन्चरे तुशशो विश्वास बधेलो तेन्चरे-तेन्चरे अस एपनी हदारे मुताबिक तुशशो वजाई सेइं होरां भी बड़ां जादे कम्मां केरनेरे काबल भोले।

16 कि अस तुशशो हदन करां सारे दूर-दूर इलाकन मां भी खुशखबरी शुनाम, इन नई कि अस होरि केरे हदां केरे अन्तर बनोरे कम्मन पुड़ घमण्ड केरम।

17 पन जेन्चरे पवित्रशास्त्र ज्ञाते, जै घमण्ड केरे तै प्रभु पुड़ केरे।

18 किजोकि जै अपनि बड़याई केरते, तै नई, पन जेसेरी बड़याई प्रभु केरते, तैए परमेशेरी नजरी मां रोड़ोए।

## 11

### \*\*\*\*\*

1 तुस होरन कबूल केरतथ जैना अपनि बड़याई केरतन, ते एल्हेरेलेइ अवं उमीद केरतां, अगर अवं थोड़ी जेरि बेवकूफी केरि त तुस झैल्ले।

2 किजोकि अवं तुसन सेइं प्यार केरताई ते तुशशो खियाल रखताई ठीक तेन्चरे, जेन्चरे परमेशर केरते, मीं वादो कियोरोए तुसन मसीह जो देनेरे लेइ, जेन्चरे लोक पूरे तरीके सेइं समर्पितन।

3 पन अवं डरताई कि जेन्चरे शैताने सप्येरे रूपे मां एइतां अपनि च्लैकी सेइं पेइली कुआन्श, हव्वा भटकवरी थी, तेन्चरे तुशशो मन तैसेरे सिधयेई ते पवित्रतैई सेइं जै मसीहे कबूल केरत भोरी लोडे भ्रष्ट न की गाए।

4 जैखन भी कोई तुसन कां एइते ते तुसन तैस यीशुएरी जैस यीशुएरो असेई नई कियोरो एइतां, कोन्ची होरि यीशुएरो प्रचार केरते, जेसेरो प्रचार असेई नई कियोरो: या जै आत्मा तुसन मैल्लोरी तैस करां अलग किसमेरी आत्मा तुसन मैल्ले; या जैस खुशखबरी पुड़ तुसेई विश्वास कियू तैस करां अलग किसमेरे खुशखबरी तुसन शुनाए, त तुस तैन शिक्षान कबूल केरने मां गलतथ।

5 अवं समझताई, कि अवं कोन्ची गल्ली मां, जैना इस तरीके सेइं बर्ताव केरतन, कि तैना होरि सब प्रेरितन करां महान आन अवं भी तैन केरो जेरो रोड़ो प्रेरित आई।

6 अगर अवं भाषण देने मां माहिर नई, पन मसीह ते खुशखबरारे बारे मां मीं कां ज्ञाने; बल्के मीं हर गल शिक्षालने मां अपनू ज्ञान हिरावरूपे।

7 कि मीं तुसन परमेशेरी खुशखबरी मुखत शुनाई; ते अपनो आप निकड़ो कियो, कि तुस उच्चे भोथ, कुन इस मां मीं किछ् पाप कियो?

8 मीं होरि कलीसियान करां दान कबूल कियू, ताके तुशशी सेवा मुफते मां केरि बेटि, तैस जो लूट न ज़ोथ।

9 ते जैखन तुसन सेइं साथी थियो, ते मीं पेइसेरो घाटो भोव, ते मीं केन्ची पुड़ भार न छुड़डो, किजोकि विश्वासी दलाएई, मकिदुनिया इलाकेरां एइतां मेरो घाटो पूरो कियो: ते मीं हर गल्ली मां अपनो आप तुसन पुड़ भार भोने करां रोको, ते अग्रोवं जो भी रोकेलो।

10 मसीहेरी सच्च्चाई मीं मां आए, मीं अखाया इलाके मां कोन्ची करां दान नई नेवरू, एल्हेरेलेइ अखाया इलाके मां इस घमण्डे केरने करां कोई मीं न रोकी बटे।

11 किजो मीं तुशशो पेइंसी नई नेवरो? कुन मीं एन कियू, कि अवं तुसन सेइं प्यार न केरि? परमेशर ज्ञानते कि अवं तुसन सेइं प्यार केरताई।

12 पन जैन अवं केरताई, तैने अग्रोवं भी केरतो रेइलो; अवं तुसन करां महत न नेइलो जैस सेइं अवं तैन जैना घमण्ड केरनेरो मौको चातन, कि जेरू कम अस परमेशेरे लेइ केरतम तेरहु कम तैना भी केरतन।

13 किजोकि एरे लोक झूठे प्रेरित आन, ते दगो केरतां कम केरनेबालन, ते मसीहेरे प्रेरितां केरू जेरू रूप बनाने बालेन ।

14 ते ई हेरान राने बाली गल नई किजोकि शैतान एप्पु भी महिमा बाले स्वर्गदूतां केरू रूप बनाते ।

15 ते अगर तैसेरे सेवक भी धर्मी सेवकां केरू जेरू रूप बनान, त कोई बड़ी गल नई पन तैन केरो अन्त तैन केरे कम्मां केरे मुताबिक भोनोए ।

\*\*\*\*\*

16 अवं फिरी ज़ोताई, कोई मीं बेवकूफ न समझ; नई बेवकूफ समझतां मीं कबूल केरे, ताके अवं थोडू जेरू घमण्ड केरि ।

17 जैन किछ अवं ज़ोताई जेरू यीशु चाते तेरहु नई बल्के बेवकूफी सेइं ज़ोताई ।

18 जैखन कि बड़े लोक इस दुनियारे लोकां केरू जेरू घमण्ड केरतन, त अवं भी घमण्ड केरेलो ।

19 तुस त समझदार भोइतां आनन्दे सेइं बेकूफां केरि झेलतथ ।

20 किजोकि जैखन तुसन कोई गुलाम बनातन, या जैन किछ तुसन कां आए नेते, या तुसन सेइं धोखो केरते, या सोचतन कि तैना तुसन करां बड्डेन, या तुश्रे तुतरे पुड़ थपुड़ बातन, त तुस झल्लतथ ।

21 एल्हेरेलेइ कुन तुस सोचतथ कि मीं छिथोरू लोइते किजोकि मीं तैन नई कियोरू; पन जै कोई कोन्वी गल्लीना मां घमण्ड केरते, अवं बेवकूफी सेइं ज़ोताई, फिरी भी घमण्ड केरताई ।

22 कुन तैन्ना इब्रानी आन? अवं भी आई। कुन तैन्ना इस्राएली आन? अवं भी आई, कुन तैना अब्राहमेरे खानदाने करां आन? अवं भी आई?

23 कुन तैना मसीहेरे सेवक आन? (अवं पागलेरो ज़ेरो ज़ोताई) अवं तैन करां बेदुतां आई! मीं तैन करां जादे मेहनत कियोरीए; तैन करां जादे बार अवं कैद कियोरोई, बड़े बार मीं मार बजोरीए, हमेशा मेरी जान मुश्किली मां पवरीए ।

24 मीं यहूदन लीडरेई करां पंच बार 39 कोडे खाए ।

25 टलेइ बार मीं बंतेई खेइ; एककी बार मीं पुड़ घोडेव कियो जेव; टलेइ बार जिहाजे मां जैन पुड़ अवं चढोरु थियो, टलुटी जेआं, अक रात ते दिहाड़ी मीं समुन्दरे मां कट्टी ।

26 अवं बार-बार सफरे मां; दरियारे खतरन मां; डैकू केरे खतरन मां; अपने जातरे खतरन मां; गैर कौमां केरे खतरन मां; नगरां केरे खतरन मां; जंगल्लेरे खतरन मां; झूठे विश्वासी लोकां केरे खतरन मां;

27 बड़े मेहनती मां ते तकलीफी मां; बार-बार बींझे बिशने मां; बार-बार बरत रखने मां; दलुख टलिशी मां; हिवतडे मां; ते नगगे रानेरी हालती मां राहोरोइं ।

28 ते होरि इना गल्लां केरे अलावा जैन गल्लां केरे बारे मां अवं न ज़ोई सेभी कलीसिया केरे फिक्र मीं रोज़ दुवातीए ।

29 जैखन कोई कमजोर भोते अवं भी कमजोर भोताई । जैखन कोई पापेरे पासे गाते त मेरो दिल बड्डो दुखी भोते?

30 अगर घमण्ड केरनू ज़रूरीए, त अवं एपनी कमजोरारी गल्लन पुड़ केरेलो ।

31 परमेशर इश्रे प्रभु यीशुएरो बाजी जै सदा धने, तै ज्ञानते, कि अवं झूठ नई लोरो ज़ोने ।

32 जैखन अवं दमिश्क नगरे मां थियो त अरितास राजेरे हाकिमे अवं कैद केरनेरे मकसदे सेइं सारे नगरे मां पेरहो रखोरु थियो ।

33 ते अवं टोकरे मां शहरपनाहेरे दैरारे बत्तां दुवारी उन्ढो औसालोरो थियो, ते अवं हाकिमेरे हथ्ये करां बचो ।

## 12

\*\*\*\*\*

1 अगर घमण्ड केरनू मेरे लेइ ठीक नई, फिरी भी केरनू पते; अवं प्रभुएरे दित्तारे दर्शन ते प्रकाशेरे बारे मां ज़ोइएलो ।

2 अवं मसीह मां जेवधे साल पेइले टलेइयोवं स्वर्गे\* पुइ नीयो जेव, चाए अवं जिसमे मां थियो या जिसमे मरां बेइर, अवं न जैनी सिर्फ परमेशर जानते।

3-4 अवं फिरी जोताई, कि ई मैन्हु स्वर्गे तगर अकदम नेव जेव (फिरी, अवं न जैनी कि इन जिसमे मां भोवं या अक दर्शन थियूं, सिर्फ परमेशर जानते), तैडी तैनी तैना गल्लां शुनी जैना लफसन मां न जोइयोन, एरी गल्लां जैना मैन्हु ओठन सेइं न जोई बटन।

5 एरे मैन्हु पुइ त अवं घमण्ड करेलो, पन अपने कमजोरी केरे अलावा, अपने बारे मां घमण्ड न केरि।

6 किजोकि अगर अवं घमण्ड केरनू चैई भी त बेवकूफ न बेई, किजोकि अवं सन्न जोइलो; पन अपने आपे एस किसमेरे घमण्डे करां रोकताई, एरू न भोए, कि जेन्चरे कोई मीं लाते, या मीं शुन्ते, मीं तैस करां भी बेद्धतां न समझे।

7 पन जैना अद्बूद गल्लां परमेशरे मीं हेरेवरिन तैन केरे वजाई सेइं अवं बडो जादे घमण्डी न भोइ गेइ। एल्हेरेलेइ तैनी मीं अक बडो मुशकिल मसलो तुसन सेइं बतावं केरनेरे लेइ दित्तोरोए (मेरी जानी मां अक कंटो)। शैतानेरे एक्की दूते मीं मड्डनेरो इरादो कियोरोए ते अवं घमण्ड केरने करां रोकरोई।

8 इसरे बारे मां मीं प्रभु कां टलाई बार बिनती की, कि मीं करां दूर भोइ गाए।

9 ते तैने मीं सेइं जोवं, “मेरो अनुग्रह तेरे लेइ सुधोए; किजोकि मेरी शक्ति कमजोरी मां सिद्ध भोतीए।” एल्हेरेलेइ अवं अपनी कमजोरी पुइ घमण्ड करेलो, कि मसीहेरी सामर्थ मीं पुइ एंडती राए।

10 इस वजाई सेइं अवं मसीहेरे लेइ कमजोरन मां, ते बेइजतन मां, गरीबी मां, सताए गाने मां, ते मुशकलन मां खुश आई; किजोकि जैखन अवं कमजोर भोताई, तैखन अवं मसीहेरी शक्ति सेइं जोरे बालो भोताई।

### \*\*\*\*\*

11 अवं बेवकूफ त बनो, पन अवं एरू केरनेरे लेइ तुसेईं अवं मजबूर कियो, तुसेईं त मेरी बडयाई कियोरी लोइती थी, किजोकि अगर अवं किछ भी नई, फिरी भी होरे प्रेरित जैना महान आन अवं तैन केरो जेरो रोडो आई।

12 मीं रोडे प्रेरितेरी पिशान भी तुशशे दरमयान हर किसमेरे सवर साथी ते निशान ते बडां-बडां कम्मां, ते सामर्थेरां कम्मां हिरां।

13 अक गल थी जै मीं तुसन सेइं न की, जै मीं होरि कलीसियान सेइं की, यानी अवं पेइसां केरे बारे मां तुशशे लेइ बोझ न बनो। कुन इन तुसन घटिया बनाते, एरू केरने सेइं मीं तुशशे खलाफ गलत कियोरू ई तुशशी सोच गलते।

14 हेरा, अवं टलेइयोवं बार एजनेरे लेइ तियाराई, ते अवं तुसन करां कोई पेइसां केरि मांग न रेखेलो। किजोकि अवं तुशशी जेइदाद नई, बल्के तुसन चाताई, किजोकि बच्चेइं अम्मा बाजी केरे लेइ धन अकोट्टू न लोडे कियेरू, पन अम्मा बाजेई बच्चां केरे लेइ कियेरू लोडे।

15 अवं तुशशी लेइ बडी खुशी सेइं खर्च करेलो, बल्के अवं अपनू सब किछ तुसन देइलो, अवं तुसन सेइं बडो प्यार केरताई पन एरू लगते कि तुस मीं सेइं घट प्यार केरतथ।

16 तुसन मरां किछ मन्तन कि मीं तुसन पुइ भार नई छुडोरो, पन किछ होरे सोचतन कि अवं चलाक आईं ते मीं तुसन पूरे तरीके सेइं धोखो दित्तोरोए, जैन कि झूट आए।

17 मीं अपने लेइ तुसन करां पेइसे नेनेरे लेइ तीतुस या होरो कोई इस्तेमाल नई कियोरो।

18 मीं तीतुस समझेइतां तैस साथी तै दला भेजो, त कुन तीतुसे धोखे सेइं किछ नेव? कुन अस एक्की मकसदे सेइं न चले? कुन इशशां कम्मां अक्कां जेरां नई।

\* 12:2 12:2 टलेइयोवं स्वर्गे: मतलब सैभा वा स्वर्गे मां जैडी परमेशर रहते

19 हे ट्लाराव, तुस हेजू तगर इन समझतथ कि अस तुशुशे सामने अपनो बचाव लोरेम करने, अस त परमेशेरे हाज़र सेमझतां मसीह मां ज़ोतम, ते सब गल्लां एल्हेरेलेइ ज़ोतम कि तुसन विश्वासे मां मज़बूत करने लोरेम।

20 किजोकि मीं डरे, कि एरू न भोए, कि अवं एज्जी ते ज़ेन्वरे अवं चाताई, तेन्वरे तुस न भोथ; ते मीं भी ज़ेन्वरे तुस मीं चातथ तेरे लाथ, कि तुसन मां लडैई, गर्म सुभाव, सरक, खलाफत, जलन, चोगली, अभिमान ते फसाद भोन।

21 कि एरू न भोए कि ज़ैखन अवं तुसन कां दुबारां एज्जी, त मेरो परमेशर मीं छिथाए। ते मीं दुःख केरनो पे, किजोकि तुसन मरां बडेई अपने पुराने पाप नई शारोरे। ते तैस गंदे कम्मे, ते बदमाशी, ते लुचपने सेई, ज़े तेनेई कियो, मन न फिराव।

## 13

???????

1-2 पवित्रशास्त्रे मां इन लिखोरूए कि, “हर अक गल दूई या ट्लेइ गवाहां केरे गवाही केरे ज़िरिये सेई पक्की की गाली।” मीं तैन लोकन हदैइयत दित्तोरीए ज़ैना पाप केरते थिये, ज़ैखन अवं दुइयोवं बार ओरो थियो। हुनी अवं फिरी तैन ते होरि सेब्मी लोकन हदैइयत देताई कि ठीक तेन्वरे ज़ेन्वरे मीं पेइलू भी कियोरूए इस चिट्ठी मां खबरदार केरताई। हुनी अवं ट्लेइयोवं बार एजनेबालो आई, ते अगर तैना हेजू भी पाप केरनो बंद नई कियोरो, तैन मरां कोई भी सज़ाई करां न बचेलो।

3 अवं ज़ोताई कि तुस इना गल्लां केरू सबूत चातथ, कि मसीह मेरे ज़िरिये गल्लां केरते, पन ज़ैखन मसीह तुसन सेई बतावं केरते त तै कमज़ोर नई; पन तुसन मां सामर्थ आए।

4 तै कमज़ोरारे वजाई सेई करूसे पुड़ चाढो त जेव, फिरी भी परमेशेरे शक्ति सेई ज़ीतोए। अस भी कमज़ोरम, ठीक तेन्वरां, ज़ेन्वरे मसीह थियो; पन ज़ैखन अस तुसन सेई बतावं केरमेले अस भी तैस सेई साथी ज़ीते भोमेले ते असन सेई साथी परमेशेरी शक्ति भोली।

5 अपनो आप परखा, कि तुशुशो विश्वास सच्चो आए कि नई; एप्पू परखा, कुन तुसन अपने बारे मां ई पतो नई, कि यीशु मसीह तुसन मां आए, नई त तुस निकम्मे भोए।

6 पन मेरी उमीदे, कि तुस बुझले, कि अस निकम्मे नई निसोरे।

7 चाए अगर तुसन इन लेइहोते कि अस सच्चे प्रेरित नई, अस तुशुशे लेइ परमेशेरे कां प्रार्थना करने लोरेम, कि गलती केरनेरे बगैर सिर्फ रोडू केरा।

8 किजोकि अस सच्चेरे खलाफ किछ न केरि बटम, पन सच्चेरे लेइ केरि बटतम।

9 ज़ैखन अस कमज़ोरम, ते तुस ताकतवरथ, अस खुशी रातम, ते ई प्रार्थना भी केरतम, कि तुस विश्वासे मां सिद्ध भोते राथ।

10 एन्हेरेलेइ अवं तुशुशे पिठी पतर इना गल्लां लिखताई, कि मौजूद भोइतां मीं तैस अधिकारेरे मुताबिक ज़ै प्रभुए विगाइनेरे लेइ नई पन बनानेरी लेइ मीं दित्तोरोए, सेखती सेई किछ न केरनू पे।

???????

11 हे ढ्लाव ते बेइनव, खुश राथ, सिद्ध बनते राथ; एक्की होरि हिम्मत देथ; ते मेल मिलापे सेई राथ, ते प्यार केरनेबालो ते शान्ति देनेबालो परमेशर तुसन साथी भोलो।

12 मसीहेरे प्यारे सेई एक्की होरि जो नमस्कार केरा।

13 सब पवित्र लोक तुसन जो नमस्कार ज़ोतन।

14 प्रभु यीशु मसीहेरो अनुग्रह ते परमेशेरो प्यार ते पवित्र आत्माारी सन्नाती तुसन सेभन साथी भोए।

## गलातियों

??????

1 अवं पीतुस ई चिट्ठी तुसन लिखताई, अवं अक प्रेरिताई, अवं न मैन्हु केरे तरफां, ते न केन्वी मैनेरे जिरिये प्रेरित भोनेरे लेइ चुनोरोई, बल्के यीशु मसीह ते बाजी परमेशेरे जिरिये, जैनी यीशु मुडदन मरां जीतो कियो ।

2 ते सारे दूलां केरे तरफां, जैना मीं सेइं साधिन; गलातिया इलाकेरे कलीसियां केरे लेइ ई चिट्ठी लिखताई ।

3 बाजी परमेश, ते इश्शे प्रभु यीशु मसीहेरे तरफां तुसन अनुग्रह ते शान्ति मैलती राए ।

4 इश्शे परमेश ते बाजी केरि मेर्जी सेइं यीशु मसीहे अपने आप इश्शे पापां केरे लेइ बलिदान कियो, ताके असन इस मौजूद बुरे दुनियाई करां छुटकारो दे ।

5 तैसेरी महिमा हमेशा भोती राए । आमीन ।

??? ???? ??????? ???

6 अवं हैरान भोताई, कि परमेशेरे तुस मसीहेरे अनुग्रहे मां जीनेरे लेइ कुजाए; ते तुस तैस करां एत्तेर जल्दी फिरतां होरि किसमेरी खुशखबरी मन्ने लाए ।

7 पन सिर्फ एक्के सच्ची खुशखबरी आए, गल ईए, कि किछ लोक एरेन, जैना तुसन धोखो देतन, ते मसीहेरी खुशखबरी बगाडने चातन ।

8 पन अगर असन मरां कोई या कोई स्वर्गदूत भी तुसन कोई तैस खुशखबरे अलावा जै असेई तुसन शुनोरी, शुनाए त लानती भोए ।

9 जेन्चरे असेई पेइलू ज़ोवरूए, तेन्चरे अवं हुना फिरि ज़ोताई, कि तैस खुशखबरे अलावा जै तुसेई कबूल कियोरोए, अगर कोई होरो खुशखबरी शुनाए, त लानती भोए ।

10 हुनी कुन अवं मैन्हु केरि मन्जूरी हासिल केरनेरी कोशिश केरताई या परमेशेरी? कुन अवं लोकन खुश केरनेरी कोशिश केरने लोरोई? बिलकुल भी नई, अगर हेजू तगर लोकन खुश केरतो राताई, त मसीहेरो दास न भोथो ।

????? ?????????? ????????? ???

11 हे दूलाव ते बेइनव, अवं तुसन ज़ोताई, कि जै खुशखबरी मीं तुसन शुनाई, ई मैन्हु केरि बनोरी नई ।

12 किजोकि तै मीं न केन्वी मैन्हु करां मैलोरी, ते न मीं कोन्वी उस्तादे करां शिखोरी, बल्के यीशु मसीहे मीं पुइ बादी की ।

13 तुसेई शुनोरूए यहूदी धर्मे मां पेइलो जै मेरो चालचलन थियो तै केरो थियो, कि अवं परमेशेरी कलीसियाई बड़ी सतातो थियो, ते नाश केरनेरी कोशिश केरतो थियो ।

14 ते अवं अपने धर्मे मां तैस वक्ते बड़े मेरे उमरारे यहूदन करां अग्रोवं थियो । ते अपने बुजुगां केरे रीतन मां जोशे मां थियो ।

15 पन परमेशेरी जैखन इच्छा भोइ, तैनी अवं मेरे ज़रमने करां पेइलो चुनो ते अपने अनुग्रह सेइं कुजाव,

16 कि मीं मां अपने मट्टू बांदू केरे कि अवं गैर कौमन मां तैसेरी खुशखबरी शुनेई; ते मीं समझनेरे लेइ होरि कोन्वी करां सलाह नी ।

17 ते न यरूशलेम नगरे मां तैन कां जेव जैना मीं करां पेइले प्रेरितन, पन अरब मुल्खे जो चलो जेव, ते फिरि किछ चिरेरां बाद तैटठां दमिश्क नगरे जो वापस अव ।

18 फिरि टूलाई सालना पत्ती अवं कैफा (यानी पतरस प्रेरिते) सेइं मिलने यरूशलेम नगरे जो जेव, ते 15 दिहाडे तैड़ी राव ।

19 पन प्रेरितन मरां प्रभुएरे दला याकूबेरे अलावा होरि कोन्ची सेइं न मिलो ।

20 जैना गल्लां अवं तुसन लिखताई, हेरा परमेशेरे हाज़र सेमझतां ज़ोताई, कि तैना झूठी नई ।

21 यरूशलेम नगर शारनेरां पत्ती, अवं सीरिया ते किलिकियारे मुलखे मां जेव ।

22 पन यहूदिया इलाकेरे कलीसियां केरे लोक जैना मसीह मां थिये, जैना मीं सेइं कधे न थिये मिलोरे ।

23 पन इन्ने शुन्ते रहते थिये, कि जै असन पेइलो सतातो थियो, तैए तैस्से विश्वासेरी खुशखबरी शुनाते, जैस पेइलो नाश केरतो थियो ।

24 ते जैन परमेशेरे मेरे जिन्दगी मां कियू तैह्हेरेलेइ तैना परमेशेरी बडीयाई केरते रहते थिये ।

## 2

~~~~~

1 च़ेवधे सालना पत्ती अवं बरनबासे सेइं साथी यरूशलेम नगरे जो जेव, ते तीतुस भी मीं एण्णु सेइं साथी नीयो ।

2 अवं एल्हेरेलेइ तैड़ी जेव किजोकि परमेशेरे मीं गानेरे लेइ ज़ोरू थियू, ज़ैखन अवं तैड़ी थियो, अवं अकैल्ले मां कलीसियारे खास बुज़ुर्गन सेइं मिलो ते तैन खुशखबरी समझाई, जै अवं गैर कौमन मां प्रचार केरतो ओरो थियो, ताके एरू न भोए, कि जैन किछ अवं केरतो ओरोई ते जैन केरने लोरोई बेफैइद् भोए ।

3 मेरो साथी तीतुस, जै यूनानीए, ज़ेसेरो खतनो कधी न भोरो । पन जैना यरूशलेम नगर कलीसियारे खास बुज़ुर्ग थिये तेनेईं ते खतनो करानेरे लेइ मजबूर न कियो, बल्के तेनेईं ते कबूल कियो ।

4 ते ई गल तैन केरे लेइ परेशानी बनी, ई इन तैन झूठे द्लां* केरे वजाई सेइं भोवं, जैना छेपतां इश्शे टोली मां ओरे थी, कि तैस ऐज़ेदरी जै मसीह यीशु मां असन मैलोरीए, भेद नेइतां फिरी असन यहूदी केरे कानूनेरे गुलाम बनान ।

5 पन असेईं एक्की पलेरे भी तैन केरि शुने करा इन्कार कियो, ताके जै सन्देश असेईं तुश्शे लेइ आनो ते सच्च़ी खुशखबरी बनोरी राए ।

6 तैन यरूशलेम नगरेरे कलीसियारे खास लीडरेई मेरी शिक्षाई मां किछ न जोडू, इस सेइं मीं किछ फर्क न पे, कि तैना केरहे बुज़ुर्ग आन, किजोकि परमेशेर बेइरोवं रूप हेरतां फैसलो न केरे ।

7 पन इसेरे उलट ज़ैखन तैन बुज़ुर्गेई हेरू, कि जेन्च़ेरे परमेशेरे यहूदी लोकां केरे लेइ खुशखबरारू कम पतरसे साँफू, तेन्च़ेरे परमेशेरे गैर कौमां केरे लोकन खुशखबरी शुनानेरू कम मीं साँफू ।

8 ज़ेन परमेशेरे पतरस यहूदी केरो प्रेरित भोनेरे लेइ चुनो, तैन्ने अवं भी गैर कौमां केरो प्रेरित भोनेरे लेइ चुनो ।

9 ज़ैना मैन्हू कलीसियारे खम्मवे समझे गाते थिये (यानी खास लीडर) मतलब याकूब, कैफा (यानी पतरस) ते यहून्ना तैनेईं अनुग्रहेरू तैन वरदान पिशानू ज़ैन मीं मैलोरू थियू । तैनेईं अवं ते बरनबास साथी सेमझतां ते असन सेइं हथ मिलेइतां राजी भोए । कि अस गैर कौमन मां खुशखबरी प्रचार केरम, ते तैना यहूदीन मां ।

10 तैनेईं असन कां बिनती की, कि अस यरूशलेमेरे गरीब विश्वासी लोकां केरि मद्दत केरम, ज़ैन केरनेरी अवं बड़ी इच्छा केरतो थियो ।

~~~~~

11 पन ज़ैखन कैफा (पतरस) अन्ताकिया नगरे मां अवं, त मीं सेब्भी विश्वासी लोकां केरे सामने तैसेरी खलाफ की ते झाड़ दित्ती, किजोकि ज़ैन तैनी कियोरू थियू तैन गलत थियू ।

\* 2:4 2:4 झूठे द्लां: इना तैना यहूदी विश्वासी लोक थिये, जैना ज़ोते थिये मुक्ति हासिल केरनेरे लेइ मुसेरो कानून भी मन्नेरू लोडे, किजोकि झूठे द्ला तैना विश्वास न थिये केरते, कि ज़ैन यीशुए कूरसे पुड कियू, सिर्फ तैस्से सेइं असन मुक्ति मिलतीए ।

12 एल्हरेलेइ कि याक्वेरे पासेरां किछु मैन्हु केरे एजनेरे पेइले तै गैर कौमां केरे लोकन साथी खातो थियो, पन ज़ैखन तैना आए, त खतनो कियोरे लोकां केरे डरे सेइं तैन करां हटो ते अलग भोने लव।

13 ते तैस साथी बाकी यहूदी विश्वासी लोकेई भी पाखंड कियूं, इड़ी तगर कि बरनबास भी तैन केरे संगती मां शामिल भोव।

14 पन ज़ैखन मीं तैन केरो बताव हेरू, कि तैना खुशखबरे सच्चेरे खलाफ चलतन, त मीं सेभी केरे सामने कैफा (पतरस) सेइं ज़ोवं, “कि ज़ैखन तू यहूदी भोइतां गैर कौमन केरि ज़ेरि चाल चलतस, न कि यहूदी केरि ज़ेरि, त तू गैर कौमन यहूदी केरे रसमन पुड़ चलनेरे लेइ किजो ज़ोतस?”

### ???????? ???? ?????????

15 अस ज़ैना जर्मनेरे यहूदिम, ते पैपी गैर कौमां केरे ज़ेरे नईं।

16 फिरी भी इन सेमझतां कि मैन्हु मूसेरे कानूनेरे कम्मन सेइं नईं, पन सिर्फ यीशु मसीह पुड़ विश्वास केरने सेइं धर्मी भोते, असेईं एप्पू भी मसीह यीशु पुड़ विश्वास कियो, कि अस मूसेरे कानूनेरे कम्मन सेइं नईं पन यीशु मसीह पुड़ विश्वास केरने सेइं धर्मी भोए, किजोकि मूसेरे कानूनेरे कम्मन सेइं कोई धर्मी न भोलो।

17 किछु यहूदी सोचतन कि असेईं पाप कियो, किजोकि असेईं धर्मी भोनेरे लेइ कानून मन्नेरे बदले सिर्फ मसीह पुड़ विश्वास कियोरो, त कुन मसीहे अस पापी बनाए, नईं, कधी नईं।

18 किजोकि ज़ैन किछु मीं बछोड़, अगर तैस फिरी बनेइं, त अपनो आप पापी बनाताईं।

19 अवं त कानूने सेइं कानूनेरे लेइ मेरि जेव, कि परमेशेरे लेइ ज़ीईं।

20 अवं मसीह सेइं साथी क़रूसे पुड़ चढोरोईं, ते हुनी जीतो न राव, पन मसीह मीं मां जीतोए, ते अवं जिसमे मां हुनी ज़ीतोईं, त सिर्फ तैस विश्वासे सेइं ज़ीतोईं, ज़ै परमेशेरे मट्ठे पुड़े, ज़ैने मीं सेइं प्यार कियो, ते मेरे लेइ अपनि जान दिती।

21 अवं इस गल्लरो इन्कार न केरि कि परमेशर अपने अनुग्रहे सेइं बचाते, किजोकि अगर कानून मन्ने सेइं लोक धर्मी भोथे, त मसीहे मरनेरी कोई ज़रूरत न थी।

## 3

### ????????? ???? ?????????

1 हे बेसमझ गलातियोरे लोकव, केने तुस टरे लाए? तुश्शे त मना तुश्शे सामने यीशु मसीह क़रूसे पुड़ चढो!

2 अवं तुसन सिर्फ ईं सवाल पुछ्नो चाताईं, कि तुसेईं पवित्र आत्मा कुन कानून मन्ने सेइं हासिल कियो? विलकुल भी नईं, तुसेईं खुशखबरी शुनी ते तैस पुड़ विश्वास कियूं ते पवित्र आत्मा हासिल की।

3 कुन तुस एरे बेसमझथ, कि पवित्र आत्मा रे रीति पुड़ शुरू केरतथ ते जिसमे रे रीति पुड़ खतम केरेले?

4 कुन तुसेईं सब दुःख बेफैइदो झैल्ले? अवं उमीद केरताईं बेफैइदो नईं।

5 एल्हरेलेइ ज़ै तुसन पवित्र आत्मारू दान बडू जादे देते ते चमत्कार केरते, कुन तै कानून मन्नेरे वजाईं सेइं एन केरते या तुसेईं खुशखबरी शुनी ते तैस पुड़ विश्वास कियो?

6 हुनी अब्राहमेरे बारे मां सोचा “अब्राहमे परमेशेरे पुड़ विश्वास कियो ते तै तैसेरेलेइ धार्मिकता गनो जेव।”

7 एल्हरेलेइ तुसन एन ज़ान्नेरी ज़रूरते कि ज़ैना अब्राहमेरो ज़ेरो परमेशेरे पुड़ विश्वास केरनेबालेन तेन्ना हकीकति मां तैसेरी बच्चेन।

8 पवित्रशास्त्रे मां बडू पेइलू इन लिखोरूए, कि परमेशर गैर कौमन विश्वासे सेइं धर्मी बनालो, पेइले अब्राहमे ईं खुशखबरी शुनाईं, “कि तेरे ज़िरिये सेभी कौमन बरकत मैलेली।”

9 ते ज़ैना अब्राहमेरो ज़ेरो परमेशेरे पुड़ विश्वास केरतन, परमेशर तैन सेबन बरकत देते ज़ैना मसीह पुड़ विश्वास केरतन जेन्नेरे तैनी अब्राहमे बरकत दित्ती।

10 एल्हेरेलेइ ज़ैना लोक सोचतन कि तैना मूसेरो कानून मेन्तां धर्मी बनाए गाले, तैन पुड़ परमेशेरेरी लानते, किजोकि मूसेरे कानूने मां लिखोरूए, “कि ज़ै कोई कानूने मां लिखोरे सब कानूनेरे मुताबिक न चले, तैस पुड़ परमेशेरेरी लानते।”

11 ई गल साफे, कि मूसेरे कानून सेइं परमेशेरे कां कोई मैन्हु धर्मी न भोए, “किजोकि ज़ै मैन्हु परमेशेरे पुड़ विश्वास केरते, परमेशर तैस धर्मी ठहराते ते तैस हमेशारी जिन्दगी मैलतीए।”

12 पन मूसेरे कानूनेरो विश्वासे सेइं कोई वासतो नई; पन “ज़ै तैन मन्नेलो, तै तैन मन्ने सेइं ज़ींतो रालो।”

13 मसीहे ज़ै इशे लेइ लानती बनो, तैने अस कीमत देइतां कानूनेरे लानती करां छुटाए किजोकि पवित्रशास्त्रे मां लिखोरूए, “ज़ै कोई करूसे पुड़ टंगो गालो तै लानतीए।”

14 मसीहे एन एल्हेरेलेइ कियू, कि गैर कौमां तैसेरे ज़िरिये तैना सेरी बरकतां हासिल केरन, ज़ैन केरो वादो परमेशेरे अब्राहम सेइं कियोरो थियो, ते मसीह पुड़ विश्वास केरने सेइं अस पवित्र आत्मा हासिल केरम, जेसेरो वादो तैने कियोरोए।

### ????? ?? ???? ?

15 हे दूलाव ते बेइनव, अवं आम जिन्दगी मिसाल देने लोरोई, ज़ैखन दूई मैन्हु केरो करार ज़ै पक्को भोते, त न कोई तैस टालते ते न तैस मां किछ बद्धाते।

16 ते सारे वादे परमेशेरे अब्राहमे ते तैसेरे खानदाने दित्ते; पवित्रशास्त्र इन न ज़ोए, “कि वंशां,” कि बड़ां केरे बारे मां ज़ोव, पन एककी मैनेरे बारे मां ज़ोव “कि तेरू वंश इने, ते तै मसीहे।”

17 मेरे ज़ोनेरो मतलब ई आए, परमेशेरे अब्राहमे सेइं करार केरनेरां बाद 430 सालन पत्ती मूसे कानून दित्तो (ताके तैस करारे पक्को केरे), पन अस न ज़ोई बटन कि परमेशेरो करार ट्लुटो, तैए करार पक्कोए, तैए तैस पूरो केरेलो।

18 किजोकि परमेशर असन अपनि बरकत एल्हेरेलेइ न दे कि अस मूसेरे कानूनेरे मुताबिक चलतम, पन तै एल्हेरेलेइ देते कि तैनी वादो कियोरोए, परमेशेरे अपने अनुग्रहे सेइं अब्राहमे बरकत दित्ती, किजोकि तैनी पेइलो वादो कियोरो थियो।

19 तैखन, फिरी कानूनेरो कुन मकसद थियो? तैन त पापां केरे वजाई सेइं वादे मां दित्तु, ताके तैसेरे वंश मसीहेरे एजने तगर राए, ज़ैस सेइं वादो कियोरो थियो, परमेशेरे स्वर्गदूतां केरे ज़िरिये मूसे कानून दित्तो, ज़ै परमेशर ते लोकां केरि बिचवाईं केरनेबालो थियो।

20 परमेशेरे एप्पू अब्राहमे सेइं वादो कियो। एल्हेरेलेइ हुनी बिचवाईं केरनेबालेरी कोई ज़रूरत नई।

### ????? ?????? ???? ?

21 कुन कानून परमेशेरेरे वादां केरे खलाफे? नई, कधी नई! किजोकि अगर एरो कानून दित्तो गाथो ज़ै हमेशारी जिन्दगी देइ बटेथो, त सच्चे धार्मिकता कानून मन्ने सेइं भोथी।

22 पन पवित्रशास्त्रे ज़ोते दुनियारे सब लोक पापेरे अधीन आन, ताके तै वादो जेसेरी बुनीयाद यीशु मसीह पुड़ विश्वास केरनोए, तैस पुड़ विश्वास केरनेबालां केरे लेइ पूरो भोए।

23 पन इस करां पेइले कि लोक मसीह पुड़ विश्वास केरन, मसीहेरे एजने करां पेइले अस यहूदी कैदे मां थियो कानून इशरी रखवाली केरतो थियो। ते तैस विश्वासे एजने तगर ज़ै बांदो भोनेबालो थियो, अस तैसेरे बन्धने मां रहम।

24 एल्हेरेलेइ कानून मसीह तगर पुज़ानेरे लेइ असन बत हिरानेबालो ते स्मभालने बालो भोव, कि अस यीशु मसीह पुड़ विश्वासे केरने सेइं परमेशेरेरे सामने धर्मी भोम।

25 पन ज़ैखन मसीह अव ते असेई विश्वास कियू, त असन ज़रूरत न पेई, कि कानून बत हिराए ते मद्दत केरे।



26 किजोकि तुस सब विश्वास करने सेइं जै मसीह यीशु पुड़े, परमेशेरे बच्चेथ।

27 ते तुसन मरां जे तरेइं मसीह मां अक भोनेरे लेइ बपतिस्मो नीयो, तुसेईं मसीहेरी नब्बीं जिन्दगी तेन्चरे लाई जेन्चरे लिगाड़ां लातन।

28 हुनी मसीह मां कोई फर्क नई, चाए कोई यहूदीए या गैर यहूदीए, गुलामे या आज्ञाद। कोई फर्क नई मडदे या कुआन्शे, अस यीशु मसीह मां सब बराबर आम।

29 किजोकि तुस मसीह सेइं साथी अक आथ, त अब्राहमेरे बच्चेथ, ते परमेशेरे वादेरे मुताबिक बरकतां केरे वारस भी आथ।

## 4

1 अवं मिसाल देइतां ज़ोताई, कि वारस ज़ांतगर बच्चोए, अगर तै सेम्बी चीज़ां केरो मालिके, फिरी भी तैस त कने गुलामे मां कोई फर्क नई।

2 पन बाजी केरे ठहरावरे वक्ते तगर सुमालने वालां ते भैन्डैरी केरे हेरगेशी मां रहते।

3 तेन्चरे अस भी जैखन बच्चां केरे ज़ेरे थिये, त दुनियारे रीति रूवाज़ां ते कानूनेरे गुलाम थिये।

4 पन जैखन ठीक वक्त अव, त परमेशेरे अपनू मट्टू दुनिया मां भेजू, जैस एक्की कुआन्शां ज़र्म दित्तू, तैन यहूदन मां ज़र्मू ते तैनी कानून मन्नो।

5 ताके तैन छुटाए ज़ैना मूसेरे कानूनेरे अधीन्न थिये, ते असन तैसेरे बच्चे भोनेरो अधिकार मैल्ले।

6 ते तुस ज़ैना बच्चेथ, एल्हेरेलेइ परमेशेरे मट्टेरी आत्मा इश्शे दिले मां भेजोरीए, जै आत्मा, "हे बैपू, हे बाजी," ज़ोती।

7 एल्हेरेलेइ हुनी तू गुलाम नई, पन परमेशेरेरो बच्चोस, ते जैखन परमेशेरेरो बच्चोस, त तीं तैन सब मैलेलू ज़ेसेरो वादो परमेशेरे अपने बच्चन देनेरो वादो कियोरोए।

~~~~~

8 जैखन तुस परमेशर न थिये ज़ानते, त तुसन तैन केरे गुलाम थिये, ज़ैना हकीकति मां ईश्वर अथी नई।

9 पन हुनी तुश्शो रिश्तो परमेशर सेइं आए, ते तुसेईं तै ज़ानो बल्के परमेशेरे अस कबूल किये, ते तैन कमज़ार ते निक्केमी पेइली गल्लां केरे पासे किजो गातथ, कुन तुस तैन केरे दुबारा गुलाम भोने चातथ?

10 मीं शुनेरूए कि तुस गैर कौमां केरे विश्वासी, यहूदी केरे दिहाइन ते महीन्न ते खास वक्ते ते सालां केरे तिहारन मन्तथ, इन सोचतां कि परमेशर खुश भोते।

11 अवं तुश्शू एन केरनेरे वजाई सेइं परेशान आई, कि एरू न भोए, कि जै मेहनत मीं तुश्शे लेइ कियोरीए तै बेफेइदी भोए।

12 हे द्लाव ते बेइनव, अवं तुसन कां बिनती केरताई, तुस अपने आपे यहूदी केरे कानूने करां आज्ञाद केरा, किजोकि मीं अपना आप आज्ञाद कियोरोए जेन्चरे तुस गैर कौमरे लोक पेइले आज्ञाद थिये, तुस पेइले मेरे सामने बड़े रोड़े थी।

13 तुसन याद भोलू, जैखन अवं पेइली बार खुशखबरी शुनाने तुसन कां अव त अवं विमार थियो।

14 ते मेरी जिंसमानी हालत जै तुश्शे आजमैइशरी वजा थी, तुसेईं अवं घटिया न समझो ते तुसेईं दूर न कढो बल्के एन्चरे कबूल कियो जेन्चरे परमेशेरेरो दूत या यीशु मसीह एप्पू।

15 ते तुश्शी तै खुशी मनानी कोरां जेई? अवं सच्चे जोई बटताई, तुस मेरे लेइ सब किछ बलिदान केरनेरे लेइ तियार थिये, इड़ी तगर कि अपनि एछ्छी भी।

16 ते कुन तुसन सेइं सच्च ज़ोनेरे वजाई सेइं अवं तुश्शो बैरी भोरोई।

17 तैना झूठे उस्ताद तुसन दोस्त बनानो त चातन, पन रोड़ी नीती सेइं नई; बल्के तुसन अलग केरने चातन, कि तुस तैन केरे चले बना।

18 जोशे मां भोनू रोडूए, कि रोड़ी गल्लन मां हर वक्त दोस्त बनानेरी कोशिश की गाए, सिर्फ तैस वक्ते नई जैखन अवं तुसन सेइं साथी राताई।

19 हे मेरे बच्चव, ज्ञांतगर तुसन मां मसीहेरू रूप न बने, तांतगर अवं तुशशे लेइ जर्म देने बैली कुआन्शे ज़ेरे तकलीफी मां राताई।

20 अवं त चाताई कि हुनी तुसन कां एडतां मिट्टी ज़बाना गल केरि, किजोकि मेरी समझी मां न एज्जे कि अवं तुसन सेइं कुन केरि।

~~~~~

21 तुस ज़ैना मूसरे कानूनर अधीन भाने चातथ, मीं ज़ोतथ, कुन कानूनेरी गल्लां शुन्नेरे लेइ तियार नई?

22 तैस मां इन लिखोरूए, कि अब्राहमेरां दूई मट्टां थियां; अक गुलाम कुआन्शरू, ते अक ज़ै आज़ाद थी तैसेरू।

23 पन ज़ैन गुलाम कुआन्शरू भोव, तैन आम बच्चां केरू ज़ेरू ज़र्मू, ते ज़ैन आज़ाद कुआन्शरू भोव, तैन परमेशरेरे वादेरे मुताबिक ज़र्मू।

24 इना दूई कुआन्शां परमेशरेरे दूई करारां केरे रूपे मां कम केरतिन। पेइली कुआन्श हाजिरा सीनै पहाड़े हिराती ज़ैडी लोकन कानून मैल्लो, ज़ैन तैन गुलाम बनातू थियूं।

25 हाजिरा मना अरबेरू सीनै पहाड़ेरी ज़ेरि आए, ज़ेसेरी तुलना मौजूद यरूशलेम सेइं केरोतीए, किजोकि तैन अज़ अपने बच्चन यानी अपने लोकन समेत गुलैमी मांए।

26 पन बेयूं यरूशलेम अब्राहमेरे कुआन्श सारारू ज़ेरूए, ते तैसेरे बच्चे गुलाम नई। इन यरूशलेम इशशे लेइ इशशे अम्मारू ज़ेरू आए ज़ैसां विश्वास कियो।

27 किजोकि पवित्रशास्त्र ज़ोते,

“हे बाँझ, तीं ज़ैसां कधे बच्चे नई ज़ावरे, खुश भो,  
तीं ज़ैस बच्चो ज़ानेरी तकलीफ नई भोरी; आवाज़ उच्ची केर ते जयजयकार केर,  
किजोकि शैरोरारी औलाद सुहागनी करां भी जादे।”

28 हे दूलाव ते बेइनव, तुस अब्राहमेरे मट्टे इसहाकेरे ज़ेरे आथ, ज़ैन परमेशरेरे वादेरे मुताबिक ज़र्मू, अस भी परमेशरेरे वादेरे मुताबिक तैसेरे बच्चे बने।

29 ते ज़ेन्चरे तैस वक्ते ज़ै बच्चो आम बच्चां केरो ज़ेरो ज़र्मोरो थियो, तैस सतातो थियो ज़ै परमेशरेरे आत्मार मुताबिक ज़र्मोरो थियो, तेन्चरे अज़ भी अस तैन करां सताव झैल्लतम ज़ैना कानून मेन्तां परमेशरेरे सामने धर्मी भोनु चातन।

30 पन पवित्रशास्त्र कुन ज़ोते? “गुलाम कुआन्शी ते तैसेरे मट्टे कढ, किजोकि गुलाम कुआन्शरू मट्टू आज़ादेरे मट्टे साथी वारस न भोलू।”

31 एल्हेरेलेइ हे दूलाव ते बेइनव, अस गुलाम कुआन्शरे बच्चे नई, ज़ै कानूने, बल्के आज़ाद कुआन्शरां बच्चेम, ज़ै विश्वासे।

## 5

~~~~~

1 मसीहे अस आज़ाद कियोरम हुनी असन गुलामेरू ज़ेरू यहूदी केरू कानून मन्नेरी ज़रूरत नई, अपने एस ऐज़ैदी मां बनोरे राथ, ते दुबारा अपने आपे कानून मन्नेरे गुलाम भोनेरे लेइ न देथ।

2 हेरा, अवं पीलुस तुसन सेइं ज़ोताई, अगर परमेशरेरे सामने धर्मी भोनेरे लेइ खतनो कराले, फिरी ज़ैन मसीहे कियोरू तैसेरो तुसन कोई फैइदो न भोलो।

3 फिरी भी अवं हर एककी सेइं ज़ोताई ज़ै इस उमीदी सेइं खतनो कराते कि परमेशरेरे सामने धर्मी भोए, तैस कानूनेरो हर हुक्म मन्नो पेनोए।

4 तुस ज़ैना कानून मेन्तां धर्मी भोने चातथ, तुसेईं अपनो आप मसीहे करां अलग कियो ते परमेशरेरो अनुग्रह कबूल केरने करां इन्कार कियो।

5 अवं इन ज़ोई बटताई, किजोकि असन पवित्र आत्मार तरफां पूरो भरोसो कि परमेशर असन धर्मी कबूल केरेलो किजोकि अस मसीहे पुइ विश्वास केरतम।

6 ते मसीह यीशु मां न खतनो, न बगैर खतनो किच्छ कम्मरोए, पन सिर्फ विश्वास जै प्यारे सेइं अस्सर करते ।

7 तुस त राडी दौड़ लोरे थिये दौड़ने, तुस केनि रोके, कि सच्चे न मन्थ ।

8 एरी शिखर तुसन परमेशेरे नईं दित्तोरी जैने तुस अपने बच्चे भोनेरे लेइ कुजोरेथ ।

9 झूठी शिक्षा थोडे जेरे खमीरेरी जेरि जैन सारे सोन्नोरे अट्टे खमीर करते ।

10 अवं प्रभु पुड़ भरोसो रखताई, कि तुसन झूठी शिक्षा पुड़ विश्वास केरने करां दूर रखे; पन जै तुसन परेशान करते, तै कोई कि न भोए परमेशर तैस सजा देलो ।

11 पन हे दूलाव ते बेइनव, अगर अवं लोकन प्रचार करतो भोथो कि खतनो केरनो जरूरीए, त स्ताव न गाथो । अगर अवं ईं प्रचार न करतो राथो कि मुक्ति सिर्फ मसीहेरे कुरूसे सेइं, त फिरी केन्ची टोकर न लगेथी ।

12 रोडू भोथु कि जैना तुसन टपलातन, तैना अपनो अंग कठेथे!

13 हे दूलाव ते बेइनव, तुस आज्ञाद भोनेरे लेइ कुजोरेथ पन एरू न भोए, कि ईं आज्ञादी जिसमानी कम्मां केरे लेइ मौको बने, बल्के प्यारे सेइं एक्की होरेरे सेवक बना ।

14 किजोकि सारो कानून इस्से एक्की गल्ली मां पूरो भोइ गाते, “कि तू अपने पड़ोसी सेइं अपनो जेरो प्यार केर ।”

15 पन अगर तुस एक्की होरि सेइं लटते ते तंग करते राथ, त खबरदार राथ, एक्की होरेरी बरबादी करेले ।

????? ?????? ?????? ??????

16 पन अवं ज़ोताई, पवित्र आत्मारें च़लाने सेइं च़लेले, त तुस जिसमेरी खुवैइशां कधी पूरी न करेले ।

17 किजोकि जिसम पवित्र आत्मारें खलाफे, ते पवित्र आत्मा जिसमेरे खलाफ खुवैइश करते, ते इना एक्की होरेरे दुश्मन आन; एल्हेरेलेइ जैन तुस केरनू चातथ तैन न केरि बटथ ।

18 ते अगर तुस पवित्र आत्मारें च़लाने सेइं च़लतथ त कानूनेरे अधीन न राए ।

19 जिसमेरां कम्मां बांदन, मतलब बदमाशी, गंदा कम्मां, चपलूसी ।

20 मूरती केरि पूजा, दूनो, बैर, लड़ाई, जलन, सरक, खलाफत, फसाद, विधर्म ।

21 नफरत, नशां केरनो, नाच, ते इन केरे जेरां होरां भी कम्मां आन, जैन केरे बारे मां अवं तुसन पेइलू ज़ोताई, जेन्च़रे पेइलू भी ज़ोवरूए, कि एरां कम्मां केरनेवाले परमेशेरे राज़ेरे वारस नईं भोने ।

22 पन पवित्र आत्मारो फल प्यार, आनन्द, शान्ति, सबर, ते दया, भलाई, विश्वास,

23 नमूरता, ते बरदाश केरनू; एरां कम्मां केरे खलाफ कोई कानून नईं ।

24 ते जैना मसीह यीशु मां आन, तैनेईं जिसम तैसेरे खुवैइशन सेइं साथी कुरूसे पुड़ त्रादोरोए ।

25 अगर पवित्र आत्मां असन नर्वीं जिन्दगी दित्तोरीए, त पवित्र आत्मारें मुताबिक च़लम भी ।

26 अस घमण्ड न केरम, अस एक्की होरि न सरकाम, ते एक्की होरि सेइं न जलन केरम ।

6

????? ?????? ?????? ??????

1 हे दूलाव ते बेइनव, अगर तुसन पतो च़ले कि केन्चे कोई पाप कियोरोए, त तुस जैना पवित्र आत्मारें च़लाने सेइं च़लतथ, तैस बड़े नेरमी सेइं वापस धार्मिकतारे बत्तां वापस एजनेरी लेइ मद्दत केरा, ते अपनो भी खियाल रखा, कि तुस भी तैस्से अज़मैइशी मां न पेथ ।

2 तुस एक्की होरेरी मुशकलन मां मद्दत केरा, ते एन्च़रे मसीहेरो कानून पूरो केरा ।

3 अगर कोई अपने आपे खास मैन्हु समझे ते तै सच्चे न भोए, त तै अपने आपे धोखो देते ।

4 पन हर कोई अपने कम्मे परखे, ते तैखन तैस होरि केरे बारे मां नईं पन अपने बारे मां घमण्ड केरनेरो मौको भोलो ।

5 किजोकि हर कोई मैन्हु अपनो भार छूलो ।

6 ज़ैन वचनेरी शिक्षा मैलतीए, तैना सब रोड़ी चीज़न मां शिखालनेबाले शामिल रखन ।

7 धोखो न खाथ, परमेशर ठाठन मां न उड़ाव गाए, किजोकि मैन्हू ज़ैन किछ् बेते, तैन्ने कटेलो ।

8 किजोकि ज़ै अपने जिसमेरे लेइ बेते, तै जिसमे सेइं विनाशेरी फसल कटेलो; ते ज़ै आत्माेरे लेइ बेते, तै आत्मा सेइं हमेशारी ज़िन्दगरी फसल कटेलो ।

9 अस रोड़ां कम्मां केरने मां हिम्मत न हारम, किजोकि अगर अस हार न मनमेले त परमेशर अपने वक्ते पुइ असन इनाम देलो ।

10 एल्हरेलेइ ज़ैड़ी तगर मौको मल्ले सेब्बन सेइं भलाई केरा; खास केरतां मसीही लोकन सेइं ।

??????????

11 हेरा, मीं केतरे बड-बडे लफसन मां तुसन अपने हथ्थे सेइं लिखोरूए ।

12 ज़ेत्तरे लोक यहूदन खुश केरने चातन तैना तुसन खतनो कराने लेइ ज़ोतन । तैना एन केरतन कि लोक प्रचार केरनेरे लेइ तैन न स्तान कि परमेशर लोकन सिर्फ एल्हरेलेइ वच्चाते कि तैना विश्वास केरतन कि मसीह क़रूसे पुइ मरोए ।

13 किजोकि खतनो करानेबाले एप्पू भी सेब्बी कानूने पुइ न ज़लन, पन तैना चातन तुस खतनो कराथ, ताके तैना होरि यहूदी केरे सामने घमण्ड केरनेरे काबल भोन, कि तुसेइं तैन केरे वजाई सेइं खतनो कियोरोए ।

14 पन मेरे लेइ इने, अगर अवं घमण्ड केरि त सिर्फ इश्शे प्रभु यीशु मसीह पुइ ज़ै इश्शे लेइ क़रूसे पुइ मरो । किजोकि तेसेरे मरने सेइं अवं हुनी दुनियारे चीज़ां केरि इच्छां केरो गुलाम न राव, ते तैन मीं पुइ राज़ केरनेरी कोई शक्ति नई ।

15 किजोकि न खतनो, ते न खतनो न भोनो ज़रूरीए, पन ज़रूरी इने, कि परमेशरे तुस पवित्र आत्माेरे कम्मेरे ज़िरिये अक नब्बों इन्सान बनोरैथ ।

16 परमेशर तैन सेब्बन अपनि शान्ति देलो ते तैन बरकत देलो ज़ैना इस नियमें मन्तन, तैना परमेशरेरे लोक आन ।

17 अग्रोवं जो कोई मीं दुख न दे, किजोकि मेरे जानी पुइ ज़ैना दाग आन तैना हिरातन कि अवं यीशु मसीहेरो दास आई ।

18 हे द्लाव ते बेइनव, इश्शे प्रभु यीशु मसीहेरो अनुग्रह तुसन पुइ भोए । आमीन ।

इफिसियों

1 अवं पौलुस परमेशेरी मेर्जी सेइं यीशु मसीहेरो प्रेरित आई। अवं तुसन ज़ैना परमेशेरे लोक आथ ते इफिसुस नगरे मां रातथ ई चिट्ठी लिखने लोरोई।

2 इश्शे वाजी परमेशर ते प्रभु यीशु मसीह करां तुसन अनुग्रह ते शान्ति मैलती राए।

????? ??? ??????? ?????

3 इश्शे प्रभु यीशु मसीहेरे परमेशर ते कने वाजी केरि बड़याई भोए, इश्शो रिश्तो मसीह सेइं भोनेरे वजाई सेइं तैने असन हर लिहाजे सेइं तैना आत्मिक बरकतां दितोरिन, ज़ैना बरकतां स्वर्गरो एइतिन।

4 ज़ेन्चरे तैने अस दुनिया बनानेरे पेइली मसीह मां चुने, कि अस तैसेरी नज़री मां प्यारे मां पवित्र ते बेइलज़ाम भोम।

5 किजोकि परमेशरे असन सेइं प्यार कियो, तैनी बड़े पेइले ई फैसलो कियोरो थियो कि तै असन यीशु मसीहेरे ज़िरिये अपने बच्चां केरे रूपे मां गोद ने, किजोकि तै इन केरनू चातो थियो।

6 अस परमेशेरे अनुग्रहेरे लेइ तैसेरी बड़याई केरतम, ज़ै तैने असन मुफते मां दितो, किजोकि इश्शो रिश्तो तैसेरे टूलेरे मट्टे सेइं आए।

7 परमेशेरे बड़े अनुग्रहेरे मुताबिक मसीहेरे खूने बगाने सेइं असन छुटकारो मैल्लो, मतलब इश्शे पाप माफ़ भोए।

8 ज़ै तैनी सारे ज्ञान ते समझ सेइं साथी असन पुड़ बड़ो जादे कियो।

9 कि तैने अपनि मेरज़रो भेद, अपने रोड़े इरादेरे मुताबिक असन पुड़ बांदो कियो, ज़ै तैने पूरो केरनो थापोरो थियो।

10 परमेशेरे ठहरावरे वक्ते पुड़ तै स्वर्ग ते धेरतरी चीज़न साथी आनेलो ते मसीह तैस पुड़ राज़ करालो।

11 मसीह सेइं इश्शो रिश्तो भोनेरे वजाई सेइं परमेशरे अस चुने, तैन हासिल केरनेरे लेइ ज़ेसेरो वादे तैने असन देनेरे लेइ कियोरो थियो। इन बिलकुल तेन्चरे भोव ज़ेन्चरे तैनी बड़े पेइलू पूरू केरनू थापेरू थियू ते इच्छा कियोरी थी।

12 अस यहूदी पेइले लोक आम ज़ैनेई मसीह पुड़ उमीद रखोरि थी, ते अस चुने जे, ताके परमेशेरे महिमारी स्तुति केरि बटम।

13 ते तुस भी मसीह सेइं शामिल भोए ज़ैखन तुसेईं सच्चू वचन शूनू, ज़ै खुशखेबरां तुश्शे लेइ मुक्ति आनी, ज़ैखन तुसेईं विश्वास कियो परमेशरे तुसन पुड़ अपनि छाप लाई, ई छाप पवित्र आत्मा आए, ज़ै तैनी असन दितो, ज़ेसेरो वादो तैनी कियोरो थियो।

14 पवित्र आत्मा भी छुटकारेरे सैयरो जेरो आए, ज़ै पक्कू केरते कि परमेशरे असन तै विरासत देलो ज़ेसेरो तैनी वादो कियोरोए, ते तैनी अस अपने लोकां केरे रूपे मां घिनोरेम, ताके तैसेरे महिमारी बड़याई भोए।

?????????? ???????????

15 एल्हेरेलेइ, ज़ेइसेरू मीं शुनेरूए कि तुस प्रभु यीशु पुड़ विश्वास केरतथ ते परमेशेरे सेब्बी लोकन सेइं प्यार केरतथ,

16 तुश्शे लेइ परमेशेरू शुकर केरनू न शैरी, ते अपने प्रार्थनां मां तुसन याद केरताई।

17 अवं प्रार्थना केरताई कि परमेशर, इश्शे प्रभु यीशु मसीहेरे महिमा बाले वाजी, तुसन पवित्र आत्मा दे, तै तुसन अक्लमन्द बनालो ते परमेशरे तुसन पुड़ बांदो केरेलो, ताके तुस तैस पिशैनी बटथ।

18 अवं ई भी प्रार्थना केरताई कि तै तुशशे मने खोलेलो, कि तुस बुझथ कि इशशे कुजानेरी कुन उमीद आए, ते केत्री महान ते महिमा बैली बरकतां केरे लेइ परमेशेरे अपने लोकन जो वादो कियोरोए।

19 ते तैसेरी शक्ति इशशे लेइ जैना अस विश्वास केरतम, केत्री महाने, तैसेरी शेक्तेरे कम्मरे मुताबिक,

20 जैन तैनी मसीहेरे बारे मां कियूं, कि तैस मुडदन मरां जीते केरतां स्वर्गे मां अपने देइने पासे विशालो।

21 तेई तै हर किसमेरी हकौमत, ते अधिकार, ते शक्ति, ते प्रभुता, ते तैसेरी पदवी हर एक्के अधिकैरी करां ते महान आए, जैना न सिर्फ इस जहानी मां, पन एजनेबाले जहानी मां भी आए।

22 ते परमेशेरे सब किछ मसीहेरे अधिकारे मां कियूं, तैनी सेन्नी चीजन पुइ अधिकारी बनेइतां कलीसिया दितो।

23 कलीसिया मसीहेरी जान आए, ते तैसेरी भरपूरी जै सेन्न मां सब किछ पूरू केरतीए।

2

~~~~~

1 बीतोर वक्ते मां परमेशेरे तरफां तुसन कां नर्वीं जिन्दगी न थी; तुस अपने पाप ते बुरे कम्मां केरे वजाई मरोरे लोकां केरे जेरे थिये।

2 तैस वक्ते तुस दुनियारे रीति पुइ चलते थिये, ते तुस अम्बेरे दुष्ट आत्मा केरे अधिकैरी मुताबिक चलते थी, जेसेरी आत्मा हेजू भी परमेशेरे हुक्म न मन्नेबाले लोकां केरे मन्न मां कम केरती।

3 एन मां अस भी सब पेइले अपने जिसमेरे खुवैइशन मां दिहाड़े कटते थी, ते जिसम, ते मनेरी मर्जां पूरी करते थी, ते होरि लोकां केरे जेरे स्भाव सेइ बुरे थिये ते परमेशेरे सज़ारे अधीन थिये।

4 पन परमेशर जै बड़ो दया करनेबालोए; अपने तैस बड़े प्यारे सेइ, जैस सेइ तैने असन सेइ प्यार कियो।

5 जैखन अस पापां केरे वजाई सेइ मरे लोकां केरे जेरे थिये, तैनी असन जिन्दगी दित्ती जैखन तैनी मसीह मुडदन मरां जीतो कियो, परमेशेरे अनुग्रहे सेइ तुसन मुक्ति मैलोरीए।

6 किजोकि तैनी अस मसीह सेइ साथी मुडदन मरां जीते किये, ते स्वर्गेर टैरन मां तैस सेइ साथी विशाले।

7 परमेशेरे एन कियूं कि एजनेबाले वक्ते मां दुनियारे लोकन हिराए कि तैसेरो अनुग्रह केत्रो महान आए। ई अनुग्रह इशशे लेइ हिराव, तैने इशशे लेइ एन कियूं जैना अस यीशु मसीह मां आम।

8 किजोकि विश्वासेर जिरिये परमेशेरे अनुग्रहे सेइ तुसन मुक्ति मैलोरीए, ते तुसेई अपनो आपे एप्सू नई बचावरो बल्के परमेशेरे दाने सेइ तुस बचोरथ।

9 ते भले कम्मन सेइ नई, एरू न भोए कि कोई घमण्ड केरे।

10 किजोकि अस परमेशेरे बनोरम; ते मसीह यीशु मां तैन भले कम्मां केरे लेइ पैदा कियोरेम, जैना परमेशेरे पेइले इशशे केरनेरे लेइ तियार करां।

~~~~~

11 एल्हेरेलेइ याद केरा, कि तुस जैना ज़रमनेरे गैर कौमरेथ, ते खतनो कियो लोक तुसन जो बगैर खतने वाले जोतन।

12 तुस लोक तैस वक्ते मसीह न थिये जानते, ते तुस परमेशेरे चुनोरे इस्राएली लोक न थिये, ते तुस तैन रोड़ी चीजन मां हिस्सेदार न थिये जैन केरो वादो परमेशेरे यहूदी लोकन सेइ कियोरो थियो, ते न उमीद ते दुनियाई मां परमेशेरे करां दूर थिये।

13 पन अक वक्त थियो कि तुस परमेशेरे करां दूर थिये, पन हुनी यीशु मसीह मां तैसेरे खून सेइ नडे आनोरथ।

14 किजोकि मसीहे इशो मेले कराव, तैन्ने यहूदी ते गैर यहूदी दुइये अक केरे, ते अलग करनेवाली दिवार जै मझाटे थी, डोली ।

15 मसीहेरे करूसेरे मौतरी वजाई सेइं, तैनी कानूनेरे सारे नियम पूरे तरीके सेइं खतम किये । मसीहेरो एरो केनेरो मकसद ई थियो कि दूई टोली केरि अक नव्वीं टोली बनाए, जै तैस सेइं जुड़ोरी भोए ।

16 मसीहेरे करूसेरी मौतरे जिरिये, तैनी दूई टोली अक की, ते परमेशेरे सेइं तैन केरो मेल कराव, एन्वरे यहूदी ते गैर यहूदी केरि दुश्मनी खतम की ।

17 ते मसीहे एइतां तुस गैर कौमरे लोक जैना परमेशेरे करां दूर थिये, ते यहूदी जैना तैसेरे नेडे थिये, दुइयन मेल मिलापेरी खुशखबरी शुनाई ।

18 किजोकि मसीहेरे बदाँलम अस सारे एक्की पवित्तर आत्माेरे जिरिये बाजी परमेशेरे कां एज्जी बटतम ।

19 एल्हेरेलेइ तुस गैर कौमां केरे लोक परदेशी ते मुसाफर न राए, पन परमेशेरेरे लोकां केरू झुण्ड, ते परमेशेरेरे घरानेरे भोए ।

20 तुस इमारतरे जेरेथ जेसेरी बुनीयाद परेरित ते नेबी आन ते यीशु मसीह एप्पू तैसेरे कूनेरो घोडे ।

21 जैस मां सारी इमारत साथी मिलतां प्रभु मां अक मन्दर बनती गातीए ।

22 तुस गैर कौमरे विश्वासी लोक भी परमेशेरेरे होरि लोकन सेइं साथी शामिल किये जे, किजोकि तुस मसीह सेइं साथी अक भोरेथ । ताके तुस अक घर बनथ जैडी परमेशेरेरो आत्मा रहते ।

3

THE NEW TESTAMENT

1 किजोकि परमेशेर तुशं गैर कौमां केरे लेइ इन कियोरू, अवं पौलुस तुशं लेइ प्रार्थना केरताई, अवं कैदे मां आई, किजोकि अवं तुशं लेइ यीशु मसीहेरी सेवा केरताई ।

2 पक्कू तुसेईं शुनेरूए, परमेशेरे अपने अनुग्रहेरे जिरिये तुसन खुशखबरी शुन्नेरी लेइ मीं ज़िमेवारी दित्तोरीए ।

3 परमेशेरो छप्पोरो मकसद बड़ो पेइलो छपोतो थियो, हालांकी तैनी मीं पुड़ बांदो कियो, किछ गल्लां आन जैना अवं तुसन चिट्ठेरे जिरिये समझानो चाताई ।

4 जैस सेइं तुस पेढतां बुझी बटतथ, कि अवं मसीहेरो ते भेद कोड़ि तगर समझताई ।

5 बीतोरे वक्ते मां परमेशेरे ई भेद लोकन पुड़ बांदो नई कियोरो, पन हुनी पवित्तर आत्माेरे जिरिये अपने पवित्तर परेरितन ते नेबन पुड़ बांदो कियो ।

6 परमेशेरो मकसद ई आए, खुशखबरेरे जिरिये यीशु मसीहे सेइं तैन केरो रिशतो भोनेरे वजाई सेइं गैर कौमां केरे लोक तैस्से विरासती मां हिसेदार भोले, ते तैना तैस्से जानरे अंग आन, जेसेरो वादो परमेशेरे यहूदन सेइं कियोरो ।

7 परमेशेरे अनुग्रह ते बेडि शेक्ति सेइं मीं तै खुशखबरेरी प्रचार केनेरो लेइ सेवा केनेरो खास अधिकार दित्तोरीए ।

8 चाए अवं परमेशेरेरे सेब्मी लोकन मरां निकडे करां निकोडोईं । परमेशेरे मीं पुड़ अनुग्रह कियो, कि अवं गैर कौमन खुशखबरी शुनेईं बेटि कि मसीह हमेशारी बरकतां केरो देनेवालोए ।

9 अवं इस भेदरे मकसदरे वारे ज़ोनेरे लेईं चुनोरोईं, जै परमेशेर हर चीज़ बनानेवालोए तैनी शुरू करां छप्पोरो रखोरो थियो ।

10 ताके हुनी कलीसियोरे जिरिये सेइं, परमेशेरू बडू ज्ञान, अम्बरेरे तैन प्रधांन ते अधिकैरन पुड़ बांदू कियूं गाए ।

11 परमेशेरे दुनिया बनानेरे पेइलो इन्ने थापेरू थियू, जैन तैन इशो प्रभु यीशु मसीह मां पूरू कियूं ।

12 किजोकि मसीह पुड़ इशो विश्वासे, तैसेरे वजाई सेइं अस परमेशेरी मौजूदगी मां हिम्मत ते भरोसे सेइं साथी एज्जी बटतम।

13 एल्हेरेलेइ अव बिनती केरताई कि जैना दुःख तुशे लेइ मीं पुड़ लोरेन एजने, तैन केरे वजाई सेइं दिलेरी न शैरी, किजोकि इन सब तुशे फैइदेरे लेइ आए।

XXXXXXXXXXXX

14 एल्हेरेलेइ अव तैस बाजी परमेशेरे कां जैधू केरे भारे परार्थना केरताई,

15 तैए आए जै स्वर्ग ते धेरती पुड़ रानेबाले विश्वासी लोकां केरो बाजी।

16 कि तै अपने महिमारे धनेरे मुताबिक तुसन इन दान दे, कि तुस तैसेरी आत्माई सेइं अपनो एनतरीयां मैन्हु मां शक्ति हासिल केरतां मजबूत भोते गाथ।

17 ते विश्वासे सेइं मसीह तुशे दिले मां राए, कि तुस प्यारे मां जील छेडतां ते मुनीयाद छेडतां,

18 सब पवित्तर लोकन सेइं रोडे चारे समझनेरी शक्ति हासिल केरा; कि तैसेरी चौड़ाई, ते लम्बाई, ते ऊँचाई, ते डुघार केतरोए।

19 ते अव परार्थना केरताई कि तुस मसीहेरे तैस प्यारे सेमझी बटतथ जै समझी करां बेइरे, कि तुस परमेशेरी भरपूरी सेइं भेरोते गाथ।

20 हुनी जै एरो शक्ति बालोए, जै इशु बिनती ते समझी करां बडू जादे कम केरि बटते, ते तैस शेक्तेरे मुताबिक असन मां कम केरते,

21 कलीसिया मां, ते मसीह यीशु मां, तैसेरी महिमा पीड़ी करां पीड़ी तगर हमेशा भोती राए। आमीन।

4

XXXXXXXXXXXX

1 अव जै प्रभुएरी सेवा केरनेरे वजाई सेइं केदे मां आई, तुसन कां बिनती केरताई, कि जेन्चरे परमेशेरे तुस अपने लोक भोनेरे लेइ कुजेवरथ, तैसेरे मुताबिक जिनंदगी भी जीथ।

2 मतलब सैरी दीनतां ते नमरता सेइं साथी, ते सबर केरतां प्यारे सेइं एककी होरेरी झल्लां।

3 इस कम्मे मां अपनि पूरी कोशिश केरा ताके तुस मेल मिलापे सेइं राथ, किजोकि पवित्तर आत्माए जिरिये तुस अक कियोरेथ।

4 अस सारे विश्वासी एककी जानरे अंगां केरे जेरे आम, ते असन सेबन अक्के पवित्तर आत्माए मैलोरोए; ते तुसन अक्के उमीद दिती, जैखन तुस परमेशेरे लोक भोनेरे लेइ चुने जे।

5 अक्के प्रभुए जै यीशु मसीहे, जैस पुड़ अस सब विश्वास केरतम, ते असेई सेबन अक्के बपतिस्मो मैल्लो।

6 ते अक्के परमेशेरे, जै सेबनी केरो बाजीए, तैए सेबन पुड़ राज केरते ते इशे दरमियान कम केरते, ते असन सेबन मांए रहते।

7 पन मसीहे असन मरां हर एककी तैसेरू कम केरनेरे लेइ अलग-अलग किसमेरी काबलीत दितीरीए।

8 एल्हेरेलेइ पवित्तरशास्त्र ज्रोते,

“जैखन तै उच्चे पुड़ ज़ादो,
ते तैने बड़े कैदी एप्पू सेइं साथी ने,
ते तैने लोकन बेड़ि बरकतां दिती।”

9 (तैसेरे उच्चे चढ़नेरो साफ मतलबे ईं आए, कि मसीह धेरतरे बुनीयें ठारन मां ओरो थियो।

10 एल्हेरेलेइ मसीह बुन ओरो थियो, तैए आए जै सैरी अम्बरे करां भी उबरो जेव, मसीहे एन एल्हेरेलेइ कियू ताके सब किछ तैसेरे हजूरी सेइं भरपूर भोए)

11 ते तै मसीहे जैने (कलीसियाई) जिमेबारी दिती, तैने किछ प्रेरित किछ नबी, किछ खुशखबरी शुनाने बाले, किछ रखवाले ते किछ उस्ताद चुने।

12 मसीहे अपने लोकन इना ज़िमेदारी एल्हेरेलेइ दित्तोरिन, कि कलीसिया ज़ै मसीहेरी जाने तरक्की केरे।

13 ज़ैखन कि अस सब विश्वास, ते परमेशेरे मट्टेरी पिशानी मां अक भोम, ते ज़ांतगर अक सिद्ध मैन्हु न भोम ते मसीहेरे कदेरे अनदाजे तगर न पुजाम।

14 ताके अस अग्रावं जो बच्चां केरे ज़ेरे न रहम, ज़ैना मैन्हु केरि टगनेरी गल्लां ते च़लैकी सेइ तैन केरे कोशिशी सेइ खियालां केरि ते शिक्षारी हर एककी बयाने सेइ उछड़ाए, ते इरां उरां घुमाए गाते भोन।

15 बल्के प्यारे सेइं सच्च ज़ोइतां, सेब्भी गल्लन मां मसीहेरे ज़ेरे सिद्ध भोथ ज़ै कलीसियारी कुरोडी।

16 ज़ैस सेइं सारी जान सेब्भी जोइं केरि मदी सेइं साथी मिलतां, ते साथी ज़ुइतां तैस अस्सरेरे मुताबिक ज़ै सेब्भी हिसन सेइं भोइतां, अपने आपे बद्धाते, कि तै प्यारे मां तरक्की केरतो राए।



17 एल्हेरेलेइ अवं इन ज़ोताई, ते पूरभु मां खबरदार केरताई कि ज़ेन्चरे गैर विश्वासी लोकां केरे लोक अपने मनरे बेकार खियालन पुइ च़लतन, तुस अज़ेरे बाद तैन केरे ज़ेरे न च़ला।

18 किजोकि तैना बेसमझ भोरेन, ते तै अज्ञानतारी वजाई सेइं ते सखत मनरे वजाई सेइं तैना तैस ज़िन्दगी करां दूर आन ज़ै परमेशर देते।

19 ते तैना बेशर्म भोइतां, एश मां लेगि जे, कि सेब्भी किसमेरां गन्दां कम्मां शोके सेइं केरन।

20 पन तुसन मसीहेरी एरी शिक्षा नई मैल्लोरी।

21 बल्के मीं पूरू याकीने कि ज़ैखन तुसेईं यीशुएरे वारे मां अपने उस्तादन करां शुनू, त तुसेईं तैन करां सच्च़ी शिक्षा शिखी।

22 कि तुस पइले चाल चलनेरे पुरानी इन्सानयती ज़ै टपलाने बैली इच्छां केरे मुताबिक भ्रष्ट भोइ गातीए, खोल्ला।

23 इसेरे बदले पवित्तर आत्मा तुशशे खियालन ते नज़िरियो बदले।

24 परमेशेरे तुसन नव्वों स्वभाव दित्तोरोए, ज़ै तैसेरे स्वभावेरे ज़ेरो आए। त तुस नव्वें स्वभावेरे ज़ेरे ज़ीथ। सच्च़े तुस धर्मी ते पवित्तर भोथ।

25 एल्हेरेलेइ झूठ ज़ोनू शैरतां हर कोई अपने पड़ोसी सेइं सच्च ज़ोए, किजोकि अस एप्पू मामेइं एककी जानेरे अंग आम।

26 अगर तुस क्रोधे मां भोथ खबरदार राथ, कि पाप न केरथ, दिहाइ डुबने तगर तुशशो क्रोध मुक्की गाए।

27 ते शैताने मौको न देथ कि तै तुशशी अज़मैइश केरे।

28 च़ोरी केरनेवालो फिरी च़ोरी न केरे; बल्के इमानदेरी सेइं अपने हथ्थन सेइं मेहनत केरे; एल्हेरेलेइ ज़ैस ज़रूरत भोए तैस देनेरे लेइ तैस कां किछ भोए।

29 कोई गन्दी गल तुशशे ज़बाना न निस्से, पन ज़रूरतरे मुताबिक तैन्ने ज़ोथ, ज़ैन होरि केरे लेइ विश्वासे मां मजबूती सेइं बद्धनेरी वजा भोए। तैखन ज़ैन तुसेईं ज़ोवं तैन लोकां केरे लेइ रोडू भोलू ज़ैना तुशशी शुन्तन।


30 ते ज़ैन किछ तुस केरथ तैसेरे वजाई सेइं परमेशेरे पवित्तर आत्मा दुखी न केरा, ज़ैस सेइं तुसन पुइ छुटकारेरे दिहाइरे लेइ छाप दित्तोरीए।

31 सेब्भी किसमेरी ट्लइठार ते प्रकोप, ते क्रोध, सखत गल, ते तुहीन ते सारो बैर-भाव सेइं तुस दूर कियेरेथ।

32 ते एककी होरि पुइ दया केरा, ते माफ़ केरनेवाले भोथ, ते ज़ेन्चरे परमेशेरे मसीह मां तुशशे पाप माफ़ किये, तेन्चरे तुस भी एककी होरेरे पाप माफ़ केरा।



- 1 एल्हरेलेइ तुस परमेशेरे बच्चेथ जैन सेइं तै प्यार करते, तैसेरे जेरे बन्नेरी कोशिश केरा।
- 2 होरि केरे लेइ प्यारे सेइं भेरतां जिन्दगी जीथ, जेन्चरे मसीहे भी तुसन सेइं प्यार कियो; ते इशशे लेइ अपनो आप रोड़ी मुशकरे लेइ परमेशेरे कां च्चेदतां बलिदान केरो।
- 3 ते जेरू परमेशेरे लोकां केरे लेइ जरूरीए, तेन्चरे तुसन मां भी बदमाशी, ते कोन्ची किसमेरू बुरू कम न भोए, या लालचैरे बारे मां गल भी न भोए।
- 4 ते न बे शरमी, न बेंसरी गल्लां, न मेवजेरी गल्लां, किजोकि इना गल्लां शोभन्न न, बल्के तुसेईं परमेशेरेरू शुकर कियोरू लोडे।
- 5 किजोकि तुस इन ज्ञानतथ, कि कोन्ची बदमाश, या भिट्टो मैन्हु, या लालची मैनेरो जै मूरती पूजा केनेबालोए, मसीह ते परमेशेरे राज्जे मां तैसेरो कोई हिस्सो नई।
- 6 कोई तुसन ई सल्लाह देइतां धोखो न दे, कि परमेशेरे हकीकति मां तैन सजा न देलो जैना एरे पाप केरतन।
- 7 एल्हरेलेइ तैन केरू साथ न रखा।
- 8 किजोकि तुस त पेइले आंधरू थी, पन हुनी प्रभु यीशु मां लोआथ, ते लोअरे बच्चां केरे जेरे चला।
- 9 (किजोकि लोअरो फल सेबमी किसमेरी भलाई, ते धार्मिकता, ते सच्चे)।
- 10 ते इन तोप्पां कि प्रभु कुन रोडू लगते।
- 11 ते आंधेरां ते बेकार कम्पन मां शामिल न भोथ, बल्के लोकन इन हिराथ कि इना कम्मां बुरन।
- 12 किजोकि गैर विश्वासी लोकां केरां छुपोरां कम्मां केरि गल केरनि भी शर्मांरी गल आए।
- 13 जैखन लौ कोन्ची चीज़ी पुड़ चमकती त हर कोई लेई बटते कि इन केरू, किजोकि जैखन लौ किछ् हिराती, त ते चीज़ एप्पू लौ भोइ गातीए।
- 14 एल्हरेलेइ एन्चरे ज़ावें गाते,
“हे झुलने बाला उठ
ते मुडदन मरां जीतो भो,
ते मसीहेरी लौ तीं पुड़ चमकेली।”
- 15 एल्हरेलेइ रोडे चारे हेरा, कि केरि जिन्दगी जीने लोरेथ। बेअक्लां केरि जेरि नई पन अक्लमन्दा केरि जेरि जिन्दगी जीथ।
- 16 ते मौको कीमती समझा, किजोकि दिहाडे बुरेन।
- 17 एल्हरेलेइ बेअक्ल न बना, पन ध्याने सेइं समझा, कि प्रभुएरी तुशशे लेइ कुन मर्जी?
- 18 ते शराब पीने मां मतवाले न भोथ, किजोकि एस सेइं बदचलनी भोतीए, पन पवित्र आत्मा सेइं भेरोते राथ।
- 19 ते एप्पू मांमेइं परमेशेरां भजन ते स्तुति करते ते आत्मिक गीत ज़ोथ, ते अपने-अपने मने मां प्रभुएरे लेइ गीत ज़ोथ ते किरतन करते राथ।
- 20 ते सदा सेबमी गल्लां केरे लेइ प्रभु यीशु मसीहेरे नंवे सेइं वाजी परमेशेरेरू शुकर करते राथ।
- 21 ते मसीहेरे डरे सेइं एककी होरिरे अधीन राथ।



- 22 हे कुआन्शव, अपने-अपने मुन्शां केरे अधीन राथ, जेन्चरे प्रभुएरे।
- 23 किजोकि मुन्श त कुआन्शरी क्रोड़ी जेन्चरे मसीह कलीसियारी क्रोड़ी, ते मसीह कलीसियारो मुक्ति देनेबालोए जै तैसेरी जाने।
- 24 जेन्चरे कलीसिया मसीहेरे अधीने, तेन्चरे कुआन्शां भी हर गल्ली मां अपने-अपने मुन्शेरे अधीन रान।
- 25 हे मुन्शव, अपने-अपने कुआन्शन सेइं प्यार केरा, जेन्चरे मसीहे भी कलीसिया सेइं प्यार केरतां अपनो आप तैसेरेलेइ दित्तो।
- 26 ताके तैस वचनेरे ज़िरिये पैनेरे निहाने सेइं शुद्ध केरतां पवित्र बनाए।

27 ते तैस अक एरी महिमा बाली कलीसिया बनेइतां एप्पू कां खडी केरे, जैस मां न कोई दाग, न धबो, न कोई एरी चीज भोए, बल्के पवित्र ते बेइलजाम भोए।

28 एन्चरे मुन्श अपने कुआन्शी सेइं अपने जानी बराबर प्यार केरे। जै अपने कुआन्शी सेइं प्यार केरते, तै एप्पू सेइं प्यार केरते।

29 किजोकि कोन्चे कधी अपने जानी सेइं बैर नईं रखोरो, बल्के तैसेरी हेरगेश कियोरीए, जेन्चरे मसीहे भी कलीसियाई सेइं केरते।

30 एल्हेरेलेइ अस मसीहेरे जानेर अंगां केरे जेरे आम।

31 जेन्चरे पवित्रशास्त्र जोते “एल्हेरेलेइ मइद अम्मा बाजी शैरतां अपने कुआन्शी सेइं मिलोरो रालो।”

32 ई भेद त बड़ोए; पन अवं मसीह ते कलीसियारे बारे मां जोताईं।

33 पन तुसन मरां हर कोई अपने कुआन्शी सेइं एप्पू बराबर प्यार केरे, ते कुआन्शी भी अपने मुन्शेरो इज्जत केरे।

6

1-3 पवित्रशास्त्र जोते, “अपने अम्मा ते बाजी केरि आदर केरा, तैखन तुश्शू भलू भोलू ते दुनियाई मां तुश्शी लम्मी उमर भोली।” ई पेइलो हुक्मे जैस सेइं परमेशेरे वादो कियोरोए, त बच्चव इन तुश्शे लेइ रोडू आए, तुस जैना प्रभु यीशु पुइ विश्वास केरतथ, अपने अम्मा बाजी केरू जोनू मन्ना।

4 ते हे बच्चन बालव, अपने बच्चन न सरकाथ, पन प्रभुएरी शिक्षा ते खबरदारी देइतां, तैन केरि हेरगेश केरा।

5 हे गुलामाव, जैन लोक दुनियारे मुताबिक तुश्शे मालिकन, अपने मनरे सचैई सेइं डरते, ते धरकते, ते जेन्चरे मसीहेरो तेन्चरे तैन केरो भी हुक्म मन्ना।

6 ते मैन्हु खुश केरेने बालां केरि जेरे हिरानेरे लेइ सेवा न केरा, पन मसीहेरे दासां केरे जेरे मने सेइं परमेशेरी मेर्जी पुइ चला।

7 ते तै सेवा मैन्हु केरि नईं, पन प्रभुएरी जैनतां केरा।

8 किजोकि तुस जानतथ, कि जै कोई जेरू रोडू कम केरेलो, चाए गुलाम भोए, चाए आजाद; तैस प्रभु करां तेरहु इनाम मैलेलू।

9 एन्चरे हे मालिकव, तुस भी धेमकी शैरतां अपने नौकरन सेइं रोडो बर्ताव केरा, किजोकि तुस जानतथ, कि तैन केरो ते तुश्शो दुइयां केरो मालिक स्वर्गे मांए, ते तै केन्चेरी तरफदारी न केरे।

10 आखरी मां तुस प्रभुएरी शक्ति बाले शक्ति मां मजबूत बना।

11 परमेशेरे सारे हथियार बन्धा; ताके तुस शैतानेरे सारे मन्सूबां केरो मुकाबलो केरि बटतथ।

12 किजोकि इश्शी ई लडाईं, खूने या मांसे सेइं यानी मैन्हु केरे खलाफ नईं, बल्के प्रधान्न् सेइं, ते अधिकैरन सेइं, ते इस दुनियारे आंधरेरे हाकिमन सेइं ए, ते तैस दुष्टेरे आत्मिक फौजन सेइं ए जैना आसमाने मां आन।

13 एल्हेरेलेइ परमेशेरे सारे हथियार बन्धा, ताके तुस जेइस बुरे दिहाइन एजन त तुस सामनो केरि बटतथ, ते सब किछू पूरू केरतां मजबूत राथ।

14 परमेशेरे सच्च्चाई पटकेरी जेरि अपने कमरी सेइं बन्धा, ते धार्मिकतारी झिलम लेइतां,

15 ते पवन्ना मां मेलेरे खुशखबरी शुनानेरे तियैरारे वूट लाथ।

16 ते तैन सेबन सेइं साथी विश्वासेरी ढाल घिन्तां मजबूत भोथ जैस सेइं तुस तैस शैतानेरे सब जलते तीर हिशेईं बटथ।

17 ते मुक्तरा टोप, ते आत्मारी तलवार जैन परमेशेरे वचने, नेथ।

18 ते हर वक्त ते हर किसमे सेइं जै पवित्र आत्मा चलाने सेइं प्रार्थना ते बिनती केरते राथ, ते बींझे राथ, कि सब परमेशेरे लोकां केरे लेइ लगातार बिनती केरा।

19 ते मेरे लेइ भी, कि मीं वचन शुनानेरे वक्त हिम्मत भोए, कि अवं दिलेरी सेइं खुशखबरायो भेद जोई बेटि।

20 एल्हेरेलेइ अवं शंगलन सेइं बन्धोरो राजदूतेरो जेरो सेवा केरनेबालोई। प्रार्थना केरा कि जेन्त्रे मीं शुनावरू लोडे, तेन्त्रे अवं दिलेरी सेइं खुशखबरी शुनेई बेटि।

????????????

21 तुस भो, अवं जोई बटताई ते कुन केरने लोरोई, इस सेइं बुझा। तुखिकुस जै तुसन सब किछ ज़ोलो। तै इशो टूलारो साथीए, ते प्रभु मां वफादार सेवके।

22 तै मीं तुसन कां एल्हेरेलेइ भेजोरोए, कि तुस इशो हालती जानथ, ते तै तुशे मन्न मां हिम्मत दे।

23 अवं प्रार्थना केरताई कि इशो बाजी परमेशेरे ते प्रभु यीशु मसीह तुसन विश्वासी लोकन शान्ति दे, ते तेना तुसन एक्की होरि सेइं प्यारे मां ते मसीह पुइ विश्वासे मां बनोरे रानेरे वजा भोन।

24 जैना इशे प्रभु यीशु मसीह सेइं सच्चो प्यार केरतन, तेन सेभन पुइ अनुग्रह भोतो राए।

फिलिपियों

- 1 अवं पौलुस, त कने तीमुथियुस, यीशु मसीहेरे दास आम। इश्शे तरफां सेब्भी पवित्र लोकां केरां नंवां, जैना मसीह यीशु मां भोइतां फिलिपी नगरे मां रातन, रखवालन ते सेवकन समेत,
2 इश्शे बाजी परमेशर ते प्रभु यीशु मसीहे केरां तुसन अनुग्रह ते शान्ति मेलती राए।

????????? ?????????? ? ??? ?????????? ??????

- 3 अवं जैखन-जैखन तुसन याद केरताई, तैखन-तैखन अपने परमेशेरू शुक्र केरताई।
4 ते जैखन भी तुश्शे सेब्भी केरे लेइ बिनती केरताई, ते हमेशा आनन्दे सेइं प्रार्थना केरताई।
5 किजोकि तुस पेइले दिहैडे केरां अज्र तगर यीशु मसीहेरी खुशखबरी फैलाने मां मीं सेइं साथी शामिल रावरेथ।
6 ते मीं इस गल्लरो भरोसोए, कि परमेशरे तुसन मां रोडे कम्मेरी शुरुआत कियोरीए, तैए तैस कम्मे यीशु मसीहेरे वापस एजनेरे दिहाडे तगर पूरू केरेलो।
7 इन जेइजे, कि अवं तुसन सेब्भी केरे लेइ एरू सोची, किजोकि तुस मेरे मने मां बस्सोरेथ, ते मेरे कैदे मां खुशखबरे लेइ जुवाब ते सबूत देने मां तुस सब मीं सेइं साथी अनुग्रहे मां मीं साथिथ,
8 इस मां परमेशर मेरो गवाहे, कि अवं यीशु मसीहेरो जेरो प्यार केरतां तुश्शे सेब्भी केरू लालच केरताई।

- 9 ते अवं ई प्रार्थना केरताई, कि तुश्शो प्यार ज्ञान ते सेब्भी किसमेरो जमीर सेइं होरे भी बद्धते गाथ।
10 इडी तगर तुस रोड़ी केरां रोड़ी गल्लां ट्लाएरी बुझा, ते मसीहेरे दिहाडे तगर सच्च्रे बनोरे राथ; ते टोकर न खाथ।
11 ते तैस धार्मिकतारे फले सेइं जै यीशु मसीहेरे जिरिये भोते, भेरोते गाथ जैस सेइं परमेशेरी महिमा ते बड्याई भोती राए।

????????? ???? ???? ?????????? ??????

- 12 हे दूलाव ते बेइनव, अवं सच्च्र ज़ोताई, कि तुस इन ज्ञाना, कि मीं पुड जै बीतोरीए, तैस सेइं खुशखबरी बडोतरी भी भोइ।
13 इडी तगर कि महाराजरी सारी फौज ते बाकी सारे लोकन मां इन बांदू भोव कि अवं मसीहेरे लेइ कैद मां आई।
14 ते प्रभु यीशु मां जैना दूला आन, तैन मरां बडे मेरे कैद भोनेरे वजाई सेइं आन, तैना हिम्मत केरतां परमेशेरो वचन बेधइक भोइतां ते दिलेरी सेइं शुनानेरी कोशिश केरतन।
15 किछ्छ लोक त जलन ते लडैई सेइं मसीहेरो प्रचार केरतन ते किछ्छ लोक सच्च्रे दिले सेइं।
16 किछ्छ त इन सेमझतां कि अवं खुशखबरे लेइ जुवाब देनेरे लेइ ठेरावरोई प्यारे सेइं प्रचार केरताई।
17 पन तैना होरे लोक साफ दिले सेइं नई पन जलनी सेइं मसीहेरो प्रचार केरतन, इन सेमझतां कि मेरे कैद मां मेरे लेइ मुसीबत बधान।
18 त कुन भोव? सिर्फ इन, कि हर बत्तां चाए बुरे खियाले सेइं, चाए सच्च्रेई सेइं, मसीहेरे बारे मां खुशखबरी प्रचार भोतीए, ते अवं इस सेइं खुश आई, ते खुश भी रेइलो।

???? ???? ???? ???? ?

- 19 किजोकि अवं ज्ञानताई, कि तुश्शी प्रार्थनाई सेइं, ते यीशु मसीहेरी आत्मार दाने सेइं इसेरो नितीजो मेरी मुक्ति भोली।
20 अवं त दिले सेइं इन चाताई, ते ई उमीद रखताई, कि अवं कोन्वी गल्ली मां न छिथोई, बल्के जेन्चरे मेरी बडी दिलेरी सेइं मसीहेरी बड्याई मेरे जिसमे सेइं भोती राई, तेन्चरे हुना भी भोए चाए अवं ज़ीतो रेइ या मेरी।

- 21 किजोकि मेरे लेइ ज़ींतू रानू मसीहे, ते मरनु फैइदोए ।
- 22 पन अगर जिसमे मां ज़ींतू रानू मेरे कम्मरे लेइ फैइदेमंदे त अवं न ज़ैनी, कि केस चुनी ।
- 23 किजोकि मीं दुइयां केरे मझाटे चुने मां मुशकिल भोने लोरीए । अवं मरनु चाताई ताके स्वर्गे मां मसीह साथी रेइ बेटि, किजोकि इन बडू ज़रूरीए ।
- 24 पन तुशशी मद्दत केरनेरे लेइ मेरू ज़ींतू रानू बडू ज़रूरीए ।
- 25 एल्हेरेलेइ कि मीं इलहेरो भरोसोए ते अवं ज्ञानताई कि अवं ज़ींतो रानोई, बल्के तुसन सेभन सेइं साथी रानोई ज़ैस सेइं अवं तुशशी मद्दत केरि, कि विश्वासे मां मजबूत भोथ, ते इस मां खुश राथ ।
- 26 ज़ैखन अवं तुसन कां दुबारां एज्जी, तुसन कां जादे वजा भोली यीशु मसीह पुइ घमण्ड केरनेरी एल्हेरेलेइ ज़ैन किछ तै मेरे ज़िरिये केरने लोरोए ।
- 27 सिरफ एतरू केरा कि तुशशो चालचलन मसीहेरे खुशखेबारे काबल भोए । चाए अवं तुसन एइतां हेरी, चाए न एज्जी, तुशशे बारे मां इन शुनी, कि तुस अक मन भोइतां बनोरे रातथ, ते अकोट्टे भोइतां खुशखेबारे विश्वासेरे लेइ मेहनत केरते रातथ ।
- 28 ते कोन्ची गल्ली मां खलाफत केरनेबालन करां न डराथ । ई तैन केरे लेइ बरवाद भोनेरो साफ निशाने, पन तुशशे लेइ मुक्तरो, ते इन परमेशेरे तरफां आए ।
- 29 किजोकि मसीहेरे वजाई सेइं तुसन पुइ ई अनुग्रह भोव कि न सिर्फ तैस पुइ विश्वास केरा पन तैसेरेलेइ दुःख भी झैल्लां ।
- 30 ते तुसन तेन्चरे मुसीबत केरनीए, जेन्चरे तुसेईं मीं करां केरते लोरीए, ते हुना भी शुन्तन, कि अवं तेन्चरे केरताई ।

2



- 1 अगर मसीह मां किछ तसल्ली ते प्यारे सेइं हिम्मत ते आत्मारी मौजूदगी, ते किछ दर्द ते दयाए ।
- 2 ते मेरो ई आनन्द पूरो केरा कि अक्के मन राथ ते अक्के प्यार, ते अक्के खियाल, ते अक्के सोच रखा ।
- 3 खुदगरज या झूठी बड्यैयरे लेइ किछ न केरा पन नर्म भोइतां एक्की होरि एप्पू करां रोडो समझा ।
- 4 तुसन मरां हर कोई सिर्फ अपने भलैइयरे लेइ न सोचे, बल्के होरि केरि भलैइयरे लेइ भी सोचे ।
- 5 जेन्चरे यीशु मसीहेरो सुभाव थियो तेन्चरे तुशशो भी भोए ।
- 6 ज़ैने परमेशेरे बराबर भोइतां भी परमेशेरे बराबर भोने अपने कब्जे मां रखनेरी चीज न समझू ।
- 7 बल्के अपना आप खाली केरो, ते गुलामेरू रूप धारण केरू, ते मैन्दु केरे ज़ेरो बनो ।
- 8 ते मैनेरे रूपे मां बांदो केरतां दीन केरो, ते इडी तगर हुकम मन्ने बालो राव, कि मौत, हाँ, क़रूसेरे मौत भी झैल्ली ।
- 9 एल्हेरेलेइ परमेशेरे तै बडो महान भी केरो, ते तैस तैन नवं दित्तू ज़ैन सेब्भी नव्वन करां बड्डूए ।
- 10 कि स्वर्गे मां ते धेरती पुइ ते धेरतलरे बुने; तैना सब यीशुएरे नव्वे पुइ ज़ैधूए टेकन ।
- 11 ते बाजी परमेशेरी महिमारे लेइ हर अक ज़िभ मन्ने कि यीशु मसीह प्रभुए ।



- 12 ते हे मेरे ट्लारव, जेन्चरे तुस सदा हुकम मन्ते ओरेथ, तेन्चरे हुना भी न सिर्फ मीं सेइं साथी रेइतां पन खास केरतां ज़ैखन अवं दूर भोताई फिरी भी डरते राथ ते थरकते अपने मुक्तरू कम पूरू केरते गाथ ।
- 13 किजोकि परमेशर ज़ै तुसन मां कम केरते, ते तुसन इच्छा ते शक्ति तैन केरनेरे लेइ देते, ज़ैस सेइं तै खुश भोते ।
- 14 त सब कम्मां बगैर शकैइतां ते बगैर बेसी सेइं केरा ।

15 ताके तुस बेइलजाम ते शरीफ भोइतां टारे ते ढीठ लोकन मां परमेशेरे बेइलजाम बच्चे बना, जैन मां तुस जिनंदगरो वचन घिन्तां दुनियाई मां बलते दीयां केरे जेरे लेइहोते रातथ,

16 कि मसीहेरे वापस एजनेरे दिहाड़े घमण्ड केरनेरी वजा भोए, कि न मेरी दौड़-धूप ते न मेरी मेहनत बेकार भोए।

17 अगर मीं तुशे विश्वासेरे बलिदाने या सेवारे लेइ अपनो खून भी बगानो पे, त फिरी भी अवं खुश आई, ते तुसन सेब्भी साथी खुश आई।

18 तेन्चरे तुस भी खुश भोथ, ते मीं साथी आनन्द केरा।

~~~~~

19 मीं परभु यीशु मां उमीदे, कि अवं तीमुथियुसे तुसन कां जल्दी भेजेलो, ताके तुशशो हाल शुन्तां मीं शान्ति मैल्ले।

20 किजोकि मीं कां एरे जेरे सुभावेरो कोई नई, जै साफ दिले सेइं तुशशी फिकर केरे।

21 किजोकि सब अपने फैइदो तोपतन, न कि यीशु मसीहे।

22 पन तुसेईं तै परखो ते पिशानो भी, कि जेन्चरे मटटू बाजी साथी केरते, तेन्चरे तैनी मीं सेइं साथी खुशखबरी फैलाने मां मीं सेइं साथी मेहनत केरि।

23 ते मीं उमीदे, कि जैखन मीं पतो जल्लेलो कि मेरी कुन हालत भोली, तैखन अवं तैस लूशी भेजेलो।

24 ते मीं परभु मां भरोसोए, कि अवं एप्पू भी जल्दी एज्जेलो।

25 पन मीं इपफरुदीतुस जै मेरो दलाए, ते मद्दतगार, ते साथी योधो ते तुशशो दूते, ते जरूरी गल्लन मां मेरी सेवा टेल केरनेबालोए, तुसन कां भेज्जो जरूरी समझो।

26 किजोकि तैसेरो मन तुसन सेबनन मां लगगोरो थियो। एल्हेरेलेइ बे चैन रातो थियो किजोकि तुसेईं तैसेरे बिमैरारो हाल शुनोरो थियो।

27 ते तै सच्चे बिमार त भोरो थियो, इडी तगर कि मरने पुड़ थियो, परमेशेरे तैस पुड़ दया की; ते सिर्फ तैस्से पुड़ नई, पन मीं पुड़ भी, कि मीं दुःखे पुड़ दुख न भोए।

28 एल्हेरेलेइ अवं तैस भेजनेरी होरि भी कोशिश केरि, तुस फिरी तैस सेइं मिलतां खुश भोइयथ ते मेरो भी दुःख घटे।

29 एल्हेरेलेइ तुस परभु मां बड़े आनन्दे सेइं तैस सेइं मुलाकात केरा, ते एरे जेरे लोकां केरि आदर केरा।

30 किजोकि तैए मसीहेरे कम्मरे लेइ अपनि जान खतरे मां छेइतां मौतरे नेइो पुजोरो थियो, ताके जै घाटो तुशशे तरफां मेरी सेवा मां भोव, तैस तै पूरो केरे।

### 3

~~~~~

1 हे मेरे दलाव ते बेइनव, परभु मां आनन्दित राथ, तैना गल्लां तुसन बार-बार लिखने मां मीं त कोई कष्ट न भोए, ते इस मां तुशशी सलामतीए।

2 तैन बुरां कम्मां केरनेबाले लोकन करां हुशार राथ, जैना खुवार कुतरां केरे जेरे खाने वालां आन।

3 किजोकि खतने बाले त असां आम जैना परमेशेरेरे आत्मारे जलाने सेइं जलतम ते आराधना केरतम ते मसीह यीशु पुड़ घमण्ड केरतम ते जिसमे पुड़ भरोसो न रखम।

4 पन अवं त जिसमे पुड़ भरोसो रेख्खी बटताई अगर कोन्ची होरि जिसमे पुड़ भरोसो रखनेरो वचार भोए, त अवं तैस करां भी जादे रेख्खी बटताई।

5 अटोवं दिहाड़े मेरो खतनो भोव, इस्राएल केरे कुटमे ते विन्यामीनेरे गोत्रे मरां आई; इब्रैनी केरो इब्रानी; कानूनेरे बारे मां अगर कोई ज़ोए त फरीसी।

6 जोशेरे बारे मां अगर कोई ज़ोए त कलीसियाई सताने बालो; ते अगर कानूनेरे धार्मिकतारे बारे मां कोई ज़ोए त बेइलजाम।

7 पन ज़ैना-ज़ैना गल्लां मेरे फैइदेरी थी तैना मीं मसीहेरे खातर नुकसान सैमझोरिन ।

8 बल्के मीं अपने प्रभु यीशु मसीहेरे पिशानारी बड़यैयरे वजाई सेइं अवं सब गल्लां नुकसान समझताई, जेसेरे वजाई सेइं मीं बेइ चिजां केरो नुकसान उठाव, ते तैन कूडो समझताई, जैस सेइं अवं मसीह हासिल केरि ।

9 ते तैस मां भोइ, न कि एपनी तैस धार्मिता सेइं, जै मूसेरे कानूने सेइं ए, बल्के तैस धार्मिकता सेइं जै परमेशेरे तरफां मसीह पुड़ विश्वास केरने सेइं भोतीए ।

10 ते अवं तैस ते तैसेरे ज़ींती भोनेरी शक्ति, ते तैस साथी दुखन मां शामिल भोई, ते तैसेरी मौतरी बराबरी हासिल केरि ।

11 ताके अवं कोन्ची रीति सेइं मुइदन मरां ज़ींते भोनेरे पदे तगर पुजी ।

~~~~~

12 ई मतलब नई, कि मीं हासिल करू, या अवं सिद्ध भोइ जेव, पन तैस चीज़ी हासिल केरनेरे लेइ दौड़ने लोरोई, जेसेरे लेइ मसीह यीशुए अवं ट्लावरो थियो ।

13 हे ट्लाव ते बेइनव, मेरू इन गुमान नई कि मीं ट्लाव, पन सिर्फ अक कम केरताई, कि ज़ैना गल्लां पत्तरोवं रेइ तैन बिसरतां, अग्री गल्लां केरे पासे गाताई ।

14 निशानेरे पासे दौड़तो च़लताई, ताके मीं तैन इनाम मैल्ले, जेसेरे लेइ परमेशेरे अवं मसीह यीशु मां बा कुजेवरोई ।

15 असन मरां ज़ेत्तरे सिद्धन, ईए विचार रखा, ते अगर कोन्ची गल्लीं मां तुशशो होरो खियाल भोए त परमेशर तैस भी तुसन पुड़ बांदो केरेलो ।

16 एल्हेरेलेइ ज़ैडी तगर पुजोरेम, तैसेरे मुताबिक च़लम ।

17 हे ट्लाव ते बेइनव, तुस सब मिलतां मेरी ज़ेरि च़ाल च़ला, ते तैन केरि पिशान रखा, ज़ैना इस रीति पुड़ च़लतन ज़ेसेरी मिसाल तुस असन मां हेरतथ ।

18 किजोकि बड़े एरी च़ाल च़लतन, ज़ैन केरि चर्चा मीं तुसन सेइं बार-बार की ते अज़ भी लेरां देइ-देइ ज़ोताई, कि तैना अपने च़ालच़लन सेइं मसीहेरे करूसेरे बैरिन ।

19 तैन केरो अन्त विनाशे, तैन केरो ईश्वर पेटे, तैना एपनी शरमरी गल्लन पुड़ घमण्ड केरतन, ज़मीनारी गल्लन पुड़ मन लातन ।

20 पन इशशो मुलख स्वर्गे, ते अस एक्की मुक्ति देनेवाले प्रभु यीशु मसीह स्वर्गों बलगने लोरेम ।

21 तैए एपनी शक्ति सेइं तैस अस्सेरे मुताबिक तैना सब चीज़न अपने वशे मां केरि बटते, इशशे कमजोर जिसमेरू रूप बेदलतां, अपने महिमारो जिसमेरे मुताबिक बनालो ।

## 4

1 एल्हेरेलेइ हे मेरे ट्लारे ट्लाव ते बेइनव अवं तुसन सेइं प्यार केरताई, ज़ैन मां मेरो दिल लगगोरो रहते ज़ै मेरो आनन्द ते ताज भोए, हे ट्लारे ट्लाव ते बेइनव, प्रभु मां एन्चरे मज़बूत राथ ।

~~~~~

2 अवं यूओदियारे छंदे केरताई, ते सुन्तुखेरे भी, कि तैना प्रभु मां अक मन रान ।

3 ते हे सच्चे मद्दतगार अवं तीं कां भी बिनती केरताई, कि तू तैन कुआन्शां केरि मद्दत केर, किजोकि तैनेई मीं सेइं साथी खुशखबरी फैलाने मां, क्लेमंस ते मेरे तैन मद्दत केरनेवालन समेत मेहनत की, ज़ैन करां नंवां जिन्दगरे किताबी मां लिखोरन ।

4 प्रभु मां सदा आनन्दित राथ; अवं फिरी ज़ोताई, आनन्दित राथ ।

5 तुशशी नरमी सेब्मी मैनन् पुड़ बांदी भोए, प्रभु नेडोए ।

6 कोन्ची भी गल्लारी फिक्र न केरा, पन हर एक्की गल्लीं मां तुशशी दरखुवास, प्रार्थना बिनती सेइं शुकरे साथी परमेशेरे कां हाज़र भोन ।

7 तैखन परमेशेरी शान्ति, ज़ै समझी करां बिलकुल बेइरे, तुशशे दिलन ते तुशशे खियालन मसीह यीशु मां बिलकुल मैफूज़ रखेली ।

8 आखरी मां, हे मेरे दूलाव ते बेइनव, ज़ैना-ज़ैना गल्लां सच्चीन, ते ज़ैना-ज़ैना आदरारे काबलन, ते ज़ैना-ज़ैना गल्लां पवित्तरन, ते ज़ैना-ज़ैना गल्लां रोड़िन, ते ज़ैना-ज़ैना गल्लां मने रोड़ी लेगतिन, ते ज़ैना-ज़ैना गुण ते ज़ैना-ज़ैना गल्लां तरीफेरी, तैन पुड़ धयान केरा ।

9 ज़ैना गल्लां तुसेई मीं करां शिखी, ते कबूल की, ते शुनी ते मीं हेरी, तैन केरो हुक्म मन्ना तैखन परमेशर ज़ै शान्ति देनेबालोए तुसन साथी भोलो ।

????? ???? ???? ?

10 अवं परभु मां बड़ो खुश आई कि हुनी एतरे दिहाइन पत्ती तुसन मेरे बारे मां फिरी खियाल भोव; याकीन्नु तुशशे शुरुआती मां इस एरो खियाल थियो, पन तुसन मौको न मैल्लो ।

11 इन नई कि अवं अपनि कम्मरे वजाई सेइं ज़ोताई; किजोकि मीं इन्ने शिखोरूए कि ज़ैस हालती मां आई, तैस्से मां राज़ी भोई ।

12 अवं निकड़ भोनु भी ज़ानताई ते बड़ड़ भोनु भी ज़ानताई, ते मीं हर एक्की गल्लती ते सेब्मी हालतन मां रज़नू, दलुखुनू ते बधनू घटनू शिखोरूए ।

13 ज़ै मीं ताकत देते तैस मां अवं सब किछ् केरि बटताई ।

14 फिरी भी तुसेईं रोड़ू कियूं, कि मेरे दुख मां मीं साथी भोए ।

15 ते हे फिलिप्पियों, तुस एप्पू भी ज़ानतथ, कि खुशखबरी प्रचाररे शुरुआती मां ज़ैखन अवं मकिदुनिया अग्रोवं जेव, तैखन मीं तुस शारे ते कोन्ची होरि मेनडलारे लोकेई लेने देनेरे बारे मां मद्दत न की ।

16 एन्चरे ज़ैखन अवं थिस्सलुनीके नगरे मां थियो; तैखन भी तुसेईं मेरी घटी पूरी केरनेरे लेइ एक्की बार नई बल्के काई बार किछ् भेजेरू थियूं ।

17 इन नई कि अवं दान चाताई पन अवं एरो फल चाताई, ज़ै तुशशे फैइदरे लेइ बड़तो गाए ।

18 मीं कां सब किछ्, बल्के बड़ू जादे, ज़ैन तुसेईं इपफरुदीतुसेरे हथ्थे भेजोरू थियूं, तैन मेलतां रज़ोरोई, तैन त खुशबू ते कबूल केरनेरे काबल बलिदाने, ज़ैन परमेशरे पसंदे ।

19 ते मेरो परमेशर भी अपने तैस धनेरे मुताबिक ज़ैन महिमा सेइं यीशु मसीह मांए, तुशशी हर अक ज़रूरत पूरी केरेलो ।

20 इशशो परमेशर ते बाजी एरी महिमा हमेशा भोती राए । आमीन ।

????? ???? ???? ?

21 हर अक पवित्तर मेन्हु ज़ै यीशु मसीह मांए तैस जो नमस्कार ज़ोथ । ज़ै दूला मीं साथीए तुसन नमस्कार ज़ोते ।

22 सब पवित्तर लोकन, खास केरतां ज़ैना महाराजरे घरानेरेन तुसन नमस्कार ज़ोतन ।

23 इशशे परभु यीशु मसीहेरो अनुग्रह तुशशी आत्माई सेइं साथी राए ।

कुलुस्सियों

??????

1 अवं पौलुस ई चिट्ठी लिखने लोरोई, अवं परमेशेरी मेर्जी सेइं मसीह यीशुएरो प्रेरित आई, ते विश्वासी दला तीमुथियुस भी मीं साथी आए।

2 मसीह मां तैन पवित्र ते विश्वासी दलां केरे नव्वे जैना कुल्लुसे नगरे मां रातन।

इशशे बाजी परमेशेरे तुसन अनुग्रह ते शान्ति देतो राए।

????????? ??????????

3 अस जैखन तुशशे लेइ प्रार्थना केरतम त अपने प्रभु यीशु मसीहेरे बाजी, परमेशेरू शुकर केरतम।

4 किजोकि असेई शुनोरूए, कि मसीह यीशु पुइ तुशशो विश्वासे, ते तुस सेभी पवित्र लोकन सेइं तुस प्यार केरतथ।

5 तैस उमीद कियोरी चीजारे वजाई सेइं जै तुशशे लेइ स्वर्ग मां रखोरीए, जेसेरे बारे मां तुसेई तैस खुशखेबरे सच्चे वचने सेइं शुनोरूए, जै तुसन कां पुजोरोए।

6 ते जेन्नेरे दुनियाई मां भी फल आनते, ते बद्धतो गाते; मतलब जैस दिहैड़ी करां देंतू तुसेई ते शुनु, ते सच्चेई सेइं परमेशेरो अनुग्रह पिशानो, तुसन मां भी एरू केरि बटते।

7 तैसेरी शिक्षा तुसेई इशशे दलारे मद्दतगार इपफूरास करां हासिल की, जै इशशे लेइ मसीहेरो वफादार सेवके।

8 तैने तुशशे प्यारेरे बारे ज़ोवं जै होरि लोकां केरे लेइ आए, जै पवित्र आत्मा मांए तुसन दित्तोरोए।

9 एल्हेरेलेइ जैस दिहैड़ी करां इन शुनु, त असेई हमेशा तुशशे लेइ प्रार्थना की, कि परमेशेरी आत्मा तुसन अक्ल ते मसझ दे जैस सेइं तुस तैसेरी मर्जी पूरे तरीके सेइं सेमझी बटले।

10 ताके तुस तेरही जिन्दगी जीथ जेरि प्रभुएरे लोकन ज़ियोरी लोडे, ते तुस प्रभुए हर बत्तां खुश केरथ, ताके तुस लगातार हर किसमेरी भलाई करते राथ, ते परमेशेरी पिशानी मां बद्धते गाथ।

11 अवं प्रार्थना केरताई कि परमेशर अपनि महिमारे शेक्तेर इस्तेमाल केरनेरे ज़िरिये तुसन मज़बूत केरे, ताके तुस आनन्दे ते सबरी सेइं दुख झैल्ली बटतथ।

12 बाजी परमेशेरू शुकर केरते राथ, जैने अस इस काबल बनाए कि स्वर्गेरे राज्जे मां तैसेरे अपने लोकन सेइं साथी विरासती मां हिसेदार भोम।

13 किजोकि तैने अस शैतानेरे राज्जे मरां छुटेइतां अपने दलारे मट्टेरे राज्जे मां आने

14 परमेशेरे अपने मट्टेरे बलिदाने सेइं असन पापां केरि माफ़ी दिती (यानी शैतानेरे राज्जे करां आज़ाद किये)।

????? ???? ?? ?? ????????? ???????

15 परमेशेरे त कोई न लेई बटे, पन जैखन तैसेरू मट्टू मैन्हू बनू त तैनी परमेशर लोकन पुइ बांदो कियो, जैन किछ परमेशेरे बनाव तैस पुइ तैस कां सेभना जादे अधिकार आए।

16 किजोकि ई तै (मसीह) थियो जैने सब किछ बनानेरे वक्ते परमेशेरे सेइं कम कियुं, चाए अम्बेरे पुइ भोन या धेरती पुइ भोन, लेवरी भोन या आलेई, कुन तखत भोन, या रियासतां, कुन हकौमतां भोन या अधिकार, सैरी चीज़ां तैस्से सेइं ते तैसेरेलेइ बनेइ।

17 ते मसीह सेभी चीज़ां बनाने करां पेइलो थियो, ते सब चीज़ां तैस मां बनोरी रैतिन।

18 तैए कलीसियारो प्रधाने जै तैसेरी जाने; तैए पेइलोए ते मुइदन मरां ज़ीतो भोने बालन मरां पेइलोए कि सेभी गल्लन मां तैए प्रधान भोए।

19 किजोकि बाजी परमेशर इस्से मां खुश भोते कि मसीह मां तैसेरे सारे सुभाव वास केरतन।

20 परमेशेरे फैसलो कियो कि अपने मट्टे भेजे, जैने अपनो खून बगाव ते करूसे पुड़ अपनि जान दित्ती। परमेशेरे सेब्भी चीज्जान सेइं मेल मलाप केरनेरे लेइ एन कियूं। एन्चरे तैनी मसीहेरे जिरिये सेइं सेब्भी चीज्जां केरो मेल मिलाप एप्पू साथी कियो, चाए तैना धेरतरी भोन, चाए स्वर्गेरी भोन।

21 ते तुस जैना पेइले परमेशेरे करां दूर थिये, ते बुरे कम्मां सेइं मने सेइं बैरी थी।

22 फिरी भी परमेशेरे अपने मट्टे यीशुएरे मैन्हु बन्ने सेइं ते करूसे पुड़ मौतरे जियरीए तुशशो मेल कराव, ताके तुसन एप्पू कां पवित्तर ते बे दाग ते बेइलजाम हजार केरे।

23 पन तुस मसीह पुड़ विश्वास केरनेरे मां बुनीयादरे जेरे मजबूत राथ, ते तैस खुशखेबारे उमीद पुड़ जै तुसेईं शुनोरी एन शारथ, जेसेरो प्रचार अम्बरे करां बुन सैरी सर्प्टि मां कियो जेव; ते जैस मां अवं पौलुस सेवक बनो।

24 हुनी अवं तेन दुखन सेइं खुश आई, जैना तुशशो लेइ झैल्लताई, ते मसीहेरी दुखां केरि घटी तैसेरे जानारे लेइ, मतलब कलीसियारे लेइ, अपने जिसमे मां पूरी केरताई।

25 जेसेरो अवं परमेशेरेरे इतजामेरे मुताबिक सेवक बनो, जै तुशशो लेइ मीं सोंफो, ताके अवं परमेशेरेरू वचन पूरो-पूरो प्रचार केरि।

26 मतलब तैस भेदे जै जमाना ते पीड़न करां छुप्पोरो थियो, पन हुनी तैसेरे तैन पवित्तर लोकन पुड़ बांदो भोरोए।

27 जैन पुड़ परमेशेरे बांदो केरनो चाव, कि तैन ज्ञान भोए होरि कौमन मां तैस भेदेरी महिमारी कीमत कुने ते ते ईए, कि मसीह जै महिमारी उमीद तुसन मां रहते।

28 जेसेरो प्रचार केरतां अस हर एक्की मैन्हु ज़ोतम ते सारे ज्ञाने सेइं हर एक्की मैन्हु शिखालतम, कि अस हर एक्की मैन्हु मसीह कां सिद्ध केरतां पेश केरम।

29 ते एल्हेरेलेइ अवं तैसेरी शेक्तेरे मुताबिक जै मीं मां शेक्ति सेइं साथी अस्सर केरतीए तन मन लेइतां मेहनत भी केरतम।

2

1 अवं चाताई कि तुस ज्ञानथ, कि तुशशो ते तैन केरे जैना लौदीकिया नगरे मां आन, ते तैन सेब्भी केरे लेइ जैनेई अवं नई लोरोई कि अवं केन्चरे मेहनत केरताई।

2 ताके तैन केरे मन्न मां शान्ति भोए ते तैना प्यारे सेइं एप्पू मांमेइं बनोरे रान, ते तैस पूरी समझरू धन हासिल केरन, बाजी परमेशेरेरे भेदे मतलब मसीह पिशानन।

3 जैस मां समझरे ते ज्ञानेरे सारे भण्डार छुपोरेन।

4 इन अवं एल्हेरेलेइ ज़ोताई, कि कोई मैन्हु तुसन लालच देने बैली चीजी सेइं धोखो न दे।

5 किजोकि अवं अगर जिसमेरे लिहाजे सेइं दूराई, फिरी भी आत्मिक लिहाजे सेइं नेडो आई, ते तुशशो रीति सेइं तुशशी हालती ते तुशशो विश्वासे जै मसीह यीशु मां मजबूती हेरतां खुश भोव।

6 ते जेन्चरे तुसेईं मसीह यीशु अपनां प्रभु कबूल कियोरोए, तेन्चरे तैस मां ज़लते भी राथ।

7 ते तैस मां ज़ील छुडते राथ ते बद्धते राथ; ते जेन्चरे तुस शिखालोरेथ तेन्चरे विश्वासे मां मजबूत भोते गाथ, ते खूब शुकर केरते राथ।

8 खबरदार राथ कि तुसन कोई तैसेरे ज्ञाने ते धोखे सेइं शिकार न केरे, जैन मैन्हु केरू रवाजेरू ते दुनियारी पेइली शिक्वारे मुताबिके पन मसीहेरे नई।

9 किजोकि तैस मां ईश्वरत्वेरी सारी भरपूरी जानी मां एइतां वास केरती।

10 ते तुस तैस मां भेरोरेथ जै सैरी हकोमती ते अधिकारेरी करोड़ी।

11 तैस्से मां तुशशो एरो खतनो भोरोए, जै हाथेरो नई, मतलब मसीहेरोए खतनो, जैस सेइं तुशशी पुरानी इन्सानयत अलग की गातीए।

12 ते तैस्से सेइं साथी बपतिस्मे मां दवे जे, ते तैस्से मां परमेशेरी शेक्ति पुइ विश्वास केरतां, जैने तै मुइदन मरां जीतो कियो, तुस भी तैस सेइं साथी जीते किये ।

13 ते तैने तुस भी, जैना अपने पापन, ते अपने जिसमेरे खतनेरे हालती मां फटरे थी, तैस सेइं साथी जीते भी केरे, ते इश्शे सब पाप माफ़ केरे ।

14 ते विधि केरो तै लेख जै इश्शे नंवे पुइ ते इश्शे खलाफ थियो मटाव; ते तैस कुरूसे पुइ कील देइतां दूर केरो ।

15 ते तैने प्रधान्ते अथिकैरन हारेइतां तैन केरो खुल्लो मुखूल्लो तमाशो बनावं ते कुरूसे सेइं जयजयकार भी केरू ।

16 एल्हेरेलेइ खानू पीनू या तिहार या नव्वीं चाँदनी, या आरामेरे दिहाइं केरे बारे मां तुश्शो कोई फेसलो न केरो ।

17 किजोकि सब एजने बैली गल्लां केरि छावे, पन असली चीजां मसीहेरिन ।

18 कोई मैन्हु दीनता ते स्वर्गदूतां केरि पूजा पसंद केरतां तुश्शी दौइरे इनामे करां दूर न रखे । एरो मैन्हु लेवहरी गल्लां मां लगगोरो रहते ते एपनी जिसमानी समझी पुइ बेफैइदो फुलते ।

19 ते तैस कुरोडी टलेइतां न रखन जै मसीह आए ते जैस सेइं सारो जिसम जोइन ते पठां केरे हफाजती सेइं ते एक्की सेइं साथी जुइतां, परमेशेरे तरफां बद्धतो गाते ।

20 जैखन कि तुस मसीह सेइं साथी दुनियारे पेइली शिक्षाई सेइं मरोरेथ, त फिरी तैन केरे जेरे जैना दुनियाई मां जिन्दगी बीतातन मैन्हु केरे हुक्म ते शिक्षा सेइं,

21 ते एरी शिक्षा मां किजो रातथ कि इस सेइं नई हरनु, एन नई खानू, ते तैस सेइं हथ नई लानो?

22 (किजोकि इना सब चीजां कम्मे मां आनते-आनते नाश भोइ गैली) ।

23 इन गल्लन मां एपनी मेज्जरी मुताबिक अपनि बनेवरी भेक्ति सेइं, ते दीनता, ते जिसमानी कोशिश सेइं ज्ञानेरू कम त आए, पन जिसमानी खुवैइशन रोकने मां इन सेइं किछ भी फेइदो न भोए ।

3

1 ते जैखन तुस मसीह सेइं साथी जीतो किये, त स्वर्गेरि चीजां केरे तोपी मां राथ, जैडी मसीह मौजूदे ते परमेशेरे देइने पासे विशोरौए ।

2 धेरतरे नई पन स्वर्गेरि चीजन पुइ ध्यान लाथ ।

3 किजोकि तुस त मरे, ते तुश्शी जिन्दगी मसीह सेइं साथी परमेशेरे मां छपोरूए ।

4 जैखन मसीह जै इश्शी जिन्दगीए, बांदो भोलो, तैखन तुस भी तैस सेइं साथी महिमा साथी बांदे किये गाले ।

5 एल्हेरेलेइ अपने तैन अंगन मैरी देथ, जैना धेरती पुइ आन, मतलब बदमाशी, गन्दगी, बुरे खियाल, बुरी खुवैइश ते लालचे जैन मूरती पूजने बराबरे ।

6 इन केरे वजाई सेइं परमेशेरो क्रोध हुक्म न मन्ने बालन पुइ एइते ।

7 ते तुस भी, जैखन इन बुरैइन मां जिन्दगी बीताते थी, त इन केरे मुताबिक चलते भी थी ।

8 पन हुनी तुस भी इन सेभन मतलब क्रोध, सरक, वैर, तुहीन, गैई देनी इना सब गल्लां शारा ।

9 एक्की होरि सेइं झूठ न जोथ किजोकि तुसेईं पुरानी इन्सानयत तैसेरे कम्मन समेत खोलोरीए ।

10 ते नव्वीं इन्सानयत लोरीए जै अपने बनाने बालेरे रूपेरे मुताबिक ज्ञान हासिल केरनेरे लेइ नव्वी बनातीए ।

11 तैस मां न कोई यूनानी राव, न यहूदी, न बगैर खतने बालो, न जंगली, न स्कूती, न गुलाम न आज्ञाद, सिर्फ मसीह सब किछ ते सेभन मांए ।

12 एल्हेरेलेइ परमेशेरे चुनोरां केरे ज़ेरे ज़ैना पवित्र ते ट्लारेन, बड़ी, ते ढला, ते दीनता, ते नमरता, ते बरदाशत धारण केरा ।

13 ते अगर केन्ची, केन्ची पुड़ दोष लानेरी वजा भोए, त एक्की होरेरी झैल्ला, ते एक्की होरेरे पाप माफ़ केरा, जेन्चरे प्रभुए तुशशे पाप माफ़ केरे, तेन्चरे तुस भी केरा ।

14 इन सेब्बन करां वा प्यारे ज़ै सेब्बन सिद्धतारो पटकोए बंधा ।

15 ते मसीहेरी शान्ति ज़ेसेरे लेइ तुस अक जान भोनेरे लेइ कुजेवरे भी आथ, तुशशे दिलन मां राज़ केरे, ते तुस शुक्र केरते राथ ।

16 मसीहेरे वचन अपने दिलन मां रोड़ेचारे बसने देथ; ते सारे ज्ञाने सेइं एक्की होरि शिखाला, ते नसीहत देथ, ते अपने-अपने मन्न मां अनुग्रहे साथी परमेशेरे लेइ भजन ते स्तुति ते आत्मिक गीत ज़ोते राथ ।

17 ते वचन या कम ज़ैन किछ भी केरा सब प्रभु यीशुएरे नब्बे सेइं, ते तैसेरे ज़िरिये बाजी परमेशेरे शुक्र केरा ।

~~~~~

18 हे कुआन्शव, जेन्चरे प्रभु मां जेइजे, तेन्चरे अपने-अपने मुन्शां केरे अधीन राथ ।

19 हे मुन्शाव, एपनी-एपनी कुआन्शन सेइं प्यार रखा, ते तैन सेइं सखत बर्ताव न केरा ।

20 हे बच्चाव, सेब्बी गल्लन मां अपने-अपने अम्मा बाजी केरो हुक्म मन्ना, किजोकि प्रभु इस सेइं खुश भोते ।

21 हे बच्चन बालव, अपने बच्चन तंग न केरा, एरू न भोए कि तैन केरि हिम्मत न ट्लुटे ।

22 हे सेवकाव, ज़ैना जिसमेरे मुताबिक तुशशे मालिकन, सेब्बी गल्लन मां अपने मालिकां केरो हुक्म मन्ना, मैनन् खुश केरनेरे बालां केरे ज़ेरे हिरानेरे लेइ नई, पन सच्चरे मने सेइं ते परमेशेरे डरे सेइं ।

23 ते ज़ैन किछ तुस केरतथ, तैन मने सेइं केरा, इन समझतां कि मैन्हु केरे लेइ नई पन प्रभुएरे लेइ केरतथ ।

24 किजोकि तुस ज़ानतथ कि तुसन एसेरे बदले प्रभु करां बदले मां मीरास मैल्लनीए, तुस प्रभु यीशु मसीहेरी सेवा केरतथ ।

25 किजोकि ज़ै बुराई केरते, तैस एपनी बुरैइयो फल मैलनोए; तैड़ी केन्चरी तरफदारी नई ।

## 4

1 हे मालिकव, अपने-अपने गुलामन सेइं साथी इन्साफ ते ठीक-ठीक बर्ताव केरा, इन समझतां कि स्वर्गें मां तुशशो भी अक मालिके ।

~~~~~

2 प्रार्थना मां लगगोरो राथ, ते शुक्र सेइं साथी हुशार राथ ।

3 साथी इशशे लेइ भी प्रार्थना केरते राथ, कि परमेशर इशशे लेइ शनानेरे लेइ एरी बत खोल्ले, कि अस मसीहेरे तैस भेदेरे बारे मां ज़ोई बटम ज़ेसेरे लेइ अवं कैदे मां आई ।

4 ते तैस बांदो केरि, जेन्चरे मीं कियो लोडे ।

5 वक्त कीमती समझतां बेइरन साथी समझदैरी सेइं बर्ताव केरा ।

6 तुशशो वचन सदा अनुग्रहे सेइं ते एरो लूनो भोए, कि तुसन हर एक्की मैन्हु रोड़ेचारे जुवाव देनो एज्जे ।

~~~~~

7 ट्लारे ढला ते वफादार सेवक, तुखिकुसे ज़ै प्रभु मां मेरो मदतगार, तै मेरी सेब्बी गल्लन मां तुसन ज़ोलो ।

8 ते मीं एल्हेरेलेइ तुसन कां भेजो, कि तुसन इशशी हालतरो पतो भोए ते तै तुशशे दिलन शान्ति दे ।

9 ते तैस सेइं साथी उनेसिमुस भी भेजो जै वफादार ते दलारो दलाए ते तुसन मरांए, ते तुसन इड़ी तगर सैरी गल्लां ज़ोले ।

10 अरिस्तर्खुस जै मीं सेइं साथी कैदीए, ते मरकुस जै बरनबासेरो दलाए लगते । (जैसेरे बारे मां तुसन हुक्म मैल्लोरो थियो कि अगर ते तुसन कां एज्जे, त तैस सेइं रोड़ेचारे बर्ताव केरथ)

11 ते यीशु जै जो यूस्तुस ज़ोतन, तै तुसन नमस्कार ज़ोते । खतनो केरे लोकन मां सिर्फ ईए परमेशरेरे राज्जे लेइ महतगार ते मेरे शैनतरी वजा राए ।

12 इपफ़रास जै तुसन मरांए, ते मसीह यीशुएरो दासे, तुसन जो नमस्कार ज़ोते ते सदा तुश्शे लेइ प्रार्थना केरते, ताके तुस सिद्ध भोइतां पूरे विश्वासे सेइं साथी परमेशरेरे मेज्जीं पुड़ मज़बूत राथ ।

13 अवं तैसेरो गवाह आई, कि तै तुश्शे लेइ ते लौदीकिया ते हियरापुलिस बालां केरे लेइ बड़ी कोशिश केरतो रहते ।

14 दलारे तबीब लूका ते देमासेरू तुसन नमस्कार ।

15 लौदीकिया नगरेरे दलान ते नुमफास ते तैन केरे घरेरे कलीसियान जो नमस्कार ज़ोथ ।

16 ते ज़ैखन ई चिट्ठी तुश्शे इड़ी पढ़ी गाए, त एरू केरनू कि लौदीकियारे कलीसिया मां भी पढ़ी गाए, ते तै चिट्ठी जै लौदीकियारां एज्जे तैस तुस भी पेइथ ।

17 फिरी अरखिप्पुसे सेइं ज़ोइयथ कि जै सेवा प्रभु मां तीं सोंफी, तैस बड़े हुशैरी सेइं पूरी केरथ ।

18 अवं पौलुस अपने हथ्यन सेइं नमस्कार लिखताई । मेरी शंगलन याद रखा; तुसन पुड़ अनुग्रह भोतो राए । आमीन ।

## 1 धिस्सलुनीकियों

????????

1 अवं पौलुस ई चिट्ठी लिखताई । सिलवानुस ते तीमुथियुस भी मीं सेइं साथी आन, धिस्सलुनीकि नगरेरे कलीसियारे विश्वासी लोकन, जैना बाजी परमेशर ते प्रभु यीशु मसीह मां आन, तैन अनुग्रह ते शान्ति मैलती राए ।

???????????????? ?????????? ?????????? ??????????

2 अस अपने प्रार्थनान मां तुसन याद करतम, ते सदा तुश्शी सेब्भी केरे लेइ परमेशेरू शुक्र करतम ।

3 ते अपने बाजी परमेशेरें सामने तुश्शां कम्मां, जैना तुस विश्वासेरे वजाई सेइं केरतथ, ते बड़ी मेहनतरां कम्मां जैन सेइं पतो चलते तुस होरन सेइं प्यार केरतथ, ते इश्शे प्रभु यीशु मसीहेरे वापस एजनेरे उमीदरे लेइ मुसीबतन मां सबर केरतथ, अस लगातार याद केरतम ।

4 ते हे द्वाव, ते परमेशेरें द्तारें लोकव, अस ज्ञानतम, कि तुस परमेशेरें अपने लोक भोनेरे लेइ चुनोरेंथ ।

5 किजोकि यीशु मसीहेरे बारे मां खुशखबरी तुसन कां न सिर्फ लफसन मां पुजी बल्के पवित्र आत्मारें शक्ति सेइं, ते बडे याकीने सेइं साथी पुजी, जेन्चरे तुस ज्ञानतथ, कि अस तुश्शे लेइ तुसन मां केरहे बनोरें थिये ।

6 ते तुस बडे दुखे मां पवित्र आत्मारें आनन्दे सेइं साथी वचने मेन्तां इश्शे ते प्रभुएरी चाल चलने लाए ।

7 इडी तगर कि मकिदुनिया ते अखाया इलाकां केरे सेब्भी विश्वासी लोकां केरे लेइ तुस अक नमूनो बने ।

8 किजोकि तुश्शे इट्टां न सिर्फ मकिदुनिया ते अखाया इलाकन मां प्रभुएरू वचन शुनावं, पन तुश्शे विश्वासेरी जै परमेशेरें पुइ, हर ठैरी जैडी अस जे चर्चा फेलोरीए, कि असन तुश्शे बारे मां ज़ोनेरी ज़रूरत नई ।

9 किजोकि तैना एप्पू होरन ज़ोतन कि जैखन अस तुसन कां आए त कुन भोवं । तुस मूरतन करां दूर भोइतां परमेशेरें पासे फिरे, ताके ज़ीते ते सन्नचे परमेशेरें सेवा केरथ,

10 ते तैसेरू मट्टरू स्वर्गरां वापस एजने बलगतें राथ, जैन तैने मुडदन मरां ज़ीतो कियूं, मतलब यीशुए, जै असन एजनेवाले परमेशेरें प्रकोपे करां बन्नाते ।

## 2

????????????? ?????????????? ??

1 हे द्वाव, तुस एप्पू ज्ञानतथ कि इश्शू तुसन कां एजनु बेफैइदू न भोवं ।

2 बल्के तुस एप्पू ज्ञानतथ, कि असेई पेइले फिलिपी नगरे मां दुख झल्लने ते मुसीबत झल्लने पुइ भी इश्शे परमेशेरें असन दिलेरी दित्ती, कि अस परमेशेरें खुशखबरी बड़ी खलाफत भोते भी तुसन शुनाम ।

3 किजोकि इश्शी शिक्षा न टपलाने सेइं ते न धोखे सेइं, ते न बुरे मकसदे सेइं आए ।

4 पन जेन्चरे परमेशेरें अस इस काबल बनेइतां असन खुशखबरी सोंफी, अस तेन्चरे बियांन केरतम, ते मैनन् नई, बल्के परमेशेरें खुश केरनेरे लेइ शिक्षा देतम, जै इश्शे मन्न परखते ।

5 तुस ज्ञानतथ, कि असेई कधी चपलूसारी गल्लां नई कियोरी, ते न लालचरे लेइ बहानो केरते थी, परमेशर इस गल्लरो गवाहे ।

6 ते असन मसीहेरे प्रेरित भोनेरे वजाई सेइं तुसन करां महत नेनेरो अधिकार थियो । फिर भी अस मैनन् करां आदर न थिये चाते, ते न तुसन करां, न होरि कोन्ची करां ।

7 पन जेन्चरे अम्मा अपने मट्टां केरि हेरगेश केरतीए, तेन्चरे असेई भी तुसन मां रेइतां नरमी हिराई।

8 ते तेन्चरे अस तुशु लालच करेते, न सिर्फ परमेशेरी खुशखबरी, पन अपने-अपने प्राण भी तुसन देनेरे लेइ तियार थिये, एल्हेरेलेइ तुस इशु बड़े टलारे भोइ जोरे थिये।

9 किजोकि, हे दलाव, तुस इशु मेहनत ते कष्टे याद रखतथ, कि असेई एल्हेरेलेइ रात दिहैड़ी कारोबार केरतां तुसन मां परमेशेरी खुशखबरी प्रचार की, कि तुसन मरां कोन्ची पुड़ भार न भोए।

10 तुस एप्पू गवाह आथ, ते परमेशर भी गवाहे, कि तुसन जैना विश्वास केरतथ, अस केरी पवित्रता, ते धार्मिकता ते बेइलजामे सेइ राए।

11 तुसन पतोए, कि जेन्चरे बाजी अपने बच्चन सेइं बर्ताव केरते, तेन्चरे अस भी तुसन मरां हर केन्ची शिक्षा देते, ते दिलासो देते, ते समझते थिये।

12 कि तुस एरी जिन्दगी जीथ जैस सेइं परमेशर खुश भोए, जै तुसन अपने राज्जे ते महिमा मां कुजाते।

13 अस भी परमेशेरू शुकर लगातार केरतम, कि जैखन इशु जिरिये परमेशेरी खुशखबरी तुसन कां पुजी जै असेई प्रचार की, त तुसेई तै मैन्हु केरि नई, बल्के परमेशेरू वचन सेमझतां (ते सच्चे इन परमेशेरू वचन आए) कबूल की, ते तै वचन तुसन मां जैना मसीह पुड़ विश्वास केरतथ कम केरते।

14 एल्हेरेलेइ तुस, हे दलाव, परमेशेरी तैन कलीसियां केरि जेरि चाल चलने लाए, जैना यहूदिया मां यीशु मसीह मां आन, किजोकि तुसन भी अपने लोकन करां एरो दुःख मैल्लो, जेन्चरे तैन यहूदन करां मैल्लोरो थियो।

15 जैनेई प्रभु यीशु ते नबी भी मारे, ते अस सताए, ते परमेशर तैन सेइं खुश नई, ते तैना सेन्ची मैन्हु केरि खलाफत केरतन।

16 ते तैना गैर कौमन सेइं तैन केरे मुक्तेरे लेइ गल्लां केरने लेइ असन रोकतन। तैना पापे पुड़ पाप केरतन ज्ञांतगर परमेशर तैन सजा न दे, ते हुनी परमेशेरे तैन पक्को सजा देनेबालोए।

**XXXXXXXXXX XXXXXXXXXXXXXXXXXXXXXXX**

17 हे दलाव, जैखन अस थोड़े चिरेरे लेइ मने मां नई बल्के बांटे मां तुसन करां अलग भोरे थी, ते असेई बड़े लालचे सेइं तुसन हेरनेरी बड़ी जादे कोशिश की।

18 एल्हेरेलेइ (मतलब मीं पौलुसे) एक्की बार नई बल्के बार-बार तुसन कां एजनू चाव, पन शैतान अस तुसन कां एजनेरे लेइ रोके।

19 भला इशु उमीद, या आनन्द, या बड़ीयैयूरू ताज कौन आए? इन तुस भोले जैखन प्रभु यीशु वापस एज्जेलो

20 इशु बड़याई ते आनन्द तुस आथ।

### 3

**XXXXXXXXXX XXXXXXX**

1 एल्हेरेलेइ जैखन असेई जादे न बेलगी वट्ट त असेई इन ठहराव कि अस एथेस नगरे मां अकैल्ले रेइ गाम।

2 ते असेई तीमुथियुस जै मसीहेरे खुशखबरी मां इशु दलाए, ते परमेशेरो सेवके, एल्हेरेलेइ तुसन कां भेजो, कि ते तुसन विश्वासे मां मजबूत केरे ते तुशु हिम्मत बधाए।

3 कि कोई इन दुखां केरे वजाई सेइं न घबराए, किजोकि तुस एप्पू रोड़े चारे ज्ञानतथ परमेशेरे फैसलो कियोरोए, कि अस सताए गानेम।

4 किजोकि पेइले भी, जैखन अस तुसन कां थिये, त तुसन सेइं ज़ोते थी, कि अस सताए गानेम, ते तुस ज्ञानतथ एरू भोवं भी।



5 एल्हरेलेइ ज़ैखन मीं करां होरू न बेलगोव, त तुशुशे विश्वासेरो हाल ज़ान्नेरे लेइ तीमुथियुस भेजो, किजोकि अवं डरों थियो कि एरू न भोए, कि अज़माने बाले (शैताने) तुस अज़माए त न, कि इशुशी मेहनत बेकार त न भोइ ।

~~~~~

6 पन तीमुथियुसे ज़ै तुसन करां इशुशे इडी अव, ते तुशुशे विश्वासेरे ते प्यारेरे बारे मां खुशखबरी शुनाई। ते ई गल भी शुनाई, कि तुस सदा प्यारे सेइं असन याद केरतथ, ते असन हेरनेरी इच्छा रखतथ, जेन्चरे अस भी तुसन हेरनेरी इच्छा रखतम।

7 एल्हरेलेइ हे ढलाव, अपनि सारी तंगी, ते मुसीबतन मां तुशुशे विश्वासे सेइं असन शान्ति मैल्ली।

8 तुशुशो प्रभु पुड़ मजबूत विश्वासे इशुशे लेइ अक नव्वें ज़िन्दगरे साँसेरो ज़ेरोए।

9 ते ज़ेरो आनन्द असन तुशुशे वजाई सेइं अपने परमेशेरे सामने, तैसेरे बदले मां अस कोस तरीके सेइं परमेशेरू शुकर केरम!

10 अस रात दिहाडी बडी प्रार्थना केरते रातम, कि तुसन सेइं दुबारां मिलम, ते तुशुशी मद्दत केरम कि तुस होरि जादे मजबूती सेइं प्रभु यीशु पुड़ विश्वास केरथ।

11 ते अस प्रार्थना केरतम कि इशुशो बाजी परमेशर ते इशुशे प्रभु यीशु, बत खोल्ले कि अस तुसन कां एज्जी बटम।

12 ते प्रभु एरू केरे, कि जेन्चरे अस तुसन सेइं प्यार केरतम; तेन्चरे तुशुशो प्यार एप्पू मामेइं, ते सेब्भी मैनन् सेइं बधे, ते तरक्की केरतो राए।

13 ताके तै तुशुशे मन्न मजबूत केरे, कि ज़ैखन इशुशो प्रभु यीशु अपने सब पवित्तर लोकन सेइं साथी एज्जे, त तै इशुशे बाजी परमेशेरे सामने तुशुशे मन्न पवित्तरता मां बेइलजाम ठहरालो।

4

~~~~~

1 आखर, हे ढलाव अस तुसन कां विनती केरतम, ते तुसन प्रभु यीशु मां समझातम, कि जेन्चरे तुसेईं इशुशो ज़ेरो चाल च़लन रख्खो, ते परमेशर खुश केरनो शिखरोए, ते जेन्चरे तुस च़लतथ भी, तेन्चरे तुस अग्रोवं बद्धते राथ।

2 किजोकि तुस ज़ानतथ, कि इना हदायतां असन प्रभु यीशु करां मैलोरिन।

3 परमेशर चाते, कि तुस पवित्तर बना, मतलब बदमाशी केरने करां बच़ोरे राथ।

4 ते तुसन मरां हर केन्चे ज़ानेरू लोडे कि केन्चरां अपने कुआन्शी सेइं पवित्तरता ते आदरी सेइं ज़िन्दगी ज़ीयोरी लोडे।

5 ते इन कम खुवैइशी सेइं नई, ते न गैर कौमां केरे ज़ेरे, ज़ैना परमेशेरे न पिशानन।

6 कि इस गल्लती मां कोई अपने विश्वासी ढलाए न ठगे, ते न तैस पुड़ हकोमत च़लाए; किजोकि प्रभु इन सब गल्लां केरि सज़ा देलो, जेन्चरे कि असेईं पेइलू तुसन सेइं ज़ोरू थियूं, ते खबरदारी भी दित्तारी थी।

7 किजोकि परमेशेरे अस अशुद्ध ज़िन्दगी ज़ीनेरे लेइ नई, पन पवित्तर ज़िन्दगी ज़ीनेरे लेइ कुजवरेम।

8 एल्हरेलेइ ज़ै कोई इना हदायतां केरो इन्कार केरते, तै मैन्हु केरो नई, पन परमेशेरो इन्कार केरते, ज़ै अपनो पवित्तर आत्मा तुसन देते।

~~~~~

9 पन विश्वासी भाईच़ारेरे प्यारेरे बारे मां तुसन किछ लिखनेरी ज़रूरत नई, एप्पू मामेइं प्यार रखनो तुसेईं परमेशेरे करां एप्पू शिखरोए।

10 ते सारे मकिदूनिया इलाकेरे सेब्भी ढलान सेइं साथी एरू केरतथ भी, पन हे ढलाव, अस तुसन कां छन्दे केरतम कि होरे भी बद्धते गाथ।

11 ते जेन्चरे असेई तुसन हुक्म दित्तो, तेन्चरे तुस होरन सेइं लडाई न केरा, ते अपनू कम केरा त कने अपने लेइ कमाई केरा ।

12 ते एन्चरां तैना भी तुशशी आदर केरेले जैना विश्वासी नई, ते तुसन कोन्ची चीजारा घाटो न भोलो ।

????????????????

13 हे दूलाव, अस न चातम, कि तुस तैन केरे बारे मां अनजान राथ जैना विश्वासी मरैन अनजान राथ, एरू न भोए, कि तुस होरि केरे जेरे शोग केरथ, जैन मरनेरां पत्ती उमीद नई ।

14 किजोकि अगर अस विश्वास केरतम, कि यीशु मरो, ते ज्रींतो भोव, त तेन्चरे परमेशर तैन भी जैना यीशु पुइ विश्वास केरतां मरे, परमेशर तैन भी यीशु सेइं साथी वापस आनेलो ।

15 किजोकि अस प्रभु यीशुएरे वचनेरे मुताबिक तुसन सेइं इन ज्रोतम, कि अस जैना ज्रींतेम, ते प्रभुएरे वापस एजने तगर बच्चारे रामेले, त जैना विश्वासी मरैरिन पेइले तैस सेइं मिलमेले, फिरी अस मिलमेले ।

16 किजोकि प्रभु यीशु एप्पू स्वर्गोरां एज्जेलो; ते ज़ोर सेइं हुक्म देलो, तैस वक्ते प्रधान दूतेरी आवाज शुनोली, ते परमेशरी महिमारो नइशिनगो बजो गालो, ते जैना मसीह पुइ विश्वास केरनेबाले मां मरैन, तैना पेइले ज्रींते भोनेन ।

17 तैखन अस जैना ज्रींते बच्चारे रहमेले, ते तैन सेइं साथी बिदलारी पुइ नियो गानेम, कि अम्बरे मां प्रभु सेइं मिलमेले, ते तेइसेरां बाद अस सदा प्रभु सेइं साथी रानेम ।

18 एल्हेरेलेइ इन्ने गल्लन सेइं एक्की होरि तस्सली देते राथ ।

5

????????????????

1 हे दूलाव ते वेइनव, इसेरी ज़रूरत नई, कि वक्तन ते कालां केरे बारे जेइस प्रभु यीशु वापस एज्जेलो तुसन किछु लिखू गाए ।

2 किजोकि तुस एप्पू रोइ चारे ज्ञानतथ, ते जेन्चरे चोर राती एइते, तेन्चरे प्रभुएरू दुबारां एजनु भोल् ।

3 जैखन लोक ज़ोले, “कि शान्तिए, ते कोई डर नई,” त तैन पुइ अकदम विनाश एजनोए, जेन्चरे दोज्रींती पुइ तकलीफ; ते तैना तैस मुसीबती करां न बच्चेले ।

4 पन हे दूलाव ते वेइनव, तुस त (आत्मिक) आंधरे मां नई, कि तै दिहाड़ी पुसन पुइ चोरेरी ज़ेरि एज्जे ।

5 किजोकि तुस सब लोअरे बच्चे आथ, ते दीसारे बच्चे आथ, अस न रातेरम, न आंधारेरम ।

6 एल्हेरेलेइ अस होरि केरे जेरे झुलोरे न रहम, पन बीझे रहम ते हुशार रहम ।

7 किजोकि जैना झुलोरे रातन, तैना राती झूलतन, ते जैना नशे मां रातन, तैना राती नशे मां भोतन ।

8 पन अस त दीसेरम, विश्वास ते प्यार लेइतां कि इशशी हिफाजत भोए जेन्चरे झिलम सिपाहेरी हिफाजत केरतीए, ते मुक्तेरे उमीद लेइतां जेन्चरे सिपाही टोप लाते, खबरदार रहम ।

9 किजोकि परमेशर अस सज़ारे ते क्रोधेरे लेइ नई, पन एल्हेरेलेइ चुनोरेम कि अस अपने प्रभु यीशु मसीहेरे ज़िरिये सेइं मुक्ति हासिल केरम ।

10 यीशु मसीह इशशे लेइ एल्हेरेलेइ मरो, कि अस चाए बीझे भोम, या झुलोरे भोम, सब मिलतां तैस सेइं साथी जीम ।

11 एल्हेरेलेइ एक्की होरि हिम्मत देथ, ते एक्की होरेरी तरक्की भोनेरी ज़िरियो बना, लगातार, तुस एरू केरतथ भी ।

????????????????

12 ते ढलाव, अस तुसन सेइं बिनती केरतम, कि ज़ैना तुशुशे लेइ बडी मेहनत केरतन, ते प्रभु मां तुशुशी अगवाईं केरनेबाले आम, ते ज़ैना तुसन सलाह देतन, तैन केरि आदर केरा।

13 ते ज़ैना कम्मां तैनेईं तुशुशे लेइ कियां तैन केरे वजाईं सेइं तैन केरि आदर ते तैन सेइं बडो प्यार केरा, ते एप्पू मांमेइं मेल मालपे सेइं राथ।

14 हे ढलाव ते वेइनव, अस तुसन कां मिनत केरतम, कि ज़ैना आलसी आन, तैन खबरदार केरा, ज़ैन केरि हिम्मत घटे तैन हिम्मत देथ, तैन केरि मदद केरा ज़ैना (आत्मिकता) मां कमज़ोरन, सेब्भी केरे लेइ बरदाशत केरनू हिराथ।

15 इस गल्लारू ध्यान रखवा, कि कोई कोन्वी सेइं बुरीयीयैरे बदले बुराईं न केरे, पन सदा भलाई केरनेरे लेइ तियार राथ, एप्पू मांमेइं ते सेब्भन सेइं भी भलाई केरनेरी कोशिश केरा।

16 सदा खुश राथ।

17 लगातार प्रार्थना केरते राथ।

18 हर हाले मां शुक्र केरा, किजोकि तुशुशे लेइ मसीह यीशु मां परमेशेरी ईए मर्जीए।

19 पवित्र आत्माके कम्पन ज़ैना लोकां केरे ज़िन्दगी मां भोतन तैन न रोका।

20 भविष्यवैनी केरो इन्कार न केरा।

21 सब गल्लां परखा, ज़ैना रोड़ी भोन तैन अपनाथ।

22 सेब्भी किसमेरी बुरैईं करां बच्चोरे राथ।

~~~~~

23 शान्ति देनेबालो परमेशेरे एप्पू तुसन पूरे तरीके सेइं पवित्र केरे; ते तुशुशी आत्मा ते प्राण ते जिसम इशुशे प्रभु यीशु मसीहेरे दुबारां एजने तगर पूरे, ते वेइलज़ाम ते सुरक्षित रान।

24 तुशुशो कुजाने बालो वफादारे, तै एरू केरेलो।

25 हे ढलाव, इशुशे लेइ प्रार्थना केरा।

26 सेब्भी विश्वासी ढलान मसीहेरे प्यारे सेइं नमस्कार केरा।

27 अवं तुसन प्रभुएरी कसम देताईं, कि ई चिट्ठी सेब्भी विश्वासी ढलान पेढतां शुनाईं गाए।

28 इशुशे प्रभु यीशु मसीहेरो अनुग्रह तुसन पुइं भोतो राए।

## 2 थिस्सलुनीकियों

???????

1 अवं पौलुस ई चिट्ठी लिखने लोरोईं। सिलवानुस ते तीमुथियुस भी मीं सेइं साथी आन। थिस्सलुनीकि नगरेरे कलीसियारे विश्वासी लोकन, जैना बाजी परमेशर ते प्रभु यीशु मसीह मां आन,

2 अस प्रार्थना केरतम कि इशु बाजी परमेशर ते प्रभु यीशु मसीह तुसन अनुग्रह ते शान्ति दे।

????????? ??????

3 हे दूलाव ते बेइनव, तुशु बारे मां असेईं हर वक्त परमेशेरू शुक्र कियेरू लोडे, ते इन इशु लेइ ठीक भी आए। एल्हेरेलेइ कि तुशु यीशु मसीह पुइ विश्वास बडो बद्धतो गाते, त कने तुशु एक्की होरि सेइं प्यार केरनो भी बडो बद्धने लोरोए।

4 ई वजा आए, कि अस एप्पू परमेशेरें कलीसियान मां, तुशु बारे मां घमण्ड केरतम, चाए तुसन पुइ मुसीबत या दुःख भी एज्जन, फिरी भी तुस सबरी सेइं झैलतथ, ते तुस यीशु मसीह पुइ विश्वास केरते रातथ।

5 परमेशर अपनो इन्साफ हिरानेरे लेइ ई स्ताव इस्तेमाल केरेलो, कि तुस परमेशेरें राज्जरे काबल भोथ, जेसेरे लेइ तुस दुःख भी झैलतथ।

6 परमेशर हमेशा ठीक तरीके सेइं इन्साफे केरते, कि जैना तुसन दुःख देतन, तैन बदले मां दुःख दे।

7 तुस जैना दुःख झैलतथ, परमेशर तुसन आराम देलो ते असन भी। इन तेइस भोलू जेइस प्रभु यीशु अपने शेक्तिबाले स्वर्गदूतन सेइं साथी बेलति अगारे लप्पी सेइं साथी स्वर्गोरा एज्जेलो।

8 ते जैना लोक परमेशरे न पिशानन् त कने इशु प्रभु यीशुएरे खुशखेबरी न मन्न, तैन तै सजा देलो।

9 तैना प्रभुए करां हमेशारे लेइ अलग भोले, ते तैसेरे महान शेक्तेर हिस्सेदार न भोले। तै तैन हमेशारी सजा देइतां नाश केरेलो।

10 इना गल्लां तेइस भोली जेइस यीशु अपने लोकन करां आदर हासिल केरनेरे लेइ वापस एज्जेलो, ते जैना लोक तैस पुइ विश्वास केरतन तैना हैरान भोले। तुस भी तैन्ने लोकन मरां भोले, किजोकि जै सन्देश असेईं तैसेरे बारे मां तुसन शुनव तुसेईं तैस पुइ विश्वास कियो।

11 एल्हेरेलेइ अस लगातार तुशु लेइ प्रार्थना भी केरतम, कि परमेशर तुसन इस काबल बनाए, जेरि जिन्दगी ज़िनेरे लेइ तुस कुजवरे तेन्चरे तुस ज़ीथ। ते तै तुसन अपने शेक्ति सेइं इस काबल बनालो कि तुस जैना रोडू केरथ ते जैन तुस केरनू चाथ, ते जैन कम तुस अपने विश्वासे सेइं केरतथ पूरू केरथ।

12 एन्चरे इशु प्रभु यीशु मसीहरे नंवेरी तुशु ज़िरिये बडीयाई भोली। ते तैसेरे ज़िरिये तुसन आदर मैलेली। इन सब किछ इशु परमेशर त कने प्रभु यीशु मसीहरे अनुग्रहे सेइं भोलू।

## 2

?????? ???? ???? ?????????? ??

1 हे दूलाव ते बेइनव, असन कां प्रभु यीशु मसीहरे वापस एजनेरे बारे मां ज़ोनेरे लेइ किछ आए। ते वक्त एज्जेलो जेइस अस तैस सेइं साथी मिलमैले।

2 इन सोचतां तुस परेशान न भोथ या तुशु दिल न घबराए कि प्रभुएरी दिहाड़ी पेइली ओरिए। किछ ज़ोई बटतन कि इन भविष्यवाणी मां या सन्देशे मां या चिट्ठी मां तैन कां ओरू थियू।

3 लोक ज़ैना इस बारे मां झूठी गल्लां ज़ोतन तैन पुड़ विश्वास न केरा। किजोकि यीशु मसीहेरे वापस एजनेरे पेइले, तै वक्त एज्जेलो ज़ेइस बड़े लोक परमेशेरेरे खलाफ भोले, ते फिरी अधर्मी मैन्हु बांदो भोलो। तै, तै आए ज़ै नाश भोनेरे लेइ ठहरावरोए।

4 तै अधर्मी मैन्हु परमेशेरी खलाफत केरेलो, ते तैन सब किछ् ज़ैन लोक देबते सेमझतां आराधना केरतन, तै इन ज़ोलो ई अवं इन सेबन करां महान आई। इड़ी तगर कि तै परमेशेरे मन्देरे मां विश्तां अपनो आपे जो परमेशर ज़ोलो।

5 इन न विसरा, कि मीं बड़े बार इन गल्लां केरे बारे मां ज़ोरूए, ज़ैखन अवं तुसन सेइं साथी थियो।

6 हुन्ना तै अधर्मी मैन्हु बांदो नई भोरो किजोकि कोई आए ज़ैने तै रोकरोए, कि तै अपने वक्ते पुड़ बांदो भोए।

7 किजोकि अधर्मी चीज़ां केरि शक्ति इस दुनियाई मां पेइली छेपतां कम केरने लोरीए, पन अक आए ज़ै तैस रोकते। ते तै तैस रोकतो रालो ज़ां तगर तै दूर न कियो गाए।

8 तेदटां बाद तै दुष्ट मैन्हु एज्जेलो, पन बादे मां ज़ैखन प्रभु यीशु एज्जेलो, त तैस दुष्ट मैन्हु अपने ऐशेरे फुकी सेइं ते एजनेरी महिमाई सेइं मारेलो।

9 ते दुष्ट मैन्हु, शैतानेरे शक्ति सेइं एज्जेलो। तै हर किसमेरे झूठे चमत्कार ते निशान, ते बडां-बडां कम्मां केरेलो, ताके लोक सोचन कि तै परमेशेरे ज़ै एन केरते।

10 ते तै हर किसमेरां बुरां कम्मां केरेलो, ते तैन धोखो देलो ज़ैना परमेशेरे नाश केरनेन। किजोकि तैनेई तैस सच्चे पुड़ विश्वास केरने करां इन्कार कियो, ज़ैस सेइं तैन मुक्ति मैल्लेथी।

11 एल्हेरेलेइ परमेशर तैन मां अक धोखो देनेवाली आत्मा भेजेलो ज़ै तैन सच्चे करां दूर केरेली, ताके तैना झूठे पुड़ विश्वास केरन ज़ैन तै दुष्ट मैन्हु तैन सेइं ज़ोलो।

12 परमेशर तैन सेबमी लोकन सज़ा देलो ज़ैनेई यीशु मसीहेरे सच्चे सन्देशे पुड़ विश्वास न कियो, पन पाप केरने सेइं खुश भोए।

### ~~~~~

13 हे दलाव ते बेइनव, असेईं तुश्शे लेइ परमेशेरू शुकर कियोरू लोड़े। किजोकि परमेशर तुसन सेइं प्यार केरते, तैने तुस दुनिया बनाने करां पेइले चुने, कि पवित्तर आत्मारे पवित्तर बनाते, ते यीशु मसीहेरे बारे मां ज़ै सच्चे सन्देशे तैस पुड़ विश्वास केरतां परमेशर तुसन मुक्ति दे।

14 ज़ै खुशखबरी असेईं प्रचार की परमेशेरे तै इस्तेमाल की, कि तुसन बच्चानेरे लेइ कुजाए, तुस इश्शे प्रभु यीशु मसीहेरी महिमाई मां शामिल भोथ।

15 एल्हेरेलेइ, दलाव ते बेइनव, ज़ै शिक्षा असेईं तुसन दिती, ज़ैखन असेईं तुसन सेइं गल्लां की त कने चिट्ठी केरे ज़िरिये, तैस पुड़ तुस लगातार विश्वास केरते राथ।

16 अस प्रार्थना केरतम इश्शो प्रभु यीशु मसीह एप्पू, ते इश्शो बाजी परमेशर ज़ैने असन सेइं प्यार कियो, ते ज़ैने अपने अनुग्रहे सेइं असन हमेशारो होसलो ते पक्की उमीद दिती,

17 तैना तुसन होसलो देन, ते तुसन मज़बूत केरन ताके तुस लगातार भलाई केरथ ते ज़ैन ज़ोथ तैन रोड़ भोए।

## 3

### ~~~~~

1 आखरी मां हे दलाव ते बेइनव, इश्शे लेइ प्रार्थना केरते राथ, कि अस प्रभु यीशुएरू वचन होरि भी बड़े टैरन शुनेईं बटम, ते ज़ैना शुन्न त तैना तेन्नेरे मनन ज़ेन्नेरे तुसेईं मन्नु।

2 ते ई भी प्रार्थना केरा कि परमेशर असन बुरे ते दुष्ट लोकां केरे ज़िरिये नुकसान पुज़ाने करां बच्चेइतां रख्वे, किजोकि बड़े लोक ज़ैनेईं प्रभु यीशुएरी खुशखबरी शुनी, ते तैनेईं इस पुड़ विश्वास न कियो।

3 पन तुस प्रभु पुइ पूरो भरोसो केरि बटतथ, तैए तुसन मजबूत केरेलो, ते दुष्टे करां यानी शैताने करां बचालो, ताके तै तुसन कोई नुकसान न पुज्जेई बटे ।

4 ते असन प्रभु मां तुसन पुइ भरोसोए, कि जैन किछ्छ् असेई तुसन केरनेरे लेइ ज़ोरुए, तुस तेन्त्रे केरते ओरेथ ते एजनेबाले वक्ते मां केरते राले ।

5 अस प्रार्थना केरतम, कि प्रभु यीशु मसीह तुसन इन समझनेरे काबल बनाए कि परमेशर तुस सेइ केतरो प्यार केरते, ते बरदाश केरा ज़ेन्त्रे मसीहे बरदाश कियूं ।

*ⓂⓂⓂⓂⓂⓂⓂⓂⓂⓂⓂⓂⓂⓂⓂⓂⓂⓂ*

6 हे द्दलाव ते बेइनव, अस प्रभु यीशु मसीहेरे दित्तोरे अधिकार सेइ तुसन ई हुक्म देतम, कि तुसन मरां हर कोई एरे द्दलान ते बेइनन सेइ साथ न रखवे, ज़ैना आलसी आन त कने ज़ै शिक्षा असेई तुसन दित्ती तैस न मन्न ।

7 किजाकि तुस एप्पू रोडे च़ारे ज़ानतथ, कि तुसेई तेन्त्रे ज़िन्दगी ज़ीयोरी लोडे ज़ेन्त्रे असेई ज़ी, ज़ैखन अस तुसन सेइ साथी थिये, अस आलसी न थिये पन कम केरते थिये ।

8 असेई कोन्चेरी रोट्टी मुफ्त न खाइ, पन अस मेहनत ते कष्टे सेइ रात दिहैड़ी कारोबार केरते थिये, कि अस अपने ज़रूरतां केरे लेइ तुसन पुइ निर्भर न भोम ।

9 असेई बड़ी मेहनत की, एल्हेरेलेइ नई कि असन अधिकार नई, कि तुसन हुक्म देम कि तुस इश्शी ज़रूरतां पूरी केरा । पन एल्हेरेलेइ कि असेई अपनो आप तुश्शे लेइ मिसाल बनाई ताके तुस इश्शे ज़ेरि ज़िन्दगी ज़ीथ ।

10 ज़ैखन अस तुसन सेइ साथी थिये तैखन असेई तुसन हुक्म दित्तोरो थियो, कि अगर कोई कम केरने करां इन्कार केरे त तैस रोट्टी भी न देथ ।

11 इश्शे शुन्ने मां ओरु आए कि तुसन मां बड़े लोक एरे आन ज़ैना आलसी ज़िन्दगी ज़ीतन । तैना एप्पू कम न केरन, पन होरि केरे कम्मन मां दखल देतन ।

12 एरे लोकन अस प्रभु यीशु मसीहेरे दित्तोरे अधिकारे सेइ हुक्म देतम ते समझातम, कि चुपचाप कम केरतां अपनि ज़िन्दगी ज़ीनेरे लेइ कमाई केरन ।

13 ते तुस, द्दलाव ते बेइनव, भलाई केरने मां हिम्मत न हारा ।

14 अगर कोई इश्शी इस चिट्ठेरे सन्देशे न मन्ने, त सेन्भी केरे सामने तैसेरी पिशान केरा, ते तैस सेइ साथ न रखवा, ताके तै छिथोए;

15 फ़िरी भी तैस सेइ दुश्मनेरो ज़ेरो बर्ताव न केरा, पन तैस सेइ विश्वासी सैथेरो ज़ेरो बर्ताव केरतां तैस खबरदार केरा, कि ज़ेरु तैने कियूं तैन न केरे ।

*ⓂⓂⓂⓂⓂⓂⓂⓂⓂⓂⓂⓂⓂⓂⓂⓂⓂⓂ*

16 हुनी अवं प्रार्थना केरताई प्रभु ज़ै शान्ति देनेबालोए, तुसन हर वक्त हर किसमे सेइ शान्ति देतो राए, ते प्रभु लगातार तुसन सेन्भन सेइ साथी भोए ।

17 अवं पौलुस अपने हथ्थे सेइ नमस्कार लिखताई, इन मेरु सबूते, अवं चिट्ठी केरे आखरी मां एन्त्रे लिखताई, ताके हर एक्की पतो च़ले कि ई चिट्ठी मेरे तरफ़ आए ।

18 इश्शे प्रभु यीशु मसीहेरो अनुग्रह तुसन सेन्भन पुइ भोतो राए ।

## 1 तीमुथियुस

1 अवं पौलुस ई चिट्ठी लिखने लोरोई। अवं इशशे मुक्ति देनेवाले परमेशरे ते यीशु मसीहेरे अधिकारे सेइं प्रेरित आईं, जैस पुड़ इशशी उमीदे।

2 अवं ई चिट्ठी तीमुथियुसे जो लिखने लोरोई। हे तीमुथियुस तू मेरे मट्ठे जेरू आस, किजोकि जेन्चरे अवं विश्वास करताई तेन्चरे तू भी विश्वास केरतस। अवं प्रार्थना करताई इशशे बाजी परमेशर ते परभु यीशु मसीह तीं अनुग्रह, दया त कने शान्ति देतो राए।

~~~~~

3-4 हे तीमुथियुस जेन्चरे तू ज्ञानतस, इफिसुस नगरे मां किछ एरे लोक आन जैना गलत शिक्षा देतन। तैना लगातार झूठी कहैनी शिखालतन ते पूर्वजां केरे नव्यां केरे बारे मां शिखालतन। जैखन अवं इफिसुस नगरेरां मकिदुनिया इलाके जो गानेरे लेइ तियार थियो, त मीं तीं जेरू थियूं कि इफिसुस नगरे मां रा ते तैन जो, कि एरी जेरि शिक्षा न देतन, जैखन तैना एरी जेरि शिक्षा देतन त लोक तैन केरे बारे मां बेंस केरतन। नितीजो ई आए, जैन कम परमेशरे दित्तोरूए, शिखालनेवाले तैन नई लौ केरने जैन सिर्फ परमेशरे पुड़ रेखतां भोइ सकते।

5 मेरो हुक्म देनेरो मकसद ई आए, कि तुस एक्की होरि सेइं साफ दिले ते रोड़े ज़मीरे, ते सच्चे विश्वासे सेइं प्यार केरा।

6 झूठी शिक्षा देनेवालेईं इन सैरी गल्लां केरनि बंद की ते सिर्फ बेकार बेंस केरतन।

7 ते शास्त्री बन्नु चातन, पन जैना गल्लां तैना होरन शिखालतन ते जैन केरो दावो केरतन तैन एप्पू भी न समझन।

8 अस ज्ञानतम, कि अगर लोक मूसेरे कानूने सही तरीके सेइं शिखालन त तैन रोड़ आए।

9 तुस ज्ञानतम मूसेरो कानून धर्मी मैनेरे लेइ नई। पन तैन केरे लेइ आए, जैना परमेशरेरे कानूनेरो इन्कार केरन ते तैस न मनन, ते जैना परमेशरेरी आराधना न केरन ते जैना लगातार पाप केरतन, ते जैना अशुद्ध आन, ते परमेशरेरी आदर न केरन, ते जैना अपने अम्मा बाजी ते होरि केरे कातलिन।

10 ते कने बदमाशी केरनेवालां, मड़द मड़दन सेइं जिसमानी रिशतो रखनेवालां, नौकर बेचवालां, झूठ जोने वालां, ते झूठी कसम खाने वालां, ते इन केरे अलावा रोड़ी शिक्षारी खलाफ कम केरनेवालां केरे लेइ आए।

11 ई शिक्षा महान परमेशरेरी महिमारे खुशखेबारे मुताबिके, ई परमेशरे मीं होरन शुनानेरे लेइ दित्तोरिए।

~~~~~

12 अवं अपने परभु मसीह यीशुएरू शुक्र करताई जैन मीं शक्ति दित्ती, तैन अवं वफादार समझतां मीं अपनि सेवा दित्ती।

13 विश्वासी बन्ने करां पेड़लो अवं यीशुएरे बारे मां तुहीन केरनेवालो ते विश्वासी लोकन सताने वालो, ते तैन नुकसान पुजाने वालो थियो। पन परमेशरे मीं पुड़ अपनि दया हिराई, किजोकि मीं हेजू यीशु पुड़ विश्वास न थियो कियोरो ते अवं न थियो ज्ञानतो कि कुन लोरोई केरने।

14 ते इशशे परभुए अपनो बड़ो अनुग्रह लगातार हिराव। ते तैनी विश्वास ते प्यार दित्तो, किजोकि अवं तैस सेइं साथी अक भोरो थियो।

15 ई गल सच्चे, ते हर किसमे सेइं मन्ने कावल, कि मसीह यीशु असन पापी लोकन मुक्ति देने इस दुनियाईं मां अव, जैन मरां सेबना जादे पापी अवं आईं।

16 पन परमेशरे मीं पुड़ दया की, एन तेने एल्हेरेलेइ कियूं, कि मेरे ज़िरिये, जैन मैने होरन करां जादे बुराई की, यीशु मसीह तैस पुड़ अपनि पूरी बरदाशत हिरईं बंटे, चाए मीं जैन भी कियोरू थियूं। तैन एन कियूं ताके बादे मां होरे लोक विश्वास केरन ते हमेशारी ज़िन्दगी हासिल केरन।

17 हुनी हमेशारो राज्ञो, जै सदा ज़ीतोए ते आलाए महान परमेशेरी आदर, ते महिमा सदा भोती राए। आमीन।

18 हे मट्टां तीमूधियुस, अवं इन्ना हदायतां देने लोरोई: अवं तीं तैना गल्लां याद कराताई ज़ैना बीतोरे वक्ते मां नेबेई तीं ज़ोरी थी। तू तैन गल्लां केरो इस्तेमाल हथियारां केरो ज़ेरो तैन केरे खलाफ लड़नेरे लेइ केर, ज़ैना झूठी शिक्षा देतन।

19 तू मसीह पुड़ लगातार विश्वास केर ते अपनो ज़मीर भी साफ रख। किछु लोकेई अपने साफ ज़मीररो इन्कार कियोरोए तेसेरो नितीजो ई भोव कि तैनेई यीशु पुड़ विश्वास केरनो शारो।

20 तेन्ने मां हुमिनयुस ते सिकन्दरे, ज़ैना मीं शैतानेरी शेक्ति मां देइतां तैन सज़ा दित्तोरीए, एस सेइं तैना इन शिखले कि परमेशेरी तुहीन केरनि बंद केरन।

## 2

???????? ???? ???

1 हुनी अवं सेब्बन करां बेद्धतां इन ज़ोताई, कि विनती, ते प्रार्थनां, ते दरखुवासां, सेब्बी मैन्हु केरे लेइ की गान।

2 राजां ते सेब्बी उच्चे पदे वालां केरा लेइ प्रार्थना केरा, ताके तैना असन सुखे ते बगैर खतरे सेइं जीने देन ते अस परमेशेरी आराधना केरि बटतम ते होरि लोकन सेइं रोड़ो बर्ताव केरि बटम।

3 इन इश्शे मुक्ति देनेवाले परमेशेरो रोड़ू लगगते ते पसंद एइते।

4 तै इन चाते, कि सेब्बी मैनन् मुक्ति मैल्ले; ते तैना सच्चरे ज्ञाने ज्ञानन।

5 किजोकि सिर्फ अक्के परमेशेरे, ते अक मैन्हु आए ज़ै परमेशेरे ते लोकां केरो बिचवाई कराने वालो, ते तै मैन्हु यीशु मसीह आए।

6 सेब्बी लोकन पाप ते मौतरी शेक्ति करां छुटकारो देनेरे लेइ मसीहे अपनो आप बलिदान कियो। तेसेरे मौतरे ज़िरिये परमेशेरे ठीक वक्ते पुड़ सबूत दित्तु कि तै सेब्बी लोकन बचानो चाते।

7 ई वजा आए, परमेशेरे अवं खुशखबरी प्रचार केरनेवालो ते परेरित भोनेरे लेइ चुनो। तैने अवं गैर कौमन विश्वासेरो सच्चो सन्देश शिखालनेरे लेइ चुनो। अवं झूठ नई लोरो ज़ोने बलके सच्च ज़ोने लोरोई।

8 अवं चाताई, कि हर ठैरी सभान मां मइद परमेशेरे लेइ समर्पित हथ खड़े केरतां बगैर सरकां ते बगैर बेंसी सेइं प्रार्थना केरन।

9 तेन्चरे मसीही कुआन्शां भी इज्जतदार लिगड़ां लेइतां, ते अपनो आप रोड़ेचरे सजेइतां, न कि अलग-अलग किसमे सेइं दोग बनाने, ते सोन्ने, ते मोती, ते कीमती लिगड़न सेइं।

10 बलके इसेरे बदले तैनेई होरि केरे लेइ रोड़ां कम्मां केरतां अपनो आप खूबसूत लोड़े बनावरो, किजोकि परमेशेरी भक्ति केरनेबैली कुआन्शन इन शोभा देते।

11 ज़ैखन होरे लोक विश्वासी लोकन शिखालन ते सेब्बी कुआन्शेई चुपचाप ते आदरी सेइं शुन्तां शिखोरू लोड़े।

12 अवं अज़ाज़त न देई कि कुआन्शां मइदन शिखालन ते तैन पुड़ अधिकार रखन। ज़ैखन तुस आराधना केरनेरे लेइ अकोट्टे भोथ ते कुआन्शेई चुप लोड़े रावरू।

13 अवं इन एल्हेरेलेइ ज़ोताई किजोकि परमेशेरे पेइली आदम बनाव, तेसेरे पत्ती हव्वा बनाई।

14 होरि वजा ई आए कि कुआन्शां सप्ये करां धोखो खाव न कि आदमे, एन्चरां हव्वा परमेशेरो हुक्म टलोड़ो।

15 फिरी भी कुआन्श बच्चे ज़रमने सेइं परमेशेरे करां मुक्ति हासिल केरेली, अगर मसीह पुड़ लगातार विश्वास केरती राए, ते होरि लोकन सेइं प्यार केरती राए, ते शुद्ध ते कने रोड़े तरीके सेइं बर्ताव केरे।



## 3

~~~~~

1 ई गल सच्चै, कि जै कलीसियाई मां अगवो भोनो चाते, त तै आदरारे पदेरी इच्छा रखते ।

2 ते इन जरूरीए कि अगवो बेइलजाम भोए, ते तैसेरी अक कुआन्शा लोडे, ते तै अपने आपे पुड़ कबू केरनेवालो, समझदैरी सेइं जीनेवालो भोए, इज्जतदार भोए, ते टलाहना केरि आदर केरनेरे लेइ तियार रानेवालो भोए, ते होरि लोकन परमेशेरो सन्देश रोडे चारे शिखालनेरे काबल भोए ।

3 तै शराबी या मार-पीट केरनेवालो न लोडे, बल्के दया केरनेवालो लोडे, ते लड़ाई न केरनेवालो लोडे ते पेइसां केरे लालची न भोए ।

4 तै अपने घरेरो रोडे चारे चलानेवालो ते बन्दो बसत केरनेवालो लोडे, ते तैनी अपने बच्चन शिखालोरू लोडे कि तैना हर गल्ली मां इज्जती सेइं तैसेरी मनन ।

5 जैखन अगर कोई अपने घरेरो बन्दो बसत करनी न जानतो भोए, त तै परमेशेरी कलीसियारी हेरगेश केन्चरे केरेलो?

6 ते नब्बो विश्वासी न लोडे, एरू न भोए अभिमान केरे ते तैस शैतानेरी जेरि तैस सजा मैल्ले ।

7 ते जैना लोक विश्वासी नईं तैनेईं भी तैसेरे बारे मां इन जरूरो लोडे कि ए रोडो मैन्हु आए । ताके एरू न भोए कि तै घटिया भोए ते शैतानेरे जाले मां फसे ।

~~~~~

8 तेन्चरे सेवक भी तेरहे लोडन जैन केरि लोक आदर केरन । ईमानदार लोडन, ते पीने वाले न भोन, ते एरे मैन्हु न भोन जैना पेइसां केरे लेइ किछ भी केरि बटतन ।

9 पन तैन केरे जमीर साफ लोडन ते जै शिक्षा परमेशेरे बांदी कियोरीए, तैस पुड़ लगातार विश्वास केरनेवाले लोडन ।

10 जैखन कलीसियोरे सेवक चुने गान त पेइलू तैन केरू चालचलन परखू गाए, कि तैन मां रोडे गुण आन, ते केन्ची तैन मां कोई गलती न लेइहोए, त फिरी सेवकेरू कम केरन ।

11 एन्चरे कलीसियाई मां सेवा केरनेवालां केरि कुआन्शां भी आदरारे काबल भोन, होरन बदनाम केरनेवैली न लोडन, पन शांत सुभावे बैली, ते सेब्भी गल्लन मां ईमानदार भोन ।

12 कलीसियोरे सेवक अपने कुआन्शेरे लेइ वफादार लोडे, ते बच्चां ते अपने घरेरे सारे लोकां केरो रोडो चारे हेरगेश केरनेवालो लोडे ।

13 किजोकि जैना सेवकेरू कम रोडे चारे केरतन, तैना लोकां केरि नजरी मां इज्जतदार भोतन । ते तैना अपने तैस विश्वासेरे बारे मां जै यीशु मसीहे पुडे बडे दिलेरी सेइं ज़ोतन ।

~~~~~

14 अवं तीं कां जल्दी एजनेरी उमीद रखने पुड़ भी इना गल्लां एल्हेरेलेइ लिखताई ।

15 अगर मीं एजने मां चिर लगे, त तू जानस, कि लोकेईं परमेशेरेरे टब्बरेरे होरि लोकन सेइं केन्चरे बर्ताव कियोरो लोडे । इन टब्बर तैना लोकन सेइं बनोरू, जैना यीशु पुड़ विश्वास केरतन ते जीते परमेशेरेरे कलीसियारेन । इना विश्वासी सच्चै शिक्षाई मजबूती सेइं मन्तन ते सम्भालतन जेन्चरे बुनीयाद ते खम्मबे इमारती सम्भालतन ते मजबूत केरते ।

16 ते इस मां शक नईं, अस पूरे याकीन सेइं ज़ोईं बटतम, जैना शिक्षां परमेशेरे बैदी की एना विलकुल सच्चै आन, मतलब,

मसीह मैनेरे रूपे मां बांदो भोव,

पवित्र आत्मा तै हर कम्मे मां धर्मी ठहराव,

स्वर्गदूतेईं तै लाव,

लोकेईं तैसेरे बारे मां कौमन मां प्रचार कियो,

सारे दुनियाईं मरां लोकेईं तैस पुड़ विश्वास कियो,

परमेशेरे ते उबरे स्वर्गे जो नीयो ।

4

ॐॐॐॐ ॐॐॐॐॐॐ ॐॐॐॐॐॐॐॐ

1 पन पवित् आत्मा साफ ज़ोते, कि आखरी वक्ते मां किछ् लोक मसीही शिक्षाई पुड़ विश्वास केरनो बन्द करेले। तैना दुष्ट आत्मान कबूल करेले, तैना तेन बुरी बत्ती ब्रलैली, त कने तैना लोक दुष्ट आत्मां केरि झूठी शिक्षाई पुड़ विश्वास करेले।

2 इन तैना झूठे पाखंडी लोक आन, ज़ैना इन झूठी शिक्षान शिखालतन, तैन केरो ज़मीर ज़ै रोडे ते बुरे मां फैसलो केरते मर्रां आए ते ज़ेन्चरे तात्ते लोहे सेइं तै फुकोरोए।

3 एरे लोक इन शिखालतन कि इला नई बनानो ते खानेरी किछ् चीज़ां न लोडन खेवरी, पन परमेशरे इन खानेरी चीज़ां विश्वासी लोकां केरे खानेरे लेइ बनोरिन ज़ैना सच्चरी शिक्षा ज्ञानतन कि प्रार्थना केरतां खावरू लोडे।

4 किजोकि परमेशेरी बनेवरी हर चीज़ रोडीए। अस परमेशेरू शुक्र केरतां सब किछ् खेइ बटतम।

5 किजोकि परमेशेरे वचने, ते प्रार्थनाई सेइं शुद्ध भोते।

ॐॐॐॐ ॐॐॐॐॐॐ ॐॐॐ ॐॐॐॐ

6 अगर तू दलान ते बेइनन लगातार इन्ना गल्लां याद करातो रालो, ज़ैन केरि हदायत मीं तीं दित्तोरीए त कने विश्वासेरे सन्देशे ते तैस रोडी शिक्षाई सेइं ज़ैस मां तू मज़बूत बनावरोस ज़ै तू मन्तो ओरोस। त तू यीशु मसीहेरो रोडो सेवक भोलो।

7 पन बनेवरी कहैनी ते बेकार कहैनी केरे वजाई सेइं वक्त बरबाद न केर ज़ैन सेइं परमेशेरी आदर न भोए। पन तू लगातर परमेशेरी आदर केरनेवाली ज़िन्दगी ज़ीनी शिखाल।

8 किजोकि जिसमानी वर्जिशी सेइं जानी फैइदो भोते, पन भेक्तेरे लेइ तियारी बडी रोडीए किजोकि इस वक्तेरी ते एजनेवाले वक्तेरी ज़िन्दगरो फैइदो इस्से मां आए ज़ेसेरो वादो परमेशेरे कियोरोए।

9 ते ई गल सच्च, ते हर तरीके सेइं मन्नेरे काबल।

10 किजोकि अस मेहनत ते कोशिश एल्हेरेलेइ केरतम, किजोकि इश्शी उमीद तैस ज़ीते परमेशेरे पुड़े। ज़ै सेभी लोकां केरो, ते खास केरतां विश्वास केरनेवालन मुक्ति देनेवालोए।

11 विश्वासी लोकन इना गल्लां शिखाल ते तैन ई हुक्म दे कि तैना इन मनन।

12 तू एन्चरे बर्ताव केर कि कोई भी तेरी अनादर न केरे किजोकि तू जवान आस। पन तू विश्वासी लोकां केरे लेइ इन सैरी गल्लन मां अक मिसाल बन, गलबाती मां, होरन सेइं बर्ताव केरने मां, ते होरन सेइं प्यार केरने मां, ते यीशु मसीह पुड़ विश्वास केरने मां, ते बेइलजाम ज़िन्दगी ज़ीने मां ताके लोक भी एन्चरां केरन।

13 ज़ांतगर अवं न एज्जी, तांतगर ज़ैखन विश्वासी लोक अकोट्टे भोतन ज़ोरे सेइं पढ़ने मां, ते तैन केरो होसलो बद्धा ते पवित् रशास्तेरो मतलब शिखाल।

14 इस गल्ली याद रख ज़ैखन बुजुर्गां केरे एककी टोलां तीं पुड़ हथ रखोरे थिये, परमेशेरे तैन अक सन्देश दित्तो कि तैस वरदानेरे बार मां जोन ज़ै तैने तीं दित्तोरी। तैस वरदानेरे नज़र अनदाज़ न केर।

15 तैन गल्लन सोचतो रा, ते तैन मां अपनू ध्यान लेइतां रख, एन्चरे हर कोई हेरी बटेलो कि तू विश्वासे मां बद्धने लोरोस।

16 इस गल्लरू ध्यान रख कि तू केन्चरे जीतस ते केन्चरे शिखालतस। इसेरो नितीजो ई भोलो कि परमेशेरे इन्साफे मां तेरे ज़िरिये तीं ते तेरे शुन्नेवालन बचालो।

5

ॐॐॐॐॐॐ ॐॐॐॐ ॐॐॐ ॐॐ ॐॐॐॐॐॐॐॐ

1 बुढे मैन्हु न झिड़क पन तैस एन्चरे आदरी सेइं सल्लाह दे ज़ेन्चरे अपने बाजी, एप्पू करां निकडे मैन्हु एन्चरे सल्लाह दे ज़ेन्चरे अपने निकडे दूलाए।

2 बुढी कुआन्शन सेइं एन्चरे बर्ताव केर जेन्चरे अम्मा सेइं, ते जवान कुआन्शन सेइं एन्चरे बर्ताव केर जेन्चरे अपने बेइनी सेइं। इन साफ दिले सेइं केर।

3 तैन विधवां केरि आदर केरा, जैन केरो कोई हेरगेश केरनेबालो नई तैन केरू ध्यान रखवा।

4 ते अगर कोन्वी विधवांरां मट्टां या पोट्लडां या धियोडां भोन, ते तैन पेइलू अपने घरेरे लोकां केरू ध्यान रेखतां परमेशेरी भक्ति केरनि शिखोरी लोड़े। ते तैना एन केरतां अपने अम्मा-वाजी ते दादा देदी केरू हक देन, किजोकि इन परमेशेरे पसंद एइते।

5 जै विधवा आए ते तैसेरो ध्यान रखनेबालो कोई नई, तै परमेशेरे पुइ उमीद रखतीए, ते रात दिहैडी बिनती ते प्रार्थनाई मां परमेशेरे करां महत मगतीए।

6 पन जैना विधवां अपने सारो वक्त एशे मां बितैतिन तैना जिसमानी रूपे सेइं त ज़ीतिन पन आत्मिक रूपे सेइं मेरनि।

7 इन गल्लां केरो भी हुक्म दे कि तैना बेइलजाम रान।

8 पन अगर कोई अपने रिशतेदारां केरि ते खास केरतां अपने घरानेरू ध्यान न रखवे, ते तै विश्वासे करां मुकरोरोए, ते जै विश्वास न केरे तैस करां बुरो बनोरोए।

9 तेस्से विधवारू नवं लिखू गाए, जै शट सालन करां घट न भोए, ते अपने मुन्शे सेइं वफादार रावरी भोए।

10 ते होरे लोक तैसेरे बारे मां ज़ानते भोन कि तैसां हमेशा रोडां कम्मां कियोरन। जेन्चरे कि, तैसां बच्चे रोड़े च़ारे पाले, ते तैना विश्वासी लोक अपने घरे मां आने, जैना सफ़रे मां थिये, जेन्चरे होरि लोकां केरि सेवा कियोरी भोए, ते तैन लोकां केरि महत कियोरी भोए जैना मुसीबती मां थिये, ते जैसां हर किसमेरां रोडां कम्मां कियोरां भोन।

11 पन जवान विधवां करां नंब्वां न लिख, किजोकि जैखन तैन केरि जिसमानी इच्छा तैस वादे करां शेक्ति वाली भोती, जै तैनेई विधवा रेइतां मसीहेरी सेवा केरनेरे लेइ कियोरोए, त तैना इला बनानो चैतिन।

12 दुबारां इला केरतां तैना दोषी भोतिन, किजोकि तैनेई अपने पेइलो वादो बरकरार नई रखोरो।

13 एन्चरे तैना घरे-घरे फिरतां आलसी भोनु शिखतिन, ते सिर्फ आलसी नई, पन होरि केरे खलाफ गल्लां केरतिन, ते होरि केरे कम्पन मां दखल देतिन, ते तैना गल्लां ज़ोतिन जैना न लोडन ज़ोरी।

14 एल्हेरेलेइ अवं इन चाताई, कि जवान विधवां इला बनान; ते तैन बच्चे भोन ते घरवार सुमालन, ते दुश्मन्न बदनाम केरनेरो मौको न देन।

15 किजोकि किछ जवान विधवां कुआन्शेई परमेशेरे करां दूर भोइतां शैताने पत्ती चलनू शुरु कियोरू।

16 अगर कोन्वी विश्वास केरनेबालेरी टब्बरे मां विधवां भोन, त तैए तैन केरि महत केरे न तैन केरि जिमेवारी कलीसियाई पुइ भोए। तैखन कलीसिया तैस विधवारी महत केरि बटते ज़ेसेरो कोई न भोए।

17 जै बुजुर्ग रोड़े च़ारे कम केरते तै आदर हासिल केरनेरे ते बराबर तनखाएरे काबले, खास केरतां तैना जैना परमेशेरे वचन शुनाने, ते शिखालने मां बडी मेहनत केरतन।

18 किजोकि पवित्रशास्त्र मां इन लिखोरूए, “कि तू जोट्लोरे दांतेरू आशी न बेन्धाँ,” किजोकि, “मज़दूर अपने मज़दूरां हकदारो।”

19 कोई दोष कोन्वी बुजुर्गे लव गाए, त ज़ांतगर दई या जादे लोक न ज़ोन कि असेई ए पाप केरतो लावरोए, तांतगर न शुन।

20 जैना लोक पाप केरतन तैन सेम्बी विश्वासी लोकां केरे सामने झिड़क, ताके होरे विश्वासी लोक भी डरन।

21 परमेशर ते मसीह यीशु, ते चुनोरे स्वर्गदूत हाज़र सेमझतां अवं तीं हादयत देताई, ध्यान राए कि तू केन्चेरो इन्साफ जल्दी न केरस, ते कोन्चेरी तरफदारी न केर।

22 कलीसियारो बुजुर्ग चुनेरे बारे मां जल्दी कधे नई करेनि । ते होरि केरे पापन मां शामिल न भो, अपनो आप पवित्तर बनोरो रख ।

23 अग्रोवं जो पानी न पी, पन अपने पेटेरे ते अपने बार-बार बिमार भोनेरे लेइ थोड़ो-थोड़ो दाछारो रस भी कम्मे मां आन ।

24 अवं ज़ोताई कि जल्दी बुजुर्ग नई चुन्ने, किजोकि किछ् लोक खुले आम पाप केरतन, इन्साफे करां पेइले भी तैना विश्वासी लोकां केरे सामने दोषी आन । हांलाकि होरि लोकां केरे पाप बादे न भोन पन बादे मां पिशाने गातन ।

25 एन्चरे ज़ैखन लोक रोड़ां कम्मां केरतन, त तैन होरि विश्वासी केरे ज़िरिये हेरू गाते । अगर तैना तैन एक्की बारे साफ च़ारे लेई बटन, आखर तैना तैन पिशानेले ।

6

1 ज़ैना विश्वासी लोक गुलाम आन, तैनेई हर तरीके सेइं अपने मालिकां केरि आदर कियोरी लोडे ताके होरे लोक परमेशेरी ते इश्शे शिक्षारी तुहीन न केरन ।

2 ते ज़ैना मालिक विश्वासी भोन, त तैन केरू मसीह पुड़ विश्वास केरनेरे वजाई सेइं तैन केरि बराबर इज़्जत की गाए, बल्के तैन केरे लेइ होरू भी जादे कम कियोरू लोडे । किजोकि इस सेइं फैइदो नेनेवाले विश्वासी आन ते तैना गुलाम तैन सेइं प्यार केरतन, इन गल्लां केरि शिक्षा दे ते इन होसलो दे कि तैना इन सब केरन ।

~~~~~

3 किछ् लोक इश्शे शिक्षारी खलाफत केरि बटतन, पन इना यीशु मसीहेरी रोड़ी शिक्षां आन । इना शिक्षां भेक्तरी ज़िन्दगी बद्धेतिन ।

4 ज़ै कोई अलग शिक्षालते ते अभिमानी ते ते किछ् न समझे । एरे ज़ेरे मैन्हु गैर ज़रूरी मुद्दां ते लफसां केरो मतलब ज़ान्नेरे लेइ होरन सेइं बेंस ते तर्क केरतन । ज़ैन केरो नितीजो जलन, ते लड़ाई ते तुहीनरी गल्लां, ते बुरी-बुरी शक,

5 ते मैन्न मां बेफैइदी लडैई पैदा भोतिन, ते ज़ैन केरे मन बुरे शक्की सेइं भेरोरेन, ते तैना लगातार होरन सेइं बेंस केरतन, ते तैना सेझी न बटथ कि सन्न कुने, तैना समझतन परमेशेरे बारे मां शिक्षा देनी कमाई केरनेरो ज़िरियोए ।

6 पन इश्शे इन लेइ इन रोड़ कि अस तैन केरम ज़ैस सेइं परमेशर खुश भोए ते ज़ैन परमेशर असन देते तैस सेइं अस राज़ी भोम ।

7 ते न असेईं दुनियाई मां किछ् आनोरू, ते न किछ् नेही बटम ।

8 ते अगर असन कां किछ् खाने पीने ते लाने जो भोए, ते इस्से मां खुश रहम ।

9 पन ज़ै धनी भोनो चाए, तैना इन सब पाप केरतां बडे आसान तरीके सेइं धोखो खातन, ज़ेन्चरे जानवर ज़ाले मां फसतन तेन्चरे तैना फसतन । तैना इन केरनू चातन ज़ैन तैन केरे लेइ वेवकूफी ते खतरोए, ते एरी इच्छां तैन बरबाद ते नाश केरनेरे पासे नेतिन ।

10 किजोकि पेइसां केरू लालच सेब्भी किसमेरे बुरेइअरू वजाए, किछ् लोकेईं बले-बले मसीह पुड़ विश्वास केरनो शारो किजोकि तैना धनी भोनू चाते थिये, ते तैनेई तैस मैनेरो ज़ेरो बडे तरीकन सेइं दुःख झैल्लो ज़ै अपने आपे कोन्वी हथियारे सेइं ज़खमी केरते ।

~~~~~

11 पन हे तीमूथियुस, तू परमेशेरो मैनुस, तीं इन गल्लां न लोइन कियोरी, सिर्फ ज़ैन ठीके तैन केरनेरे लेइ हर किसमे सेइं कोशिश केर । एरी ज़िन्दगी ज़ी ज़ैस सेइं परमेशेरी आदर भोती, मसीह पुड़ भरोसो केर, होरि लोकन सेइं प्यार केर, मुश्किल वक्ते मां हिम्मत रख, ते होरि लोकन सेइं नेरमी सेइं बर्ताव केर ।

12 ज़ेन्चरे अक रोड़ा सिपाई जंगी मां लडैई मां हार न मन्ने, तेन्चरे तू भी परमेशेरे पुड़ भरोसो रखने मां ते तैसेरी गल मन्ने मां हार न मन्न । ते तैस हमेशारी ज़िन्दगी मज़बूती सेइं ठेमतां रख,

जेसेरे लेइ तू परमेशेरे कुजावरोस, ते जेसेरे बारे मां तीं बडे लोकां केरे सामने दिलेरी सेइं ज़ोरू थियूं कि तू मसीह पुड़ विश्वास केरतस।

13 अवं तीं परमेशेरे सामने ज़ै सेब्बन ज़िन्दगी देते, ते मसीह यीशुएरे सामने ज़ोताईं, ज़ैने पुन्तियुस पिलातुसेरे सामने रोड़ी गवाही दिती, ई हुक्म देताईं।

14 ज़ैन किछ् परमेशेरे तीं केरनेरे लेइ हुक्म दित्तोरो तैन सब किछ् पूरू केर, ताके यीशु मसीह ज़ांतगर वापस न एज्जे तीं पुड़ कोई दोष न लेई बटे तू कुन गलत केरने लोरोस।

15 सिर्फ परमेशेर तै राज़ोए ज़ै बड़यैयरे काबले, तै महान राज़ो ते महान परभुए, तैए मसीहे सही वक्ते पुड़ बांदो केरेलो।

16 सिर्फ तैए हमेशा ज़ींतो रहते, ते तै तैस महिमा बैली लोई मां रहते ज़ैस कां कोई न एज्जी बटे। तैसेरी आदर ते शक्ति हमेशा राली। आमीन।

17 इस दुनियारे दौलतमंदन हुक्म दे, कि तैना घमण्डी न भोन ते चंचल धने पुड़ उमीद न रखन, पन परमेशेरे पुड़ ज़ै इशशे मुखेरे लेइ बड़ हछ्छ् देते।

18 ते तैन ज़ो कि तैना अपने पेइंसे रोड़े कम्मां केरे लेइ इस्तेमाल केरन ते भलाई केरने मां दौलतमंदन बनन ते हमेशा तियार रान होरन खुल्ले दिले सेइं देनेरे लेइ ज़ो।

19 एन्त्रे केरने सेइं तैना अपना रोड़ां कम्मां खज़ानेरे ज़ेरे जमा केरेले, ज़ैना तैन केरे लेइ एजनेबाले वक्ते स्वर्गे मां मज़बूत मुनीयादरां ज़ेरां भोलां। ते तैना तै सच्ची ज़िन्दगी हासिल केरेले ज़ै हमेशेरे लेइ आए।

20 हे तीमथियुस इस गल्ली पुड़ ध्यान दे कि ज़ैन परमेशेरे तीं केरनेरे लेइ दित्तोरूए तैन्ने केर। दुष्ट ते बेकार गल्लन करां ते तैन शिक्षान करां बेचता रा, ज़ैना परमेशेरी सच्ची शिक्षां केरि खलाफत केरतन, तैस तैना ज्ञान ज़ोतन पन तैन गलते।

21 किछ् लोकेईं इन झूठ ज्ञान कबूल कियोरूए, एन्त्रे केरनेरे सेइं तैनेईं मसीहेरे सच्ची शिक्षान पुड़ विश्वास केरनो शारो। परमेशेरो अनुग्रह तुसन सेब्बन पुड़ भोतो राए।

2 तीमुथियुस

??????

1 अवं पौलुस ई चिट्ठी लिखने लोरोई । परमेशरे अवं यीशु मसीहेरो प्रेरित भोनेरे लेइ चुनो, ताके अवं इस सन्देशेरो प्रचार करि कि परमेशरे यीशु मसीह पुड़ विश्वास केरनेरे जिरिये वादो कियो कि हमेशारी जिनंदगी देलो ।

2 अवं ई चिट्ठी तीमुथियुसे लिखने लोरोई, जैन मेरे मट्ठेरू जेरूए, हे तीमुथियुस अवं प्रार्थना केरताई बाजी परमेशर ते इशे प्रभु यीशु मसीह तीं अनुग्रह ते दया ते शान्ति देतो राए ।

??????

3 जैस परमेशेरी सेवा अवं अपने दादे पड़दादां केरे रीति पुड़ शुद्ध जमीरे सेइं केरताई, तैसेरू शुक्र भोए, कि अवं अपनी प्रार्थनान मां तीं रात दिहैड़ी याद रखताई ।

4 मीं यादे जैखन अस अलग भोने लोरे थिये तैखन तू केन्नेरे लेरां देने लोरो थियो, ते तीं सेइं मिलनेरी बड़ी इच्छा रखताई कि जैखन मिली त अवं आनन्दे सेइं भरी गेइ ।

5 ते अवं तेरे अम्मा यूनीके ते तेरी नानी लोइसेरो ते सच्चे विश्वास याद केरताई । तेरो विश्वास भी तेरो आए, ते मीं याकीने तीं मां भी आए ।

6 एल्हेरेलेइ अवं तीं याद कराताई, कि तू परमेशेरे तैस वरदाने जैन मेरे हथ रखने सेइं तीं मैल्लेरू थियूं चमका ।

7 किजोकि परमेशर अस डरपोक नई बनावरे बल्के तैसेरो आत्मा इशे दिलन मजबूत केरते, ते मद्दत केरते कि अस होरि लोकन सेइं प्यार केरम ते ताके आपे कैबू मां रखम ।

8 एल्हेरेलेइ होरि लोकन प्रभु यीशुएरे वारे मां जोने करां शरमा ते एल्हेरेलेइ शरमा कि अवं प्रभुएरी सेवा केरनेरे लेइ कैदे मां आई । बल्के तू परमेशेरे तैस शक्ति इस्तेमाल केर ते मीं सेइं साथी खुशखबरारे लेइ दुःख झलने मां शामिल भो ।

9 परमेशरे असन मुक्ति दिती, ते अस पवित्र जिनंदगी जीनेरे लेइ कुजाए, तैने अस एल्हेरेलेइ नई कुजवरे कि असेई रोड़ां कम्मां कियो, किजोकि दुनिया बनाने करां पेइलो परमेशेरो ई मकसद थियो कि तै यीशु मसीह इशे लेइ इस दुनिया मां भेजतां असन पुड़ अनुग्रह हिराए ।

10 पन हुनी इशे मुक्ति देनेवाले यीशु मसीह ओरोए ते तैनी अपनो अनुग्रह हिरावरोए । तैने मौतरी शक्ति नाश की, तैने असन खुशखबरारे जिरिये हमेशारे जिनंदगी बत हिराई ।

11 इस खुशखबरारे लेइ परमेशरे अवं प्रचारक ते प्रेरित ते शिक्षा देनेवालो चुनो ।

12 एल्हेरेलेइ अवं कैदखाने मां दुःख भी झैल्लने लोरोई, पन शरमेई न, किजोकि अवं मसीहे जानताई जैस पुड़ मीं विश्वास कियोरोए, ते मीं याकीने, कि जैन मसीहे दितोरू ज्ञांतगर ते वापस न एज्जे तांतगर ते तैसेरी रखवाली केरि बटते ।

13 जैना रोड़ी शिक्षां तीं मीं करां शुनोरिन तैन तू मिसालरे रूपे मां रख, इन तू विश्वासे ते प्यारे सेइं साथी केर, किजोकि तू मसीह यीशु सेइं साथी अक भोरोस ।

14 ते तैस सच्चेरी रखवाली केर, जैन पवित्र आत्मा रे जिरिये सेइं तीं सोंफेरू, जै असन मां रहते ।

15 तू ज्ञानतस, कि आसिया इलाकेरे बड़े विश्वासी लोक जैनेई अवं शारोरोई, जैन मां फूगिलुस ते हिरमुगिनेसे भी अवं शारो ।

16 उनसिफुरूसेरे घराने पुड़ प्रभु दया केरे, किजोकि तै बड़े बार मीं कां अव ते मीं होसलो दितो, ते मीं सेइं कैदखाने मां एजनेरे लेइ न शरमाव ।

17 पन जैखन तै रोम नगरे मां अव, त बड़े कोशिश सेइं तोपतां मीं सेइं मुलाकात केरि ।

18 परभु इन्साफेरे दिहाड़े अपनि महान दया अनेसिफुरूसे पुड़ हिराए। तू एप्पू रोड़े चारे ज्ञानतस कि इफिसुस नगरे मां तैनी मेरी केतरी मद्दत की।

2

???? ??????? ????????????? ???????

1 एल्हेरेलेइ हे मेरे मट्टां तीमुथियुस, तू अपने आपे मजबूत केर इन जैनतां कि परमेशेरी ती अनुग्रह दित्तोरो, जै सिर्फ यीशु मसीह सेई अक भोइतां मैलते।

2 ती बड़े लोकां केरे सामने जै मसीहरे सन्देशी शिक्षा मीं करां शुनोरिन। एल्हेरेलेइ अवं चाताई कि तैए सन्देश तू होरि विश्वासी लोकन शिक्षाल, जैना वफादार भोन ते होरन शिक्षालनेरे काबल भोन।

3 बिलकुल तेन्चरे जेन्चरे अक सिपाही जंगरे मैदाने मुश्किल हालातन मां सबरी सेई झैल्लते, तेन्चरे तू भी मुश्किल हालातन मां सबरी सेई दुःख झैल्ल जेन्चरे अस यीशु मसीहरे लेइ झैल्लतम।

4 अक सिपाही जैखन फौजी मां नौकरी केरते त तै होरि किसमेरू कम न केरे, किजोकि तै अपने भरती केरनेबाले खुश केरनू चाते।

5 फिरी आखाड़े मां घुल्लने बालो अगर कानूनेरे मुताबिक न घुल्ले त तैस ताज न मैल्ले।

6 जै जमीनदार मेहनत केरते, फसलरे पेइले हिस्सेरो हकदार तैए भोते।

7 जैन अवं ज़ोताई, तैस पुड़ ध्यान दे, ते परभु तीं सेब्भी गल्लां केरि समझ देलो।

8 लगातार याद रख कि यीशु मसीह कौने, तै दाऊदेरे खानदेनी मरां आए, ते परमेशेरी तै मुडदन मरां ज़ीतो कियो ते ईए खुशखबरी अवं लोकन शुनाताई।

9 अवं खुशखबरी शुनाताई एल्हेरेलेइ अवं मुजरामेरो ज़ेरो दुःख झैल्लताई, इड़ी तगर कि कैदे मां आई, पन कोई भी लोकन परमेशेरीरू वचन प्रचार केरने करां न रोकी बटे।

10 एल्हेरेलेइ अवं तैन लोकां केरे फेइदेरे लेइ दुःख झल्लताई जैना परमेशेरी चुनोरिन, ताके तैना भी यीशु मसीह पुड़ विश्वास केरतां मुक्ति हासिल केरन ते हमेशारी महिमा हासिल केरन।

11 ई गल सच्चे, कि

अगर अस तैस सेई साथी मरे त तैस साथी ज़ीते भी भोमेले।

12 अगर अस तैसेरे वजाई सेई दुःख झैल्लते रहले, त तैस सेई साथी राजां केरू जेरू अस भी राज केरमेले,

अगर अस तैसेरो इन्कार केरमेले कि अस तैस न ज्ञानम, त तै भी इश्शो इन्कार केरेलो।

13 अगर अस मसीह सेई साथी वफादार न भोम, त तै फिरी भी वफादार बनोरो रालो,

किजोकि तै अपने स्भावेरे खलाफ न गेइ बटे।

???? ???????

14 जैना गल्लां मीं तीं सेई ज़ोरिन तैन तू अपने लोकन बिसरने न दे, ते परभुए गवाह रेखतां तैन खबरदार केर, कि लफसन पुड़ बैस न केरन, जैस सेई किच्छ फेइदो न भोए, बल्के शुन्ने बालां केरो बड़ो नुकसान भोते।

15 बड़ी मेहनत केर ताके तू परमेशेरीरे सामने कबूल भोनेरे काबल भोस, तू एरे मैनेरो ज़ेरो भोनेरी कोशिश केर जै अपने कम्मे सेई वजाई सेई शरमिनदा न भोए, ते जै सच्चो सन्देश ठीक तरीके सेई शिक्षालतो भोए।

16 पन बेकार ते बेवकूफ गल्लन करां दूर राए, किजोकि एरी गल्लां परमेशेरी करां दूर केरतिन।

17 ते तैन केरि गल्लां मैनेरे शड़ोरे जखेमेरी ज़ेरि फैलतां लोकां केरे विश्वासे नाश केरतिन। ते हुमिनयुस ते फिलेतुस तैन केरे ज़ेरे आन।

18 तैनई सच्च पुड़ विश्वास केरनो बंद कियो। तैना ज़ोतन परमेशेरी पेइले मरे विश्वासी लोक हमेशेरी जिन्दगरे लेइ ज़ीते कियोरेन। एसेरो नितीजो ई भोते कि किच्छ लोक मसीहरी शिक्षाई पुड़ विश्वास केरनो बंद केरतन।

19 परमेशेरे लोक पक्की मुनीयादारे जेरे आन जै हिल्ले न। इस मुनीयादी पुड़ एरे लफस लिखोरन: “परभु ज्ञानते तैसेरे लोक कौन आन, ते इन भी कि जैना प्रभुएरी आराधना केरतन तैनेई बुरां कर्मां केरनां बंद कियोरां लोडन।”

20 एककी अमीर घरे मां किछु सोन्नेरे ते चैदरां भांडां भोतन ते लेकडारां ते मितरां भोतन। माघां भांडां खास मौके पुड़ इस्तेमाल केरनेरे लेइ भोतन ते सस्तां रोज इस्तेमाल केरनेरे लेइ भोतन।

21 तेन्चरे विश्वासी लोक जैना अपनो आप एन सैरी बुरी चीजन करां अलग केरे त तै कीमती भांडेरो जेरो भोलो जैन खास मौके पुड़ इस्तेमाल कियू गाते, जेसेरी जिनदगी पवित्तर भोली त तै अपने मालिकेरे इस्तेमाल भोनेरे काबल भोलो।

22 जवैनीर खुवैइशन करां दूर रा, ते जैना मैन्हु शुद्ध मने सेइं प्रभुएरू नवं घिन्तन, तैन सेइं साथी धार्मिकता, प्यार, ते मेल मलापेरो पीछो केर।

23 अवं फिरी ज़ोताई तू अपनो आप बेवकूफी, ते बेफैइदी गल्लन करां दूर रा, किजोकि तू ज्ञानतस, कि तैन सेइं लड़ाई भोतिन।

24 ते परमेशेरो दास लड़ाको न लोडे, पन सेबन दया केरनेवालो ते परमेशेरे वचनेरी रोडे चारे शिखा देनेवालो, ते जैना लोक तैसेरे खलाफ भोन तैन सेइं सबर केरनेवालो लोडे।

25 ते जैना लोक तैसेरी खलाफत केरन तैन बडे नेरमी सेइं शिखालेनेवालो लोडे, भोइ सकते परमेशर तैन लोकां केरि मद्दत केरे कि तैना मन फिरान, ते मसीहेरी सच्च्चाई पिशानन

26 ते एरे लोक दुबारां फिरी साफ तरीके सेइं सोचनेरे काबल भोले ते शैतानेरे धोखे करां जै ज़ालेरे जेरोए बचले। शैताने तैना फासवरे थिये कि जैन तै चाते तैना तैन करां कराए।

3

~~~~~

1 ध्यान दे अवं हुन्ना कुन ज़ोने लोरोई, कि दुनियारे आखरी दिहाइन मां बुरो वक्त एज्जोए।

2 किजोकि लोक सिर्फ अपने आपे सेइं प्यार केरेले, दौलतरे लालची, बडकां मारनेवाले, अभिमानी, होरन बेइज्ज केरनेवाले, अम्मा-बैपू केरू ज़ोन्नू न शुन्ने वाले, होरि केरू शुकर न केरनेवाले, अपवित्तर,

3 होरन सेइं प्यार न केरनेवाले, माफ न केरनेवाले, दोष लाने वाले, अपनि इच्छान पुड़ कैबू न केरनेवाले, सखत, सच्च्चे सेइं नफरत केरनेवाले।

4 धोखो देनेवाले, दीठ, ते अभिमानी ते परमेशेरे नई बल्के एशेरे चानेवाले भोले

5 तैना भेक्तरू रूप त बनाले पन तैस शक्ति न मन्नेले जै तैन भक्त बनाथी, एरे जेरे लोकन सेइं संगती न रेखां।

6 एन्ने मां तैना लोकन, जैना लोकां केरे घरन मां गेइतां बेवकूफ कुआन्शन अपने वशे मां केरतन, जैन केरे मन पापे सेइं देबोइतां हर किसमेरी खुवैइशन मां आन।

7 ते हमेशा नर्वी-नर्वी गल्लां त शिखती रैतिन, पन तैना मसीहेरी सच्च्ची शिक्षाई कधे न सेमझी बटन।

8 इना झूठे उस्ताद मसीहेरे सच्च्चे सन्देशेरे खलाफत केरतन जेन्चरे यन्नेस ते यम्बरेसे मूसेरी खलाफत कियोरी थी। तैन केरे मन बुरेन ते तैन केरो मसीह पुड़ विश्वास सच्च्चो नई।

9 तैन केरि कामयाबी सिर्फ थोडे वक्तेरीए, किजोकि जेन्चरे लोकेई यन्नेस ते यम्बरेस पिशानोरे थिये कि तैना बेवकूफन। तेन्चरे हर कोई इन भी पिशानेलो कि इना भी बेवकूफन।

~~~~~

10 पन हे तीमूथियुस तू एप्पू रोडे चारे ज्ञान कि अवं शिखालताई, ते अवं केन्चरे ज़ोताई, ते मेरो कुन मकसदे, ते अवं कुन विश्वास केरताई। तू ज्ञानतस अवं सबर केरतो ओरोई ते सेबी किसमेरे लोकन सेइं प्यार केरतो ओरोई, मीं मुसीबतां झैल्ली ते लोकेई अवं स्तव कि मीं बडो दुःख भोए,

11 तू तैन भयानक गल्लां केरे बारे मां ज्ञानतस जैना लोकेई मीं सेइं अन्ताकिया ते इकुनियुम ते लुस्त्रा नगरन मां की, ते मीं तैड़ी केरो स्तव झैल्लो। पन प्रभुए अवं तैन सेबन मरां छुटव।

12 जै कोई तैन केरनू चाते जैस सेइं परमेशेरे खुश भोते ते यीशु मसीह पुड़ विश्वास केरते तै स्वत गानोए ।

13 पन दुष्ट लोक ते तैना धोखो देनेबाले होरि भी बुरी चीजां केरेले । तैना लोकन धोखो देले ते एप्पू भी होरन करां धोखो खाले ।

14 पन जैन तीं असन करां शिखोरूए तैस पुड़ लगातार विश्वास केर, ते तीं पूरू याकीन किजोकि तू असन जानतस ते असन पुड़ भरोसो केरि बटतस जैनेई तीं इना सैरी गल्लां शिखैली ।

15 ते बचपनेरो तू पवित्रशास्त्रेरो ज्ञान्ने बालोस, जैन तेरी इन समझनेरे लेइ मद्दत केरते, कि जैखन तू यीशु मसीह पुड़ विश्वास केरतस परमेशर तीं मुक्ति देते ।

16 सारू पवित्रशास्त्र परमेशेरे अगवैई सेइं लिखोरू, ते इन लोकन शिखालने लेइ मद्दतगारे, तैन ज्ञोनेरे लेइ कि जैन तैनेई कियूं तैन गलते, तैन केरि गोलती सुधारनेरे लेइ, ते तैन केरनेरे लेइ शिखालनेरे लेइ जैन सही आए ।

17 ताके परमेशेरो मैन्हु हर किसमेरां रोड़ां कम्मां केरनेरे लेइ तियार भोए ।

4

1 जैखन मसीह यीशु राजेरो जेरो राज केरने एज्जेलो त तै जीते ते जैना मरेन, लोकां केरो इन्साफ केरेलो, अवं तीं परमेशेरे ते मसीहे गवाह रेखतां हुक्म देताई ।

2 कि तू परमेशेरू वचन प्रचार केर, वक्त बे वक्ते तियार रा, तू लोकन जैना बुरां कम्मां तैनेई कियां हिरा, तैन केरे पापां केरे लेइ तैन झिड़क पन तैन होसलो भी दे ते तैन सबरी सेइं शिखाल ।

3 किजोकि एरो वक्त एजनोए, कि लोक रोड़ी शिक्षा न शुन्नी चाले, पन तैना अपने मेर्जी पुड़ चलनू चाले ते तैना अपने लेइ बड़े उस्ताद तोप्पेले जैना तैन सेइं तैन ज्ञोन जैन तैना शुन्नु चातन ।

4 तैना तैन करां शुन्नु न चाले जैना परमेशेरू सच्चू वचन शुनातन पन तैना झूठी कहैनी शुन्नी चाले (जैना मैन्हु केरि बनेवरिन) ।

5 पन तू अपना आप कैवू मां रख चाए किछ भी की न भोए, इस मां तीं जैना भी दुःख भी झैल्लने पेन त झल्ल, खुशखबरी शुनानेरे लेइ बड़ी प्रचार केर, ते जैन कम परमेशेरे तीं केरनेरे लेइ दितोरू तैन पूरे केर ।

6 अवं इना हुक्म तीं देताई किजोकि मेरी जिन्दगी ते परमेशेरे लेइ कम खतम भोवरूए किजोकि अवं जानताई अवं जल्दी मरेलो ।

7 मीं जंगी मां रोड़ा सिपेहेरे जेरे जै लड़ाई केरने मां कधी हार न मन्ने, तू भी मसीहेरे लेइ बड़ी मेहनत केरिन कधे हिम्मत न हार, मीं तैन कम पूरू कियूं जैन मसीह यीशुए मीं केरनेरे लेइ दितोरू थियूं, मीं वफादेरी सेइं खुशखबरी प्रचार की ।

8 हुनी, प्रभुएरे मेरे लेइ स्वर्गें मां इनाम रखेरू किजोकि मीं तैस खुश केरनेबाली जिन्दगी जीयोरीए । प्रभु जै धर्मी इन्साफ केरनेबालोए मीं इन इनाम तेइस देलो जेइस तै वापस इन्साफ केरनेरे लेइ एज्जेलो । पन इन इनाम सिर्फ मेरे लेइ नई, पन तैन सेब्मी केरे लेइ भी आए, जैना तैसेरे एजनेरी बड़ी इच्छा रखतन ।



9 मीं कां जल्दी एजनेरी कोशिश केर ।

10 किजोकि देमासे इस दुनियारी चीजन सेइं प्यार केरतां अवं शारो, ते तै थिस्सलुनीके नगरे जो चलो जेव, ते कोरसकंस गलातिया इलाके जो जेव ते तीतुस दलमतिया इलाके जो चलो जेव ।

11 सिर्फ लूका मीं सेइं साथीए, जैखन तू एजस त मरकुसे भी एप्पू सेइं साथी एना, किजोकि तै इड़ी मेरे मद्दत केरनेरे काबले ।

12 तुखिकुस मीं इफिसुस नगरे जो भेजोरोए ।

13 जैखन तू एजस त तै चोगो एना जै मीं तूरोआस नगरे मां मरकुसेरे घरे रखबोरोए। ते मेरे चर्मपत्र भी एना, खास केरतां तै जै छेल्ली केरे खेडू सेइं बनोरोए।

14 सिकन्दर ताम्बेरू कम केरनेबाले मीं बडे बारे दुःख दित्तोरोए, प्रभु तैस तैसेरे बुरे कम्मां केरे मुताबिक बदलो देलो।

15 तू भी तैस करां खबरदार रा, किजोकि तैने इशशे शिक्कारी बडी खलाफत की जै मसीहेरे बारे मां आए।

16 जैखन पेइले बार अवं आदालती मां अपनो आप बचाव केरनेरे लेइ जोरो थियो त कोई भी मीं सेइं साथी न थियो। पन तैना सारे मीं शैरतां जले जे, परमेशर इन तैन केरे खलाफ न गने। अवं प्रार्थना केरताई परमेशर तैन हछु माफ़ केरे।

17 पन प्रभु मेरो मद्दतगार राव, तैने मीं हिम्मत दित्ती, ते अवं यीशु मसीहेरी खुशखबरी शुनानेरे काबल भोव कि सारे गैर कौमां केरे लोक शुन्न, ते तैने अवं मौती करां एन्चरे बचाव जेन्चरे शेरे करां।

18 ते प्रभु मीं हर एक्की बुरे हमले करां बचालो ते अपने स्वर्गेरे राज्जे मां हफाजती सेइं पुजालो, सारे महिमा हमेशा-हमेशा परमेशेरी भोती राए। आमीन।



19 मेरू नमस्कार पिरस्का ते तैसेरे घरे बाले अक्विला ते कने उनेसिफुरूसेरे घराने दे।

20 इरास्तुस कुरिन्थुस नगरे मां रावरोए, ते तरुफिमुस मीं मीलेतुस नगरे मां बिमार शारोरोए।

21 हीवतडेरे पेइले एजनेरी कोशिश केर, ते यूबूलुस ते पूदेंस ते लीनुस ते क्लौदिया, ते इटेरे सारे विश्वासी लोकेई नमस्कार भेजेरू आए।

22 अवं प्रार्थना केरताई प्रभु तीं सेइं साथी भोए, ते तैसेरो अनुग्रह तुसन सेब्बन पुड भोतो राए।

तीतुस

ॐॐॐॐॐॐ

1 अवं पौलुस ई चिट्ठी लिखने लोरोई। अवं परमेशेरो दास ते यीशु मसीहेरो परेरित आई। अवं परमेशेरे चुनारे लोकां केरे विश्वासे मजबूत केरनेरे लेइ ते तैन केरि मद्दत केरनेरे लेइ चुनोरोई, कि तैना यीशु मसीहेरी सच्च्ची शिक्षा ज्ञानन ताके तैना एरी जिन्दगी जीन जैस सेइं परमेशर खुश भोए।

2 तैसेरो नितीजो ई भोए कि तैना परमेशेरे सेइं हमेशा रानेरी उमीद रखन, परमेशर जै कद्वे झूठ न ज़ोए, तैने दुनिया बनाने करां पेइलो वादो कियोरो थियो, कि तैसेरे लोक हमेशारे लेइ ज़ीयेले।

3 ते हुनी परमेशेरे ठीक वक्ते पुइ ई खुशखबरी असन पुइ बांदी की जै अस सेब्बन प्रचार केरतम। इश्शे मुक्ति देनेवाले परमेशेरे ई जिमेवारी मीं दित्तोरीए ते तैसेरेलेइ इन कम केरनेरे लेइ मीं हुक्म दित्तोरोए।

4 अवं ई चिट्ठी तीतुसे जो लिखने लोरोई। तू मेरे मट्टे जेरू आस, किजोकि जेन्चरे अवं विश्वास केरताई तेन्चरे तू भी विश्वास केरतस। अवं प्रार्थना केरताई इश्शो बाजी परमेशर ते इश्शो मुक्ति देनेवालो प्रभु यीशु मसीह तीं अनुग्रह त कने शान्ति देतो राए।

ॐॐॐॐॐ ॐॐॐ ॐॐ ॐॐॐॐॐॐॐ ॐॐ

5 मीं तू एल्हरेलेइ करेते टैपू मां शारोरो थियो, ताके तू तैड़ी इश्शू कम पूरू केरस, ते होरि नगरन मां बुजुर्ग चुन जेन्चरे तीं केरनेरो हुक्म दित्तोरो थियो।

6 लीडर बेइलजाम लोडे ते अपने कुआन्शी सेइं वफादार लोडे, जैन केरे बच्चे विश्वासी भोन ते बुरो बर्ताव केरनेवाले न भोन ते तैना अपने अम्मा बाजी केरो हुक्म मन्नेवाले भोन।

7 किजोकि रखवालो परमेशेरो भण्डारी भोने वजाई सेइं बेइलजाम लोडे, न अपनि च़लानेवालो, न सेरकलो, न शराबी, न लडाको, ते न पेइंसां केरो लालची लोडे।

8 पन मेहमानां केरि आदर केरनेवालो, होरि केरि भलाई केरनेवालो, अपने आपे पुइ कैवू केरनेवालो, धरमात्मा, पवित्तर ते अपने इच्छान कैवू केरनेवालो लोडे।

9 ते तै यीशु मसीहेरे तैस सन्देशे पुइ जै भरोसेरे कावले मजबूती सेइं विश्वास केरनेवालो लोडे, जै असेई तैस शिखालोरोए। ताके तै होरन सही शिक्षाई मन्नेरे लेइ होसलो देइ बटे ते ज़ैना गलत भोन तैन सुधैरी बटे।

10 अवं इन एल्हरेलेइ ज़ोताई, किजोकि बड़े लोक सही शिक्षारी खलाफ केरेले, ज़ैना बेकार गल्लां शिखालतन ते होरन धोखो देतन। इन खास केरतां किछ् यहुदी केरे लेइ सत्र आए ज़ैना विश्वासी बनोरेन (इना तैना लोकन ज़ैना चातन कि सारे मसीही लोक यहुदी केरे कानूने मनन, खास केरतां खतनेरे कानूने)।

11 एन लोकन शिखालनेरी अज़ाज़त न दे, किजोकि ज़ैखन तैना इन गल्लन शिखालतन, ज़ैना तैनेई शिखेलोरी लोइन, त तै सारे टब्बरां केरे विश्वासे बरवाद केरतन। तैना इन एल्हरेलेइ केरतन कि पेइंसो कमेई बटन।

12 अक मैन्हु करेते टैपेरो आए ज़ैस जो तैना अक्लमन्द ज़ोतन तैने ज़ोरूए, “करेतेरे लोक हमेशा झूटे, जंगली जानवरां केरो ज़ेरो बर्ताव केरनेवाले, तैना आलसी ते हमेशा अढंगू खानेवाले भोतन।”

13 इन गल्लां करेतेरे लोकां केरे बारे मां सच्च्ची आन। एल्हरेलेइ तैन खबरदार केर, कि तैना यीशु मसीहेरी शिक्षाई पुइ विश्वास केरन।

14 ते यहुदी केरि बनोवरी कहैनी ते ज़ैना लोक सच्च्चे करां दूर भोरन तैन केरे हुक्म शुन्ने बंद केरा।

15 जैन लोकां केरे मने मां पापी खियाल नई तैन केरे लेइ रीतेरे मुताबिक सब किछ शुद्धे । पन तैन लोकां केरे लेइ जैना बुरेन ते यीशु मसीह पुइ विश्वास न केरन तैन केरे लेइ किछ भी शुद्ध नई जैन तैना केरतन ।

16 तैना झूठे उस्ताद ज़ोतन कि अस परमेशेर ज्ञानतम, पन तैन केरां कम्मां साफ तरीके सेइ हिरातन कि तैना तैस न ज्ञानन, किजोकि परमेशेर तैन सेइ नफरत केरते ते तैना हुकम न मन्नेवालेन, ते किछ भी रोडू केरनेरे काबल नई ।

2



1 पन हे तीतुस तू विश्वासी लोकन तैन शिखाल जैन यीशु मसीहेरे बारे मां सही शिक्षारे मुताबिक ठीके ।

2 बुड्डे मडदन शिखाल कि अपने आपे पुइ कैवू केरनेवाले बनन, ते तैनेई एरो बर्ताव केरन कि लोक तैन केरि आदर केरन, ते समझदैरी सेइ बर्ताव केरनेवाले भोन । ते तैना परमेशेरें पुइ मज्रबूती सेइ विश्वास केरनेवाले बनन, होरन सेइ प्यार केरनेवाले ते सबर केरनेवाले बनन ।

3 एन्त्रेरे बुड्डी कुआन्शन शिखाल कि एरी ज़िन्दगी ज़ीन ज़ैस सेइ परमेशेरि आदर भोए । तैना होरन पुइ दोष लाने बैली, ते पीने बैली नई, पन ते तैन ज़ो कि तैन होरन तैन शिखालन ज़ैन रोडूए ।

4 ताके तैना जवान कुआन्शां केरे लेइ मिसाल भोन ते तैन शिखालनेरे काबल भोन कि अपने मुन्शन ते बच्चन सेइ केन्त्रेरे प्यार केरन ।

5 ते तैना अपने आपे कैवू केरनेबैली, अपने मुन्शां केरे लेइ वफादार, ते घरेरो कारोबार केरनेबैली, भलाई केरनेबैली ते अपने-अपने मुन्शां केरे अधीन राने बैली भोन, ताके परमेशेरें वचनेरी तुहीन न भोए ।

6 एन्त्रेरे जवान मडदन भी अक्लमन्द भोइतां ज़ीनेरे लेइ समझा ।

7 हर गल्ली मां तू हमेशा अपनो आप अक मिसाल बना, ताके तैन भी एन्त्रेरे केरन । ज़ैखन तू परमेशेरें बारे मां शिखालस त रोडे मकसदे सेइ शिखाल । एन्त्रेरे लोक तेरी आदर केरेले ।

8 ते ज़ैन सच्चें तैन शिखाल ते ज़ेसेरी आलोचना न भोए, ताके तेरे दुश्मन छिथोन, किजोकि फिरी कोई बुराई नई भोनी ज़ेसेरी तैना खलाफ केरि बटन ।

9 ज़ैना विश्वासी गुलाम आन तैन शिखाल कि हमेशा अपने मालिकां केरि गल मनन । तैन ज़ो कि तैन केरन ज़ैस सेइ तैन केरे मालिक खुश भोन ते कम्मेरे बारे मां शिकायत न केरन ।

10 चोरी न केरन, पन इन साबत केरन कि तैना हमेशा ईमानदारन, ताके लोक तैन केरे रोडे बर्तावे हेरन ते ज़ैन तैना केरतन तैन लोकां केरे लेइ, इश्शें मुक्ति देनेवाले परमेशेरें सन्देश शुन्नेरी वजा भोली ।

11 किजोकि परमेशेरें सेबभी लोकन मुक्ति देनेरे लेइ अक बत देइतां अपनो अनुग्रह हिराव ।

12 परमेशेरें अपने अनुग्रहरे ज़िरिये असन शिखालते, परमेशेरें असन शिखालते कि अस तेरहो बर्ताव न केरम ज़ैस सेइ ते खुश भोए । ज़ेन्त्रेरे गैर विश्वासी चीज़ां केरू लालच केरतन तुस एरू न केरा, तुस ज़ातगर इस दुनियाई मां आथ, अक्लमन्द ते धर्मी लोकां केरो ज़ेरो ते एरो ज़ेरो बर्ताव केरा ज़ैस सेइ परमेशेरें खुश भोते ।

13 अस तैस अनोखी दिहैइरी उमीदी मां रातम, कि ज़ेइस इश्शो महान परमेशेरें ते मुक्ति देनेवाले यीशु मसीह महिमाई सेइ साथी वापस एज्जेलो ।

14 एने यीशु मसीहे अपनो आप इश्शे लेइ बलिदान कियो ताके असन पापेरे शक्ति करां छुटकारो दे, ताके अस शुद्ध भोम ते तैसेरे अपने लोक बनम ज़ैना रोडां केरतन ।

15 इना गल्लां शिखाल ते अपनो पूरो अधिकार इस्तेमाल केर, ते अपने शुन्नेवालन होसलो दे ते झिड़क दे । कोई तीं घटया न समझे ।

3

????? ?

1 विश्वासी लोकन याद करा, कि हाकिमां ते अधिकैरी केरे अधीन रान, ते तैन केरो हुक्म मन्न, ते हमेशा रोडो केरनेरे लेइ तियार रान ।

2 कोन्वी बदनाम न केरन, लडाके न भोन, पन नर्म सुभावेरे भोन, ते सेब्मी मैनन् सेइं साथी वेडि नेरमी सेइं रान ।

3 किजोकि अस भी पेइले बेअक्ल ते हुक्म न मन्नेबाले थिये ते लोकेईं असन धोखो दित्तोरो थियो । बडे खुवैइशां ते एशेरे केरनेरे गुलाम थिये, इशशी जिन्दगी दुष्टे ते जलनी सेइं भेरोरी थी ते एक्की होरि सेइं नफरत करते थिये ।

4 पन फिर भी इशशे मुक्ति देनेबाले परमेशेरे असन लोकन पुइ दया ते प्यार हिराव ।

5 तैने अस इशशे पापां केरि सजाई करां बचाए एल्हेरेलेइ नईं कि असेईं रोडां कम्मां कियोरां थियां, पन तैसेरे दयारे वजाई सेइं । तैन इशशे पाप धोइतां असन नन्वू जर्म दित्तू ते पवित्त्र आत्मा देनेरे जिरिये असन नर्वीं जिन्दगी दित्ती ।

6 परमेशर पवित्त्र असन मुफते मां दित्तो कि इशशे जिन्दगी मां शेक्ति सेइं कम केरे, किजोकि यीशु मसीह इशशो मुक्ति देनेबालो वन्नेरे लेइ इशशे पापां केरे लेइ मरो ।

7 परमेशर इन कियू ताके ते अपने अनुग्रहे सेइं अपने नजरी मां धर्मी बनाए, ताके अस तैसेरे बच्चे बनम ते पूरे तरीके सेइं हमेशा तैस सेइं साथी रानेरे उमीदी सेइं केरम ।

8 ई गल सञ्जे, अवं चाताई कि तू इन शिक्षान पुइ ज़ोर दे ताके सब ज़ैना परमेशेरे पुइ भरोसो रखतन ते अपनो आप रोडू केरनेरे लेइ सॉफेले, इना शिक्षां सेब्मी केरे लेइ रोड़ी ते फेइदामंद आन ।

9 पन बेवकूफी वेंस ते पूर्वजां केरे नव्वां केरे वारे मां, ते लडाई ते तैन ते मूसेरे कानूनेरे वारे मां लडाई करां दूर रा, किजोकि तैन सब बेकार ते बेफेइदू आए ।

10 ज़ैना लोक कलीसियाई मां फिरके बनानेरी वजा बनतन, कम से कम दूई वार तैन खबरदार केर कि तैना एन न केरन, तैट्टां बाद अपनो वक्त तैन पत्ती बर्बाद न केर ।

11 तुस ज़रूर ज़ैनी बटतथ एरो ज़ेरो मैन्हु ज़ैनी बुज्जतां गलत बत्तां ज़लते, ते तैन अपना बुरां कम्मां इन सावत केरतन कि तैना पापिन ।

????? ? ?

12 अवं अरतिमास या तुखिकुस तुसन कां भेजनेरे लेइ बिस्तार बनाने लोरोईं, ज़ैखन तैन मरां अक तीं कां पुजते त निकुपुलिस नगरे मां मीं सेइं मिलनेरी पूरी कोशिश केर, किजोकि मीं तैडीए हिवतडो कटनो थापोरोए ।

13 ज़ैखन जेनास शास्त्री ते अपुल्लोस तैट्टां गानेरे लेइ तियार भोन त ज़ेतूरु भोइ बटे तैन केरि मद्दत केर, ताके तैन कोन्वी भी चीज़री घटी न भोए ।

14 सिर्फ इन नईं, बल्के तू विश्वासी लोकन शिक्षा देतो रा, कि तैना रोडां कम्मां केरन ताके तैन लोकां केरि मद्दत केरन ज़ैन ज़रूरत आए । इस सेइं तैन केरि मद्दत भोली कि तैना एक्की मकसदे सेइं जिन्दगी जीन ।

15 सारे विश्वासी लोक ज़ैना मीं सेइं साथी आन तींजो नमस्कार ज़ोतन । इशशे विश्वासी सैथी लोकन ज़ैना असन सेइं प्यार केरतन तैन नमस्कार । अवं प्रार्थना करताई प्रभु तुसन सेब्मन पुइ अनुग्रह केरतो राए ।

फिलेमोन

??????

1 अवं पौलुस ई चिट्ठी लिखने लोरोई। अवं कैदे मां आई किजोकि अवं यीशु मसीहेरे बारे मां प्रचार करताई। हे फिलेमोन तीं इशशे दूला तीमुथियुस ते मेरे तरफां नमस्कार। तू इशशो दूलारो दोस्तस आस ते जेन्चरे अस मसीहेरे लेइ कम केरतम तेन्चरे तू भी केरतस।

2 अवं इशशी विश्वासी बेइन अफफिया ते इशशे सैथी अरखिप्पुस जै सिपेहेरे जेरो प्रभुएरी सेवा केरते, ते तैन कलीसियारे लोक जैना तेरे घरे मां अकोट्टे भोतन, तैन भी लिखने लोरोई,

3 अवं प्रार्थना करताई, इशशे बाजी परमेशर ते प्रभु यीशु मसीह तुसन पुइ अनुग्रह केरे ते तुसन शान्ति दे।

????????????????????

4 अवं जेखन भो तेरे लेइ प्रार्थना करताई, तेरे लेइ अवं परमेशेरू शुकर करताई।

5 किजोकि मीं प्रभु यीशु मां तेरे विश्वासेरे बारे मां ते परमेशेररे लोकां केरे लेइ तेरे प्यारे बारे मां शूनू।

6 अवं प्रार्थना करताई तेरी संगती जै विश्वासी लोकन सेइ साथीए, तुशशे तैन रोड़ि चीजां केरे जान्नेरे जिरिये जैना परमेशेर दित्तोरिन बद्धती गाए। इन मसीहेरे महिमारे लेइ भोतू राए।

7 किजोकि हे दूला, अवं तेरे प्यारे सेइ जै तू मीं केरतस बड़ो खुश आई, ते मीं बड़ो होसलो भोव, एल्हेरेलेइ कि तेरे प्यारेरे जिरिये होरि परमेशेररे लोकन भी होसलो मैल्लो।

????????????????????

8-9 अवं तीं किछु केरनेरे लेइ पुछताई जैन तीं कियोरू लोडे। अवं मसीहेरो दित्तोर अधिकारे इस्तेमाल केरतां इन केरनेरे लेइ हुम्म देइ बटतो थियो, पन अवं न केरेलो। इसेरे बदले मां, अवं बल्हे चारे जोताई कि तू इन केर, किजोकि अस एक्की होरि सेइ ते परमेशेररे लोकन सेइ प्यार केरतम। अवं पौलुस हुनी सियाने मैनेरे रूपे मां तीं पुछतई, अवं लोकेई कैदे मां बंद कियोरोई किजोकि अवं यीशु मसीहेरी सेवा करताई।

10 अवं उनेसिमुसेरे लेइ मिनत केरताई जैन मेरे लेइ मट्ठेरू जेरूए। तैन मसीह मां मेरू मट्ठ इड़ी कैदखाने मां बनू।

11 ते बीतोरें वक्ते मां तेरे लेइ केन्वी कम्मरो न थियो, पन हुनी तेरे त कने मेरे दुइयां केरे बडे कम्मरोए।

12 अवं उनेसिमुसे तीं कां वापस भेजने लोरोई, तैस सेइ अवं पूरे दिले सेइ प्यार करताई।

13 अवं जांतगर खुशखबरी प्रचार केरनेरे वजाई कैदखाने मां आई तांतगर तैस अपनि मद्दत केरनेरे लेइ इड़ी एप्पू सेइ साथी रखनो चातो थियो। ताके तै तेरे ठेरी मेरी मद्दत केरे, किजोकि अवं जानताई तू मेरी मद्दत केरनि चातस।

14 पन मीं तेरी मेर्जी बगैर किछु भी केरनू न चाव, अवं चाताई तू ई मेरी मद्दत केर, किजोकि तू इन केरनेरे लेइ खुश आस ते एल्हेरेलेइ नई कि अवं इन केरनेरे लेइ दबाव बनाने लोरोई।

15 जेइद परमेशेर उनेसिमुस एल्हेरेलेइ तीं करां नशशने दित्तो, ताके तै मसीह पुइ विश्वास केरे, ते तैसेरो नितीजो ई भोए कि तै हमेशा तीं सेइ साथी राए।

16 पन हुनी तै तेरो गुलाम नई, बल्के गुलामे करां भी बेद्धतां आए। तै हुनी तेरो दूलारो विश्वासी दूला आए। अवं तैस सेइ बड़ो प्यार करताई, पन तीं तैस अपने गुलामेरे रूपे मां होरो भी प्यार कियोरो लोडे किजोकि तै मसीह मां अक दूलाए।

17 अगर तू मीं शामिल समझतस, त जेखन उनेसिमुस वापस तीं कां एज्जे त तैस एन्चरे कबूल केर जेन्चरे मीं।

18 ते अगर तैने किछ् तेरो नुकसान कियोरोए, या तेरे किछ् पेइंसां केरो कर्जो भोए त अवं तैसेरे बदले देइलो ।

19 अवं पौलुस अपने हथ्यन सेइं लिखताई, कि अवं तीं एप्पू वापस देइलो, तू इन पेइलू ज्ञानतस, अगर मीं तेरी मदत न भोथी कियोरी त तीं अपने आपे सेइं न भोथू मैलोरू, मेरो कर्जो जै तीं पुड़े तै तेरी अपनि जिन्दगी आए ।

20 हे मेरे दलारे दोस्त, साथी विश्वासी भोनेरे वजाई सेइं इन मेरे लेइ केर ते मसीह मां मीं खुश केर ।

21 मीं ई चिट्ठी लिखोरीए, किजोकि मीं याकीन कि जैन केरनेरे लेइ ज़ोरू तैन तू केरेलो । हकीकति मां अवं ज्ञानताई तू तैस करां भी बडू जादे केरेलो, जैन केरनेरे लेइ मीं ज़ोरूए ।

22 ते अक होरि गल, तू अपने घरे मां मेरे लेइ अक कमरो तियार केर । किजोकि मीं उमीदे परमेशर तुश्शे प्रार्थनां केरो जुवाब देलो ते तीं कां फिरी एजने देलो ।

~~23~~

23 इपफ्रास, जै योशु मसीहेरी खुशखबरी प्रचार केरनेरे वजाई सेइं मीं साथी कैदीए तै तीं नमस्कार ज़ोते ।

24 ते मरकुस ते अरिस्तर्खुस ते देमास ते लूका जैना प्रभुएरू कम मीं सेइं साथी केरतन तीजो नमस्कार ज़ोतन ।

25 इश्शे प्रभु यीशु मसीहेरो अनुग्रह तुसन पुड़ भोतो राए । आमीन ।

2

1 एल्हेरेलेइ, जैना गल्लां असेई शुनोरिन, तैन पुइ असेई होरो भी मन लेइतां ध्यान कियेरू लोडे, कोस्कोई एरू न भोए, कि असां टेपलोइतां तैन करां दूर चले गाम।

2 किजोकि जैन वचन परमेशरे स्वर्गदूतां केरे जिरिये ज़ोरू थियूं, तैन सच्चू सावत भोवं, ते हर एककी पाप करनेवाले ते हुकम न मन्नेवाले सज़ा मैल्ली।

3 त असन भी सज़ा मैलेली, अगर अस एतरी महान मुक्ति करां बे खबर राए त। जेसेरे बारे मां पेइले प्रभुए एप्पू ज़ोरूए, ते जैन चलेई एन प्रभु करां शुनोरू थियूं तैन केरे जिरिये असन याकीन भोवं कि एन सन्न आए।

4 परमेशरे भी निशान ते चमत्कार ते बड्डां-बड्डां कम्मां केरे जिरिये ते अपने मेरज़रे मुताबिक लोकन पवित्र आत्मारे जिरिये वरदान देइतां इन सावत कियूं।

XXXXXXXXXXXXXXXXXXXX

5 परमेशरे एजने बेली दुनिया जेसेरे बारे मां अस ज़ोने लोरेम, स्वर्गदूत केरे अधीन मां न की पन प्रभु यीशुएरे अधीन की।

6 बल्के पवित्रशास्त्रे मां कोस्कोई केन्चे परमेशरे सेइ एन ज़ोरूए,

“मैन्हु कुन चीज़े, जेसेरे बारे मां तू सोचतस?

या इन्सान कौने, कि तू तैसेरी फिकर केरतस?

7 तीं ते शेक्ति मां किछ वक्तेरे लेइ स्वर्गदूतन करां थोडो ज़ेरो घट कियो,

ते तीं तैस राज़ेरी ज़ेरि महिमा ते आदर दित्तोरीए, ते तैस अपने हथ्यां केरे कम्मन पुइ अधिकार दित्तो।

8 तीं तैस सेब्भी चीज़न पुइ अधिकार दित्तोरोए,”

ज़ैखन सब किछ तैसेरे अधिकारे मां कियूं,

ते किछ भी बाकी न रखवू, जैन तैसेरे अधीन न भोए। पन असां हुन्ना तगर सैरी चीज़ां तैसेरे अधिकारे मां न लहम।

9 पन असां यीशु लहतम, जै स्वर्गदूतन करां किछ वक्तेरे लेइ निकडो कियोरो थियो, ताके तै परमेशरेरे अनुग्रहे सेइ सेब्भी केरे लेइ अपनि जान दे। किजोकि यीशुए दुख बरदाश कियो ते मरो, ते हुनी अस ज्ञानतम कि तैस महिमा ते आदर दित्तोरीए।

10 परमेशरे सब किछ बनाव, ते तै सब किछ अपने लेइ सुमैलतां रखते। परमेशरे ठीक कियूं जैन तैनी दुखेरे जिरिये यीशु सिद्ध कियो, ताके तै बडे लोकन महिमा मां पुज़ाए। किजोकि यीशु ही आए ज़ै असन मुक्तेरे पासे नेते।

11 किजोकि पवित्र करनेवालेरो ते पवित्र भोने बालां केरो बाजी अक्के, एल्हेरेलेइ यीशु तैन जो ढला बेइन ज़ोने करां न शरमाए।

12 पन मसीह परमेशरे सेइ ज़ोते,

“अवं अपने लोकन इन ज़ोएलो कि तीं मेरे लेइ इन कियोरूए

ते तैन केरे सभाई मां तेरे नव्वेरू गीत ज़ोइलो।”

13 ते फिरी तै ज़ोते,

“अवं तैस पुइ भरोसो रेखेलो।”

ते फिरी तै ज़ोते,

“अवं तैन लोकन सेइ साथी भोनोई, जैना परमेशरे मीं दित्तोरे।”

14 किजोकि जेन्चरे परमेशरेरे बच्चे, मैन्हु आन, तेन्चरे यीशु भी तैन केरो ज़ेरो मैन्हु बनो। परमेशरे एन एल्हेरेलेइ कियूं ताके तैसेरे मौतरे जिरिये शैताने बरबाद केरे ज़ैस कां मौतरो अधिकार थियो।

15 ते एन्चरे तैनी तैना आज़ाद किये जैना मौतरे डरे सेइ सैरी उमरी गुलामेरे ज़ेरे ज़ीते थिये।

16 किजोकि प्रभु यीशु स्वर्गदूतां केरि नई बल्के अब्राहमेरे वंशेरी मद्दत केरते।

17 एल्हरेलेइ यीशु मसीहे हर गल्ली मां मैन्हु केरो ज़ेरो बन्नु ज़रूरी थियूं, ताके सेब्भी केरे पापां केरे बलिदानेरे लेइ परमेशेरे सामने दया करनेवालो ते ईमानदार महायाजक बने।

18 किजोकि यीशुएरी अज़मैइश कीजेई ते तैनी एप्पू दुःख झैल्लोरोए, एल्हरेलेइ ते तैन लोकां केरि मद्दत केरि बटते, ज़ैना आजमैइशरो सामनो केरतन।

3

एल्हरेलेइ हे विश्वासी ढूलाव ते बेइनव, तुस परमेशेरे स्वर्ग मां तैस सेइं शामिल भोनेरे लेइ कुजोरथ। एल्हरेलेइ परभु यीशुएरे वारे मां ध्यान देथ ज़ै इशुशे लेइ परमेशेरो बिस्तार आन्ने वालो दूत ते महायाजक आए ज़ेसरो अस इकरार केरतम।

1 एल्हरेलेइ हे विश्वासी ढूलाव ते बेइनव, तुस परमेशेरे स्वर्ग मां तैस सेइं शामिल भोनेरे लेइ कुजोरथ। एल्हरेलेइ परभु यीशुएरे वारे मां ध्यान देथ ज़ै इशुशे लेइ परमेशेरो बिस्तार आन्ने वालो दूत ते महायाजक आए ज़ेसरो अस इकरार केरतम।

2 यीशु परमेशेरे लेइ वफादार थियो, ज़ैनी तै ठहरावरो थियो, ज़ेन्चरे मूसा भी परमेशेरे लोकां केरि सेवाई मां वफादार थियो।

3 किजोकि घर बनानेवालो घरे करां जादे इज़्जतरे काबल समझो गाते, तेन्चरे यीशु भी मूसा करां जादे इज़्जतरे काबल समझो जेव।

4 किजोकि हर घरेरो कोई न कोई बनानेवालो ज़रूर भोते, पन ज़ैनी सब किछ् बनावं तै परमेशेरे।

5 मूसा त परमेशेरो सेवक भोने सेइं परमेशेरे घरेरे लोकन मां वफादार राव। ताके तैना गल्लां केरि बटे, ज़ैना परमेशेरे एजनेवाले वक्ते मां ज़ोनेवालो थियो।

6 पन मसीह मट्टू भोनेरे वजाई सेइं परमेशेरे लोकां केरू मुखतियारे, ते असां तैसेरे लोकम, शर्त एने कि असां तैस दिलेरी ते उमीदी मज़बूत रखम, ज़ैस पुइ असां भरोसो केरतम।

बस्सा पवित्र आत्मा ज़ोते,

7 बस्सा पवित्र आत्मा ज़ोते,

“अगर अज़ तुस परमेशेरी आवाज़ शुनथ।

8 त अपने दादे पड़दादां केरे ज़ेरे तैसेरो हुक्म मन्ने करां इन्कार न केरथ,

ज़ैखन तैनेई परमेशेरे खलाफ खलाफत की,

ते ज़ेन्चरे तैस दिहाड़े तुशुशे दादे पड़दादेई ज़ेइस तैना सुनसान ठैरी मां थिये, तैनेई परमेशेरी अज़मैइश की।

9 तैड़ी तुशुशे दादे-पड़दादे 40 सालन तगर मेरां महान कम्मां हेरनेरे बाद भी, अवं चनोती देइतां अज़माव।

10 एल्हरेलेइ अवं तैस वक्तेरे लोकन पुइ क्रोधे भोव,

ते मीं ज़ोवं, तैना हमेशा मेरो इन्कार केरतन,

ते ज़ैन केनेरो मीं हुक्म दित्तोरोए तैन केने करां इन्कार केरतन।

11 एल्हरेलेइ मीं एपनी सरकी मां कसम खाइ,

कि तैना तैस ठैरी कधे दाखल न भोले ज़ैड़ी अवं तैन आराम देथो।”

12 हे ढूलाव ते बेइनव खबरदार राथ, तुसन मरां केन्चेरो दिल एत्रो बुरो ते बेईमान न भोए, कि ज़ै तैस ज़ीते परमेशेरे करां दूर केरे।

13 पन ज़ांतगर तै दिहाड़ी ज़ैस जो अज़ ज़ोतन, रोज़ एक्की होरि हिम्मत देते राथ, एरू न भोए कि तुसन मरां कोई पापेरे धोखे मां एइतां परमेशेरे लेइ सखत दिल न भोइ गाए।

14 किजोकि अगर असां अपने पेइले विश्वासे पुइ अपने मौती तगर लगातार मज़बूत रातम, त अस अकोट्टू कम केने मां मसीह सेइं साथी ज़ुइतम।

15 ज़ेन्चरे पवित्रशास्त्रे मां लिखोरूए,

“अगर अज़ तुस तैसेरी आवाज़ शुनथ त तुस

अपने दिले सखत न केरा, त अपने दादे पड़दादां केरे ज़ेरे तैसेरो हुक्म मन्ने करां इन्कार न केरथ,

ज़ैखन तैनेई परमेशेरे खलाफ खलाफत की।”

16 तैना लोक कौन थिये, जैनेई परमेशेरी आवाज श्रुन्तां भी तैसेरे खलाफ खलाफत की? तैना सब लोक तैना थिये जैना मूसेरे जिरिये मिस्र मुलखे मरां निसोरे थिये।

17 तैना कौन लोक थिये, जैन सेइं परमेशर 40 सालन तगर कुरोधे राव? तैना लोक तैना थिये, जैनेई पाप कियो ते मेरतां तैन केरि लाशां सुनसान टैरी मां रेइ जेई।

18 जैखन परमेशेरे कुरोधे मां कसम खाइ, कि तैना तैस टैरी कधे दाखल न भोले जैडी अवं तैन आराम देथो, हकीकत मां तै तैन केरे बारे मां ज़ोतो थियो जैनेई हुकम न थियो मन्नेरो।

19 वस्सा, असन हुनी पतो लगे, कि तैना विश्वास न केरनेरी वजाई सेइं तैडी दाखल न भोइ सके।

4

XX

1 एल्हेरेलेइ जैखन परमेशरो ए वादोए कि असां तैस आरामे मां दाखल भोइ सकतम, ते असेई खबरदार राहेरू लोइते, ताके कोस्कोई एरू न भोए, कि तुसन मरां कोई तैस मां दाखल भोने करां एरो रेइ गाए।

2 किजोकि जेन्चरे असेई यीशु मसीहेरी खुशखबरी शुनी, तेन्चरे इस्राएली लोकेई भी आरामेरे टैरी दाखल भोनेरी खुशखबरी शुनीरी थी। पन तेनेई तैस पुइ विश्वास न कियो, एल्हेरेलेइ तै सन्देश तैन केरे लेइ बेफैइदो भोव।

3 पन असेई जैनेई विश्वास कियो, परमेशेरे तैस वादो कियोरे आरामे मां दाखल भोतम, जेन्चरे परमेशेरे ज़ोरू थियू,

“मीं अपने कुरोधे मां कसम खाइ,

कि तैना तैस टैरी कधे दाखल न भोले जैडी अवं तैन आराम देथो।”

परमेशेरे एन एल्हेरेलेइ नई ज़ोरू, किजोकि हेजू तगर आरामेरी ठार तियार न थी, पन तै ठार दुनिया बनानेरे वक्ते करां तै तियार आए।

4 किजोकि परमेशेरे सत्तोवं दिहैडारे बारे मां पवित्रशास्तरे मां एन्चरे ज़ोरू आए,

“परमेशेरे अपना सब कम्मां खतम केरतां सत्तोवं दिहाड़े आराम कियो।”

5 ते अस भी इन पढतम कि तैनी वादे मां ज़ोवं,

“एना मेरे आरामेरे टैरी कधी दाखल न भोले।”

6 तैना इस्राएलेरे लोक जैनेई पेइली ई खुशखबरी त शुनी, पन आरामेरे टैरी दाखल भोने मां कामयाब न भोए, किजोकि तैनेई परमेशेरे हुकम न मन्ने। पन हुन्ना भी किछ लोकां केरे लेइ आरामेरे टैरी दाखल भोनेरे लेइ मौको आए।

7 एल्हेरेलेइ परमेशेरे कोई होरो वक्ते अपने आरामेरे टैरी मां दाखल भोनेरे लेइ ठहरावरो, तै वक्त अज्र आए, इश्शे दादे पडदादेई खलाफ केरनेरे बडे सालना बाद परमेशेरे दाऊदेरे जिरिये ज़ोवं, जेन्चरे तैने ज़ोवं

“अगर अज्र तुस तैसेरी आवाज श्रुनथ,

त अपनो दिल सखत न केरा।”

8 अगर यहोशूए तैना लोक आरामे मां दाखल करावरे भोधे त वादे मां परमेशेरे होरि दिहैडारे बारे मां गल न थी केरनि।


9 एल्हेरेलेइ परमेशेरे लोकां केरे लेइ एरी ठार तियार आए जैडी तैना पूरे तरीके सेइं आराम केरि बटतन। तैना तेन्चरे आराम केरेले जेन्चरे परमेशेरे सत्तोवं दिहाड़े आराम कियोरो थियो।

10 किजोकि जै कोई परमेशेरे आरामे मां दाखल भोते त तै परमेशेरो जेरो अपने कम्पन पूरे केरतां आराम केरते।

11 एल्हेरेलेइ एज्जा अस भी तैस आरामेरी टैरी मां दाखल भोनेरी कोशिश केरम, ताके कोई भी मैन्हु इस्राएली लोकां केरे जेरो हुकम न मन्तां तैस आरामेरी टैरी दाखल भोने करां रेइ न गाए।

12 किजोकि परमेशेरू वचन जींतू ते शेक्ति बालू आए, ते हर दई धारण बैली तलवारी करां भी जादे तिख्वू आए । ते तैन पुराण ते आत्माई गहराई तगर च़ीरते, जेन्च़रे तिख्वी तलवार जोडन ते हेडी केरे अन्तरीयों मासे वारां पार च़िरतां निसतीए ते दिलेरे खियाल ते मैनेरो इरादो भी जानते ।

13 दुनियारी कोई भी चीज़ परमेशेरी नज़री करां छ़प्पोरी नई, बल्के तैसेरे सामने सब चीज़ां खुल्ली ते बेंदिन, ते असेई तैस, ज़ैन किछ़ भी अपने पूरे ज़िन्दगी मां कियोरू तैसेरो हिसाब देनो पेनोए ।



14 बस्सा, एज्जा अस अपने विश्वासे पुड़ मज़बूत रहम । किजोकि इश्शो अक महान महायाजके, ज़ै स्वर्गे मां जोरोए, यानी परमेशेरू मट्टू यीशु ।

15 किजोकि इश्शो महायाजक इश्शी सैरी कमज़ोरी समझते । किजोकि शैताने ते सेब्भी गल्लन मां इश्शो ज़ेरो अज़माव, पन तैनी कोई पाप न कियो ।

16 एल्हेरेलेइ एज्जा असां दिलेरी सेइं, अनुग्रह देनेवाले परमेशेरे तख़तेरे सामने च़लम, ताके तै असन पुड़ अनुग्रह ते दया केरे ते ज़रूरते मौके तै इश्शे मद्दत केरे ।

5

1 परमेशेरे हर महायाजक इस्राएली लोकन मरां चुनो, ते परमेशेरे महायाजक, लोकां केरि तरफां अपनि सेवा केराने लेइ ठहराए, ताके तैना लोकां केरे मैफ़रे लेइ च़दतल ते पापां केरू बलिदान च़ाढ़न ।

2 किजोकि अक याजक एप्पू बेड़ि गल्लन मां कमज़ोरे, एल्हेरेलेइ तै बेसमझ, ते टेपलोरे लोकन नेरमी सेइं बर्ताव केरि बटते ।

3 किजोकि तै एप्पू कमज़ोरे, एल्हेरेलेइ तैस न सिर्फ़ लोकां केरे पापां केरे लेइ, बल्के अपने पापां केरे लेइ भी बलिदान च़ाढ़नेरि ज़रूरत भोतीए ।

4 कोई मैन्हु अपने लेइ महायाजकेरी पदवी अपने आपे सेइं हासिल न केरि सखे, ज़ांतगर तै हारूनरो ज़ेरो परमेशेरी तरफां कुजाव न गाए ।

5 तेन्च़रे मसीहे भी महायाजक बेनतां अपनि आदर न की, बल्के परमेशेरे तैस आदर दित्ती ज़ैखन तैने ज़ोवं,

“तू मेरू मट्टू आस,

अज़ अवं इन वांद् केरताई तू मेरू मट्टू आस ।”

6 एल्हेरेलेइ परमेशर फिरी एक्की होरि ठैरी ज़ोते,

“तू मेलिकिसिदकेरो *ज़ेरो

हमेशेरे लेइ याजक आस ।”

7 यीशुए एक्की मैनेरी ज़ेरि ज़िन्दगी गुज़ारनेरे दिहाडन मां फुकैरी-फुकैरी ते लेरां देइ-देइ परमेशेरे कां प्पार्थना ते बिनती की, ज़ै तैस मौती करां बच्चेइ सकतो थियो, ते परमेशेरे लेइ तैसेरे भेक्तेरे वजाई सेइं परमेशेरे तैसेरी फरयाद शुनी ।

8 ते परमेशेरू मट्टू भोइतां भी तैनी दुख झैल्लतां हुक्म मन्नो शिखो ।

9 ज़ैखन तैनी तैन सब कियूं ज़ैन तैनी कियेरू लोडतू थियूं, त ते तैन केरे लेइ हमेशेरे लेइ मुक्तेरो ज़िरयो बनो, ज़ैना तैसेरे हुक्म मन्तन ।

10 ते तैस परमेशेरी तरफां मेलिकिसिदकेरी ज़ेरि महायाजकेरी पदवी मैल्ली ।



11 असन कां इस बारे मां ज़ोनेरे लेइ बडू किछ़ आए, पन तुसन समझानू मुश्किले, किजोकि तुस समझाने मां सुसतथ ।

* 5:6 5:6 मेलिकिसिदक: मेलिकिसिदक अब्राहमेरे वक्ते महायाजक ते हकोमत केरनेवालो थियो

12 द्रासले मां अज्र तगर तुस गुरू बनोरे लोइते थिये, किजोकि तुसन विश्वास कियोरे बडू चिर भोरूए। पन हुन्ना त ज़रूरत इस गल्लरीए कि कोई मैन्हु तुसन परमेशोरे वचनेरी शुरुआतरी गल्लां दुबारां शिखाले। तुस तैन बच्चां केरे ज़ेरेथ ज़ैन हेजू दुद्ध पीतन ते शुरी रोट्टी न खेइ बटन।

13 ज़ै दुद्ध पीते, तै हेजू बच्चो भोते, किजोकि तैस नई पतो सही कुने ते गलत कुने।

14 पन शुरी रोट्टी तैन केरे लेइ भोचे ज़ैना विश्वासे मां बड्डेन, ते अपने तजरवे सेइं इस काबल भोरेन, कि रोडे ते बुरे मां फ़रक सेमझी सखन।

6

1 एल्हेरेलेइ एज्जा अस मसीहेरे बारे मां शुरुआतरी शिक्षारी गल्लां बार-बार दोरहानेरे बगैर अस सिधतारे पासे च़लते रहम। ते मौतरे पासे नेनेवाले कम्मन करां मन फिराम ते परमेशोरे पुइ विश्वास केरनो,

2 बपतिस्मे ते हथ रखनेरी शिक्षारे बारे मां, ते मुइदां केरे जीते भोनेरे बारे, ते हमेशोरे इन्साफेरे बारे मां दुबारा गल न केरम।

3 एज्जा अस परिपक्व विश्वासी बनम! अगर परमेशर अज़ाज़त दे त असां इन केरमेले।

4 ज़ैना लोक अपने विश्वास शारतन तैन फिरी मनफिरानेरे पासे केन्चरे आने गान? तैनी एक्की बारे परमेशोरे सच्च्चाई पिशानोरी थी, ते तैन स्वर्गोरां वरदाना मैलोरां थियोां ते तैनेई होरन सेइं साथी पवित्तर आत्मा हासिल कियोरो थियो।

5 तैनेई मैसूस कियोरू थियूं कि परमेशोरू वचन रोडू आए, ते तैनेई एजनेवाले ज़मानेरी शक्ति मैसूस कियोरी थी।

6 ते हुनी तैनेई अपनो विश्वासे शारोरो! एल्हेरेलेइ तैन मनफिरानेरे पासे आनू मुशकिले, किजोकि तैना एप्पू परमेशोरे मट्टे फिरी कूरूसे पुइ च़ाढ़ने लोरेन! ते लोकां केरे सामने तैसेरी बेइज़ी केरने लोरेन।

7 जैन लोकन रोड़ी शिक्षा मैलोरीए तैना तैस ज़मीनेरे ज़ेरे आन ज़ैस पुइ झैड़ी लग्गती रातीए। अगर ज़मीन रोड़ीए त ज़िमदारोरे लेइ रोड़ी फसल देचे, ते तैस परमेशोरी तरफां बरकत मैलचे।

8 होरे लोक तैस ज़मीनेरे ज़ेरे आन ज़ैस मां कंटे ते झैल्लां लगतन ते तै कोन्ची कम्मरी नई। ते परमेशर तैस ज़मीनी फिटकार देनेवालोए ते आखरी मां तैस अग्गी मां बरबाद केरेलो।

9 हे मेरे टलारे द्लाव ते बेइनव, हालांकी असां एरी गल्लां ज़ोतम फिर भी अस विश्वास केरतम कि एन तुश्शे लेइ नई। इश्शो भरोसोए कि तुस रोड़ी गल्लां केरे लेइ आथ ज़ैना मुक्तेरे ज़िरिये एइतिन।

10 किजोकि परमेशर बेइनसाफ नई कि ज़ै तुश्शू कम ते प्यार बिसरी गाए, ज़ै तुसेई तैसेरे लोकां केरि सेवा केरनेरे ज़िरिये तैसेरेलेइ हिरावरोए। ते परमेशर याद केरेलो कि तुस हेजू भी तैन केरि मदत केरने लोरेथ।

11 इश्शी इच्छा ई आए कि तुस ज़ांतगर ज़ीतिथ रोडो बर्ताव केरते राथ, इन पक्कू केरनेरे लेइ कि तुश्शी उमीद सन्न भोली।

12 तैखन तुस आलसी न बनेले। पन तुस तैन केरे ज़ेरे च़लेले ज़ैना अपने विश्वास ते सबारे वजाई सेइं परमेशोरे वादां केरे बारस भोले।

~~~~~

13 ज़ैखन परमेशर अब्राहमे सेइं वादो कियोरो थियो त कसम केरनेरे लेई तैस करां बड्डो कोई न थियो, एल्हेरेलेइ तैनी अपनि ही कसम कमाइतां ज़ोवं,

14 “अवं तीं सच्च्चे बरकत देइलो, ते तेरू वंश बेशुमार बेधेइलो।”

15 एल्हेरेलेइ अब्राहम तैन वादन हासिल केरनेरे लेइ सबरी सेइं इंतज़ार केरतो राव।

16 मैन्हु त एप्पू करां बडां केरे नव्वेरी कसम केरतन ते एन्चरे तैन हर मसलेरो हल कसम केरतां खतम भोते।

17 एल्हरेलेइ परमेशरे भी कसम खाइ, एन करेने सेइं तैनी तैन लोकन जैन सेइं वादो कियोरो थियो, इन हिरानू चाऊ कि जै वादो तैनी कियोरोए तै पूरो केरेलो ।

18 त इडी दई गल्लां आन तैसेरो वादो तें तैसेरी कसम, जैना कधे न बेदलोने ते तैन केरे बारे मां परमेशर कधे झूठ न ज़ोए । एल्हरेलेइ अस जैना तैसेरे सहारे मां ओरम त जै उमीद असन दित्तोरीए, तैस मां अस बनोरे रहम, ते अस बड़े जादे जोशे मां आम ।

19 इइशी उमीद पूराणा केरे लेइ पक्की आए तै टेली न बटे ते ई असन परमेशरे करां भटकने न दे, बल्के ई असन परमेशरे मन्दरे मां महा पवित्तर ठैरी पुजातीए ।

20 जैडी यीशु इइशे लेइ मेलिकिसिदक महायाजकेरो ज़ेरो हमेशारो महायाजक बेनतां इइशे लेइ बत हिराने बालेरो ज़ेरो दाखल भोव ।

7



1 ई मेलिकिसिदक शालेमरो राज़ो ते परमपूधान परमेशरेरो याजक थियो, जैसन अब्राहम राजन मैरतां वापस ओरो थियो, त मेलिकिसिदके तैस सेइं मिलतां तैसेरी बड़ी आदर की ते तैस बरकत दित्ती ।

2 अब्राहमे तैस तैन सेब्मी चीज़ां केरो दशोवं हिस्सो दित्तो जैना तैनी कब्ज़ो केरतां ऐनोरी थी । मेलिकिसिदकेरो नंब्वेरो मतलब धार्मिकतारो राज़ो आए, ते शालेमरो मतलब शैन्तरो राज़ो ।

3 तैसेरो न कोई बाज़ी, न अम्मा, न तैसेरू कोई वंशे, न तैसेरी ज़रमनेरे बारे मां न तैसेरे मरनेरे बारे मां लिखोरूए । तै परमेशरेरे मट्टेरो ज़ेरोए तै हमेशारे लेइ याजक बनोरो रहते ।

4 पन हुनी इस पुड़ ध्यान देथ मेलिकिसिदक केत्रो महान थियो । जैस पूर्वज अब्राहमे कब्ज़ो कियोरी चीज़ां केरो दशोवं हिस्सो दित्तो ।

5 मूसरे कानूनेरे मुताबिक जैना लेवेरे खानदाने मरां थिये यानी जैना याजक ठहराए गातन, तैन हुक्म दित्तो जोरोए कि तैना इस्राएली लोकन यानी अपने लोकन करां दशोवं हिस्सो नेन, हालांकी तैना भी अब्राहमेरी वंशे मरां आन ।

6 पन मेलिकिसिदके जै लेवी केरे वंशे मरां न थियो फिरी भी अब्राहमे करां दशोवं हिस्सो नीयो, ते तैस बरकत दित्ती जैस सेइं परमेशरे वादो कियो थियो ।

7 अस पक्कू ज्ञानतम कि जै बरकत देते तै बरकत मैलने बाले करां महान आए ।

8 ते याजक जैना दशोवं हिस्सो नेतन तैना तैन मैन्हु आन जैना मरतन, पन मेलिकिसिदक एन करां भी महान आए, किजोकि पवित्तरशास्त्र ज़ोते कि ते ज़ीतो आए ।

9 बल्के अस ज़ोई सकतम कि लेवी भी जै दशोवं हिस्सो नेते, अब्राहमेरे ज़िरिये मेलिकिसिदक जो दशोवं हिस्सो दित्तो ।

10 एल्हरेलेइ कि जैस मौके मेलिकिसिदके लेवेरे पूर्वज अब्राहमे सेइं मुलाकत की, तैस मौके लेवी ज़रमोरो भी न थियो ।



11 इना लेवी याजकेरे आधारे पुड़ कानून इस्राएली लोकन दित्तोरो थियो, अगर लेवी ते याजकेरू कम ठीक थियुं, त अलग किसमेरे याजकेरू बांदू भोनुं ज़रूरी न थियुं, जै मेलिकिसिदकेरो ज़ेरो आए । पन हारूनेरो ज़ेरो नई ।

12 किजोकि जैसन याजकेरी पदवी बेदलोतीए त कानूनेरू बेदलोनु भी ज़रूरीए ।

13 असां इना सैरी गल्लां मसीहेरे बारे मां ज़ोने लोरेम जै होरि गोत्त्रे मरां आए, ते तैस गोत्त्रे मरां केन्चे बलिदान केरनेरे ठैरी याजकेरी सेवा नई कियोरी ।

14 किजोकि इन अस ज्ञानतम, कि इइशो प्रभु यहूदारे गोत्त्रे मरां थियो । ते मूसा एस गोत्त्रे मरां याजकेरे पेदवरे बारे मां कोई गल नई कियोरी ।

15 मेलिकिसिदकेरो ज़ेरो अक होरो भी याजक एजने सेइं इन होरू भी साफ भोते ।

16 किजोकि यीशु कानूनेर हुकमेरे मुताबिक याजक लोडतो थियो, पन तै नाश न भोनेबैली जिनदगरे शेक्तेरे जिरिये महायाजक बनो।

17 किजोकि तैसेरे बारे मां परमेशर पवित्रशास्त्रे मां ई गवाही देते, “कि तू मेलिकिसिदकेरे जेरो हमेशारे लेइ याजक आस।”

18 एन्त्रे मूसेरो कानून कमजोर ते बेफल भोनेरे वजाई सेइं हुनी कम न केरि बटे।

19 (किजोकि मूसेरे कानूने कोई गल्ली सिद्ध न केरि बटी) पन हुनी असन कां अक रोड़ी उमीदे जेसेरे जिरिये सेइं असां परमेशरेरे सामने एज्जी बटतम।

20 ते परमेशरे भी तैस वक्ते कसम खाइ जैखन तैनी यीशु महायाजक बनाव।

21 किजोकि होरे याजक त बगैर कसमा याजक बनाए, पन जैखन यीशु, परमेशरेरी तरफां याजक बनाव त तैनी जौवं,

“अवं, प्रभु कसम खाताई, कि तू हमेशा याजक रालो

ते अवं अपने मने कधी न बेदलेलो।”

22 एल्हेरेलेइ यीशु जमानत देते कि पुरानो करार नव्वे करारे करां रोडो भोलो।

23 ते अक फर्के, किजोकि पेइले बड़े याजक बेनतां आए, पन तैना सब मरे ते तैनेई लगातार याजकेरू कम न केरि बट्ट।

24 पन यीशु आखरी तगर रानेबालो याजके ते एल्हेरेलेइ तैसेरी ठैरी होरो कोई याजक न रखवो जाए।

25 एल्हेरेलेइ जैना लोक यीशुएरे जिरिये सेइं परमेशरे कां एइतन, यीशु तैन पूरी-पूरी मुक्ति देइ बटते, किजोकि ते तैन केरे लेइ बिनती केरनेरे लेइ हमेशा जीतोए।

26 एल्हेरेलेइ असन एरे जेरो महायाजक जरूरी थी, जै इशे जेरूरतन पूरी केरे, जै पवित्र, निष्कपट ते शुद्ध, ते पैपन करां अलग भोए ते जै परमेशरे स्वर्गें जो नेवरो भोए।

27 ते होरि महायाजक केरू जेरू यीशु जरूरी नई, कि पेइले अपने पापां केरे लेइ ते फिरी अपने लोकां केरे पापां केरे लेइ रोज बलिदानां चाढ़े, किजोकि यीशुए सेव्भी लोकां केरे पापां केरे लेइ एक्की बार अपना आप बलिदान केरतां एरू बलिदान चाढ़ू जैन हमेशारे लेइ आए।

28 किजोकि मूसेरो कानून त तैन मैनन् महायाजक भोनेरे लेइ ठहराते जैना सिद्ध नई, पन मूसेरे कानूनेरे बाद परमेशरे कसम खेइतां अपना मट्टू ठहराव ते तैसेरू मट्टू हमेशारे लेइ सिद्ध महायाजक बनोरोए।

8

???? ???? ???? ??

1 जैना गल्लां हुन्ना अस जौने लोरिम तैन मरां सेभना बड्डी गल ई आए कि इशे एरो महायाजक, जै स्वर्गे मां परमेशरेरे महिमा बाले तखतेरे देइने पासे विशोरोए।

2 ते जै तैस महा पवित्र ठैरी ते तैस सच्चे तेम्बु मां सेवा केरते, जै केन्वे मैने नई बल्के परमेशरे खडो कियोरोए।

3 किजोकि हर महायाजक पापां केरे मैफरे लेइ चढतल ते बलिदान चाढ़नेरे लेइ ठहराव गाते, एल्हेरेलेइ जरूरी आए, कि इशे महायाजके (यीशु) कां भी किछ चाढ़नेरे लेइ भोए।

4 ते अगर यीशु दुनियाई मां बोथो त कथे कोई याजक न थियो भोनो, किजोकि इडी मूसेरे कानूनेरे मुताबिक चढतल चाढ़नेरे लेइ याजक आन।

5 इना याजक जैना कम केरतन, तैना सिर्फ स्वर्गेरी चीजां केरि नकल ते सैयोए, पन जैना चीजां स्वर्गे मां आन। एल्हेरेलेइ जैखन मूसा तेम्बु बनानेरी तियेरी मां थियो, त परमेशरे तैस हदैइयत दिती, “हेर जै नमूनो मीं तीं पहाड़े पुड़ हिरावरो थियो तैसेरे हिसाबे सेइं तू सैरी चीजां बना।”

6 पन हुनी जै महायाजकेरी सेवा यीशु दित्तोरी तै पुराने याजकेरे सेवाई करां बड़ी बड्डीए, किजोकि तै जैना गल्लां केरि बिचवाई करेते तैना पुराने करारे करां भी उच्ची आन, ते वादन पुङ तैसेरी बुनियादे ।

7 किजोकि अगर पेइले करारे मां कोई खांमी न भोथी त होरो करार केरनेरी कोई ज़रूरत न थी भोनी ।

8 पन परमेशर लोकन पुङ दोष लेइतां ज़ोते,
“तक्का प्रभु ज़ोते कि तै दिहाड़ी एज्जी राहोरीए,
इस्राएलेरे लोक ते यहूदारे लोकन सेइ साथी नंब्वो करार केरेलो ।

9 ए तैस करारेरो ज़ेरो न भोलो जै मीं तैन केरे दादे पड़दादन सेइ तैस दिहाड़े कियोरो थियो ।
जैखन मीं मिस्रे मरां तैन कढनेरे लेइ तैन केरो हथ ठमोरो थियो,
किजोकि प्रभु ज़ोते कि तैना मेरे तैस करारेरे मुताबिक वफादार न राए,
एल्हेरेलेइ मीं भी तैन केरे पासे कोई ध्यान न दित्तू ।

10 प्रभु ज़ोते कि जै करार अवं इस्राएलेरे लोकन सेइ तैस मौके केरेलो तै ईए,
कि अवं अपने कानून तैन केरे मन्न मां छुडेलो,
ते तैन केरे दिलन मां लिखेलो,
ते अवं तैन केरो परमेशर भोलो ते तैना मेरे लोक भोले ।

11 ते केन्वी ए ज़रूरत न भोली कि अपने पुङासन,
या अपने रिशतेदारन ए शिक्षा दे कि प्रभु पिशाना,
किजोकि निकड़े करां बड्डे तगर सब मीं पिशानेले ।

12 एल्हेरेलेइ अवं तैन केरे अधर्म माफ़ केरेलो,
ते तैन केरे पापन फिरी कधे याद न केरेलो ।”

13 जैखन परमेशेरे नंब्वो करारे कमाव त पेइलो करारे पुरानो बनाव, ते जै चीज पुरानी ते कमज़ोर भोती तै जल्दी खतम भोतीए ।

9

1 पेइले करारेरे मुताबिक भी परमेशेरी आराधना केरनेरे नियम थिये; ते आराधना केरनेरे लेइ मैन्हु केरि बनोरी अक ठार थी ।

2 यानी अक तेम्बु बनोरो थियो, ते तैसेरे दूई हिस्से थिये, पेइले हिस्से मां अक दीवट (दीयो), मेज़ ते ज़ेदोरी रोट्टी रेखोरी भोती थी, तैस हिस्से जो पवित्तर ठार ज़ोते थिये ।

3 ते होरि हिस्से मां पड़दे पतोरों तै ठार थी, तैस हिस्से जो परमपवित्तर ठार ज़ोते थिये ।

4 एसमां सोन्नेरी तै बलिदान केरनेरी ठार थी जैस पुङ खुशबूदार चीज़ां बालते थिये, ते ज़ेवरे पासन सोन्ने सेइ पलेटोरो करारेरो सुंदुख थियो । ते तैस सुंदुखे मां मन्ने सेइ भेरतां अक सोन्नेरू भांड थियू, ते कने हारूनेरी तै सोटी थी जैस पुङ पटलां लगगोरां थियां ते दूई घोड़ां केरि सलेटां थी, जैन पुङ दश हुक्म लिखोरे थिये ।

5 एस सुंदुखेरे बेइयें पासे महिमा बाले करूब* बनोरे थिये, जैना परमेशेरी मौजूदगी हिराते थिये । तैना अपन-अपने फगन सेइ तैस ठैरी सैयो केरि रावरे थिये, जैड़ी पाप माफ़ कियोरे थिये । पन हुनी इन गल्लन रोड़े चारे ज़ोनेरो वक्त नई ।

6 एना सब चीज़ां एस तरीके सेइ तियार केरनेरे बाद, याजक तेम्बेरे तैस पेइले हिस्से मां रोज़ गाते, ताके सेवारू कम पूरू केरन ।

7 पन परमपवित्तर ठैरी मां सिर्फ महायाजक साले मां सिर्फ एक्की बार गाते । ते तै भी खून घिन्तां ताके अपनि ते अपने लोकां केरे पापां केरे लेइ बलिदान ज़ादे, जैना तैनेई अनजाने मां किये ।

* 9:5 9:5 करूब सोन्नेरे फगन वाले पुराणी

8 एस नियमें सेइं पवित्तर आत्मा इन हिराते, कि जांतगर पेइलो तेम्बु आए, तांतगर परमपवित्तर टैरी गानेरी बत बंदे ।

9 ते इन सब किछ्इ इस वक्तोरे लेइ अक मसाले, एस सेइं एन बांद् भोते कि जै च्चढतल ते बलिदान याजक परमेशेरे जो चाढ़ते थियो, तैस सेइं आराधना करनेवालां केरो ज़मीर रोडे च्चारे शुद्ध न भोए ।

10 तैन केरो तलक सिर्फ खाने पीनेरे चीज ते अलग-अलग शुद्ध भोनेरे रसमन सेइं भोतो थियो । इन सिर्फ जिसमानी रसमां आन, इन तैखन तगर लागू भोतन जांतगर परमेशेरे नव्वां नियाम न बनाए ।

?????? ????????? ?????

11 पन ज़ैखन मसीह इश्शो महायाजक बेनतां अव, त तै रोड़ी चीजां घिन्तां अव जैना हुन्ना मौजूद आन । तै स्वर्गें मांजो परमेशेरे हज़ूरी मां जेव । ते तै हज़ूरी एक्की महान ते सिद्ध तेम्बेरो जेरि आए, जै मैन्हु केरे हथ्थां केरे ज़िरियो सेइं नईं बनोरो ते न दुनियारो ।

12 ज़ैखन मसीह तैस तेम्बु मांमेइं भोइतां पवित्तर टैरी दाखल भोव, त तैनी थावां ते बछ्छड़ां केरो खून नईं, बल्के अपने खूनेरे ज़िरियो एक्की फेरे पवित्तर टैरी दाखल भोव ते असन इश्शो पापन करां हमेशारे लेइ छुटकारो दित्तो ।

13 किजोकि ज़ैखन थावां ते दांतां केरो खून ते बेछ्छड़ी केरि मांजन अपवित्तर लोकन पुड़ छक्के गाने सेइं तैना लोक जिसमानी तरीके पवित्तर मन्ने गाते थियो,

14 त मसीहे सनातन आत्मारो ज़िरियो सेइं अपने आप परमेशेरे कां बगैर पापेरू बलिदान केरतां चाढ़, ते तैसेरो खून असन इश्शो ज़मीरेरे तैन कम्मन करां होरो भी जादे पवित्तर केरेलो, जैन केरो तलक मौती सेइं ए, ताके अस ज़ीते परमेशेरेरी आराधना केरम ।

15 एहे वजा आए कि परमेशेरे अपने ते दुनिया मझाटे मसीह बिचवाईं बनेइतां तैसेरे ज़िरियो सेइं अक नब्बो करार बनावरोए, ताके जैना परमेशेरे कुजोरेन तैना हमेशारी बरकत हासिल केरन जेसेरे लेइ परमेशेरे तैना कुजोरेन । किजोकि पेइले दित्तोरे करारेरे अधीन कियोरे पापन करां तैन आज्ञाद केरनेरे बदले मां मसीह मरौए ।

16 किजोकि वसीयतरे सिल्लले मां वसीयत देनेवालेरी मौत साबत भोनी ज़रूरीए ।

17 एल्हेरेलेइ वसीयत देनेवालेरे ज़ीते दम्मं तगर वसीयत कम्मरी न भोए, पन तैसेरे मरनेरे बाद तै वसीयत पक्की भोतीए ।

18 एहे वजा आए कि पेइलो करार भी खूनेरे बगैर नईं कियोरो ।

19 एन्चरां ज़ैखन मूसा सैरी लोकन कानूनेरो अक-अक हुक्म शुनाव, त तैनी थावां ते बछ्छड़ां केरो खून पैनी मां मिलाव, ते फिरी लाल उन्ना ते जूफा सेइं एन्तां कानूनेरी किताबी ते सैरी लोकन पुड़ छिडको ।

20 ते ज़ोवं कि, “ए तैस करारेरो खून जेसेरो हुक्म परमेशेरे तुश्शे लेइ दित्तोरोए ।”

21 एन्चरे तैनी तेम्बु पुड़ ते आराधना केनेरी सैरी चीजन पुड़ खून छिडको ।

22 किजोकि मूसे कानूनेरे मुताबिक लगभग सैरी चीजां खून सेइं पवित्तर की गोइचन, ते जांतगर खून न बगाव गाए, तांतगर पाप भी माफ़ न भोन ।

????????????????????????????

23 त फिरी ए ज़रूते कि तैना चीजां जैना स्वर्गेंरी नकल आन, तैना जानवरां केरे बलिदाने सेइं शुद्ध की गान । पन स्वर्गेंरी चीजन इन करां भी जादे रोड़े बलिदाने सेइं शुद्ध भोनेरी ज़रूते ।

24 किजोकि मसीह मैन्हु केरे बनेवरे घरे मां जैन सच्चे पवित्तर ठारारी नकले, दाखल नईं भोरो, बल्के स्वर्गें मां दाखल भोव ज़ैड़ी तै इश्शे लेइ परमेशेरे कां हाज़रे ।

25 यहूदी केरो महायाजक पवित्तर घरे मां हर साल होरि केरो यानी जानवरां केरो खून नेइतां गाते, पन मसीह अपने आपे बार-बार बलिदान केनेरे लेइ न गाए ।

26 वरना दुनियारे शुरू करां लेइतां हुन्ना तगर तैस बार-बार दुख झैलनो पथो; पन हुनी जुगोरे आखरी मां तै बांदो भोव, ताके अपने बलिदाने सेइं पाप दूर केरे।

27 ते जेन्चरे सेइं मैनेरू मरनू ते एक्की बार इन्साफेरू भोनू पक्कुए।

28 तेन्चरे सेइं मसीहे भी बडे लोकां केरे पाप सैल्लां गानेरे लेइ एक्की बार बलिदान भोव, ते दुवारां पापां केरू बलिदान देनेरे लेइ नई, बल्के तैन मुक्ति देनेरे लेइ एज्जेलो, जैना तैसेरे इंतजारे मां आन।

10

~~~~~

1 मूसरो कानून एजने बैली रोड़ी चीजां केरो सिर्फ अक सैयोए, न कि असली रूपे। एल्हेरेलेइ एक्की किसमेरां बलिदानां जैना हर साल चाढां गातन, तैना परमेशरे कां एजने बालन कधे भी सिद्ध न केरि सखन।

2 अगर केरि सखेथां, त कुन तैन केरू चाढनू बंद न भोथू? एल्हेरेलेइ अगर आराधना करनेवाले एक्की बार हमेशारे लेइ पवित्र भोइ गाथे, त तैन केरो ज़मीर तैन पापी न बनाथो।

3 पन तैना बलिदानां तैन लोकन हर साल याद करातन कि तैना पापिन।

4 किजोकि मुमकिन नई, कि दांतां केरो ते थावां केरो खून पापे दूर केरि सके।

5 एल्हेरेलेइ जैखन मसीह दुनियाई मां ओरो थियो, त तैनी परमेशर सेइं ज़ोरू थियूं,

“तीं बलिदान ते चढतल न चाई, बल्के तीं मेरे लेइ अक जान तियार की।

6 तू न भस्म भोनेवाले बलिदाने सेइं, ते न पापेरे बलिदाने सेइं खुश भोव।”

7 तैखन मसीहे जोव, “हे परमेशर, हेर, अवं तेरी इच्छा पूरी करनेरे लेइ ओरोई, जेन्चरे मेरे बारे मां पवित्रशास्त्रे मां लिखोरूए।”

8 पेइले त तै जोते, न तीं कोई बलिदान ते न कोई चढतल चाई, ते न भस्म भोनेवालू बलिदान ते न पापेरू बलिदान चाव, ते न तैन सेइं तू खुशी भोव, हालांकी एना बलिदानां मूसरे कानूनरे मुताबिक दितां गातन।

9 फिरी ते एन जोते, “हेर, अवं तेरी मर्जी पूरी करनेरे लेइ ओरोई,” एन्चरे तै पेइले सारे बलिदान न हटाते ताके तैन केरे ठैरी मसीहेरे बलिदाने रखे।

10 परमेशेरी मर्जी ई थी, कि यीशु मसीहेरे जिसम एक्की बार बलिदान भोने सेइं अस हमेशारे लेइ पवित्र भोम।

11 पेइले करारेरे मुताबिक हर याजक बलिदान करनेरे ठैरी खडे भोइतां रोज सेवा केरतन, ते एक्की किसमेरां बलिदानां बार-बार चाढतन, जैना पापे कधी भी दूर न केरि सखन।

12 पन मसीह जै इशशो महायाजके, इशशे पापां केरे लेइ एक्की बार बलिदान भोइतां परमेशेरे देइने पासे गेइतां बिशशी जेव।

13 तेई तै तैस वक्तेरो इंतजार केरने लोरोए, कि परमेशर तैसेरे दुश्मन पूरे तरीके सेइं हाराए।

14 तैनी एक्की बलिदाने सेइं जैना लोक पवित्र कियोरेन, तैना हमेशारे लेइ सिद्ध कियोरेन।

15 पवित्र आत्मा भी एस गल्लरी गवाही देते। पेइलू त एन जोते कि

16 “प्रभु जोते, कि जै करार अवं

तैन दिहैइना बाद अपने लोकन सेइं केरेलो तै ईए,

अवं अपने कानून तैन केरे मन्न मां छुडेलो

ते तैन केरे दिलन मां लिखेलो।”

17 ते फिरी एन भी जोते कि, “अवं तैन केरे पाप ते बुरां कम्मां माफ़ केरेलो, ते फिरी कधी याद न केरेलो।”

18 बस्सा, जैखन तैन केरे पापां केरि माफ़ी भोइजेइ, त फिरी पापां केरे लेइ बलिदानेरी ज़रूरत नई।

~~~~~

19 एल्हेरेलेइ दलाव ते बेइनव, असन यीशुएरे खूनेरे ज़िरिये सेइं मन्देरेरे परमपवित्र ठारी मां दाखल भोनेरी दिलेरी भोरीए ।

20 यीशुए इश्शे लेइ अक नर्वीं ते ज़िन्दगी देनेवाली बत खोलरोरीए, ज़ै तैनी पडदे मां यानी अपने जिसमे मां मौतरे ज़िरिये इश्शे लेइ बनाई ।

21 ते एल्हेरेलेइ इश्शे एत्रो महान याजक ज़ै परमेशेरेरे घेरो मुखतियारे ।

22 त एज्जा अस सच्चे दिले सेइं ते पूरे विश्वासे सेइं, ते एरो ज़मीर ज़ै खूनेरे तेप्पेइं सेइं पापेरे एसासे करां पवित्र कियोरे, ते एरो जिसम नेइतां ज़ै साफ पैनी सेइं धोवरोए, परमेशेरे कां नेम ।

23 ते अस एपनी उमीदरो इकरार रोडेचारे टलेइतां रखम, किजोकि ज़ैनी असन सेइं वादो कियोरोए तै सच्चोए ।

24 ते असेईं इस गल्लारू ध्यान लोडे रखोरू कि अस केन्चरे प्यार ते रोइं कम्मां केरे लेइ एक्की होरेरी हिम्मत बधाम ।

25 ते एक्की ठैरी अकोट्टू भोनू न शारम, जेन्चरे होरे लोक केरतन बल्के अस एक्की होरि हिम्मत देथ, तुस ज़ैस हिसाबे सेइं परमेशेरे दुबारे एजनेरी दिहैडी नेइंते लातथ तैस्से हिसाबे सेइं जादे एन गल्लन पुइ च़लते भी राथ ।

26 किजोकि अगर अस सन्न पिशानेरां बाद, ज़ैनी बुझतां पाप केरम त पापां केरे लेइ कोई बलिदान बाकी नईं रावरू ।

27 हाँ, परमेशेरेरे इन्साफ ते भयानक अग ज़ै परमेशेरेरे दुश्मन्न भस्म केरेली तै बाकी आए ।

28 ज़ैखन मूसेरे कानून न मन्नेवाले, दईं या टलाई मैन्हु केरे गवाही देने सेइं तैस मैन्हु बगैर दया केरतां मौतरी सज़ा दिती गातीए ।

29 त तै मैन्हु केतरी सज़ारो लैईक भोलो, ज़ैनी परमेशेरेरे मट्टू पावन हैट दलेन्चू, ते करारेरो खून ज़ैस सेइं तै पवित्र ठहरावरो थियो, तै अपवित्र समझो । ते पवित्र आत्मारी बेइजती की, ज़ेसेरे ज़िरिये असन अनुग्रह मैलते ।

30 किजोकि अस ज्ञानतम, तैनी जोरू थियूं, “बदलो घिन्नो मेरू कम्मे, अवं एप्पू बदलो देइलो ।” ते फिरी तैनी एन भी ज़ोवं, “परभु अपने लोकां केरि इन्साफ केरेलो ।”

31 ज़ीते परमेशेरेरे हथ्थन मां गानू बड़ी खतरनाक गल्ले ।

32 पन तैना पेइले दिहाडे याद केरा, ज़ैखन तुसन मसीह पिशानेरी ली मैल्ली, ते तैसेरे बाद तुसेईं बेइ मुशकलातां केरो दैटां मुकाबलोइ कियो ।

33 यानी कधे त तुस लोकां केरे तुहीन केने सेइं ते मुसीबती सेइं तुस तमाशो बने, ते कधी तुसेईं होरे मुसीबत बरदाशत केरते लाए ते तुसेईं तैन केरू साथ दिन्तू ।

34 किजोकि तुसेईं कैदन सेइं हमदरदी की, ते अपनो माल भी लुट्टानो खुशी सेइं कबूल कियो । किजोकि तुस ज्ञानते थियो कि अक बड़ी बड़डी खास मलकियत तुसन कां आए ज़ै हमेशारे लेईं आए ।

35 एल्हेरेलेइ तुस हिम्मत न हरा, किजोकि तैसेरो फल बड़ो बड़ोए ।

36 तुसेईं बेइ सबरी सेइं कम कियेरू लोइते, ताके तुस परमेशेरी मर्ज़ी पूरी केरतां तै चीज हासिल केरि सखथ ज़ेसेरो तैनी वादो कियोरोए ।

37 किजोकि ज़ेन्चरे पवित्रशास्त्रे मां लिखोरू आए,

“हुनी थोडु च़िर बाकी आए,

कि एजनेवालो एज्जेलो ते च़िर न लाएलो ।

38 पन मेरे धर्मी लोक मीं पुइ विश्वासे रखने सेइं ज़ीते राले,

अगर तैना मीं पुइ विश्वास केरने करां पत्रोवं हटन त मेरो दिल तैन पुइ खुश न भोलो ।”

39 पन अस हटने वाले नईं, कि परमेशेरे पुइ विश्वास केरने करां पत्रोवं हटम ते नाश भोम, बल्के अस विश्वास केरनेवाले आम, ताके इश्शे प्राण बचाए गान ।

11

??????????

- 1 हुनी विश्वास उमीद कियोरी चीजां केरू याकीन, ते अलैई चीजां केरू सबूते ।
- 2 इश्शे दादे पड़दादन भी एरो विश्वास थियो । एल्हेरेलेइ परमेशर तैन पुड़ खुश भोव ।
- 3 विश्वासे सेइं असन पतो लगते कि दुनियारी हर चीज परमेशेरे वचने सेइं बनोरीए । एल्हेरेलेइ जैन किछ् अस लहतम, तैन लेइहोने बैली चीजन सेइं नईं बनोरोए ।
- 4 विश्वासे सेइं आदमेरे मट्ठे हाबिले अपने बड्डे दूला कैने केरां रोडू बलिदान परमेशेरे लेइ ज़ादू । ज़ेसेरी वजाई सेइं परमेशेरे तैसेरू बलिदान कबूल कियू, ते तैसेरे बारे मां गवाही दिती, कि हाबिल धर्मी मैन्हु आए । हालांकी हाबिल मेरि जोरोए, फिरी भी अस तैसेरे विश्वासेरे ज़िरिये परमेशेरे पुड़ भरोसा केरनो शिखतम ।
- 5 विश्वासे सेइं हनोक नव्वेरो मैन्हु मौती करां पेइलो ज़ीतो स्वर्गे जो नीयो, ते तैसेरो पतो न चलो, किजोकि परमेशेरे तै स्वर्गे जो नीयोरो थियो, तैसेरे उबरे गाने करां पेइले तैसेरे हके मां गवाही दितीरी थी, कि तैनी परमेशर खुश कियो ।
- 6 किजोकि विश्वासेरे बगैर परमेशर खुश केरनो नामुमकिने, बस्सा रोडू एने कि परमेशेरे कां एजने बालन विश्वास कियोरो लोडे कि परमेशर आए, परमेशर तैन ज़ैना तैस सच्चैई सेइं तोपतन फल देते ।
- 7 विश्वासे सेइं नूहे तैन गल्लां केरे बारे मां ज़ैना एजनेबाले वक्ते मां भोनी बैली थी, परमेशेरे तरफां हुक्म मैलतां परमेशेरेरे प्यारे सेइं तैस पुड़ अमल कियू, ते अक किशती बनाई ज़ैस मां तैसेरू सारू टब्बर बच्, एन केरने सेइं तैनी सारी दुनिया मुजंम बनाई ते एप्पू तैस धार्मिकतारो बारस बनो ज़ै विश्वासे सेइं हासिल भोचे ।
- 8 विश्वासे सेइं ज़ैखन परमेशेरे अब्राहम, ज़ैस जगाई गाने जो परमेशेरे तै कुजोरो थियो, त तै हुक्म मेन्तां तैस जगाई चलो जेव, ज़ै जगाई वादे मां परमेशर तैस विरासतरो ज़ेरो देनेबालो थियो । हालांकी तै एन भी न थियो ज्ञानतो कि अवं कोरां चलोरोई, फिरी भी चलो जेव ।
- 9 विश्वासेरे ज़िरिये सेइं तै परमेशेरेरे कियोरे वादेरे मुताबिक तैस मुलखे मां परदेशी केरो ज़ेरो तेम्बन मां गेइतां बस्सो । ते तैस सेइं साथी तैसेरू मट्ठू इसहाक ते तैसेरू पोटलडू याकूब भी राए, तैन भी परमेशेरे करां तैए वादो मैलो ते तैना भी तेम्बन राए ।
- 10 किजोकि अब्राहम तैस नगरेरे इंतज़ारे मां थियो (ज़ैन स्वर्गे मांए) ज़ेसेरी मुनीयाद सदारे लेइ आए, ज़ेसेरो तियार केरनेबालो ते बनानेबालो परमेशेरे ।
- 11 विश्वासे सेइं सारा दोज़ीती भोनेरी ताकत हासिल की, हालांकी तै उमरारे हिसाबे सेइं बच्चो ज़ानेरे काबल न थी राहोरी, सारा एन याकीन थियू कि वादो केरनेबालो परमेशर अपने वादो पूरो केरेलो ।
- 12 ज़ेइस अब्राहम बडो बुड्डो थियो ते बच्चे पैदा केरनेरे काबल न थियो, अम्बरेरे तारां केरे ते समुदरेरी रेतारे बराबर एतूरू हच्छु वंश पैदा भोव ।
- 13 एन सेब्मी लोकेई परमेशेरे पुड़ भरोसा कियो ते मेरि जे, ते तैन तै कोई चीज न मैल्ली ज़ेसेरो वादो परमेशेरे कियोरो थियो, तैनेई समझू कि परमेशर एन एजनेबाले वक्ते मां केरेलो, ते तैना इन भी समझते थिये, कि तैना ज़मीनी पुड़ परदेशी ते मुसाफर आन ।
- 14 ज़ैना एरी गल्लां ज़ोतन तैन सेइं एन साबत भोते, कि तैना अज़ तगर अपने मुलखेरी तलाशी मां आन ।
- 15 अगर तैना तैस मुलखेरो खियाल रखते भोथे ज़ैस मरां तैना ओरे थिये, त तैना वापस गेइ बटते थिये ।
- 16 पन असलीती मां तैना एक्की रोडे स्वर्गेरे मुलखेरे उमीदी मां थिये, एल्हेरेलेइ परमेशर तैन केरो परमेशर ज़ुवाने सेइं खुश भोव, एल्हेरेलेइ तैनी तैन केरे लेइ अक नगर तियार कियोरोए ।

17 विश्वासे सेइं अब्राहमे अपने इम्तिहानेरे मौके अपने मट्ठे इसहाकेरू बलिदान देने करां न टलो, जैन तैस परमेशेरे वादे कबूल करने बद्द मैलोरो थियूं, तैस्से अकैल्ले मट्ठे बलिदान करने जो तियार भोइ जेव ।

18 हालांकी परमेशेरे तैस सेइं ज़ोरू थियूं, “कि इसहाकेरे वंशे सेइं तेरे वंशेरू नवं रालू ।”

19 किजोकि अब्राहमे याकीन थियूं, कि परमेशेरे कां मुड्दन ज़ीते केरनेरी शक्ति आए, एल्हेरेलेइ लेइ ज़ेन्चरे परमेशेरे इसहाक मुड्दन मरां फिरी वापस आनो ।

20 विश्वासे सेइं इसहाके अपने दुइये मट्ठन याकूवे ते एसावे आशिर्वाद दित्तो, कि एजनेवाले वक्ते मां तैना वादे पूरे भोले ।

21 विश्वासे सेइं याकूवे मरते वक्ते यूसुफेरे दुइये मट्ठन बरकत दित्ती ते अपने सोटेरे सहारे सेइं परमेशेरेरी आराधना की ।

22 विश्वासे सेइं यूसुफे मरते बार पूरे याकीन सेइं ज़ोरू थियूं, इस्राएली लोक मिस्र मुलख शारेले । ते तैन हुक्म दित्तोरो थियो कि ज़ेइस तैना मिस्र मुलखे मरां निसेले त तैना तैसेरी हेड्डी साथी नेन ।

23 विश्वासे सेइं मूसेरे हाज बव्वेई तैसेरे जरमनेरां पत्ती टलाई महीन्न तगर छेपेइतां रख्खो, किजोकि तैनेई हेरू कि तै बच्चो खासे, ते तैना राज़ेरो हुक्म टलोइने करां न डरे ।

24 विश्वासे सेइं मूसा बड्डे भोइतां फ़िरौनेरे कुड्यरू मट्ठ* वन्ने करां इन्कार कमाव ।

25 पापेरे थोडे दिहाडे आनन्देरी ज़िन्दगी गुज़ारनेरे बजाहे तैनी परमेशेरे लोकन सेइं साथी मिलतां दुख झैलनो चुनो ।

26 तैनी मसीहेरे लेइ दुख झैलनो मिसरेरे खज़ानन् करां जादे दौलत समझी, किजोकि तै ज्ञानतो थियो कि तैस स्वर्गें मां इनाम मैलनूए ।

27 विश्वासे सेइं तैनी राज़ेरे सरकरो डर न कियो, बल्के मिस्र मुलख छेडी दित्तो, एल्हेरेलेइ तैनी समझोरू थियूं ज़ेन्चरे तैनी न लेइहोने वाले परमेशेरे लाहू ।

28 विश्वासे सेइं मूसे इस्राएली लोकन हुक्म दित्तो कि तैना फ़सह तिहारेरी दिहाडी बनानी ते गबडेरो खून दारन छिड़कन, ताके मौतरो स्वर्गदूत ज़ै परमेशेरेरी तरफां भेजोरोए इस्राएलेरे पेइले मट्ठन न मैरी बटे ।

29 विश्वासे सेइं इस्राएली लोक लाल समुन्दरे मांमेइं एन्चरे लंघे ज़ेन्चरे शुक्कोरी ज़मीनी पुड्मेइं पार निस्से, पन ज़ैखन मिसरेइं तैट्टां पार लंघनेरी कोशिश की त तैना डुबतां मेरि जे ।

30 किजोकि इस्राएली लोकेई परमेशेरे पुड् विश्वास कियो, ते सत दिहैडन तगर यरीहो नगरेरे चक्कर लाए (ज़ेन्चरे परमेशेरे ज़ोरू थियूं) ते दिवार डुल्ली ।

31 विश्वासे सेइं राहाब वेश्या परमेशेरेरे हुक्म न मन्ने बालन साथी नाश न भोइ; एल्हेरेलेइ कि तैसां इस्राएली जासूस शैन्ति सेइं अपने घरे मां आने ज़ैना छेपतां यरूहो नगरे हेरने ओरे थियो ।

32 हुनी हारू किछ ज़ोनेरी ज़रूरत नई । हुनी मीं कां वक्त नई कि एरे ज़ेरे लोकां केरे बारे मां ज़ोई, ज़ेन्चरे गिदोन, बाराक, शिमशोन, यिफतह, दाऊद, ते शमूएल ते होरे नबी ।

33 तैनेई विश्वासे सेइं राज़ां ज़ीतां, ते धार्मिकतारां कम्मां कियां ते वादो कियोरी चीज़ां हासिल की, ते शेरेई तैना न खाए ।

34 अग्गां तैना न फुके, ते तलवारी सेइं तैना न मारे जे, ज़ैखन तैना कमज़ोर थिये तैखन तैन ताकतवर बनाए, ते जंगी मां भी बहादर निस्से, ते तैनेई दुश्मनां केरि फौज निशानी ।

35 विश्वासे सेइं किछ कुआन्शन अपने मुओरे लोक ज़ीतो मैल्ले, किछ मार खाते-खाते मेरि जे । ते तैनेई अपनो विश्वास शारनो न चाव, तैसेरे बदले मां तैनेई कैद रानू मन्ज़ूर कियूं, एल्हेरेलेइ तैना मरनेरां बाद फिरी ज़ीते भोन, ते तैन रोडी ज़िन्दगी मैल्ले ।

* 11:24 11:24 फ़िरौनेरे कुड्यरू मट्ठ: किजोकि फ़िरौन राज़ेरे कुड्यां मूसे पालोरो थियो तांए तैस जो फ़िरौनेरे कुड्यरू मट्ठ ज़ोते थियो ।

36 किछ लोकां केरो मज्जाक बनाव जेव, किछ लोकन कोड़े बाए, ते किछ शंगलन सेइ बंधे ते केदखाने मां छुडे ।

37 ते किछन घोड़ेई बेई; ते आरे सेइ चिरे, ते तलवारी सेइ मारे जे । तैना गरीब थिये, तैन दुःख दित्तो जेव ते तैन सेइ बुरो बताव कियो जेव । तैना भेइडां छैल्ली केरि खाड़ी लेइतां इरां उरां नशते थिये ।

38 तैना जंगलन ते पहाइन ते कुढन मां ते धेरतरे खडन मामेइं हंठते थिये ।

39 इन बुरू संसार तैन विश्वासी लोकां केरे काबल न थियुं, तैन सेब्भी केरे विश्वासेरे वजाई सेइं परमेशर तैन पुड़ खुश भोव, पन तैन, तैन मैल्लू जेसेरो वादो परमेशरे कियोरो थियो ।

40 किजोकि परमेशरे कां न सिर्फ तैन केरे लेइ बल्के इशे लेइ रोड़ी योजनाए । परमेशरे तैन शुद्ध बनानो चाते, पन सिर्फ असन सेइं साथी ।

12

~~~~~

1 एल्हेरेलेइ जैखन गवाहां केरे एत्रो बड़डो घाने असां घेरोरेम, त अस भी सैरी रकावटां ते तैस पापे दूर केरम जै असन उलझाते, ते तैस दौड़ी जै असेईं दौवइनीए बल्हे सेइं दौवइम ।

2 एज्जा अस विश्वासे मां पवित्तर केनेबाले यीशु पुड़ नजर रखम, जैनी तैस खुशारे लेइ जै तैसेरी नजरी मां थियो, बेइजतरी परवाह न की, बल्के कूरूसरो दुख झैल्लो ते परमेशरेरे तखतरे देइने पासे गेइतां विश्शो ।

3 तुस एस गल्ली पुड़ खियाल केरा, कि अपने खलाफत केनेबाले जैनी पैपी केरि तरफां केत्रो दुख झैलो, ताके बेदिल भोइतां हिम्मत न हैरी ।

4 तुसेईं पापे सेइं लइते-लइते हेजू तगर एत्रो मुकाबलो नई कियोरो कि तुसेईं अपनो खून बगावरो भोए ।

5 ते तुसेईं तैन समझानू बिसरी छुइइ, कि जैस मां तुसन जो मट्ठां ज़ोवं, "कि हे मेरे वच्चव परमेशरेरे हुक्मे एरे न समझा ।

ते जैखन प्रभु तीं झिइके त शारनेरे जेरे मैसूस न केर ।

6 किजोकि जैस सेइं परमेशर प्यार केरते तैस झिइते भी, ते जैस तै अपनू मट्टू बनाते तैस सोटेईं भी वाते ।"

7 ए हदैइत तुशे समझनेरे लेइए, एस बल्हे सेइं बरदाशत केरा, परमेशर तुसन अपना मट्ठां समझतां बताव केरते, किजोकि तैन कौन जेरू मट्टूए जैस तैसेरो बाजी समझाए नन्ना?

8 पन अगर तुसन सुधारे न गाथ जैस शामिल त तुस न गैर औलाद भोनेथ न की अपना मट्ठां ।

9 एसेरे अलावा जैखन इशे जिसमानी बाजी सुधारते रहते थिये ते अस तैन केरि इज्जत केरते राए, त कुन आत्मां केरो बाजी यानी परमेशरेरी जादे इज्जत न केरम ताके ज़ीते राम ।

10 इशे जिसमानी बाजी त थोड़े दिहाड़ां केरे लेइ एपनी समझरे मुताबिक असन सुधारते रहते थिये, पन परमेशर इशे फेइदेरे लेइ असन सुधारते ताके असां तैसेरी पवित्तरतैईं मां शामिल भोम ।

11 एसमां शक नई कि जैखन केन्ची हदैइत की गाचे त ते खुशी नई, बल्के बड़ बुरू बुझते, पन जैखन ते बले-बले पक्की भोइ गाते त तैस वादे मां धर्मी बेनतां चंनरो फल मैलते ।

~~~~~

12 बस्सा एपनी कमजोर पैखइन ते कमजोर जैन्धु मज्जबूत केरा ।

13 ते अपने पावन सिधी बत्तां ज़लाथ ताके टॉटे टेपलोए न ते तैना बेझोन ।

14 सेब्बन सेइं मेल मिलापे सेइं राथ, ते ते पवित्तरताई हासिल केनेरी हर वक्त कोशिश केरा जेसेरे बगैर कोई प्रभु न लेईं सके ।

15 खबरदार एरू न भोए कि कोई मैन्हु परमेशरेरे अनुग्रह करां रेइ गाए, एरू न भोए कि कोई दलिटू ज़ील लग्गे ते तुसन परेशान केरे ते हारे लोक भी भिटे भोइ गान ।

16 ते न कोई मैन्हु तुसन मां बदमाशी करनेवालो भोए, या एसावेरो ज़ेरो अधर्मी न बने, ज़ैनी एक्की वार रोट्टी खानेरे लेइ अपने बड़डे भोनेरू हक बेचतां छूट्ट।

17 किजोकि तुस ज्ञानतथ कि बादे मां ज़ैखन तैनी ते बरकत हासिल करनेरी कोशिश की, त तैस न मैल्ली, तैस अपनि नियत बदलनेरो मौको न मैलो हालांकी ते लेरां देइ-देइ तैस तोपनेरी कोशिश केरतो राव।

18 तुस तैस पहाड़े कां नेडे नई ओरे, ज़ैस सेइं तुस हुरी सकते थिए, तैन पहाड़ अगगी सेइं फुकोत् थियूं ते अंधगुबारी ते बड़ो तूफान थियो।

19 तैड़ी नइशिंगेरी शोर ते ज़ोने शुनाने वालेरी एरी आवाज़ शुनोती थी, कि ज़ैखन लोकेई ते आवाज़ शुनी त मिनत करने लगे, कि असन सेइं होरि गल्लां न केर।

20 एल्हेरेलेइ कि तेनेईं तै हुकम बरदाशत न केरि बटो, “अगर कोई जानवर भी एस पहाड़े सेइं हुरेलो त तै घोड़ेईं बैइतां मारो गालो।”

21 तै नज़ारो एतरो खतरनाक थियो कि मूसे ज़ोवं, “अवं डरने ते थरकने लोरोईं।”

22 बल्के तुस सिय्योनेरे पहाड़े ते ज़ीते परमेशेरे नगर यानी स्वर्गेर यरूशलेमे मां लखेइं स्वर्गदूतन कां खुशी मनाने ओरेथ।

23 ते तुस परमेशेरी पेइले बच्चां केरि सभाईं मां ते कलीसियाईं मां ओरेथ, एना तैना लोकन ज़ैन केरां नव्वां स्वर्गे मां लिखेरेन, तुस इन्साफ करनेवाले परमेशेरे कां ओरेथ, ते धेरमी केरि आत्मन कां ओरेथ, यानी तैन कां ज़ैना सिद्ध कियोरेन।

24 तुस नव्वे करारे बिचवाईं करनेवाले यीशु ते तैसेरे छिड़कोरे खूने कां ओरेथ, ज़ै हाबिलेरे खूने करां रोड़ी गल्लां ज़ोते।

25 खबरदार राथ, तुस परमेशर ज़ै तुसन सेइं गल्लां केरते तैसेरो इन्कार न केरथ, किजोकि ज़ैनेईं ज़मीनी पुड़ हदैइत करनेवालेरो इन्कार कियो त तैना न बच्चे, त अगर अस स्वर्गे हदैइत करनेवालेरो इन्कार केरमेले त केन्चरे बंचमेले?

26 तैखन तैसेरी आवाज़ी सेइं धरती हिली जेईं पन तैनी ई वादो कियोरोए कि, “एक्की फेरे फिरी अवं सिर्फ ज़मीन नई बल्के अम्बरे भी हिलेइलो।”

27 तैसेरू “एक्की फेरे फिरी” ज़ोने सेइं साफ पतो लगते की पैदा कियोरी चीज़ां ज़ैना हिलचन तैना खतम भोनिन ताके ज़ैना हिलन नन्ना तैना रैनिन।

28 ज़ैड़ी असन तैन राज़ मैलने लोरूए ज़ैन हिलनेरू नईं त एज्जा अस तैसेरू शुक्र केरम ते हिम्मत केरम कि, अस परमेशेरी आराधना परमेशेरे डरे सेइं केरि बटम ज़ैस सेइं ते खुश भोए।

29 किजोकि इश्शो परमेशर भस्म करनेवैली अगारो ज़ेरोए।

13

13:1-16

1 एक्की होरि सेइं दूला ते बेइनां केरो ज़ेरो प्यार केरते राथ।

2 बखले लोकां केरि खातरदारी केरा, किजोकि एरू करने सेइं किछेईं अनजाने मां स्वर्गदूतां केरि खातरदारी कियोरीए।

3 कैदन याद रखा, मन्ना कि ज़ेन्चरे तुस एण्यू भी तैन सेइं साथी कैद आथ, ते ज़ैन सेइं बुरो बर्ताव भोते तैन भी याद रखा, इन सेमझतां मन्ना कि ज़ेन्चरे तुसन सेइं बुरो बर्ताव भोव।

4 इला बनानो सेब्मी लोकन मां इज्जतरती गल समझी गाए, ते कुआन्श ते मइद एक्की होरेरे लेइ वफादार रान, किजोकि परमेशर बदमाशी करने ते नाजाइज़ रिशते रखनेवालां केरो इन्साफ केरेलो।

5 अपने आपे दौलतरे लालचरे करां दूर रखा, ते ज़ैतरू तुसन कां आए तैस्से मां राज़ी राथ, किजोकि परमेशेरे एण्यू एन ज़ोरूए, “अवं तीं करां कधे भी दूर न भोइलो, ते न कधे तीं शेरलो।”

6 एल्हेरेलेइ अस दिलेरी सेइं ज़ोईं सकतम कि, “परभु मेरो महत करनेवालोए, अवं डेरि नन्ना इन्सान मेरू कुन बगेड़ी सकते?”

7 जैना तुशुशे अगुवे थिये, तैन याद रखा, जैनेई तुसन परमेशेरे बच्चन शुनावरू थियुं, इस गल्ली पुड ध्यान देथ, कि तैना केरी ज़िन्दगी गुज़ैरतां चले जे, ते ज़ेरो विश्वास तैन थियो तुस भी तैन केरो ज़ेरो विश्वास केरा ।

8 यीशु मसीह हीज ते अज़ बल्के हमेशारे लेइ अक्कां ज़ेरोए ।

9 अलग-अलग किसमां केरि शिक्षाई सेइं न टेपलोथ, रोडू एन्ने कि तुशुशो दिल परमेशेरे अनुग्रहे सेइं मज़बूत राए, न कि एरो परहेज़ेरे खाने सेइं, ज़ेसेरे खाने बालन कोई फैइदो न मैलो ।

10 इशुशी अक एरी बलिदान केरनेरी ठारे, तैस मरां तैन खानेरी कोई अज़ाज़त नई ज़ैना तेम्बु मां सेवा केरतन ।

11 किजोकि महायाजक ज़ैन जानवरां केरो खून मन्देरे मां परमपवित्र टैरी मां पापेरे बलिदानेरे लेइ नेतो थियो, तैन केरो बाकी जिसम ज़ैडी इस्राएली लोक रहते थिये तैट्टां बेइर फुकते थिये ।

12 एल्हेरेलेइ, यीशुए भी लोक एप्पू अपने खूने सेइं पवित्र केरनेरे लेइ यरूशलेम नगरे करां बेइर दुःख झैल्लो ते मरो ।

13 एल्हेरेलेइ, एज्जा अस भी यहूदी केरि रसमन शैरतां यीशु पुड विश्वास केरम ते तैसेरो ज़ेरो दुःख ते निन्दा झैल्लम ।

14 किजोकि ई दुनिया इशू हमेशारू घर नई, पन अस एजनेवाले घरेरे इंतज़ारे मां आम ज़ैन एजनेवाले वक्ते मां इशू भोलू ।

15 एल्हेरेलेइ असां यीशुए ज़िरिये परमेशेरे लेइ तारीफरू बलिदान चादम, यानी ज़ैखन अस अपने शब्दन सेइं इकरार केरतम कि यीशु इशुशो प्रभु आए ।

16 पन भलाई केरनि ते ज़ैन ज़रूरते तैन केरि मद्दत केरा, किजोकि परमेशर एरे ज़ेरे बलिदान्न् सेइं खुश भोते ।

17 अपने अगुवां केरो हुक्म मन्ना, ते तैन केरे अधीन राथ, किजोकि तैन केरे ज़िमेदारी कि तैना प्राणा केरि रखवाली केरन, ते एस कम्मेरो तैनेई परमेशेरे हिसाब भी देने पेनोए । अगर तुस तैन केरो हुक्म मन्नेले त तैना अपनू कम खुशी सेइं केरेले त तुसन फैइदो भोलो, पन अगर तैस कम तकलीफ बुझेले त तुसन कोई फैइदो न भोलो ।

18 इशुशो लेइ प्रार्थना केरते राथ, असन याकीने इशुशो ज़मीर साफे, ते अस हर हिसावे सेइं नेक नीती सेइं ज़िन्दगी गुज़ारनी चातम ।

19 अवं तुसन कां बिनती केरताई कि मेरे लेइ प्रार्थना केरा, कि अवं फिरी लूशी तुसन कां एज्जी सेखी ।

20 हुनी शान्ति देनेवालो परमेशर, ज़ैनी भैड्डां केरो महान रखवालो मतलब प्रभु यीशु मसीहे, इशुशे प्रभु हमेशारे करारेरे खूने सेइं मुडदन मरां जीतो कियो,

21 तुसन हर रोडे कम्मे मां सिद्ध केरे, ज़ैस सेइं तुस तैसेरी मर्जी पूरी केरथ, ते ज़ैन किच्छ परमेशेरे पसंद एइते तैस यीशु मसीहेरे ज़िरिये असन मां केरे, ते मसीहेरी बडयाई हमेशा-हमेशा भोती राए, आमीन ।

22 हे दूलाव ते बेइनव, अवं तुसन कां बिनती केरताई कि मेरी तुस तैना गल्लां सबरी सेइं शुना, ज़ैना मीं तुशुशे हिम्मत बद्दानेरे लेइ लिखोरिन, किजोकि ई चिट्ठी ज़ै मीं तुसन लिखी बडी नई ।

23 ताके तुसन पतो लगगे कि इशुशो विश्वासी दूला तीमुथियुस कैदेरां छुटोरोए, ते अगर तै जल्दी अव, त अस दुइये तुसन सेइं मिलमेले ।

24 अपने सेब्भी विश्वासी लोकन ते सेब्भी पवित्र लोकन जो इशू नमस्कार ज़ोथ । इतालिया मुलखेरे विश्वासी लोकेई तुसन जो नमस्कार ज़ोरूए ।

25 तुसन सेब्भन पुड परमेशेरो अनुग्रह भोतो राए, आमीन ।

याकूब

??????

1 अवं याकूब, जै परमेशर ते प्रभु यीशु मसीहेरे दास आईं। अवं तैन 12 यहूदी गोत्रां केरे विश्वासी लोकन जैना तितर बितर भोइतां सारे दुनियाई मां रातन, तैन जो नमस्कार लिखताईं।

?????? ? ? ? ? ? ? ? ? ? ?

2 हे मेरे दूलाव ते बेइनव, जैखन तुसन पुइ अलग-अलग किसमां केरि अज्रमैइशां एज्जन, त एस खुशारी गल समझा,

3 किजोकि तुस ज्ञानतथ, तुशशे विश्वासेरे परखे गाने सेइं इन साबत भोते, कि तुस हेजू तगर भी परमेशरे पुइ भरोसो रखतथ, ते तुस मुशकलन सबरी सेइं झल्लेले।

4 पन मुशकलन मां सबर केरनि शिख्वा, कि तुस आत्मिकता मां मज्रबूत ते सिद्ध भोते गाथ, ते तुसन मां कोन्ची रोड़ी गल्लरी घटी न भोए।

5 पन अगर तुसन मरां कोन्ची अक्लारी घटी भोए, त तै परमेशरे करां मग्गे, जै बगैर दोष लेइतां सेभन खुशी सेइं देते, त मगने बाले दित्ती गाली।

6 पन विश्वासे सेइं मग्गे, ते शक न केरे। किजोकि शक केरनेबालो समुन्दरेरी छेल्ली केरो ज़ेरोए, जैना हवाई सेइं चेलतिन ते उछड़तिन।

7 एरो मैन्हु इन न समझे, कि मीं प्रभु करां किछ मैलेलू।

8 ई मैन्हु दूमन्नोए ते एपनी सैरी गल्लन मां चंचल आए।

???? ? ? ? ? ? ?

9 गरीब विश्वासी दूला खुश भोए, किजोकि परमेशरे तैसेरी आदर कियोरीए।

10 ते धनी विश्वासी अपने घटिया हालती पुइ खुश भोए, किजोकि घासेरे फूडोवेंरो ज़ेरो मिटी गातो।

11 दिहाड़ा निसते बड़ी धुप पतीए, ते घासे शुकाते, ते तैसेरू फूडोव झैड़ी गाते, ते तैसेरी शोभा गाती रहतीए; तेन्त्रे दौलतमन्द दूला भी अपने कम्मन मां मैरी गानेन।

??? ? ? ? ? ? ? ?

12 धने तै मैन्हु, जै अज्रमैइशी मां मज्रबूत रहते; किजोकि तै अपनो विश्वास साबत केरतां जिन्दगरू तैन इनाम हासिल केरेलो, जेसेरो वादो प्रभुए तैन सेइं कियोरोए, जैना तैस सेइं प्यार केरतन।

13 जैखन कोन्चेरी अज्रमैइश भोए, त तै इन न ज़ोए, कि मेरी अज्रमैइश परमेशरेरी तरफां भोतीए। न बुरी गल्लन सेइं परमेशरेरी अज्रमैइश भोइ बटतीए, ते न तै बुरी गल्लन सेइं केन्चेरी अज्रमैइश केरते।

14 पन हर कोई अपने खुवैइशन मां खिचोइतां, ते फेसतां अज्रमैइशी मां गाते।

15 ते फिरी वुरू केरनेरी खुवैइशरो नितीजो ई भोते, कि मैन्हु बुरी चीजां केरतन, ते आखरी मां तैन हमेशारी सजा मैलतीए।

16 हे मेरे टलारे दूलाव ते बेइनव, धोखो न खाथ।

17 किजोकि हर रोडू वरदान, ते हर रोडू दान इशशे बाजी परमेशरेरे तरफां आए, जैनी सैरी लोआं (यानी दिहाड़ा चाँदनी, तारे) बनेइं। परमेशर हमेशा अक्कां ज़ेरो आए, तै छावरो ज़ेरो न बेदलो।

18 तैने अपने मेर्जां सेइं असन सच्चरे वचने ज़िरिये सेइं नव्वीं जिन्दगी दित्ती, ताके अस तैसेरी सच्चनाई मरां फसलारे ज़ेरे पेइले फल भोम।

?????? ? ? ? ? ? ? ? ?

19 मेरे ट्लारे द्दलाव ते बेइनव, ई गल तुस ज्ञानतथ, एल्हेरेलेइ हर कोई मैन्हु शुन्नेरे लेइ हुशार ते ज़ोने मां पत्रोवं भोए, ते सरकी मां ढिल्लो भोए।

20 किजोकि ज़ैखन मैन्हु सरकी मां भोए त तै धार्मिकतारू कम न केरि बटे ज़ैस सेइं परमेशर खुश भोए।

21 एल्हेरेलेइ सारी गंदगी ते दुष्ट दूर केरतां, तैन परमेशररू वचन नेरमी सेइं कबूल केरे, ज़ैन दिले मां छड़इ जेव, ज़ैन तुशे प्राणन मुक्ति देइ बटते।

22 पन परमेशररेरे वचने पुइ च़लनेवाला बना, ते सिर्फ शुन्ने बाले नईं, ज़ैना अपने आपे धोखो देतन।

23 किजोकि ज़ै परमेशररू वचन शुन्ने बालो भोए, ते तैस पुइ च़लने बालो न भोए, त तै तैस मैनेरो ज़ेरोए, ज़ै अपनू तुतर शीशे मां हेरते।


24 ते तै अपनो आप हेरतां च़लो गाते, ते तैखने बिसरते कि अवं केरो थियो।

25 पन ज़ै मैन्हु कानूने ध्यान सेइं पढते, ज़ै पूरे तरीके सेइं असन आज़ादी देते, सिर्फ शुन्ने न पन तेन्चरे कम केरते, तै अपने कम्मे मां बरकत हासिल केरेलो।

26 अगर कोई अपनो आप भक्त समझे, ते अपनि ज़िभी कैवू मां न रखे, तै अपने आपे धोखो देते, ते तैसेरी भक्ति बेफ़ैइदी आए।

27 इशे वाजी परमेशररेरे नेइं शुद्ध ते रोड़ी भक्ति ई आए, कि बे सहारां ते विधवां केरे मुसीबती मां खबर नी गाए, ते अपनो आप दुनियारे बुरे सुभावेरे अस्सरे करां दूर रखम।

2



1 हे मेरे द्दलाव ते बेइनव, इशो महिमा बालो परभु यीशु मसीहेरो विश्वास तुसन मां तरफ़दैरी सेइं न भोए।

2 अगर अक मैन्हु सोन्नेरे छल्ले ते रोड़ां लिगड़ां लेइतां तुशे झुण्डे मां एज्जे ते अक गरीब भी मेलां लिगड़ां लेइतां एज्जे।

3 ते तुस तैस रोड़े लिगड़न बालेरू तुतर हेरतां ज़ोथ, “तू इड़ी रोड़ी टैरी बिश,” ते तैस गरीबे सेइं ज़ोथ, “कि तू इड़ी खड़ा रा, या इड़ी तल्ले बिश।”

4 त कुन तुसेईं भेद भाव न कियो, ते बुरे खियाले सेइं इन्साफ़ केनेबाले न भोए?

5 हे मेरे ट्लारे द्दलाव ते बेइनव शुना, कुन परमेशरे दुनियारे गरीब न चुने, कि विश्वासे मां धनी भोन, ते तैस राज्जरे बारस भोन, ज़ेसेरो वादो तैने तैन सेइं कियोरोए ज़ैना तैस सेइं प्यार केरतन।

6 पन तुसेईं तैस गरीबेरी बेइज्जती की, कुन धनी लोक तुसन पुइ ज़ुलम न केरन? ते कुन तैना तुसन आदालतन मां घसीटी-घसीटी न नेन?

7 कुन तैना तैस रोड़े नंखेरी तुहीन न केरन ज़ेसेरे तुसन ज़ो ज़ोतन?

8 फिरी भी तुस पवित्रशास्त्ररेरे इस वचनेरे मुताबिक, कि “तू अपने पड़ोसी सेइं अपनो ज़ेरो प्यार केर,” सच्चे तैस राज़-कानून पूरो केरतथ, त रोड़ू केरतथ।

9 पन अगर तुस तरफ़दारी केरतथ, त पाप केरतथ; ते मूसेरो कानून तुसन पापी ठहराते।

10 किजोकि अगर कोई मूसेरे सारे कानूने पुइ च़लते, ते एक्की गल्लती पुइ न च़ेलि बटो त तै सेब्भी गल्लन मां दोषी भोते।

11 एल्हेरेलेइ कि ज़ैने इन ज़ोवं, कि “तू बदमाशी न केरां,” तैने इन भी ज़ोवं, “तू खून न केरां” एल्हेरेलेइ अगर तीं बदमाशी न की, पन खून कियो फिरी भी तू मूसेरे कानूने पुइ च़लने बालो न भोव।

12 तुशशी गल्लां ते बर्ताव तैन लोकां केरे ज़ेरो भोए, ज़ैन केरो इन्साफ़ आज़ादी देनेबाले कानूनेरे मुताबिक भोलो।

13 किजोकि ज़ैने दया न की तैसेरो इन्साफ बगैर दयाई सेइं भोलो। दया इन्साफे करां भारी भोतीए।

?????? ? ? ?

14 हे मेरे दूलाव ते बेइनव, अगर कोई ज़ोए कि मीं यीशु मसीह पुड़ विश्वासे, पन होरि केरे लेइ रोड़ां कम्मां न केरतो भोए, त तैस सेइं कुन फैइदो? कुन एरो विश्वास तैस मुक्ति देइ बटते?

15 अगर कोई विश्वासी दूला या बेइन भोए ज़ैन लिगाड़ा केरि ज़रूरत भोए, ते तैन रोज़ खाने जो न भोए।

16 ते तुसन मरां कोई तैन सेइं ज़ोए, “खुशी सेइं गाथ परमेशर तुसन बरकत दे,” तुस गर्म राथ, ते रज्जा; पन ज़ैना चीजां जानरे लेइ ज़रूरिन तैना तैन न दे, त कुन फैइदो?

17 तेन्चरे विश्वास भी, अगर रोड़े कम्मन सेइं न भोए, त अपने सुभावे मां मरौए।

18 बल्के कोई ज़ोई बटते कि, “तीं विश्वासे, ते अवं रोड़ां कम्मां केरताई।” पन अवं ज़ोताई तू अपनो विश्वास मीं रोड़ां कम्मां केरे बगैर हिरा, ते अवं अपनो विश्वास रोड़े कम्मन सेइं तीं हिरालो।

19 तीं विश्वासे कि अक्के परमेशरे, तू रोड़ू केरतस, भूतां भी विश्वास केरतन, ते थरकतन।

20 पन हे निकम्मे मैन्हु तू इन न ज़ानस, कि रोड़े कम्मन बगैर विश्वास मरौए।

21 ज़ैखन इश्शे पूर्वज अब्राहमे अपनू मट्टू इसहाक बलिदान केरनेरे ठैरी पुड़ ज़ादू, त कुन तै कम्मन सेइं धर्मी न भोव?

22 तीं हेरू कि विश्वासे तैसेरे कम्मन सेइं साथी अस्सर कियोरोए, ते कम्मन सेइं विश्वास सिद्ध भोव।

23 ते पवित्रशास्त्रेरो ई वचन पूरो भोव, “कि अब्राहमे परमेशरे पुड़ विश्वास कियो, ते तै तैसेरेलेइ धार्मिकता गनो जेव,” ते तै परमेशरेरो दोस्त भोव।

24 ते तुसेईं हेरू कि मैन्हु सिर्फ विश्वासे सेइं नई, बल्के कम्मन सेइं भी धर्मी भोते।

25 तेन्चरे राहाव वेश्यां भी ज़ैखन तैसां बिस्तार देनेवाले लोक अपने घरे मां रखे, ते होरि बत्तां वापस भेजे, त कुन कम्मन सेइं धर्मी न भोइ?

26 ते ज़ेन्चरे जान आत्मा बगैर मरौं आए, तेन्चरे विश्वास भी रोड़े कम्मन बगैर मरौंए।

3

???? ???? ???? ???? ?

1 हे मेरे दूलाव ते बेइनव, तुसन मरां बड़े परमेशरेरे वचनेरे उस्ताद न भोन, किजोकि तुसन पतोए, कि इश्शो उस्तादां केरो इन्साफ जादे सेखती सेइं भोलो।

2 अस बड़े बार गेलती केरतम, ज़ै ज़ोने मां गलती न केरे, तैए सिद्ध मैनुए, ते सारे जानी कैवू केरते।

3 ज़ैखन अस अपने कैवू मां केरनेरे लेइ घोड़ां केरे ऐशी मां लगाम लातम, त अस तैन केरि सारी जानी भी फेरी सखम।

4 हेरा, पेनेरां ज़िहाजां भी, अगर बडां भोतन, ते तेज हवाई सेइं चलां गातन, फिरी भी एक्की निकड़ी पतवारी सेइं चलानेवालो अपने मेर्जी सेइं फिराते।

5 तेन्चरे जिभ भी, अगर अक निकड़ो अंगे, ते बेड़ि-बेड़ि घमण्डेरी गल्लां केरती, तक्का, थोड़ी ज़ेरि अग्गी सेइं केतरे बड़े-बड़े जंगले मां अग लाई गातीए।

6 जिभ भी अक अगारी ज़ेरीए, जिभ इश्शे जानी मां अक बुरो हिस्सो आए, ते सैरी जानी पुड़ कलक लातीए, ते ज़िन्दगरी दुनियाई मां अग लातीए, ते नरकेरी अग्गी सेइं बलती रहतीए।

7 हर किसमां केरे जंगली जानवर, चुड़ोल्, ते पेटेरे भारे बाले जीप जन्तू ते दरियारे जानवर त इन्सानेरे हथ्थे एज्जी बटतन ते ओरे भी आन।

8 पन जिभ भी मैनन् मरां कोई भी कैवू मां न केरि सके, तै अक एरी बलाए ज़ै कधे रुके न, तै सप्पेरे ज़ेहेरे ज़ेरीए नुकसान देने वालीए।

9 इस्से ज़िभी सेइं अस परभु ते बाजी परमेशेरी तारीफ़ केरतम, ते इस्से सेइं मैन्हु, ज़ै परमेशेरे रूपे मां बनोरोए शराप देतम।

10 एककी ऐशी सेइं शुक्र ते शराप निसतन। हे मेरे दूलाव ते बेइनव एरू न लोडे भोरू।

11 कुन एककी नागे मरां मिट्टू ते लूनू पानी निस्सी बटते?

12 हे मेरे दूलाव ते बेइनव, कुन फ़ेगोरो बुटे पुड़ ज़ैतून, या दाछी पुड़ फ़ैगू लेगि बटतन? तेन्त्रे लूनो नाग भी मिट्टू पानी न निस्सी बटे।

????????????

13 तुसन मरां ज्ञानी ते समझदार कौने? ज़ै एरो भोए तै अपने कम्मन रोडे चाल चलने सेइं तैस नमरता सेइं साथी बांदो केरे ज़ै ज्ञाने सेइं पैदा भोतीए।

14 पन अगर तुस अपने-अपने मने मां सखत जलन, ते खुदगरज़ी रखतथ, त बेड़ि-बेड़ि गल्लां न केरथ ते सच्चेरे खलाफ झूठ न ज़ोइयथ।

15 इन ज्ञान तैन नई, ज़ैन स्वर्गोरां ओरूए बल्के दुनियारू, ते जिसमानी, ते शैतानीए।

16 एल्हेरेलेइ कि ज़ैड़ी जलन, ते खुदगरज़ी भोतीए, तैड़ी फसाद ते हर बुरू कम भोते।

17 पन ज़ैन ज्ञान स्वर्गोरां एइते तैन पेइलू त पवित्तर भोते, फिरी मिलनसार, हलीम ते शिखालने बालू, ते दया ते रोडे कम्मन सेइं ते बगैर तरफदारी ते पाखंडे बगैर भोते।

18 ते मिलाप केराने बालां केरे लेइ धार्मिकतरो फल मेल मलापे सेइं साथी बेव गाते।

4

????????????

1 तुसन मां लड़ाई ते झगड़ कोट्टां एइतन? कुन तैन खुवैइशन सेइं नई ज़ैना तुश्शे अंगन मां लेइतिन?

2 तुस खुवैइश रखतथ, पन तुसन मैल्ले न, एल्हेरेलेइ तुस खून ते जलन केरतथ, ते किछ हासिल न केरि बटथ तुस झगड़तथ ते लइतथ; तुसन एल्हेरेलेइ न मैल्ले, कि तुस मगतथ न।

3 तुस मगतथ ते मैल्ले न, किजोकि बुरी इच्छा सेइं मगतथ, ताके अपने एशे मां खर्च केरथ।

4 हे बेईमान लोकव, कुन तुस न ज्ञानथ, कि दुनियारी चीज़न सेइं दोस्ती रखनी परमेशेरे सेइं बैर केरनोए, ज़ै कोई दुनियारो दोस्त भोनो चाते, तै अपनो आप परमेशेरो दुश्मन बनाते।

5 कुन तुस इन समझतथ, कि पवित्तरशास्त्र बैफैइद् ज़ोते कि, “ज़ै आत्मा तैने असन मां छुड़ी, कुन तै एरी इच्छा केरती, ज़ेसेरो फल जलन भोए?”

6 पन ज़ै अनुग्रह परमेशर देते तै बड़ो मज़बूते, एल्हेरेलेइ पवित्तरशास्त्रे मां इन लिखोरूए, “कि परमेशर अभिमान केरनेबालां केरो मुकाबलो केरते, पन दीनन पुड़ अनुग्रह केरते।”

7 एल्हेरेलेइ परमेशेरे अधीन भोथ, ते ज़ैन शैतान तुसन करां करानू चाते तैन न केरा, त तै तुसन करां दूर नशेलो।

8 परमेशेरे नेडे एज्जा, त तै तुश्शे नेडे एज्जेलो, हे पापी लोकव, अपने ज़िन्दगी करां पाप दूर केरा, ते हे दुमन्ने बाले लोकव अपने मन्न पवित्तर केरा।

9 अपने पापां केरे वजाई सेइं दुखी भोथ, ते शोग केरा, ते लेरां देथ, तुश्शी हासी शोगे मां, ते तुश्शी खुशी उदैसी मां बेदलोए।

10 परभुएरे सामने नम्र बना, त तै तुसन इज़्जत देइतां उच्चे केरेलो।

????????????

11 हे दूलाव ते बेइनव, एककी होरेरी तुहीन न केरा, ज़ै अपने दूलाएरी तुहीन केरते, या अपने दूलाए पुड़ दोष लाते, ते मूसेरे कानूनेरी भी तुहीन केरते, ते मूसेरे कानूने पुड़ दोष लाते, ते अगर तू कानूने पुड़ दोष लातस, त तू कानूने पुड़ चलने बालो न भोव, पन तैसेरो हाकिम भोव।

12 मूसेरो कानून देनेबालो ते हाकिम त अक्के, तै परमेशर आए, ज़ैस कां बच्चाने ते नाश केरनेरी शक्ति आए, तू कौन आस, ज़ै अपने पड़ोसी पुड़ दोष लातस?

????????????????

13 तुस ज़ैना इन ज़ोतथ, “कि अज़ या कालां अस कोन्ची होरि नगर मां गेइतां अक साल बीतामेले, ते बुपार केरतां फैइदो उठामेले।”

14 ते इन न ज़ानथ कि कालां कुन भोलू, शुना, तुशशी ज़िन्दगी आए कुन? तुस त भाखेरे ज़ेरेथ, ज़ै थोड़े चिरे लेइहोते, ते फिरी गेइब भोते।

15 एल्हरेलेइ तुसेई इन ज़ोरू लोड़े, “अगर प्रभु चाए, त अस ज़ीते रहमेले, ते इन या तैन कम भी केरमेले।”

16 पन हुनी तुस अपने अभिमाने पुड़ घमण्ड केरतथ, एरू सब घमण्ड बुरू भोते।

17 एल्हरेलेइ ज़ै कोई भलाई केरनि ज़ानते ते न केरे, तैसेरेलेइ ई पापे।

5

????????????????

1 हे दौलतमदव विश्वासी लोकव, शुना, तुस अपने एजनेबाले दुखेरे लेइ ज़ोरे-ज़ोरे लेरां देथ।

2 तुशशू धन नाश भोवं ते तुशशे लिगडन खर लगगे।

3 तुशशे सोन्ने चैदी मोरचो लगगे, ज़ेइस परमेशेरे तुशशो इन्साफ केरेलो त ई मोरचो तुशशे खलाफ गवाहरो ज़ेरो भोलो, ते अगगारो ज़ेरो तुशशू मास फुकलो, तुसेई आखरी युगे मां धन अकोट्टू कियूं।

4 तक्का, ज़ैन मज़दूरेई तुशशां ऊडारां कट्टां, तैन केरि ते मज़दूरी ज़ै तुसेई तैन न दित्ती, चिन्डां मारने लोरीए, ते फसल कटने बालां केरि फरयाद फौज़ेरे परमेशेरे शुनोरीए।

5 तुस धेरती पुड़ एश केरने मां लगगोरो राए, तुसेई सिर्फ अपने सुखेरे लेइ ज़िन्दगी ज़ी, एल्हरेलेइ तुसेई अपनो आप तैस दिहाड़ेरे लेइ तियार कियोरोए ज़ेइस परमेशेरे तुशशो इन्साफ केरेलो।

6 तुसेई धर्मी दोषी बनेइतां मारो, ते तुशशे सामनो न केरे।

????????????????

7 ते हे दूलाव ते बेइनव, प्रभुएरे एजने तगर सबरी सेइं बलगा, हेरा, ज़मीनदार कीमती फसलरे कीमती फलेरे उमीदरो पेइली ते आखरी झैडी भोने तगर सबरी सेइं बलगते।

8 तुस भी तेन्चरे सबरी सेइं बलगा, ते अपने दिले मज़बूत केरा, किजोकि प्रभुएरू एजनु नैडूए।

9 हे दूलाव ते बेइनव, एक्की होरि पुड़ दोष न लाथ ताके तुसन पुड़ भी दोष न लाव गाए, हेरा, हाकिम नैडे ते एजनेरे लेइ तियारे।

10 हे दूलाव ते बेइनव, ज़ैन नेबेई प्रभुएरे नंवे सेइं गल्लां की, तैन सबर केरनेरो अक नमूनो समझा।

11 हेरा, अस बलगने बालन जो धन ज़ोतम, तुसेई अय्यूबेरे सबरारे बारे मां शुनोरूए, ते प्रभु करां तैसेरो ज़ै प्रतिफल भोव तैने भी बुझू, ज़ैस सेइं प्रभुएरी बड़ी महरबानी ते दया बादी भोतीए

12 पन हे मेरे दूलाव ते बेइनव, सेब्बन करां बड्डी गल ईए, कि कसम न खाथ, न स्वर्गोरी न धेरतरी, न होरि कोन्ची चीज़री, पन तुशशी गल हांएरी हाँ, ते न एरी नां भोए, फिरी परमेशेरे तुसन सज़ा न देलो।

????????????????

13 अगर तुसन मां कोई दुखी भोए त तै प्रार्थना केरे, अगर खुश भोए, त परमेशेरां भजना ज़ोए।

14 अगर तुसन मां कोई रोगी भोए, त कलीसियारे बुज़ुर्गन कुजाए, ते तैना प्रभुएरे नंवे सेइं तैस पुड़ तेल मेलतां तैसेरेलेइ प्रार्थना केरन।

15 ते विश्वासेरी प्रार्थनाई सेइं रोगी बचेलो ते प्रभु तैस बज्जालो, ते अगर तैने पाप कियोरे भोले त परमेशेरे तैस माफ़ केरेलो।

16 एल्हरेलेइ तुस एक्की होरेरे सामने अपने-अपने पाप मन्ना, ते एक्की होरेरे लेइ प्रार्थना केरा, ज़ैस सेइं तुस बेज्झोथ, धर्मी मैनेरे प्रार्थनारे अस्सेरे सेइं बडू किछ भोइ बटते।

17 एलिय्याह भी इशशो ज़ेरो दुःख सुख झैल्लने वालो मैन्हु थियो, तैने दिले सेइं प्रार्थना की, कि झैडी न भोए, ते सडे ट्लाई साल झैडी न भोइ।

18 फिरी तैने प्रार्थना की, त अम्बेरेरां झैडी भोइ, ते धेरती पुड फसल भोइ।

19 हे मेरे द्वाव ते बेइनव, अगर कोई विश्वासी परमेशेरी सच्च्ची शिक्षा मन्नी शारे, ते कोई तैस मनफिरानेरे लेइ मद्दत केरे,

20 त तै इन बुझे, कि ज़ै कोई कोन्ची भटकोरे पैपी मनफिरानेरे लेइ मद्दत केरे, त तै एक्की प्राणे (मैन्हु) मौती करां बच्चालो, ते परमेशर तैसेरे बडे पाप भी माफ़ केरेलो।

1 पतरस

१११११११ १११११११

1 अवं पतरस यीशु मसीहेरो परेरित आई, अवं ई चिट्टी परमेशेरे चुनोरे लोकां केरे लेइ लिखने लोरोई, जैना परदेशी केरे जेरे पुन्तुस, गलातिया, कप्पदकिया, आसिया ते बितूनिया इलाकां केरे अलग-अलग नगरन मां तितर-बितर भोइतां रातन ।

2 बाजी परमेशेरे बडो पेइलो ई फैसलो कियोरो थियो कि तुस तैसेरे लोक भोथ त कने तै तुसन पवित्तर आत्माेरे कम्मरे जिरिये पवित्तर बनाए । तैने एन एल्हेरेलेइ कियूं ताके तुस यीशु मसीहेरी मन्नथ ते तैसेरे खूनेरे जिरिये सेइ शुद्ध भोथ । अवं प्रार्थना केरताई कि परमेशर तुसन अनुग्रह ते शान्ति जादे करां जादे दे ।

११ ११११११ १११११

3 इश्शे प्रभु यीशु मसीहेरे बाजी ते परमेशेरू शुकर भोए, परमेशेरे असन पुइ महान दया केरतां असन नर्वीं जिन्दगी दिती । किजोकि परमेशेरे यीशु मसीह मुइदन मरां ज़ीतो कियो त कने तैने अस पूरी उमीदी सेइ जीनेरे काबल बनोरम, मतलब असन तैन चीजां हासिल केनेरी पूरी उमीदे, जैन केरो देनेरो वादो परमेशेरे असन सेइ कियोरोए ।

4 अस तैस विरासती हासिल केनेरो इंतज़ार केने लोरेम जै परमेशेरे इश्शे लेइ तियार कियोरोए । कोई भी तैन चीजन कधी बरबाद न केरि बटे । किछ भी तैस खराब केरि बटे । तैना चीजां कधी भी पुरैनी न भोली ते तैन केरि खूबसूरती कधे न घटेली । परमेशेरे इना चीजां तुश्शे लेइ स्वर्ग मां रेखोरिन ।

5 परमेशर तुसन अपने महान शेक्तेरे जिरिये सेइ सम्भाले, किजोकि तुस यीशु पुइ विश्वास केरतथ । तै तुसन यीशु मसीहेरे वापस एजने तगर सम्भलतां रखेलो । तेइस तुस जानले कि परमेशेरे तुस पापे करां ते मौती करां पूरे तरीके सेइ बचावरेथ ।

6 तुसेई इन सेबमी चीजां केरे बारे मां खुश भोरू लोडे, चाए हुना किछ वक्तेरे लेइ अलग-अलग किसमेरी मुसीबतां तुसन दुखी केरतन ।

7 इन मुसीबतां केरो मकसद ई आए कि इन बांदू भोए कि तुस सच्चे परमेशेरे पुइ विश्वास केरतथ । तुश्शो यीशु मसीह पुइ विश्वास केरनो सोन्ने करां भी जादे कीमतीए । जेन्चरे नाश भोनेबालू सोन्नु अगगी सेइ परखू ते शुद्ध कियूं गाते, तेन्चरे अगर तुश्शो विश्वास अगारे जेरे अज़मैइशन सेइ परखनेरे बाद भी मज़बूत रहते त जेइस यीशु मसीह फिरी एज्जेलो, परमेशर तुसन जो शाबाश ज़ोलो, महिमा ते आदर देलो ।

8 तुसेई यीशु मसीह कधे नई लवरो, पन फिरी भी तुस तैस सेइ प्यार केरतथ । तुस हुना तैस न लाथ पन तुस तैस पुइ विश्वास केरतथ । एसेरो नितीजो ई आए, कि तुस बडे खुश आथ । तुस एतरे खुश आथ कि लफज़न मां बियांन न केरोए ।

9 तुस एल्हेरेलेइ खुश आथ किजोकि परमेशर तुश्शे प्राण पापेरे सज़ाई करां बचाने लोरोए । इन यीशु मसीह मां तुश्शे विश्वासेरू इनामे ।

10 ई मुक्ति किछ एरी थी जेसेरे बारे मां नबी बडू ज्ञाननू चाते थिये । तैनेई ज़ोवं केन्चरे परमेशर तुसन पुइ अनुग्रह केरतां बचालो जेसेरे काबल तुस न थिये, तैनेई बडी जांच पड़ताल की, कि तैन जुवाब मैल्ले ।

11 मसीहेरो आत्मा तैन मां थियो ते तैन सेइ ज़ोने लोरो थियो कि मसीहे केन्चरे दुःख झैल्लेलो ते तैटटां बाद तैस महान आदर दिती गाली । एल्हेरेलेइ तैना इन खोज केरतां तोपने लगे कि सच्चे मसीह कौन भोलो ते इन केइस भोलू ।

12 पन परमेशेरे इन अपने गल्लां ज़ोनेबालन सेइ ज़ोवं, कि तैन केरो सन्देश तैन केरे अपने आपेरे लेइ नई, पन तुश्शे लेइ आए । ते सन्देश यीशु मसीहेरे बारे मां खुशखबरी आए, जै तुसेई इस वक्त

शुनी। परमेशेरे स्वर्गोरां पवित्तर आत्मा भेज्जो कि लोकां केरि मद्दत केरे कि तैना तुसन खुशखबरी शुनान। इन सब एत्तू हैरान केरनेबालू ए कि स्वर्गदूत भी इन हेरनेरी बडी इच्छा रखतन।

13 एल्हेरलेइ अपने मन तियार केरा ते अपने आपे कैबू मां रख्वा। तैस मुक्तरी उमीद रख्वा जै तुसन अनुगरहे सेइं तेइस मैलनी जेइस यीशु मसीह दुबारा इस दुनियाई मां एज्जोए।

14 परमेशेरे मन्ना किजोकि तुस तैसेरे बच्चेथ। बुरां कम्मां न केरा जैना तुस बुरी इच्छाई सेइं केरते थिये जेइस तुस परमेशेरे सच्चाई न थिये जानते।

15 पन हुनी तुस जैन किछ्छ् केरतथ तैस मां पवित्तर भोथ, जेन्चरे परमेशर पवित्तेरे जैने तुस अपने बच्चे भोनेरे लेइ चुनोरेथ।

16 किजोकि पवित्तरशास्त्रे मां परमेशेरे जेवळू ए “पवित्तर बना, किजोकि अवं पवित्तर आई।”

17 जैखन तुस परार्थना केरतथ तुस परमेशेरे जो वाजी ज्योतथ। पन याद रख्वा तै तरफदारी न केरे। एल्हेरलेइ जैखन तुस इस दुनियाई मां परदेशी केरे जेरे रातथ त तुसेईं तैसेरी बडी इज्जत कियोरी लोडे।

18 किजोकि तुस जानतथ, बीतोरे वक्ते मां तुस बेकार तरीके सेइं ज्योते थिये जेन्चरे तुशेरे दादे-पडदादे ज्योते थिये। पन हुनी तुस बेकार जिन्दगी करां छुटावरेथ, तुस नाश भोनेवाले सोन्ने चैदी सेइं नईं घिन्नोरे,

19 पन मसीहेरे कीमती खूने सेइं घिन्नोरेथ, मसीह जै शुद्ध ते सिद्ध गबडेरो जेरोए।

20 दुनिया बनाने करां पेइले परमेशेरे इन ठहरावरू थियू कि यीशु मसीह मुक्ति देनेबालो भोलो। पन तै इन आखरी दिहाइन मां इस दुनियाई मां अव ताके तुशशी मद्दत केरे।

21 यीशु मसीहे जैन कियू तैसेरे वजाई सेइं तुस हुनी परमेशेरे पुड विश्वास केरतथ, तैए आए जैने यीशु मसीह मुडदन मरां ज्योतो कियो ते तैस आदर दिती ताके तुशशो विश्वास ते उमीद परमेशेरे पुड भोए।

22 किजोकि तुस सच्च मन्नेरे जिरिये शुद्ध कियोरेथ, ते हुनी तुसेईं विश्वासी सैथन सेइं इमानदेरी सेइं प्यार कियोरो लोडे। तुसेईं एक्की होरि सेइं गहराई ते पूरे दिले सेइं प्यार कियोरो लोडे।

23 किजोकि तुसन परमेशेरेरी तरफां नव्वीं जिन्दगी मैलोरी। तुसेईं ईं जिन्दगी एरी चीजी सेइं नईं हासिल कियोरी जै नाश भोली। पन तैस सेइं जैन हमेशा रालू। मतलब परमेशेरेरे ज्योते ते हमेशा रानेवाले वचने सेइं मैलोरीए।

24 किजोकि पवित्तरशास्त्र ज्योते “सारे लोक घासेरे जेरे आन ते तैन केरि शोभा जंगली फूडोवेरी जेरीए। घास शुक्की गालो ते फूडोव झेडी गालू।

25 पन प्रभूएरू वचन सदा बनोरू रालू, ते वचन मसीहेरे बारे मां खुशखबरी जैन तुसन शुनव जेवं।”

2

1 एल्हेरलेइ सब किसमेरो बुरा सलूख केरनो शारा। होरन धोखो न देथ, पाखंड न केरा। ते होरन सेइं जलन न केरा। होरि केरे बारे मां बुरी गल्लां न ज्योथ।

2 जेन्चरे नव्वे जमोरे बच्चे अपने अम्मारे खालिस दुद्धेरी इच्छा रखतन, तेन्चरे तुस भी परमेशेरे वचन शिखनेरे लेइ इच्छा रख्वा जैस सेइं तुस आत्मिक तरीके सेइं मजबूत बनेले। फिरी आखरी मां परमेशर तुसन दुनियारी बुरी चीज्जन करां पूरे तरीके सेइं बज्जालो।

3 जेन्चरे पवित्तरशास्त्र ज्योते, “तुसेईं तजरवे सेइं जानेरूए कि प्रभु भलो आए।”

4-5 तुस प्रभु यीशु कां ओरेथ। तै खास घोडेर जेरोए जै घरेरे बुनियादी मां लोरोए, पन तै ज्योतो घोडे। बडे लोकेईं तै रद कियो, पन परमेशेरे तै चुनो ते बडो कीमती मन्नो। जेन्चरे लोक घोडन सेइं घर बनातन, तेन्चरे परमेशर तुसन एक्की एरे झुण्डे मां शामिल भोनेरी वजा बनाने लोरोए, जैस मां

परमेशेरो आत्मा रहते, ताके तुस जैन यीशु मसीहे इशे लेइ कियोरूए तैसेरे वजाई सेइं याजक बना, जैना बलिदाना चादतन, तुस भी तैन केरां जेरां रोडां कम्मां केरथ जैन सेइं परमेशर खुश भोते ।

6 एल्हेरेलेइ जेन्चरे परमेशर पवित्रशास्त्रे मां ज़ोते,
“तक्का, अवं अक मैन्हु सिय्योन नगरे मां रखने लोरोई ।

जै कूनेरो खास ते चुनोरो घोड़े,

तै अक कीमती घोडरो जेरो जै मुनीयादी मां रखवोरोए ।

ते जै तैस पुइ विश्वास केरेलो तै कोन्ची भी तरीके सेइं शरमिनदो न भोलो ।”

7 तुस जैना यीशु मसीह पुइ विश्वास केरतथ ई घोड़ तुशे लेइ बडो कीमतीए । पन पवित्रशास्त्र तैन लोकां केरे बारे मां ज़ोते जैना विश्वास न केरन,

“जै घोड़ राज मिस्त्रेई इस्तेमाल केरनो न चाव,

तैए धरेरे मुनीयादरो खास घोड़ भोव,”

8 ते पवित्रशास्त्र फिरी ज़ोते,

“ई घोड़ लोकां केरे बिछुड़नेरी वजा भोलो ।

ई अक चट्टाने जै तैन बिछोड़ेली ।”

तैना एन्चरे बिछुड़तन किजोकि तैना परमेशेरे सन्देश मन्ने करां इन्कार केरतन । तैन सेइं इन भोनेरे लेइ परमेशर इन थापेरू थियूं ।

9 पन तुस तैन केरे जेरे नई किजोकि तुस परमेशेरे चुनोरे लोक आथ, परमेशर जै राजोए, तुस तैसेरे याजक आथ, तुस एरे लोक आथ जैनेईं अपनो आप परमेशेरे सोंफोरोए, ते परमेशेरे अपने लोक आथ । तैने तुस आंधरे मरां बड़े लोईं मां कुजावरेथ, ताके तुस परमेशेरे महान कम्मां केरे बारे मां एलान केरथ ।

10 तुशे बारे मां होशे नेबे जैन ज़ोरू तैन सच्चरे,

“तुस पेइले परमेशेरे लोक न थिये पन हुनी तुस परमेशेरे लोक आथ ।

तुस पुइ पेइले परमेशेरी दयाईं न थिये ज़ानते पन हुनी ज़ानतथ,

किजोकि तैने तुसन पुइ अपनि दया हिरावरीए ।”



11 हे टलाराव, तुस इस दुनियाईं मां परदेशी ते मुसाफरां केरे जेरे ज़ीने लोरेथ, अवं तुसन खबरदार केरताई, कि तुस जिसमेरी सेरी पापी खुवेइशन करां दूर राथ, किजोकि तैना हमेशा तुशे आत्माेरे खलाफ लेइतन ।

12 जैना लोक परमेशेरे पुइ विश्वास न केरन तैना तुशे चेवरे पासन रहतन, तैना ज़ोले तुस गलत केरने लोरेथ । तुस एरी रोड़ी ज़िन्दगी ज़ीथ कि लोक तुशे रोडां कम्मां हेरतां तैस दिहाड़े ज़ेइस यीशु मसीह दुबारा एजनो परमेशेरी बडयाईं केरेले ।



13 प्रभुएरे इज्जतरे खातर, मैन्हु केरे ठहरावरे हर एक्की अधिकारेरे अधीन राथ, किजोकि ई प्रभुएरी इच्छा आए, हकोमत केरनेवालारे अधीन एल्हेरेलेइ राथ किजोकि तै बडो खास अधिकारी आए ।

14 ते हाकिमेरे भी अधीन भोथ, किजोकि राजो तैस बुरां कम्मां केरनेबालन सज़ा देने लेइ ते रोडां कम्मां केरनेबालां केरि तारीफ़ केरनेरे लेइ इस्तेमाल केरते ।

15 किजोकि परमेशेरी मर्जी ईए, कि तुस रोडां कम्मां केरतां तैना बेवकूफ लोकन जैना परमेशेरे न ज़ानन, तुशे खलाफ दोष लाने करां रोक्थ ।

16 हुनी तुस पापेरे गुलाम नईं किजोकि तुस इशे प्रभु यीशु मसीहेरे ज़िरिये आज़ाद कियोरेथ । पन अपनि ई आज़ादी बुरे कम्मां केरे लेइ इस्तेमाल न केरा, पन तुस भला कम्मां केरे ज़िरिये इन हिराथ कि तुस सच्चरे परमेशेरे दास आथ ।

17 सेन्बी केरि आदर केरा, अपने विश्वासी साथी लोकन सेइं प्यार केरा, परमेशरे करां डरा, हकोमत करनेबालेरी इज्जत केरा।

18 हे घरन मां कम करनेबाले सेवकव, तुस जैना विश्वासी आथ अपने मालिकां केरे हुकम मन्ना ते हमेशा तैन केरि आदर केरा। इन न सिर्फ दया करनेबालन सेइं केरा, बल्के जैना दया न केरन तैन सेइं भी।

19 किजोकि अगर अस बगैर गलती केरतां दुःख झैल्लतम त अस ज्ञानतम कि परमेशरे सब किछ् ज्ञानते ते परमेशर असन सेइं खुश भोते।

20 किजोकि अगर तुसेईं पाप केरतां मार खाइ त तुशशी कोई बडयाई नई कि तुसेईं सजाई मां सवर की। पन अगर भलाई केरतां दुःख झैल्लतथ ते सवर केरतथ त इस सेइं परमेशर खुश भोते।

21 परमेशरे तुसन कुजानेरी अक वजा ई भी आए कि तुस तैसेरेलेइ दुःख झैल्ला, मसीह भी तुशशे लेइ दुःख झैल्लतां तुसन अक मिसाल दिती। तुसेईं भी तेन्चरे कियोरू लोडे जेन्चरे मसीहे कियू।

22 पवित्रशास्त्र ज़ोते, तैने कधी पाप नई कियोरु। तैने कधी झूठ नई ज़ोवरू।

23 जैखन लोकेईं यीशु बेइज्जत कियो, त तैने तैसेरे बदले मां तैना बेइज्जत न कियो। जैखन लोकेईं तैस दुःख दित्तो त तैने बदले मां तैन दुख न दित्तो, बल्के तैने परमेशरे पुड़ भरोसो कियो कि तै तैसेरी मद्दत केरे। तै ज्ञानतो थियो कि परमेशर हमेशा धार्मिकताई सेइं लोकां केरो इन्साफे केरते।

24 जैखन मसीह मरो, त तैसेरे जानी पुड़ इशशे पापां केरे लेइ तैस कुरूसे पुड़ सजा दिती। तैने एन कियू कि अस पाप केरनो बंद केरम ते धार्मिकतारी जिन्दगी जीनी शुरू केरम। तैसेरे ज़खम जैना तैनी झैल्ले तैन केरे वजाई सेइं अस बेज्जोए।

25 तुस पेइले टेपलोरी भैड्डां केरे ज़ेरे थिये, पन हुनी तुस मसीह कां वापस ओरेथ जै तुशशे प्राणा केरो पुहाल ते रखवालोए।

3

1-2 हे कुआन्शव, तुस भी अपने मुन्शां केरे अधीन राथ। एल्हेरेलेइ अगर इन मां कोई एरो भोए जै परमेशरे वचने न मनतो भोए, तुशशे जीनिरे तरीके सेइं तुशशे बगैर ज़ोने तैन केरे विश्वास केरनेरी वजा भोली। तैना तुशशे रोडे ते पवित्र बर्ताव हेरतां मसीह पुड़ विश्वास केरेले।

3 ते तुशशी सजावट दिखावेरी न भोए, मतलब अलग-अलग किसमे दोग बनानो, ते सोन्नेरे गेहने, या किसमां-किसमां केरां लिगडां लाना।

4 बल्के तुस अपने गुना केरे ज़िरिये अपनो आप खूबसूरत बनाथ जै तुसन करां दूर न गाए, मतलब नेरमी ते शांत स्भाव सेइं जै परमेशरे लेइ बडो कीमती आए।

5 ते पेइले ज़ुमाने मां पवित्र कुआन्शां भी, जैना परमेशरे पुड़ उमीद रेखती थी, तैना अपनो आप इस तरीके सेइं सजैती ते अपने-अपने मुन्शां केरे अधीन रैती थी।

6 जेन्चरे सारा अब्राहमेरे अधीन रहती थी ते तैस ज़ो मालिक ज़ोती थी, ते तुस भी अगर भलाई केरथ, ते केन्वी किसमेरे फिक्रन सेइं न डरथ त सारारे कुइयां केरि ज़ेरि भोली।

7 तेन्चरे हे मुन्शव, तुस भी समझदैरी सेइं कुआन्शन सेइं जिन्दगी बीताथ ते इन याद रखवा कि तैना तुसन करां कमज़ोरन, एल्हेरे तुसेईं तैन केरि आदर कियोरी लोडे, किजोकि तुस दुइये तैस वरदानेरे हिसेदार आथ जैन परमेशर तुसन अनुग्रहे सेइं दितोरू आए, तै हमेशारी जिन्दगी आए। एरू केरा ताके जैखन तुस प्रार्थना केरथ त परमेशर तुशशी प्रार्थना शुने।

8 आखरी मां अवं तुसन इन ज़ोताई, तुसेईं सेभई अक मन भोवरू लोडे ते एक्की होरि सेइं हमदेरदी केरा ते एक्की होरि सेइं दला बेइनां केरो ज़ेरो प्यार केरा, ते एक्की होरि पुड़ दया केरा, एक्की होरेरे लेइ नर्म बना।

9 बुरैदारे बदले बुराई न केरा, गैई केरे बदले गैई न देथ, पन इसेरे बदले बरकत देथ, किजोकि परमेशेर तुस होरन बरकतां देनेरे लेइ कुजावरेथ। अगर तुस इन केरतथ, त परमेशर तुसन भी बरकतां देलो

10 किजोकि पवित्रशास्त्र ज़ोते, “अगर कोई मैन्हु ज़िन्दगरो आनन्द नेनो चाते, ते रोडे दिहाडे हेरने चाते त तैनी ध्यान लोडे दितोरू कि बुरी गल्लां न ज़ोए। ते तैनी होरन धोखो न लोडे दितोरो।

11 ते बुरू केरनू बंद कियोरी लोडे बल्के तैनी रोडू कियोरू लोडे। होरन सेई मेल मिलापे सेई ज़ीनेरे लेइ मेहनत कियोरी लोडे।

12 किजोकि प्रभु तैन लोकां केरू ध्यान रखते ज़ैना तैन्ने केरतन ज़ैन सही आए, ते तै हमेशा तैन केरि प्रार्थना शुन्नेरे लेइ तियार रहते। पन परमेशर तैन केरे खलाफ कम केरते ज़ैना बुरू केरतन।”

13 अगर तुस हमेशा भलू केरनेरी कोशिश केरथ, त फिरी कोई भी तुसन हकीकति मां नुकसान न पुज्जेई बटे।

14 अगर अस धार्मिकतारे स्थावरे वजाई सेई दुःख झैल्लम, त अस सच्चे धन भोले, पन अगर कोई असन डराते त तैस करां डरू न लोडे ते न घबरावरू लोडे।

15 पन इसेरे बदले, तुसेई मसीहेरी आराधना अपने ज़िन्दगरे प्रभुएरे रूपे मां कियोरी लोडे। ते ज़ै कोई तुसन तुशे उमीदरे बारे मां किछ पुच्छे, ज़ैस मां सारे विश्वासी शामिल आन, त तैस जुवाव देनेरे लेइ हमेशा तियार राथ, पन नेरमी ते आदरी सेई।

16 हमेशा तैन्ने केरा ज़ैन सही भोए। तैखन अगर लोक तुशे लेइ बुरू ज़ोले त तैना मसीह सेई तुशो रिशतो भोनेरे वजाई सेई तुशो रोडो बताव हेरेले त तैना छिथोले।

17 किजोकि इन रोडू आए अगर इश्यां रोडो कम्मां केरे वजाई सेई अस दुःख झैल्लम, अगर इशे लेइ परमेशेरी इच्छा ई आए। इन इशे बुरां कम्मां केरे वजाई सेई दुःख झैल्लने करां बडू रोडूए।

18 अव इन ज़ोताई, मसीहे भी इशे पापां केरे लेइ दुःख झैल्लो ते मरो। ते एक्की बारे मरो ते तैस दुबारा मरनेरी ज़रूरत नई। ते अक धर्मी मैन्हु थियो ज़ै पापी लोकां केरे लेइ मरो ताके ते असन परमेशेरे कां आने। तैनेई तैसेरो जिसम मारो पन ते पवित्र आत्माे शेक्ते ज़िरिये ज़ीतो कियो


19 तैट्टां बाद तैसेरी आत्मा तैन आत्मान खुशखबरी शुनाने जेई, ज़ैना परमेशेरे तैस ठैरी कैद कियोरिन ज़ैडी मरे लोकां केरि आत्मा रैती थी।

20 इन तैन मैन्हु केरि आत्मा आन ज़ैनेई बडे पेइले परमेशेरो हुक्म न थियो मन्नोरो। ज़ैखन नूह किशती बनाने लोरो थियो, त परमेशेरे बडे सबरी सेई बलगू कि तैना पापन करां मन फिरान। पन सिर्फ अठ तैस भयानक तूफाने करां बचे।

21 पुराने वक्ते मां तैन केरि मुक्ति हुना इशे लेइ ज़ैखन अस बपतिस्मो नेतम मिसाले। ज़ैस पैनी मां अस बपतिस्मो नेतम तैन इशे जानरो मैल दूर न केरे, पन ई अक निशान आए कि असेई परमेशेरे करां माफ़ी मगोरीए ताके इशो मन असन परेशान न केरे। असन माफ़ी मैल्ली बटतीए किजोकि यीशु मसीह मेरतां ज़ीतो भोवरोए,

22 ते तै स्वर्ग जो जोवरो। तैडी हुनी तै परमेशेरे देइने पासे खास ठैरी, तैडी तै सारे स्वर्गदूतन ते अधिकैरन ते शेक्तन पुइ राज़ केरने लोरोए।

4



1 एन्हरेलेइ ज़ैखन मसीहे जिसमे मां भोइतां दुःख झैल्लो, त ज़ेन्नेरे तैसेरो स्भाव थियो तेन्नेरे तुस भी दुःख झैल्लनेरे लेइ तियार भोथ। किजोकि अगर तुस मसीहेरे लेइ दुःख झैल्लनो चातथ त तुसेई पाप न केरनेरो फैसलो कियो।

2 नितीजो ई भोलो, कि तै मैन्हु बाकी अपनि ज़िन्दगी मैन्हु केरे पापी खुवैइशां केरे मुताबिक इस दुनियाई मां न ज़ीयोले पन तै तैन्ने केरेलो ज़ैन परमेशर तैस करां करानो चाते।

3 किजोकि बीतारे वक्ते मां तुस गैर विश्वासी लोकां केरे ज़ेरे आनन्द केरने मां वक्त बर्बाद केरते थिये, ते तुस अपनि ज़िन्दगी एश केरने मां, बुरी खुवैइशन मां, ते तैन केरे तिहारन मां, शराब पीने मां ते नाचे मां, ते तैन केरि मूरती केरि पूजाई मां ज़ैन सेइ परमेशर नफरत केरते बीताते थिये।

4 एल्हेरेलेइ तुशशे पुराने दोस्त हैरान भोतन, ज़ैखन तुस तैन केरे बुरी गल्लन मां ज़ैना तैन केरतन शामिल न भोथ, तांए तैना तुशशे बारे बुरू-भलू ज़ोतन।

5 पन एककी दिहाड़े तैनेई ज़रूर परमेशररे सामने इन्साफेरे लेइ खडू भोनू पेनूए। ते परमेशर तैन मरां हर एककी ज़ैन तैनेई इस धेतली पुड़ कियोरू तैसेरे बारे मां पुछेलो। परमेशर ज़ीते ते मुड़दां केरो इन्साफ केरेलो।

6 ईए वजा आए कि मुड़दन भी मसीहेरे बारे मां खुशखबरी शुनाई। तैन केरे जिसम भी एन्चरे मरे ज़ेन्चरे सारे मैन्हु मरतन। पन हुनी तैना आत्माई मां परमेशररे सेइ साथी हमेशा ज़ीइले।

~~~~~

7 सेब्भी गल्लां केरो अन्त जल्दी भोने बालोए, एल्हेरेलेइ साफ तरीके सेइ सोचा ते अपने आपे पुड़ कैबू केरा ताके तुस प्रार्थना केरी सकतथ।

8 सेब्भन करां रोड़ी गल ईए, कि एककी होरि सेइ ईमादैरी सेइ प्यार केरा, किजोकि अगर तुस लोकन सेइ प्यार केरेले त तुस तैन केरि गेलती भी माफ़ केरनेरे लेइ तियार भोले।

9 ज़ैखन लोक तुशशे घरन मां एजन त बगैर कोन्वी शिकायतां तैन केरू स्वागत केरा।

10 हर एककी परमेशरे करां वरदान मैलोरूए ते तैनी तैन वरदान होरि केरि मद्दत केरनेरे लेइ इस्तेमाल कियोरू लोड़े। तैनेई तैना काई किसमां करां वरदानां इस्तेमाल कियोरं लोड़न ज़ैना परमेशररे अपने अनुगारहे सेइ दितोरन।

11 अगर तुसन कां प्रचार केरनेरू वरदाने त तुसेई परमेशेरू वचन प्रचार कियोरू लोड़े। अगर तुसन कां होरि लोकां केरि मद्दत केरनेरू वरदाने त तैस शेक्ति सेइ केरा ज़ै परमेशरे तुसन दितोरीए। फिरी सब किछु ज़ैन तुस केरेले तैस सेइ यीशु मसीहेरे ज़िरिये परमेशेरी महिमा भोली। सारी महिमा ते शक्ति हमेशा-हमेशा तैसेरीए। आमीन।

~~~~~

12 टूलारव, ज़ैना दुःख तुस झैल्लने लोरथ तैन केरे बारे मां हैरान न भोथ किजोकि तुस मसीहेरे आथ। पन इना चीजां इन हिरानेरे लेइ भोनेरे लोरिन कि तुस सच्चे परमेशरे पुड़ विश्वास केरतथ की नई। एल्हेरेलेइ इन न सोचा कि तुसन सेइ नर्वीं गल भोने लोरीए।

13 पन इसेरे बारे मां खुश भोथ, कि ज़ैना दुःख मसीहे मैल्ले तुस भी तैन मां शामिल भोए। एल्हेरेलेइ ज़ैखन मसीह दुबारा एज्जेलो त सेब्भी लोकन पुड़ अपनि महिमा बांदी केरेलो, त तुस बड़े खुश भोले।

14 फिरी अगर मसीहेरे नंब्बेरे लेइ तुशशी तुहीन भोतीए, त तुस धन आथ। किजोकि परमेशेरे महिमा बालो आत्मा तुसन मां रहते।

15 तुसन मरां कोई मैन्हु खूनी ते चोर, या कुकर्मी भोने, या होरि केरे कम्मन मां दखल देनेरे वजाई सेइ दुख न झैल्ले।

16 पन अगर मसीही भोने सेइ दुःख झैल्लथ त शरमाए न, पन इस गल्लेरे लेइ परमेशेरी बडीयाई केरे किजोकि तुस विश्वासी आथ।

17 किजोकि इन्साफेरो वक्त ओरोए, ते तै इशशो विश्वासी लोकां केरो इन्साफ पेइलो केरेलो, तैन डरानेबेली गल्लां केरे बारे मां सोचा ज़ैना तैन सेइ भोनिन, ज़ैना खुशखबरी पुड़ विश्वास न केरन ज़ै परमेशेरे तरफां एइतीए।

18 ज़ेन्चरे पवित्रशास्त्र ज़ोते,

“अगर धर्मी मैनेरे लेइ मुक्ति हासिल केरनि बड़ी मुशकलीए, त बुरे ते पापी मैन्हु पक्के नाश भोनेन!”

19 एल्हेरेलेइ जैना परमेशेरी मेरजरे मुताबिक दुःख झैल्लतन, तैनेई तैस पुड़ लगातार भरोसो कियोरो लोडे जैने तैना बनाए। परमेशर हमेशा तैन करते जैन केरनेरो वादो तैनी कियोरोए ते तै लगातार तैन केरेलो जैन रोड़ए।

5

~~~~~

1 अवं साथी बुजुर्गन सेइ इन ज़ोनू चाताई किजोकि अवं तुशशो ज़ेरो आई। मीं एप्पू तैना दुःख हेरोरेन जैना मसीहे बड़े पेइले झैल्ले। जैखन तै दुबारां एज्जेलो, त अवं तैसेरे महिमा मां शामिल भोनोई। अवं तुशशो साथी बुजुर्ग भोने सेइ तुसन कां ई बिनती केरताई,

2 जेन्चरे पुहाल अपनि भैडडां हेरतन, तुस भी तेन्चरे हर एक्केरी हेरगेश केरा, जैना परमेशेरे तुशशे रखवैली मां रखोरेन। इन अपने मेर्जी सेइ केरा किजोकि परमेशर इन चाते। तुस इन एल्हेरेलेइ न केरा कि तुसन पुड़ दबाव बनाव गाते। ते इन कम एल्हेरेलेइ न केरा कि तुस कमाई केरनि चाथ, पन इस इच्छाई सेइ केरा कि तुस परमेशेरी ते लोकां केरि सेवा केरनि चातथ।

3 ते जैना लोक तुसन सॉफे तैन पुड़ हकोमत न केरा, बल्के तैन केरे लेइ रोड़ी मिसालां बना।

4 ते जैखन यीशु मसीह जै इशशो परधान पुहालेरो ज़ेरोए, वापस एज्जेलो त तै तुसन तैन इनाम देलो जेसेरी शोभा कधे खतम न भोली।

5 तेन्चरे हे जवान लोकव, तुस भी बुजुर्गां केरे अधीन राथ, तुस सारे एक्की होरेरी मद्दत बड़े नर्म स्भाव सेइ केरा। किजोकि कोई पवित्रशास्त्रे मां पेढ़ी बटते “परमेशर घमण्ड केरनेवालां केरि खलाफ करते, पन तै तैन केरे लेइ रोड़ो आए जैना दीन आन।”

6 एल्हेरेलेइ अपनो आप परमेशेरे कां दीन बनाथ तै तुशशी हफाज़त केरनेरे लेइ शेक्ति बालोए, जैस सेइ तै तुसन ठीक वक्ते पुड़ आदर दे।

7 परमेशेरे अपने परेशैनी ते फिकरां केरे बारे मां ज़ोथ, किजोकि तैस तुशशू ध्यान आए।

8 खबरदार राथ, ते बीझे राथ, किजोकि तुशशो दुश्मन शैतान तुसन पुड़ हमलो केरनेरे लेइ तियारे, कि तुस परमेशेरे मन्नु शारा। तै गज्जनेबाले शेरे ज़ेरो तोपने लोरो कि केस मारे ते खाए।

9 तुस विश्वासे मां मज़बूत भोइतां तैसेरो मुकाबलो केरा, तैन विश्वासी लोकन याद रख्खा जैना दुनियारे अलग-अलग ठैरन मां आन, तैना भी तुशशो ज़ेरो दुःख झैल्लने लोरेन।

10 हुनी परमेशर जै सारे अनुग्रहे सेइं भेरतां, तैने अस हमेशारी महिमा मां शामिल भोनेरे लेइ चुनोरेम किजोकि इशशो रिशतो यीशु मसीह सेइं आए। थोडे वक्तेरे दुःख झैल्लनेरे बाद परमेशर तुसन सही बनालो ताके तुसन मां कोई गलती न राए, तै तुशशे दिलन मज़बूत केरेलो ताके तुस मज़बूती सेइं तैस पुड़ विश्वास केरथ।

11 तै शेक्ति सेइं हमेशा राज़ केरेलो। आमीन।

~~~~~

12 मीं सिलवानुसरे मद्दती सेइं ई निकडी ज़ेरि चिट्ठी लिखी ते तुसन जो भेज़ी, अवं तैस ज्ञानताई तै मसीह मां वफादार ढला आए, मेरे लिखनेरो मकसद ई आए कि तुशशो होसलो बधेई ते याकीन दूवेई कि जै तजरबो तुस केरने लोरोरेथ तै सच्चे परमेशेरे अनुग्रहेरो अक हिस्सो ए, इस अनुग्रहे मां मज़बूती सेइं बनोरे राथ।

13 बाबैल नगरेरे विश्वासी जैना परमेशेरे चुनोरेन ठीक तेन्चरे जेन्चरे तुस चुनोरेथ, तैना तुसन जो नमस्कार ज़ोतन। मरकुस जै मेरे मट्टेरो ज़ेरोए तुसन जो नमस्कार ज़ोते।

14 मसीहरे प्यारे सेइं एक्की होरि जो नमस्कार केरा। अवं प्रार्थना केरताई परमेशर तुसन सेबनन जैन केरो रिशतो मसीह सेइं साथी शान्ति दे।

2 पतरस

पुस्तक पत्रिका

1 अवं शमौन पतरस, यीशु मसीहेरो दास ते परेरित आई, अवं तुशशे सेब्मी केरे लेइ लिखने लोरोई, तुस भी तैस कीमती विश्वासे मां शामलथ जै अस केरतम, ई विश्वास असन यीशु मसीह, इशशे परमेशर ते मुक्ति देनेबाले जिरिये दित्तो जेव, जै असन धर्मी बनाते ।

2 अवं प्रार्थना केरताई जेन्चरे तुस परमेशररे ते प्रभु यीशुएरे ज्ञाने मां बद्धते गाथ, परमेशरे तुसन अनुग्रह ते शान्ति जादे करा जादे दे ।

पुस्तक पत्रिका पुस्तक पत्रिका पुस्तक पत्रिका पुस्तक पत्रिका पुस्तक पत्रिका

3 परमेशर अपने शक्ति सेई असन तैन सब दितोरू जैन असन परमेशरे खुश केरनेरी जिनदगी जीनेरे लेइ लोइते । इन भोइ बटते किजोकि अस परमेशरे ज्ञानतम कि तैन अस अपने महिमा ते अपने रोड़े गुना केरे मुताबिक तैसेरे लोक भोनेरे लेइ कुजोरम ।

4 इन सेब्मी केरे जिरिये परमेशरे असन महान ते कीमती वरदानां दितोरन जैन केरो तैनी वादो कियोरो थियो, इन वरदानां इस्तेमाल केरतां अस दुनियारी बुरी इच्छान करां बेची बटतम, जैना लोकन नाश केरतन, ते अस परमेशररे स्भावे मां शामिल भोइ बटतम ।

5 एल्हेरेलेइ तुसेई न सिर्फ यीशु पुइ विश्वास कियोरो लोडे, बल्के होरि केरे लेइ भलाई केरनेरे लेइ सखत मेहनत भी कियोरी लोडे, तुसेई न सिर्फ तैन कियोरू लोडे जैन रोडू भोए, बल्के तुसेई एरे लोक बनोरू लोडे जैना ज्ञातन समझदैरी सेई केन्चरे बर्ताव केरतन,

6 तुसेई सिर्फ इन न लोडे ज्ञानोरू कि समझदैरी सेई केन्चरे बर्ताव केरतन, पन तुसेई अपनो आप कैवू भी कियोरो लोडे, तुसेई न सिर्फ अपनो आप कैवू मां लोडे कियोरो, बल्के मुसीबत मां सबर भी कियोरी लोडे, तुसेई न सिर्फ मुसीबत मां सबर कियोरी लोडे बल्के तुसेई एरी जिनदगी भी जीयोरी लोडे जैस सेई परमेशर खुश भोए ।

7 तुसेई न सिर्फ एरी जिनदगी जीयोरी लोडे जैस सेई परमेशर खुश भोए, बल्के तुसेई एककी होरि विश्वासी लोकन सेई अपने टब्बरेरे लोकां केरो जेरो प्यार भी कियोरो लोडे, तुसेई एककी होरि सेई न सिर्फ अपने टब्बरेरे लोकां केरो जेरो प्यार कियोरो लोडे बल्के तुसेई सैरी लोकन सेई प्यार कियोरो लोडे ।

8 अगर तुस एन्चरे जीले त तुस इशशे प्रभु यीशु मसीह ज्ञानेले ते तुस इस्तेमाल भोनेबाले ते फलदार भोले ।

9 पन अगर कोन्ची मां इना गुण न भोन त तै एरे मैनेरो जेरोए जै कानोए, ते तैन विसोरूए कि परमेशरे तै तैसेरे पुराने पापन करां साफ कियोरोए ।

10 एल्हेरेलेइ हे द्वाव ते बेइनव, एन्चरे कम केरनेरे लेइ होरि जादे मेहनत केरा, जैस सेई तुस अपनो आप साबत केरा कि परमेशरे तुस हकीकति मां तैस पत्ती चलनेरे लेइ चुनोरैथ ते तैसेरे लोक भोनेरे लेइ चुनोरैथ । अगर तुस इना गुणा केरे मुताबिक केरेले त तुस कधी मसीह पुइ भरोसो केरनो न शारैले ।

11 ते परमेशर भी तुसन तैस राज्जे मां बड़े जोशे सेई कबूल केरेलो जैडी यीशु मसीहे, जै इशशो प्रभु ते इशशो मुक्ति देनेबालोए, तै राज्जेरो जेरो हमेशा राज्ज केरेलो ।

पुस्तक पत्रिका पुस्तक पत्रिका

12 चाए तुस इना सैरी गल्लां ज्ञानतथ, ते सच्च्ची शिक्षा तैस मां तुस मजबूती सेई बनोरे रातथ, जै लोकेई तुसन शिखालोरी, अवं तैन केरे बारे मां लगातार याद किरैइलो ।

13 अवं ज्ञानताई ज्ञातगर अवं जीतोई, तैन केरे बारे मां लगातार तुसन ज़ोनू सही आए, ताके तुस तैन न विसरथ ।

14 किजोकि अवं ज्ञानताई, अवं जल्दी मरनोई, किजोकि इशु प्रभु यीशु मसीहे मीं एल्हेरे बारे मां साफ ज़ोवरूए।

15 एल्हेरेलेइ अवं इना गल्लां केरे बारे मां ज़ोनेरी वड़ी कोशिश केरताई, ताके तुस मेरे मरनेरां पत्ती इना सैरी गल्लां याद केरि बटथ।

~~~~~

16 ज़ैखन असेईं प्रेरितेईं तुसन अपने प्रभु यीशु मसीहेरी शक्ति ते एजनेरी खबर शुनावरी थी, त असेईं ज़लैकी सेईं बनेवरी कहैनी न ज़ोई बल्के असेईं मसीहेरी तैस महिमारे बारे मां ज़ोवं ज़ै असेईं अपने एच्छेईं सेईं लाईं।

17-18 ज़ैखन अस तैस सेईं साथी पवित्र पहाड़े पुड़ धिये ज़ैखन बाजी परमेशरे तैस आदर ते महिमा दिती। तैस वक्ते परमेशरे करां तैस महान महिमाईं मरां आवाज़ आई, “इन मेरू ट्‌लारू मट्टूए ज़ैस सेईं अवं खुश आईं।” असेईं एप्पू ईं आवाज़ स्वर्गंरां शुनी।

19 अस नेबी केरू वचन भी ज्ञानतम, ज़ैन तैनेईं मसीहेरे बारे मां ज़ोवं तैन बिलकुल सच्चे, तैना इस बारे मां पक्कू केरतन ज़ैन असेईं तुसन तैसेरे वापस एजनेरे बारे मां शिखालू। तुसेईं तैना गल्लां ध्याने सेईं शुनोरी लोडन, ज़ेन्चरे दीयो आंधरे मां बलते ते लोकन सही बत्तां गानेरे लेइ मद्दत केरते, इन वचन तुशुशी इन ज़ान्नेरे लेइ मद्दत केरेलू कि सन्न कुने। तुसेईं तैन वचन रोड़े चारे शुनोरे लोडन ज्ञांतगर इशु प्रभु यीशु मसीह वापस न एज्जे। तैसेरू एज्ज नू एरू भोलू ज़ेन्चरे नंब्वे दिहैइरी लौ भोली, ते तै झेरे तारेरो ज़ेरो भोलो। तैस वक्त तैसेरी लौ तुशु दिलन मां चमकेली त कने तुसन पुड़ परमेशरे बांदी केरेली।

20 पन इन ज़रूरी कि तुस नेबी केरू वचन ज़ैन तुस पवित्रशास्त्रे मां पढतथ, तैन वचन तैन केरे अपने खियाल नईं।

21 किजोकि कोई भी भविष्यवाणी मैन्हु केरे मेर्जी सेईं न भोइ, पन भक्त लोक पवित्र आत्मा अगवैईं सेईं परमेशरे तरफां सन्देश ज़ोते धिये।

## 2

~~~~~

1 ते ज़ेन्चरे वड़े पेइले इसराएली लोकन मां झूठे नबी धिये, तेन्चरे तुसन मां भी झूठे उस्ताद भोले। तैना बल्हे चारे तुसन मां एज्जेले ते परमेशरे बारे मां नाश केरनेबालू झूठ ज़ोले। इड़ी तगर तैना मसीहेरो इन्कार केरेले कि तै प्रभु नईं ज़ैने तैना पापन करां आज़ाद किये। एन्चरे केरने सेईं तैना एप्पू पुड़ विनाश आनेले।

2 परमेशरे वड़े लोक तैन इन झूठे उस्तादां केरे बुरे कम्मां केरि नकल केरेले, ते तैन बुरां कम्मां केरे वजाईं सेईं सच्चे बतारे खलाफ बुरी गल्लां ज़ोले।

3 इना उस्ताद वड़े लालची भोले ते तैना तुसन बनेवरी कहैनी शुनेइतां तुसन धोखो देले, ताके तुसन करां पेइंसो हासिल केरन। परमेशरे वड़े पेइले ईं फैसलो कियोरो कि तैन सज़ा दे ते तै इन केरनेरे लेइ तियार भी आए, तैसेरे एज्जेने मां किछ भी च़िर नईं, ते तैन केरो विनाश बलगतोए। तै पक्को तैन नाश केरेलो।

4 तुस ज्ञानतथ वड़े पेइले किछ स्वर्गदूतेईं परमेशरेरो हुकम न मन्नो, ज़ैन तैनेईं कियूं तैसेरेलेइ परमेशरे तैन सज़ा दिती। तैने तैना नरके मां छुडडे, ते तैस दिहैइरी तगर आंधरे मां कैद किये ज्ञांतगर तै तैन केरो इन्साफ न केरे ते तैन सज़ा न दे।

5 तुस इन भी ज्ञानतथ ज़ैना लोक वड़े पेइले इस दुनियाईं मां ज़ीते धिये तैनेईं परमेशरेरो डर न मन्नो, परमेशरे तैन करां बुरां कम्मां नज़रानदाज़ न कियां। बल्के तैनी पानी भेजतां तैन सज़ा दिती ज़ैस मां सारी धरती छुप्पी ते तैना सारे नाश भोए। पन तैन तैन मरां नूहे समेत अठ लोक बचाए, ज़ैने धार्मिकतारो प्रचार कियो।

6 परमेशेरे सदोम ते अमोरा नगरन सज़ा दिती, तैना भस्म भोइतां मांज़न बना, एन केरतां परमेशेरे लोक खबरदार किये, कि ज़ैना तैसेरे हुक्म न मनन तैन सेइं भी एरू भोळु।

7 पन सदोम ते अमोरा नगरन नाश करेने करां पेइले तैने धर्मी लूत नगरे करां बेइर कढो ते बचाव। लूत तैन लोकन सेइं खुश न थियो किजोकि तैना कोई भी कानून न थिये मन्ते ते बेशर्म कम्मां केरते थिये।

8 (लूत धर्मी मैन्हु थियो, पन तै रोज़ तैन बुरे लोकन मां रातो थियो, एल्हेरेलेइ ज़ैन बुरी गल्लां तै शुनतो थियो ते हेरतो थियो तैन सेइं तैसेरो रोडो दिल बडो दुखी भोतो थियो)।

9 इन सैरी गल्लां ज़ैना परमेशेरे कियोरिन इन हिरैतिन कि पूरभु परमेशर अपने धर्मी लोकन तैन केरे मुसीबतरे वक्त तैन सम्भालेलो, ते इन्साफेरे दिहाडे तगर बुरे लोकन सज़ा देतो रालो।

10 परमेशर तैन झूटे उस्तादन पक्की सज़ा देलो, ज़ैना इना गल्लां अपने गलत ते बुरी खवैइशन सेइं केरतन, ते तैना परमेशेरे अधिकारे ज़ै तैन पुडे घटया समझतन, ते तैना ढीठ ते घमण्डी आन। तैना स्वर्गेरे प्राणेरी केरे बारे मां बुरू ज़ोने करां न डरन।

11 स्वर्गदूतां केरे बारे मां सोचा, तैना तैन झूटे उस्तादन करां बडे शेक्ति बालेन। तैना ज़ैखन इन झूटे उस्तादन पुड़ परमेशेरी हज़ूरी मां दोष लातन, त गलत ज़बान इस्तेमाल न केरतन।

12 पन इना झूटे उस्ताद जंगली जानवरां केरे ज़ेरन, इना जानवर न ज़ानन केन्चरे सोचोरू लोडे तैन केरो मकसद सिर्फ़ टलानू ते मारनू भोते। इन लोक भी ज़ैन तैन केरे मने मां एइते तैन केरतन, ते ज़ैन गल्लन न समझन तैन केरे बारे मां बुरू ज़ोतन, तैना पक्के नाश भोनेन।

13 तैन नाश भोनु तैन केरे कियोरे नुकसानेरो इनामे। तैन भर दूपार्ण एश केरनो रोडो लगते, तैना तुसन मां कलंक ते दाग आन। इडी तगर कि तैना तुसन सेइं धामन मां खातन-पीतन फिरी भी धोखो देने मां खुश भोतन।

14 तैना ज़ैस कुआन्शी भी लातन तैस सेइं बदमाशी केरनि चातन। तैना पाप केरने लेइ मौके तोपने कधी न शारन। तैना तैन लोकन धोखो देतन ज़ैना मसीह पुड़ मज़बूती सेइं विश्वास न केरन ते तैन पापे मां नेतन। तैन केरि जादे करां जादे बुरी इच्छां केरे वजाई सेइं परमेशर तैन सज़ा देलो।

15 तैनेई सही केरनू बंद कियोरूए, ते तैनेई तेन्चरे बुरां कम्मां केरनां शुरु कियां ज़ेन्चरे बडे पेइले बओरेरे मट्टे बिलामे कियोरां थियां। तैनेई बुरी चीज़ां केरतां पेइसे कमाने पसंद किये।

16 परमेशेरे तै तैसेरे बुरैडारे लेइ डांटो ज़ै तैनी कियोरी थी, तैसेरे गोधां मैन्हु केरि भाषाई मां गल की ते नबी गलत केरने करां रोको।

17 इन झूटे उस्ताद शुक्कोरे खूआं केरे ज़ेरे बेकार आन, ते तैना बेफैइदी विदलारे ज़ेरे आन, ज़ैस झड़ी भोने करां पेइले हवा दूर उडारती। परमेशेरे तैन केरे लेइ एरी ठार तियार कियोरी ज़ै बिलकुल आंधरीए।

18 ज़ैखन तैना लोकन शिखालतन त तैना बेकार ते घमण्डी लफ़ज़ इस्तेमाल केरतन, तैना लोकन ज़ोतन कि तैना बेइज़ज़त चीज़ां केरि बटतन ज़ैना तैन केरे जिसम केरने चातन, तैना लोकन धोखो देइतां पाप करातन ज़ैना इस किसमेरी बुरी ज़िन्दगी करां बचोरेन।

19 तैना तैन लोकन सेइं ई वादो केरतन अगर तैना तैन केरि मनन, त तैना ज़ैन चातन तैन केरि बटतन, किजोकि तैन केरो कोई मालिक नई। पन इन सच्चे, तैन एप्पू भी अपने बुरे रूवाज़ां केरे गुलामन, किजोकि ज़ै कोई चीज़ केरनेरो आदी त तै तैस केरनेरो गुलाम बनते।

20 ज़ैखन लोकेई यीशु मसीह तैन केरो पूरभु ते मुक्ति देनेबालोए पिशानो, त तैना दुनियारे बुरैई करां छुटोरे थिये। पन तैना फिरी तैन बुरी चीज़ां केरने मां शामिल भोए ते तैना बुरी चीज़ां तैन केवू केरतन, ते तैन केरि आखरी हालत पेइली हालती करां भी बुरी भोइ।

21 ज़ोनेरो मतलब ई आए, किजोकि ज़ैन लोकेई मसीहे पुड़ विश्वास केरनो शारो, परमेशर तैन, तैन लोकन करां जादे सज़ा देलो, ज़ेनेई कधे विश्वास नई कियोरो, तैन लोकां केरे लेइ रोडू भोथू

कि तैना कधी न ज्ञानेथे कि धार्मिकतारी ज़िन्दगी केन्चरे ज़ीतन। हुनी तैना ज्ञानतन कि सही कुन आए, पन तैना परमेशरेर हुकमन न मनन ज़ैना असेई प्रेरितेई शिखालोरन।

22 ज़ैन तैनेई कियू तैन करे लेइ इना दूई कहावत ठीक आन, “तैना कुत्रां करे ज़ेरे आन ज़ैना उलटी करतां फिरी खातन, ते तैना निहावरे सूरां करे ज़ेरे आन ज़ैना फिरी चिकरी मां गातन।”

3

???????? ?????? ???????

1 हे ट्लारव, अवं दुइयोवं चिट्ठी लिखने लोरोई, अवं दुइये चिट्ठन मां तुसन किछ् गल्लां याद करेइतां होसलो देनेरी कोशिश करने लोरोई। ज़ैना तुसेई पेइली शिखारिन ताके तुस सही तरीके सेइ सोचथ।

2 अवं इन एल्हेरेलेइ लोरोई करने, कि अवं तुसन तैना गल्लां याद करैनी चाताई ज़ैना बडे पेइले नेबेई ज़ोरिन ते इशे प्रभु ते मुक्ति देनेबाले यीशु मसीहेरी शिक्षा आन। ज़ैना प्रेरित तुसन कां आए तैनेई तुसन शिखैलोरन।

3 सेम्बन करां खास गल ई आए, कि तुस ज्ञानथ, कि आखरी दिहाइन मां मसीहेरे वापस एजने करां पेइले, लोक तुशो मज़ाक बनाने कि तुस विश्वास करतथ कि मसीह दुबारा वापस एजनाए, तैना आदी भोनेरे वजाई सेइ एना बुरी चीज़ां करेले ज़ैन सेइ तैना खुश भोतन।

4 तैना ज़ोले, “तैसेरो एजनेरो वादो सन्न नई, तै बिलकुल भी नई एजनेरो! किजोकि ज़ैना शुरुआती मां इशे मसीही बुजुर्ग थिये तैना सब मरे, पन किछ् भी वेदलोवं। सब किछ् तेरहु आए, ज़ेन्चरे दुनिया बनानेरे वक्ते करां थियूं।”

5 तैना एन एल्हेरेलेइ ज़ोतन किजोकि तैना इन बिस्सरनू चातन, कि बडे पेइले अम्बर ते धरती परमेशरेर हुकमे सेइ बनाव जेव। तैन्ने धरती पैनी मरां कढी ते पैनी करां अलग की।

6 फिरी तैनी पैनेरो इस्तेमाल कियो कि पुरानी दुनिया बडे तूफाने सेइ नाश करे।

7 पन परमेशरे अम्बर ते धरती तैस्से हुकमे ज़िरिये रखेरेन, ताके तैन अगगी सेइ नाश करे। तै तैन तैस दिहैडी तगर रखेलो ज़ेइस तै तैन लोकां केरो इन्साफ करेलेो ते नाश करेलेो ज़ैना तैसेरी आदर न केरन।

8 हे ट्लारव, ज़ैना गल्लां अवं हुन्ना ज़ोने लोरोई तैन नज़रानदाज़ न केरा, कि प्रभुएरी नज़री मां अक दिहाडी हज़ार सालन बराबरे ते हज़ार साल एककी दिहैडरे बराबर आन (तैना तैसेरेलेइ अक्कां ज़ेरे आन)।

9 किछ् लोक सोचतन कि प्रभु अपना वापस एजनेरो वादे पूरे करने मां चिर लोरो लाने। पन परमेशर एन्चरे चिर नई लाने लोरो, बल्के इसेरे बदले तै तुसन सेइ सबर लोरो करने। किजोकि तै न चाए कोई भी नाश भोए। पन तै चाते कि हर कोई अपना मन बदले त कने गलत केरनू शारे ते तैस कां एज्जे।

10 पन मसीह पक्को वापस एज्जेलो, तै अचानक एज्जेलो ज़ेन्चरे चोर अचानक एइते। तैस वक्त अम्बर मां गर्जनेरी जेरि शोर भोली, ते अम्बर गायब भोइ गालू। सब किछ् ज़ैन अम्बरे मां आए, दिहाडो, चांदनी, तारे सब अगगी सेइ बिलकुल नाश भोलू, तैस दिहाडे परमेशर इन्साफ केरनेरे लेइ तैन सब किछ् बांदू केरलो ज़ैन लोकेई इस दुनियामां कियोरूए।

11 एल्हेरेलेइ कि परमेशर इना सैरी चीज़ां पेक्की नाश करेलेो ज़ेन्चरे मीं ज़ोवं, एल्हेरेलेइ तुसेई पवित्र ज़िन्दगी ज़ीयोरी लोडे ते अपना आप परमेशरे सॉफोरो लोडे।

12 ज़ेन्चरे तुस तैस दिहैडी बलगने लोरेथ ज़ेइस परमेशर दुनियारो इन्साफ केरने एज्जेलो, ते बडी कोशिश केरा कि तै दिहाडी जल्दी एजनेरे लेइ। तैस दिहाडे परमेशर अम्बरे अगगी सेइ फुकैलो ते नाश करेलेो त कने अम्बेरेरी सैरी चीज़ां अगारे गेरमी सेइ गेलेली।

13 पन अस विश्वासी नंवे अम्बरे ते नंवे धरती बलगने लोरेम ज़ेसेरो वादो परमेशरे कियोरो, ज़ेडी लोक परमेशरेरे इच्छाई सेइ ज़ीयले।

?????? ?? ??????? ???

14 एल्हरेलेइ, हे ट्लारव, जेन्त्रे तुस तैस दिहैडी बलगने लोरेथ जेइस परमेशर इस दुनियारो इन्साफ करेलो, त तुस पूरी कोशिश केरा कि तुस शैन्ति सेइं परमेशेरे नज़री मां शुद्ध ते बेइलजाम भोथ ।

15 ते इश्शे प्रभुएरे सबारे बारे मां सोचा तैने तुसन मौको दित्तो, कि तुस एजनेबाले इन्साफे करां बच्चथ । इन इश्शे ट्लारे विश्वासी सैथे पौलुसे भी तुश्शे लेइ तैस समझारे मुताबिक अपने चिट्ठी मां लिखोरू जै परमेशेरे तैस दित्तोरिए ।

16 तैने अपने सैरी चिट्ठन मां जैना तैने विश्वासी लोकन जो लिखी, इना सैरी गल्लां तुसन लिखी । पन किछ तैसेरी लिखोरी गल्लां समझनी मुश्किल आन । तैन लोकां केरे लेइ जैनेई रोडे चारे नई पढोरू जैन इस बारे मां पक्को पतो नई कि तैना कुन विश्वास केरतन, तैना गलत तरीके सेइं इन मुश्किल गल्लां केरे मतलब कढतन, जेन्त्रे तैना पवित्रशास्त्रेरी किछ गल्लां केरो गलत तरीके मतलब समझातन । एन्त्रे केरने सेइं तैना अपनो आप इस काबल बनातन कि परमेशर तैन नाश केरे ।

17 एल्हरेलेइ, हे ट्लारव तुस पेइले ज्ञानतथ कि इना गल्लां भोनिन, एल्हरेलेइ तुस हुशार राथ ताके जैना लोक कानूने न मनन तैना तुसन झूठ ज़ोइतां धोखो न देन, ते तुस सेच्ची गल्लन विश्वास केरनो शारथ ।

18 पन तुस इश्शे प्रभु ते मुक्ति देनेबाले यीशु मसीहेरे अनुग्रह ते ज्ञाने मां बद्धते गाथ । तैसेरी महिमा हुन्ना भी भोए, ते हमेशा भोती राए । आमीन ।

1 यूहन्ना

??????????

1 अस तैस एककी वचनेरे (मैनेरे) बारे मां लिखने लोरेम जै ज़िन्दगरो वचन आए, जै शुरू करां थियो, जै असेई शुनो, ते जै अपनि एछ्छेई सेई लाव, बल्के जै असेई ध्याने सेई लाव, ते तैस सेई अपने हथ लाए।

2 (ई ज़िन्दगी बांदी भोइ, ते असेई लाई, ते अस तैसेरी गवाही देतम, ते तुसन तैस हमेशारी ज़िन्दगरी खबर शुनातम, जै बाजी सेई साथी थी, ते असन पुइ बांदी भोइ)।

3 जैन किछ्छ असेई यीशुएरे बारे हेरू ते शुनू तैसेरी खबर तुसन भी देतम, एल्हेरेलेइ कि तुस भी असन सेई साथी शामिलथ, ते इश्शी ई शामिलीत बाजी सेई साथी, ते तैसेरे मट्टे यीशु मसीह सेई साथीए।

4 ते इना गल्लां अस एल्हेरेलेइ लिखतम, कि इश्शी खुशी पूरी भोए।

???? ???? ???? ?

5 जै खबर असेई परभु यीशु करां शुनी, ते तुसन शुनातम, तै ईए; कि परमेशर लोअरो ज़ेरो शुद्धे, ते तैस मां किछ्छ भी आंधरू (बुराई) नई।

6 अगर अस ज़ोम, कि तैस सेई साथी इश्शी शामिलीते, ते फिरी आंधरे मां चलतम, त अस झूटेम, ते सच्चे पुइ न चलम।

7 पन अगर जेन्चरे परमेशर लोई मांए, तेन्चरे अस भी लोई मां ज़ीम, त एककी होरि सेई शामिल रातम ते तैसेरे मट्टे यीशु मसीहेरो खून असन सेब्बी पापन करां शुद्ध केरते।

8 अगर अस ज़ोम, कि असन मां कोई पाप नई, त अपने आपे धोखो देतम, ते असन मां सच्चे नई।

9 अगर अस अपने पाप मन्तम, त तै इश्शे पाप माफ़ केरने, ते असन सेब्बी अधर्मे करां शुद्ध केरने मां वफादार ते धर्मीए।

10 अगर अस ज़ोम कि असेई पाप नई कियोरो, त परमेशरे झूठो ठहरातम, ते तैसेरू वचन असेई कधी कबूल नई कियोरू।

2

???? ???? ???? ???? ?

1 हे मेरे टलारे बच्चव, अवं इना गल्लां तुसन एल्हेरेलेइ लिखताई, कि तुस पाप न केरा, ते अगर कोई पाप केरे, त बाजी परमेशरे कां इश्शो अक मदतगारे, मतलब धर्मी यीशु मसीह।

2 ते इश्शे पापां केरो छुटकारेरे लेइ बलिदान भोव, ते सिर्फ इश्शे लेइ नई, बल्के सैरी दुनियारे पापां केरे लेइ भी।

3 अगर अस तैसेरे हुक्मन मन्तम, त इस सेई अस समझे गाले कि अस तैस ज्ञानतम।

4 जै कोई इन ज़ोते, “कि अवं तैस ज्ञानताई,” ते तैसेरे हुक्मन न मन्ते, तै झूठोए, ते तैस मां सच नई।

5 पन जै कोई तैसेरे वचने पुइ चलते, त तैस मां सच्चे परमेशरेरो प्यार सिद्ध भोरोए, असन इस सेई पतो चलते, कि अस तैस मां आम।

6 जै कोई इन ज़ोते, कि अवं तैस मां बनोरो राताई, त तैनी तेन्चरे ज़ीयोरू लोडे जेन्चरे यीशु मसीहे ज़ीयोरूए।

???????? ???? ?

7 ट्लारव, अवं तुसन कोई नंव्वो हुक्म न लिखी, पन तैए पुरानो हुक्म जै पेडलो तुसन मैल्लो; ई पुरानो हुक्म तैन वचने, जैखन तुसेई मसीह पुड विश्वास कियुं।

8 फिरी भी अवं तुशशे लेइ नंव्वो हुक्म लिखताई, किजोकि एन सन्न आए, जैन मसीह मां ते तुसन मां भी लेइहोवं, किजोकि अन्धकार मिटटो गाते ते सच्चैरी ली हुनी चमकने लोरीए।

9 जै इन ज़ोते, कि अवं लोई मां आई ते विश्वासी द्दलाए सेइ बैर रखते, तै हेजू तगर आंधरे मां आए।

10 जै कोई अपने द्दलाए सेइं प्यार करते, तै लोई मांए, तैसेरेलेइ पाप केरनेरे लेइ कोई वजा नई।

11 पन जै कोई अपने द्दलाए सेइं बैर रखते, तै आंधरे मांए, ते तै आंधरे मां चलते; ते न जाने, कि कोरां गाते, किजोकि आंधरे तैसेरी एछ्छी कैनी केररिन।

12 हे बच्चाव अवं तुसन एल्हेरेलेइ लिखताई, कि यीशु मसीहेरे नंव्वे सेइं तुशशे पाप माफ़ भोए।

13 हे बुजुर्गव अवं तुसन एल्हेरेलेइ लिखताई, कि जै शुरू करां आए तुस तैस ज्ञानथ, हे जवानव, अवं तुसन एल्हेरेलेइ लिखताई कि तुसेई तैस शैताने पुड जीत हासिल केरीए, हे बच्चाव अवं तुसन एल्हेरेलेइ लिखताई कि तुसेई बाजी परमेशर पिशानो।

14 हे बाजव, अवं तुसन एल्हेरेलेइ लिखताई, कि जै पेडलोए तुसेई पिशानो, हे जवानव, अवं तुसन एल्हेरेलेइ लिखताई, कि तुस मजबूतथ, ते परमेशेरू वचन तुसन मां बनोरू रहते, ते तुस शैताने करां जीतोरेथ।

~~~~~

15 तुस न दुनियाई सेइं ते न दुनियायी चीजन सेइं प्यार केरा, अगर कोई दुनियाई सेइं प्यार करते, त तैस मां बाजी परमेशेरु प्यार नई।

16 किजोकि जैन किछ दुनियाई मां आए, मतलब जिसमेरी खुवैइश, ते एछ्छी केरि खुवैइश ते ज़िन्दगरू घमण्ड, तैन बाजी परमेशेरु तरफां नई पन दुनियाये तरफांए।

17 दुनिया ते तैसेरी खुवैइश दुइये मिटती गैतिन, पन जै परमेशेरु मेर्जी पुड चलते, तै सदा बनोरु रालो।

~~~~~

18 हे बच्चव, ई आखरी वक्ते कि मसीह वापस एज्जोए, ते जेन्चरे तुसेई शुनोरूए, कि मसीहेरी खलाफत केनेबालो एज्जोबालोए, तैसेरे मुताबिक हुना भी बडे मसीहेरी खलाफत केनेबाले उठोरें, इस सेइं अस ज्ञानतम, कि ई आखरी वक्ते कि मसीह वापस एज्जोए।

19 तैना मसीहेरी खलाफत केनेबाले लोक निस्से त असने मरां, पन तैना असन मरां न थिये, किजोकि अगर असन मरां भोथे, त असन सेइं साथी राथे, पन निस्से एल्हेरेलेइ कि इन बांदू भोए कि तैना सब असन मरां नई।

20 पन मसीहेरे ज़िरिये तुसन पवित्र आत्मा दितोरुए, तैसेरे वजाई सेइं तुस सब सन्न ज्ञानतथ।

21 मीं तुसन एल्हेरेलेइ नई लिखोरू, कि तुस सच्चै न ज्ञानथ, पन एल्हेरेलेइ, कि तैस ज्ञानतथ, ते एल्हेरेलेइ कोई झूठ, सच्चैरे पासेरां नई।

22 झूठो कौने? सिर्फ तै, जै यीशुएरू मसीह भोनेरो इन्कार करते, ते मसीहेरी खलाफत केनेबालो तैए आए, जै बाजी परमेशेरु ते कने मट्टेरो यानी यीशुएरो इन्कार करते।

23 जै मट्टेरो इन्कार करते तैस कां बाजी परमेशर भी नई, जै मट्टे मन्ते, तैस कां बाजी परमेशर भी आए।

24 जैखन तुसेई यीशु मसीह पुड विश्वास कियुं, तुसेई जै सच्चै शिक्षा शुरू करां शुनोरुए, तैए तुसन मां बनोरी राए, त तुस भी मट्टे मां, ते बाजी परमेशेरु मां बनोरे राले।

25 ते जेसेरो वादो परमेशेरु कियोरुए, तै हमेशारी ज़िन्दगीए।

26 मीं इना गल्लां तुसन तैन करां खबरदार रानेरे लेइ लिखी, जैना लोक तुसन झूठी शिक्षारे ज़िरिये टपलातन।

27 ते तुशुश तैन अभिषेक, जैन तैसेरे तरफां करूए, तुसन मां बनोरू रहते; ते तुसन एल्हेरी ज़रूरत नई, कि कोई तुसन शिखाले। बल्के जेन्चरे तैन अभिषेक जैन तैसेरे तरफां कियोरूए, तुसन सब गल्लां शिखालते, ते इन सच्चे, ते झूठ नई, ते जेन्चरे तैने तुसन शिखालोरूए, तेन्चरे तुस तैस मां बनोरे रातथ।

~~~~~

28 हे बच्चव, तैस मां बनोरे राथ, कि ज़ैखन इन बांदू भोए, त असन दिलेरी भोए ते अस तैसेरे एजने पुड तैसेरे सामने शरमिनदे न भोंम।

29 अगर तुस ज्ञानतथ, कि मसीह धर्मीए, त इन भी ज्ञानतथ, कि ज़ैना धार्मिकतारां कम्मां केरतन, तैना परमेशेरे बच्चेन।

### 3

1 हेरा बाजे परमेशेरे असन सेइं करो प्यार कियो, कि असन जो परमेशेरे बच्चे ज़ोन, ते अस अहम भी, एल्हेरेलेइ दुनियारे लोकेई अस न पिशाने कि अस परमेशेरे बच्चेम, किजोकि तैनेई बाजी परमेशेरे भी न पिशानो।

2 हे ट्लारव, हुनी अस परमेशेरे बच्चेम, ते हेजू तगर इन बांदू नई भोरू, कि अस केरे भोनेम! इन ज्ञानतम, कि ज़ैखन यीशु मसीह बांदो भोलो त अस भी तैसेरे जेरे भोमेले, किजोकि तैस तेरहे लहमेले जेरो तै आए।

3 ते जै कोई भी मसीह पुड ई उमीद रखते, तै अपनो आप तेरहो पवित्र केरते, जेरो मसीह पवित्र आए।

4 जै लगातार पाप केरतो रहते, तै मूसेरे कानूनेरो इन्कार केरते, ते पाप त कानूनेरो इन्कार केरनो।

5 ते तुस ज्ञानतथ, कि यीशु मसीह एल्हेरेलेइ अव, कि पापन दूर केरे, ते तैस मां पाप नई।

6 जै तैस मां बनोरो रहते, तै लगातार पाप न केरे, जै लगातार पाप केरते, तै न समझे कि मसीह कौन आए, ते न तैसेरो तैस सेइं रिशतोए।

7 ट्लारे बच्चव, केन्चरे धोखे मां न एजाथ, जै धार्मिकारां कम्मां केरते, तैए मसीहेरो जेरो धर्मीए।

8 जै कोई लगातार पाप केरते, तै शैतानेरे तरफांए, किजोकि शैतान शुरुआती करां पाप केरतो ओरोए, परमेशेरू मट्टू एल्हेरेलेइ अव, कि शैतानेरे कम्मन खतम केरे।

9 ज़ैना परमेशेरे बच्चेन तैना लगातार पाप न केरन, किजोकि परमेशेरो सुभाव तैन मां बनोरू रहते, ते तैना पाप केरि न सकन, किजोकि तैना परमेशेरे बच्चेन।

10 इस्से सेइं परमेशेरे बच्चे, ते शैतानेरे बच्चे पिशैनोतन, ज़ैना धार्मिकता कम्मां न केरन, तैना परमेशेरे सेइं नई, ते न ते जै अपने दूलाए सेइं प्यार न केरे।

~~~~~

11 जै खबर तुसेईं पइली शुनी, तै ईए, कि अस एक्की होरि सेइं प्यार रखम।

12 ते आदमेरे मट्टेरे कैनेरे जेरे न बनम, जै तैस शैताने सेइं थियो, ते ज़ैने अपनो दूला मारो, ते तै कोस वजाई सेइं मारो! एल्हेरेलेइ कि तैसेरां कम्मां बुरां थियां, ते तैसेरे दूलाएरां कम्मां रोड़ां थियां।

13 हे दूलाव, अगर दुनियारे लोक तुसन सेइं बैर केरते त हैरान न भोथ।

14 अस ज्ञानतम, कि अस मौती करां पार भोइतां जिन्दगी मां पुजोरेम, किजोकि अस दूलान सेइं प्यार रखतम। जै प्यार न रखे, तै मौतरे हालती मांए।

15 जै अपने दूलाए सेइं बैर केरते, तै खूनी आए, ते तुस ज्ञानतथ, कि कोन्ची खूनी मां हमेशारी जिन्दगी न राए।

16 असेईं प्यार इस्से सेइं ज्ञानो, कि यीशु मसीहे इशे लेइ अपने प्राण दित्ते, एल्हेरेलेइ इशो भी दूलां केरे लेइ प्राण देने फ़जै।

17 पन ज़ैस कां दुनियारी जेइदाद भोए, त तै अपने दूलाए ज़ैस ज़रूरत भोए, तैस हेरतां तैस पुड तरस खानो न चाए, त तैस मां परमेशेरो प्यार केन्चरे बनोरो रेइ बटते?

18 हे ट्लारे बच्चव, अस सिर्फ वचन ते जुवानी सेइं नईं, पन कम्मन ते सच्चे सेइं भी प्यार केरम।

QUESTION

19 जैखन अस होरन सेइं प्यार केरमेले एप्से सेइं अस ज्ञानमेले, कि अस सच्चरेम, ते जैस गल्ली मां इशशो ज़मीर असन दोष लाए, तैसेरे बारे मां अस तैसेरे सामने अपने-अपने मने याकीन देइ बटमेले।

20 किजोकि परमेशर इशशे मने करां बड्डोए, ते सब किछ ज्ञानते।

21 हे ट्लारव, अगर इशशो मन असन दोष न दे, त असन परमेशरेंरे सामने दिलेरी भोतीए।

22 ते जैन किछ अस मगतम, तैन असन तैस करां मैलते, किजोकि अस तैसेरे हुक्म मन्तम, ते जैन तैस पसंदे तैन केरतम।

23 ते तैसेरो हुक्म ईए कि अस तैसेरे मट्टे यीशु मसीहरे नच्चे पुइ विश्वास केरम ते जेन्चरे तैने असन हुक्म दितां तैसेरे मुताबिक एक्की होरि सेइं प्यार केरम।

24 ते जैना परमेशरेंरो हुक्म मन्तन, तैना परमेशरें मां, ते परमेशर तैन मां बनोरो रहते, ते इस्से सेइं, मतलब तैस पवित्तर आत्मा सेइं जै तैने असन दित्तोरोए, अस ज्ञानतम, कि ते असन मां बनोरो रहते।

4

QUESTION

1 हे ट्लारव, हर एक्की मैनेरू याकीन न केरा जै दावो केरते कि परमेशरेंरी आत्मा तैस मां आए, बल्के आत्मां अज़माथ कि ते परमेशरेंरी तरफांए कि नईं; किजोकि बडे झूठे नबी दुनियाईं मां निसोरेन।

2 परमेशरेंरी आत्मा तुस इस रीति सेइं पिशनी बटतथ, कि जै आत्मा इन मन्ने, कि यीशु मसीह जिसमे मां ओरोए तै परमेशरेंरे तरफांए।

3 ते जै आत्मा यीशु न मन्ने, तै परमेशरेंरे तरफां नईं, ते तैए मसीहरी खलाफत केनेवाली आत्माए, जेसेरे बारे मां तुसेईं शुनोरू, कि ते एजने वालीए, ते अज़ भी दुनियाईं मां आए।

4 हे ट्लारे बच्चव, तुस परमेशरेंरे लोक आथ, ते तुसेईं तैन झूठन पुइ ज़ींत हासिल कियोरीए, किजोकि पवित्तर आत्माकी शक्ति जै तुसन मांए तै शैतानेरे शक्ति करां बड्डी, जै दुनियाईं पुइ राज़ केरते।

5 तैना झूठे नबी दुनियारेन, एल्हेरेलेइ तैना दुनियारी गल्लां ज़ोतन, ते दुनियारे लोक तैन केरि शुन्तन।

6 अस परमेशरेंरेम, जै परमेशरे ज्ञानते, तै इशशी शुन्ते, जै परमेशरे न ज़ाने तै इशशी न शुने, एल्हेरेलेइ अस तैस आत्माईं जै सच ज़ोतीए ते जै आत्मा झूठ ज़ोतीए पिशानतम।

QUESTION

7 हे ट्लारव, अस एक्की होरि सेइं प्यार केरम; किजोकि प्यार परमेशरे करां आए, जै कोई प्यार केरते, तै परमेशरो बच्चोए, ते परमेशरे ज्ञानते।

8 जै होरन सेइं प्यार न केरे, तै परमेशरे न ज़ाने, किजोकि परमेशर प्यारे।

9 जै प्यार परमेशरे असन सेइं केरते, तै इस सेइं बांदो भोव, कि परमेशरे अपनू अकैल्लू मट्टू दुनियाईं मां भेज्, कि तैस पुइ विश्वास केने सेइं असन हमेशारी ज़िन्दगी मैल्ले।

10 प्यार इस सेइं नईं कि असेईं परमेशरे सेइं प्यार कियो, पन इस मां आए, कि तैने असन सेइं प्यार केरो, ते इशशे पापां केरे छुटकारेरे लेइ अपनू मट्टू भेज्।

11 हे ट्लारव, जैखन परमेशरे असन सेइं एरो प्यार कियो, त असेईं भी एक्की होरि सेइं प्यार कियोरो लोइं।

12 परमेशर कधी केन्चे नईं लवरो; अगर अस एप्पू मामेईं प्यार रखम, त परमेशर असन मां बनो रहते; ते तैसेरो प्यार असन मां सिद्ध भोरोए।

13 इस सेइं अस ज्ञानतम, कि अस परमेशरे मां बनो रातम, ते परमेशर असन मां, किजोकि तैने असन अपने आत्माई मरां दिती।

14 ते असेईं हेरू भी, ते गवाही भी देतम, कि बाजी परमेशरे, मट्टू दुनियाई मां मुक्ति देनेबालो केरतां भेजोरोए।

15 जै इन मन्ते, कि यीशु परमेशेरू मट्टूए, परमेशर तैस मां बनोरो रहते, ते तै परमेशरे मांए।

16 ते जै प्यार परमेशर असन सेइं करते, ते असेईं ज्ञानो, ते असन तैस पुड़ विश्वासे, परमेशर प्यारे, जै प्यारे मां बनोरो रहते, ते परमेशर तैस मां बनोरो रहते।

17 इस सेइं प्यार असन मां सिद्ध भोव, कि असन इन्साफेरे दिहैड़ी दिलेरी भोए, किजोकि जेरो तै आए, तेरे अस भी दुनिया मां अहम।

18 प्यारे मां डर न भोए, बल्के सिद्ध प्यार डरे दूर करते, किजोकि डरेरो रिशतो सजाई सेइं भोते, ते जै डरते, तै प्यार मां सिद्ध नई।

19 अस परमेशरे सेइं ते होरन सेइं एल्हेरेलेइ प्यार केरतम, कि पेइलो परमेशरे असन सेइं प्यार कियो।

20 अगर कोई ज़ोए कि, “अवं परमेशरे सेइं प्यार केरताई,” पन अपने द्वाए सेइं बैर रखे, तै झूठोए, किजोकि जै विश्वासी द्वाए सेइं जै तैने लोरोए प्यार न केरे, त परमेशरे सेइं भी जै तैने लवरो नई, प्यार न केरि सके।

21 ते तैस करां असन ईं हुक्म मैलते, कि जै अपने परमेशरे सेइं प्यार केरते, तै विश्वासी द्वाए सेइं भी प्यार केरते।

5

1 जेसेरो ईं विश्वासे कि यीशु ही मसीहे, तै परमेशरेरो बचोए, ते जै परमेशरे सेइं प्यार केरते, तै तैस सेइं भी प्यार केरते, जैना परमेशरेरे बच्चेन।

2 जैखन अस परमेशरे सेइं प्यार केरतम, ते तैसेरे हुक्मन मन्तम, त इस सेइं अस ज्ञानतम, कि अस परमेशरेरे बच्चेन सेइं प्यार केरतम।

3 अस परमेशरेरे हुक्म मेन्तां तैस प्यार हिरातम, ते तैसेरे हुक्म मुशकलन नई।

4 किजोकि जै परमेशरेरो बचोए, तै दुनियाई पुड़ ज़ीत हासिल केरते, ते तै ज़ीत जैस सेइं दुनियाई पुड़ ज़ीत हासिल केरतम ते इशो विश्वासे।

5 दुनियाई पुड़ ज़ीत हासिल केरनेबालो कौने, सिर्फ तै जेसेरो ईं विश्वासे, कि यीशु, परमेशेरू मट्टूए।

~~~~~

6 ईए तैए, जै पैनी ते खुनेरे जिरिये ओरो थियो; मतलब यीशु मसीह, तै न सिर्फ पैनी सेइं, बल्के पैनी ते खुने दुइयां केरे जिरिये ओरो थियो। ते ई आत्मा जै गवाही देतीए, किजोकि तै सच्चे।

7 ते गवाही देनेबाले टलाई आन

8 आत्मा, ते पानी, ते खून, ते टलेइयां केरि एक्की गल्ली पुड़े गवाही देतन।

9 जैखन अस मैन्हु केरि गवाही मन्तम, त परमेशरेरी गवाही त तैस करां भी बड्डीए, कि तैने अपने मट्टेरे बारे मां गवाही दिती।

10 जै परमेशरेरे मट्टे पुड़ विश्वास केरते, तै अपने आपे मां ई गवाही रखते, जैने परमेशरे पुड़ विश्वास न कियूं, तैने तै झूठो ठहराव, किजोकि तैने तैस गवाही पुड़ विश्वास न कियो, जै परमेशरे अपने मट्टेरे बारे मां दितीरीए।

11 ते तै गवाही ईए, कि परमेशरे असन हमेशारी ज़िन्दगी दिती, ते ई ज़िन्दगी तैसेरे मट्टे मांए।

12 जेसेरो रिशतो मट्टे सेइं आए तैस कां ज़िन्दगीए, ते जेसेरो रिशतो परमेशरेरे मट्टे सेइं नई, तैस कां हमेशारी ज़िन्दगी भी नई।

~~~~~

13 मीं तुसन, जै परमेशेरे मट्ठेरे नंवे पुड विश्वास केरतो भोए, एल्हेरेलेइ लिखताई, कि तुसन पतो लग्गे, कि हमेशारी जिन्दगी तुशशीए ।

14 ते असन परमेशेरे सामने ई दिलेरी भोतीए, तै ईए; कि अगर अस तैसेरे मेर्जी सेइ किछ मगतम, त तै इशशी शुनते ।

15 ते अगर अस ज्ञानतम, कि जैन किछ अस परमेशेरे करां मगतम, तैन असन मैलते ।

16 अगर कोई विश्वासी दूलाए कोई एरो पाप केरतो लाए, जेसेरो नितीजो मौत न भोए, त बिनती केरे, ते परमेशर तैसेरेलेइ, जैने एरो पाप कियोरोए जेसेरो नितीजो मौत नई, जिन्दगी देलो । पाप एरो भी भोतेए जेसेरो नितीजो मौते, एसेरे बारे मां अवं प्रार्थना केरनेरे बारे मां न जोई ।

17 सेभी किसमेरी बुराई त पापे पन एरो भी पापे, जैरेरो नितीजो मौत नई ।

18 अस ज्ञानतम, कि जैना परमेशेरे बच्चेन, तैना लगातार पाप न केरन, पन परमेशेरू मट्ठू यीशु तैस बचाते, ते शैतान तैसेरू किछ न केरि सके ।

19 अस ज्ञानतम, कि अस परमेशेरे सेइ अहम, ते सारी दुनिया तैस शैतानेरे कब्जे मां आए ।

20 ते इन भी ज्ञानतम, कि परमेशेरू मट्ठू यीशु मसीह इस दुनियाई मां ओरूए, ते तैने असन समझ दितोरीए, कि अस सच्चे परमेशेरे पिशानम, ते अस तैस मां जै सच्चे मां आए, मतलब तैसेरे मट्ठे यीशु मसीह मां बनोरे रातम, सच्चो परमेशर ते हमेशारी जिन्दगी ईए ।

21 हे बच्चव, हर अक तैस चीजी करां दूर राथ, जै तुशो दिले मां परमेशेरेरी ठार नेतीए ।

2 यूहन्ना

??????

1 अवं यूहन्ना कलीसियारो बुजुर्ग, तैस बेइन ते तैसेरे बच्चन जैना परमेशरे चुनोरेन ई चिट्ठी लिखने लोरोई। जैन सेई अवं सच्चो प्यार केरताई। सिर्फ अवं नई पन तैना सारे जैना सच्चे ज्ञानतन तुसन सेई प्यार केरतन।

2 अस तुसन सेई प्यार केरतम किजोकि अस सच्ची शिक्षाई पुड़ विश्वास केरतम, ते अस तैस शिक्षाई हमशारे लेइ मन्ते राले।

3 बाजी परमेशर ते तैसेरे मट्टू यीशु मसीह असन अनुग्रह, दया, शान्ति देन। इना सब इशे लेइ आए अस जैना सच्चे मन्तम ते एक्की होरि सेई प्यारे केरतम।

???? ? ? ? ? ? ?

4 अवं बड़ा खुश भाव, जैखन मीं तेरे किछ बच्चां केरे बारे मां शुनु कि तैना परमेशरे बत्तां चलने लोरेन, तैना तैन्ने केरने लोरेन जैन इशे बाजी परमेशरे असन केरनेरे लेइ ज़ोरूए।

5 हुनी हे बेइन, अवं तीं कां मिनत केरताई, असेई एक्की होरि सेई प्यार कियोरो लोडे, ई अक नंवो हुकम नई पन अक आदेशे जै अस तैस वक्ते करां ज्ञानतम, जेइसेरू असेई यीशु मसीह पत्ती चलनू शुरू कियोरूए।

6 सच्चो प्यार ई आए जैखन अस परमेशरे हुकम मन्तम। जेइसेरू तुसेई यीशु मसीह पत्ती चलनू शुरू कियोरू तेइसेरू तुसेई शुनेरू कि परमेशरे हुकम दित्तोरो, कि हमेशा एक्की होरि सेई प्यार कियो लोडे।

7 अवं इन एल्हेरेलेइ ज़ोताई, किजोकि बड़े लोक जैना होरि लोकन झूठी शिक्षारे ज़िरिये धोखो देतन। तैना दुनियारे अलग-अलग टैरन मां जोरेन। तैना ज़ोतन यीशु मसीह मैनेरे रूपे मां नई ओरो, अगर कोई मैन्हु एन्चरे ज़ोते, त तै मसीहेरो खलाफत केरनेबालोए जै हमेशा लोकन धोखो देते।

8 एल्हेरेलेइ तू अपने बारे मां खबरदार रा कि तैना लोक तीं धोखो न देन। जै मेहनत परमेशरे सेवारे लेइ तीं की तै बेफैइदी न भोए, पन तुस तैना सैरी बरकतां हासिल केरेलो जैना देनेरो वादो परमेशरे तुसन सेई कियोरोए।

9 अगर कोई मैन्हु मसीहेरी शिक्षाई पुड़ लगातार न चले पन तैस मां होरू किछ ज़ोइते त तैसेरो रिशतो परमेशरे सेई साथी नई, तैस कां परमेशर नई। पन अगर कोई मसीहेरी शिक्षाई मां बनोरो रहते, तैसेरो रिशतो बाजी परमेशर ते तैसेरे मट्ठे यीशु मसीह सेई भी आए।

10 अगर कोई तुशे सभाई कां एज्जे, ते मसीहेरे बारे मां ईए शिक्षा न दे, त तैस न अपने घरे मां एज्जे देथ, ते न तैस नमस्कार केरतां होसलो न देथ।

11 किजोकि जै कोई एरे मैन्हु जो नमस्कार केरते, तै तैसेरे बुरे कम्मन मां शामिल भोते।

???? ? ? ? ? ? ?

12 बेइ गल्लां आन जैना अवं तुसन सेई ज़ोनी चाताई, पन अवं तैना एन्चरे चिट्ठी मां लिखनी न चैई। पन मीं उमीदे कि अवं तुसन कां एज्जेलो ते अस आमने-सामने भोइतां गल्लां केरमेले, तैखन अस पूरे तरीके सेई खुश भोले।

13 तेरी चुनोरी बेइनारे बच्चे इड़ी जैना परमेशरे चुनोरेन नमस्कार ज़ोतन।

3 यूहन्ना

XXXXXXXXXX XXXXXXX

1 अवं यूहन्ना कलीसियारो बुजुर्ग आई, हे टलारे गयुसे अवं तीजो ई चिट्ठी लिखने लोरोई। अवं सच्चरे तीं सेई प्यार करताई।

2 मेरे टलारे दोस्त, मेरी प्रार्थना ई आए, कि जेन्चरे तू आत्मिक तरक्की केरि रवरोस, तेन्चरे तू सेबी गल्लन मां तरक्की केरतो रास, ते तेरी जान भी राजी राए।

3 किजोकि किछु विश्वासी लोकेई मीं सेई एइतां ज़ोवं, कि तू केन्चरे सच्चरे मुताबिक ज़ीने लोरोस त अवं बड़ो खुश भोव।

4 ज़ैखन भी अवं शुनताई कि तैना, ज़ैना मेरे बच्चां केरे ज़ेरे आन तैना सच्चरे मुताबिक ज़ीतन, तैखन अवं बड़ो खुश भोताई।

XXXXXXXXXX XXXXXXX XXX XXXXXXX XXXX XXX XXXXXXX XXXXXXX

5 हे टलारा, तीं इश्शे विश्वासी सेथी केरि मद्दत केरनेरे लेइ वफादेरी सेई बडू किछु कियोरूए, इड़ी तगर ज़ैन तू ज़ानस भी न तैन केरि भी मद्दत केरतस।

6 इन मरां किछु लोकेई इट्ठेरी कलीसियारे विश्वासी लोकन सेई ज़ोवं, कि तुस अपने मसीही लोकन सेई केतुरो जादे प्यार केरतथ। हुनी अवं तीं ज़ोताई ज़ैना इना लोक तीं करां गान त तीं तैन केरि मद्दत केरती रावरी लोड़े किजोकि एस सेई परमेशर खुश भोते।

7 किजोकि इना लोक मसीहेरू वचन प्रचार केरनेरे लेइ सफर केरतन, ते गैर विश्वासी लोकन करां किछु मद्दत न नेन।

8 एल्हेरेलेइ असेई तैन केरि आदर-खातर कियोरी लोड़े, ताके अस भी तैन सेई साथी सच्च प्रचार केरनेरे कम्मे मां शामिल भोम।

XXXXXXXXXXXXXXXXXX XXXXXXXXXXXXXXX

9 मीं तुश्श नगररे कलीसियार लोकन पइले चिट्ठी लिखोरी थी, पन दियुतिरफेस मेरे हदायतन कबूल केरने करां इन्कार केरते, किजोकि तै हमेशा अपनो आप कलीसियारो लीडर बनानो चाते।

10 एल्हेरेलेइ अगर अवं एज्जेलो, त कलीसियारे लोकां केरे सामने ज़ैन तै केरि रावरोए ज़ोइलो। तै इश्शे खलाफ बुरी-बुरी गल्लां ज़ोइतां झूठे दोष लाते, ते एतूरू नई तै एप्पू प्रचार केरनेवालन कबूल न केरे, ते ज़ैना तैन कबूल केरने चातन, तैन भी टाकते ते कलीसिया मरां कढतन।

11 हे टलारा, तैन लोकां केरि नकल न केरा ज़ैना बुरां कम्मां केरन, पन तैन लोकां केरू ज़ेरू बन्नेरी कोशिश केरा ज़ैना भला कम्मां केरतन। ज़ैखन कोई भला कम्मां केरते तैस सेई साबत भोते कि तै परमेशररो बच्चोए, अगर कोई बुराई केरते तैस सेई साबत भोते कि तै परमेशर न ज़ाने।

12 कलीसियारो सारे मैन्हु दिमेतिरयुसेरे बारे मां ज़ोतन कि तै रोडो मैन्हु आए, किजोकि तै सच्चरे मुताबिक ज़ीते ते अस भी ज़ोतम कि तै अक रोडो मैन्हु आए, ते तू ज़ानतस अस सच्च ज़ोतम।

XXXX XXXXXXX

13 वेइ गल्लां आन ज़ैना अवं तीं सेई ज़ोनी चाताई, पन अवं तैना एन्चरे चिट्ठेरे ज़िरिये न लिखनी चैई।

14 पन मीं उमीदे कि अवं तीं सेई जल्दी मुलाकत केरेलो, तैखन अस आमने-सामने गल्लां केरमेले।

15 अवं प्रार्थना केरताई परमेशर तीं शान्ति दे, इट्ठेरे मसीही दोस्त तींजो नमस्कार ज़ोतन, एट्ठेरे दोस्तन अकैल्ले-अकैल्ले मां गोइतां मेरू नमस्कार ज़ोइयां।

यहूदा

~~~~~

1 अवं यहूदा यीशु मसीहेरो सेवक ते कने याकूबेरो निकडो दूला आई। अवं यहूदा ई चिट्ठी तुसन लोकन लिखने लोरोई, जैना परमेशेरे कुजवरेथ कि तैस पुड़ विश्वास केरथ। बाजी परमेशेर तुसन सेइं प्यार केरते ते यीशु मसीहेरे ज़िरिये तुस सुरक्षित आथ।

2 अवं प्रार्थना केरताई कि परमेशेर तुसन दया ते शान्ति ते प्यार जादे करां जादे दे।

~~~~~

3 हे टुलारव, अवं लिखनेरे लेइ हर मुमाकिन कोशिश केरि रावरो थियो तैस (मुक्तेरे) नंवे ज़िन्दगरे बारे मां जै यीशु मसीहेरे ज़िरिये परमेशेरे तरफां मैलतीए, जैस मां अस शामिल आम। पन हुना अवं इन ज़रूरी समझताई कि तुसन इस चिट्ठेरे ज़िरिये होलसो देई, ताके तुस मसीही विश्वास बनोरो रखनेरे लेइ बड़ी मेहनत केरि बटथ, परमेशेरे ई विश्वास अपने सेबभी लोकां केरे लेइ एक्की बार दित्तोरोए, ते ई न बेदलोए।

4 किछु लोक जैना यीशु मसीह पुड़ विश्वास केनेरो दिखावो केरतन तैना तुशुशे कलीसियान मां शामिल भोरेन। तैना परमेशेरेरी आदर न केरन ते तैना ई गलत शिक्षा देतन, कि परमेशेरे इशु पाप माफ़ कियोरेन ते अस अधर्मी ज़िन्दगी ज़ी बटतम। तैना यीशु मसीहेरो इन्कार केरतन, जै इशुओ अक्के मालिक ते प्रभुए। बड़े पेइले पवित्तरशास्त्र ज़ोते, परमेशेरे एरे ज़ेरे लोकन सज़ा देलो।

5 पन अगर तुसेई सब गल्लां एक्की बार ज़ैनोरिन, फिरी भी अवं तुसन इना गल्लां याद करैनी चाताई, कि प्रभुए इस्राएली लोक गुलैमी मरां आज़ाद किये, ते मिस्र मुलखे मरां कढे पन वादे मां तैने तैना मारे ज़ैनेई सुनसान ठारी मां तैस पुड़ विश्वास न कियो।

6 तुसेई तैन स्वर्गदूतां केरे बारे मां सोचोरू लोड़े ज़ैना अपने पदे पुड़ खुश न थिये, जै परमेशेरे तैन दित्तोरो थियो, पन तैनेई स्वर्गरू घर शारू; परमेशेरे तैना कधी न टलुटेने बैली शंगलन सेइं बंधतां बुन आंधरे मां तैस महान दिहैड़ी तगर रखोरिन, जेइस तै तैन दोषी बनालो।

7 इना इस्राएली ते स्वर्गदूतां केरू जेरू इन भी याद रख्खा कि सदामे ते अमोरा नगरां ते कने आसेपासेरे नगरां केरे रानेबाले लोकन सेइं कुन भोवं। लोक अधर्मी भोए ते हर किसमेरी बदमाशी केनेबाले थिये। एल्हेरेलेइ परमेशेरे तैना अगारे ज़िरिये भस्म किये। ज़ैन तैन सेइं भोवं ई तैन झूठे उस्तादां केरे लेइ खबरदारी आए कि तैन भी हमेशेरे अगारे ज़िरिये सज़ा मैल्लनीए।

8 तेन्त्रेरे इना अधर्मी लोक ई दावो केरतन कि परमेशेरे दर्शने मां ज़ोवरू अधर्मी ज़िन्दगी ज़ीतां तैना अपनो जिसम अशुद्ध केरि बटतन, ते कोन्ची भी एप्पू पुड़ अधिकार रखनेरी अज़ाज़त न देन ते तैना महिमा बाले स्वर्गदूतां केरे बारे मां बुरी गल्लां ज़ोतन।

9 पन इड़ी तगर कि प्रधान स्वर्गदूत मीकाईले इन अधर्मी लोकां केरू जेरू न कियू। ज़ैखन शैतान ते मीकाईल मूसा नेबेरी लाश दबनेरे अधिकारेरे बारे मां बेंस भोइ, त मीकाईल स्वर्गदूते कां इन लोकन करां जादे अधिकार भोनेरे बावजूद भी तैने शैताने बुरी गल्लां ज़ोइतां दोषी न ठहराव, इसेरे बदले तैने इन ज़ोवं, कि “प्रभु तीं डाँटि।”

10 पन इना लोक तैन चीजां केरे खलाफ गलत ज़बान इस्तेमाल केरतन ज़ैन तैना न समझन। ते ज़ैन चीज़न तैना समझतन तैन लैट्टे जानवरां केरे ज़ेरे केरतन, एना चीजां केरतां तैना अपनो आप नाश केरतन।

11 तैन पुड़ अफ़सोस! किजोकि तैना आदमेरे मट्टे कैनेरो ज़ेरो बुरो सलूख केरतन, ज़ैने अपनो दूला मारो। तैना जल्दी ज़ेन्त्रेरे बिलामे पेइसो कमानेरे लेइ लोकन करां पाप कराव तैनेई भी तैए गलती की, ते ज़ेन्त्रेरे करोह नाश कियो किजोकि तैने (मूसेरे खलाफ़) खलाफत की, तेन्त्रेरे तैना लोक भी नाश किये गाले किजोकि तैना भी प्रभुएरे खलाफ खलाफत केने लोरेन।

12 जैखन इना लोक धामन मां खातन जैना तुस प्रभुएरो प्यार याद केरनेरे लेइ बनातथ, त तैना समुन्दरेरी छेपोरी शफड़ां केरे जेरे खतरनाक आन, जैना तुसन डोबनेरी वजा बेनि बटतन। तैना तैन बेशर्म पुहालां केरे जेरे आन जैना सिर्फ अपनो खियाल रखतन। तैना बगैर पैन बिदलारारे जेरेन जैन हवा उडारतीए, तैना शेरारे बेफल बुट्टां केरे जेरे आन. जैना ज़ीलना उखड़ोरेन ते दुइये तरीकेई सेइं मरेन।

13 जेन्चरे समुन्दरेरी मजबूत छेल्ली गंदी शैमफ एनतिन, तेन्चरे इना लोक बेशर्म कम्मां केरतन। तैना किछ तारां केरे जेरे आन जैना सिद्धे वत्तां न चलन, तैना सही बत न हिरान। प्रभुए तैन केरे लेइ अक ठार रखोरि जै पूरे तरीके सेइं आंधरीए जैडी तैनेई हमेशारे लेइ रानू पनू।

14 ते हनोक जै आदमेरे सतोवं पीड़ी मरां थियो, तैन इन अधर्मी लोकां केरे बारे मां भविष्यद्वणी की। तैन ज़ोवं "हेरा, प्रभु अपने बेशुमार पवित् स्वर्गदूतन सेइं साथी एज्जेलो।

15 कि सेब्भी लोकां केरो इन्साफ केरे, ते तैन केरे सेब्भी बुरां कम्मां केरे बारे मां जैना तैनैई परमेशेरे खलाफ कियोरन ते सैरी बुरी गल्लां जैना तैनैई तेसरे खलाफ कियोरिन तैन केरे बारे मां तैन दोषी बनालो।"

16 इना लोक हमेशा परमेशेरे खलाफ ज़ोतन ते होरि केरि गेलती कडतन। तैना अपने मनरे मेरजरे मुताबिक लगातार बुरां कम्मां केरतन। तैना अपने बारे मां घमण्ड केरतन ते अपने फैइदेरे लेइ होरि केरि चापलूसी केरतन।

XXXXXXXXXX

17 पन हे ट्लारव, तुस तैन गल्लन याद रखा; जैना गल्लां इशशे प्रभु यीशु मसीहरे प्रेरितेई पेइली ज़ोरिन।

18 तैना तुसन सेइं ज़ोते थियो, "कि आखरी दिहाइन मां एरे लोक भोले जैना प्रभु ते तैसेरे लोकां केरो मज़ाक बनाले। इना तैना लोक आन जैन केरि ज़िन्दगी तैन केरे बुरी इच्छा केरे कैबू मां आए।"

19 इना तैना लोक आन जैना तुसन अलग-अलग टोलन मां बंटतन, तैन केरि बुरी इच्छां तैन ज़लैतिन ते तैन कां परमेशेरो आत्मा नई।

20 पन हे ट्लारव, तुस एक्की होरेरी मद्दत केरते राथ कि बडे पवित् सच्चे मां बद्धथ जैन तुस विश्वास केरतथ। तुसेई पवित् आत्मारे शेक्तेरे अगवैई सेइं प्रार्थना कियोरो लोडे।

21 तुसेई लगातार इन जैनतां ज़ियोरू लोडे कि परमेशर तुसन सेइं प्यार केरते, जेन्चरे तुस बलगने लोरेथ जेइस इशशो प्रभु यीशु मसीह अपने दयाई मां तुसन हमेशारी ज़िन्दगी देलो।

22 तैन लोकन पुड़ दया केरा जैन नई पतो कि तैना कोस शिक्षाई पुड़ विश्वास केरन।

23 किछ होरे लोक जैन तुस ज़ानतथ कि नरके मां ज़लोरेन। तैन जल्दी खिचतां हमेशारी अगगी मरां बचाथ। हेजू भी होरन पुड़ दया केरा। हांलाकि, ध्यान देथ तेस्से पापे दुबारा न केरा। तुस तैन केरे पापन सेइं अजमैइशी मां न पेथ, ते तैना पाप केरनेरे ज़िरिये अपनो आप दागदार न केरा।

24 परमेशर तुशशी हफाज़त केरनेरे बाले ताके तुस पापेरी ज़िन्दगी ज़ीतां धोखो न खाथ। ते महिमा बालो परमेशर तुसन एप्पू कां आन्नेरे ते तुसन बेकसूर ते खुशी सेइं भरनेरे काबले।

25 तेए अक परमेशर जैन यीशु मसीहरे ज़िरिये असन मुक्ति दिती, इशशो प्रभु यीशु लोकन परमेशेरी आदर केरने ते तैसेरी बडयाई केरनेरी वजा बनाते। ताके तैना इस गल्ली पिशानन कि तैस कां शुरू करा हुन्ना ते हमेशारे लेइ शक्ति ते अधिकार आए। आमीन।

यीशु मसीहेरो प्रकाशितवाक्य

११ ११११११११ ११११ ११११ ११११

1 यीशु मसीहेरो प्रकाशितवाक्य, जै परमेशरे तैस एल्हेरेलेइ दित्तो कि तै अपने सेवकन तैना गल्लां हिराए, जैन केरू जल्दी भोनू जरूरीए। यीशु मसीहे अपनो स्वर्गदूत भेजतां तैसेरे जिरिये अपने दास यूहन्ना इना गल्लां जोई,

2 अवं यूहन्ना तैन सब लिखने लोरोई जैन मीं लवं, अवं इस मां परमेशेरू वचन ते यीशु मसीहेरी सच्च्ची शिक्षारी गल्लां लिखने लोरोई जैना तैनी मीं सेइं जोई।

3 परमेशर तैन सेब्भी लोकन बरकत देलो जैना इस भविष्यवैनरे वचने पढतन, ते कने जैना शुन्तन ते इस मां लिखारी गल्लन मन्तन, किजोकि इन गल्लां पूरी भोनेरो वक्त नेडो ओरोए।

4 अवं यूहन्ना आसिया इलाकेरे सत कलीसियान जो लिखने लोरोई। परमेशरे जै आए ते जै हमेशा थियो, ते जै एजनेबालो आए; ते तैन सत आत्मां केरे तरफां जैना तैसेरे तखतेरे सामनेन तुसन अनुग्रह ते शान्ति मैलती राए।

5 ते यीशु मसीहेरे तरफां, जै वफादार गवाह ते मुडदन मरां ज़ीतो भोने बालन मरां पेइलोए त कने धेरतेरे राजां केरो प्रधाने तुसन अनुग्रह ते शान्ति मैलती राए। यीशु मसीहे असन सेइं प्यार कियो, त कने तैने अपने खूने सेइं अस पापन करां छुटाए।

6 तैने अस अक राज ते अपने बाजी परमेशेरी सेवा केरनेरे लेइ याजक भी बनाए; तैसेरी महिमा ते हकोमत हमेशा भोती राए। आमीन।

7 हेरा, मसीह बिदलारी सेइं साथी एजनेबालोए, ते हर कोई तैस लाएलो, बल्के जैना लोक तैसेरे मौतरे लेइ जिमेवार थियो, तैना भी तैस लाएले, ते धेरतेरे सारे लोक ज़ोरे-जोरे सेइं लेरां देले। हाँ इन भोल्। आमीन।

8 परभु-परमेशर ज़ोते, “अव्वें अलफा ते ओमेगा आई, (मतलब पेइलो ते आखर) अवं तै आई, जै आए, जै हमेशा थियो, ते जै एजने बालोई, ते बडो शक्ति बालोई।” तै इन ज़ोते,

११११११११ ११११११११ ११११११ ११११

9 अवं यूहन्ना तुशुशो विश्वासी दूला, ते कने यीशु मसीहेरे लेइ दुःखन मां, परमेशेरे राज्जे मां, ते सबरी मां तुसन सेइं साथी शामलाई। अवं पतमुस नव्वेरे टैपू पुड़ परमेशेरू वचन शुनानेरे त कने यीशुएरी गवाही देनेरे वजाई सेइं कैद थियो।

10 हफतेरे पेइले दिहाड़े पवित्तर आत्मां अवं अपने कैबू मां कियो, मीं एप्पू पत्तर अक आवाज इन ज़ोते शुनी। तै आवाज नइशिगेरी उच्चि आवज़री ज़ेरि थी।

11 “जैन किछ तू लातस, तैस किताबी मां लिखतां सत नगरां केरे कलीसियान कां भेज, मतलब इफिसुस, स्मरना, पिरगमुन, थुआतीरा, सरदीस, फिलदिलफिया ते लौदीकिया नगरन मां आन।”

12 तैखन जै मीं सेइं गल्लां केरने लोरो थियो तैस हेरनेरे लेइ तक्कू; ते पत्रोवं फिरतां मीं सोन्नेरे सत दीवट लाए।

13 ते तैन दीवटां केरे मझाटे मझदेरो ज़ेरो कोई लाव, तैने पवन तगर लम्मो चोगो लोरो थियो, ते तैसेरे छैती पुड़ सोन्नेरो पटको बंधोरो थियो।

14 तैसेरे दोगो पुड़ तैसेरे बाल छिती उन्नी या हिंवेरे ज़ेरे थियो। तैसेरी एछ्छी अगारे लपारी ज़ेरि बेलती थी।

15 ते तैसेरे पाव भेट्ठी मां गर्म कियोरे पितलरे ज़ेरे चमकते थियो, ते जैखन तैने गल की तैसेरी आवाज बड़े ज़ोरे सेइं थी, जेन्चरे बड़े दरियां केरि ज़ेरि जैना बड़े ज़ोरे सेइं च़लतन।

16 ते तै अपने देइने हथ्ये मां सत तारे घिन्तां थियो, ते तैसेरे मुखे सेइं दुई धारण वाली तलवार निसती थी, तैसेरू तुरत एरू चमकतू थियूं, जेन्वरे दिहाडो भर-दुपारेई चमकते ।

17 जैखन मीं तै लव, त तैसेरे पावन पुड़ मुड़दरो जेरो पेव, ते तैने मीं पुड़ अपनो देइने हथ रखतां इन जोवं, “डर न, अवं पेइलो त कने आखरी आई ।

18 ते जीतो भी अवं आई, अवं एककी बार मरों थियो, पन हुनी अवं जीतोई ते अवं हमेशा जीतो रानोई । मीं मौती पुड़ ते पाताले पुड़ जै मरें लोकां केरि ठारे अधिकारे ।

19 एल्हरेलेइ जैना गल्लां तीं हेरी ते जैना गल्लां भोइ रेवरिन, ते जैना इट्टां बाद भोने बैलिन, तैना सब लिख ।”

20 मतलब तैन सत तारां केरो भेद जैना तीं मेरे देइने हथ्ये मां लोरे थिये, ते तैन सत सोन्नेरे दीवटां केरो भेद, ते सत तारे सत कलीसियां केरे स्वर्गदूतन, ते तैना सत दीवट सत कलीसियान ।

2

1 तैने मीं सेइं इन भी ज़ावं: “इफिसुस नगरें कलीसियारे स्वर्गदूते जो ई सन्देश लिख कि, ‘अवं ते आई जै सते तारे अपने देइने हथ्ये मां घिन्तां फिरताई, ते सोन्नेरे सत दीवटां केरे मझाटे फिरताई, अवं इन ज़ोताई:

2 अवं तेरां कम्मां, तेरी मेहनत, ते तेरू सबर ज्ञानताई । ते इन भी, कि तू बुरे लोकन बर्दाश न केरि बटस; त कने तैन जैना अपनो आप पूरेरित ज़ोतन पन आन नई, तैना तीं परखे ते तैना झूटे निस्से ।

3 अवं इन भी ज्ञानताई मेरे नंब्वेरे खातर तीं सबरी सेइं दु:ख झैल्ले ते तीं मेरी सेवा केरनि न शारी ।

4 पन मीं तेरे खलाफ इन ज़ोनूए कि जेरो प्यार तीं मीं सेइं विश्वास केरनेरे वक्ते मां कियोरो थियो इस वक्ते मां न केरस ।

5 याद रख तू बिछड़ने करां पेइलो कोड़ि थियो । तू पाप केरने करां मनफिरा ते तेरही ज़िन्दगी जी जेरि पेइलो विश्वास केरनेरे वक्ते जीतो थियो । अगर तू मन न फिरालो त अवं तीं कां एइतां तेरू दीवट तैस ठारां पुटेलो ।

6 पन हाँ तीं मां ई गल त आए, कि तू नीकुलइयां* केरे कम्पन सेइं नफरत केरतस, जैन सेइं अवं भी नफरत केरताई ।

7 जै समझनू चाते तै ध्याने सेइं शुने कि परमेशेरो आत्मा कलीसियान सेइं कुन ज़ोते, जै जीत हासिल केरे, अवं तैस, ज़िन्दगरे बुटे मरां फल खानेरे लेइ देइलो जै ज़िन्दगी देते, जै परमेशेरे स्वर्ग लोके मांए ।”

8 तैने मीं सेइं इन भी ज़ावं, “स्मुरना नगरें कलीसियारे स्वर्गदूते जो ई सन्देश लिख, ‘जै पेइलो ते आखरीए; जै मरों थियो ते हुनी जीतो भोरोए, तै इन ज़ोते:

9 अवं ज्ञानताई कि तू स्तव गातस ते तू गरीब आस, पन आत्मिक गल्लन मां तू धनी आस । अवं इन भी ज्ञानताई कि जैना लोक ज़ोतन कि तैना परमेशेरे चुनोरे (यहूदी) लोकन, पन तैना असलीती मां नई । तैना तुशेरे बारे मां बुरी गल्लां ज़ोतन, पन हकीकत मां तैन केरो रिशतो एरे टोली सेइं आए जै शैतानेरी ।

10 जैना दु:ख तीं झैल्लने पेनेन तैन करां न डर । शैतान तुसन मरां किछ् लोकन ट्लुइतां कैद करालो ताके तैना परखे गान । ते तुसन दश दिहाइन तगर बड़ो दु:ख झैल्लनो भोलो । पन मीं पुड़ विश्वास केरनो न शार, चाए जान भी देनी पे, किजोकि अवं तेरे जीतरे लेइ हमेशेरे ज़िन्दगरू इनाम देइलो ।

* 2:6 2:6 नीकुलइयां: ए पंथ थियो तैना शिखालते थिये कि विश्वासी लोक अधर्मी ज़िन्दगी जी सकतन ते मूरती केरि पूजा केरि सकतन ।

11 जै समझनू चाते तै ध्याने सेइं शुने कि परमेशेरो आत्मा कलीसियान सेइं कुन ज्रोते, जै ज्रीते, तैस दुइयोवं मौती† सेइं नुकसान न पुजेलो ।”

~~~~~

12 तैने मीं सेइं इन भी ज़ावं, “पिरगमुन नगररे कलीसियारे स्वर्गदूत जो ई सन्देश लिख, ‘अवं तै आईं जैस कां दुईं धारण वाली तिख्खी तलवार, अवं इन ज्रोताईं:

13 अवं इन जानताईं, कि तू तैड़ी रातस जैड़ी शैतान राज़ करते, तू मीं सेइं साथी ईमानदार राव, त कने तू मीं पुड़ विश्वास केरनो कधे न शारस । तीं इड़ी तगर विश्वास कियो ज़ेइस मेरो वफादार गवाह अन्तिपास तैनेईं तैस टैरी मारो, जैड़ी शैतान राज़ करते ।

14 पन मीं तेरे खलाफ किछ् गल्लां ज़ोनिन, किजोकि तू तैन केरि खलाफत न केरस ज़ैना तुशशे कलीसियाईं मां झूठी शिक्षा देतन तेन्चरे ज़ैन विलामे वीतोरें वक्ते मां शिखालू । विलामे बालाक राज़े शिखालू कि इस्राएली लोकां केरि अज़मैइश केरे ताके तैना पाप केरन । तैने शिखालू कि तैना मूरतन पुड़ बलिदान कियोरी चीज़ां खान ते बदमाशी केरन ।

15 तेन्चरे तुसन मां किछ् लोक एरे आन ज़ैना नीकुलइयां केरि शिक्षा मन्तन ।

16 ते मनफिरा, नईं त अवं तीं कां जल्दी एजतां तैन लोकन सेइं तैस तलवारी सेइं लेइले जो मेरे ऐशेरां निसतीए ।

17 जै समझनू चाते तै ध्याने सेइं शुने कि परमेशेरो आत्मा कलीसियान सेइं कुन ज्रोते; ज़ैना लोक ज़ीत हासिल केरन, तैन अवं छुप्पोरो मन्ने मरां देइलो, त कने अवं तैन अक छिटो घोड़ भी देइलो; तैस घोड़े पुड़ अक नवं लिखोरू भोलू, ज़ैस तैसेरे हासिल केरनेबालेरी अलावा होरो कोई न जानेलो ।”

~~~~~

18 तैने मीं सेइं इन भी ज़ावं, “थुआतीरा नगररे कलीसियारे स्वर्गदूत जो ई सन्देश लिख कि, ‘अवं परमेशेरू मट्टू ज़ेसेरी एछ्छी अगारी ज़ेरिन, त कने ज़ेसेरे पाव कीमती पीतलारे ज़ेरिन, अवं इन ज्रोताईं:

19 अवं तेरे कम्मन, तेरे प्यारे, विश्वास, सेवा त कने सबरी जानताईं, ते इन भी जानताईं, कि तेरां आखरी कम्मां पेइले कम्मन करां बेदुतन ।

20 पन मीं तेरे खलाफ इन ज़ोनूए, कि तू तै कुआन्श इजेबेल राने देतस; ज़ै अपनो आप नबिन ज़ोतीए, ते मेरे दासन बदमाशी केरने त कने मूरतन कां चाढोरू खानू शिखैलतां टपलातीए ।

21 मीं तैस मनफिरानेरे लेइ मौको दित्तो, पन तैसा अपने बदमाशी केरने करां मन न फिरानो चाव ।

22 हेरा, एल्हेरेलेइ अवं तैस बिमार केरेलो; ते ज़ै तैस सेइं बदमाशी केरेलो अगर तैना भी तैन कम्मन करां मन न फिराले, त तैन बड़े मुसीबती मां छेडेलो ।

23 ते अवं तैसेरे बच्चन मेरेलो; ते तैखन सब कलीसियां बुझेली कि दिल त कने मनेरो परखने बालो अवं आईं; ते अवं तुसन मां हर एककी तैसेरे कम्मां केरे मुताबिक बदलो देइलो ।

24 पन तुस थुआतीरा नगररे बाकी लोकन सेइं, ज़ैना तैस शिक्षाईं न मन्न्, ज़ैन गल्लन जो तैना शैतानेरी डुगी गल्लां ज़ोतन न ज़ानन, इन ज़ोताईं, कि अवं तुसन पुड़ होरो बोझ न रेख्खी ।

25 पन हां, ज़ैन तींकांए तैस मेरे एजने तर ठेमतां रख ।

26 ज़ैना लोक ज़ीत हासिल केरन, ते ज़ै मेरे इच्छारे मुताबिक आखरी तगर केरतो राए, अवं तैस सैरी कोमां केरे लोकन पुड़ अधिकार देइलो ।

27 अवं तैस तेरहो अधिकार राज़ केरनेरे लेइ देइलो ज़ेरो मेरे बाजे मीं दित्तोए । तैन केरू राज़ लोहेरू ज़ेरू मज़बूत भोलू ज़ैन टलुटे न, ते तैन केरे दुश्मन मित्तरे भाण्डां केरे ज़ेरे चूर-चूर भोले ।

28 अवं तैन केरि ज़ीत हिरानेरे लेइ तैन झेझेरो तारो भी देइलो ।

29 जै समझनू चाते तै ध्याने सेइं शुने कि परमेशेरो आत्मा कलीसियान सेइं कुन ज्रोते ।”

† 2:11 2:11 दुइयोवं मौत: पेइली मौत जानरी मौते, दुइयोवं मौत हमेशारी मौते

3

XX

1 तैने मीं सेइं इन भी ज़ोवं, “सरदीस नगरेर कलीसियारे स्वर्गदूते जो ई सन्देश लिख कि, ज़ैस कां परमेशेरी सत आत्मान ते सत तारेन, तै इन ज़ोते कि अवं तेरे कम्मन ज्ञानताई, कि तींझो ज़ींतो ज़ोतन, पन तू आस मरों।

2 एल्हेरेलेइ वींझो रा, ते तैन चीज्जन ज़ैना रेवरिन, ते ज़ैना मितने वैलिन, तैन मज़बूत केर; किजोकि मीं तू केन्वी चीजी मां अपने परमेशेरे कां पूरो न लव।

3 याद केर, कि तीं केरि शिक्षा मैलोरी थी तीं ते शुनोरी थी, ते तैस मनतो रा ते कने मनफिरा, ते अगर तू वींझो न रालो, त अवं चोरेरो ज़ेरो एज्जेलो ते तू कथे न ज़ानिलो, कि अवं कोस घेड़ी तीं पुइ एज्जेलो।

4 पन सरदीस नगरे मां तुसन मां किछ् लोक एरे आन, ज़ैनेई अपने आप पापे सेइं अशुद्ध नईं कियोरो, तैना छित्तां लिगडां लेइतां मीं सेइं साथी च़लेले किजोकि तैना इस काबलन।

5 ज़ैना ज़ीत हासिल केरेले तैन इस्से तरीके सेइं तैन केरां ज़ेरां छित्तां लिगडां लुवां गालां। अवं तैन केरू नवं तैस कितावी मरां हटेइलो ज़ैस मां परमेशेरे तैन केरां नंवां लिखोरन ज़ैना हमेशारी जिन्दगी हासिल केरेले। अवं तैन केरू नवं अपने बाजी ते अपने स्वर्गदूतां केरे सामने एलान केरेलो।

6 ज़ै समझून चाते तै ध्याने सेइं शुने कि परमेशेरो आत्मा कलीसियान सेइं कुन ज़ोते। ”

XX

7 तैने मीं सेइं इन भी ज़ोवं, “फिलदिलफिया नगरेर कलीसियारे स्वर्गदूते जो इन लिख, अवं ते आई ज़ै पवित्र ते सच्च्ने, ते ज़ैस कां दाऊदेरी चाबीए, ज़ेसेरे खोल्लेरे कोई बंद न केरि सके ते ज़ेसेरे बंद केरि कोई खोल्लेरे न सके, तै इन ज़ोते:

8 अवं तेरे कम्मन ज्ञानताई, हेर, मीं तेरे सामने अक बत खोलरोरीए, ज़ैस कोई बंद न केरि सके कि तेरी शक्ति थोड़ीए, ते तीं मेरू वचन मनोरूए, ते मेरे नंवेरो इन्कार नईं कियोरो।

9 हेर, ज़ैन लोकां केरो रिश्तो शैतानेरी टोली सेइं आए, तैना ज़ोतन कि तैना यहूदी आन, पन आन नईं, बल्के झूठ ज़ोतन हेर, अवं एरू केरेलो, तैना तीं कां एइतां झुकेले, ते इन ज़ानेले, कि अवं तीं सेइं प्यार करताई।

10 ज़ैखन तू दुःख झैल्लतो थियो तीं सबरी सेइं मेरो सन्देश मन्नो। एल्हेरेलेइ अवं भी तीं बडे अज़मैइशेरे वक्ते बच्चेइलो, ज़ै धेरतली पुइ रानेबालन पुइ परखनेरे लेइ सारे दुनियाई पुइ एजने बालीए।

11 अवं जल्दी एजने बालोई; ज़ैन किछ् तींकांए, तैस टेमतां रख, कि कोई तेरू ताज न थसोडे।

12 ज़ै ज़ीत हासिल केरे, तै ज़ेन्चरे अक खम्भो घरे मज़बूत रखते, तेन्चरे तै भी परमेशेरेर मन्दरे मां हमेशा रालो; ते अवं अपने परमेशेरेरू नवं, ते अपने परमेशेरेर नगर, मतलब नंवे येरूशलेमेरू नवं, ज़ैन नगर स्वर्गे पुडां एजने बालूए ते अपनू नंवां नवं तैस पुइ लिखेलो।

13 ज़ै समझून चाते तै ध्याने सेइं शुने कि परमेशेरो आत्मा कलीसियान सेइं कुन ज़ोते। ”

XX

14 तैने मीं सेइं इन भी ज़ोवं “लीदीकिया नगरेर कलीसियारे स्वर्गदूते जो ई सन्देश लिख कि, ज़ै आमीन, वफादारे, ते सच्च्चो गवाह आए, ते परमेशेरी सर्ष्टिारी वजाए, तै इन ज़ोते।

15 कि अवं तेरे कम्मन ज्ञानताई, कि तू तैस पैनेरो ज़ेरोस ज़ैन न ठंढू ए ते न गर्म, रोडू भोथू कि तू ठंडो भोथो या फिरी गर्म, यानी तू मीं पूरो विश्वास केरेथो या बिलकुल न केरेथो।

16 एल्हेरेलेइ तू निघोस, ते न ठंडोस ते न त्तओस, पन तू अंधे मने सेइं मीं पुइ विश्वास केरतस, एल्हेरेलेइ अवं तीं रद करेनेबालो आई।

17 तू ज़ैन ज़ोतस, कि अवं धनी, ते धनी भोरोई, ते मीं केन्वी चीजरी घटी नईं, ते इन न ज्ञानस, कि तू बदकिसमत ते तुच्छ् ते कगाल ते कानो, ते नगोस।

18 एल्हेरेलेइ अवं तीं सलाह देताई, कि अग्गी मां तौरू सोन्नु मीं करां ने, कि धनी भोस; ते छित्तां लिगडां ने, कि तीं अपने नग्गे पनेरी शर्म न भोए; ते अपने एच्छी केरे लानेरे लेइ कजल ने, कि तू लास ।

19 अवं जैन-जैन सेइं प्यार केरताई, तैन शिखालताई ते सजा देताई ताके तैना रोडे बनन । एल्हेरेलेइ भलाई करने मां लग्गोरो रा, ते पापन करां मनफिरा ।

20 हेर, तेरे दिले मां एजनेरे लेइ अवं जेन्चरे कोई घेरू दार गुडकाते अवं तेन्चरे आई; अगर तू मेरी आवाज श्रुन्तां अपनो दिल खोल्लस, त अवं अन्तर एज्जेलो ते अस एप्पू मामेइ संगती केरमेले ।

21 जै जीते, अवं तैस एप्पू सेइं साथी अपने तखते पुइ विशैलेलो, जेन्चरे अवं भी जीत हासिल केरतां अपने बाजी केरे तखते पुइ विशशोरोई ।

22 जै समझनू चाते तै ध्याने सेइं शुने कि परमेशेरो आत्मा कलीसियान सेइं कुन ज़ोते । ”

4

~~~~~

1 इना गल्लां हेरनेरां पत्ती, मीं स्वर्गें मां अक दार खुल्लोरू लाव । ते मीं सेइं कोई गल्लां केरने लाव ई तैए थियो जैने मीं सेइं पेइली गल्लां की, तैसेरी आवाज नइशिनगरे जेरि थी । तैने मीं सेइं ज़ोवं, “इडी वा एई: अवं तीं तैना गल्लां हिरेइलो, जैन केरू इन गल्लां केरे पत्ती पूरू भोनू ज़रूरीए ।”

2 अकदम पवित्तर आत्मां अवं अपने कैवू मां कियो; ते मीं स्वर्गें मां अक तखत लाव ते तैस तखते पुइ कोई विशोरो लाव ।

3 ते जै तैस तखते पुइ विशोरो थियो, तै यशव ते मानिक कीमती घोड़ां केरो जेरो लेइहोतो थियो । ते तैस तखते च़ेवरे पासन भुन्जल्लैठ थी, जै मरकत घोड़ेरी जेरि लेइहोती थी ।

4 तैस तखतेरे च़ेवरे पासन चोब्डी तखत थिये; ते तैन तखतन पुइ चोब्डी बुजुर्ग छित्तां लिगडां लेइतां विशशोरे थिये, ते तैन केरे दोगन पुइ सोन्नेरां ताजां थियां ।

5 ते तैस तखते मां बिजली ते गुडने ते तखतेरे सामने अगारे सत दीवट बलने लोरे थिये, इन परमेशेरे सत आत्मा आन ।

6 ते तैस तखतेरे सामने शीशेरो साफ समुन्दर थियो जै बरफारो जेरो थियो, ते तखतेरे मझाटे ते तखतेरे च़ेवरे पासन प्राणी थिये, तैन केरे सैरे जानी पुइ एच्छी-एच्छी थी ।

7 पेइलो प्राणी शेरो जेरो थियो, ते दुइयोवं प्राणी दाँतेरो जेरो, दलेइयोवं प्राणी मैनेरो जेरो थियो, ते च़ेवरोवं प्राणी उडरने वाले उकावरो जेरो थियो ।

8 ते च़ेवरे परेणी केरां शा-शा फंगां थियां ते तैन पुइ एच्छी थी इडी तगर कि फंगन अन्तर भी एच्छी थी, तैना रात दिहाड़ी बगैर आरामे इन ज़ोते रातन,

“पवित्तर, पवित्तर, प्रभु-परमेशर, सर्वशक्तिमान,  
जै थियो, जै आए, ते जै एजनेबालोए ।”

9-10 जै तखते पुइ विशोरो जै हमेशा-हमेशा जीतोए, तैना प्राणी तैसेरी महिमा ते आदर ते शुकर केरेले, जैखन चोब्डी बुजुर्ग तखतन पुइ बिशने वाले कां मथ्यो टेकेले, ते तैसेरी आराधना केरेले । ते तैना अपना-अपना ताजां तखतेरे सामने इन ज़ोइतां रखेले:

11 “हे इशशे प्रभु-परमेशर, तींए सैरी चीजां बनेइ ।

तेरे मेर्जी सेइं सब चीजां बनेइ जेई ते वजूदे मां एई ।

एल्हेरेलेइ तूए महिमा, आदर ते शेक्तेरे काबलस ।”

## 5

~~~~~

1 जै तखते पुइ विशोरो थियो, मीं तैसेरे देइने हथ्ये मां अक किताब लाई, जै अन्तर्मेई त कने बेइरमेई लिखोरी थी, ते तै सत मोहरां लेइतां बन्द कियोरी थी ।

2 फिरी मीं अक ताकतवर स्वर्गदूत लाव, जै ज़ोरे ज़ोरे सेइ ई प्रचार केरतो थियो । “इस किताबारे खोल्लने ते इसेरी मोहरां टलोइनेरे काबल कौने?”

3 पन न स्वर्गे मां, न धेरती पुइ न धेरतारे बुन कोई तैस किताबी खोल्लने या तैस पुइ नज़र केरनेरे काबल मैलो ।

4 ते अवं ज़ोरे-ज़ोरे सेइ लेरां देने लव, किजोकि तैस किताबरे खोल्लनेरे या तैस पुइ नज़र केरनेरे काबल कोई न मैलो ।

5 तैखन तैन बुजुर्गन मरां एक्के मीं सेइं ज़ोवं, “लेरां न दे, तक, तै ज़ैस जो यहूदारे गोत्तेरो शेर ज़ोतन, ज़ै दाऊद राज़ेरे खानदाने मरांए तैने तै किताबी खोल्लनेरे ते सत्ते मोहरां टलोइनेरे लेइ शैतान हारावरोए ।”

6 तैखन मीं तखत ते च़ेवरे प्राणी त कने तैन बुजुर्गां केरे मझाटे अक मारोरू गबडू लाव । तैसेरां सत शिनाां ते सत एछ्छी थी; इना परमेशेरी सते आत्मान, ज़ैना सैरी धेरतली पुइ भेजोरिन ।

7 गबडे अग्रर एइतां ज़ै तखते पुइ विशोरो थियो तैसेरे देइने हथ्थे मरां तै किताब नेही ।

8 ते ज़ैखन तैने किताब नेही, त तै च़ेवरे प्राणी ते चोब्डी बुजुर्ग तैस गबडेरे सामने झुके; ते हर केन्चेरे हथ्थे मां बर्बत ते धूपे सेइं भरोरे सोन्नेरे कटोरे थिये, इना पवित्तर लोकां केरि प्रार्थनान ।

9 त तैना इन नंखू गीत ज़ोने लगे,

“तीं कां अधिकारे कि तू मोहरन टलोइस ते इस किताबी खोल्लस,

किजोकि तीं मेरतां अपने खूने सेइं परमेशेरे लेइ हर एक्की कुले मरां, हर भाषाई मरां,

हर लोकन मरां, ते कौमी मरां लोक धिन्नोरेन ।”

10 “तीं तैना राज़े बनाए, तीं तैना याजक बनाए ज़ैना इश्शे प्रभु परमेशेरे लेइ सेवारू कम केरन, ते तैना धेरती पुइ राजां केरू ज़ेरू राज़ केरतन ।”

11 मीं दुबारा तक्कू, त मीं बेशुमार स्वर्गदूतां त च़ेवरे प्राणी ते बुजुर्गां केरि आवाज़ शुनी ज़ैना तखतेरे च़ेवरे पासन थियो ।

12 तैना ज़ोरे सेइं ज़ोते थी, “मारोरू गबडू समर्थ, धन, ज्ञान, शेक्ति, आदर, महिमा, ते कने शुक्रेरे काबले ।”

13 फिरी मीं स्वर्गे मां ते धेरतली पुइ त कने धेरतलेरे बुन, ते समुन्देरेरी सब चीज़ां, ते सब किछ् ज़ैन तैन मांए, इन ज़ोते शुनू कि, “ज़ै तखते पुइ विशोरोए तैसेरू त कने गबडेरू शुक्कर, आदर, महिमा ते राज़, हमेशा राए ।”

14 ते च़ेवरे प्रेणई आमीन ज़ोवं, ते बुजुर्गेई मथ्यो टेको ।

6

२२ २२२२२ २२२२२

1 फिरी मीं लाव, कि गबडू तैन सत मोहरन मरां अक खोल्ली; ते तैन च़ेवरे प्रेणन मरां एक्केरी गुइनेरी ज़ेरि आवाज़ शुनी कि, “एई ।”

2 ते मीं नज़र की, ते अक छितो घोडोए, ते तैसेरे सुवारे कां धनक थियूं, ते तैस अक ताज दित्, ते तै ज़ीतो निस्सो कि होरि भी ज़ीत हासिल केरे ।

3 ज़ैखन गबडे दुइयोवं मोहर खोल्ली, त मीं होरो प्राणी इन ज़ोते शुनू कि, “एई ।”

4 फिरी अक होरो घोडो निस्सो, ज़ै लाल रंगेरो थियो; ते तैसेरे सुवारे ई अधिकार दित्तो, कि धेरतली पुडां मेल-मिलाप सल्ले, ताके लोक एक्की होरि मारन; ते तैस अक बडडी तलवार दित्ती ।

5 ते ज़ैखन गबडे टलेइयोवं मोहर खोल्ली, त मीं टलेइयोवं प्राणी इन ज़ोते शुनू कि, “एई ।” ज़ैखन मीं तक्कू त अक कालो घोडो निस्सो;

6 ते मीं तैन च़ेवरे प्रेणन मरां मैनेरी ज़ेरि ई गल ज़ोते शुनी, कि दीनारो गेहुं, “ते दीनारेरे ट्लाई सेर ज़ौ, तेल, ते कने दाछ़ोरो रसेरो नुकसान न केरथ ।”

7 ज़ैखन तैने च़ेवरोवं मोहर खोल्ली, त मीं च़ेवरोवं प्राणी इन ज़ोते शुनो कि, “एई ।”

8 ते मी नजर की, ते हेरा, अक हेडदलो घोडोए; तैसेरे सूवारेरू नवं मौते, ते पाताल तैस पत्ती-पत्तीए, ते तैन ई अधिकार मैल्लो कि धेरती पुड रानेबाले लोकन मरां हर च़ेवरो मैन्हु मारन, कि तैना तैन तलवारी सेइं मारन, ते दलुखी सेइं मारन, ते बुरी बिमैरी सेइं मारन, ते तैन जंगली जानवरन सेइं भी मारन ।

9 ज़ैखन गबडे पंच्रोव मोहर खोल्ली, त मी वलिदान केरनेरी ठारी करां वुन आत्मा लेई, ज़ैना परमेशरेरे वचनरेरे वजाई सेइं, ते तैस गवाहेरी वजाई सेइं ज़ै तैनेईं दित्तोरी थी, कि यीशु मसीह तैन केरो प्रभुए मारोरो थियो ।

10 ते तैनेईं बडे ज़ोरे सेइं हक देइतां ज़ोवं, “हे पवित्तर, ते सच्चे प्रभु; तू केइस तगर इश्शो इन्साफ न केरेलो? ते धेरतलरे रानेबालन सेइं इश्शे खूनेरो बदलो केइस नेलो?”

11 ते तैन सेबन छित्तां लिगडां दित्तां, ते तैन सेइं ज़ोवं, कि थोडे च़िरेरे लेइ आराम केरा, ज़ांतगर तुश्शे संगी दास, ते विश्वासी साथी, ज़ैना तुश्शे ज़ेरे मारे गानेन, तैन केरि भी गिनती पूरी न भोए ।

12 ज़ैखन गबडे शेइयोवं मोहर खोल्ली, त मी हेरू, कि अक बडो भुंजल अव; ते दिहडो कमलेरो ज़ेरो भोव, ते चाँदनी पूरी खूनेरी ज़ेरि भोइ ।

13 ते अम्बरेरे तारे धेरतली पुडां झडे ज़ेन्बरे बडे तूफाने सेइं फेगरे बुटे मरां कच्चे फल झइतन ।

14 ते अम्बर एरू घिशकू, ज़ेन्बरे बरको पलेटोते ते हर अक पहाड़, ते टैपू, अपने-अपने ठारां घिशके ।

15 ते धेरतलरे राज़े, प्रधान, सरदार, धनी ते समर्थि लोक, ते हर अक दास, ते हर अक आज़ाद पहाडां केरे कुदन मां, ते शफइन मां छप्ये ।

16 ते पहाड़न, ते शफइन सेइं ज़ोने लाए, “कि असन पुड झडा; ते असन तैसेरे ऐशी सेइं ज़ै तखते पुड विशोरोए ते गबडरे सरकी करां छुपा ।

17 किजोकि तै खतरनाक दिहाडी एज्जेली ज़ेइस परमेशर ते गबडू हर एक्की सज़ा देले, ते कोई भी तैस झैल्लनेरे काबल नईं ।”

7

144000

1-2 इसरां पत्ती मीं दुनियारे च़ेवरे कूनन पुड च़ेवर स्वर्गदूत खडे लाए । तैन स्वर्गदूतन दुनियाईं मां आफत फैलेइतां नुकसान पुजानेरे लेइ परमेशरे करां अधिकार हासिल कियोरो थियो, चाए धेरती पुड या समुन्दरे पुड । तैनेईं दुनियारे च़ेवरे कूनन करां हवान ठेमतां रखी ताके धेरतली, या समुद्र, या कोन्ची बुटे पुड, हवां न च़ले । ते मीं अक होरो स्वर्गदूत पूर्वरां एइतो लाव । तैस कां अक महोर थी ज़ै हमेशा ज़ीते परमेशरेरे तरफां थी । तैने च़ेवरे स्वर्गदूतन सेइं ज़ोरे सेइं ज़ोवं:

3 “जांतगर अस अपने परमेशरेरे दासां केरे कुपाए पुड मोहर न लाम तांतगर तैना आफतां तैन पुड न एजन, ते धेरतली, समुन्दर ते कने बुटन नुकसान न पुजान ।”

4 ते ज़ैन पुड मोहर कीजेईं, मीं तैन केरि गिनती शुनी, कि इस्राएलेरी खानदानेरे गोदलन मरां अक लख चुरतैली हज़ारन पुड महोर कीजेईं ।

5 यहूदारे गोदलन मरां 12 हज़ारन पुड मोहर लाईं, रुबेनेरे गोत्रे मरां 12 हज़ारन पुड; गादेरे गोत्रे मरां 12 हज़ारन पुड ।

6 अशेरेरे गोदलेरे मरां 12 हज़ारन पुड; नप्तालेरे गोत्रे मरां 12 हज़ारन पुड; मनश्शेरे गोत्रे मरां 12 हज़ारन पुड ।

7 शमीनेरे गोत्रे मरां 12 हज़ारन पुड; लेवेरे गोत्रे मरां 12 हज़ारन पुड; इस्साकारेरे गोत्रे मरां 12 हज़ारन पुड ।

8 जबूलनेरे गोत्रे मरां 12 हज़ारन पुड; यूसुफेरे गोत्रे मरां 12 हज़ारन पुड, बिन्यामीनेरे गोत्रे मरां 12 हज़ारन पुड मोहर लाईं ज़ेईं ।

144000

9 इसेरां पत्ती मीं मैन्हु केरि भीड लाई जैस कोई गेनि न थियो बटतो । तैना हर कुले मरां, हर कौमी मरां, ते हर भाषाई मरां ओरे थिये । तैना तखतेरे ते गबड़ेरे सामने खड़े थिये । तैनेई छित्तां लिगडां लोरो थियां, ते सैभेई अपने हथ्थन मां तैसेरे आदरारे निशानेरे रूपां मां खजूरेरी डैलडी घिन्तां थिये ।

10 ते तैना लोक बड़े ज़ोरे सेई ज़ोती थिये, “मुक्तेरे लेइ इश्शे परमेशेरू ज़ै तखते पुड़ बिशोरोए, ते गबड़ेरू जयजयकार भोए ।”

11 ते सारे स्वर्गदूत जैना तखतेरे च़ेवरे पासन ते बुजुर्गां केरे च़ेवरे पासन थिये ते च़ेवरे पूरेणेई तैनेई मथ्यो टेको, ते परमेशेरे कां मथ्यो टेकतां ज़ोवं,

12 “आमीन, इश्शे परमेशेरी स्तुति, ते महिमा, ते ज्ञान, ते शुक्र ते आदर, ते समर्थ, ते शक्ति हमेशा बनोरी राए । आमीन ।”

13 इन गल्लन पुड़ बुजुर्गन मरां एक्के मीं सेई ज़ोवं; “इना छित्तां लिगडां लेइतां कौन? ते कोट्टां ओरेन?”

14 मीं तैस सेई ज़ोवं; “हे मालिक, तूए ज्ञानतस ।” तैने मीं सेई ज़ोवं; “इना तैना आन, जैना तैस बड़े मुसीबती मरां निसोरेन; तैनेई अपना लिगडां गबड़ेरे खूने सेई धोइतां छित्तां केरन, ज़ेसेरो मतलब तैन केरे पाप दूर किये ।”

15 “एल्हेरेलेइ तैना परमेशेरे तखतेरे सामनेन, ते तैसेरे मन्देरे मां रात दिहाडी तैसेरी सेवा केरतन; ते ज़ै तखते पुड़ बिशोरोए, ते तैन मां रालो ते तैन केरि रक्षा केरेलो ।

16 ते तैना फिरी दलुखोरे ते टलिशोरे न भोले: ते तैना दिहाड़े सेई ते कोन्वी भी गेरमी सेई न फुकोले ।

17 किजोकि गबड़ू ज़ैन तखतेरे मझाटे, तैन केरि रखवाली केरेलू; ते तैन लोकन ज़िन्दगरे पैनी कां नेलू, ते परमेशर तैन केरे एछ्छी केरां सब ऐंखरू पुछ्छेलो ।”

8

~~~~~

1 ज़ैखन गबड़े सतावं मांहर खोल्लो, त स्वर्ग मां अध्ये घंटे तगर खामोशी राई ।

2 मीं तैन सत स्वर्गदूत जैना परमेशेरे सामने खड़े रहतन, लाए, ते तैन सत नइशिंगे दित्ते जे ।

3 फिरी अक होरो स्वर्गदूत सोन्नेरू धूपदान घिन्तां अव, ते बलिदान केरनेरी ठारी कां जेव; ते तैस बड़ो धूप दित्तो, कि सेन्बी पवित्तर लोकां केरि प्रार्थनान सेई साथी तैस सोन्नेरे बलिदान केरनेरी ठारी पुड़ ज़ै तखतेरे सामने चादे ।

4 ते तैस धूपेरो तू परमेशेरे लोकां केरि प्रार्थनान सेई साथी स्वर्गदूतां केरे ज़िरिये परमेशेरे सामने पुजो ।

5 तैखन स्वर्गदूत धूपदान नेइतां तैस मां बलिदान केरनेरी ठारारी अग भरी, ते धेतली पुड़ छड़ी, ते गुड़नेरी आवाज ते बिजली ते भुंजल भोने लाए ।

~~~~~

6 ते तैना सते स्वर्गदूत ज़ैन कां सत नइशिनगे थिये, बजानेरे लेइ तियार भोए ।

7 पेइले स्वर्गदूत नइशिनगो बजाव, ते खूने सेई मिलोरी आण ते अग धेरतली पुड़ शारी; ते धेरतली टलेइन मरां अक हिस्सो फुकोई, ते बुट भी अक तीयाही फुकोए, ते सब नीलो घास भी फुकोव ।

8 दुइयोवं स्वर्गदूते नइशिनगो बजाव, त किछ ज़ेन्बरे बड़े पहाड़ेरू ज़ेरू अग्गी सेई फुकोतू समुन्दरे मां शारू; ते समुन्दर अक तीहाई खून भोव ।

9 ते अक तीहाई जानवर जैना समुन्दरे मां रहते थिये मेरि जे, ते समुन्दरेरां अक तीहाई जिहाजां तुवा भुआं ।

10 टलेइयोवं स्वर्गदूते नइशिनगो बजाव, ते अक बड्डो तारो जै दीयेरो ज़ेरो बलतो थियो, स्वर्गेंरां टलुटो, ते दरियां केरे एक्की तीहाई पुड़, ते पैन्न पुड़ पेव ।

11 ते तैस तारेरू नवं नागदौनाए, ते अक तीहाई पानी नागदौनारू ज़ेरू टलिटू भोवं, ते बडे मैन्हु तैस पैनेरे टलिटू भोने सेइं मेरि जे ।

12 च़ेवरोवं स्वर्गदूते नइशिनगो बजाव, ते दिहाडो अक तीहाई, ते चेंदनरी अक तीहाई ते तारां केरि एक्की तीहाई पुड़ हलचल पेई, इड़ी तगर कि तैन केरो अक तीहाई हिस्सो आंधरो भोव ते दिहैइरी एक्की तीहैई मां लौ न राई, ते तेन्च़रे राती मां भी ।

13 ज़ैखन मीं हेरू, त अम्बरेरे मझामेई अक उकाव उडरते ते ज़ोरे सेइं इन ज़ोते शुनु, “कि तैन टलाई स्वर्गदूतां केरे नइशिनगेरे आवाज़ारे वजाई सेइं ज़ैना बजाने हेजू बाकिन, धेरतली रानेबालन पुड़ अफ़सोस! अफ़सोस! अफ़सोस!”

9

1 ज़ैखन पंचोंव स्वर्गदूते नइशिनगो बजाव, त मीं स्वर्गेंरां धेरतली पुड़ अक तारो झडतो लाव, ते तैस अथाह कुण्डेरी चावी दिती ।

2 तैने अथाह कुण्ड खोल्लु, ते कुण्डे मरां एक्की भेटठारो ज़ेरो तू निस्सो, ते कुण्डेरे तूए सेइं दिहाडो ते अम्बर आंधरू भोइ जेव ।

3 ते तैस तूए मरां धेरतली पुड़ टिट्टां निस्सां, ते तैन धेरतलरे बिच़्चू केरि ज़ेरि ताकत दिती जेई ।

4 ते तैन सेइं ज़ोवं, कि न धेरतलरे घासे, न केन्ची नीलारे, न केन्ची बुटे नुकसान पुज़ान, सिर्फ़ तैन मैन्न ज़ैन केरे कुपाए पुड़ परमेशेरी मोहर नई ।

5 ते तैन मारनेरे लेइ नई, पन पंच महीन्न तगर लोकन दुःख देनेरो अधिकार दितो, ते तैन केरो दुःख एरो थियो, ज़ेन्च़रे बिच़्चू केरे डस मारने सेइं मैन्न भोते ।

6 तैन पंच महीन्न मां मैन्हु मरनू चाएले, पन तैना न मेरि बटेले । तैना मरनेरी इच्छा रखेले पन तैना कोन्ची भी तरीके सेइं मरनेरी बत न मैलेली ।

7 तैना टिट्टां जंग केरनेरे लेइ तियार घोड़ां केरे ज़ेरां लेइहोतां थियां, तैन केरे दोगन पुड़ सोनूरां ताजां केरू ज़ेरू किछ़ लेइहोतू थियूं; तैन केरां तुतूरां मैन्हु केरे तुतूरां केरां ज़ेरां थियां ।

8 ते तैन केरे बाल कुआन्शां केरे ज़ेरे लम्मे थिये, ते तैन केरे दंत शेरां केरे ज़ेरे मज़बूत थिये ।

9 ते तैने लोहेरी ज़ेरि झिलम लोरी थी, ते तैन केरे फंगां केरि आवाज़ एरी थी ज़ेन्च़रे रथां केरि ते लडैई मां दौड़ते बडे घोड़ां केरि ।

10 तैन केरां पूछ़ड़ां बिच़्चू केरां ज़ेरां थियां, ते तैन मां डस थियो, ते तैन पंच महीन्न तगर मैन्न दुःख पुज़ानेरी ताकत थी, तै ताकत तैन केरे पूछ़ड़न मां थी ।

11 अथाह कुण्डेरो दूत तैन पुड़ राज़ो थियो, तैसेरू नवं इब्रानी भाषाई मां अबदोन, ते यूनानी भाषाई मां अपुल्लहोने, ज़ेसेरो मतलब नाश करेनेबालो ।

12 पंच महिन्ना बाद पेइली आफत बीती जेई, ते इट्टां पत्ती दूई बल्के दूई करां जादे आफतां एजने बैलिन ।

13 ज़ैखन शेइयोवं स्वर्गदूते नइशिनगो बजाव ते ज़ै सोन्नेरे बलिदान केरनेरी ठार परमेशेरे सामने, तैसेरे च़ेवरे कूनन मरां मीं एरी आवाज़ शुनी ।

14 ज़ेन्च़रे कोई शेइयोवं स्वर्गदूत सेइं ज़ोने लोरोए ज़ैस कां नइशिनगो थियो, “कि तैन च़ेवरे दूत ज़ैना बडे दरियाए फ़राते कां बन्दोरोए, तैन खोल्ल ।”

15 तैखन तैना च़ेवरे दूत खोल्ले, तैना पेइले तियार भोरे थिये, त इस घेड़ी, ते दिहाडे, ते महीने, ते सालेरे लेइ तैन बलगनेरे लेइ ज़ोरू थियूं, ते हुनी ई वक्त अब, कि तैना दुनियारे लोकन मरां अक तीहाई लोक मारन ।

16 ते तैन केरे फौजरी गिनती बी करोड़ थी ज़ैना घोड़न पुड़ सुवार थिये, मीं तैन केरि गिनती शुनी ।

17 ते मीं इस दर्शन मां घोडे ते तैन केरे एरे सुवार लेइहोए, जैन केरि झिल्लमां अगारे जेरि लाल, ते नीले ते हेडले रंगेरे जेरे थी, ते तैन घोड़ां केरि कुरोडी शेरां केरे कुरोडी केरि जेरि थी, ते तैन केरे ऐशेरां अग ते तू ते गन्धक निसती थी ।


18 इन टलेइ आफतन सेइं जैना इना आन, अग, तू, ते कने गन्धक, जै तैन घोड़ां केरे ऐशी मरां निसती थी; तैन सेइं अक तीहाई लोक मेरि जे ।

19 तैन घोड़ां केरि ताकत तैन केरे ऐशी, ते कने तैन केरे पूछइन मां थी, किजोकि तैन केरां पूछइं सप्पां केरां जेरां थियां, ते तैन केरे पूछइं केरि कुरोडी भी थी, ते तैने सेइं तैना दुःख भी पुज्जाते थिये ।

20 ते होरे मैन्हु जैना तैन आफतन सेइं न थी मरें, ते तैनेई मूर्ती केरि पुज्जा केरनि न शारी, जैना तैनेई सोन्ने, पितल, ते कन्ने घोड़, लेकइरे बनेइं । तैना मूर्ती न लहन, न शुन्नु, न चेलि बटन, ते तैनेई भूतां केरि आराधना केरनि भी न शारी ।

21 ते तैनेई, खून, टूनो, बदमाशी, ते कने ज़ोरी केरने करां मन न फिराव ।

10



1 फिरी मीं अक होरो ताकतबर स्वर्गदूत विदलार पलेटतां स्वर्गेरां एइतो लाव, तैसेरे दोगे पुड़ भुन्जल्लैठ थी, ते तैसेरू आशी दिहाड़ेरू जेरू ते तैसेरे पाव अगारे खम्मबेरे जेरे थिये ।

2 तैने अपनो देइने पाव समुन्दरे पुड़ रखवो, ते खिशडो धेरतली पुड़ रखवो, ते तैसेरे हथ्ये मां अक निकडी किताब खोलोरी थी ।

3 तैनी स्वर्गदूते बडे ज़ोरे सेइं ज़ोवं, तैसेरी आवाज़ शेररे गज़नेरी जेरि थी । ते ज़ैखन तैने ज़ोरे सेइं चिन्ड मारी, त सत आवाज़ेई जुवाब दित्तो, जैन केरि आवाज़ गुइनेरी जेरि थी ।

4 ते ज़ैखन मीं सत्ते गुइनेरी आवाज़ शुनी, त अवं लिखनेबालो थियो, त मीं स्वर्गेरां ई आवाज़ शुनी, “कि जैना गल्लां तीं गुइनेरी जेरि शुनोरिन, तैन छेपोरी रख, ते तैन न लिख ।”

5 ते ज़े स्वर्गदूत मीं समुन्दर ते धेरतली पुड़ खडो लोरो थियो; तैने अपनो देइने हथ स्वर्गेरे पासे खडो कियो ।

6 ते ज़े हमेशा जीतोए ते ज़ैने स्वर्ग, धरती त कने समुन्दर ते ज़ैन किछ तैन मांए बनोरूए, तैनी तैसेरी कसम खेइतां ज़ोवं, “हुनी होरि कोन्वी चीजरो इंतज़ार नई । हुनी सब पूरू कियुं गालू ।”

7 बल्के ज़ैखन सतोवं स्वर्गदूत नइशिनगो बज़ालो, त परमेशेरो ते मकसद पूरो भोलो ज़े तैसेरे नेवेई ज़ोरोए, ज़ैनेई तैसेरी सेवा की, पन तैने होरि लोकन तैसेरो पतो लगने न दित्तो ।


8 मीं फिरी दुबारां स्वर्गेरां तैए आवाज़ शुनी । तैस आवाज़ां मीं सेइं ज़ोवं, तैए फिरी मीं सेइं गल्लां केरने लाव; “कि गा, ज़े स्वर्गदूत समुन्दर ते धेरतली पुड़ खडोए, तैसेरे हथ्ये मरां खुलोरी किताब ने ।”

9 ते मीं स्वर्गदूत कां गेइतां ज़ोवं, “ई निकडी किताब मीं दे ।” तेने मीं सेइं ज़ोवं, “यां इस खा, ते ई तेरे पेटे टलइट्टी त केरेली, पन तेरे ऐशी मैछी करां भी जादे मिट्टी लगगेली ।”

10 ते मीं तै निकडी किताब तैस स्वर्गदूत करां नेइतां खाइ, तै मेरे ऐशी मां मैछेरी जेरि मिट्टी लगगी, पन ज़ैखन मीं तै खाइ, ते तैस सेइं मेरू पेट टलिट्टू भोवं ।

11 तैखन मीं सेइं इन ज़ोवं, “तीं बडे लोकन, कौमन, भाषान, ते कने राजन पुड़, फिरी दुबारां भविष्यवाणी केरनि भोली ।”

11



1 फिरी मीं नापनेरे लेइ अक निराठी दिती, ते तैने मीं सेइं ज़ोवं, “उठ परमेशेरे मन्दरे ते बलिदान केरनेरी ठार नाप, ते ज़ैना लोक तैडी मेरी आराधना केरने लोरेन तैन गन ।

2 पन मन्दरेरे बेइरयो अंगन न नाप, किजोकि एन तैन लोकां केरे लेइ आए ज़ैना मीं पुड़ विश्वास न केरन, ते तैना तैस पवित्र नगर यरूशलमे 42 महीन्न तगर तुबा केरेले ।

3 तैस वक्ते अवं अपने दुइये गवाहन ई अधिकार देइलो, तैना टाट यानी मातमेरां लिंगड़ां लेइतां 1260 दिहाइन तगर मेरे सन्देशरू एलान केरन ।”

4 तैना दूई गवाह, जैन केरे बारे मां बड़े पेइले केन्चे जैतूनेरे दूई बुट ते दूई दीवट* केरि मिसाल दित्तोरी थी जैना परमेशेरे सामने रहतन जै धेरतरे लोकां केरो प्रभुए ।

5 ते अगर कोई तैन नुकसान पुजानो चाए, त तैन केरे ऐशी मरां अग निस्तां तैन केरे दुश्मन भस्म केरतीए, ते अगर कोई तैन नुकसान पुजानो चाए, त जरूर तै इस्से तरीके सेइं मारे गाले ।

6 परमेशेरे तैन अधिकार दित्तोरो, कि तैना सन्देश एलान केरनेरे दौरान अम्बर बंद केरन (यानी झड़ी रोकन) । तैन ई भी अधिकार मैल्लो पानी खूनेरू जेरू लाल बनान, ते इन भी कि जैखन तैना चान धेरतली पुड़ हर किसमेरी आफत एनी बटतन ।

7 ते जैखन तैना दूई गवाह परमेशेरे सन्देशरू एलान केरतां झाड़ेले, त तैए हैवान जै अथाह कुण्डे मरां निसेलो, तैन सेइं लेइतां तैन करां जीतिलो ते तैन मारेलो ।

8 ते तैन केरि लाशां तैस महान नगर यरूशलेमेरे सड़की मां राली जैड़ी तैन केरो प्रभु कूरस पुड़ चाढोरो थियो, जेसरी तुलना सदोम नगर ते कने मिसरे मुल्खे सेइं कियोरीए ।

9 ते सब लोकन, कुलन, भाषान ते कने कौमन मरां लोक तैन गवाहां केरि लाशां सड़े टलाई दिहाइन तगर हेरते राले । ते तैना लोक तैन केरि लाशन कोन्ची भी दबने न देले ।

10 ते धेरतलरे रानेबाले, तैन केरे मारने सेइं खुश ते मघन भोले, ते तैन केरे हेरने बालन बड़े डरेले ।

11 ते सड़े टलाई दिहाइना पत्ती परमेशेरे तरफां जिन्दगरी सांस तैन मां आई, ते तैना खड़े भोए, ते जैनेई तैना दुबारां जीते लाए तैना बड़े डेरि जे ।

12 एसेरां बाद, तैन दूई मैनेई स्वर्गेरां अक ज़ोनेवालो उच्ची आवाजी मां ज़ोते शुनो, “कि इडी बा एज्जा!” जैखन तैन केरे दुश्मन हेरनेरे लोरे थिये तैना तैने केरे सामने बिदलारी पलेटतां स्वर्गे मांजो चले जे ।

13 फिरी तैस्से वक्ते यरूशलेम नगरे मां अक बड़ो भुंजल अव, ते नगरेरे इमारतां केरो दशोवं हिस्सो झड़ो; ते तैस भुंजले सेइं 7000 मरे, ते होरे जैना बच्चोरे थिये तैना बड़े डरे, ते तैनेई स्वर्गेरि परमेशेरी बडीयाई की ।

14 दुइयोवं आफत बीती जेई, हेरा, टलेइयोवं आफत एजने वालीए ।

~~~~~

15 जैखन सतावं स्वर्गदूते नइशिन्याो बजव, त मीं स्वर्गे मां बड़ी ज़ोरे सेइं आवाज शुनी, “हुनी इस दुनियाई मां कोई राज़ केरनेवालो नई सिफ इश्शो प्रभु-परमेशर ते तैसेरो चुनोरो मसीह, ते तै हमेशांरे लेइ राज़ केरेलो ।”

16 ते चोव्ही बुजुर्ग जैना परमेशेरे सामने अपने-अपने तखते पुड़ बिश्शोरे थिये, परमेशेरे कां मथ्यो टेकतां,

17 इन ज़ोने लाए:

“हे सर्वशक्तिमान प्रभु-परमेशर, तू जै आस, ते जै थियो, अस तेरू शुकर केरतम, कि तीं हुन्ना महान शक्ति हिराई, ते तीं धेरती पुड़ राज़ केरनू शूरू कियोरूए ।


18 होरि कौमां केरे लोकेई तीं पुड़ क्रोध कियो, ते तेरो प्रकोप अव, ते तै वक्त ओरोए कि मरां केरो इन्साफ कियो गाए, ते ई वक्त भी आए, कि तेरे दास नेबन ते सारे लोकन जैना तेरे आदर केरतन जैना कमज़ोरन ते जैना ताकतवरन तैन तू इनाम देस,

ते तैस्से वक्ते तैन नाश केरस जैना धेरतरे नाश भोनेरी वज़ा थिये ।”

19 परमेशेरू जैन मन्दर स्वर्गे मांए, तैन खोल्लू, ते तैसेरे मन्दरे मां कारोरो सन्दूख लेइहोव, ते बिजली ते आवाज ते गुड़ने ते भुंजल आए, ते बड़ी-बड़ी आण पेई ।

\* 11:4 11:4 जैतूनेरे दूई बुट ते दूई दीवट जक. 4:1-3, 11-14

## 12



1 जैखन तैन बीती जेव, त फिरी अम्बरे मां अक बड़ो आजीब निशान लेइहोव। मतलब अक कुआन्श जै चाँदनी पुड़ खड़ी आए ते तैसां जैना लिंगड़ां लोरन तैना दिहाड़े जेरां लेइहोतन। ते तैसेरे अपने दोगगे पुड़ ताज लोरू थियूं जैस पुड़ 12 तारे थियो।

2 ते दोर्जाती भोइ, ते चिन्डां मारती थी; किजोकि तैस बच्चो ज्ञानेरी तकलीफ थी।

3 ते अक होरो निशान अम्बरे मां लेइहोव, ते हेरा; अक बड़ो लाल अजगर (यानी शैतान) थियो, तेसेरी सत करोड़ी ते दश शिन्गाँ थियां, ते तैसेरे दोगन पुड़ सत ताजां थियां।

4 ते तैसेरे पूछड़ां अम्बरेरे तारां केरि अक तीहाई ज़मीनी पुड़ आनी, ते तै अजगर तैस कुआन्शरे सामने खड़ो भोव जै दोर्जाती थी, कि जैखन तै बच्चो ज़ाए त तै बच्चे तैस खाए।

5 तैखन तैस कुआन्शां मट्टू ज़ाऊं, तैन अजगरे न खेइ बट्टू किजोकि तैन अकदम परमेशरे ते तैसेरे तखते कां आनु जेव। तैन मट्टू सारी कौमन पुड़ लोहरे डण्डे सेइं राज़ केरलू।

6 ते ई कुआन्श जंगले जो नशशी, जैड़ी परमेशरे तरफां तैसेरेलेइ अक ठार तियार कोयोरी थी, कि तैड़ी 1260 दिहाइन तगर तैसेरी हेरगेश की गाए।

7 फिरी स्वर्गे पुड़ लड़ाई भोइ, मीकाईल ते तैसेरे स्वर्गदूत अजगरे सेइं लड़ने लेइ निस्से, ते अजगर ते तैसेरे दूतन सेइं लड़े।

8 अजगरे लड़ाई हारी, ते फिरी तैना स्वर्गे मां न रेइ बटे।

9 एल्हेरेलेइ तै त तैसेरे दूत धेरती पुड़ शारे, तैए बड़ो अजगर, ई तैए जै बड़े पेडले सपेरे रूपे मां बांदो भोरो थियो, जेसेरू नवं शैतान या दोष लानेबालोए। तैए आए जै दुनियारे लोकन धोखे देने लोरोए।

10 फिरी मीं स्वर्गेरां ई बड़ी आवाज़ एइती शुनी, “कि हुनी परमेशर अपने लोकन बचालो! हुनी तै अपनि शक्ति इस्तेमाल केरेलो ते राजेरू जेरू राज़ केरेलो! हुनी तैसेरो मसीह दुनियाई पुड़ अधिकार रखेलो! किजोकि हुनी शैतान इश्ये परमेशरेरे हज़ूरी मां खड़ो न रेइ बटेले कि इश्ये साथी सेवकन पुड़ रात दिहाड़ी दोष लाए। तै स्वर्गे मरां शारो जोरोए।

11 ते तैनेई गबड़ेरे खूनेरे वजाई सेइं ते अपने गवाहरे वचनेरे वजाई सेइं, तैस पुड़ ज़ीत हासिल की, ते तैनेई अपने प्राण दलारे न समझे, इड़ी तगर की मौतरी भी परवाह न की।

12 एल्हेरेलेइ तुस सब जैना इड़ी स्वर्गे मां रहने बालेख खुश भोथ। पन हे धेरतली ते कने समुन्दरे मां रानेबालव तुसन पुड़ अफ़सोस! किजोकि शैतान बड़े करोधे सेइं तुसन कां एजनेबालोए, किजोकि ते ज्ञानते कि तेसेरो आखरी वक्त एजनेबालो।”

13 ते जैखन अजगरे समझू, कि अव ज़मीनी पुड़ जो शारोरो, त तैस कुआन्शी पत्ती दौड़ो जैसां मट्टू ज़ावरू थियूं।

14 पन परमेशरे तैस कुआन्शी उकाबेरां दूई बड़ड़ां फंगां दित्तां, कि अजगरे करां उडरतां जंगले मां तैस ठैरी पुजे, जैड़ी सड़े दलाई सालन तगर तैसेरी हेरगेश भोरी थी, ताके तैड़ी अजगर न पुजी बटे।

15 फिरी अजगरे तैस कुआन्शी पत्ती अपने ऐशी सेइं दरियारू जेरू पानी शारू, कि तैस इस दरियाए सेइं रूड़ए।

16 तैस कुआन्शी मद्दत केरनेरे लेइ ज़मीना तैन पानी पियूं जैन तैस अजगरेरे ऐशी मरां निसोरू थियूं।

17 ते अजगर कुआन्शी जो सेरकोव। एल्हेरेलेइ तैन कुआन्शरे औलादी सेइं लड़ाई केरनेरू एलान कियूं। तैना लोक जैन परमेशरे हुक्मन मन्तन, ते यीशुएरी दित्तोरी शिक्षाई पुड़ चलतन।

18 तैखन अजगर जेव, ते समुन्दरेरे बन्ने पुड़ खड़ो भोव।



## 13



1 मीं अक हैवान समुन्दरे मरां निसतो लाव, तैसेरां दश शिन्गाँ ते सत करोड़ी थी; तैने शिन्गान पुड़ दश राजमुकट ते तैसेरे दोगन पुड़ परमेशेरी तुहीनरां नंवां लिखोरां थियां ।

2 जै मीं हैवान लाव, तै डलाघेरो ज़ेरो थियो; ते तैसेरे पाव इच्छेरे पावां केरे ज़ेरे थियो; ते तैसेरू आशी शेररे एशेरू ज़ेरू थियूं, ते अजगरे तैस हैवाने अपनि शेक्ति दित्ती ते राज केरनेरे लेइ तैस अधिकार दित्तो ।

3 मीं तैस हैवानेरे करोड़न मरां एक्की पुड़ अक एरो ज़खम लाव, ज़ेन्चरे तै मरने पुड़े; फिरी तैसेरो मारनेबालो ज़खम रोड़ो भोव, ते सारे धेरतलरे लोक हैरान भोए, ते तैस हैवाने पत्ती च़लने लगे ।

4 ते तैन सेम्भी लोकेई तैस अजगरेरी पूजा की, किजोकि तैने हैवाने अपनो अधिकार दित्तोरो थियो । ते इन जोड़तां कि, “इस हैवानेरो ज़ेरो कौने? हैवाने सेइं कौने लेइ बटते?”

5 परमेशेरे तैस हैवाने अज़ाज़त दित्तोरी थी कि अपने अधिकारे पुड़ घमण्ड केरे ते एन्चरे परमेशेरी तुहीन केरे । परमेशेरे तैस 42 महीन्न तगर ई अधिकार रखनेरे लेइ अज़ाज़त दित्ती ।

6 तै हैवान परमेशेरी तुहीन केरने लगो, कि तैसेरे नंवेरे खलाफ, ते ज़ैडी परमेशर रहते ते स्वर्गे मां रानेबाले सेम्भी लोकां केरे खलाफ तुहीन केरने लगो ।

7 परमेशेरे तैस हैवाने अज़ाज़त दित्तोरी थी, कि परमेशेरे लोकन सेइं लडे, ते तैन करां ज़ीते, ते तैस हर कुले, सारे लोकन, भाषान, त कने कौमन पुड़ अधिकार दित्तो जेव ।

8 ते धेरती पुड़ रानेबाले सेम्भी लोकेई तैसेरी पूजा की । सिर्फ तैनेई न की ज़ैन केरां नंवां ज़िन्दगरे किताबी मां दुनिया बनाने करां पेडले लिखोरां थियां । तै किताब गबड़ेरी ज़िन्दगरी किताबे ज़ैन बलिदानेरे लेइ मारू ज़ोवं ।

9 ज़ै समझनू चाते तै ध्याने सेइं शुने ।

10 ज़ैना कैद भोनेन, तैना कैद भोले, ज़ैना तलवारी सेइं मरेलो, ज़रूरीए तैना तलवारी सेइं मरेले, परमेशेरे लोकां केरि सबर ते विश्वास इस्से मांए ।

11 फिरी मीं अक होरो हैवान धेरतली पुड़ा निसतो लाव, तैस गबड़ेरे ज़ेरां दूई शिन्गाँ थियां, पन ज़ैखन तैने ज़ोवं त तैसेरी आवाज़ अजगरेरे ज़ेरी थी ।

12 ई दुइयोवं हैवान पेडले हैवानेरो सारो अधिकार इस्तेमाल केरते । दुइयोवं हैवाने धेरती ते तैस पुड़ रानेबालन करां पेडले हैवानेरी पूजा कराते ज़ेसेरो मारनेबालो ज़खम ठीक भोरो थियो ।

13 दुइयोवं हैवान बड़े-बड़े निशान हिरातो थियो, इडी तगर कि मैन्हु केरे सामने अम्बेरां ज़मीनी पुड़ अग भेजतो थियो ।

14 दुइयोवं हैवाने परमेशेरे अज़ाज़त दित्ती कि तै पेडले हैवानेरे सामने चमत्कार हिराए । एन चमत्कारां केरे ज़िरिये तैनी दुनियारे सारे लोक टपलाए । तैने तैन पेडले हैवानेरी मूरती बनानेरो हुक्म दित्तो, ज़ै तलवारी सेइं मारोरो थियो पन फिरी ज़ीतो भोरोए ।


15 दुइयोवं हैवाने परमेशेरे अज़ाज़त दित्तोरी थी कि तै पेडले हैवानेरी मूरती बनाए ते तै ज़ीतोए, ताके तैस हैवानेरी मूरती गल्लां केरि बटे ते ज़ैना तैस हैवानेरी पूजा न केरने तैना मारे गान ।

16 दुइयोवं हैवाने सारे लोकन सेइं ज़बरदस्ती की, ज़ैना खास आन ते ज़ैना खास नई, अमीर, गरीब, आज़ाद, गुलाम आन, कि तैना पेडले हैवानेरे नंवेरी मोहर देइने हथ्ये या कुपाए पुड़ लान ।

17 ज़ैस पुड़ छाप मतलब तैस हैवानेरू नवं या तैसेरो नंवेरो अंक भोए, त तैसेरे अलावा होरो कोई लेन देन न केरि सके ।

18 इस समझनेरे लेइ अक्ल ज़रूरीए । ज़ैस अक्ल भोए, तै इस हैवानेरो अंक जमा केरे, किजोकि तै मैनेरो अंके, ते तैसेरो अंक 666 आए ।

## 14



1 एसेरे बाद, मीं किछू लाऊं, मीं गबडू सिय्योन पहाड़े पुड़ खडू लाऊं । ते तैस सेइं साथी 144000 लोक थिये, जैन केरे कुपाए पुड़ तैसेरू ते कने तैसेरे बाजेरू नवं लिखेरू थियूं ।

2 ते स्वर्गेरां एरी आवाज शुनोई, जै बड़े पैनेरी ते बड़े गुडनेरी जेरि आवाज थी, ते जै आवाज मीं शुनी; ते एरी थी जेन्नेरे कोई सारंगी बाजाने बालो सारंगी बजाने लोरोए ।

3 144000 लोक तखतेरे सामने, ते प्राणी ते कने बुजुर्गां केरे सामने खडे थिये; तैना अक नव्वू गीत ज़ोने लोरे थिये, तैन गीत सिर्फ तैन लोकेईं शिखेरू थियूं । तैना लोक इना आन जैना सिर्फ इस दुनियाईं मां रानेवाले लोकन मरां परमेशेरे छुटोरे थिये ।

4 इना तैना लोक आन, जैना कुआन्शन सेइं अशुद्ध नईं भोरे, पन कुवारेन, इना तैना आन, जेरां भी गबडू गाते तैना भी तैस पत्ती ज़लतन, इना त परमेशेरे लेइ पेइले फल भोनेरे लेइ मैनन् मरां घिने जोरन ।

5 तैनेईं कधी झूट नईं जोरू, ते तैना बेइलजामन ।

### ~~~~~

6 फिरी मीं अक होरो स्वर्गदूत अम्बरे मझामेईं उडरतो लाव जैस कां धेरतली पुड़ रानेवालां केरि हर अक कौम, कुल, ते कने भाषारे लोकन शुनानेरे लेइ हमेशारी खुशखबरी थी जै कधे न वेदलोए ।

7 तैने बड़े ज़ोरे सेइं ज़ोवं, “परमेशेरे करां डरा; ते तैसेरी बडयाईं केरा; किजोकि तैसेरो इन्साफ केनेरो वक्त पुजोरोए, ते तैसेरी आराधना केरा, जैने स्वर्ग, धरती, समुन्दर, पैनेरे नाग बनोरन ।”

8 फिरी तैसेरां पत्ती अक होरो स्वर्गदूत इन ज़ोतो अव, “कि झडू, तैन बाबेल नगर झडू, तैने सारे कौमन अपनि शराबी पियाईं, जेसेरो मतलब ईं आए कि तैने सैरी लोकन मूरती केरि पूजा केरनि शिखाली ।”

9 फिरी एसेरां पत्ती अक होरो स्वर्गदूत बड़े आवाजी सेइं इन ज़ोतो अव, “कि जै कोई इस हैवाने ते तैसेरी मूरतरी पूजा केरे, ते अपने कुपाए या अपने हथ्ये पुड़ तैसेरी छाप लाए ।

10 परमेशेरे तैन ट्लिठी शराबी पियालो जैस मां पानी न भोए मिलावरू जेसेरो मतलब परमेशेरे तैन सेइं बडो क्रोधे मां आए ते तैन पुड़ दया न केरेलो, तैना लोक अग ते गन्धकेरे दुखे मां छुडे गाले, जैखन परमेशेरे तैन सज़ा देतो भोलो त पवित्त्र स्वर्गदूत गबडू लालू ।

11 ते तैन केरे दुखेरो तू सदा उठतो रालो, ते जैना तैस हैवाने ते तैसेरे मूरतरी पूजा केरेले, ते जैना तैसेरे नव्वेरी छाप नेतन, तैन रात दिहाड़ी चैन न मैलेलो ।”

12 एल्हेरेलेइ परमेशेरे लोकां केरे लेइ ज़रूरी आए कि जैना भी दुःख तैन पुड़ एज्जन तैन सबरी सेइं झैल्लन, परमेशेरे ज़ैन केनेरो हुक्म तैन दे तैनेईं तैन कियेरू लोडे, ते तैनेईं यीशु पुड़ विश्वास केरनो न लोडे शारोरे ।

13 मीं स्वर्गेरां ईं आवाज शुनी, “लिख; जैना मुड़दे प्रभु मां मरतन, तैना धन आन ।” पवित्त्र आत्मा पक्कू केरते, “तै ज़ोते, तैन सच्चे । हाँ किजोकि तैना अपने मेहनती करां आराम हासिल केरेले, ते ज़ैन तैनेईं कियूं तैसेरे बदले तैन इनाम मैलेलू ।”

### ~~~~~

14 फिरी मीं अक छिती बिदलार लाई, ते तैस बिदलारी पुड़ मैनेरू ज़ेरो कोई विशोरो लाव, तैसेरे दोगो पुड़ सोन्नेरू ताज ते हथ्ये मां तिखी इलातीए ।

15 फिरी अक होरो स्वर्गदूत मन्देरे मरां निस्तां, तैने जै बिदलारी पुड़ विशोरो थियो, तैस बड़े ज़ोरे सेइं ज़ोवं, “कि अपनि इलाती चला किजोकि कटनेरो वक्त ओरोए ।”

16 ते जै बिदलारी पुड़ विशोरो थियो, तैने धेरतली पुड़ अपनि इलाती लाई, ते धेरतली फसल केटोईं ।

17 फिरी अक होरो स्वर्गदूत तैस मन्देरे मरां निस्तो, जै स्वर्गे मांए, ते तैस कां भी तिखी इलाती थी ।

18 फिरी एककी होरे स्वर्गदूत जैस अग्गी पुड़ अधिकार थियो, बलिदान केरनेरी ठारी मरां निस्सो, ते जैस कां तिखी इलाती थी, तैस सेइं ज़ोरे सेइं ज़ोवं; “अपने तिखे इलैइती लेइतां धेरतलरी दाछ कटी; किजोकि तैसेरी दाछ पकोरीए।”

19 ते तैने स्वर्गदूत धेरतली पुड़ अपनि इलाती रख्खी, ते धेरतलरे दाछारे फल केटतां, अपने परमेशरे परकोपेरे बड़े रसेरे कुण्ड मां छडी।

20 ते नगरेरे बेइर तैस रसेरे कुण्डे मां दाछ दूलेन्नी, ते रस कुण्ड मरां एतरो खून निस्सो कि घोड़ा केरे लगामी तगर पुजो, ते 100 कोसे तगर रूडो।

## 15

????????????????????

1 फिरी मीं स्वर्ग मां अक बड़डो ते आजीब निशान लाव, मतलब सत स्वर्गदूत जैन कां आखरी सत आफतां थी, किजोकि तैन केरे भोने पुड़ परमेशरेरो क्रोध मुकेलो।

2 तैखन मीं समुन्दरेरू जेरू किछ लाव जैन शीशेरू जेरू चमकतू थियू ते अग भी तैस मां मिलोरी थी। मीं तैना लोक भी लाए जैना हैवाने न थिये हैरेई बटोरो, तैन लोकेई हैवान ते तैसेरे मूरतरी पूजा न थी कियोरी। ते तैन पुड़ तैस हैवानेरे नंवेरे अंकेरी महोर न थी लोरोरी। तैना तैस शीशेरे समुन्दरेरे वन्ने पुड़ ते सारंगी घिन्तां खडे भोए जै परमेशरे तैन दित्तोरी थी।

3 तैना परमेशरेरे दास मूसेरू गीत, ते गबड़ेरू गीत ज़ोते थी,

“हे सर्वशक्तिमान प्रभु-परमेशर,

जैना कम्मां तीं कियां तैना बड़ा महान ते आजीब आन,

तू सेब्भी कौमां केरो राजोस,

तैन सब जैन तीं कियू तैन सही ते धर्मी आए।”

4 “हे प्रभु,

सेब्भी लोकेई तेरी आदर की,

ते तैना सारे तेरे नंवेरी इज्जत केरतन,

किजोकि तूए सिर्फ पवित्तरस।

सैरी कौमां केरे लोक हर राज्जन मरां तीं कां एज्जेले,

तैना तेरी आराधना केरेले किजोकि तेरे धर्मी कम्मां बड़ां मशूर आन।”

5 जैखन तैन लोकेई गीत ज़ोताई खतम कियां, त मीं स्वर्ग मां मन्दर खोलोरू लाव। तैन एरू थियू जेन्नेरे तेम्बु।

6 ते तैना सत स्वर्गदूत जैन कां सत आखरी आफतां थी, तैना तैस मन्दरे मरां निस्से। तैनेई छित्तां चमकतां लिगड़ां लोरां थियां ते तैनेई अपने छैती पुड़ सोन्नेरी पेट्टी बेन्धोरी थी।

7 ते तैन चेवरे प्रैणन मरां एक्के सत्ते स्वर्गदूतन हमेशा ज़ीते रानेबाले परमेशरेरे प्रकोपे सेइं भरोरे सत सोन्नेरे कटोरे दित्ते।

8 ते परमेशररी महिमा, ते तैसेरे शेक्तेरे वजाई सेइं मन्दर तूए सेइं भेरोई जेव, ते ज़ां तगर तैन सत्ते स्वर्गदूतेई सत्ते आफतां खतम की, तांतगर कोई मन्दरे मां न गेइ बटो।

## 16

????????????????????

1 तैटो पत्ती मीं मन्दरे मां कोई ज़ोरे सेइं तैन सत स्वर्गदूतन सेइं ज़ोतो शुनो कि, “गाथ, परमेशरेरे सज़ारे सते कटोरे दुनियारे लोकन पुड़ उलटाथ।”

2 ते पेइले गेइतां अपनो कटोरे धेरतली पुड़ उलटव। ते तैन मैन्हु केरे जैन पुड़ हैवानेरी छाप थी, ते जैना लोकेई तैसेरी मूरतरी पूजा केरते थी, एक्की किसमेरे बुरे ते दुःख देनेबालो फोडे निस्से।

3 ते दुइयोवें अपनो कटोरो समुन्द्रे पुड उलटव, ते तै मुडदां केरे खूनेरो ज़ेरो बनो, ते समुन्दरे सारे जानदार मरे।

4 ते टलेइयोवें स्वर्गदूते अपनो कटोरो दरियान ते पैनेरे नागन पुड उलटव, ते सारू पानी खून बन्नु।

5 ते ज़ैस स्वर्गदूते पैनी पुड अधिकारे मीं तै परमेशरे सेइं इन ज़ोते शुनो कि, “हे पवित्र परमेशर, तू ज़ै आस, ते हमेशा करा थियो, तीं कां एन्चरे इन्साफ केरनेरू हक्के।

6 किजोकि तैनेई तेरे लोक ते तेरे नबी मारे ते तैन केरो खून बगोरो थियो, एल्हेरेलेइ तीं हुना तैन खून पीने जो दित्तो।

इन इनामेरे रूपे मां तैन केरे लेइ ठीक आए।”

7 फिरी मीं बलिदान केरनेरी ठारी मरां ई आवाज़ शुनी कि,

“हाँ सर्वशक्तिमान परभु-परमेशर, तेरो इन्साफ सही ते कने सच्चो आए।”

8 ते ज़ेवरोवें स्वर्गदूते अपनो कटोरो दिहाड़े पुड उलटव, ते दिहाड़े जादे गर्म भोनेरी अज़ाज़त दित्ती कि तैस सेइं लोक फुकोन।

9 ते लोक तैस बड़े सेके सेइं फुकोए, ते तैना लोक परमेशेरी तुहीन केरने लाए, किजोकि तैए आए ज़ैस कां सैरी आफतन पुड अधिकारे। फिरी भी तैन लोकेई अपने पापन करां मन न फिराव, ते फिरी भी तैनेई परमेशेरे महिमारे इकरार न कियो।

10 ते पंचोवें स्वर्गदूते अपनो कटोरो तैस हैवानेरे तखते पुड उलटव ते तैसेरे सारे राज़े मां आंधरू भोवें। ते लोक दुखे सेइं मरे ते अपनि-अपनि जिभ च़ापने लाए।

11 ते अपने दुखे ते फोड़ां केरे वजाई सेइं स्वर्गेरे परमेशेरी तुहीन की; ते अपने-अपने कम्मन करां मन न फिरव।

12 श्रेइयोवें स्वर्गदूते अपनो कटोरो बड़े दरिया फराते पुड उलटव ते तैसेरू पानी शुक्की जेव एसेरो नितीजो ई भोव कि पूबेरे राज़े अपनि फौज घिन्तां पार जे।

13 एसेरां पत्ती मीं टलाई भूतां मैन्डू केरे रूपे मां लाए। अक अजगरेरे ऐशी मरां निस्सू, ते अक पेइले हैवानेरे ऐशी मरां निस्सू, ते अक दुइयोवें हैवानेरे ऐशी मरां निस्सू, ज़ै जो झूठो सन्देश ज़ोते।

14 इन भूतन कां चमत्कार केरनेरी काबलीत थी ते तैना दुनियारे सारे मुलखां केरे राज़ केरनेवालन अकोट्टे केरने च़ले ताके तैना परमेशरे सेइं लडन, ई तै दिहाड़ी आए ज़ेइस परमेशर भूतन नाश केरलो ते अपने लोकन मुक्ति देलो।

15-16 तैन भूतेई हकोमत केरनेवाले ते तैन केरि फौज एक्की ठैरी अकोट्टी की ज़ैस जो इब्रानी भाषाई मां हर-मगिदोन ज़ोतन। एल्हेरेलेइ यीशुए ज़ोरूए, “इस शुना। मेरू एजनू अचानक च़ोरेरू ज़ेरूए। धने तै मैन्डू ज़ैखन अवं एज्जी त तै बीझो रहते, ते अपने लिगइन तियार रखते। फिरी ते नगगो न भोलो, ते फिरी तैस लोकन मां गाने सेइं शर्म न भोली।”

17 ते सतोवें स्वर्गदूते अपनो कटोरो हवाई पुड उलटव, ते मीं स्वर्गे मां मन्दरे मरां परमेशरे तखते पुडां ई बड़ी आवाज़ शुनी कि कोई ज़ोने लोरोए, “सब किछ् पूरू भोवें।”

18 फिरी विजली, ते आवाज़, ते गुडने लाव, ते अक एत्रो बड्डो भुंज़ल अव, कि ज़ेइसेरे मैन्डू इस धेरतली पुड पैदा भोरोरेन, तेइसेरो अज़ तगर एरो भुंज़ल कधी नई ओरो।

19 ते तैस महान बाबेल नगरेरे टलाई टुकड़े भोए, ते दुनियारे कौमां-कौमां केरे सारे नगर बर्बाद भोए। ताके परमेशर ते वादो पूरो केरे ज़ै तैने बाबेल नगरेरे लोकन सज़ा देनेरे लेइ कियोरो थियो। ई सज़ा परमेशर पक्की देलो। परमेशर तैन टलिठी शराबी पियालो ज़ैस मां पानी न भोए मिलावरू ज़ेसेरो मतलब परमेशरे तैन सेइं बड्डो क्रोधे मां आए ते तैन पुड दया न केरलो।

20 तैस वक्ते हर अक टेपू समुन्दरे मां डुबो; ते कोई भी पहाड़ न राऊं।

21 ते अम्बेरां मैन्न पुड मन-मन आण पेई, ते एल्हेरेलेइ कि ई आफत बड़ी भारी थी, लोकेई आनहरी आफतरे वजाई सेइं परमेशेरी तुहीन की।

## 17

?????? ??

1 जैन सत स्वर्गदूतन का तैना सत कटोरे धिये, तैन मरां एइतां एक्के मीं सेइं ज़ोवं, “इरां एई, अवं तीं तैस बड़े वेश्यारी सज़ा हिराताई, ज़ै बड़े पैन्न पुड़ बिशोरीए।

2 ज़ैस सेइं धेरतलरे राज़ेई बदमाशी की, ते धेरतली पुड़ रानेवाले तैसेरे बदमैशरे शराबी सेइं मसत भोरे धिये।”

3 तैखन आत्मा अवं अपने कैबू मां कियो ते स्वर्गदूते अवं सुनसान ठैरी मांजो नेव। तैड़ी मीं अक कुआन्श हैवाने पुड़ सुवार लाई, ज़ेसेरी सत क्रोड़ी ते दश शिंगाँ धियां, तैसेरे जान परमेशेरी तुहीन करनेरे नंब्वन सेइं ढकोरी थी।

4 तैस कुआन्शां बैंगनी ते लाल लिगड़ां लोरो धियां, ते सोन्नेरे ते कीमती मेनी ते मोतन सेइं सज़ोरी थी, ते तैसेरे हथ्थे मां अक सोन्नेरो कटोरो शराबी सेइं भेरतां धियो, ज़ै भिट्टे कम्मन ते बदमैशरे कम्मन हिराते।

5 ते तैसेरे कुपाए पुड़ इन नवं लिखोरू थियूं, “भेद-बड़ो बाबेल धेरतलरी वेश्यां ते भिट्टी चीज़ां केरि अम्मा।”

6 ते मीं तै कुआन्श परमेशेरे लोकां केरो खून ते यीशुएरे गुवाहां केरो खून पीने सेइं मसत भोती लाई, ते अवं तैन लेइतां हैरान भोव।

7 तैने स्वर्गदूते मीं सेइं ज़ोवं; “तू किजो हैरान भोव? अवं तीं सेइं इस कुआन्शरो, ते तैस हैवानेरो भेद ज़ोताई, ज़ैस पुड़ तै सुवारे, ते ज़ेसेरी सत क्रोड़ी ते दश शिनगन।

8 ज़ै हैवान तीं लाव, ई पेइलो धियो, पन हुनी नई रानो, ते अथाह कुण्डरां निसेलो ते परमेशर तैस पूरे तरीके सेइं नाश केरेलो, ते ज़ैना लोक इस दुनियाई मां जीने लोरेन ज़ैन केरां नंब्वां परमेशेरे दुनिया बनाने करां पेइले ज़िन्दगरे किताबी मां नई लिखोरां, तैना इस हैवान हेरतां हैरान भोले, ई हैवान पेइलो ज़ींतो धियो ते हुनी ज़ींतो नई पन फिरी एज्जेलो।

9 इन समझनेरे लेइ ज्ञानी मन ज़रूरीए, तैना सत पहाड़न, ज़ैन पुड़ तै कुआन्श राज़ केरतीए।

10 ते तैना सत राज़े भी आन, पंज़ त मेरि ज़ोरेन, ते अक हेजू ए; ते अक आखरी हेजू नई ओरो, पन ज़ैखन तै एज्जेलो त थोड़े च़िरेरे लेइ राज़ केरेलो।

11 ते ज़ै हैवान पेइलो धियो, ते हुना नई, तै एप्पू अठोवं राज़ोए; ते तैन सत्तन मरां पैदा भोव, ते आखरी मां तैस राज़े हमेशारी सज़ा मैलेली।

12 ते ज़ैना दश शिन्नां तीं पेइलां लां, तैना दश राज़ेन, ज़ैनेई हेजू तगर राज़ शुरू नई कियोरू। तैन दश राज़ेन हैवाने सेइं साथी राज़ केरनेरो अधिकार दित्तो जेव, पन तैन राज़ केरनेरे लेइ थोड़ी वक्त दित्तो।

13 इना सब अक मन भोले, ते तैना अपनि-अपनि शक्ति ते अधिकार तैस हैवान देले।

14 इना गबड़े सेइं लड़ेले, ते गबड़ू तैन पुड़ जीत हासिल केरेलू; किजोकि तै राज़ां केरो राज़ो ते पूरभुं केरो पूरभु आए। तैस पत्ती च़लने बाले तैना आन ज़ैना परमेशेरे कुजोरेन ते चुनोरेन, ते ज़ैना तैस सेइं साथी ईमानदार आन।”

15 फिरी तैने स्वर्गदूते मीं सेइं ज़ोवं, “कि ज़ैन पानी तीं पेइलू लोरो थियूं, ज़ैस पुड़ तै वेश्या बिशोरी थी, ए दुनियारे सारे कौमन हिराती, ज़ैना बड़े मुलखन मरां ते भाषान मरां आन।

16 तै वक्त एज्जेलो ज़ेइस हैवान दश राज़ेन सेइं ज़ैना तैस सेइं साथी आन, तैस वेश्याई सेइं बैर रखेले, तैना तैस पुड़ हमलो केरेले ते तैस नगगी केरेले तैसेरू किछ्, मास खाले, ते बाकी फुकेले।

17 किजोकि परमेशर तैन केरे मन्न मां इन छ़ड़ेलो, कि तैना तैसेरी मर्ज़ी पूरी केरेले; ते ज़ांतगर परमेशेरे वचन पूरू न भोए, तांतगर अक मन भोइतां अपनू राज़ हैवाने देन।

18 ते तै कुआन्श, ज़ै तीं लोरीए तैन बड़ू नगरे, ज़ैन धेरतलरे राज़ेन पुड़ राज़ केरते।”

## 18

XXXXXXXXXXXXXXXXXXXX

1 इट्टा पत्ती मीं अक स्वर्गदत्त स्वर्ग मरां एइतो लाव । तैस कां बडो अधिकार थियो, ते एल्हेरेलेइ तैसेरे बडे चमकने बाले महिमा सेइं सारी धरतली लौ बनी ।

2 तैने ज़ोरे सेइं ज़ोवं,

“कि डुल्ली बाबेल नगरी डुल्ली, ते भूतां केरे रानेरी ठार, ते हर एक्की भूतेरो अड्डो, ते हर एक्की दुष्ट ते भिट्टे च़ड्डोलोवेरो अड्डो वीती जेव ।

3 किजोकि तैसेरे बदमेशेरे शरावी सेइं सब कौमां मसत भोइ, ते धेरतलरे राज़ेई तैस सेइं बदमाशी की, ते धेरतलरे बुपारी तैसेरे एशेरे वजाई सेइं अमीर भोइ जे ।”

4 फिरी मीं स्वर्गेरां अक हारि आवाज़ शुनी,

“हे मेरे लोकव तुस तैस मरां निस्सा ताके तुस तैसेरे पापन मां शामिल न भोथ, ते तैसेरी आफतन मरां कोई भी तुसन पुड न एज्जे ।

5 किजोकि तैसारे पाप बडे आन ज़ेन्चरे कि अगर ढेर लाव गाए त अम्बरे तगर पुज़ोरेन, ते परमेशेरे तैसेरी बुराई नई बिसरोरी ज़ै तैसां कियोरी आए ।

6 ज़ेन्चरे तैसां लोकन सेइं कियू तेन्चरे तैस सेइं भी केरा ।

तैना दुःख ज़ैना तैसां लोकन दिते तैस दुगने देथ, तैसां लोक अपने बुरां कम्मां केरो स्वाद च़खनेरे लेइ प्रभावित किये, ते परमेशेरी दुगनी सरक मैसूस केरनेरे लेइ भी बनाई जेई ।

7 ज़ेत्ती तैसां अपनि बडयाई की, ते एश किये, तेतरी तैस तकलीफ ते दुःख देथ, किजोकि ते अपने मने मां ज़ोतीए, अवं रानई, विधवा नई, अवं विधवार दुखे मां कधे न गेइली ।

8 एल्हेरेलेइ तैसेरे धमण्डेरे वजाई सेइं तैस पुड अचानक आफतां एज्जेली ।

अचानक तैस पुड बिमारी, दुःख ते कने काल साथी एज्जेलो । ते तै अग्गी मां भस्म की गाली, किजोकि प्रभु-परमेशर शक्तिमाने ते तै तैस सज़ा देलो ।”

9 ते दुनियारे राज़े ज़ैनेई तैस सेइं बदमाशी ते एश कियोरे थिये, ज़ैखन तैना तैसेरे फुकोनेरो तू लाएले त तैसेरेलेइ ढा छुडले, ते छ्छाती कुटेले ।

10 ते तैना डरले कि तैना भी तैसेरे सज़ाई मां टलेइयोनेन, ते दूर खडे भोइतां ज़ोले,

“हे महान नगरी, बाबेल! हे मज़बूत नगरी, हाय! हाय!

एक्की सैइती मां तीं सज़ा मैल्ली ।”

11 “ते धेरतलरे बुपारी तैसेरेलेइ लेरां देले ते मिनत केरेले किजोकि हुनी कोई तैन सेइं लेन देन न केरेलो ।

12 तैन केरू सामान बडे किसमां केरू थियू । सोन्नु चाँदी, जुवाहर, मोती । ते मलमल, बैजनी, रेशमी, ते लाल लिगडां थियां, ते कने किसमां-किसमां केरि खुशबूदार लकड़ी, ते हथीदंतेरी हर किसमेरी चीज़ां, ते कीमती लकड़ी, पितल, लूहाँ, संगमरमरेरे किसमां-किसमां केरि चीज़ां,

13 ते दालचीनी, मसाले, धूप, गन्धरस, लोबान, मदिरा, तेल, मैदो, गेहुं, बेछ्छी-दांत, भैड्डां-छेल्ली, घोडे, रथ, गुलाम, ते कने मैन्हु केरे प्राण ।

14 ते बुपारी तैस सेइं ज़ोले, ज़ैना चीज़ां तीं चेई तैना हुनी न रैली, ज़ैना खुशबूदार चीज़ां तीं पसंद की, तैना सैरी चीज़ां ज़ैना तीं अपनो जिसम खूबसूत बनानेरे लेइ इस्तेमाल की, तैना सैरी तीं गवेई ते हुनी तैना न मैल्लन ।

15 इन चीज़न सेइं बुपारी ज़ैना तैसेरे वजाई सेइं अमीर भोरे थी, तैसेरे दुखेरे डरे सेइं दूर खडे भोले, ते लेरां देइतां ते तडफते ज़ोले,

16 “अफ़सोस! अफ़सोस! ई बड़ी नगरी ज़ै मलमल, बैगनी, लाल लिगडां लेइतां थी,

ते सोन्नु, ते जुवाहर ते मोतन सेइं सजोरी थी,

17 एककी सैइती मां तैसेरू एरू धन बरबाद भोवं, ते सब मांझी, ते मुसाफर, ते मल्लाह, ते जेत्त्रे समुन्द्रे मरां कमाई कमातन तैना सारे दूर खड़े भोए ।”

18 जैखन तैना तैस नेगरारे फुकोनेरो तू लाएले त ज़ोरे सेइं ज़ोले, इस महान नेगरारी ज़ेरि कोई नगरी नई ।

19 ते अपने-अपने दोग्गे पुड़ धूड़ मलेले, ते लेरां देते ते कर लाते चिन्डां मैरतां ज़ोले,  
“अफ़सोस! अफ़सोस! ई बड़ी नगरी ज़ेसेरी दौलती सेइं समुन्द्रेरां सब ज़िहाज़न वाले धनी भोरे थी,

एककी सैइती मां उज़ड़े ।

20 तुस ज़ैना स्वर्गें मां रातथ, ते परमेशरेरे लोकव,

ते प्रेरितव, ते कने नेबव, ज़ैन तैस सेइं भोवं तैसेरे वजाई सेइं खुश भोथ,

किजोकि परमेशरे तैस नेगरारो इन्साफ कियोरो किजोकि तैसां तुसन सेइं बुरू कियोरू थियूं ।”

21 फिरी एककी ताकतबर स्वर्गदूते बड़े चेकारे पाटेरो ज़ेरो अक घोड़ छूवां, ते इन जोइतां समुन्द्रे मां शारो, कि बड़ी नगरी बाबेल एन्चरे बछ्छोड़ी गाली, ते फिरी कधे तैसेरो पतो न मैलेलो ।

22 ते सारंगी बज़ानेबाले, ते गीतां ज़ोनेबाले, ते बेइशोई बज़ानेबाले, ते नइशिनगो बज़ानेबालां केरि आवाज़ फिरी तीं मां कधी न शुनोली, ते फिरी केन्वी पेशेरो करीगिर तीं मां न मैलेलो; ते चक्की च़लनेरी आवाज़ तीं कधे न शुनोली ।

23 ते लोक दीयेरी लौ फिरी तीं मां न बालेले, ते लाड़ेरी ते लैड़ारी आवाज़ कधे तीं मां न शुनोली; किजोकि तेरे बुपारी धेरतली पुड़ प्रधान थिये, ते तेरे दूने सेइं सब कौमां टेपलोवरी थी ।

24 परमेशर बाबेले सज़ा देलो किजोकि सारे नेबी ते परमेशरेरे लोकां, ते धेरतली पुड़ सब मारोरां करो खून तैस्से मांए ।

## 19

1 ताकतबर स्वर्गदूतेरे ज़ोइतां झाड़नेरां बाद, मीं स्वर्गें मां बड़े लोकां केरि भीड़ उच्चे आवाज़ी मां इन ज़ोते शुनी,

“हल्लिलूय्याह\*! मुक्ति, महिमा, शक्ति इश्शे परमेशरेरीए ।

2 तैसेरी बड्याई भोए किजोकि तैसेरे सारे फैसले सही ते ठीक आन । तैने मशूर वेश्यारो इन्साफ कियो तैसां दुनियारे लोक पाप केरनेरे लेइ प्रभावित किये । परमेशर तैस बदलो देलो किजोकि तैसारे ज़िरिये परमेशरेरे दास मारोरेन ।”

3 फिरी दुइयां वार तैनेई ज़ोवं,

“हल्लिलूय्याह! ते तैसेरे फुकोनेरो तू सदा च़लतो रालो ।”

4 ते चोब्डी बुजुर्गेई ते च़ेवरे प्रेणेई परमेशरे कां मथ्यो टेको; ज़ै तखते पुड़ विशोरो थियो, ते ज़ोवं,  
“आमीन! हल्लिलूय्याह!”

### \*\*\*\*\*

5 ते तैखन मीं ज़ोते शुनो, ते परमेशरेरे तखते मरां अक आवाज़ आई, तैने ज़ोवं,

“तुस इश्शे परमेशरेरे दास आथ ज़ैना तैसेरी आदर केरतथ,

कुन निकड़े, कुन बड़डे, तुस सब तैसेरी तारीफ़ केरा ।”

6 फिरी मीं बड़ी भीड़ारी, ते बड़े पैनेरी आवाज़ शुनी, ते गुडनेरी ज़ेरि आवाज़ शुनी,

“हल्लिलूय्याह! कि प्रभु इश्शो परमेशर, सर्वशक्तिमान राज़ केरते ।

7 एज्जा अस खुश ते मगन भोम, ते तैसेरी बड्याई केरम;

किजोकि गवड़ेरो डला पुजोरोए, ते तैसेरे लैड़ां अपनो आप तियार केरोए ।

8 ते तैस साफ ते चमकदार महीन मतलब मलमल लानेरो अधिकार दित्तो,”

\* 19:1 19:1 हल्लिलूय्याह: परमेशरेरी बड्याई भोए

किजोकि तैस महीन मलमलेरो मतलब परमेशेरे लोकां केरां धमेंरां कम्मन ।

9 ते स्वर्गदूते मीं सेइं ज़ोवं, “इन लिख, कि धन आन तैना, ज़ैना गबड़ेरे इलाएरे धामी मां कुजोरेन ।” फिरी तैने मीं सेइं ज़ोवं, “इना गल्लां ज़ैना परमेशेरे ज़ोईं सच्च आन ।”

10 ज़ैखन मीं शुनु, अवं ज़ै मीं सेइं गल्लां लोरो थियो केरने तैसेरी आराधना केरनेरे लेइ तैस कां झुको तैने मीं सेइं ज़ोवं, “मेरी आराधना न केर, तै परमेशेरे ज़ेसेरी आराधना कियोरी लोडे । अवं भी परमेशेरो दास आईं, ज़ेन्चरे तू त तेरे विश्वासी साथी आन ज़ैना यीशुएरो अपने पूरभुएरे रूपे मां इकरार केरतन ।” ई सच्चआईं यीशुए बांदी कियोरी ज़ै लोकन शक्ति देती कि परमेशेरे वचनेरू एलान केरन ।

~~~~~

11 फिरी मीं स्वर्गं खुल्लू लाव; तैड़ी मेरे सामने छितो घोडो थियो; ते तैस पुइ अक सुवार थियो, ज़ै वफादार, ते झूठ न ज़ोए; ते ज़ैन परमेशेरी नज़री मां सही आए तैसेरे मुताबिक इन्साफ ते परमेशेरे दुश्मन सेइं लड़ाईं केरते ।

12 तैसेरे एछुछी अगारे लपारी ज़ेरि थी, ते तैने बड़ां ताजां लोरो थियां; ते तैसेरू नवं तैस पुइ लिखोरूए, तैसेरो मतलब सिर्फ तैए ज़ानतो थियो ।

13 तैनी खूने मां डुबोरू लिगड़ लोरो थियूं, तैसेरू नवं परमेशेरेरू वचने ।

14 ते स्वर्गोरी फौज छिते घोइन पुइ सुवारे; ते तैना छिते ते साफ मलमल लेइतां तैस पत्ती पत्तीन ।

15 ते कौमी-कौमी मारनेरे लेइ तैसेरे ऐशी मरां अक तिखी तलवार निसतीए, ते तै लोंहेरे सोटे सेइं तैन पुइ राज़ केरेलो, ते तै सर्वशक्तिमान परमेशेरेरे बडे प्रकोपेरी खालिस शराबी सेइं दाछ् दलेन्चेलो ।

16 ते तैसेरां लिगड़न ते जंघी पुइ इन नवं लिखोरूए, “राजां केरो राज़ो ते पूरभूं केरो पूरभु ।”

17 फिरी मीं अक स्वर्गदूत दिहाडे पुइ खडो लाव, ते तैने बेड़ि आवाज़ी सेइं अम्बरे मां उडने बाले ज़डोलन सेइं ज़ोवं, “एज्जा परमेशेरेरे बडे धामी मां शामिल भोनेरे लेइ अकोट्टे भोथ ।

18 ज़ैस सेइं तुस राज़ां, प्रधानां, ताकतबर लोकां, घोडां ते कने तैन केरे सवारां, आज़ादां, गुलामां, निकडे, बडे, सेब्भी लोकां केरू मास खाथ ।”

19 फिरी मीं हैवान लाव ज़ै समुन्दरे मरां ओरो थियो, ते धेरतलरे राज़े ते कने तैन केरि फौज तैस घोड़ेरे सुवार ते तैसेरी फौजी सेइं लड़नेरे लेइ अकोट्टी लाई ।

20 ते तै पेइलो हैवान ते तैस सेइं साथी तै झूठो नबी टलाव, ज़ैने तैसेरे सामने एरे निशान हिरावरो थियो, ज़ेसेरे ज़िरिये तैने तैना सारे लोक टपलाए, ज़ैनेई तैस हैवानेरी छाप नेवरी थी, ते ज़ैना तैसेरी मूतरी पूजा केरते थिये, इन दुइये जीति तैस अगारे झीली मां छडे जे, ज़ै गन्धके सेइं बलतीए ।

21 ते बाकी लोक तैस घोड़ेरे सवारेरी तलवारी सेइं ज़ै तैसेरे ऐशी मरां निस्सती थी मारे जे; ते चुडोलू तैसेरे मासे सेइं रेज्जी जेआं ।

20

1000 ~~~~~

1 फिरी मीं अक स्वर्गदूत स्वर्गोरां एइतो लाव; ज़ेसेरे हथ्ये मां अथाह कुण्डेरी चाबी ते कने अक बड्डी शंगल थी ।

2 तैने तै अजगर टलाव ज़ै बडे पेइले सप्पेरे रूपे मां लेइहोरो थियो ज़ेसेरू नवं शैतान भी आए । तैने तै टलेइतां हज़ार सालेरे लेइ बन्धो ।

3 ते तै अथाह कुण्डे मां शैरतां बन्द कियो ते तैस पुइ मोहर लई; कि तै हज़ार साल पूरे भोने तगर कौमां-कौमां केरे लोकन फिरी न भटकाए; इसेरां पत्ती ज़रूरे, कि थोडे चिरेरे लेइ खोल्लो गाए ।

4 फिरी मीं किछ् तखत लाए ते ज़ैना लोक तैन पुइ विश्शोर थिये ते तैन राज़ केरनेरो अधिकार दित्तो; ते तैन केरि आत्मा भी लेई, ज़ैन केरि क्रोड़ी एल्हेरेलेइ केटोरी थी कि तैना यीशु मसीह

अपनो प्रभु मन्तन ते परमेशेरे वचने पुङ्ग विश्वास केरतन, ते जैनेई तैस हैवानेरी, ते तैसेरे मूरतरी पूजा न थी कियोरी, ते तैसेरी महोर अपने कुपाए ते हथ्यन पुङ्ग न थी। तैना ज़ीते भोइतां मसीह सेइं साथी हज़ार सालन तगर राज़ केरेले।

5-6 इना लोक पेइले आन ज़ैना ज़ीते किये गाले ते तैना धन ते पवित्र आन। दुइयोवं मौतरी तैन पुङ्ग कोई शक्ति न भोली। तैना परमेशेरे लेइ याजक भोले ते मसीह तैन सेइं साथी हज़ार साल राज़ केरेलो, ज़ांतगर तैना हज़ार साल पूरे न भोन तांतगर होरे मरे लोक ज़ीते न किये गाले।

~~~~~

7 ज़ैखन हज़ार साल खतम भोनेबाले भोले त स्वर्गदूत शैताने तैस ठैरारा हथरां छुडेलो ज़ैड़ी तै बन्धोरो थियो।

8 ते तैन कौमन ज़ैना सैरी दुनियाई मां आन धोखो देनेरे लेइ निस्सेलो। तैन कौमन जो गोग ते मागोग ज़ोतन। शैतान तैन तैस ठैरी आनेलो ज़ैड़ी तै तैन सेइं लड़ेलो। तैन केरि गिनती समुन्दरे रेती बराबर भोली।

9 शैतानेरी फौज सारे दुनियाई मां गाली, तैना तैस नगरे घेरेले ज़ैस सेइं परमेशर प्यार केरते ते ज़ैड़ी तैसेरे लोक रहतन, परमेशेरे तरफां स्वर्गोरां अग तैन सेबन भस्म केरेली।

10 ते तैन केरो गुमरा केरनेबालो शैतान अग ते गन्धकेरे समुन्दरे मां शारो गालो, ज़ैस मां तै हैवान ते कने झूठो नवी भी भोलो, तैना रात दिहाड़ी हमेशा दुखे मां राले।

~~~~~

11 फिरी मीं अक बड़डो छितो तखत ते ज़ै तैस पुङ्ग विशोरो थियो लाव, ज़ेसेरे सामनेरां धरती ते अम्बर नश्यू, ते तैन केरे लेइ ठार न मैल्ली।

12 फिरी मीं निकडे बडे ज़ैना मरे थियो तखतेरे सामने खड़े लाए, ते किताबां खोल्ली जेई; ते फिरी अक होरि किताब खोल्ली; मतलब ज़िन्दगरी किताब खोल्ली; ते ज़ेन्चरे तैन किताबन मां लिखोरू थियू, तैन केरे कम्मां केरे मुताबिक मुडदां केरो इन्साफ कियो।

13 ते समुन्दरे तैना मरे मेन्हु दिचे ज़ैना तैस मां थी, ते मौतां ते पाताले ज़ैना तैस मां मरे थियो दिचे; ते तैन मरां हर एक्केरो तैन केरे कम्मां केरे मुताबिक इन्साफ कियो।

14 ते मौत ते पाताल भी अगारे समुन्दरे मां शारू, ई अगगारो समुन्दरे त दुइयोवं मौते।

15 ते ज़ेसेरू भी नवं ज़िन्दगरे किताबी मां लिखोरू न मैल्लू, तै अगारे समुन्दरे मां शारो जेव।

21

~~~~~

1 फिरी मीं नव्वू अम्बर ते नव्वी धरतली लाई, किजोकि पेइलू अम्बर, ते पेइली धरतली न थी रावरी, ते समुन्दर भी न राव।

2 फिरी मीं पवित्र नगर नव्वू यरूशलेम स्वर्गोरां परमेशेरे करां एंडतू लाव, ते तैन तैस लैइरू ज़ेरू थियू, ज़ै अपने लाड़ेरे लेइ तियार भोरी भोए।

3 फिरी मीं परमेशेरे तखते मरां कोई उच्ची आवाज़ी सेइं इन ज़ोते शुनो, “अज़ेरां बाद परमेशर मैनन् सेइं साथी रालो, ते तैसेरू घर तैन लोकन मां भोलू, ते तैना तैसेरे लोक भोले, ते परमेशर एप्पू तैन, अपने लोकां केरे रूपे मां कबूल केरेलो ते तैना लोक तैस अपनो परमेशर कबूल केरेले।

4 ते तै तैन लोकां केरे एछ्छी करां सब ऐखरू पुछ्छेलो; ते तैटठां पत्ती मौत न राली, ते न दुःख, न मातम, न मुसीबत राली; पेइली गल्लां बीती जेई।”

5 ज़ै तखते पुङ्ग विशोरो थियो तैने ज़ोवं, “कि तक, अवं सब किछ् नव्वू केरताई।” फिरी तैने ज़ोवं, “कि लिख, किजोकि इना वचन विश्वासेरे काबल ते सच्चे आन।”

6 फिरी तैने मीं सेइं ज़ोवं, “सब किछ् पूरू भोवं, अवं अलफा ते ओमेगा, पेइलो ते आखरी आई, अवं ट्लिशोरे ज़िन्दगरे पैनेरे नागन मरां मुखत देइलो।

7 जै ज्रीत हासिल केरे, तैए इन चीजां केरो बारस भोलो; ते अव तैसेरो परमेशर भोलो, ते तैन मेरू मट्टू भोलू ।

8 पन डरपोक, विश्वास न केरनेबाले, भिटे, खूनी, बदमाशी केरनेबाले, जैदू केरने बाले, मूरती केरि पूजा केरनेबाले ते सब झूठां केरो हिस्सो तैस समुन्दरे मां मैलेलो जै अग्गी ते गन्धकी सेइ बलतो रहते, ई दुइयोवं मौते ।”

### \*\*\*\*\*

9 फिरी तैन सत स्वर्गदूतेई जैनेई सत आखरी आफतन सेइ भरोरे कटोरे मैनन पुइ उलटावरे धिये, तैन मरां एक्के मीं कां एइतां ज़ोवं, “इरां एई, तीं अव लैडे जै जल्दी गबडे सेइ इला बनानी हिराताई ।”

10 परमेशेरे आत्मा अव अपने कैबू मां कियो ते स्वर्गदूते अव एक्की बड्डे ते उच्चे पहाडे पुइ नेव, ते पवित्र नगर यरूशलेम स्वर्गोरां मरां परमेशेरे करां एइतो हिरव ।

11 परमेशेरी महिमा तैस मां थी, ते तैसेरी लौ बडे कीमती घोड़ां, मतलब बिल्लौरैरे ज़ेरे यशवे बराबर साफ थी ।

12 तैस नगरेरे ज़ेवरे पासन बडी उच्ची दिवार थी, ते तैसेरां 12 दारां ते दारन पुइ 12 स्वर्गदूत धिये; ते तैन पुइ इस्राएली केरे 12 गोत्रां केरां नब्वां लिखोरां धियां ।

13 पूर्वरे पासे ट्लाई दारां, उत्तरेरे पासे ट्लाई दारां, दखिनेरे पासे ट्लाई दारां, ते पश्चिमेरे पासे ट्लाई दारां धियां ।

14 ते नगरेरे दिवारी 12 मुनीयादां थी, ते तैन पुइ गबडेरे 12 प्रेरितां केरां 12 नब्वां लिखोरां धियां ।

15 ते जै मीं सेइ गल्लां केरतो धियो, तैस कां नगर, ते तैसेरे दारन ते तैसेरे दिवारन नापनेरे लेइ अक सोन्नेरो गज्ज धियो ।

16 ते तैस नगरेरे ज़ेवर पास धिये, ते तैसेरी लमबाई चोडाइअरे बराबर थी, ते तैन तैस गज्जे सेइ नगर नापू, त सडे 750 कोस निस्सी, ते तैसेरी लमबाई, ते चौडाई, ते ऊँचाई बराबर थी ।

17 तैसेरां बाद स्वर्गदूते दिवारी ऊँचाई नापी । तैन एन्चरे नापी जेन्चरे मैन्हु चीजां नापतन, ते दिवार 66 मीटर उच्ची निस्सी ।

18 ते ते दिवार कीमती घोड़न सेइ बनोरी थी जैस जो यशव ज़ोतन, नगर खालिस सोन्ने सेइ बनोरू धियू, जैन साफ चमकते शीशेरू ज़ेरू भोए ।

19 ते तैस नगरेरी मुनीयादारे घोड़ हर किसमेरी कीमती घोड़न सेइ सज़ावरी थी, पेइली मुनीयाद यशवेरी दुइयोवं नीलमणेरी टलेइयोवं लालडी, ज़ेवरोवं मरकते,

20 पञ्चोवं गोदेक, शेइयोवं माणिक्ये, सतोवं पीतमणि, अठोवं पेरोजे, नावोवं पुखराजे, दशोवं लहसनिए, यारोवं धूमरकान्त, बारोवं याकूतेरी थी ।

21 ते 12 दारां, 12 मोती केरां धियां, अक-अक दार, एक्की-एक्की मोती सेइ बनोरू धियू, ते नगरेरी सडक साफ शीशेरी ज़ेरि खालिस सोन्नेरी थी ।

22 मीं कोई मन्दर न लाव, किजोकि सर्वशक्तिमान प्रभु-परमेशर, ते गबडू तैडी नगरे मां आए । एल्हेरेलेइ मन्देरी कोई ज़रूरत नई ।

23 ते तैस नगर मां दिहाडो ते चैदनेरे लोअरी ज़रूरत नई, किजोकि परमेशेरे महिमा सेइ तैस मां लौ भोइ रावरीए, ते कने गबडू तैसेरो दीयोए ।

24 ते कौमां-कौमां केरे लोक तैसेरी लोई मां राले, ते धेरतलरे राजे अपनि-अपनि धन दौलत तैस नगरे मां आनेले ।

25 तैस नगरेरां दारां सारे दिहैडी खुल्लां भोलो ते कधी बंद न भोलां । किजोकि तैडी कोई रात न भोली ।

26 दुनियारे लोक दुनियारे कौमां केरि सैरी खूबसूत चीजां ते धन दौलत तैस नगरे मां आनेले ।

27 ते तैस मां कोई भिट्टी चीज़ या गन्दु कम करनेवालो या झूठ बनानेवालो, केन्ची भी तरीके सेइं अन्तर न गालो; पन सिर्फ तैना लोक जैन केरां नंवां गबड़ेर ज़िन्दगरे किताबी मां लिखोरां भोलां ।

## 22

1 फिरी तैने मीं बिल्लौरैरे ज़ेरो अक चमकतो ज़िन्दगरे पैनेरो दरिया हिराव, ज़ै परमेशरैरे ते गबड़ेर तखतै करां निस्तां तैस नगरेरी सड़की तगर मझामेई निसतो थियो ।

2 ते दरियारे इस पासे ते उस पासे, ज़िन्दगरो बुट थियो, तैस मां 12 किसमां केरे फल लगते थियो, ते तै हर महीने फलतो थियो; ते तैस बुटेरे पट्लान सेइं कौमां-कौमां केरे लोक बेज्जोते थी ।

3 फिरी तैड़ी लानत न भोली ते परमेशर ते गबड़ेरो तखत तैस नगर मां भोलो, ते तैसेरे दास तैसेरी सेवा केरेले ।

4 ते तैना परमेशरैरे आमने सामने लाएले, ते परमेशरैरू नवं तैन केरे कुपाए पुड़ लिखोरू भोलू ।

5 ते फिरी रात न भोली, ते तैन दीयो ते दिहाड़ेरी ज़रूरत न भोली, किजोकि प्रभु-परमेशर तैन लौ देलो, ते तैना हमेशा राज़ केरेले ।

### परकाशित 22:18-22

6 फिरी स्वर्गदूते मीं सेइं ज़ोवं, “इना गल्लां विश्वासेरे कावल ते सच्चीन, ते प्रभु ज़ै नेबी केरे आत्मा केरो परमेशर, तैने अपने स्वर्गदूत एल्हेरेलेइ भेज्जे, कि अपने दासन तैना गल्लां ज़ैन केरू जल्दी भोनू ज़रूरीए हिराए ।”

7 “हेर, अवं जल्दी एजने वालोई, परमेशर तैन सेभन बरकत देते ज़ैना इस किताबेरे सन्देशे पुड़ ध्यान देतन ।”

8 अवं तैए यूहन्ना आई, ज़ै इना गल्लां शुन्तो, ते लहतो थियो, ते ज़ैखन मीं शूनू, ते लाऊं, त ज़ै स्वर्गदूत मीं इना गल्लां हिरातो थियो, अवं तैस कां मथ्यो टेकने लाव ।

9 ते तैने मीं सेइं ज़ोवं, “हेर, एरू न केर; किजोकि अवं तेरो, ते तेरे विश्वासी सैथी नेबी ते इस किताबरी गल्लां केरे मन्ने बालां केरो संगी दासाई; परमेशर कां मथ्यो टेक ।”

10 फिरी तैने मीं सेइं ज़ोवं, “इस किताबेरे भविष्यवैनेरे गल्लन केरो भेद छुपेइतां न रख, किजोकि वक्त नेडोए ।

11 ज़ै बुरू केरते, तै बुरू केरतो राए; ते ज़ै भिट्टो, तै भिट्टो बनोरो राए; ते ज़ै धर्मी, तै धर्मी बनोरो राए; ते ज़ै पवित्तर तै पवित्तर बनोरो राए ।”

### परकाशित 22:23-27

12 फिरी प्रभु यीशुए ज़ोवं, “अवं जल्दी एज्जेलो । अवं एज्जी रावरोई ज़ैन लोकेई कियू तैसेरे मुताबिक इनाम देनेरे लेइ या सज़ा देनेरे लेइ ।

13 “अवं अलफा ते ओमेगाई, पेइलो ते आखरी, शुरुआत ते अन्त आई ।”

14 धने तै, ज़ै अपना लिगड़ा धोते, किजोकि तैस ज़िन्दगरे बुटे कां एजनेरो अधिकार मैलनोए, ते तै दारां केरे बत्तां गेइतां नगर मां दाखल भोलो ।

15 पन कुतरां, जैदू करनेवाले, बदमाशी करनेवाले, खून करनेवाले, मूरती केरि पूजा करनेवाले, हर कोई झूठेरो चाने वालो, ते कने झूठ बनानेवालो बेइर राले ।

16 “मीं यीशुए अपने स्वर्गदूत एल्हेरेलेइ भेज्जे, कि तुसन अगर कलीसिया मां इन गल्लां केरे बारे मां गवाही दे, अवं दाऊदेरू ज़ील, वंश, ते झेइरो चमकतो तारोई ।”

17 परमेशरैरी आत्मा ते गबड़ेरी लाड़ी यीशु सेइं ज़ोतिन, “तू ज़रूर एई!” ते शुने बाले भी ज़ोन, “एई!” ज़ै टलिशोरो भोए, तै एज्जे ते ज़ै कोई चाए पानी ने ज़ैन मुफ्ते मां ज़िन्दगी देते ।

### परकाशित 22:28

18 अवं हेर एक्की ज़ै इस किताबरी भविष्यवैनेरी गल्लां शुनते गवाही देताई, कि अगर कोई मैन्हु इन गल्लन मरां किछ् बधाए, त परमेशर तैना आफतन ज़ैना इस किताबी मां लिखोरिन, तैस देलो ।

19 ते अगर कोई इस भविष्यवैनरी किताबरी किछ् गल्लां कढे, त परमेशर तैस ज़िन्दगरे बुटे ते पवित्र नगर मरां ज़ेसेरे बारे मां इस किताबी मांए, तैसेरो हिस्सो कढेलो ।

20 ज़े इन गल्लां केरि गवाही देते, तै इन ज़ोते, “हाँ अवं जल्दी एजने बालोई ।” आमीन । हे प्रभु यीशु एई!

21 प्रभु यीशुएरो अनुग्रह परमेशरेरे लोकन सेइं साथी राए । आमीन ।